




SC. 7 P1 5.





MAG 3077



HISTORIA PATRIARCHARUM ALEXANDRINORUM JACOBITARUM

A D. MARCO USQUE AD FINEM SÆCULI XIII.

CUM CATALOGO SEQUENTIUM PATRIARCHARUM
& collectaneis Historicis ad ultima tempora spectantibus.

INSERUNTUR MULTA AD RES ECCLESIASTICAS
Jacobitarum Patriarchatûs Antiocheni, Æthiopiz, Nubiæ & Armeniæ
pertinentia.

ACCEDIT EPITOME HISTORIÆ MUHAMEDANÆ
ad illustrandas res Ægyptiacas.

*Omnia collecta ex Autoribus Arabicis, Severo Episcopo Aschmonina, Michaelæ
Episcopo Tancoes, Ephraem filio Zaraa, Abulbircas & aliis anonymis : æum
ex editis Eutychio, Elmacino, Abulfaragio, Chronico Orientali, diversif-
que Historia Muhamedana Scriptoris Arabicis & Persicis.*




PARISIIS,
Apud FRANCISCUM FOURNIER, viâ sancti Jacobi ad insigne
Scuti Urbis.

M DCC XIII.
CUM APPROBATIONE ET PRIVILEGIO REGIS,

C. 64

C. 44



C O S M O I I I . MAGNO DUCI ETRURIÆ.

EU SEBIUS RENAUDOTIUS S. P. D.

QUANTUM artium liberalium aut scientiarum studia Græcis debeant, ex quorum libris depulsâ barbarie, eruditionis omnis, tanquam ex uberrimis fontibus, copia in Europam manavit, nemo literis humanioribus, vel leviter imbutus ignorat. Qui porro Græcorum librorum, magistrorumque cognitionem Florentinis, maximeque Mediceis Principibus debere se nesciat, is in historia non minus, quam in politiori literatura, hospes esse judicandus est. Illorum enim munificentia ingens rarissimorum & quibus omnes disciplina continentur scriptorum numerus, ex Græcia incendiis servatus est, totque exules veteribus Athenis digni, eorum liberalitate sustentati, quæ sola bona secum detulerant, ea hospitibus, & per illos toti Europæ communicaverunt. Sed hac satis nota: obscurius omnino, quod ut Græcæ, ita Orientales literæ Florentinis quoque & Mediceis Principibus non minus debent, quod apud nos coli & propagari cæptæ sunt, quâ tamen eos laude

carere minimè oportebat. Cum enim pauca admodum & exigui pretii in Arabica Syriacæque literatura aliis in Europa regionibus edita forent, prodierunt Avicennæ opera, Euclides cum Nasfiredini commentariis, Geographia, Grammaticæ, Evangelia, tum multi ad Officia Ecclesiastica pertinentes libri, typos subministrante ipsis Romanis Pontificibus, insigni, & quæ parem huc usque non habuit, Typographiâ Medicæ. Quales porro & quàm peritos Orientalium linguarum oporteat illos fuisse qui talibus editionibus præfuerunt, sciunt qui his studiis operam dedere: reliqui non satis intelligunt. Nam qui superiori sæculo in illis literis excolendis laborare ceperunt, magnum se fecisse quidpiam arbitrati sunt quòd edita à Florentinis opuscula Arabica recuderunt, quòd proverbiosa interpretati sunt, sæpe parum feliciter, quòd Grammaticas ediderunt, quo nomine laudandi sunt, nec tamen cum magnis illis viris qui Medicorum Principum auspiciis eas literas promoverunt, comparandi. Quippe spissum Avicennæ operum corpus, ex MSS. codicibus transferre, majoris omnino operæ fuit, quam aliquot ex iisdem libris lacinias longis commentariis oneratas cum jactantia publicare. Eos sanè quibus tales editiones debemus, non modò Arabismi peritissimos fuisse quisque agnoscit, sed rerum etiam Orientalium, quod de aliis qui ex eorum laboribus profecerunt, dici non potest. Talis erat Joannes Baptista Raimundus Medicorum alumnus, qui Romæ auspiciis Ferdinandi Cardinalis, postea magni Ducis Etruriæ, per annos multos domi ejus cum aliis aliquot Orientalium linguarum peritissimis, quorum omnium ejus domus erat liberalis alumna, strenuè laboravit. Ejus & sociorum studio characterum omnium Orientalium typi tam accurati, tam elegantes, tam curiosam illam *ἔκδοξιν* exprimentes formati sunt, nihil ut hoc in genere possit esse perfectius. Ab eo doctissimorum virorum Collegio multa ad communem Ecclesiæ utilitatem præstita sunt: Evangeliorum Arabico-rum excusa exemplaria tria millia: quorum magna pars in Orien-

tem missa & Christianis distributa: multi quoque alii libri variis linguis editi, cum Gregorius XIII. Orientalibus juvandis & instituendis incumberet, sed Medicei Principes totum in se suosque laboris & impensa onus recepissent. Nam præter eos sumtus qui Romæ fiebant, ut esset paratius ex Typographia Medicea subsidium, inelytus ille Cardinalis Ferdinandus, quò Apostolicæ Sedis negotium ageret, in varias Orientis partes ornatissimos statim viros emisit qui omnis generis disciplinarum libros, & dissimili earum nationum idiomate conscriptos diligenter pervestigarent. Omnium verò linguarum Grammaticæ paratæ erant aliaque literaria subsidia: tum ingens opus editionis Bibliorum, sex principalibus Orientis linguis; quod iniquitate temporum, etsi lucem non aspexit, at immortalem Mediceo nomini gloriam comparavit. Testes enim constantis & proluxæ de Ecclesia deque literis benemerendi voluntatis supersunt adhuc typi illi limatissimi, qui in Gaza veteris Palatii servantur, ut multa alia tam insignium laborum monumenta. Dolendum tamen quòd tot vigiliarum majorumque tuorum munificentiae fructu, qui uberrimus fuisset, Respublica Christiana caruerit, nec minùs quòd tantorum virorum memoria tali oblivione sepulta sit, ut honorem qui Orientalium linguarum in Europa restauratoribus debebatur, alii ad se transtulerint.

Nam illorum qui Florentiâ in Orientem profecti, magnam rarissimorum librorum Orientalium qui in Bibliotheca tua conservantur copiam collegerunt, quis meminit? Fuerunt tamen præter eos quorum nomina ignorantur, bis literis eruditissimi Joannes Baptista Vecchiectus & Hieronymus ejus frater Florentini, scilicet ille præsertim: supersunt plures Manuscripti codices, qui illius quondam fuerunt, Arabici & Persici, ex quibus eum in utraque illa lingua majores quàm Europæus ante illum quisquam progressus fecisse demonstratur. Insignis est præ cæteris Codex Persicæ Psal-

J. Bapt.
Ramun-
dus Ep.
ad Pau-
lum V.

morum ex Hebræo versionis , de qua iudicium ultimis foliis ad-
 jecit suum , ex quo intelligere licet , non cum modò vulgaris tunc
 linguæ , sed veteris etiam , stylique illius reconditoris poetarum ,
 peritissimum fuisse , quòd etiam notæ plures codicibus adjunctæ
 palam faciunt. Exstant quoque alii codices Julii Acarisi Equitis
 Hierosolymitani manu , tam eleganter & eruditè scripti , ex eorum
 numero quos Arabes ipsi & Persæ nisi literatissimi vix intelli-
 gunt , quique summam illius eruditionem demonstrant. Multos
 etiam Ursini Lansfredini chirographo notatos reperi in nostris Bi-
 bliothecis , & in instructissima DUX SERENISSIME , Palatina tua ,
 quam anno 1701. Roma rediens cum Florentiæ substitissem , quo-
 ties vellem adire permisisti. Cum igitur ex libris Orientalibus
 quorum ditissima est , multa quæ ad institutum ante aliquot annos
 opus conferebant didicerim , partem illius quæ Alexandrinæ Ec-
 clesiæ historiam complectitur , ut tuo nomini dicarem , non officii
 modò mei , sed æquitatis ratio postulabat. Ita enim quod ab homi-
 ne humili & privato , qualis ego sum , præstari solum poterat ,
 extabit consignata literarum monumentis , istius & aliorum , quæ
 in me amplissima contulisti , beneficiorum memoria , simulque grati
 erga majores tuos , & Florentinos , qui illorum opibus , politioris
 omnis literaturæ , etiam Orientalis , restitutores fuerunt , animi mei
 testimonium.

Mihi sane Florentiæ , idem quod veteribus illis Romanis acci-
 dit , qui Athenis cum essent , & ea loca viderent , in quibus memo-
 riâ dignos viros acciperent multum esse versatos , movebat eos tan-
 torum nominum recordatio. Ita mihi tot illustrium Græcorum ,
 quos majores tui à Turcica servitute & inopia , simulque Euro-
 pam à barbarie qua obsidebatur liberarunt , nec minus tot eximio-
 rum virorum quos illi discipulos habuerunt , reliqua Europa ma-
 gistros in mentem veniebat. Sed multo magis recurrebat animo ,
 Cosmi Patris Patriæ , Petri Laurentii & tot aliorum nunquam

intermoritura memoria, cum quacumque ingrederer, in aliqua, magnificentiâ, liberalitatis, pietatis illorum monumenta vestigium ponerem, præsertim cum Laurentianam Bibliothecam & Palatinam frequentarem. De illis cum me referentem audires, quod quotidie, quæ summa tua benignitas erat, factitabas, mirabiliter affici mihi videbare majorum tuorum laudibus, & virorum illustrium, qui patriam literis ornaverunt & qui multos imitatores habuerunt. Ut enim eos quorum recentior memoria est solos commemorem, Francisco Redio quis nostra ætate doctior? Quanta in eo fuit politiorum literarum ubertas, cum summa rerum naturalium novorumque experimentorum facultate conjuncta! Carolus Datus, Laurentius Magalottus, & alii à quibus præclarissima illa observationes physica prodierunt, non minus acri judicio summaque veteris & novæ Philosophiæ peritiâ, quam ingenii & eruditionis laude floruerunt. Alfonsus Borellus, Bartolomæus Vivianus, pares in Mathematicis disciplinis vix habuerunt. Vix à multis annis autor aliquis Græcus editus est, qui non ex Codicibus Medicis melior & emendatior prodierit, nec sine laudibus Florentinorum tuorum, præsertim Antonii Magliabecchi omnibus eruditissimis. Mitto eos qui munificentiam tuam vere Regiam experti sunt, etiam externos, ut non ita pridem magnum purpuræ Romanæ lumen Henricus Cardinalis Norisius, ad quam ex Pisana tua Academia evectus est.


Itaque in te PRINCEPS, SERENISSIME avitam illam de literatis & doctrina præstantibus viris benemerendi voluntatem agnoscimus, non minus quam reliquas majorum tuorum virtutes omnes. Illi magnitudine animi, fortitudine militari, constantiâque in laboribus & periculis effecerunt, ut agitata diu civilibus discordiis Respublica, sub uno principe conquiesceret: tu prudentiâ benignitateque, verus Pater Patriæ opes & potentiam in publicâ commoda ita impendisti, ut in superiorum, & in ultimi hujus funestissimi

belli tempestatibus, Etruria prope sola pacata & secunda quieverit. Illam ut incliti Majores tui opibus, artibus, ædificiorum splendore omnibusque ornamentis affluentem tibi reliquerunt, tu non minus ut felix, florentissimaque pace, justitiâ & pietate foras, laborasti. Tuam enim potestatem ad Dei cultum maxime dilatandum, ita majestati ejus famulam fecisti, ut opes non ad luxum insanasque substructiones; sed ad templa, monasteria, domos excipiendis pauperibus & peregrinis, vias muniendas, in publicam denique utilitatem impendere solitus sis. Ita dum tuos ad perfectam vitæ Monasticæ observationem excitare satagis, strictioris Observantia Franciscanos ex Hispania, Cistercienses ex Gallia nostra accersivisti, quibus amplissimas aedes fundasti & instruxisti, ut Ambrosianam, & nuper Boni Solatii. Illic oblectamenta tua sunt, & sanctæ deliciæ, dum novæ illius sobolis Religiosa à te adoptatæ colloquiis animum pascis, nec exemplo minus quam beneficiis & paterna caritate pios Ascetas ad tuendam instituti sui sanctitatem provocas.

Sciunt omnes quàm difficile sit viro Principi non efferre se in potestate; non se præferre aliis propter abundantiam fortunæ, ut opes & copia, non superbia videantur, sed bonitati ac magnificentiæ facultatem & materiam dedisse: placabilitatem & clementiam ita temperare, ut emendatrices vitiorum, commendatricesque virtutum leges religiosè observentur: negotiis districtum officia ita partiri, ut pietatis Christianæ exercitationes curam salutis publicæ non interpellent. Hæc tua laus propria est PRINCEPS SERENISSIME quam auditione dudum perceptam admiratus, præsens famâ majorem esse cognovi. Diu igitur vivas, valeas, & regnes, magno Etruriæ bono, raro inter Christianos Principes exemplo, & hoc qualescumque observantiæ testimonium benignè suscipe.

Lutetiæ Parisiorum 17. Julii 1713.

IN HISTORIAM



IN HISTORIAM PATRIARCHARUM
ALEXANDRIÆ JACOBITARUM.

[P R Æ F A T I O .

Institutam à me ante annos multos Epitomen Historiæ Patriarcharum Alexandrinorum Jacobitarum, ut tandem publicarem, doctissimorum virorum qui nonnulla illius viderant, & probaverant compulsi auctoritas. Cum enim ad eorum temporum, quæ Muhametano Imperio vetustiora sunt historiam illustrandam, nullum ex Arabicis libris comparari possit subsidium; eorum verò quæ sub novis dominis successerunt, partes sint duæ, una quæ Græcam Ecclesiam spectat, altera quæ Jacobiticam; istam Græci scriptores penitus neglexerint & ignoraverint, non minùs quàm priorem qui Arabicè scripserunt; unde corpus historiæ qualecumque formari posset, non suppetebat. Igitur ea duntaxat quæ ad Jacobitas spectabant colligere nobis propositum fuit, cum vel ea sola pars, Græcis Latinisque scriptoribus prorsus intacta, multa scitu dignissima contineat, & non modò ad Ecclesiasticam historiam, sed ad fidem mores & instituta Orientalium cognoscenda plurimùm lucis afferat. In illa porrò explicanda, non inutiliter operam impendi, vel ea sola ratione constat, quod paucissimos autores qui huc usque Latine prodierunt, Etmacinum, Chronicon Orientale, Eutyechium & Abulfaragium, legunt cruditi omnes, eorumque non rarò

Operis con-
silium.

P R Æ F A T I O.

testimoniis utuntur, quamvis exiguo, aut prope nullo operæ pretio: tandemque vir doctissimus Daniel Papebrochius specimen ejusdem historię aggressus est, quod ab ejus sodalibus, non mediocri labore perfectum Tomo V. Junii Bollandiani præmissum est. Cum igitur plura longè & certiora ex variis autoribus collegissemus, quæ, si non totius Ecclesiæ Alexandrinæ, saltem partis illius, quæ per Dioscorum & ejus successores à matre Catholica avulsa est, historiam illustrarent, ea in medium conferre, viris doctis qui Orientalia studia non excoluerunt profutura fortassis, tandem oportuit. Priusquam vero consilii nostri ratio explicetur, pauca quæ ad historicorum Orientalium, præsertim Christianorum, notitiam necessaria sunt, præfabimur.

De Historicis
Orientalibus
qui editi sunt
judicium.

Statim porro libenter agnoscimus, quas huc usque habemus historias Orientales typis editas, eas esse ejusmodi, ut legantur à paucissimis, à plerisque contemnantur nec immerito; nullus ut inde, vel saltem exiguus ad eruditos huc usque fructus pervenerit. Hinc factum est ut ex paucis illis libris, qui Orientalem historiam continent, plurimi judicaverint, vix quidquam utilitatis capi posse, quæ acerbior sententia, communis multorum gravissimorum hominum fuit. Neque est quod accusemus eos magis, quàm ipsos talium librorum editores & interpretes, qui vel in illis laudandis modum non tenuerunt, ut commendabiliores eos facerent: vel in interpretando ita versati sunt, ut essent lectoribus, præsertim linguarum Orientalium imperitis, planè inutiles: multò minùs excusandi, qui ex talibus autoribus historiam Ecclesiasticam reformare aggressi sunt, aut novarum opinionum portenta confirmare, ut Presby-

P R Æ F A T I O.

teralem ἀναρχίας, Seldenus ex Eutychio stabilire conatus est.

Primum hujus generis opus quod Arabicè Latinèque prodierit, historia Saracenica fuit, quam Thomas Erpenius, cui literæ Arabicæ multum debent, Latinè interpretatus est : editio utrâque linguâ post ejus mortem prodiiit anno 1620. sed ex mutilo codice : Autor quippe Georgius filius Hamdæ, vulgò Elmacinus dictus, historiam contexuerat à creatione mundi, ad sua usque tempora: Erpenius eam tantum partem viderat quæ Muhamedanas res complectitur; primam prorsus ignoraverat, quæ magis tamen ad res Ecclesiasticas spectabat, ut tertiam, quæ res sua ætate præsertim cum Francis gestas, & Salaheddini imperium in Ægypto & Syria stabilitum, usque ad Mamalucos Turcas, complexus erat. In secunda cujus versionem dedit, pauca occurrunt, non contemnenda tamen, de Alexandrinorum & Antiochenorum Patriarcharum successione: sed vir Arabicè doctissimus cum stilum Ecclesiasticum prorsus ignoraret, utereturque codice non admodum accuratè scripto, prope semper, nihil minùs quàm quod Arabicè autor scripserat, Latinè expressit. Nec fœlicius aliquando Elmacinum interpretatus est nostrâ linguâ, Vir cæteroqui Arabicè doctissimus, qui Latinam potiùs versionem secutus videtur, quàm Arabica autoris verba: cum præterea, nomina propria, singulari & quæ nemo alius, formâ expresse, in qua Arabibus ipsis fuerit divinandum. Ejusdem generis est Anglicana versio quæ Latinam prorsus sequitur.

Anno 1642. edidit Joannes Seldenus fragmentum brevissimum, ex quo Eutychii Patriarchæ Melchitarum Ale-

De historia
Elmacini.

Purchaf. T. 9.
De Eutychio,
Abulfaragio,
&c.

ẽ ij

P R Æ F A T I O.

xandrini historia innotescere primùm cœpit; quo frag-
 mento nihil aliud quàm fabula de ordinatione Patriar-
 charum Alexandrinorum à solis Presbyteris, & absurda
 quædam alia continebantur, pessimè interpretata, & pro-
 lixo commentario exornata, nempe ut Presbyterianæ in
 Anglia conspirationi, vir seditiosus, ex ultimo Orien-
 te præsidium accerferet. Integram post annos sexde-
 cim, scilicet an. 1658. Eutychie historiae versionem cum
 Arabico contextu, edidit Edwardus Pocockius: &
 anno demum 1663. Abulfaragii historiam Dynastia-
 rum Latine pariter & Arabicè. In nostra Gallia dum
 insigne illud Byzantinæ historiae corpus sub prælo es-
 set, symbolam suam contulit Abrahamus Echellensis
 Maronita, edito Chronico Orientali, quod Benarrahe-
 bo cuidam tribuit, sed Latine duntaxat. Atque hi li-
 bri sunt ex quibus. huc usque explicata apud nos fuit
 Orientalis historia, imperfectè prorsus & exiliter, ma-
 ximè si res Ecclesiasticas attendimus, quarum major
 Christianis, quàm Muhamedanarum cura esse debet.
 Elmacinus quippe cursim & quasi aliud agens, Alexan-
 drinorum Patriarcharum sectæ Jacobiticæ quam seque-
 batur, nomina recenset, res ab illis gestas vix delibat.
 Eutychie circa primorum Ecclesiæ sæculorum histo-
 riam indiligentissimus, ex mala aliqua Græca, Arabi-
 cam fecit non bonam, cum, si paucissima quædam ex-
 cipiuntur ad Concilium VI. spectantia, in reliquis Acta
 nulla consuluisse videatur. In Orientali Chronico quod
 Abraham Echellensis edidit, occurrit saltem accurata
 fatis Jacobitarum Alexandrinorum Patriarcharum enu-
 meratio, sed ex qua sola, illius Ecclesiæ forma, rerum-
 que in ea gestarum series agnosci vix queunt. De Miel

P R E F A T I O.

chitis nihil habet, ut Jacobitarum Eutychius vix meminit. Abulfaragius abiit in alia omnia, cum non historiam Ecclesiasticam, sed politicam potius principum Muhamedanorum & Tartarorum scripserit. Igitur cum necessariis praesidiis destituerentur homines nostri, eos in Orientalis Ecclesiae historia, parum aut nihil praestitisse mirum esse nemini debet. Non alios tamen autores viderunt Protestantes eruditi in quos reliqui dudum est cum ora obvertunt sua, ut Seldenus, Hottingerus, & qui eos exscribere satis multi Disputationum Historico-Theologicarum scriptores, quorum saepe autoritas Catholicis objicitur, quamvis inter eos qui aliqua reconditorum literarum opinione floruerunt, ne unus quidem extiterit, à quo nativum quidquam ex Arabicis Syriacisve libris productum fuerit, quod ad res Orientalium Ecclesiasticas illustrandas prodesse posset. De aliis autoribus qui editi non sunt jam dicendum est.

Esse sanè plurimos qui Orientalem historiam tractaverunt notissimum est, cum inter ea quibus Arabica & Persica studia commendari potissimum solent, non postremum locum teneat ingens historicorum numerus. Nec negamus res à Muhamedanis gestas, aliunde sciri vix posse, cum Graeci Latiniq; etiam melioris notæ scriptores eas tam obscurè, & inscitè tradiderint, ut quæ foret illius Reipublicæ forma, qui mores, quæ familiarum successio, eos plerumque ignorasse manifestum sit. Ipsos igitur Muhamedanos in patria sua historia audiri præ cæteris oportet, ita tamen ut ante Pseudo-Prophetæ sui initia, non major illis fides, quàm ineptissimis quibuscumque fabulatoribus habeatur. Nam qui veterum Arabum, aut antiquissimorum Persæ Re-

De historicis
ineditis.

P R Æ F A T I O.

gum memorias complexi sunt scriptores innumeri , præter fabulas , easque absurdissimas nihil habent : tum Critices & Chronologiæ auxiliis necessariis destituti , ne veteres suorum nãtias retexant religione tenentur , si immane quidpiam contra temporum rationem , etiam sacris Scripturis consignatam in Alcorano occurrat. Itaque Mariam virginem , sororem Moïsis & Aaron , Muhamedanus quisque credere debet , quod ita scripserit nebulo idiota & illiteratus , ut meritò testatur ipse de se , quidquid recentissimi Commentatores in contrarium scripserint ; quos secuti sunt nonnulli , ne scilicet difficultum nugarum periret autoritas. Neque minor anilium fabellarum ex apocryphis translatarum futilitas est , quarum plenæ sunt non Muhamedanorum modò , sed Christianorum historiæ. Nam pleraque illa puerilia miracula quæ Alcoranus Christo attribuit , petita sunt ex libro de Infantia Salvatoris , quem Arabicè vidimus : ex Evangeliiis falsò inscriptis Petri & aliorum , præsertim Thomæ , quo Manichæi utebantur , narrationes aliquot translatae sunt à Mari Salomonis filio & Amrou filio Mathæi in historia Catholicorum , seu Patriarcharum sectæ Nestorianæ , ut frivola multa alia ex antiquis autoribus apocryphis aut interpolatis.

Fabularum
communis
thesaurus.

Fuisse scilicet ante annos mille ducentos & amplius intelligimus apothecam , ut ita dicamus quamdam , aut commune ærarium unde Judæi , Christiani , & Muhamedani fabulas depromerent quibus veræ historiæ puritas corrumperetur. Quippe multa *antiqua* , quæ ad vetus Testamentum spectant , aut ad extrema Judaicæ Reipublicæ tempora , reperiuntur in Capitulis Rabbi Eliezer , in *Agadoth* , seu historicis narrationibus quibus

P R Æ F A T I O .

passim amplissimi Talmudicorum Pandectæ respersi sunt, ut in vetustioribus commentariis allegoricis qui *Rabbot* appellantur. Illic etiam non paucas veteris historię Græcæ lacinias observare licet, quæ diversis modis interpolatæ leguntur apud Arabes & Persas historicos, sumtæ scilicet ex Græcis sequioris ævi scriptoribus, qui veterem historiam ubique contaminaverunt : magnum quid se fecisse arbitrati, si incredibilia potius quàm vera narrarent. Ita quidquid Pseudo-Callistenes & alii autores sordidissimi de rebus Alexandri scripserunt, de Neftenabone, de itinere ad fontem vitæ, de congressu cum Brachmanibus, & si quæ sunt alia portentosa & miracula plena summæ futilitatis, ea omnia apud Judæos, Arabes, Græcosque recentiores extant : quod multis exemplis probari facile posset, etiam ex autoribus qui à nugacitate videntur abesse longissimè. Nam ut in uno specimine conquiescamus, Makrizius qui ante annos circiter quadringentos res Ægyptiacas commentariis non pœnitendis illustravit, ne unius quidem urbis meminit, cujus conditorem non statim appellet : obscurum scilicet aliquem heroa, Mesraimi filium, nepotem, aut abnepotem, sed cujus nomen frustra alibi quam apud Arabes quisquam quærat : de antiquis Ægypti Regibus ne syllaba quidem occurrit : omnia Salomoni, vel Alexandro tribuuntur. Sic igitur habendum est, nullum ad veteris ante Muhamedem historię illustrationem ab Arabicis, aut Persicis, multò minùs à Turcicis scriptoribus auxilium expectari oportere. An aliquid in Ecclesiastica historia laudem dignum præstiterint, jam est disquirendum.

Eorum libros editos hoc est Elmacinum, Eutyrium, Quil in his
tota Arabes

P R Æ F A T I O.

scriptores
præstiterunt.

Abulfaragium & Chronicon Orientale qui viderit ; non omnino temerè poterit de ineditis judicare. Neque enim si qui forte meliores aut uberiores sunt , arte historica , rerum delectu , autorum limato jūdicio , accuratiori rerum quæ narrantur examine , aut dote ulla alia quæ in historico requiritur , autores illos superant quorum libri sunt in omnium manibus. Non soli autem Christiani eo vitio tenentur , commune enim Orientalibus omnibus historicis illud est , neque suspicari quicquam debet eloquentiam , si quæ est apud Arabes aut Persas , solis Muhamedanis patuisse , qua Christiani caruerint. Habuerunt isti scriptores , qui Arabicæ linguæ elegantia , alios æquaverunt , ut illi præsertim qui in Mesopotamia , & Iraca floruerunt : præ cæteris Nestoriani , adeo ut inter specimina purioris Arabismi hominæ non nullorum Catholicorum propositæ fuerint , ut à Golio ea , quam de Nativitate Christi Domini scripsit Elias , Nestorianæ sectæ Catholicus. In ea scilicet potissimum viguit stilius ille floridus , quo maxime Arabes delectantur , quemque reliqui Christiani videntur neglexisse , ut accuratius de fidei mysteriis loquerentur & scriberent. Verum historicus apud Arabes & Persas laudem & famam præ cæteris consequitur , quicumque illis , quos ut historiam scribendi magistros , Græci , Latini , omnes tandem admirantur , dissimillimus est. Incipit vulgo à Dei laudibus in quibus amplificandis talis est hominum illorum impia religio , ut non modo illas seriis & alicujus bonæ frugis operibus præmittere soleant ; verum etiam in ludicris , aut turpitudine plenis ; quas postea in Prophetam suum verbosissime congerunt. Neque alia est apud eos historiam inchoandi methodus ,

P R Æ F A T I O.

methodus, quæ quibuscumque libris communis est. Mox ubi ad rem ventum est, ampullatis verbis, & quidem multis pauca dicuntur, stilo illo qui constat abstrusissimis & rarioribus vocibus minutatim per *ὀμοιωματα*, concisis, quo mirificè afficiuntur. Talis Hamadeddin Is-pahanensis in historia Salaheddini, & qui Timuris res gestas descripsit, Arabscha, ut complures alii: si Poëticam autor excoluit, sæpe narrationis filum, ut carmina sua vel aliena ingerat, abrumpere solet, quæ raro ad rem pertinent. Vulgò non alium quàm temporum ordinem sequuntur, veterum nostrorum Chronicorum more. Res Christianas vix attingunt, nisi bella cum Imperatoribus gesta, & ea præsertim quæ expeditionis sacræ causâ pugnata sunt in quibus describendis multi sunt diligenter versati, adeoque non modò cum fructu leguntur: verùm absque illorum subsidio, vera rerum illarum historia haberi vix potest, cùm autores Gestorum Dei per Francos, quamvis reliquos sui temporis antecellant, familias Orientales, dominorum mutationes, leges, religionem & multa alia Muhamedanis propria, non satis explicaverint. Solus prope Makrizius in Ægypto describenda multa de Patriarcharum successione scripsit: nec pauca de Ecclesiis & Monasteriis, sua ætate conservatis, quæ non faciliè alibi reperiantur.

Christiana historia, non meliori apud Arabes, quàm secularis conditione fuit: nam in ea primus propemodum habitus est. Eutychius, & cum exscripserunt plerique, præterquam illis in rebus, quæ secundum sectarum diversitatem, aliter ab Orthodoxis, aliter ab Hæreticis tractatæ fuerant. Porro cùm liber Latine dudum exstet, jamque multis eruditorum sententiis judicatum

De Scrip-toribus Arabicis historię Ecclesiasticę. Eutychius.

P R Æ F A T I O.

fit, nullam in rebus antiquis esse illius auctoritatem, pauci erunt omnino qui communi illi iudicio non ad-
quiescendum potius existiment, quàm Hottingeri, Sel-
deni, Pocockii, & aliorum contrariæ opinioni. Sufficiat
ad tuendam auctoris famam, quòd res Muhamedanas
satis accuratè retulerit, quo nomine laudatus olim fuit
à Willelmo Tyrio: at antiqua Græca monumenta vix
cum consuluisse, aut id negligenter admodum præsti-
tisse certissimum est: & quæ ad Jacobiticam sectam per-
tinent aut ad Nestorianam, neglexisse vel ignorasse.

Elmacinus.

Elmacini historię prima pars nondum edita, ex Eu-
rychio contracta est, adhibitis tamen paucis aliis histo-
ricis præsertim Episcopo Menbigeni sive Hierapoli-
tano, quem alicubi ab aliis nominatum legimus, sed de
eo plura non suppetunt. Quisquis porò ille fuerit,
Eurychio postponendus est, ut ætate inferior, fuit. In
ea verò parte quæ Jacobiticam sectam propius attingit,
ut est narratio rerum in Calchedonenâ Concilio gesta-
rum, Elmacinus, qui eam profitebatur, relicto Eury-
chio, communem suæ Ecclesiæ traditionem secutus est,
& in aliis usque ad Arabum tyrannidem vitas Patriar-
charum Alexandrinorum, quorum sæpius in secunda sua
parte meminit. Quam parum autem ex ea profecerint
qui eam legerunt, aut qui ex ea historiam Alexandrinæ
Ecclesiæ contexere aggressi sunt, multis clarissimis ar-
gumentis fiet manifestum.

**Chronicon
Orientalis.**

Ex eadem Patriarcharum historia depromsit quid-
quid de illis habet autor Chronici Orientalis ab Echel-
leni Latine tantum editi: & de quo judicare difficile
est, cum Arabicè à nemine visus huc usque fuerit, nec
ejus titulus occurrat in amplissimis catalogis. *Ebnrabeb,*

P R Æ F A T I O.

feu *Benalrahbum*, autorem vocatum fuisse conjicit Echellensis; nam nomen in ejus codice non exstabat: illud sufficit, expressum esse satis fideliter ex majori illa quam diximus historia; sed cum illud interpret sine notis, quæ summè necessariæ erant ediderit, non magna inde lux affulsit obscurissimæ historiæ.

Igitur cum his solis prædiis instructi desperaremus prorsus materiam historicam, quantum opus erat ad successionem Patriarchalem Jacobitarum, posse colligi, nacti sumus ex insigni ditissimaque Codicum Orientalium, aliorumque cujuslibet facultatis aut linguæ, Bibliothecâ Regiâ Historiam illam Patriarcharum, ex qua fluxisse certum videbatur quidquid Elmacinus & alii de Alexandrinis Christianianorum rebus scripserant. Liber est majori forma duobus voluminibus distinctus, scriptus ante annos circiter quadringentos eleganti & perita manu, quodque singulare est, eâ ipsâ quâ scriptus fuit codex integerrimus & optimus Collectionis Canonum Arabicæ Jacobitarum in Bibliotheca Seguieriana. Partem aliquam illius operis habuit Stephanus le Moine *Variarum Sacrorum* autor, ut olim cum Lutetiam venisset, inde ad Batavos profecturus, mihi retulit: qualis verò foret dicere non potuit. Mirum porro eum qui in sua illa collectione, tam libenter eruditionis Orientalis lumina chartis suis illinere solet, ne minimam quidem istius historiæ, unde multa instituto suo convenientiâ petere poterat, mentionem fecisse. Habuerat quoque librum eundem Echellensis, ex Bibliothecis Italiæ, nam utitur ejus testimoniis adversus Seldenum in Eutychio vindicato. Regius Codex Gilberti Gaulmini quondam fuit libellorum supplicum Magistrî, viri harum lingua-

Severi histo-
ria Patriar-
charum Ale-
xandrinorum.

P R Æ F A T I O.

rum peritissimi, cujus Bibliothecam optimis Orientalibus libris refertam, cui literæ plurimum debent, Vir Clarissimus Joannes Baptista Colbertus, ut in Regiam transferretur, curaverat.

Ea potissimum
in sumus.

Illam tandem historiam ut in manus sumimus intelleximus ex ea colligi posse magis accuratam rerum Ægyptiacarum Christianarum notitiam quàm ex editis quibuscumque. Ita post diligentem illius libri lectionem, agnoscere facile fuit, multa ex eo ad Ecclesiæ utilitatem posse decerpi, quæ huc usque obscurissima fuerant: atque adeo de illius integra versione videbatur cogitandum. Eam exspectabant qui de Orientalibus Scriptoris ita judicabant, ut Græcis inferioris ævi similes existimarent, aut saltem barbaris illis nostris Chronographis, qui licet virtutibus omnibus historicis destituti, fide & simplicitate commendantur. Sed qui Eutyechium aut Abulfaragium, eximios Arabum judicio historicos legerunt, intelligent procul dubio, quàm inutiliter labor tristissimus suscipiatur interpretandi, auctores quos absque perpetuis commentariis, etiam cum versione intelligere rerum Orientalium imperitus nemo possit. Quotus enim quisque est qui ex Elmacino Latine loquente, vel mediocrem Orientalis historiæ notitiam hauserit: aut ex Eutychio Alexandrinæ Ecclesiæ mutationes, strages, formam denique quam sub Infidelibus Imperatoribus, recepit, hæreses novas, si quæ fuerunt, aut peccata contra disciplinam varia, didicerit? Hæc autem omnino melius intelliguntur ex ea quam damus historiâ, sed eam tamen totam interpretari, non visum est operæ pretium.

Per integram
versionem sumus.

In prima parte scilicet quamvis Severus Aschmo-

P R Æ F A T I O.

ninæ Episcopus, monumenta quæ Græcè & Copticè ^{elipere non est visum.} extabant in Monasterio S. Macarii se consuluisse testatur, vix quidquam tamen circa primorum Patriarcharum historiam refert quod primævæ antiquitatis colorem habeat: imò Acta Græca, si quidem ulla consuluit, (neque enim ullo vel levissimo indicio animadvertitur, illum Græcè scivisse) ea erant quæ, iudice Bollandò & Papebrochio viris gravissimis, non sincera, sed interpolata esse constabat. Eusebii historiam Ecclesiasticam, aut librum de Martyribus Palestinæ vidisse eum, vix credibile est. Itaque ex longo & rædii plenissimo labore non aliud respublica Christiana fructum tulisset, nisi quod nugæ meras, & fabularum cumulum Græcis & Latinis quæ jam diu exploræ sunt, adjecissemus. In tactas illas à censura relinquere, ut interpretes aliarum historiatarum fecerunt, puditum fuisset: eas autem refellere, & veritatem, quæ à tot viris doctissimis explicata est, iterum demonstrare, inutilis & infinitæ operæ fuisset.

Consultius igitur visum est, totam illam historiam in compendium reducere, neglectis iis quæ plenius in Græcis Latinisque monumentis leguntur, omissisque fabulis, nisi fortè ad traditionem illarum Ecclesiarum illustrandam pertinerent (ex illis enim aliquando veritas elicitur) & ea referre tantummodo, ex quibus Jacobiticæ Ecclesiæ successio & forma agnosci possent. Quia tamen sæpe junior est Arabum narratio, emendatio: neque opus habet, ex aliis autoribus ea seliguntur, quæ ad eam illustrandam videbuntur necessaria: Ita brevitati consulatur, neque tamen omittatur quidquam quod ad fidem, disciplinam, mores & instituta Ecclesiarum.

Es in compendium redacta, & illustrata.

P R Æ F A T I O.

spectet , qui præcipuus esse debet hujus lucubrationis fructus. Ea quippe ratione constabit numerosam illam Jacobitarum sectam , quæ, si Monophysitarum hæresis excipimus, servavit majorum suorum traditionem circa Sacramenta , præcipuasque alias cultûs divini partes, testem esse omni exceptione majorem, perpetui cum Græca Latinaque Ecclesia consensûs , circa ea quæ à Protestantibus rejecta sunt , tanquam superstitiones & sacrilegia. Quæ etiam alibi probavimus, credi ab illis hæreticis & quotidiano usu frequentari, majori in luce collocabuntur , cum variis ex historia exemplis , eos, non illa docere modò in libris Theologicis & Officiis Ecclesiasticis, sed perpetuò observasse constiterit. Dabimus exempla aliquot , ex quibus documenta certa capere quisque possit.

Ex ea historia probantur multa quæ ad doctrinam pertinent.

In Eutychio nihil laudabilius visum est Seldeno atque aliis Episcopatûs everforibus, quàm narratio illa singularis de Presbyteris Episcopum Alexandrinum ordinantibus, ex suo numero. Nihil quoque inanitatem illius fabulæ æquè demonstrat, ac simplex historia primorum Patriarcharum, ex qua constat reliquos Sacerdotes, Episcopos , & plebem ad eos eligendos convenisse, Ordinationem non nisi ab Episcopis factam , & eo ritu qui Græco simillimus sit, cujus forma Pontificali libro consignata est posterioribus sæculis. Nullos in Ægypto Episcopos ante Demetrii tempora existisse, Seldenus idem, ex malè intellectis Eutychii verbis, affirmavit : at multorum memoriam, Severi sola historia subministrat, qui ea in regione floruerunt, & ad novorum Pontificum ordinationem convenerunt : regimen Ecclesiæ per Episcopos, quibus subessent Presbyteri &

P R Æ F A T I O.

Diaconi : Sacramentorum administrationem legitimam , vetustaque disciplinæ conformem : omnia tandem Græcis Latinisque institutis similia , Protestantium reformationi dissimillima. Liturgiam & alia Officia sacramentalia quæ apud nos in usu sunt , calumniantur Protestantes , tanquam nuper inventa , & à Verbo divino alienissima ; Græcas etiam Liturgias eâdem censurâ involvunt. At forma illius quæ inter Ægyptios Jacobitas , saltem à tempore Calchedonenſis Concilii usurpatur , Græcam Latinamque eximie confirmat : si tandem aliis illa autoritatibus careret , frequens præcipuarum ejus partium in hac historia mentio , vana Riveri aliorumque judicia satis refelleret. Quærunt Protestantes argumenta quibus fidem de reali corporis & sanguinis Christi in Eucharistia præsentia labefactent , veluti novam & apud nos natam : at in hac historia , ea leguntur , quæ eamdem Coptitis ante multa sæcula communem fuisse certissimè demonstrant. Ita crucis signum , ejus imagines , alias quoque Virginis & Sanctorum : orationes ad eorum auxilia postulanda , cereos , suffitus , cultum reliquiarum , peregrinationes ad loca sancta ; jejunia cum abſtinentia à certis eduliis , carnis macerationes ; vitam monasticam : castitatis vota , vasa sacra , festa , publicas supplicationes statis temporibus : omnia tandem , quæ nos Catholici à majoribus tradita religiosè observamus , quæque observari apud Orientales , constat indubitatè monumentorum quæ variis linguis supersunt testimoniis , ea per annos mille ducentos teneri , tanquam Christiani cultûs partes , exemplis ex historia petitis abundè constabit.

Verùm nonnullis fortasse videbitur levis nimium & De Miraculis

P R Æ F A T I O.

quæ sæpe oc-
curreunt.

parum firma eorum Scriptorum autoritas, qui miraculis absurdis, & quæ à nobis recipi vix possunt, cum inter hæreticos facta dicantur, historiam contaminant. Sed hoc non agimus, ut quia hæc Arabicè & in libris rarissimis scripta reperiuntur, non minùs ab eruditis explodantur, quàm Acta Græca & Latina, quæ quotidie ab illis rejiciuntur, & quæ fontem esse plurimarum ejus generis fabellarum omnes agnoscunt. Neque expendimus an inter hæreticos miracula Deus aliquando ediderit; illud solùm certissimum habendum est, eos qui miracula ita referunt, ut ea se credere indubitanter affirmant, fidem illam quæ miraculis respondeat habere, & ab ea quæ illa non admittat esse remotissimos. Nemo quippe miraculum apparentis in Eucharistia carnis aut sanguinis, qualia occurrunt aliqua in historia Patriarchali, referre potest, quin realem elementorum transmutationem credat: nemo sanitatem signo crucis, benedictione Sacerdotali, aut reliquiarum tactu procuratam, nisi ea quæ credimus persuasissima habeat. Eâ causâ igitur nonnulla alicujus momenti referentur; inutilia tacebuntur.

Severi histo-
ria ab aliis
continuatâ.

Severus historiam ad tempora sua deduxit, eam aliquot alii continuaverunt, Michael Episcopus Taneos, Mauhoub filius Mansour, Marcus filius Zaráa & anonymi usque ad Cyrillum Patriarcham in quo desinunt. An aliquis eam ad ultima ista sæcula perduxerit, scire huc usque non potuimus: nam Abulbircat qui ultra progressus est, & qui eum descripserunt, nuda dederunt Patriarcharum nomina, adjectis annis quo quisque ordinatus est, & diem suum obiit; nihil præterea; atque ex illo indiculo Joannes Michael Wanslebicus eum contexit, qui in ejus historia Ecclesiæ Alexandrinæ reperitur.

PRÆFATIO.

tur. Athanasius Kircherus alterum dedit planè factitium ab Ægyptio aliquo imperitè concinnatum, in quo nomina Patriarcharum literis Copticis describuntur, quo scilicet plus ponderis haberet: adjunctæ ex Elmacino, aut ex conjectura notæ, falsi damnatæ sunt plerisque in locis ab eruditis Bollandi continuatoribus. Chronicon ab Echellenfi editum, non ultra historiar nostrar terminos progreditur. Itaque pauca admodum, quæ passim colligere ex aliis libris licuit, ut Ecclesiarum multarum sub Sultanis Mamalukis everasio, & nonnulla ejusmodi appendicis loco subjiciuntur, quia unde integrum historiar corpus conficeretur, non occurrebat.

In primis sæculis communis est Orthodoxis, Jacobitisque Chronologia, adeoque ad eas Epochas de quibus Chronologi inter se consentiunt res gestas revocavimus: nulla, nisi ubi necessarium fuit, ratione habita quæstionum quæ eruditos exercent in rationibus temporum discutiendis. Nam quæcumque de hoc argumento dici possunt, exhausta sunt dudum à viris doctissimis; quantum ad ea quæ ex certis monumentis, tam Astronomicis quàm Ecclesiasticis illustrantur: majorem porro lucem afferri, obscuris Chronologiar quæstionibus, ex Orientalium libris posse si quis existimet, magnopere fallitur. Nam annos Græci numerant ab Orbe condito, quod etiam Melchitæ Alexandrini dudum faciunt: Jacobitæ Ægyptii utuntur solâ Martyrum Epochâ: Antiocheni Syrique omnes Orthodoxi, Nestoriani, Jacobitæ, ærâ Alexandri, seu Seleucidarum: tandem ex quo Muhamedani totum Orientem subegerunt, omnes, etiam Christiani, annos Arabum more numerant ab Hegira seu fuga impostoris. Observatur

De Chronologia.

P R Æ F A T I O.

autem autores Christianos cùm factum aliquod insigne notis Chronologicis designare student, & annos secundùm diversas illas Epochas numerant, persæpe peccare graviter, dum annos Hegiræ componunt cum annis Martyrum Diocletianæis. Ingens sanè & quæ hominum in Astronomia non apprime exercitatorum vires superet, difficultas est, in componendis annis & mensibus, quorum diversa initia, diversaque dierum ratio est; abstrusa etiã & intricata embolismorum methodus: tum perpetuum errandi periculum in numeris, Sifris præsertim mendosissimè scriptis, unde nihil certi sæpe elici potest. Si quis tamen his quæstionibus Chronologicis delectatur, eas omnes quæ annos Patriarcharum Alexandrinorum spectant à Bollandianis Sodalibus fusè & accuratè tractatas reperiet: magnâ sanè diligentia, sed quam sæpius fefellit Arabicorum librorum, quos per interpretes legebant, inconcinna Chronologia.

Quæ sit in
opere tempo-
rum observata
ratio,

Igitur ut aliqua temporum ratio haberetur, quantum in nobis fuit, initia cujusque Patriarchæ & obitum iis notis annorum mensiumque signavimus, quas autores nostri referebant. Annos Martyrum quorum apud eos perpetuus est usus, firmatâ prius Epochâ secundùm meliorum Chronologorum demonstrationes, quæ cum Orientalium calculis conveniunt, ex tabulis exactissimis numeravimus, ut annos Hegiræ, Alexandri, & Æræ Persicæ, si quando occurrunt. Tabulæ verò illæ sunt, quas Joannes Gravius, vir Astronomiæ linguarumque Orientalium peritissimus, nec minùs fide erga Carolum I. regem infelicissimum suum, commendandus, quam in fortunarum suarum naufragio, longoque

P R Æ F A T I O.

carcere incorruptam servavit; Versioni Ulugbeigi à se elaboratæ subjunxit. Eas enim per annos expansos ira disposuit, ut anno æræ Christianæ cuilibet anni Hegiræ, Æræ Persicæ & Alexandræ, aliarumque, si Diocletianeam exceperis, accuratè respondeant. Illam neglexit, quia usus illius apud Orientales Astronomos dudum nullus est, sed inter Christianos Ægyptios eosque Jacobitas, Æthiopesque illis subiectos tantum consistit. Cum porrò Ægyptiacus annus solaris sit: qui annum Julianum habet, alterum habebit continuò, & ex iisdem tabulis annum Hegiræ qui vagus & desultorius est deprehendet.

Severo & aliis Historiæ Patriarchalis scriptoribus non ita adhæsimus, ut negligerentur alii quos, ubi necesse fuit, cum primis illis comparamus, ut etiam cum Mari Salomonis filio & Amro Mathæi, qui brevem & Alexandrinâ minùs accuratam historiam dederunt Catholicorum seu Patriarcharum Sectæ Nestorianæ, per Episcopos Seleuciæ & Ctesiphontis ad Apostolica usque tempora multarum fabularum fidiculis perductam. Sunt illi, ut jam diximus paucissimi, sed quidquid alicubi etiam in locis peregrinis repertum est, suo loco referetur.

In ea historiæ parte quæ Muhamèdana tempora antecedit non alios annos quam vulgaris Æræ notavimus, neque in historia Imperatorum etiam Christianorum ad Orientales calculos revocanda quidquam operæ impendimus, cum adeo turbata sit Arabum Chronologia, ut nec Imperatorum nomina satis distinguant, quod in Arabica scriptura difficillimum est, multò minus res ab eis gestas accuratè exponant. Nullum enim quem sequerentur autorem habuerunt præter Eusebium, cujus

Præter Severum alii auctores adhibiti.

Communem Chronologiam sequimur ante Muham. dana tempora.

P R Æ F A T I O.

etiam historiam Arabes habuisse non videntur, sed tantum Chronica, nec ipsa integra. At ubi ad Muhamedanorum tempora pervenimus, cum ex Græcis Latinisve autoribus res eorum explicari nequaquam possint, brevem illarum notitiam dabimus, quia non facilius ut plurimum in Orientali historia tractanda successit plerisque nostris scriptoribus, quam Arabibus in Græca & Latina.

Califarum & Sultanorum successio à plebisque mundissime deficiat.

Igitur à Muhamede initio ducto, Califarum ejus successorum successionem brevissimè exponemus; tum mutationes varias Principum qui Ægyptum obtinuerunt, quæ pars historiarum obscurissima est, multisque modis, etiam à viris qui literarum Orientalium famam claruerunt conturbata. Nam inter alios qui præcipue commendantur, Leo Africanus, qui Italicè; Ludovicus de Marmol qui Hispanicè scripserunt de Africa, ejus res cum Ægyptiacis magnam habent affinitatem, sciant peccatis contra historiam gravissimis. Inter literatos recentioris ævi, primus Josephus Scaliger in Canonibus Isagogicis suis, specimen quoddam Orientalis Chronici edidit, non indicatis fontibus, unde sua deduxerat; (id enim majorem dignitatem habere videbatur) nec sine plausu eruditorum omnium, quorum nemo quidquam simile audierat. Nihil porro aliud fuit Chronicon illud eximium, quàm Epitome parum accurata eorum quæ libro *Juchassim* sive familiarum suo; Rabbi Abraham Salmanticensis adjecerat, breviter & diligenter ex Arabicis libris digesta. Sed cum Hebraicis characteribus Arabica vocabula non faciliè exprimantur, quæ rectè, quoad ejus fieri poterat, Judæus scripserat, pessimè legit Scaliger, adeo ut pleraque nomina

P R Æ F A T I O.

mirè corrupta sint; tum etiam plura non rectè interpretatus est. Ea omnia potuerunt deinde ex Elmacini historia Saracenica emendari: sed cùm imperfectissima sit, nec mutationes principum satis explicet, præsertim si Latine tantum legatur, nulla inde lux affulsit historiæ Ægyptiacæ. Nemo quippe Arabissantium illorum superioris sæculi, eos dico qui lacinias ex Elmacino Arabicè & Latine commentariis interseruerunt suis, ut erudituli viderentur, in ea parte non peccavit, si quando ulterius progressus est. Ita ille *literarum Orientalium in duperator*, ut a palponibus suis vocatus est, Constantinus l'Empereur, Hebraicæ linguæ professor apud Batavos, pessimus Itinerarii Benjaminii Interpres, dum autorem, quem non intelligebat, emendare satagit, inscitiam ipse suam, temeritatemque non uno loco prodidit. Eum qui suâ ætate in Ægypto regnabat Califam, Benjamin appellaverat, & rectè: is enim erat ex Fatimidarum familia, quæ Africâ Ægyptoque occupatis in Califatûs quoque jura involaverat. Interpres qui non alios Califas quàm quos Saracenica historia repræsentabat, novissèt, Benjaminum vexat, & Hebraicis Arabicisque testimoniis contundit, ut probet alium tum fuisse Califam, nempe Bagdadensem & Abbassidam: hoc erat scilicet probare Bagdadum non esse Alexandriam. Quid porro ab eo expectandum fuit, qui *Hassissinos*, hoc est ut vulgò loquuntur autores nostri *Assassinos*, quos Benjamin sicanos illos celebres fuisse ait qui principes proditoriè occiderent, ait esse *eos qui Reges serra dissecant*.

In brevi porro quam historiæ Patriarchali subjungemus Muhamèdanarum rerum Epitome, sequemur autores probatissimos, meliorisque notæ, quàm Elmacinus

Epitome historiarum Arabum facta ex probatissimis autoribus.

P R Æ F A T I O.

fuit. Is enim ex editione Erpeniana famam in Europa consecutus est, quam in Oriente exiguam habuit, aut planè nullam: non tam quòd Christianus foret, quàm quòd varietate illa quâ Arabes delectantur caret ejus historia, cùm de viris illustribus vix quidquam referat. Dabimus porrò Califarum successionem, tum eorum principum, qui precariâ, aut supremâ potestate Ægyptum obtinuerunt, mores quoque & instituta, quantum necesse erit, explicabimus, quæ omnia huc usque obscurissima fuerunt. In ea tamen Orientalis historiæ parte quæ res Muhamedanas attinet, ita versabimur, ut eas tantùm quæ Christianis rebus connexæ sunt attingamus, reliquas prætereamus.

De nupera
historia Pa-
triarcharum
Alexandri-
narum.

Affecta dudum erat Epitome hæc nostra, simulque alia ejusdem generis, sed argumenti planè diversi, successionem eorum Antistitum continens qui se ipsos Ctesiphontis & Seleuciæ Episcopis inseruerunt & Catholicorum nomine totius Nestorianæ sectæ Primatum ab annis mille circiter & ducentis obtinuerunt, cùm ad nos perlatus est Tomus Junii Bollandiani V. cui historiam Alexandrinorum Patriarcharum Jacobitarum præmiserunt immensi illius laboris continuatores doctissimi. Ex illorum igitur virique clarissimi Danielis Papebrochii, qui autor tentandæ illius historiæ fuerat, & ad eam multa congererat, judicio, aliorumque intellexi, opus istud non inutile planè futurum, cùm quæ mihi venerant in mentem, de fragmentis illis colligendis, ea quoque viris in illa literaturæ Ecclesiasticæ parte exercitatisimis cogitata fuissent. Miratus sum maximam autorum diligentiam qui omnibus propemodum præsidiiis literariis Orientalibus destituti, tam multa, obscura perplexaque

P R Æ F A T I O.

in Elmacino Chronicoque Orientali illustrassent, & emendassent, illudque specimen Alexandrinæ Jacobitarum historiæ edidissent, quod alia omnia, quæ hoc in genere edita fuerant, longè superaret. Dolui tamen vehementer, cum ex prima operis inspectione patuit, præter Eutyrium, Elmacinum, Chroniconque Orientale, nihil habuisse illos unde plenior & accuratior rerum Alexandrinarum notitia compararetur, nisi transmissas schedas aliquot à viro celebri Jobo Ludolfo, quibus excerpta ex Synaxario quodam Æthiopico, paucifque eadem linguâ libris, ejusque de variis historiæ locis conjecturæ continerentur.

Fuit sanè Ludolfus omnium quos Europa nostra tulit Æthiopice doctissimus, cuique ea lingua plus quàm nemini debet, cum Grammaticam, Lexicaque ediderit omnibus numeris absoluta. In historia non tam feliciter versatus est; cum enim per annos ut minimum quadraginta quidquid ad res Æthiopicas illustrandas spectabat magno labore collegisset, vix tamen habuerat unde libellum conficeret, donec Historiam Æthiopiæ superioris, à Baltazaro Tellezio Societatis Jesu Presbytero Lusitanicè scriptam nactus fuit. Ex eo enim opere, longè plura & meliora didicit quàm ex omnibus suis Æthiopicis libris: & Tellezio auspice duo volumina satis spissa in lucem emisit, quæ ob materiæ raritatem, novarumque rerum copiam eruditis omnibus acceptissima fuerunt. Verumtamen dum evagatur liberiùs, mavultque Æthiopem quemdam suum, à quo per ambiguas quæstionculas, absurda multa præsertim circa Religionem exprimebat, quàm Tellezium ducem sequi, non modò contra veritatem peccavit sæpe gravissimè, dum Æthiopes omni

De Ludolfi
historia Æ-
thiopica.

P R Æ F A T I O.

erroris suspicione purgare nititur, sed multa quæ ratio-
nes ejus conturbabant, dissimulavit. Totius enim Lu-
dolfini operis consilium ad duo potissimum capita re-
ferri potest: primum ut Ecclesiam Æthiopicam, quasi
Jerusalem novam, sine macula & ruga nobis repræsen-
tet; alterum ut à Romana alienissimam. Itaque unius
naturæ Jacobitica hæresis, Calchedonenſis Concilii de-
testatio: communio cum hæreticis Alexandrinis, Judi-
cæ superstitiones multæ, polygamia, sacrorum Ordinum
prophanatio, & similia, nihil illum morantur. At ubi eos
à veteri Religione communique omnium Ecclesiarum
doctrina & disciplina non defecisse constat ex eorum li-
bris, ut in fide realis elementorum transmutationis in
corpus & sanguinem Christi Domini, in reliquis Sacra-
mentis, oratione pro mortuis, jejuniis, cultu Sancto-
rum, votis monasticis, & multis aliis, nihil non molitur
Ludolfus, ut eos Lutheranos esse demonstret. Quàm verò
infeliciter hanc causam suscepit, quàmque infideliter
in ea versatus fuerit, palam ut speramus facient Disser-
tationes de Ecclesia Æthiopica nostræ, simulque de-
monstrabunt, quàm parum subsidii ex Æthiopicis suis
libris Ludolfus habuerit, cum plura & certiora nobis
Arabes in historia Alexandrina suppeditaverint.

Historiam
Alexandrinam
prius igno-
ravit.

At de ea agebatur, cum viros doctissimos eam do-
cere aggressus est, quàm penitus ignorabat, ut nobis,
anno 1684. Lutetiæ cum esset, sæpe fassus est: & Ara-
bicè sciebat mediocriter. Neque enim Arabicè scire di-
cendus est, qui ex libro aliquo edito & jam Latine con-
verso tres quatuorve lineas exscribit, ut nimium multi
fecerunt; neque aliud quidquam præstitit Ludolfus tam
in historia quàm in Commentario, nisi quod pauca
quædam

P R Æ F A T I O.

quædam inferuit ex vita manuscripta Arabica Teklahaimanot cujus excerpta, Lutetiâ proficiscens à me acceperat ; plura omisit quæ Latine conversâ non erant. Omnis igitur literaria ejus supellex, quantum ad Alexandrinam historiam spectabat, Synaxario quodam metrico constitit, quod *Hagiologium* appellavit. *Synaxarium* vocant Græci, librum quo vitæ Sanctorum breviter explicantur, secundum dierum & mensium ordinem, quales multi exstant editi vel manuscripti, non sine insigni inter codices varietate : alii enim prolixiores narrationes, alii breviores continent : & non nullis subjunguntur hymni ad Sanctos quorum vita descripta est. Similes habent libros Christiani Alexandrini, tam Melchitarum quam Jacobitarum, utrique linguâ Arabicâ : quia etsi Græca lingua illis in usu sit ad Officia Ecclesiastica, ut istis Coptica, neutra tamen vulgaris est. Talem librum ad usum Melchitarum seu Orthodoxorum habet Bibliotheca Regia : eum qui Jacobitis proprius est inter Ecclesiasticos libros recenset Abulbircat, & recensitum fuisse scribit à Petro, cognomine Eljemil, Episcopo Melichar. In eo contineri testatur Sanctorum vitas eorumque res gestas, secundum dierum ordinem, quibus eorum memoria celebratur. Verum hymni illi, vel potius orationes rhythmicæ, quæ Copticè non minus quam aliæ omnes recitari solent, singulari volumine continentur, qualia extant in Regia, Seguieriana, Colbertina & aliis Bibliothecis. Ex altero volumine illo, quod *Synaxarium* quoque appellatur, expressum fuit procul dubio id quod *Hagiologium* vocavit Ludolfus, & unde excerpta varia ad historiæ Patriarcharum Alexandrinorum autores transmisit. Alterius majoris Synaxarii versionem exti-

P. af. ad Lex.
Æth. Ed. 2.

tisse apud Æthiopes verisimile omnino est, sed visa Ludolfo non fuit : nam de suo ita loquitur. *Encomium celestium & terrestrium. Hic est libri titulus, de autore non constat. Poëma est insigne ex Synaxariis Æthiopum, sanctorum nomina eorumque martyria atque miracula, necnon festa in Ecclesia Æthiopica recepta metricè referens, &c.* At Synaxaria integra, solutâ oratione scripta sunt : ut etiam orationes illæ quæ Copticis Synaxariis continentur : cùmque Æthiopicum metro decurrat, quin genio suo Poëta Æthiops indulserit, non dubitamus. Sanè ex ejusmodi hymnariis, quamvis integra fuisset autorum fides, vix quidquam ad historiam contexendam colligi posse satis quique intelligit, & excerpta ipsa per se loquuntur. Unde cùm præter eos, qui abstrusam hanc materiam ex Arabicis autoribus diligentius tractaverant, scire nemo posset quàm vana forent Ludolfi promissa, multò minùs quàm hospes in Alexandrinorum Christianorum rebus esset, miramur potius autores doctissimos tali ducelapso sapius non fuisse, quàm quòd nimium illius auctoritati, quam fama commendabat, aliquando tribuerint. Nec dubitamus eos neglexisse multa, quæ illis suggererant, quorum levitas aut falsitas effugere limatissimæ eorum judicia non poterat, cùm omnia prope quæ religionem spectant aliundè transtulerint, & Ludolfi observationes varias insuper habuerint, circa Æthiopicæ Ecclesiæ fidem, cujus historiam mirè corrumpit, si quidpiam occurrebat, quod in Alexandrinæ dedecus redundaret, quæ alterius parens & magistra est. Et istam quoque læsit non perfunctoriè, dum Æthiopum pravas consuetudines, quas Patriarchæ Alexandrini sapius damnaverunt, excusare nititur : tandem si illum audiamus,

P R Æ F A T I O.

erunt Æthiopes, atque adeo Alexandrini Jacobitæ, immunes ab omni hæresi, etiamsi unicam in Christo naturam agnoscant; Synodusque Calchedonensis, Leo Romanus, totusque Occidens, imo Protestantes ipsi, erunt Nestoriani, quippe qui cum Ecclesia Catholica ejusdem Synodi fidem amplectuntur. Hæc omnia Viri doctissimi prudentissimè rejecerunt, aliamque & veriolem dederunt Ecclesiæ Alexandrinæ imaginem, rudi tamen (aliter enim vix poterat) penicillo adumbratam. Verùm hæc omnia plenius ex historiæ variis locis cognoscuntur, adjunctis, ubi res ita postulabit, observationibus in quibus ita versabimur, ut non conjecturas, quod fere semper à Ludolfo factum, aut sordidorum autorum testimonia proferamus; sed eorum duntaxat quorum apud Christianos Orientales constet autoritas. Ubi conjectandam erit, ea quæ magis verisimilia videbuntur, proponemus: in aliis obscurissimis ignorantiam nostram ingenuè profitebimur.

Erunt fortasse quibus displicebit quòd, cùm plerique à quibus de Ecclesia Alexandrina aliquid ab annis plus minus triginta scriptum est, Wanslebium ubique appellent, alii ut eum exscribant, multi ut refellant, eorundemque sæpe librorum uterque testimoniis uti soleamus, rarissima duplicis ejus operis mentio sit, primi quod Italicâ linguâ; alterius quod Gallicâ nostrâ edidit. Sanè neque dissimulare per quos profecerim, animus fuit, neque Wanslebium, quo antequam in Ægyptum proficisceretur usus sum familiariter, vel minima suæ laudis parte fraudandum existimavi, multò minùs ad tetras de ejus operibus Ludolfi sententias accedendum; adversùs quem si parum officiosus fuit, nostrâ non inte-

De Wanslebii
operibus.

P R Æ F A T I O.

rest. Verum si cum in Æthiopica lingua magistrum habuit Wanslebius, in Arabica & rebus Ægyptiacis, multa Ludolfus ab eo discere potuisset: res igitur ita se habet. Cum ille ex Ægypto & Cypro multa volumina auspice viro Clarissimo Joanne Baptista Colberto, emisset Regiis impensis, eaque Lutetiam, transmisisset, ut in Bibliothecæ Regiæ jam Orientalibus codicibus refertissimæ censum referrentur, eos libros omnes tractaveram, priusquàm Wanslebius ex Ægypto rediisset, omniaque ad Orientalium Ecclesiarum fidem & disciplinam illustrandam spectantia collegeram, antequàm sua edidisset. Itaque nihil inde sumtum, materia omnis ex libris quos conquisiverat & multis aliis comparata fuit, neque tunc de edendis Dissertationibus meis cogitabam. Ut prodire duo illa Wanslebiï opuscula, tanti illa visa non sunt, ut me ipse retexerem, cum inspicienti satis pateret, quàm parum hoc in genere præstitisset, multaque illi & præcipua deessent, ad ea explicanda, quæ docere alios aggrediebatur. Qui hæc nostra legent agniture sunt procul dubio, scriinia nos illius non expilasse, quod, qui de eo contemtim loquuntur, multi fecerunt, & non uno loco, ipse Ludolfus. At ubi hallucinatus est, hominem vellicare & refellere, nisi quando necessarium fuit, non sustinimus, cum in ejus libris, qualescumque sint, multa nova, & prius ignorata reperiantur.

De propriorum nominum scriptura.

Occurret in propriis nominibus inter orthographiam illius, nostramque & aliorum diversitas, quod incommodum in peregrinis illis linguis vitari vix potest. Itaque vix unum reperias qui Arabica propria nomina Sultanorum, Urbium, Provinciarum, iisdem Latinis literis expresserit, præsertim Arabica. Qui ea ut vulgo nunc

P R Æ F A T I O.

pronunciantur exprimunt, non magis inter se consensuunt, cum non uno modo, etiam ubi Arabica lingua vernacula est, efferri soleant. Nos magis communem simplicemque sequimur, ut scilicet per *A* clarum exprimantur ea nomina quæ adjunctam Elif habeant; ubi ea carent, per *E* aut *I* breve, quod ad *E* vel *A* Anglicum accedat: *I* longum & *O* aut *On*, ubi adjunguntur vocales duæ ejusdem soni. Itaque *Abulbircat* scripsimus, cum *Wanslebius* efferat *Abulbaracat* & alia similia: in celebrioribus vulgarem usum, ut plurimum, secuti sumus, neglectis articulis, nisi ubi in nomina ipsa ex consuetudine coaluerunt, ut in *Almanfor*, *Almammon*, & aliis similibus, apud Europæos scriptores notissimis.

In prima hujus Epitomes historica parte quæ res ante Muhamedanum imperium gestas complectitur, non tam historiam quàm Jacobitarum traditionem exhibere nos, ultro fatemur, quam omisisse melius fuisset, nisi foret aliquis fructus etiam in falsis illis narrationibus colligendis, non ut inde historiarum lumen accedat, sed ut opinioniones quibus olim fascinati fuerunt à magistris erroris, veteres Syri & Ægyptii, certius cognoscantur. Frustra enim Missionarii qui Hæreticos Nestorianos vel Jacobitas ad unitatem Catholicam reducere satagunt, historiam rerum in Ephesino, vel Chalcedonensi Conciliis gestarum exponent ex Epitome Annalium Baronii, quam Arabicè olim scripsit P. Brixius Redonensis ex Capucinatorum sodalitia, tantâ cum negligentia, ut ne nomina quidem propria, ut ab Orientalibus scribi solent, expresserit. Neque magis juvari possunt ex Eutychii Alexandrini historia, quando autor Monophysitis & Nestorianis, æque suspectus est: cavet etiam ne aliorum tra-

Prima hujus
historiæ pars
traditionem
Jacobitarum
complectitur.

P R Æ F A T I O.

ditionem referat, quam sciri tamen interest.

*De admittis
fabulis.*

In antiqua historia ante scissas per hæresim & schismata Ecclesias, etsi multis in locis fabulas narrent sæpe numero Orientales scriptores, in illis refellendis, non multum operæ ponendum existimavimus, cum primorum sæculorum res gestæ dudum à viris doctissimis explicatæ sint: atque adeo ab autorum longis allegationibus abstinere visum est: hæc enim omnia per se notissima sunt. Illis tantum illustrandis immorati sumus, quæ cum autores aliqui nimis extollerent, ut ea quæ de Nicænorum Patrum historia Echellensis protulit; aut Eutyrium Seldenus & Hottingerus, ut Episcopatum impugnarent, aut quisquilias Æthiopicas Ludolfus, ut absurda multa eliceret: ea quantum in nobis fuit elucidare conati sumus.

*Quidam au-
tores neglecti
sunt.*

Sunt autores Orientales quorum testimonia contempsimus & jure merito, quales omnes prope fuerunt quos Maronitæ testes proferunt perpetuæ suorum majorum in fide Orthodoxa constantiæ, ut eos à Monotheliticæ hæreseos labe vindicent; Joannes Maro scilicet, Gabriel Klai: Chronicon Maroniticum & si qui sunt alii, quorum testimonia qui produxerit, præter tres aut quatuor Maronitas reperimus neminem, imò qui eos noverit. Et quod alio in opere fusiùs demonstrabitur, quæ ex illis producuntur, ejusmodi sunt, ut indubitata præferant novitatis aut falsitatis indicia.

*Verba alio-
rum allegata
tantum ubi
opus fuit.*

De aliis, quorum certa autoritas est, & quorum testimoniis frequenter utimur, monemus, nos illorum fidem religiosè secutos esse, verba tamen ipsa non nisi quando necessarium fuit retulimus, quod si factum fuisset, in nimiam molem excrevisset nostra hæc Epi-

P R Æ F A T I O.

tome. Neque etiam semper illorum titulis margines oneramus, hæc enim diligentia non valde necessaria est in allegandis Codicibus Manuscriptis, qui passim obvii non sunt : præcipuorum indicem dabimus, ut etiam insigniores Bibliothecas in quibus reperiuntur indicabimus.

Monendum quoque est in tota hac historia *Misra* nomen Arabum exemplo usurpari, quotiescumque de veteri Kahira agitur. Novam enim quæ Kahira propriè dicitur ab ea distingunt, cum vetus à Muhamedanis expugnata sit, altera à Fatimidis post multos annos ædificata. Fostata quæ ab Amro filio El Assi condita est, eo ipso loco ubi tentorium fixerat ab aliis distincta, *Fostata Misra* idcirco appellatur, quia veteri fuit urbi contigua. In eadem urbe antiqua, major erat omnino Christianorum numerus, quia præcipuæ Ecclesiæ illic erant cum novas ædificare vix liceret sub Arabum tyrannide. Id porro observandum erat quia Ludolfus, quod satis mirari nemo possit in Schedis ad viros doctissimos transmissis hæc scripsit. *Nulla etiam urbs Misra nobis nota est, sed Memphis vel Cairus.* Attamen notissima fuit omnibus qui historiam Ægyptiacam vel leviter attigerunt, quod Elmacini & Geographiæ Nubiensis sexcenti loci satis demonstrant, præter Geographos & historicos ineditos. Neque Memphin vel Cairum illam urbem appellant, quæ nunc vulgari inter Europæos Kahiræ nomine designatur. Nam *Menf* adhuc appellatur, urbs antiqua quæ ex altera parte Nili superest, ad cujus partem oppositam interfluente fluvio, Fostata ædificata est, unius Stationis sive octo Parasangarum itinere distans. Eam esse veterem Misram, primamque urbium Ægypti à

Misram ubique appellamus Kahiram, ut vulgò dicunt veterem.

*Abnif al.
Geogr. n. 60.*

P R Æ F A T I O.

Makrizi. Yacuti. Ebn Vet. di. c. c.
Id. n. 66.

Pharaone conditam vulgò tradunt Arabes. Itaque Mifram vocamus Kahiram veterem, prope quam erat *Nu-péior* vetus, quod *Kasser el chemah* dictum ab Arabibus fuit, quasi *Castrum luminum*, antiquitus *Babelion*: unde Babylonis Ægypti nomen Kahiræ veteri adhæsisse, rectè observavit vir his literis ornatissimus, & solidè doctus Jacobus Golius, ex Yacuto, & aliis Geographis Arabibus, à quibus plura expectari non poterant, cum remotiorum antiquitatum sint imperitissimi. Quæ porro Ludolfus de Michaeli LIII. Patriarcha scribit quod *cere domum vel commercium Judæis vendiderit*, ab Elmacini, quem illustrare aggressus erat, mente alienissimum est; cum sensus simplicissimus is sit, vendidisse eum ut impositam sibi mulctam solvendo esset, possessiones quasdam Ecclesiæ, *Castro luminum, sive cereorum*, veteri scilicet illi Pyræo contiguas. Nec veriora plerumque sunt quæ de rebus Ægyptiacis, tam in historia & commentario, quam in schedis ad viros doctissimos missis continentur.

De rebus Æthiopicis.

Mirum id minùs videri debet, quàm quòd in illo magno opere, multa ad res Æthiopicas spectantia, quæ ex Historiæ Patriarchalis autoribus collegimus, non occurrunt, quæ viri laboriosissimi diligentiam effugisse nonnulli mirabuntur. Sed cum, ut alibi dictum à nobis est, Alexandrina historia Ludolfo prorsus ignorata fuerit, Æthiopes rerum suarum memorias nullas habeant, ex Synaxario & paucis quibusdam libris aliis nihil unde juvari vel mediocriter posset nactus est. Quæ à nobis referuntur certa sunt, cum pleraque ad Metropolitanarum Æthiopiæ ordinationes pertineant, quæ in Alexandria Ecclesia non alibi celebrabantur; unde illius historici,

P R Æ F A T I O.

nici, testes eorum quæ viderant aut audiverant sunt locupletissimi, pluraque nos docent, quàm huc usque libri omnes Æthiopici.

De Antiochena quoque Jacobitarum Ecclesia multa ex Historicis Alexandrinis collegimus, quæ ad utriusque Ecclesiæ antiquam communionem pertinent, & quæ alibi haud facilè reperiantur. Quippe id habuit Alexandrina Ecclesia, præ Antiochena ejusdem sectæ Jacobiticæ, quòd licet hæreticos & per vim intrusos, Episcopos tamen semper vidit, aut in ipsa urbe, aut in Monasteriis: tum quòd statim atque Ægyptus in Arabum potestatem venit, integram Patriarchæ in Christianos suæ sectæ auctoritatem recuperaverunt. Contra verò Jacobitæ Antiocheni, cùm sub Imperatoribus Christianis pulsati urbe fuissent, eaque sæpe illorum armis recepta fuerit, vix unquam conquieverunt: & pauci inter eos aliqua doctrinæ laude floruerunt. Itaque de illorum rebus vix quidquam occurrit, adeo ut successio Patriarcharum ex certis monumentis designari nulla possit, ne Græcorum quidem, cùm hiulci sint multis in locis illorum catalogi. Unde præter illa quæ variis hujus Epitomæ locis inserta sunt, nihil nobis occurrit, unde vel leve specimen Antiochenæ Jacobitarum Ecclesiasticæ historiæ posset delineari. Erit igitur operæ pretium, ut qui literarum Orientalium præsertim Ecclesiasticarum studiis incumbunt, tam in Bibliothecis, quàm in Oriente, nova subsidia unde hæc historia illustrari possit conquiri satagant, ut etiam ea quæ res Nestorianorum in majori luce possint collocare.

Quædam eo in genere non contemnenda collegimus ex Opere Historico-Theologico Amrou filii Ma-

De rebus Antiochenis.

P R Æ F A T I O.

thæi , qui Maris filii Salomonis historiam redegit in compendium. Illa nunquam, ut existimo, in Europa visa est, cum neque in ditissimis Bibliothecis Vaticana, Regia, Florentina, Segueriana, Colbertina extet, aut mentio illius occurrat in aliarum celeberrimarum Catalogis: & si illa reperiretur, multa fortasse enucleatiùs exponerentur, quæ strictim Epitomator profecutus est. Ex ejus tamen opere successionem Catholicorum, ut vocari solent Nestorianorum Patriarchæ, confecimus, quæ in historia obscurissima non nihil lucis asferre poterit. Verùm quandoquidem nulla unquam fuit Jacobitas inter & Nestorianos societas, nihilque inter se commune habuerunt, paucissima ex illo Opere in hanc Epitomen transtulimus. Quòd si vita suppetet illa Dissertationibus de Ecclesia Nestoriana dudum affectis, & ad editionem paratis adjungi poterit.

Atque hæc ferme sunt quæ ad Historiam Patriarcharum Alexandrinorum præfari oportebat, cui multa deesse satis intelligimus, quæ eruditorum diligentiam desiderent. Optandum quippe foret, ut sicut res Jacobitarum, quas prope solas Autores quibus usi sumus suppeditaverunt, ita Melchitarum sive Orthodoxorum ex Arabicis Autoribus possent explicari. Sed Græci auctores vix Patriarcharum nomina nobis exhibent, adeò ut eorum successio obscurissima sit: res Ecclesiasticas sub Muhamedanis transactas vix attingunt. Tandem si peregrinæ istius historiæ cognitio, aliquam Ecclesiæ & Reipublicæ literariæ utilitatem affert, aliosque excitat ad hæc studia excolenda, fructum laboris non mediocris satis amplum cepisse nos arbitramur.

I N D E X

PATRIARCHARUM ALEXANDRINORUM.

I. M ARCUS. pag.	1.	XXXII. Timotheus.	131.
II. Anianus. 12.		XXXIII. Theodosius.	136.
III. Menanus seu Abilius. 13.		XXXIV. Petrus.	143.
IV. Cerdo. 14.		XXXV. Damianus.	145.
V. Frimur. 15.		XXXVI. Anastasius.	151.
VI. Justus. 16.		XXXVII. Andronicus.	154.
VII. Eumenius. <i>ibid.</i>		XXXVIII. Benjamin.	156.
VIII. Marcianus. 17.		XXXIX. Agatho.	172.
IX. Celadion. <i>ibid.</i>		XL. Joannes Semnudæus.	174.
X. Agrippinus. <i>ibid.</i>		XLI. Isaac.	177.
XI. Julianus. 18.		XLII. Simon.	179.
XII. Demetrius. 20.		XLIII. Alexander.	189.
XIII. Heraclas. 25.		XLIV. Cosmas.	201.
XIV. Dionysius. 31.		XLV. Theodorus.	<i>ibid.</i>
XV. Maximus. 39.		XLVI. Chail.	202.
XVI. Theonas. 50.		XLVII. Mennas.	237.
XVII. Petrus Martyr. 54.		XLVIII. Joannes.	241.
XVIII. Achilles. 65.		XLIX. Marcus.	246.
XIX. Alexander. 67.		L. Jacobus.	266.
XX. Athanasius. 83.		LI. Simon.	273.
XXI. Petrus. 99.		LII. Yuçab.	277.
XXII. Timotheus. 101.		LIII. Chail.	294.
XXIII. Theophilus. 103.		LIV. Cosmas.	295.
XXIV. Cyrillus. 108.		LV. Sanutius.	301.
XXV. Dioscorus. 114.		LVI. Chail.	319.
XXVI. Timotheus. 120.		LVII. Gabriel.	328.
XXVII. Petrus. 122.		LVIII. Cosmas.	336.
XXVIII. Athanasius. 125.		LIX. Macarius.	344.
XXIX. Joannes. 125.		LX. Theophanius.	349.
XXX. Joannes reclusus. 126.		LXI. Mennas.	351.
XXXI. Dioscorus junior. 119.		LXII. Ephraem.	366.

LXIII. Philotheus.	373.	LXXI. Michael.	514.
LXIV. Zacharias.	386.	LXXII. Joannes.	517.
LXV. Sanutius.	408.	LXXIII. Marcus.	550.
LXVI. Christodulus.	418.	LXXIV. Joannes.	554.
LXVII. Cyrillus.	449.	Vacatio sedis.	567.
LXVIII. Michael.	471.	LXXV. Cyrillus.	576.
LXIX. Macarius.	483.	Patriarchæ de quibus præter	
LXX. Gabriel f. Tarik.	500.	nomina nihil habetur.	599.

HISTORIA



MARCUS EVANGELISTA

ALEXANDRINUS

PATRIARCHA PRIMUS.



ARCUM Evangelistam Petri Apostolorum Principis discipulum, Ægypti, Pentapoleos, omniumque tandem quæ Alexandrino Patriarchæ olim suberant, Provinciarum Apostolum fuisse, Cathedræque Alexandrinæ fundatorem, constans Græcæ Latinæque non minùs quàm Orientalium omnium Ecclesiarum traditio est. Ea non modò à Severo quem præcipuè sequimur, ab Eutychio, Elmacino, Autore Chronici Orientalis, Abulfaragio, Ebnassalo, Canonum Arabicis Syriacive Collectionibus perscripta est, verùm etiam à Muhamedanis qui varios rerum Ægyptiacarum commentarios ediderunt. Hinc vulgarissimus apud omnes titulus *Evangelicæ sedis*, Alexandrinæ attributus, quia ab Evangelista Marco instituta est. Verùm de historia D. Marci cùm jam à multis sæculis nulla ferme extente monumenta Ecclesiastica, quæ multis fabulis inquinata non sint, eaque interpolatio Actorum veterum antiquissima sit, adeo ut viri docti eam quinto sæculo superiorem judicent, mirum esse nemini debet Coptitas qui Græcis libris uti nonnisi per interpretes potuerunt, quique sub durissima tyrannide Muhamedanorum jactati vix unquam conquieverunt, nihil in suis originibus habere quod ex corruptela ista & colluvie fabularum quarum amantissimi sunt, propagatum non fuerit. Quæ enim in antiquis Monasteriis à se conqui-

*Makrizi de
script. Ægypti
Mj. Ar. l. 1.*

A

sita & lecta testatur Severus, eadem & deteriora etiam fuerunt Græcis illis Actis quæ ad 25. Aprilis Bollandiani socii ediderunt, quæ vix aliter à doctis commemorari solent, nisi ut refellantur. Omisissis igitur quæ alibi plenius tractata sunt, Orientalium solam traditionem referemus.

De Marco
Coptitarum
graditio.

Scribunt illi Marcum non Judaicæ originis fuisse, sed Africanum, natum in Pentapolis urbe quadam, patre Aristobulo, cujus frater erat Barnabæ. Erant divites, sed cum Habissinorum atque Barbarorum incursionibus facultates omnes amisissent, in Palestina sedem quæsierunt, prope Hierosolyma. Marcus tunc Joannes appellabatur, magnamque à prima pueritia pietatem demonstrabat: neptem Aristobuli & Barnabæ Petrus Apostolorum princeps uxorem duxerat. Ea occasione Marcus, nam ita deinde appellatus est, veniens Petri sæpè domum, ab eo sacras literas didicit, fideque Christiana imbutus est. Leonem & leenam circa Jordanem occurrentes, in nomine Christi fugavit, vicinoque monte omne talium ferarum genus depulit. Eo miraculo pater & patruus se illi in disciplinam tanquam patri tradiderunt, Christi que servos se esse professi sunt. Maria mater Marci, soror erat Barnabæ Apostolorum discipuli.

Aliud insigne miraculum ab eo editum commemorant circa urbem, inquit, Azdoud appellatam, à cujus civibus arbor olea colebatur; cumque lunam adorarent, ad eam arborem orabant & vota faciebant. Eam Marcus, ut infidelibus significaverat, oratione dejecit: simul ipso meridie tenebris lucem obscurantibus luna visa est, ex qua vox audita quæ cultores astrorum Deo famulantium increparet. Inde multi ad fidem conversi. Alii casu arboris sacræ furiosi, Marcum verberatum & diu vexatum Judæis tradiderunt, à quibus in carcerem conjectus est. Sed eadem nocte, apparente sibi Christo, januis apertis, custodibusque somno sopitis, liberatus est. Hæc atque alia similia figmenta passim occurrunt in Græcorum Actorum collectionibus, quas tam in variis Metaphrastæ Miss. codicibus, quam apud Bollandum consulere quisque potest.

Marcus unus
ex septuaginta
Christi discipulis.

Marcus, ut Severus prosequitur, unus fuit ex Christi discipulis septuaginta: unus etiam ex ministris qui ad nuptias in Cana Galilæe hauserunt aquam quæ in vinum mutata est. Is etiam quem amphoram aquæ bajulantem secuti sunt Apostoli in domum Simonis, ubi ultimum Pascha paraverunt: ipse etiam qui discipulos in

PATRIARCHARUM ALEXANDRINORUM. 3

MARCUS
PATR. I.

domum suam recepit Passionis tempore, ubi post resurrectionem congregatis illis apparuit Christus, cum ad eos januis clausis introivisset.

Post ascensionem Domini Marcus Petro comes adjunctus, verbum Dei Judæis annuntiavit Hierosolymis, tum Bethaniam & vicinis in locis. Dein Petrus per somnium apparente sibi Angelo monitus est ut Marcum Alexandriam prædicandi Evangelii causam mitteret; quod factum est, inquit autor, an. 35^o post ascensionem Domini, cum prius Romæ simul prædicassent.

De anno missionis D. Marci in Ægyptum aliter scribunt non Græci modò & Latini, sed etiam Orientales, Chronicum nempe Alexandrinum an. Ch. 40. nempe 3. Caii. Eutychius an. 49. Orientale Chronicum Echellenfis, propius ad Severi calculos accedit dum eam statuit 7. Neronis anno, J. C. 60. Aliter Elmacinus qui martyrium Marci assignat 1. ejusdem Imperatoris anno, post septennium in Evangelii prædicatione consumtum, atque ita profectio ejus incideret in an. J. C. 53. verum frustra in Orientalibus libris Chronologiæ stabilitas ulla quærenda est, cum ipsi sibi frequentissime, etiam in eadem pagina contradicant.

Quo anno
Alexandriam
missus.
P. 250.

Ipse sibi Severus manifestè contrarius est, cum statim scribat, post ascensionem Domini Apostolos inspiratione divina divisisse inter se provincias, in quas singuli proficiscerentur Evangelii annuntians causa: Marcum sortitò accepisse Ægyptum & Alexandriam, atque eò profectum, cum idololatriæ immersum populum reperisset, plurimos tamen tum prædicatione, tum miraculis ad fidem convertisse. Communis porro autorum opinio est, eum à Pentapoli prædicationem incepisse tanto successu, ut partim idola frangerentur, arboreque fatidicæ profanis mysteriis consecratæ, à Neophytis excinderentur. Hæc Severus & alii Orientales, quæ etiam in Actis Græcis interpolatis occurrunt.

Divino monitu Alexandriam profectus est ut in ea verbum Dei annuntiaret. In ejus aditu rupto calceo ad sutorem divertit qui illum refecit: Is cum manum subulâ perforasset, exclamavit *ὁ θεός, unus Deus*; nam hæc græca verba Severus transcripsit. Marcus audito nomine Dei veri, gratias agens quòd spem haberet non infeliciter suscepti itineris, postquam in faciem prostratus orasset, luto vulnus liniens hominem sanavit. Ab eo domum deductus hospitioque susceptus, Christum illi annuntiavit, tanquam antiquitus in Scripturis promissum & per Prophetas prædictum, qui in

Alexandriam
venit.
Eutych. l. 1.
p. 328. &c.

fine temporum corpus acceperat ex Maria Virgine. Tandem ille & vi doctrinæ & miraculo quod ipse expertus fuerat convictus, fidem amplexus est, & cum universa familia sua, multisque ex vicinia baptismum accepit, quorum exemplum plures alii secuti sunt. Is Hananias erat seu Anianus.

Interea per urbem vulgatum est advenisse Judæum hominem, qui cultum Deorum impugnaret, atque ab idololatria averteret, unde Idololatræ insidias illi struxerunt. Eas cum rescivisset Marcus, Anianum sutorem illum ordinavit Episcopum, tres sacerdotes & septem Diaconos. His undecim viris commisit plebem fidelem ut eam in fide confirmarent, illisque valedicens in Pentapolin reversus est. Ibi duos annos permanfit prædicans Evangelium, ordinavitque Episcopos, Sacerdotes & Diaconos in omnibus illis provinciis. Deinde reversus est Alexandriam, ubi fideles in fide confirmatos & numero credentium auctos non sine magna lætitia reperit. Statim Ecclesiam in loco prope mare *Boncolia* dicto ædificare aggressi sunt.

Martyrium.

Cum vero Infideles accepissent eum in urbem rediisse, famâ miraculorum quæ ab eo edebantur ubique diffusâ, nihil omiserunt, ut eum perderent. Tandem Dominica Paschæ quæ eo anno incidebat in 29. diem mensis Pharmuthi, quo etiam die Idololatræ festum celebrabant, eum diu quæsitum ad altare in Ecclesia invenerunt. Irruentes igitur in eum, alligato ad collum fune, eum trahere cœperunt, tanto furore, ut corpore ad saxa lacerato sanguis undique fluere. Vesperè eum in carcerem conjecerunt, deliberaturi quo supplicio illum afficerent. Eadem nocte apparuit ei Angelus, qui dixit illi: *Marce serve Dei, ecce nomen tuum scriptum est in libro vitæ: annumeratus es sanctorum multitudini: spiritus tuus gloriam Deo dicet cum Angelis, corpus tuum non peribit, nec desinet esse super terram.* Evigilans dixit levatis in cœlum oculis: *Gratias tibi ago Domine Jesu Christe, oroque ut me ad te suscipias, ut teter in bonitate tua.* Postea cum rursus obdormiisset, apparuit ei Dominus ea specie, quâ cum discipulis suis erat conversatus, dixitque ei: *Pax tibi Marce Evangelista mi electe.* Marcus respondit: *Gratias ago tibi salvator meus Jesu Christe, qui dignum fecisti me ut paterer pro tuo sancto nomine.* Infideles eodem modo quo prius fecerant, raptaverunt illum fune ad collum alligato, donec sanctus cum dixisset, *Deus meus in manus tuas commendo spiritum meum*, animam Deo reddidit.

PATRIARCHARUM ALEXANDRINORUM. 5

MARCUS
PATR. I.

Infideles, collectâ lignorum magnâ copiâ, corpus ejus cremare aggressi sunt, eo in loco qui dicitur Angelium. Verùm ingens tempestas cum terræ motu, tonitru & pluvia, eos ita conturbavit, ut multi extincti fuerint. Fideles corpus sanctum ex pyra eduxerunt, illæsumque repertum in Ecclesiam detulerunt, ubi sacro celebrato precibusque super eum peractis ex more sepelierunt, ut quotannis memoriam ejus cum lætitia celebrarent. Sepultus est Marcus ad Ecclesiæ latus Orientale eo ipso die quo martyrium consummavit. Diem assignant, nempe ultimum Pharmuthi secundum Ægyptios: qui dies respondet VIII. Kal. Maii secundum Romanos, estque 24. mensis Nisan secundum Hebræos. Ita Severus quem ex hoc loco manifestum est non Græcis modò Actis usum, sed aliis etiam ex Latino versis: nam ea verba VIII. Kal. Maias, ita scripta sunt, ut planè ab eo intellecta non fuerint, & sanè divinandum fuit ut ea agnoscerentur. Barmuda, seu Parmuda, aut quocumque alio modo scribatur, nomen Arabicum detortum est ex Ægyptiaco Pharmuthi, qui mensis respondet ei quem Syri Nisan appellant, quique Romano Aprili respondet in Nomenclatore Coptico Arabico. At in Romana & aliis Ecclesiis memoria S. Marci celebratur non VIII. sed VII. KAL. Maias, atque adeo emendandus est Severus, neque enim aliter calculus ejus sibi aut cum aliis autoribus, Kalendariisque constaret. Elmacinus secunda solennitate Paschæ passum asserit, quæ tunc fuit dies 30. Pharmuthi, & 24. Nisan. Conveniunt Acta Latina vetusta apud Bollandum, mensis Ægyptiaci nomen Græca Acta conservant. Atque ita Chronicon Orientale.

Elmac. l. p.
Ass. Ar.
P. 3; 9. April.
15.

Annum, verò martyrii maximè controversum esse apud Orientales testatur Elmacinus: Cum, inquit, inter historicos alii eum sub Claudii, alii sub Neronis principatu Alexandriam venisse; fidemque prædicasse & passum fuisse scripserint. Eutychius an. 1. Neronis, vita à Kirstenio edita 14. Claudii Cæsaris: hoc est ejus ultimo, quod idem est. Verùm hæc omnia Chronologica frustra ab Orientalibus elucidari quisquam speret: atque adeo de anno quo Marcus passus est, deque aliis rebus illius gestis qui plura vult, adeat Historiæ Ecclesiasticæ viri cl. Tillemontii partem 2. ubi omnia hæc accuratè tractata sunt; & uberius in notis explicata, ex quibus intelligitur omnia ferme quæ à Severo & aliis autoribus, tanquam ex vetusta Ecclesiarum Ægyptiacarum traditione referuntur, ex illis Actis interpolatis, tum Græcis tum Latinis, esse descripta, quæ docti quicumque corruptissima esse judicant.

Annum Mart.
tyrii.

Eutych. l. xi.
p. 336.

nec aliter fidem mereri, quam ubi potiori auctoritate confirmatur.

Anianum in
sede Alexandrina consti-
tuit.

Marcum, etsi plerumque inter Patriarchas primus numeratur, Anianum tamen, vel ut alio nomine appellatur, Hananiam in sede Alexandrina collocasse constans ejusdem Ecclesiae omniumque ferme traditio est; neque tamen idcirco Hananias primus Patriarcha numeratur à Severo, sed secundus. Atque ita ferme omnes rerum Ægyptiacarum scriptores, etiam Muhamedani ut Makrizius.

Marci reli-
quix.

Communis quoque apud omnes opinio est de reliquiis D. Marci Alexandriae servatis, ad ejusque sepulcrum Patriarcharum electorum consuetudo fuit, vigiliis agere, ejusque benedictionem captare, ut multis exemplis in hac historia fiet manifestum.

Evangelium
quâ lingua
scriptum.

Evangelium à Marco scriptum, ut nemo dubitat, ita autores non consentiunt quâ lingua ab eo scriptum fuerit. Sunt enim qui, ut communis doctorum virorum sententia est, contradicente licet Cardinale Baronio, existimant eum Græcè scripsisse; ut vitæ quædam Evangelistarum, & autores multi testantur, secuti potiore veterum auctoritatem. Alii, ut multi apud nos, scripsisse aiunt eum linguâ Latinâ: atque hæc fuit Eutychii sententia, & id ejus verba significant: nec opus erat tot inanes commentarios attexere, ut Seldenus fecit, ad probandam acceptionem vocis notissimam. Etsi enim *Roum* non modo apud Muhamedanos in Alcorano, sed in usu ferme quotidiano, Græcos significet, præsertim eam partem quæ ex eadem acceptione, Romania seu Romelia huc usque appellatur, attamen *Roumia*, non Græcam linguam, quæ *Younania* dicitur, sed Romanam seu Latinam significat. Et qui accuratius locuti sunt ut eam significationem expressius confirmarent, addiderunt *Frangiet*, ut intelligeretur se non de Græca lingua quæ Rumiis vulgaris foret, hoc est Græca, sed de Latina Francica, hoc est hominum, Latinæ linguæ, quos Francorum nomine comprehendunt, verba facere. Tertia sententia est, sed rarior, obscuriorum quorundam Ægyptiorum, qui ex caritate erga patriam opinati sunt Marcum quando quidem Coptitis, seu Ægyptiis Evangelium prædicavit, Copticè illud scripsisse: ita Abulbircat & pauci alii. Hæc verò opinio nullo idoneo teste nititur, imò vel ex eo falsa est quòd Græca lingua Alexandriae & in tota Ægypto inferiori vulgatissima erat, cum in Barca, Pentapoli aliisque pro-

Abulbircat.
Mf. Eutych.
p. 337.

PATRIARCHARUM ALEXANDRINORUM. 7

vinciis ubi eum Ecclesias instituisse tradunt, nullus esset eidem linguæ locus.

Superest ut paucis referatur ex Eutychio fragmentum illius historiae quæ duodecim Presbyterorum institutionem spectat, quia locus ille admodum vexatus est à Protestantibus, præsertim Seldeno. Is cum esset in Presbyterianorum Catharorum turbulenta factione non postremus, magnique inter literatos nominis, perditæ suæ causæ præsidium in autore Arabe quæsit, cum alia omnia deficerent. Nondum editus erat Eutychius, cum ipse an. 1642. latinam ex eo opere publicavit, cum vâgrandi commentario. Verba referemus Seldeni ipsius interpretis, quamvis non minora flagitia contra Grammaticum Orationis Arabicæ sensum, quàm contra Theologiam contineant. *Constituit item Marcus Evangelista duodecim Presbyteros cum Hanania qui nempe manerent cum Patriarcha, adeo ut cum vacaret Patriarchatus, eligerent unum è duodecim Presbyteris, ejus capiti reliqui undecim manus imponerent, eumque benedicerent, & Patriarcham eum crearent: & dein virum aliquem insignem eligerent, eumque Presbyterum secum constituerent, loco ejus qui sic factus est Patriarcha, ut ita semper extarent duodecim. Neque desit Alexandriae institutum hoc de Presbyteris, ut scilicet Patriarchas crearent ex Presbyteris duodecim usque ad tempora Alexandri Patriarchæ Alexandrini qui fuit ex numero illo CCCXVIII. Is autem vetuit ne deinceps Patriarcham Presbyteri crearent. Et decrevit ut mortuo Patriarcha convenirent Episcopi qui Patriarcham ordinarent. Decrevit item ut vacante Patriarchatu eligerent sive ex quacumque regione, sive ex duodecim illis Presbyteris, sive aliis, ut res ferebat, virum aliquem eximium, eumque Patriarcham crearent. Et paulò post: Sed verò ab Hanania quem constituit Marcus Evangelista Patriarcham Alexandriae, usque in tempora Demetrii Patriarchæ ibidem, is fuit Patriarcha Alexandrinus undecimus; nullus erat in Provinciis Egypti Episcopus, nec Patriarcha ante eum crearent Episcopos; ille autem factus Patriarcha tres constituit Episcopos. Et primus fuit hic Patriarcha Alexandrinus, qui Episcopos fecit. Huc usque Seldenus.*

Mirum sanè est literato homini venisse unquam in mentem, posse se unius auctoris barbari qui decimo sæculo scribebat testimonio evertere antiquissimam, & Ecclesiæ coævam de Episcopis per tres alios Episcopos ordinandis traditionem, aut inauditum

Patr. 1.
De duodecim Presbyterorum historia & Eutychio.

Orig. Eccl.
Alex. Eutych.
t. 1. p. 331.

P. 29. Ed.
Lond.

Autoritas
Eutychii nulla.

alibi quàm apud hæreticos veteres, & quidem paucissimos, dogma de paritate Episcoporum & Presbyterorum stabilire. Unde explosus huc usque ab omnibus Seldenus fuit, contentus infelici illa laude, & cujus bonum civem pudeat, quàm apud Parlamentarios furiosos & parricidium anhelantes, quod post annos aliquot perpetraverunt, consecutus est. Athanasium non ex Presbyterorum duodecim collegio ordinatum, sed ex Diaconis assumptum observaverunt viri doctissimi, neque tamen impugnata ab Ariani fuisse electionem illius quasi contra leges Ecclesiasticas factam, etsi omnes vel minimas calumniandi illius occasiones quæsierint. Epiphanium docere morem Alexandrinis fuisse ut Episcopo defuncto statim ejus successor eligeretur, ne cives ad seditionem prompti, tumultuandi si longius electio protraheretur, locum haberent.

De electione agit, non de Ordinatione Patriarchæ.

Et sanè nihil evidentius quàm agi de Alexandrini Patriarchæ electione, non de ejus ordinatione, quod ipsa Eutychii verba palam faciunt; nam idem verbum Arabicum, quod *constituere* significat, is autor eadem in periodo duplici Latino expressit, nempe ut ad Ordinationem sacramentalem referri viderentur, quæ ad electionem tantummodo pertinebant. Illius igitur testimonii tota sententia est Marcum Evangelistam instituisse collegium Presbyterorum duodecim, ex quorum numero Patriarcha novus eligeretur. Secundò ut ab illis ipse eligeretur. Fuisse aliquam in Alexandrina Ecclesia consuetudinem hujusmodi, docet Hieronymi locus quo non alius Protestantibus notior & inutilior. *Nam & Alexandria à Marco Evangelista, usque ad Heraclum & Dionysium Episcopos, Presbyteri semper unum ex se electum in excelsiori gradu collocatum Episcopum nominabant*: nisi quid aliud singularis disciplinæ caput intellexit Hieronymus, suo tempore notissimæ, sed nobis incompetæ.

Ep. 85. ad Euzarium.

Neque tamen de ea verum scripsit.

In Ecclesia sanè Melchitica, hoc est Orthodoxa, cujus erat Patriarcha Eutychius, ut in singulis Ordinibus Ecclesiæ Ministrorum, ita & inter sacerdotes unus erat qui *Πρωτοπρεσβυτερος* simpliciter vocabatur, ut ex Balsamone & aliis notum est. Vigebat quoque ea dignitas in Jacobitica: nam ut ex historia Chailis 46. Patriarchæ constat, qui ordinatus est circa an. J. C. 743. Protopresbyter dum electio tractaretur aliorum omnium nomine quemdam proposuit. Verùm quod omnem circa singularem hanc Eutychii narrationem suspicionem tollit, Severus qui accuratius omnino quàm ille de rebus

rebus Alexandrinis scripsit, nec in Marco, nec in Heracla vel Demetrio aut Alexandro simile quidpiam memoriae prodidit, imò totam fabulam contrario testimonio evertit. Quippe statim in Cerdonis electione describenda, qui 3^m post Marcum numeratur, scribit: *Sacerdotes & Episcopos qui ejus vices in provincia administrabant, statim atque audierunt Melianum* (ita 3^m vocant) *diem suum obiisse, Alexandriam convenientes, habito cum Orthodoxa multitudine consilio ad eligendum successorem, sorte jacta, Cerdonem in quem ceciderat, Patriarcham constituisse.* In vita Primi, & Marciani meminit Severus conventus habiti, in quo plebs Orthodoxa Episcopum suum eligeret: in vita Claudiani, eam scribit cum Episcopis electionem fecisse. Quòd si à plebe electus, non à duodecim illis Presbyteris, multò minùs ex eorum numero: neque enim de ullo primorum illorum Antistitum scribitur quòd ex duodenario illo numero assumtus fuerit. Eligebat porro plebs Episcopum, sed non sola; aut si aliquis à plebe, hoc est Laicis, expeteretur, requirebatur ut Episcoporum & Sacerdotum consensus accederet. Si quando Sacerdotalis ordo & Episcopi congregati quem promoveri satagerent, necesse erat, ut eorum suffragia plebis consensu firmarentur. Hinc solennis ille ritus, qui nondum desit apud Coptitas, ut antequam novus Patriarcha ordinaretur, proponeretur ab Episcopo antiquiore nomen Electi: si probaretur, clamabant omnes *ἀγιος* voce græca, quæ ad postrema usque sæcula conservata est. Testes ejus ritus omnes qui de rebus Ecclesiasticis scripserunt: eumque accuratè exponit Ebnassalus in ultima parte Operis, cui titulus *Collectio fundamentorum fidei*: similiterque Abulbircat, autor scientiæ Ecclesiasticæ, Anba Gabriel Parr. Alexandrinus in Rituali, & alii. Ne quis autem existimet otiosè hæc dicta esse ab illis autoribus, obstant multa electionum ita celebratarum exempla, nullius omnino etiam posterioribus sæculis quæ à solis Presbyteris facta sit, multò minùs legitur ordinationem Patriarchæ ab illis factam. Neque enim talis fuit Coptitarum, quorum historiam scribimus, ignorantia Canoniciæ disciplinæ, ut nescirent ad quos ordinandi supremos Antistites autoritas pertineret, aut sacerdotibus jus non esse illos ordinandi, qui ne minimos quidem ministros constituendi jus haberent. Fusè de hoc argumento tractaverunt Ebnassalus alter in Canonum collectione, Echmimensis in sua, tum alii multi qui de disciplina scripserunt, quorum nemo abit à communi circa Ordinationes Ecclesiarum Græcæ Latinæque disciplina,

Pontific. Se-
guier. Copt. Ar.
Ms. Abulbircat,
Ebnass. abniss-
ba.

Si quid igitur veri continet Eutychii relatio, non aliud referendum est quam ad electionem duodeno illi Sacerdotum collegio permissam, tum privilegium, ut ex eodem novus Episcopus assumetur, quod factum tamen non fuisse, eorum quos diximus electio à Severo relata declarat. Adde quòd præter Elmacinum qui Eutychium transcripsit, nullus est qui illius traditionis meminerit. Eam tamen, etsi in Jacobitica secta viveret, servavit Elmacinus, homo nullius in historia iudicii, adeo ut prima illius pars non edita, secundà quæ nomine *Historia Saracenica* edita est, longè deterior censenda sit: sed non illi solùm, verùm omnibus ferme Orientalibus Scriptoribus consuetudo est, ut quidquid legerint quocumque in loco, in suos libros transferant. Sed quæ dicta sunt ad Seldenii commentarios evertendos sufficiunt, quos etiam egregiè confutavit Abrahamus Echellensis in Eutychio suo vindicato. In eo enim libro ostendit de electione, non de ordinatione Patriarchæ actum fuisse ab Eutychio, Patriarchas Alexandrinos à Plebe seu Laicis, Clero, Episcopisque electos, nempe ut omnium aliarum Ecclesiarum disciplina præscribebat, ordinatos fuisse ab Episcopis: eam verò manuum impositionem quam Eutychius designavit dum scribit, undecim sacerdotes alios, noviter electo manus imposuisse, non eam fuisse quæ ad *questorias* propriè dictam pertineret, & quæ foret characteris Episcopalis efficax, sed *questorias* sensu singulari, quæ ad solam suffragii ferendi rationem pertineret. Id multis autoritatibus probat, utiturque inter alios Severo nostro, ut doceat apud Christianos Orientales cujuscumque sectæ ordinationem nullam præterquam per impositionem Episcopaliū manuum recipi, quæ sanè constans perpetuæ Melchitarum, Jacobitarum & Nestorianorum fides fuit: neque existimandum esse Ægyptios secundum suam disciplinam scientes, ne Lectorem quidem aut Diaconum ordinari à Presbyteris posse, talem auctoritatem agnovisse in undecim Presbyteris ad Patriarcham ordinandum. Hæc fusè *Eutychius vindicatus* ostendit, Seldenum verò debellare tanti non erat, ut tot ex Orientalium libris testimonia necessaria forent, cum ex sola Grammatices supinissima ignorantie Presbyterianam suam *αιαπαλα* eum construxisset certissimum sit. Si enim vim vocum Arabicarum intellexisset, scire potuisset eas quas Eutychius adhibuit, non ad ordinationem propriè dictam, sed ad electionem pertinere: quem in sensum ducit tota Eutychii narratio. Neque tamen illa quocumque sensu accipiat, vera est: nam ut ante

PATRIARCHARUM ALEXANDRINORUM. 11

Marcus
Patr. I.

Alexandrum electos ab Episcopis, & Clero non minùs quàm à plebe seu Laicis videmus Episcopos Alexandrinos, ita post eum quando scilicet electionis jus, à Presbyteris ad Episcopos translatum esse scribit Euty chius, Sacerdotes, Laicique & conveniebant ad electionem, & eam comprobabant, ut ex hujus historiæ serie satis fiet manifestum.

Quod superest, uno verbo demonstratur Euty chii falsitas & inanitas, de rebus sibi incomptis temerè omninò ea scribentis, quæ cum perpetua temporum omnium disciplina pugnarent. In Græca Ecclesia & ante omnium schismatum hæreseonque memoriam extitisse debuit, si vera erat, collegii illius Presbyteralis institutio, cujus tamen alibi memoria nulla est. Ordinatio Patriarchæ ut omnium aliorum Episcoporum qualiter celebraretur accuratè præscribunt Apostolicæ veteres Constitutiones, quas ut Græci, ita omnes Orientales venerantur, tanquam ab Apostolis, aut eorum discipulis scripto consignatas. At non à Presbyteris, sed ab Episcopis ordinationem Episcoporum, Patriarcharum, omniumque Ministrorum etiam inferioris gradus perfici illæ præscribunt, nec aliter ordinationem ullam antiquitus factam ullo idoneo testimonio ostendi potest. Par est traditio Jacobitarum qui eandem legem servant, tum in libris, tum in quotidiana disciplina; neque aliter unquam factos Episcopos Alexandrinos, quàm per Episcopalem manuum impositionem, suspicati sunt. Ita nec in historia, nec in Arabum monumentis, nec in Coptitarum, Jacobitarum, vel Orthodoxorum Melchitarum libris quidquam reperitur, quod vel levissimam Euty chio auctoritatem conciliet.

Euty chianæ
narrationis
alii non me-
minerunt.

Commentarium prolixissimum Seldeni accuratius resellere operam esset abuti suam: nam si antiquitatem Ecclesiasticam spectes, nihil infantius, cum ea quæ ex Hieronymo adduxit, & pauca quædam alia Presbyterianæ sectæ argumenta centies non à Catholicis modò, sed ab Episcopalibus etiam Anglis confutata sint. Orientalis porro eruditio si cujusquam perstringet oculos, ejus fortassis fuit eas literas à limine salutaverit, non qui ad earum penetralia fuerit admissus. Nihil enim omnino ad rem faciunt fragmenta quædam ex Alcorano; Oratio Dominica interpolata à Muhamedanis, & similes quisquiliæ quas ad origines Ecclesiæ Alexandrinæ non pertinere nemo non intelligit. Eas si scivisset, vel ipsorum Muhamedanorum testimonio cognovisset, quas ipse excogitavit ad Presbyteriorum Genevensium formam, illas nec in Ale-

Seldeni com-
mentarius
dudum à
multis resu-
tatus.

xandrina, nec in ulla alia Orientali Ecclesia locum habuisse. Eant porro quâ ubique turget eruditionis ostentationem, satis acerbè, non tamen iniquè exagitavit Echellensis, demonstratâ ejus imperitiâ, etiam in rebus obviis meliorum autorum ignorantia, & mala ubique fide. Tale illud est quod de Episcopis commentus est dum ea verba Eutychii interpretatur, *nullus erat in provinciis Ægypti Episcopus*, cum in Arabico exemplari, vox singulari numero, non plurali occurrat; nempe ut nobis persuaderet, nullos ante Demetrium fuisse in tota Ægypto Episcopos. Attamen eos convenisse ad electionem & ordinationem novorum Patriarcharum, testatur Severus: erant igitur in rerum natura ante Demetrium. Verum hic locus intelligendus est de inferiori Ægypto sola, quæ & *Mesr* propriè dicitur. Nec debuerat Pocockius qui Eutychium integrum edidit, eadem errata recudere, nisi verisimile esset, eum famæ Seldeni potius, cujus causa ei non displicebat, quàm veritati servisse.

Anianus à
Marco con-
stitutus.

VIVO, ut diximus, Marco, & priusquam in Pentapolin vitandæ persecutionis metu proficisceretur, Anianus quem Hananiam Arabes vocant, Episcopus ab eo ordinatus est, successorque designatus. Factum id ex Apostolorum Discipulorumque Christi privilegio, qui cum prædicandi Evangelii causâ in varias regiones proficisci cogerentur, Episcopos in præcipuis urbibus ordinabant, adeo ut fundatores Cathedræ Episcopalis, primique Episcopi forent. Verum Orientalium consuetudo est, ut Apostolos, Apostolicosque viros, à quibus illæ institutæ sunt, tanquam primos Episcopos numerent. Ea ratione Marcus primus Alexandria Episcopus censetur: Anianus, secundus; quem ordinem sequuntur Laterculi Patriarcharum varia, Eutychius, Elmacinus, ipsi tandem Muhamedani ut Macrizius.

Quod de eo
Severus.

De Aniano Severus hæc tantum refert. Postquam obiit Evangelista Marcus Apostolus D. Jesu Christi, sedit ejus loco Anianus Patriarcha. Sub eo auctus est majorum in modum credentium in Christum fratrum numerus, ex quibus ordinavit Sacerdotes, & alterius ordinis Ministros. Sedit annis 22. obiitque 20. mensis Atyr (quo die memoria ejus notatur in Coptitarum Calendario) an. 8. Domitiani Imperatoris: sed 3.º ejusdem anno ejus mortem

PATRIARCHARUM ALEXANDRINORUM. 13

assignat Elmacinus : Catalogus apud Kircherum an. 22. Eum se-
disse an. 22. obiisse 20. mensis Atyr : & an. J. C. 87. obiisse
scribit Macrizius, obiisseque an. J. C. 87. testatur : quæ commu-
nis est Chronologiæ ratio. Eusebius annos quoque 22. Pontifica-
tus ei assignat, nempe ab 8° Neronis anno usque ad Domitiani
4^{um}, atque ita an. J. C. 84. supremus illi fuit. Videnda in eum
locum Nota Chronologica Tillemontii : nam hæc accuratè à viro
doctissimo expensa sunt.

Eum verò Hananiam seu Anianum, ut hoc nomen Coptice
scribitur, esse asserunt sutorem, qui Marci operâ sanatus & ad fidem
conversus fuerat : ita Severus, Eutychius, Elmacinus & alii. Com-
memorationis dies assignatur in Romano Martyrologio 25. Apri-
lis cum Marci commemoratione. Ecclesiam sub ejus invocatio-
ne Alexandriæ extitisse docet Epiphanius.

MELIANUS, seu ABILIUS, PATR. III.

ANIANI successor secundum Græcos & Latinos, quorum potior
autoritas est, Abilius appellatus fuit ; atque ita veteres omnes
Catalogi, Eusebius in historia & in Chronico, ut ejus Acta apud Bol-
landum : Copticæ *Μιλων* vocant, Arabes Melianum : tam in Historiis
quàm in Laterculis, quorum unum habetur ad Copticum Lexi-
cum ex Arabico interpretatum, aliud ad finem operis Abulbircat
& passim alibi. De eo Severus. Congregata est multitudo Ortho-
doxa, habitoque consilio elegerunt virum nomine Melianum, quem
ordinaverunt Patriarcham super sedem D. Marci Evangelistæ lo-
co Hananiæ, seu Aniani. Erat Melianus vir temperans & mode-
stus. Confirmavit autem in fide eos qui in Christum crediderant,
atque eorum numerus multiplicatus est, in Ægypto, Africa &
Pentapoli. Obiit 1. mensis Toth an. 15. Domitiani Imperatoris.
Sub eo Patriarcha Ecclesia in summa tranquillitate fuit. De eo
nihil extat aliud in Orientalibus libris, neque in Græcis aut La-
tinis, quod aliquam certi speciem habeat. Eum fuisse unum, imò
primum ex tribus Presbyteris quos Evangelista Marcus ordinasse
dicitur ad Alexandrinæ Ecclesiæ regimen, legitur in Actis quibus
usus est Bollandus : & id sanè fieri potuit. Quod à Luca Evan-
gelista ordinatus fuisse dicitur in Constitutionibus Apostolicis, pu-
gnat cum Orientalium traditione.

Sedit secundum Severum an. 12. secundum Eusebium, & Euty-

B iij.

ANIANUS
Patr. 11.

L. 2. c. 24.

Tillem. 1. x.
hist. Eccles.
p. 555.

Har. 69.
p. 726.

ABILIUS
Patr. 114.

Eusl. 3. c. 15.

T. 3. Febr.
p. 284.

25. Apr.
p. 349. c.
L. 7. c. 48.

Eusl. 13. c. 14.

ABILIUS
Petr. III.
Eutyeb. l. 1.

P. 147.
Tillem. l. 2.
hist. Eccl. p. 602.

De ejus no-
mine.

14

HISTORIA

chium cui ferme consentit Orientale Chronicon annis 13. cui ultimo accedit Elmacinus qui numerat annos 12. menses novem. Ejus memoria celebratur in Martyrologiis 22. Martii.

De diversitate nominis ea nostra conjectura est, ex Abilio factum esse *Milium*, aut *Miloum*, ut Coptice scribunt: & ut hoc nomen scribit Macrizius: nempe quia in antiqua scriptura litera B accedebat ad eam formam quam habet M in scriptura Coptica. Nam in Græcis & Latinis libris major omnino est quam in Arabicis aut Copticis autoritas. Quod verò Philetius vocatur in Eutythii Latina & Arabica editione, error antiquarii gravissimus est; quem ut multos alios ejusmodi tollere editores debuissent, non portentis noninum, historiam conturbasse.

CERDO
Petr. IV.

CERDO PATRIARCHA IV.

Ejus nomen
interpolatum.

SCRIBUNT Arabes hoc nomen non uno modo, Severus *Kerdanous*, quæ vox detorta est ex casu gignendi, atque illam rursus editores Britannii quasi data opera nugari instituisent, in Gordium transformaverunt, cum Cerdonis nomen notissimum sit ex Eusebio antiquisque Catalogis.

In vita prædecessoris ejus scribitur statim postquam Abilius seu Melianus diem suum obiit, ut de ejus obitu ad Sacerdotes & Episcopos qui ab eo in Provincia ordinati erant, fama pervenit, convenisse eos Alexandriam, habitoque cum Laicis Orthodoxis qui in ea urbe erant consilio, tandem statuisset ut sorte eligerent, qui in sede D. Marci foret collocandus, atque unanimi tandem consensu electum fuisse Cerdonem, virum probum & timentem Deum. De eo nihil præterea Severus: quod enim ex Actis Marci habetur ordinasse cum tres Presbyteros, quorum unus Cerdo fuerit, in incerto est: Synaxarium Æthiopicum traditionis hujus meminit, cujus verba à Ludolfo referuntur in Epistola ad Papebrochium: sed longè adhuc levior Synaxarii, quam Chronici Orientalis fides. Ejus memoria assignatur in Kal. Coptico 14. Cohiac. Sedit ille annis 11. obiitque 21. mensis Bounæ seu Baïni, Imperii Domitiani an. 15. Unum annum Eutythius detrahit, 10. Pontificatus tantum assignans.

P. 112.

Alexandrinam Ecclesiam per annos tres vacasse scribitur in Chronico Orientali; atque ita Pontificatus illius initium cadet in an. J. C. 99. Verum non tanti est illius Chronici autoritas, ut

contra Græcorum & Latinorum Autorum fidem, imò contra perspicuum Severi testimonium recipi debeat, cum yacationis Euty-
chius & Elmacinus non meminerint. Obitum ejus historia Eccle-
siastica assignat an. J. C. 110. Memoria ejus in Græca aut Latina
Ecclesia proprium, quem sciamus, diem non habet.

In Severi & Eutychiei exemplaribus pro Domitiano, Trajanum
substitui necesse est, cujus anno circiter 12. respondet character
temporum ab Eusebio assignatus.

PRIMUS PATRIARCHA V.

PRIMUS
Parr. V.

ORIENTALIBUS vocatur *Abrimius*, voce detorta ut ple-
rumque solent à Græca Πείμως, ut in Eusebii aliorumque
Laterculis, & omnibus Historicis. *Erat*, inquit Severus, *ex plebe*
Orthodoxa, hoc est, ex Laïcorum fidelium numero, atque adeo
ex Coptitarum traditione refellitur Eutychiei narratio de sanctione
D. Marci, ut non aliunde quàm ex duodecim Presbyterorum in-
stituto à se Collegio, Episcopus Alexandrinus adsumeretur. Pri-
mum commendabant insignis Angelicæque similis castitas, tem-
perantia, multisque bonis operibus inclaruerat. Eum igitur eligen-
tes, ordinaverunt & in Marci sede collocaverunt, quam in con-
tinua Ecclesiarum pace obtinuit annis 12. Nomen Primi mutan-
dum existimavit Papebrochius, ut Ephræm ejus loco substitue-
ret: sed frustrà. Nam Ephræm Syrum noverunt Ægyptii: neque
mirum Primi Patriarchæ memoriam in Calendario non celebrari,
cum rarò primis sæculis alii quàm martyres in eo recenserentur.
Syrum verò Ægyptii loco irrepisse, quòd eo die quo illius me-
moria fit, 3^a nempe Mefori alter obierit, rem non satis probat.
Nam Kalendarium Copticum Ephræmum sanctum simpliciter
vocat, quod idem est ac apud nos Confessor, nec illi Patriar-
chæ titulum adjungit ut aliis omnibus. Obiit secundum eum-
dem 3. mensis Mefori an. Hadriani Imperatoris 5^o. Consentiunt
Eutychieus, Elmacinus, Macrizius circa annos Pontificatus, quos
diebus 32. producit Chronicon Orientale. Mortis ejus annus
incidit in an. J. C. 122. Dominicamque Julii 27. Mefori mensis
Ægyptiacus incipit à 25. Julii Romani, atque ita congruit Copti-
tarum traditio cum vera Chronologia. De hoc Patriarcha nihil
occurrit præterea. Quæ verò ex Hagiologio Æthiopico interprete
Ludolfo producantur, verba sunt ex Copticis aut Arabicis trans-

Laïcus an-
te electio-
nem.

scripta, quæ si quid singulare continent, fidem merentur ubi meliorum Autorum consensus accedit.

JUSTUS
Patr. VI.

JUSTUS PATRIARCHA VI.

Hist. Eccles.
l. 4. c. 5.

Catal. Abul-
bircat.

MORTUO Primo electus est in ejus locum unanimi fidelium consensu vir pius & sapiens, Justus nomine, qui sedit an. 11. mortuusque est 12. mensis Bounæ seu Baini, an. 16. Hadriani Imperatoris. De eo præter nomen nihil ferme legitur in antiquis monumentis. Eutychius annos Pontificatus ejus 10. numerat. Obitus secundum Eusebium incidit in an. 14. Hadriani, J. C. 130. qui secundum Orientale Chronicon incurrit in an. J. C. 133. 12^a Bayni dies convenit 6^e Julii. Cave autem ne sequaris Chronologiam quam Catalogo suo Kircherus adjunxit, ubi omnia turbata tum ab autore, tum ab operis typographicis. ~~Idem~~ vocatur ab Ægyptiis, Justinus à Nicephoro. Eum cum patre & matre baptisatum à Marco, dicitur in Synaxario Æthiopico.

EUMENIUS
Patr. VII.

EUMENIUS PATRIARCHA VII.

Hist. Eccles.
l. 5. c. 11.

ELECTUS post Justi mortem Deo & plebi suæ acceptus. Sedit annos 13. ut etiam testatur Eusebius. Mortuus est 10. Baux seu Paophi, qui dies respondet 7. Octob. anno Antonini Imperatoris 5^e secundum Severum. Sed Eutychius cum ait ordinatum esse an. Hadriani 2. & post annos decem mortuum, atque ita non pervenisset ad Antonini tempora. Elmacinus initia Pontificatus ejus alligat an. 16. Hadriani; aitque sedisse an. 10. mens. 4. ita Macrizius & Chronicon an. 10. dies 122. Secundum veriores calculos obitus ejus incidit in an. J. C. 143. Antonini 6. In Chronico Eusebiano, Hymenæus appellatur. Nihil sub isto Patriarcha aut ejus prædecessore de persecutione sub Hadriano, quam in Ægypto viguisse sub Primo, Macrizius scribit. Dicitur tamen passa eo tempore sancta Sophia cum tribus filiabus, quarum memoria apud Græcos celebratur 17. Septembris, & 30. apud Latinos. Fidem, Spem & Charitatem vocant ejus filias Græci in Horologio & Menologio. Ejus memoria occurrit in Calendario Copitarum apud Abulbircat ad 3. diem Thoth: ut etiam in iis quæ dedit Seldenus: in Synaxario Græco ad 18. Septembris Eumenii, sed alterius, Gortynæ Episcopi.

MARCIANUS

PATRIARCHARUM ALEXANDRINORUM. 17

MARCIANUS PATRIARCHA VIII.

MARCIANUS
PATR. VIII.

MORTUO Eumenio electus est Marcianus, ordinatusque Patriarcha. Sedit an. novem, menses aliquot, vitamque insignem exemplo & pietate duxit. Obiit 6. Tybi seu Tubæ an. 15. Antonini. Dies ille in Calendario Ægyptiaco respondet 1. Januarii. Ita omnes ferme Orientales. Elmacinus scribit ordinatum fuisse Marcianum an. 5. Antonini, hoc est J. C. 143. sedisse an. 9. menses 6. mortuum esse 6. Tubæ, ac ejusdem Imperatoris 15. Ita obiit an. 153. non 149. ut perperam legitur in Chronico Eusebii, qui Marcum illum vocat ut veteres quidam Catalogi. Coptiæ & Arabes, Marcianum.

CELADION, seu CLAUDIANUS, PATR. IX.

CELADION
PATR. IX.

KΕΛΑΔΙΟΝ vocatur in Indiculo Coptico : Claudianus à Severo, Eutychio, Chronico Orientali, Elmacino, Abulbircat Makrizio & aliis. Sed credibilis est corruptum fuisse ab Ægyptiis & Arabibus nomen, nam Eusebius & alii Celadionem vocant.

Cum post Eumenii obitum fideles laici, simulque Episcopi Alexandriam convenissent, unanimi consensu elegerunt virum amore Dei conspicuum, Claudianum nomine, & in Sede D. Marci collocaverunt. Sedit an. 14. Elmacinus diem obitus quem Severus non designat, ait fuisse 9. diem Abib seu Epiphi, an. 7. Aureliani Imperatoris. Intellige M. Aurelium Antoninum, cujus eo anno mortem Celadionis assignat, & an. J. C. 167. Historia Ecclesiastica. Dies 9. Epiphi incidit in 3. Julii. Quod Claudius appellatur hic Patriarcha, vitium est exemplaris & Interpretis Eutychii.

Nihil præterea de hoc Patriarcha legitur, nisi quod sepultus fuerit Alexandriæ cum prædecessoribus suis.

AGRIPPINUS PATRIARCHA X.

AGRIPPINOS
PATR. X.

NIHIŁ etiam de eo, nisi quod electus est à populo Christiano, & impositione manuum consecratus Patriarcha. Sedit an. 12. obiitque 5. Amschiri seu Mechir, hoc est 30. Januarii, an. 19. ejusdem Imperatoris, J. C. 179. ut Autor recentior Historiæ Ec-

C

cleſiaſtica probavit. Severo per omnia conſentit Elmacinus. Agri-
bui nomen nihili, quod qua ratione Pocockius ut multa alia re-
liquerit, quia ita legebatur in ſuo exemplari, ſatis mirari non poſ-
ſumus. Si quis eum imitetur, tot erunt portenta quot nomina. At
Agrippinus ſcribitur, quantum in hac incommoda ſcriptura licet, in
omnibus Autoribus. Quod Antiochenus vocatur, in Verſione La-
tina operarum error fuit, nam Arabicus textus rectè habet. Con-
ſentit Euſebius circa annorum Episcopatus numerum, atque ita
veteres ferme omnes qui Agrippini meminerunt.

JULIANUS PATRIARCHA XI.

ITA vocatur Patriarcha ille apud Euſebium, tam in hiſtoria quam
in Chronico, aliſque monumentis Eccleſiaſticis. Lulianus ſcri-
bitur in Codice Severi, ſed per errorem manifeſtum ex primæ
literæ productione, qui tum ex Catalogo Kircheriano, tum ex eo
qui eſt apud Abulbircat & alios Autores, debet emendari.

Severus ait fuiſſe illum ſacerdotem in ſacris literis interpretan-
dis peritiſſimum, prudentem, modeſtum, religioſum, temperantia
& morum ſuavitate inſignem. Congregatis igitur poſt Agrippini
mortem Episcopis, habitaque Synodo, cum præſentibus laicis fide-
libus, quæſitum fuiſſet quis in locum deſuncti ſubſtitueretur, com-
muni omnium ſententia deſignatum fuiſſe Julianum, quandoqui-
dem nullus qui eum meritis exæquaret repertus fuit. Itaque per
impoſitionem manuum conſecratus, & Patriarcha ſalutatus eſt.
Scripſit Homilias multas & ſermones de Sanctis. Sedit an. 10. &
poſt illum Patriarcham nullus Episcoporum Alexandrinorum in
urbe manſit; ſed ſecretò egrediebantur, & ordinationes ſacerdo-
tum diverſis in locis faciebant, exemplo Marci Evangeliftæ. Obiit
Julianus 8. menſis Farmuthi, an. 5. Imperatoris Severiani. Eu-
tychius an. 5. Marci Aurelii ordinatum eum ſcribit, quo eum
mortuum Severus exiſtimavit: nam Severianus nomen nihili,
quia Aurelium Antoninum aiunt vocatum quoque eſſe Antonium
Severum. Elmacinus 1. an. Commodi, Juliani ordinationem
aſſignat: quæ conciliari non poſſunt, nec ulla utilitas eſt in expli-
candis Autoribus qui perpetuo & inſanabili errore Chronologiam
perturbant.

Euty. l. 1.
p. 360.

Euſebius Juliani initium reſert ad 19. annum M. Aurelii An-
tonini Philoſophi, ad quem ita propius accedit Elmacinus quam alii,

fed ne in illis Autoribus conciliandis abutamur operam, Agrippinum mortuum esse an. J. C. 179. 30. Januarii statuit Autor Historiæ Ecclesiasticæ. Julianum verò obiisse post annos Pontificatus decem, an. Christi 189. circa 4. Martii, idem Autor observat ex Chronici Orientalis obscura numeratione : qui annus est Commodi 9. & 10. Octavus dies Barmâthi incidit in 3. Martii. Barmâth seu Barmahat, ut Arabes scribere solent, est mensis 7. anni Ægyptiaci, quem Ægyptii Phamenoth appellant. Atque hæc sunt quæ de Juliano Patriarcha reperimus in Scriptoribus Arabicis. Græci & Latini non plura memoriæ prodiderunt. Quod scribit Severus nullum ab eo tempore Episcopum Alexandriae mansisse, non satis accuratè dictum videtur : illud, opinor, intelligendum est, quòd persecutionum metu, quæ deinde fuerunt gravissimæ, urbe excedere coactus fuerit : id porro de Patriarcha intelligendum docet Eutychius, qui cum de Theona ageret, ait : Christiani autem Alexandrini in speluncis & domibus clam orabant metu Romanorum ne ipsos trucidarent, neque manifestò se exhibebat Patriarcha in Alexandria. Itaque Episcopus plebem suam vicatim visitare & consolari cœpit, tum etiam Sacerdotes & alios Ecclesiæ ministros ordinare, qui in persecutione fidelibus auxilio esse possent. Nam anno Marci Aurelii 17. J. C. 177. intermissa ab annis circiter tribus persecutio Christianorum, majorem in modum exarsit, superstitè etiamnum Agrippino. Unde satis diligenter observavit Makrizius sævitum sub eo & ejus prædecessore in Christianos fuisse, quod etiam Elmacino annotatum est.

Porro quidquid de singulari illa Severi observatione judicatur, quæ Orientalis Chronici testimonio confirmatur, ea de Alexandrino Episcopo, non de aliis intelligenda videtur, quem persecutionis vitandæ causâ urbe excessisse verisimile est. Neque etiam inde idoneum adversus Eutychii vel Seldeni potius, narrationem, quasi ante Demetrium Episcopi tota Ægypto nulli fuissent, argumentum duci potest. Episcopos alios fuisse, conventus eorum ad eligendos Patriarchas satis demonstrat : neque à Dioecesium abesse alios Episcopos, ferebat illius temporis disciplina. Tanta non est Chronici fides ut Severi testimonio præferenda sit, à quo autor quicumque fuerit accepit omnia : interpretem verò Echellensem lapsum, faciliè credi potest.

T. 3. p. 61.

Eutych. l. I.
p. 359.

V. Hist. Patr.
Alex. Chronol.
p. 23.

DEMETRIUS
PATR. XII.

DEMETRIUS PATRIARCHA XII.

JAM ad minus obscura Ecclesiæ tempora pervenimus, quæ quidem in Græcis ac Latinis monumentis plenius explicata sunt: in Arabicis plura legimus, sed non ejusdem generis, cum ut ex tota hujus operis serie manifestum fiet, falsa veris admiscere Orientales ita soleant, ut nisi aliunde lux aliqua affulgeret, impossibile esset omnino ex talibus historicis, quales excepto nemine sunt omnes illi quos sequimur, verisimilis historiæ speciem vel leviter delineare. Quia verò non totius Ecclesiæ sed Alexandrinæ tantum historiam scribimus, imò traditionis quæ inter Arabes Christianos extat vestigia relegimus: idcirco non aliud præstabimus quam ut summatim referantur, quæ tum Severus tum alii scripserunt prolixius, deinde ea adjiciuntur à nobis quæ ad ejusdem narrationis veritatem confirmandam aut falsitatem revincendam, ex Historia Ecclesiastica peti possunt, ne fabulis quod ante nos alii fecerunt, aut interpretandis, aut in pauciora verba contrahendis, operam lectorum pariter abutamur & nostram.

LAIUS &
UXORATUS.

Demetrius igitur, ut apud veteres Autores Ecclesiasticos, ita apud Orientales Christianos magna sanctitatis & doctrinæ laude commendatur. De ejus initiis ita scribit Severus. Cum Julianus Patriarcha in extremis esset, apparuit ei Angelus Domini, qui dixit illi; futurum ut postridie manè ad eum vir quidam veniret, recentemque uvam afferret; eum esse qui post ejus obitum futurus esset Patriarcha. Manè venit ad eum vir rusticus, uxoratus, idiota, qui nec legere nec scribere posset. Ille cum ad pastinandam vineam exiisset, invenit in ea tempore non suo, uvam recentem, quam ad Patriarcham Julianum detulit. Is eo viso statim adstantibus dixit: Hic est Patriarcha vester quem designavit mihi Angelus Domini. Illi apprehensum Demetrium retinuerunt, reluctantem, adeo ut vinculis confringendus fuerit, quod deinceps erga plerisque Patriarchas observatum in consuetudinem transiit; & Patriarcham ordinaverunt, descenditque super eum divina gratia. Ea porro verba non otiosè fortassis accipienda sunt, sed ordinationem Ecclesiastico more factam designant, quam Orientales impositione manuum Episcopaliū petici credunt, tum solennibus etiam Orationibus, quarum præcipuæ sunt illæ quibus divinam gratiam implorant pro ordinando, Ordinationemque perfici

PATRIARCHARUM ALEXANDRINORUM. 21

DEMETRIUS
Patr. XII.

credunt cūm dicunt, *Divina gratia talem designat & eligit ad pascendum gregem Christi*, etsi in verbis est quædam pro rituum diversitate varietas. Ea autem Oratio apud Græcos quoque eadem cum religione & fide dicitur.

Demetrius etsi matrimonio, ut credebatur, implicatus; tamen Iosephi exemplo pudicam semper vitam duxerat, nec uxorem attigerat. Ea res cūm ignoraretur, fuerunt qui ejus ordinationem calumniarentur quasi non legitimè factam, quia uxorem haberet, & secundum Apostolicos Canones id non liceret: quod tamen excusabant alii testimonio Pauli Apostoli honorabiles nuptias appellantis; sed objiciebatur perpetua consuetudo secundum quam à D. Marco ad hunc usque Patriarcham, non modò nullus uxorem habuerat, sed omnes virginitatem servaverant. Cūm tamen ea occasione multi fidelium scandalisati forent, monitus est ab Angelo ut salutis gregis sui rationem haberet, bonum quippe pastorem animam impendere pro ovibus suis. Hæc de martyrio cūm intellexisset Demetrius, paratusque esset ad mortem pro Christi nomine subeundam, iterum revelatione sibi facta jussus est aperire plebi sibi commissæ secretum quod ipse solus cum uxore servabat. Itaque in solennitate Pentecostes cūm Liturgiam celebrasset, per Archidiaconum significari curavit ne quis ex Ecclesia abscederet, antequam ad populum verba fecisset. Tum in concionem prodians jussit ignem accendi, & uxorem advocari. Ipse in ignem ingressus & super prunas ambulans, carbones multos in Orarium coniecit, tum jussa uxore ut eas velo suo exciperet, thus iniecit, atque illi præcepit ut per multitudinem populi procederet, & incensum adoleret. His perfectis, professus se non amore gloriæ, sed solius caritatis intuitu, ne quis de se seciùs judicaret, aut scandalum pateretur hæc fecisse; tandem significavit, uxorem suam secum à prima ætate semper pudicè vixisse, neque illam aliter se nisi ex facie novisse, quam utriusque innocentiam & castitatem præfens miraculum confirmasset. Fusiùs hæc Severus; & Autor Chronici Orientalis. Strictiùs Elmacinus, ita tamen ut nihil aliud experimenti factum fuisse scribat, nisi quòd Feria v. majoris hebdomadæ inter Missarum solennia uxorem accersiverit, prunas quæ thuribulo continebantur, eam velo capitis lanco excipere jussisset, thus iniecerit, atque eam præceperit Ecclesiam circumire, & incensum adolere, velum ab igne illæsum permansisse, tum Patriarcham qua ratione per annos quadraginta octo simul virginitatem serva-

Miraculo
castimonia
ejus probata.

C iij



sent, oratione exposuisse, omnes ab eo temerarii de illius conjugio iudicii veniam petivisse.

Quid de
hic narratio-
ne consen-
sum sit.

Hæc historia quæ nulla aliorum præterquam Arabum, quos designavimus, & Chronici Orientalis autoritate nititur, ea solum ratione omittenda non fuit, quod veteris disciplinæ circa Episcoporum cœlibatum monumentum sit non plane contemnendum. Quod enim refertur quæstos fuisse Christianos Alexandrinos, quasi Demetrius ob initas ante Episcopatum nuptias ad Episcopatum promoveri non potuisset, erat sanè contra veterem disciplinam, quæ ut ex Pauli doctrina manifestum est, unius uxoris virum Episcopum esse voluit: unde tot Canones de bigamis à sacerdotio repellendis. Si quis tamen ex hac narratione probari existimat Demetrium in supremo ordine constitutum uxorem retinuisse, & apud se habuisse; quod quidem nondum satis constitutâ disciplinâ fieri potuit, atque ex contubernio suspicionem natam, quasi adhuc conjugale opus exerceret, id non inviti fatebimur. At ut inde effici queat Demetrium impunè in Patriarchatu cum uxore vixisse, neque valuisse querimonias fidelium, ut tale exemplum contra mores antiquos induceretur, id neque Severi, neque Chronici, neque Elmacini narrationes probant; & quamvis probarent, majori quàm recentium adeo scriptorum autoritate opus esset ad rei tam alienæ à Christianorum moribus veritatem stabilendam. Verùm non aliud Autores designaverunt, quàm quod non cœlebs, imò qui non virginitatem perpetuam coluisset, ad Pontificatum assumi, Christiani Alexandrini haud patienter tulissent. Eam ut suspicionem evelleret ex hominum animis, probationem per ignem adhibuit, ut eo argumento de perpetua sua uxorisque virginitate constaret. Nec alia sane sententia Autoribus qui eam historiam retulerunt esse potuit, gnaris veteris disciplinæ de Episcoporum castimonia quam Collectiones omnes Canonum repræsentant.

Hinc refel-
litur Euty-
chius de duo-
decim Pres-
byteris nar-
ratio.

Peccata oc-
cultâ cognos-
cebat Deme-
trius.

Hinc etiam observari potest vel ex ea historia refelli Eutychii de duodecim Presbyterorum collegio narrationem, cum ex eorum numero Demetrius non esset, verùm ut existimant rusticus & illiteratus, quod tamen incredibile videtur, nec magnam ex Autorum qui ita scribunt testimonio fidem nanciscitur.

Narrant Demetrium, Deo revelante, eorum qui ad communio-
nem percipiendam accederent, peccata cognovisse; atque adeo si
de illis pœnitentiam non egissent, repellebat eos, monens ut de

tali peccato poenitentiam agerent, & postea ad communionem venirent. Magnus itaque metus omnes invasit, adeo ut nullus gravioris culpæ sibi conscius auderet expetere communionem, ne peccata ejus à Patriarcha palam fierent.

Sed mira sunt quæ deinde narrantur de Origene, quem non modò plerique Græci à multis sæculis, sed etiam Jacobitæ omnesque aliæ sectæ, præter veritatem omnibus probis onerant, magnum interea insciitiæ suæ in rebus Ecclesiasticis documentum præbentes. De illis quæ præclare ab Origene gesta fuerant, martyrio Patris, voluntaria paupertate, ardore martyrii sustinendi, indefessò sacrarum literarum studio, ne loquuntur quidem. Verùm statim contra omnem antiquitatis Ecclesiasticæ fidem, hæc ferme de eo scribit Severus. Venisse Alexandriam tempore quo Demetrius Ecclesiam regebat, hominem literis sæcularibus eruditum, imò & artibus magicis imbutum, Origenem nomine: qui sacras literas & voce & scripto interpretatus est, ita ut blasphemias multas temerè effunderet, scripturæque auctoritatem parvi faceret. Docuisse inter alia quòd Pater creavit Filium; à quo creatus postea fuisset Spiritus sanctus: atque ita unitatem divinæ naturæ in trinitate personarum penitus destruxisse. Propter illas & multas alias hæreses & blasphemias eum ab Ecclesia ejectum fuisse Demetrii sententiâ. Origenem Alexandriâ pulsum in Palestinam venisse & Cæsareæ substituisse, ibique ab illius urbis Episcopo Presbyterum ordinatum fuisse. Deinde Alexandriam rediisse, cùm existimaret posse se in ea Ecclesia dignitatem, quam Cæsareæ consecutus erat, retinere. Verùm negasse Demetrium licere secundum Canonem Apostolorum, ut Presbyter ab altari ad quod ordinatus fuerat recederet: iret igitur ad Ecclesiam in qua ordinem sacerdotalem acceperat, atque ita rursus Alexandriâ pepulisse. Tum ineptias novis fabulis cumulando scribunt Origenem de recuperanda communionem desperantem, ad Judæos transivisse, quibus sacras literas interpretabatur secundum Codices Hebræicos, non secundum Versionem ab Ecclesia receptam, prophetias, quæ de Christo sunt, malignè secundum literam explicans, sed eorum sensum & veram interpretationem dissimulans. Exemplum referunt, quòd dum Abrahami historiam exponeret, reticuisse diceretur, id quod à Patribus unanimi consensu scriptum erat, vepres illos quibus impeditus aries ab Abrahamo inventus est, crucis Domini figuram fuisse. Hæc fermè de Origene quæ passim

De Origene
Ægyptiorum traditio.

reperiuntur in locis non suis, quodcumque styllum Autoribus adversus eum acuerè visum est. Hujus de Origene tam perversæ opinionis ea causa est. Orientales omnes, etiam illi qui extra unitatem Ecclesiæ sunt, Edictum Justiniani de fide, & quæcumque in eo continentur adversus Origenem & Origenistas, eadem fermè autoritate valere credunt ac Decreta Conciliorum : atque illa quæ singulari titulo *Canones Imperatorios* appellant. In iis igitur cum multa legantur adversus Origenem, ea in suos libros transtulerunt, præsertim Jacobitæ Ægyptii, qui cum se Cyrilli discipulos profiterentur, scirentque illius, tum Theophili cui successerát, zelum adversus Origenem & Origenis defensores, veritate neglecta cujus eos ignarissimos fuisse, vel ex sola insulsa quam retulimus narratione constar, tum maximè eorum doctrinam secutos se existimaverunt, si in virum magnum contumeliosissimi forent. Neque enim de tota historia Origenis præter ejusmodi fabulas quidquam omnino sciunt. Libros ejus ne ex nomine quidem noverunt : & quæcumque concertationes de ejus libris & doctrina, Catholicos exercuerunt, sunt Orientalibus ignotissimæ. Nihil igitur ad eos ex tam diffusa tamque varia historia pervenit, nisi quòd Origenes à Demetrio Ecclesiâ pulsus est, eò quòd ab alieno Episcopo fuisset ordinatus. Cum verò Demetrium inter Sanctos numerent, post tot miracula quibus ejus sanctimonia apud eos constar, cum in livoris aut iniqui adversus Origenem animi suspicionem adduci non patiuntur.

Narrat præterea Severus de Demetrio, eum ex quo ad Episcopalem dignitatem evectus est, cum antea literarum planè rudis esset, tanto studio sacrarum literarum & aliorum librorum Ecclesiasticorum lectioni incubuisse, ut doctissimus evaserit. Itaque in extrema senectute cum ad Ecclesiam lecticâ deferretur, sermones ad populum habebat, diebusque integris, & sæpe etiam noctibus, catecheses continuabat.

Sedit Demetrius secundum Severum annis 43. atque ita Eutychius, quibus consentiunt Autores alii majoris autoritatis, Eusebius, Georgius Syncellus : licet alii decennium subtrahant. Nam 32. annos tantum ei attribuit Chronicon Orientale : Makrizius, & Elmacinus 33. Mortem ejus an. J. C. 231. Alexandri an. 9. aut 10. contigisse probavit Autor historiæ Ecclesiasticæ, cujus diligentia addi nihil potest.

Memoria Demetrii assignatur in Calendario Coptitarum, 11. Paophi

PATRIARCHARUM ALEXANDRINORUM. 25

DEMETRIOS
Patr. XII.

Paophi seu Baba ut Arabes pronuntiant : 12. ejusdem in eo quod edidit Ludolphus.

Computi Paschalis autorem illum fuisse, & de ratione Paschatis ad Romanum Antiochenum & Hierosolymitanum Patriarchas scripsisse, ait Eutychius : sed Epactarum & calculi Paschalis revelationem à Spiritu sancto accepisse legitur in Synaxario Æthiopico : cujus verba obscurissima, *institutori abstinentiæ à potu & constitutori ciborum in Pentecoste*, si rectè à Ludolfo versa sunt, significant id quod non minus obscurè Eutychius scripsit, nempe ut jejunii quadragesimalis, quod post Epiphaniæ festum celebratur, tempus præscriperit, quod postea quinquaginta diebus qui à Paschate proximi numerantur, solveretur. Sed hæc tanti non sunt, cum ea de Epactis opinio plane incerta sit.

Hist. Patr.
dix. §. 119.

T. I. p. 361.

HERACLAS PATRIARCHA XIII.

HERACLAS
Patr. XIII.

HIEROCLA vocatur à Severo & plerisque aliis Arabicè scribentibus : Hieroclas in Catalogo Coptico-Arabico Kircheri : Hercol apud Eutychium, ex quo interpretes Heraclium formavit, quia Imperator hujus nominis ita vulgò vocatur apud Arabes : nomen planè corruptum apud Makrizium qui Theoclam vocat. Sed de vera ipsius scriptura dubitare non sinit Eusebius, qui de illo multa habet, ut reliqui Scriptores Ecclesiastici.

Mortuo Demetrio, ait Severus electum fuisse ad Patriarchalem Sedem Heraclam, qui prædecessoris tempore docuerat in Ecclesia sacras literas magna cum laude, nempe ut ex Eusebio, Origenes discimus, Catecheses quas Origenes priùs tanto fructu docuerat, illius curæ commissæ fuerant. Statim atque Episcopatum suscepit, omnem negotiorum Ecclesiasticorum molem transtulit in Dionysium, qui eidem successit, virum nobilem & eruditum. Is cum idololatra priùs fuisset, Sabiorumque sectæ addictus, & in ea quodammodo præcipuus, ad Christianam fidem ita vocatus est. Sedit & otioso vetula quædam transiens, codicem obtulit Epistolæ Pauli continentem. Earum prima inspectione adeo affectus est, ut numerato pretio ultrà quàm illa petierat, jussit ut similes libros sibi conquereret, quos allatos aureis aliquot ab ea redemit ; alios adhuc afferri sibi majoris pretii pollicitatione postulans. Tum illa, Quin, inquit, ad Ecclesiam abis, & à Sacerdotibus integrum sacræ Scripturæ librum postulas, qui illum tibi legendum

*Ejusad fidem conversio.

Ita in Synax.
Æthiop.

communicabunt? Itaque cum sacerdotes adiisset, & ab illis integras D. Pauli Apostoli Epistolas accepisset, sacra illa lectione plane mutatus, Demetrium adiit & ab eo baptismum petiit. Postea baptisatus ab eo est, atque gratiam consecutus est, nempe ut verisimile existimamus, Sacramentum Confirmationis quod à veteri Ecclesia acceptum, ut nos Catholici, ita Orientales omnes huc usque conservant, & *Myron*, ab oleo balsamino quod ad unctionem adhibetur, vulgò vocant, aliquando *σπερμίδα*, nonnumquam *Gratiam spiritus sancti*.

Adjungit se
Demetrio.

Dionysius jam Christianus factus, adjunxit se Patriarchæ Demetrio, ab Ecclesia non discedens, cum antea inter Sabæos sive Idololatrias, Magistri, & quidem præcipui, locum tenuisset; in Ecclesia Doctoris & Catechetæ dignitatem magna sua cum laude sustinuit, confluentibus ad eum audiendum undequaque discipulis, quos inter nominatissimi fuerunt Theodorus, Gregorius, & alius cujus nomen ob defectum codicis legi non potest. Ita quos prius in Philosophia Græcanica profanaque discipulos habuerat, in Christiana fide discipulos habuit: alios quoque ad fidem convertit. Tandem obiit Heraclas cum 13. annis Cathedram tenuisset, 8. mensis Cohiac, & appositus est ad patres suos. Plura de eo non scribit Severus: in cujus jejuna exilique narratione peccata multa sunt. Certum enim est, ex Eusebio, omnibusque Ecclesiasticis Autoribus, Heraclam fuisse Origenis discipulum, quod cum ex odio nominis Origeniani diffimulaverint aut ignoraverint Arabes, fabulam inde commenti sunt de magicarum artium studio, quas Heraclam excoluisse antequam baptisaretur, scribunt ipsi, sed idoneo autore nullo. Sabaismum enim ita solent cum antiqua Philosophia conjungere, ut idem esse existiment, cum maxime differant. Nam Sabæorum philosophia erat propriè secta Persica sive Zoroastræ, quæ præter astrorum cultum, *μαγικὰ τέχνην* docebat variasque superstitiones magicas adjungebat. Unde etiam si Magorum veterum religio in multis diversâ esset à communi *Ignicolarum* quos *Ateschperestan* vocant, hæresi; & à Saducæa quam vocant *Zenadeket*, Sabæi Orientales multa cum utrisque communia haberent, sed alia valde diversâ, omnes tamen illas sectas Arabes inter se confundunt, adeo ut Sabaismum omnes ferme hæreses contineat, præsertim in Philosophia fundatas, quæ cum Judaicæ, Christianæque religionis doctrina pugnant. Itâ sæpe Alcorani Interpretes Sabaismum definiunt: aliter de iis, &

Severus
multa in hac
historia pec-
cavit.

accuratius scribit secundum quosdam eorum libros, sed plane nugaces, & ex recentiori Ignicolarum, & Brachmanum doctrina compositos Moses Maimonides in More Nebuchim. Sed hæc non sunt hujus loci, accuratiusque ea explicari nonnisi longa dissertatione possent. Sufficit ad Autorum nostrorum intelligentiam asserere, hoc loco per Sabæorum doctrinam nihil aliud debere intelligi, quam Græcanicam Philosophiam, cui ut Origenes maximum studium impendit, quod Philosophos qui tunc maximè florebant, & in pretio erant, confutaret, & ad fidem Christianam adduceret, ita ex ejus schola Philosophi magni nominis prodierunt, inter quos non obscurum fuit Heraclæ nomen. Falsus est quoque Severus, dum Heraclam à Demetrio ad fidem adductum scribit, cum satis constet eum fuisse Origenis discipulum. Sed hæc omnia accuratè pertractata sunt Tomo 3. Historiæ Ecclesiasticæ, adeo ut nihil Autoris diligentæ adjici queat.

Tillem. 2. 3.

Eutychius Alexandrinus. sub hoc primùm Patriarcha datum esse scribit *Papæ* titulum, Alexandrino Patriarchæ. Quia verò magnas hujus loci autoritate nugas olim egit Joannes Seldenus, illius translationem referemus. *Mortuo Demetrio successit ei Heraclas Patriarcha Alexandrinus, qui Episcopos constituit viginti. Ex his unus erat Ammonius dictus, Religionis desertor. De quo simul ad Heraclam delata est fama, congregavit is Synodum Episcoporum, & in urbem Ammonii perrexit, ubi re satis cognita & perspecta, eum ad veritatem reduxit. Cum verò homines audierunt Episcopos vocitare Patriarcham, Abba seu Patrem, inter se dixerunt: Nos Episcopum quemlibet Abba seu Patrem appellamus: & appellant Episcopi Patriarcham Abba, unde sane oportet ut vocemus nos Patriarcham, Papam, id est Avum, cum sit Pater Patrum. Ita à tempore Heraclæ Patriarcha Alexandrinus dictus est Papa, id est Avus. Quæ de prima Episcoporum institutione in Provinciis Ægypti, Seldenus ex Eutychio male intellecto ad Presbyterianæ factionis præsidium scripsit, jam paucis refutata sunt, cum certissimum sit ante Demetrium & Heraclam, Episcopos in Ægypto fuisse, etiam in inferiori provincia, de qua tamen locutus est Eutychius, non de tota Ægypto. Nam ad Synodos aliquot, convenisse Episcopos Ægyptios monumenta Ecclesiastica testantur, qualiacunque sint ea, ex quibus Severus Historiam concinnavit, & Episcoporum ad eligendos Patriarchas convenientium ipse non uno loco meminit.* Sed

An ejus tempore Alexandrinus Episcopus vocari coeperit Papa.

Orig. Eccl. A. ix. p. 34.

aeque ignotum illud quod de Heracla prodit Eutyechius, quòd viginti Episcopos ordinaverit. Nempe fieri potuisse nemo negabit, ut per 13. & ampliùs Patriarchatùs annos, talem eorum numerum ordinaverit : at quod novas sedes instituerit credetur, cùm meliorem Eutychio fidejussorem habebimus. Nempe virum non magnæ doctrinæ nulliusque in antiquitate illustranda judicii sefellit obscurus aliquis Chronographus, qui ex Conciliis adversus Origenem congregatis, ubi satis magna Episcoporum Ægypti frequentia fuit ; cùm hæc sub Demetrio contigerint, facile arbitratus est tum primùm institutos fuisse Episcopos in Provincia *Mesræ*, seu Ægypto inferiori, quia primam eorum mentionem fieri tunc animadvertit.

De nomine Papæ nihil magis ridiculum. Patriarchis Alexandrinis nomen istud commune olim fuit non modò cum aliis primarum Sedium, sed cum omnibus Episcopis, præsertim in Occidente.

Præ cæteris autem jam ab Athanasio, observamus vocatum esse Alexandrum prædecessorem suum eo titulo Μακαρίω πάπα ἱεροπόλεως ἡμεῶν Ἀλεξανδρου : quomodo Theophilum Papam appellat Palladius in vita Chrysostomi. Plura hujus tituli Alexandrinis Patriarchis attributi testimonia collegit vir clarissimus Carolus Cangeus in Lexico Græco-barbaro. At quod nomen olim multis Episcopis & Patriarchis commune erat, duobus tantummodo proprium remansit, Romano scilicet & Alexandrino. De Romano nemo nescit : Alexandrino titulus adhuc servatur apud Græcos & Jacobitas. Sed quod mirum est, Schismaticorum faciliè princeps, odioque adversus Latinos suo, reliquos omnes superans

De Syn. Armin. p. 885.

Jur. Gr. Rom. l. 7. p. 450.

Theodorus Balsamon, hunc titulum cum reliquis *προπορίοις* sive Privilegiis ad Alexandrinum Patriarcham pervenisse ait beneficio Romani Pontificis, dum ejus locum Cyrillus obtinuit in Ephesino Concilio. Hæc cùm ignoraret Eutyechius ridiculam plane commentus est nominis istius etymologiam, quæ à nemine tradita est. Videri possunt quæ de hoc argumento prolixius disputavit adversus Seldenum Abrahamus Echellensis in Eutychio vindicato. Haurit eam traditionem ab Eutychio quem ut alios Christianos Arabes legerat, Makrizius Muhamedanus, etsi ut nunquam non faciunt Orientales, quædam aliter retulerit. *Vocabatur, inquit, Patriarcha Alexandrinus Papa jam à tempore Hananiae sive Aniani, qui primus post Marcum Patriarcha fuit. Ab ejus tempore usque ad Demetrium undecimum Patriarcham non erat in terra,*

*inferioris Ægypti Episcopus. At ille in ea Episcopus constituit, & multiplicati sunt in pagis illius regionis sub Patriarchatu Heracla. Episcopi Patriarcham vocabant Patrem: Sacerdotes & reliqui Christiani eodem Patris nomine Episcopum appellabant. Instituerunt igitur ut vox Baba seu Papa, quæ significat Patrem Patrum, Alexandrino Patriarchæ peculiariter tribueretur. Deinde translata est illa appellatio à Sede Alexandrina ad Sedem Romanam, quia illa est sedes Petri principis Apostolorum. Atque inde Patriarcha Romanus cæpit appellari Papa, quod perpetuo usu confirmatum, ad hæc usque nostra tempora perseverat. Hæc ille melius profectò quàm Euty chius, etsi plane contra veritatem, præterquam quòd ut rerum Christianarum parum peritus, delictum inter veterem Patriarchatum, qualis erat ante discissam Ecclesiam, haud satis intellexit; non erravit tamen, dum titulum hunc in Alexandrinis Patriarchis defecisse scribit. Nec enim alios agnoscebat quàm Coptitas-Jacobitas, qui eo titulo rariùs utuntur. Attamen in Liturgia, quo loco oratur pro Patriarcha Alexandrino: titulus est in Græco Basilianæ codice *ὁ πρὸς τὴν πόλιν ὁ Πάπας*, oratio pro Papa: & in ea oratione *Memento Domine sanctissimi & beatissimi Pontificis nostri Abba N. Papa & Patriarchæ magnæ urbis Alexandriae*. Ea verba quæ occurrunt in Marci Liturgia Græcè edita, existimavit interpret Joannes à sancto Andrea ad Romanum Pontificem pertinere; sed de Alexandrino agebatur. Unde facillè in eam opinionem adductus est Makrizius ut crederet hanc honoris prærogativam ad Romanum Pontificem transivisse, de cujus Primatu melius loquitur, quàm Presbyterianus Seldenus. Et sane illum agnoscunt Muhamedani omnes, ut vel ex verbis Edrisij Geographi Nubienfis quæ Seldenus citat, agnosci potest. Sed multò plura alij Autores cùm de Roma scribunt, Abulfeda, Yacutus Hamathæus, Abdelmuhafen & multi alij, quorum sententia una est, *Papam esse Calisam Christianorum*. At ex eorum moribus & religione, Calisæ suprema erat in Musulmanos omnes autoritas, imò & in Principes, qui ab eo investituras, ut proprio verbo utamur, accipiebant, nec id modò erat illorum erga Calisam obsequium, sed honorem primarum in Meschiis precum habebat, adeo ut pro Calisæ, deinde pro Sultano preces fierent, moneta illius nomine inscriberetur, Diplomata dignitatis suæ, Vexillum, Ensem, Cidarim, picturam Vestem ab illo acciperent. Ea verò comparatio tantopere olim nostris hominibus placuit, ut sicut*

* L'Apostolique
des Saracens.
Journville &c.

Muhamedani Papam vocabant *Calisam Christianorum*, ita Auctores bellorum trans mare gestorum, haud aliter vulgò Calisam appellare solent, quàm *Apostolicum Saracenorum* *. Quocirca quæ Protestantes de veteri Romanæ Sedis prærogativa scribunt, ea vel nobis tacentibus refellunt Muhamedani, tantumque abest ut ejus primatum in reliquos Antistites omnesque Christianos non agnoscant, ut in ejus autoritate definienda modum excedere quodanmodo videantur.

Observandum quoque Papæ nomen apud Syros Orientales duplici sensu usurpari : primo quidem simplicem Sacerdotem significat, ut nunc apud Græcos : tum aliquando Antiochenum Patriarcham qui vocatur *Papa Orientis* ; & interdum Catholicos Persidis & Armeniæ, qui dudum vocari solent *Mosriani*. Plura de nomine Papæ qui volet, consulere poterit cruditam Dissertationem de hoc argumento, quam Bollandi Continuatores vitæ Heraclæ subjecerunt.

De Ammonio.

Hist. Nest.
Ar. Ms.

De Ammonio errat quoque Severus, neque enim illum Episcopum fuisse alibi legitur, neque hæresis ullius notatus est à Scriptoribus Ecclesiasticis. Vocatur tamen *inimicus fidei*, quo nomine hæreticus solummodo designari potest, ab Autoribus Historiæ Catholicorum Bagdadensium, Nestorianæ sectæ Patriarcharum : accusaturque quasi Evangelia corruperit, & in Harmonia seu Evangelio *ἁγίας τριακοντα* parum fideliter versatus fuerit. Unde iidem historici subdubitant, num ille autor hujus Harmoniæ censendus sit, an verò Tatianus. Apparet autem etiam ex Catalogo Syrorum Autorum Hebedjesu, veterem hunc errorem esse. Causa errandi, ut videtur, haud alia est quàm quòd Tatiani qui erat in Encratitarum numero hæresin, communem cum Ammonio esse voluerunt, temerè prosum & futiliter : nam hic Alexandrinus & apud Ægyptios vixit : ille inter Syros : alter Græcè, alter Syriacè scripsit. Fuerunt præterea qui Tatianum accusarent quòd Evangelicorum verborum ordinem pervertisset, ut continuam orationem texeret ; quod cum factum ab hæretico homine indocti quidam alicubi legissent, statim in suspicionem venerè temeritatis nefariæ, quæ in Orthodoxum cadere non posset. Hinc uterque accusatus, & quia ambo in Harmonia Evangelica operam posuerant, quæ ad Tatianum pertinebat hæresis, ad alterum translata est. Nec quidquam huc usque in Orientalium libris nobis occurrit, quod aliter suspicari nos cogat. Doctiores tamen ut Dionysius Barsalibi, præfa-

PATRIARCHARUM ALEXANDRINORUM. 31

tionem in Evangelia, quæ commentario illustravit, utrumque distinguunt.

Eutychius 13. annos Heraclæ attribuit: 12 Autor Catalogi apud Kircherum. Makrizius 16. sed errore ut videtur librarium, quamvis eundem annorum numerum referat Elmacinus qui ejus initium alligat anno 7. Severi Imperatoris: adjicit Chronicon dies 56. sed hæc Chronologia stare non potest: neque enim ante annum 10. Alexandri Severi, ordinatus est Heraclas: J. C. 231. Si Eusebium sequimur, cujus major omnino quàm Arabum omnium autoritas est, obiit an. Philippi 3. J. C. 247. atque adeo annos 16. secundum Elmacinum, Chronicon Orientale & Makrizium, cum fuisse constabit, emendandique erunt Severus & Eutychius.

Hoc loco quædam adhuc de Origene Severus interfecit, præsertim de ejus ad Judæos defectione, pari loco habenda ac ea quæ superius relata sunt, nempe falsas & ridiculas calumnias, quarum nemo scriptor æqualis meminit, posteriorum adversus Origenem invidia conflavit. Nam cum certum sit Heraclam auditorem ejus fuisse, simul cum Gregorio Thaumaturgo, & aliis quorum nomina literis Arabicis scripta agnosci vix possunt, hos omnes scribunt Heraclæ fuisse discipulos. Solus eorum quos viderimus, in eum errorem non impiegit Elmacinus, qui sub Demetrio & Heracla scribit floruisse *Origenem sapientem, Alexandria oriundum virum doctissimum, qui ea in urbe docuit, magnumque habuit discipulorum numerum; quos inter præcipui fuerunt Gregorius Thaumaturgus, Theodorus Episcopus Tarsensis, Cratycus; vel ut existimamus, Plutarchus, nempe Martyr celeberrimus, non Episcopus Alexandrinus, neque enim inter eos qui circa hæc tempora floruerunt, ullus reperitur cujus nomen ad istius formam accedat.*

De Martyribus qui vel Demetrii longissimo Patriarchatu, vel sub Heracla passi sunt, levis admodum mentio in utriusque historia est, nec aliter quàm ut nomina nuda recitentur, absque ullis passionis circumstantiis. At cum ea ex Græcis Latinisque monumentis perfectissima sint, & nostro & lectorum otio abutemur, si quæ hoc in genere ab Arabibus scripta sunt adduceremus. Quæcumque enim apud illos vel apud Syros extant qui plura & meliora antiquitatis Ecclesiasticæ monumenta seivaverunt, ea perspicuè confirmant, quòd Actorum veterum quæ jam Græcè aut Latine non extant, ne litera quidem apud eos supersit. Etsi enim

HERACLAS
Patr. XIII.
Comm. Syr.
in Evang. Mss.

Adhuc de
Origene.

habentur in Synaxariis & aliis Collectionibus historiæ Martyrum factis multæ, sunt illæ tamen ejusmodi, ut ex Græcis deterrimis, deteriores factæ deprehendantur. Neque enim solum ea miracula quæ à doctis exploduntur, tanquam aliena ab Aëtorum sincerorum primæva simplicitate, leguntur in Arabicis Collectionibus, sed plura adjicere solent, quæ quò magis incredibilia videntur, eò magis illos afficiunt.

*Enf. Hist. Eccl.
l. 7. c. 7.*

Heraclam quasdam de poenitentia Constitutiones scripsisse, ex Epistola successoris ejus Dionysii discimus, præsertim circa familiaritatem cum Hæreticis, quam severè vindicabat. Sed etsi multæ sint Patriarcharum Alexandrinorum Constitutiones Canonicae, nullius quæ ab Heracla consignata sit, memoria existat tam in Historia, quàm in Canonum Collectionibus.

*Dionysius
Patr. XIV.*

DIONYSIUS PATRIARCHA XIV.

IS est ipse quem Severus ex Sabaismo ad Christianam fidem conversum scribit in vita prædecessoris sui. Statim atque ad supremam dignitatem erectus est, auctæ sunt majorem in modum Ecclesiæ, fideliumque numerus valde multiplicatus est; scientia etiam rerum divinarum maximè inter eos floruit.

Hæresis Arabica.

Eo tempore in Arabia orta est hæresis eorum qui asserabant animam mori simul cum corpore, & cum eodem resurgere in die resurrectionis. Eam sententiam damnavit Ecclesia, postquam Concilium ad ejus examen congregatum esset. Celebratum illud esse anno 4. Philippi Imperatoris docet Eusebius, atque ita anno Christi 247. vel 248. at cùm idem in Chronico assignet initium Episcopatus Demetrii an. 249. fieri potuit ut non sub eo, sed sub Heracla ejus prædecessore Synodus adversus Beryllum Bostrenum Episcopum autorem hæresis Arabicæ, habita fuerit. De ea porro Severus & alii non alio sine locuti videntur, quàm ad notandam temporis Epocham, adeo ut inde constitueretur initium annorum Dionysii; neque enim Bostra Arabiæ Metropolis ad Alexandrinum Patriarchatum pertinebat. Neque intellexit Severus, quid ipse scriberet, cùm vocem Arabiæ perversè omnino scribat, nec ut solet scribi quando Arabum regionem significat.

De illis verò quæ Dionysii electionem præcesserunt, nihil habet præter ea quæ superius designata sunt in historia Heraclæ: nempe illum Philosophiæ Sabaiticæ seu Sabiorum Sectæ addictum fuisse, qui

PATRIARCHARUM ALEXANDRINORUM. 33

DIONYSIUS
PATR. XIV.

qui locus ex Chronico Orientali, viris aliquot doctis, fraudi fuit, culpa interpretis qui Sabaitam illum fuisse dixit, quod nomen gentilitium esse existimaverunt cum sit nomen sectæ, ut supra à nobis explicatum est. Historiæ porro illius qualis ab Arabibus memoriæ prodita est, partem confirmat vetus aliarum Ecclesiarum traditio; nempe quod Dionysius ante susceptam fidem gentilis fuerit: quod à Demetrio baptisatus, sub Heracla munus Catechistæ in Ecclesia sustinuerit; nempe postea quàm Episcopatum is obtinuit; atque ut Heraclas Origeni, ita Dionysius Heraclæ successerit. Eum cum literarum sacrarum studio, Philosophiæ quoque studium conjunxisse, testatur Eusebius, nempe magistri sui exemplo, qui ita multos ab Ethnica superstitione ad Christianam fidem adduxerat. Legisse quoque magnâ curâ hæreticorum libros, ut eorum blasphemias confutaret, testis ipse est in Epistolæ fragmento quod refert Eusebius. Hinc non obscure colligitur Dionysium antequam Episcopus renunciaretur, Sacerdotis gradum obtinuisse.

Hist. Eccl.

l. 7. c. 7.

Secuta est Philippi Imperatoris necem, sævissima Decii persecutio. Philippum Christianum fuisse, ut Eusebius & veterum plerique, ita Eutychius & Autores Arabes omnes tradiderunt: sed fallitur iste dum sub Maximino atque anno ejus 2^o initium assignat Episcopatus Dionysii. Elmacinus de eo; *Philippus Cæsar qui Gordiano successit, Romanum Imperium obtinuit post ejus necem per annos septem, secundum plerosque Chronographos excepto Chrysostomo, quem sæpe laudat quasi historiam scripserit; at ille novem illi annos Imperii tribuit: Sahidis sex tribuunt*, hoc est, opinor, veteres Memoriæ quæ in Monasteriis Sahid sive superioris Ægypti conservabantur, & quarum meminist Severus in operis præfatione, unde fortè collecta fuit aliqua Chronologia quæ à nobis huc usque visa non fuit. *Is Philippus credidit in Jesum Christum, atque sub ejus imperio Christiani magna in pace fuerunt. Ejus, inquit Elmacinus, an. 1. nempe J. C. 244. ordinatus est Patriarcha Alexandria Dionysius, qui 14^{us} numeratur: Rectius Catalogus Copticus Kircherianus qui an. 248. initium ejus regiminis assignat.*

Quæ persecutionis quam ipse cum aliis expertus est historiam spectant, ipse Dionysius scripsit in Epistolis quarum fragmenta servavit Eusebius, quas etiam Arabibus non ignotas fuisse, probat fragmentum illud à Severo relatum. *Referam, inquit, quæ mihi acciderunt, Deum veritatis eorum quæ dicturus sum testem*

Hist. l. 6.

c. 40.

E

invocans. Decius Romanus Imperator, magno studio perquiri me jusserat : Deus verò protexit me ab eo , nec enim rescire potuit locum in quo d. litescebam. Post quadriduum præcepit mihi Deus, ut inde migrarem : fugi igitur cum discipulis meis , magnoque fratrū numero, longumque iter emensi sumus. Cum lucefceret post quatuor dies in fuga consumptos, cum Busrinæ urbi propiores essemus, comprehenderunt nos milites, evasitque Timotheus unus ex discipulis meis, domumque reversus est, cum inter segetes se occultasset : statim ab eo quæsierunt quid Patriarchæ factum esset : retulit milites statim atque illum comprehenderunt, eum imposuisse asino nudo, atque ita abduxisse, discipulis eum comitantibus. Reliqua quæ apud Eusebium leguntur, quæ ratione liberatus sit à deducentibus eum satellitibus, ignoravit, opinor, Severus, cum eorum non meminerit.

Subjungit autem Dionysium ad Flavium Antiochenum Patriarcham literas scripsisse, quibus significabat de martyrum passionibus qui Alexandriæ Christum inter dirissima supplicia constantissimè confessi fuerant. Earum meminit ut aliarum ad Domitium & Didymum Eusebius, & aliam earum particulam servavit Hieronymus in libro de Viris illustribus. Inter alios numerat senem quemdam nomine Motar, qui Mena ab Eusebio est nominatus :

L. 6. c. 41.
V. *Al. Martyr. um*, p. 103.
et seq.

Al. Martyr.
p. 614.

sceminam cujus nomen ignoratur, quæ post verbera & vincula ligatis manibus & pedibus, per aspera loca tracta est, totoque corpore lacerata, tandem extra urbemeducta, martyrium consummavit. Eam ex paucis quæ refert Severus intelligitur esse Quintam, Dionysio in Epistola nominatam. Deinde omnes impetu facto in Christianorum domos, eas diruperunt. Paulus Alexandrinus eo quoque tempore martyrii coronam cum gaudio suscepit. Hunc porro vel unum ex Dionysii comitibus fuisse, quem tamen in ejus Epistola passum esse non legimus, vel alterum fuisse oportet, qui primus numeratur inter Martyres Ægyptios triginta septem, quorum passio edita est in Actis modò citatis ex Januario Bollandiano & duobus Codd. Mss. Narratur deinde martyrium Apolloniæ virginis, quæ *Polomia* hic malè appellatur : eam autem esse, non aliam, demonstrat passio per ignem, in quem virgo conjecta est. Serapion quoque, ut ibidem scribitur, post sævissima tormenta, ex canaculo præcipitatus est. Julianus qui cum podagrâ impeditus ambulare non posset, duobus hominibus cum sustentibus ad prætorium ductus est, quorum unus

negavit, alter martyrium cum Serapione extra urbem igne consumtus perfecit. Inter multos autem alios martyres qui sub Decio Alexandria passi sunt, numerat Severus Alexandrum, mulieres duas, quarum una filios plures habebat, Dionysia scilicet, ut in eadem Epistola appellatur. Præter eos verò qui gloriosam pro Christi nomine mortem oppetierunt, ingens Christianorum multitudo fugiens, ut in desertis regionibus, montibusque abruptis latebras quæreret, fame, siti, frigore extincta est: multi etiam in barbarorum manus incidentes, in servitutem rapti sunt. Inter eos erat vir senex Episcopus Melichæ, quem Dionysius vocat Chæremone Episcopum Nilopoleos, seu Nili, urbis ad Occidentalem fluminis ripam; qui unâ cum muliere vel cum conjuge, ut Epistola habet, in Arabicum montem fugâ delatus, non ulterius reversus est, neque de eo quidquam auditum est. Multi in milites qui ad eos persequendos missi erant cum incidissent, datâ pecuniâ evaserunt, alii in captivitatem adducti, non comparuerunt. Tandem in maxima illa persecutione plurimos fidem abnegassô scribit, quos, inquit, *cum gaudio suscepimus, memores illius qui non vult mortem peccatoris, sed magis ut convertatur & vivat.* Sequuntur pauca quædam ex eadem Epistola, sed quæ nihil singulare contineant.

Circa hæc tempora Sacerdos quidam Romæ, superbia elatus, De Novato
& Novatiano
jactare cœpit, quòd non liceret eos qui in persecutione Christum abnegaverant recipere, autorque fuit sectæ eorum qui se puros, seu Catharos vocaverunt. Huic se adjunxit alter qui *Eus* vocabatur: hos porro esse Novatum & Novatianum satis intelligitur. Adversus eos congregatum est Romæ Concilium Episcoporum sexaginta, cum multis Sacerdotibus & Diaconis, quorum communis sententia fuit, ut pœnitentibus per orationum, fletus, jejuniorum, & bonorum operum remedia succurreretur, neque prorsus repellerentur. De ea disciplina pariter scriptum est ab Ecclesia Romana ad Antiochenam. Cumque interea Sacerdos ille Episcopatum ambivisset, & à suæ factionis hominibus ordinatus esset, multosque suæ sententiæ Sacerdotes ordinasset, Romæ Concilium habitum est, ubi omnia quæ in ejus ordinatione facta fuerant, ut etiam quæcumque ipse fecisset, irrita esse pronuntiatum est. Ea occasione Dionysius scripsit ad omnes Ecclesias de suscipiendis ad pœnitentiam illis qui abnegata fide ad eam revertentur: atque eam disciplinam quasi certum perpetuumque Ca-

nonem stabilivit. Hæc Severus. Præter Epistolas encyclicas; quarum meminit Eusebius, singularem de suscipiendis poenitentibus scripsit ad Cononem Episcopum Aschmonin, hoc est Hermopoleos, cujus nomen ut alia ferme omnia mirè depravatum est in scriptura Arabica.

De Origenis.

Cùm autem Alexandria quidam essent Origeni addictiores, monuit illos Dionysius de illis omnibus quæ in diversis Ecclesiis Origenes fecisset, ut ab eo caverent. Sed hæc falsissima esse satis quique intelligit, & ex Eusebii libris male intellectis deprompta; nam quod uno & eodem loco meminit Epistolæ quam ad Alexandrinos scripsit Dionysius, in qua eos reprehendebat, & alterius ad Origenem qua laudabat eum in persecutione constantiam: homines quibus tota Origenis historia prorsus ignota erat, facillè adducti sunt ut crederent, ea quæ de illius laudibus scripta erant ad ejus vituperationem pertinuisse, quo nihil alienius à veritate atque absurdius excogitari potest.

Canones
Dionysii.

Scripsit præterea Dionysius Canones, quorum, ut rectè monet Severus, perpetua in Ecclesia Alexandrina autoritas est: & sane extant illi in antiquis Collectionibus, quorum aliqui etsi ab eo perscribi non potuerint quod ad posteriorum temporum disciplinam spectent, ab Ægyptiis tamen tanquam legitimi agnoscuntur. Utuntur eorum autoritate Fergealla Echmimensis, & Ebnassalus in Collectionibus Arabicis suis; ut Abulfaragius in Syriaca sua.

Epistolæ.

Epistolas quoque plures eum scripsisse testantur, de persecutionibus Ecclesiæ sub Decio, & martyrum qui in Ægypto passi sunt gestis: quas Severus extitisse suo tempore testatur, sed quantum ex superiùs relatis conjicere possumus, & valde interpolatas, & non omnino integras.

Exilium.

Refert deinde Severus quomodo Dionysius ab Ægypti Præfecto comprehensus, cùm Christum constantissimè confessus esset, in exilium missus sit ad locum quem Valorri vocat, cujus interpretationem dat, cujus sensum assequi non possumus. Kephro locum illum vocatum esse testis Eusebius, qui etiam hæc gesta scribit sub Æmiliano Præfecto qui Ægyptum Valeriano imperante obtinebat. Ab incolis comiter exceptus est, simul cum Christianis exilii commixtus: paulò post iterum adductus est ad Præfectum; cùmque capitis sententia adversus eum lata esset, tamen servatus est, & in alium locum translatus. Cùmque proficisceretur ad secundum

L: 7. 6. 11.

exilium, comitibus valedicens præcepit ut quocumque pergerent, orationes & sacra sua non intermitterent; se verò etſi corpore abſentem, ſpiritu tamen præſentem ſemper adfuturum. Reductum illum fuiſſe ad priorem locum ſcribit Severus, ſed contradicente Euſebio, qui in Mareotide eum exulaſſe teſtatur.

Multi eodem tempore martyres paſſi ſunt, Alexandria & in tota Ægypto. Paulo poſt Dionyſius liber abire permiſſus eſt, ſcripſitque ad eum Imperator, Gallienus ſcilicet, ut etiam ad Demetrium & ad alios Epiſcopos, literas quibus gregem ſuum paſcere abſque hoſtium Chriſtiani nominis moleſtia permittebantur, tum Eccleſiæ illis ablata reſtituebantur. Atque illæ ſunt literæ quarum meminit Euſebius, de pace circa an. J. C. 263. Eccleſius conſeſſa: quas duplices fuiſſe ſcribit Severus & Græcè ſcriptas: unas quidem de libertate Religionis Chriſtianæ, ut Epiſcopi preces publicas, Liturgiæ cæteraque ad Dei cultum pertinentia liberè exercere poſſent, Eccleſiæque aperirentur: alteras ut Epiſcopi monaſteria, ſeu loca omnia Deo dicata reciperent.

Revocatio
ab exilio.

L. 7. c. 23.

Tandem Dionyſius laboribus fractus, illis præſertim quos in perſecutione ſuſtinuerat, cum præ corporis debilitate ad alia munerâ jam inhabilis foret, divinorum librorum lectioni affiduè incumbens, dies & noctes in ea conſumebat: quo tempore Deus per miraculum integritatem & perſpicaciam oculorum ei reſtituit, qualem in juvenilibus annis habuerat. Cum verò indiſta eſſet Synodus adverſus Paulum Samofatenum, nec ad eam ſe conferre Dionyſius præ infirmitate poſſet, ſcripſit ad Epiſcopos literas doctrinæ & ſapientiæ plenas, adverſus Paulum quem exagitat tanquam lupum diſſipantem oves Chriſti. Illi Antiochiam convenientes, cum Paulum in blaſphemiis ſuis pertinacem deprehendiſſent, depoſuerunt, & excommunicaverunt.

Scribit ad-
verſus Pau-
lum Samofa-
tenum.

Eodem tempore, nempe dum haberetur Concilium, obiit Dionyſius 13^o menſis Phamenoth, ſeu ut Arabes ſcribunt, Barmahat, qui reſpondet 9^o Martii, cum ſediſſet annos 17. At in quodam exemplari S. Macarii, inquit Severus, ſeptem tantum annos ſediſſe dicitur. Sed Euty chius ſeptemdecim numerat, quod exemplaribus congruit ex quibus hæc vita deſcripta eſt. Elmacinus ſcribit ſediſſe eum annos 19. obiſſe 3^a Toth, hoc eſt 31^a Auguſti, ſub Claudio Imperatore. Idem ferme calculus eſt Chronici Orientalis, quod annos 19. numerat, & inſuper dies 281. tum aſſerit mortem ejus inciſiſſe in diem anni 13^{um}, ſed procul dubio erravit

Obitus
Dionyſii.

interpres aut vitioso codice usus est, nam Makrizius qui Elmacino & Chronico consentit circa annorum numctum, non 13^{um} sed 3^{um} mensis Toth, obitu ejus consignat. Et sane si 3^{um} legamus, erit ille pariter anni Ægyptiaci 3^{us} qui à mense Toth incipit: Catalogus Kircherianus decem & octo annos numerat. Sed Severo, Eutychio & aliis Autoribus, qui decem & septem Episcopatus annos Dionysio tribuunt, accedit Eusebii autoritas, quam sequuntur Græci & Latini ferme omnes. Is autem 12^o Gallieni anno mortem ejus assignat, hoc est an. J. C. 264. ut ipse scripsit in Chronico, vel 265.

Hist. Dynast.
p. 81.

De Paulo Samosateno Abulfaragius, Euty chius & alii scribunt, sed ita exiliter ut nihil omnino ex illorum scriptis ad historiam illustrandam excupi queat.

Manes.

Assignant circa ea tempora Manis hæretici exordia Scriptores Orientales, de quo multa habent non Christiani modò, sed & Muhamedani, quorum una sententia est: cum duo principia rerum constituisse, quorum unum boni, alterum mali originem contineret: unde vulgò *Tanoû* vocatur eò quòd duplex illud rerum principium statueret: quamvis alii Autores ad posteriora tempora referant. Sed de eo dicitur inferius, cùm de ejus supplicio erit dicendi locus.

S. Antonius.

Antonium Magnum vitæ Monasticæ institutorem sub Dionysio Patriarcha in eternum secessisse, atque inde Anachoreticæ vitæ initium dedisse scribunt Elmacinus, Makrizius, & alii, quanquam sub Philippo ejus secessum collocet Abulfaragius: dum ait tamen, cœpisse tunc instituta Monachorum Paulo & Antonio autoribus, intelligitur eum non tam ad Antonii res gestas, quàm ad Anachoretarum principia respexisse. Habent autem Arabes Christiani S. Antonii vitæ historias plurimas, præter eam quæ Athanasio tribuitur: quam etli valde interpolatam legant, reliquis tamen præferunt, & laudatur illa à multis Autoribus. Reliquæ ut omnia ferme scripta ejusmodi fabulis inquinatissimæ sunt, nec ullius pretii.

Septem Dormientes.

Septem Dormientium historia Dionysii quoque tempore assignatur, quam non modò Arabes Christiani, sed Muhamedani, credunt & miris coloribus exornant. Eam absque ullo insigni discrimine circumstantiarum referunt, Euty chius, Elmacinus, Abulfaragius, Makrizius, Chronicon. Omnes tandem eos sub Decio passos asserunt etiam Muhamedani, atque inter eos Autor Compendii

Euty . l. 1
p. 391. Abulf.
p. 81.

PATRIARCHARUM ALEXANDRINORUM. 39

DIONYSIUS
Patr. XVL.

Perficæ Historiæ universalis, cui titulus *Mogemal Teiavich* : ut alii multi, atque & præter alios celeberrimus Emir-Condus, & ejus Epitomator Cond-Emirus. Nec mirum, cum ipse Muhamed impostor eam historiâ qualis in ore vulgi circumferebatur, Alcorano inferuerit. In eo enim, caput quod vocant speluncæ, de illa est, unde vocant eos *Ashab Elkehaf*, eos qui in spelunca delinuerunt. Legenti illas ineptias statim apparet eas ex variis quæ sæculo 7^o circumferebantur fabulis, non ex ullo Autore idoneo descriptas esse. Neque illis contenti Muhamedani, alias adjece-
runt, nam canem comitem adjiciunt, qui in hominem mutatus fuerit, de quo multa Poëtis dicta, nam hæc *amca* mirum in modum eos afficiunt. Cum verò ipse impostor, & de Dormientium numero, & de tempore quo in spelunca dormierunt dubitet, multò magis Commentatores. Illorum non postremus Huccin, qui Perficam Paraphrasin satis accuratam scripsit, rem gestam tradit sub Deciano, hoc est Decio Imperatore, Martyres illos Ephe-
so oriundos ex præcipua nobilitate : montem in quem se receperunt, *Betahalos* vocat, ut alii *Chaos* : quæ utraque vox est ni-
hili.

Alcor. cap.
Elkehaf.

Huccin Fug.
huius Com. Perf.
in Alcor. Gu-
listan.

Assignant quoque circa Dionysii tempora martyrium S. Mercurii : licet Euty chius ad Diocletiani persecutionem referat : sed verior est aliorum sententia qui in persecutione Deciana passum fuisse eum existimant. Is etiam ex illorum Sanctorum numero est, in quorum historia scribenda valde exercuerunt se Christiani Orientales, nempe ut eam fabulis insulsissimis corrumperent. Tales multas & diversas Mercurii martyris legimus, cujus titulo multæ toto Oriente Ecclesiæ, & in Ægypto non pauca edificatæ sunt.

Martyrium
sancti Mer-
curii.

Quæ de Paulo Samosateno ex Orientalibus colligi queunt, cum magis ad confundendam temporum rationem, quam ad eam illustrandam pertineant, prætermitti placuit ; ea enim historia ex certis monumentis jam satis explicata est.

Memoriam Dionysii assignat Synaxarium Æthiopicum 17^æ mensis Toth, quamvis eo die non extet in Calendario Coptiarum.

MAXIMUS PATRIARCHA XV.

MAXIMUS
Patr. XV.

MORTUO Diorysio successus est in ejus locum Maximus, An. 13^o Gallieni Imperatoris, & Valeriani, inquit Severus ; satis rectè ; nam saltem 12^o Gallieni mortuus est Dionysius,

Ejus initia.

Juverat autem in multis Ecclesiasticis rebus fratres seu fideles Christianos Maximus, antequam ad Episcopatum adsumeretur, nempe unus creditur fuisse illorum Sacerdotum qui in exilium cum Dionysio missi fuerant, ut à multis Autoribus scriptum est.

Statim atque ordinatus est, operam dedit ut Paulus Samosatenus ex Ecclesia ejiceretur. De omnibus enim quæ Antiochiæ in Concilio gesta fuerant adversus Paulum, deque ejus pertinacia certior factus est ab Episcopis in eodem congregatis, qui de toto illo judicio literas dederunt ad Dionysium Patriarcham Romanum, & Maximum Alexandrinum. Scripserunt ad omnes Episcopos, Sacerdotes, Diaconos, Christianosque tandem totius orbis de damnatione Pauli : atque ea occasione refert Severus partem Epistolæ Synodicæ contra eundem, quæ est in omnium manibus, sed suo modo, ita ut negligenter admodum ea Epistola ab Arabibus interpretibus versa intelligatur, quamvis extet in plerisque Arabicis Collectionibus. Accuratio omnino ea est quæ à Syris facta extat in antiquissimo Codice Mediceo.

Col'ect. Can.
Ar. Ms.

Eutych. t. 1.
p. 396.
De Manichæis.

Sequitur historiæ particula quæ ad Manichæorum origines spectat, nempe quod Manes ab Mago eruditus, & librorum magicorum hæres à muliere divite factus & ditatus, se Paraclitum in scripturis promissum dixerit, multosque seduxerit, tam præstigiis quam divitiis. Sed refutatus est ab Archelao Episcopo urbis cujusdam in Syria, quam ejusdem Archelai disputatio ante aliquot annos edita, Cæsaram esse docet. Ibi erat Marcellus vir divitiis affluens, sed charitate erga pauperes nobilior, qui multos Christianos à Persis in captivitatem abductos pecuniâ suâ redemit, eisque diverforia & Ecclesias ædificavit. Is est quem eadem Disputatio, & alia Acta vetera magnopere conunquant. Ad eum Manes literas scripsit, Paracliti nomen assumens, eumque ad doctrinam suam amplectendam invitans. Quia verò ejusdem antiqui monumenti versionem Arabicam habuisse Severum dubitare non possumus, Epistolam Manis, qualis ab eo refertur, transcribemus. *Manes Paraclitus Marcello. De præclaris operibus tuis fama ad me pervenit, & intellexi te fore mihi discipulum electum, ut à me viam rectam docereris, quam ad hominibus significandam Christus me misit. Et sane in errorem inducunt vos doctores vestri, cum apud vos affirmant Deum in utero mulieris fuisse. Vera autem prorsus de Christo Prophetæ prænuuntiaverunt; nempe quod Deus veteris Testamenti malus sit, nolens ut ab eo quidquam*

PATRIARCHARUM ALEXANDRINORUM. 41

MAXIMUS
Patri. XV.

quam accipiat. Deus porro Novi Testamenti bonus est, & unus, Deus verò non loquitur, aut sermone procreatur; sed de eo multa temerè dicta sunt, blasphemiae plena, quae ne commemorare quidem licet, adeo ut nec similia Satanas ipse protulerit. Hanc Epistolam Manes uni ex suis tradidit ut eam ad Marcellum deferret, ad quem nonnisi cum summa difficultate pervenit; cum enim à nemine reciperetur, nec illum quifquam hospitio dignaretur, aut cibos praeberet, aegrè radicibus & herbis vitam tolerans, tandem Epistolam Marcello tradidit. Is eam ut legit, ad Archelaum misit, qui cum legisset, Utinam, inquit, prius obissem, quàm funiles blasphemias vidissem. Latorem verò literarum cum remittere vellet; is sermonibus Episcopi commotus, reverti ad Manem noluit, sed errores ejus abjuravit. Itaque Marcellus responsum ad ejus Epistolam per servum ex suis misit, vetans ne quidquam ab eo acciperet, aut apud eum ederet vel biberet. Septem diebus elapsis, Manes ad Marcellum venit veste pellucida & pretiosa tectus, tredecim pueris & puellabus eum sequentibus. Marcellus statim Archelaum advocavit: qui Manem in sedili conspicatus in medio atrio, interrogavit quod nomen haberet. *Paraclitus* vocor, inquit Manes. Tum ille: *An ipse es Paraclitus quem Iesus Christus missurum se ad nos pollicitus est?* Ita, inquit Manes. *Quot annos natus es,* ait Archelaus? *Triginta quinque,* respondit alter. *At Dominus noster Iesus Christus,* inquit Episcopus, *discipulis suis dixit: Manete Hierosolymis, neque inde profisciscimini ad praedicandum, donec induamini virtute ex alto; atque hic est Paraclitus Spiritus sanctus: decimoque post Ascensionem die, sicut dixerat, descendit Spiritus sanctus super Apostolos die Pentecostes, cum complerentur dies quinquaginta post Pascha. An te Apostoli huc usque expectabant Hierosolymis, cum trecenti ferme anni effluerint ex quo praedicare coeperunt, & in omnem terram exiverunt voces eorum, & usque in fines terrae verba eorum? Quod si vera loqueris, neque praedicaverunt; & usque huc usque Hierosolymis permanserunt. Quomodo etiam D. Iesum Christum vidisti, tu qui annos triginta quinque aetatis numeras, & qua ratione sedes ipse in digniore loco, quod ipse prohibuit? Tum Manes: Nonne in Evangelio scriptum est: Mittam vobis Paraclitum? Ad haec Archelaus: Si Evangelio credis, in eo scriptum est dictum esse ad Mariam Virginem, Spiritus sanctus superveniet in te, & virtus Altissimi obumbrabit tibi; & quod paries,*

P. Archelai
Disp. adv. Ma-
nich. Ed. Pa-
tri. post Socrat.
p. 159.

sanctum erit, vocabiturque Filius Dei. Tandem Archelaus protulit ei datas ad Marcellum literas, in quibus negabat Manes nativitatem Christi ex muliere, mortemque & resurrectionem ejus. Ad hæc Manes inania multa effutire cœpit, ut ostenderet duos esse Deos, quorum unus lux esset, alter tenebræ. Hæc cum Episcopus refusasset, factum prope est ut Manes à plebe quæ ad colloquium audiendum convenerat, occideretur : sed vetuit Episcopus, qui cum urbe pepulit, monens ne rediret, nec certo mortis periculo se exponeret. Abiens igitur, à quodam Sacerdote hospitio exceptus, mensem circiter in ejus domo consumpsit, nihil omnino proferens, unde perversitas ejus agnosci posset. Paulò post cum apud eum dogmata sua enuntiare cœpisset, stupefactus ille, nihilque tale se unquam audivisse testatus, dixit missurum se ad Archelaum Episcopum, ut de doctrina ista cognosceret. Eo nomine perculsus Manes in Persidem rediit : ubi suas blasphemias libentius prædicavit. Tandem à Rege Persarum captus, pelle detracta, feris objectus, & ab illis laniatus miserè periit.

De Manete
quæ sit Persa-
rum traditio.

Bibl. Orient.

Multa, ut diximus, de nefando illo præstigiatore scribunt Orientales, Persæ præsertim, apud quos ex majorum traditione fama ad posteros rerum non plane fictarum pervenire potuit. Quia verò hæc passim apud nos ignota sunt, neque ante virum doctissimum Bartholomæum Herbelotium quisquam ea attigit, paucis describemus, quæ à melioris notæ Autoribus de hoc hæretico scripta fuerunt. Emir-Cond, autor celeberrimus, ait Manem, cum *Zindikæus* esset, hoc est Saducæus seu Hæreticus, varias figuras mirabiles picturasque proposuisse, quibus simplicioribus illuderet : pictor quippe erat, & mathematicus. Is cum accepisset Jesum promississe discipulis suis Paraclitum, quem ad eos missurus esset, (quod Muhamedani stolidè de Pseudopropheta suo prædictum arbitrantur,) ipse Paraclitum se esse professus est, seque Prophetam appellavit, regnante Sapore Ardeschiri filio. Sapor cum supplicium de eo sumere statuisset, Manes in Turkestaniam fugit, ubi multos seduxit. Ibi speluncam nactus, quæ aquæ fontem habebat, in ea per annum delituit, discipulis pollicitus, se anno elapso appariturum in loco quem designabat ; interea in cœlum ascensurum. Tum tempore constituto prodians, tabulam quamdam literis figurisque ignotis exaratam protulit, quam ex cœlo detulisse mentiebatur. Ea est quæ Historici contineri dicunt librum *Arzenk* dictum, alias *Arzenk*, vel, ut alij pronuntiant, *Arzenge*,

de quo mox dicitur, tanquam miraculum quo missionis suæ veritas comprobaretur. Ita multis in suam sectam adductis ex Turkeſtania, in Iran ſive Perſiam rediit. Beheram Harmuſi, ſeu Hormiſdæ filius, ſimulavit ſe illius verbis credere, ut facilius ejus diſcipulos congregaret, qui convenerunt magno numero. Tum juſſit Beheram Magorum ſuorum Antitiſtibus, ut cum Manete diſputarent; tandemque eum ſupplicio affici juſſit. Ita etiam Cond-Emir. Autor-Leb-Tarich, ſeu Medullæ hiſtoricæ, ſcribit eum Prophetam ſe dixiſſe, erroresque ſuos prædicaffe, ſub Sapore cognominato *Dul-Attaſ*, pictorem fuiſſe & mathematicum, adeo ut lineas circuloſque perfectiſſimè abſque circino aut alio instrumento duceret. Illum in excelſo monte figuram orbis terrarum deſignaffe, ita ut omnium provinciarum, marium, fluviorum, montium & civitatum ſitus agnoſcerentur. Paraſſe quoque ſibi tunicam ſubriliſſimam, qua amictus, quoties lubebat inviſibilis eſſet. Hormiſdam Saporis filium arcem in Curiftana ædificaffe, in qua Manes ſecurè degeret. Beheramum Hormiſdæ filium, ut eum ejuſque diſcipulos inde educeret, ſimulaſſe magnam ejus admirationem. Verùm ſapientibus ex Secta Zoroaſtraea congregatis, habitaque cum eo diſputatione falſi convictum, ſupplicio affectum fuiſſe. Addit Emir-Condus pellem eidem vivo detractam fœnoque repletam ſuſpenſam eſſe ad aliorum terrorem. Ita quoque Autor alterius Compendii hiſtoriarum Perſicus *Mogemal Toïarich* appellati. Maſhudi quem citat Emir-Condus, ſcribit Saporem primò ad Manetis religionem acceſſiſſe; paulò poſt mutatâ ſententiâ, Manetem ſupplicio deſtinaffe quòd ille præverterit fugiens Caſchemiram verſus, mox in Indiam, Turqueſtaniâ & Cataïam, quo nomine ſæpe Sinarum regio, aut ſaltem magna ejus pars, Tartariæ contermina, apud Arabes ſignificatur. Abulſaragius hæc ſub Sapore contigiſſe narrat. Hamza Hiſpahaniſis & Autor *Nedzam El-Toïarich*, ſub Beheramo, ut etiam Eutychiuſ, qui Manetem diſſectum eſſe ſcribit, ſocios ejus pluſquam ducentos, luto demerſos, capite inverſo ſuffocatos fuiſſe: atque ita Elmacinuſ qui eum exſcripſit. Hæc ſunt quæ de Manete Orientales tradunt. De eo Manichæorum ſupplicio intelligenda ſunt verba Synaxarii ex Ludolpho adducta, non de ſectatoribus Pauli Samoſatani, ut exiſtimavit Autor nuperuſ Hiſt. Patriarcharum Alexandrinorum.

Libros verò ejus, quos impoſtor ille tanquam cœlo demiſſos

venditabat, vocant Persæ Lexicographi *Azenk*, *Arzenk*, & *Arjenk*, aut etiam *Artenk*, nam utroque modo scribitur, imo & *Arnenk*, nisi ut videtur, error est in codice Condemiri. Omnes porro Lexicorum Autores dicunt, quacumque ratione scribatur, eandem esse vocis illius significationem; nempe ut locum picturis Sinensibus ornatum, vestes picturatas, tum singulariter Manetis pictoris aulam aut officinam, ut quidam vertunt, significet: tandem figuras illas quibus Manes doctrinam suam per ænigmata significabat, & ipsum librum ejus mysteriorum, quem ejus sectatores tanquam fidei suæ fundamentum amplectuntur. Is etiam ex præcipuorum Philologorum testimonio vocatur *Artenk* aut *Arzenk Mani*, cum propriè liber ille significatur, quia figuris peregrinis & ignotis refertus erat. Nec est cur dubitemus veterem illam & Muhamedanorum temporibus antiquiorem traditionem, ortam esse ex eo quod Manes libros Mysteriorum, Astrologiæ, Thefauros, & alia ejusmodi opera composuerat, quorum nonnulla extabant in Manichæorum manibus, superstitæ Augustino. Quia verò Manichæorum dogmata de duobus principiis, à quibus *Tanaiis* nomen, hoc est duplicatoris, ut ita dicam, illi apud Arabes inditum est: animarum quoque transmigrationis, & similes quædam opiniones, apud Indos & Sinas mirum in modum propagatæ sunt, facillè inde Arabes & Persæ qui semper incredibilia sectantur nacti occasionem fabulandi, Manem in Turkestaniam, India, & Sinarum regione, errores suos disseminasse existimaverunt. Cum etiam Astronomiæ, & Chaldaicæ superstitioni operam daret, libros figuris quæ ad illas artes propriè spectant exornatos, quos ipsi non intelligebant, picturam Sinensem appellaverunt. Habent quippe Sinæ figuras ejusmodi multas, geniorum, deorumque, quales aliquot occurrunt in China illustrata Kircheri; quæ si Astronomicis Astrologicisque notis ut aliquæ cumulentur, specimen eorum librorum exhibent, quos Manem discipulis suis tanquam lapsos divinitus proposuisse verisimile est. Neque enim plura de libris illis Orientales sciunt. Sed dubitari vix potest, maximam superstitionum partem quæ Indos, Sinas, & vicinos populos à sæculis multis occæcatos tenent, ex Manichæorum doctrina, reliquiisque Sectæ Zoroastræ originem ducere.

Abulfaragii
testimonium.
Hist. Dynast.
p. 82.

Fusus de ea doctrina loquitur Abulfaragius, sed ita ut sententiam nostram confirmet, quamvis nonnulla admisceat quæ vix alibi leguntur. Hoc tempore, inquit, innotuit Manes *Alhahanais*,

id est, duorum Deorum, seu potius principiorum, assertor. Hic primò Christianismum præ se tulit, & sacerdos factus est Ahuazæ, quæ est urbs in Mesopotamia, & interpretatus est libros sacros, & cum Judæis, Magis & Ethnicis disputavit. Nemo tamen alius Autor Manem sacerdotio inter Christianos functum fuisse memoriæ prodidit, ut videri potest in Historia Ecclesiastica nuper edita. Deinde, inquit, à fide desciscens, seipsum Messiam nominavit, imò Paraclitum ab eo promissum, ut omnes tam Christiani quàm Muhamedani testantur. Quod autem certam hanc Ecclesiasticæque traditioni conformem opinionem Persæ Muhamedani à Christianis acceperint, testis est vox *Paraclitus*, quam à Græcis ad Syros translata servavit cum inflexione Syriaca Cond-Emirus, qui *Paraclita* scribit, sicut Syri Mesopotameni pronuntiant. Duodecim discipulos sibi adscitos in omnes Orientis regiones, Indiam usque & Sinam misit, qui in ipsis doctrinam Thanaiorum seminaverunt, scilicet duos esse mundo Deos: alterum bonum qui est origo lucis: alterum malum, qui est tenebrarum origo; atque his contendentibus, bonum victoriâ in malum positum. Malum ergo in partem Australem accessisse, quò ibi mundum sibi conderet cui dominaretur, quod cùm facere cœpisset, ibique *Benat-Naash*, id est Arcturi signum, circa Polum Australem fabricasset, hinc quod circa Polum Borealem est simile, pacem inter illos fecisse Angelos eâ conditione, ut projiceret bonus luminis sui aliquid in materiam, unde extitit mundus generationi & corruptioni obnoxius, cui dominatus est malus. Quod autem bonus, hoc coactus atque invitus fecisset, ideo ipsum in cœlis duas naves grandes creasse, videlicet Solem & Lunam, in quibus animas hominum reposuit, & portionem suam quæ malo obtigit, paulatim repetere, ut materia sensim omni vestigio boni privetur, & cesset imperium mali. Huc usque etsi per umbram agnoscimus vestigia quædam satis confusa doctrinæ Manichæi, qualem eam Augustinus & Græci Patres, præsertim Epiphanius, descripserunt. Primum ne quidem ex nomine Abulfaragius aut Arabes alii Christiani unquam noverunt: alterum inter Autores, quos habent Arabice & Syriace, numerant, etsi quantum ex testimoniis quæ à variis Autoribus adducuntur, constare videatur, eos non Panarium seu integrum Tractatum adversus Hæreses, sed Anchoratum solum vidisse. At quæcunque, tum Abulfaragius, tum Christiani alii de impostoris

Tillem. Hist.
Eccles. l. 4.

illius doctrina referunt, ignorantur à Muhamedanis, qui omnia crimina uno contineri existimant, quod Paracliti nomen & dignitatem, quam Pseudoprophetae suo convenire credunt, ad se transferunt. Quantum ad reliqua, Magicarum artium praestigiarumque, eum condemnant, nec immerito.

Sequitur apud Abulfaragium: *Afferuit idem Metempsychosin, atque inesse cuius rei spiritum, qui aliunde transmigraverit.* Arabes vocant *Tanasach*. Eam verò opinionem qui in Manichaeis observaverit, non facile reperitur; sed ea erat propria Indorum Brachmanum, à quibus eam Pythagorici videntur accepisse.

Modum etiam excedebat in laudando igne ejusque virtute celebranda, eumque qui sanctus praedicetur, & divinis laudibus ornatur, dignum esse dicebat: atque haec omnia luminis ipsius atque splendoris gratia, & quod medium occupet locum inter corpora spherica & ex elementis composita. Terram autem quae vilipendatur dignam esse autumavit, quod tenebrosa sit, nec illuminetur ejus medium, actu vel potentia. Haec autem sententia antiquitus Persarum fuit, nec eam Manes primus in medium protulit, sed argumentis probabilibus confirmavit. Huc usque

P. 82. & 83.
Litt. Ed.

Abulfaragius ex versione Pocockii salebrosa nimium quibusdam in locis, sed quam mutare non libuit, quia est in omnium manibus. Ita sane potuerunt docere Manichaei sui temporis: sed quod eorum primus autor ita senserit, nemini veterum proditum est. Verum, ut monuimus, multa quae ad Magicam Zoroastræam religionem spectabant, veteremque illam Persicam Ignicolarum quae adhuc circa Baboram & in Persidis aliquibus regionibus ab iis colitur, qui *Atesch-Perestan*, & *Kebrian* appellantur, Manichaeis tributa sunt, eò quod multa Indi Idololatrae, Sinae, imò & Persae, à Manichaeorum discipulis acceperunt proculdubio. Nam in ea religione vulgari quam Sinae sequuntur, praeter Literatos, quos sublimius sapere asserunt, nihil ferme occurrit praeter ignotas fabulas, & Idolorum aut Geniorum nomina, quod Manichaeismum non referat. Unde cum turpium illarum sectarum antiquitas à quibusdam tantopere commendetur, non videntur illi satis perspexisse omnem illam errorum colluviem, à Mane potius quam à Zoroastre derivatam. Quamvis enim teterrimae superstitioni nulla ex vetustate quantacumque esse possit autoritas accedere, temerarium tamen proflus est eas portentosas sectas ad re-

motissimam usque antiquitatem promovere, cum plerumque recentissimæ sint. Frequenter nihilominus in eo peccant recentiores, præsertim cum Sinensium origines describunt, quos teste Abuzeid Sirafita (qui ante annos octingentos scribebat) ipse fatentes audierat, religionem suam se ab Indis accepisse, jam ut verisimile est, Manichæorum erroribus infectam. Cum verò communis omnium Orientalium opinio sit Manem in Indiam & ad Sinas usque profectum esse, imò in præcipuis Lexicographis & Philologis legatur eum ex Sinarum regione picturas suas detulisse, religiones verò tam diversæ, Indorum, Siamensium, Sinarum, Japonensium, non consentiant, nisi in quibusdam fundamentis quæ Manichæorum *ⲙⲉⲗⲁⲥ ⲉⲥⲉⲗⲁⲥ* continent, certissimum videtur, ex eorum hæresi omnes illas superstitiones cum Zoroastris Persicisque aliis compactas, prodidisse.

Abuzeid. Mf.
Ar.

De transmigratione animarum tanquam Manichæis communi opinione testatur quoque Maris Salomonis filius, qui addit, *Bibrouz*, quem alii Perosem vocant secundum Græcam pronunciationem, *jussisse ut Manichæi omnes occiderentur, & ea occasione multos Christianos, præsertim Episcopos, ad necem quæsitos esse, quod Manichæi crederentur, quia secundum Ecclesiasticam disciplinam cælibes, nuptias secundum illius sectæ placita abominari viderentur. Mar Paphas Catholicus, hoc est Ctesiphontis Episcopus, respondit Manichæos, duos deos seu personas credere, terram quoque animatam opinari, quodque animæ ex uno corpore in aliud transmigrarent, tandemque nuptias impuras censere. At Christianos confiteri unum Deum, connubiumque approbare: Antistites tamen ab eo prohiberi, ut orationibus vacarent, neque ullis negotiis impedirentur.*

Metempsychosin Manichæis quoque attribuit Manes Nestorianus.

De iisdem Abulbircat, aitque vocatos esse Manichæos à Mane, qui furiosus, seu Maniacus cognominatus est, cujus historiam, migrationem in Persiam, fugam ex carcere, tandemque supplicium contineri ait Autor in Catechesibus Cyrilli Hierosolymitani: & verè, nam multa de illo scribit. Eos autem hæreticos credidisse Deos duos, unum bonum, alterum malum, quorum primus lucis & boni creator esset, alter tenebrarum & mali. Negasse illos resurrectionem & ultimum judicium: adorasse Solem, Lunam, septemque Planetas: maximam vim signis Zodiaci reliquisque stellis tribuisse circa res humanas, quasi ex earum influxibus penderent: nuptias omnino damnasse: jejunium perpetuum imperasse

Cateches. Cyr.
Ar. Mf.

alimenta omnia immunda existimasse, quia oleribus herbisque animas inesse crederent. Hæc Abulbircat, qui paulò post similia ferme habet de Disanitis, qui erant secta quædam singularis Manichæorum. Utrorumque meminit Præfatio Concilii Nicæni Arabica, quam Latinè edidit Abrahamus Echellensis, ut Ebnassalus in Collectione principiorum fidei, & multi alii.

Hæc paulò fusiùs de Mane & ejus erroribus dicenda visa sunt, quia cum ejus historia jam à multis viris doctissimis tractata sit, adeo ut post amplissimam messem vix spicilegio locus sit, nemo autem sententiam Orientalium de illo exposuit, habeant eruditi, unde scire possint quæ sit communis tam apud Christianos quàm apud Muhamedanos de illis opinio, & ex quibus Autoribus peti possint quæcunque ad Manichæos spectant. Neque tamen id factum à nobis est, quod latere existimemus, in Orientalibus libris, multa quæ Græcorum Latinorumve diligentiam effugerunt, aut librorum qui periere vicem suppleant, etsi multis viris doctis ita visum fuerit: verùm ne quis in eam sententiam abducatur, ab illis qui nimio peregrinorum illorum studiorum amore, ea temerè supra modum extollunt, atque ita viris parum religiosis, quorum feracissima ætas nostra est, calumniandi occasionem præbeant, fallendi seipsos, aliosque in errorem inducendi. Ubi enim comparantur certa antiquorum monumenta cum Orientalium imperfectis Commentariis, statim agnoscitur, si quid veri isti continent, id demum factum fuisse, cum ex Græcis aut Latinis aliquid transfulerunt: ex seipsis verò nihil ferme nisi nugas producere.

Severus post recitatam Manetis cum Marcello & Archelao congressionem, quædam interferit de Romanis Antiochenisque Episcopis, quæ meliùs & accuratius apud alios Autores reperitur, præsertim cum nomina propria corrupta adeo sint, ut agnosci nequeant, nisi aliunde sciantur, ut sunt sane notissima. Hæc verò cum Alexandrinæ Ecclesiæ historiam non attingant, à nobis prætermittuntur, quia etiam in Imperatorum & Tyrannorum qui tunc Romanum Imperium occupaverunt, Chronologia nihil plane vident Orientales.

Emilianum Alexandriæ se Imperatorem renuntiasse anno J. C. 262. exeunte, ex Eusebio & aliis Autoribus discimus, sub Gallieno scilicet, à cujus duce Theodoto victus, & Romam ad supplicium ductus est. Eo tempore obsessa est Alexandria; quæ obsequio

obsidio cū sub Gallieno contigerit, à Severo describitur tanquam sub Diocletiano. Tunc ait venisse Alexandriam Episcopos duos sanctitate & pietate insignes, Eusebium Laodicenum, qui Socrati suffectus est; atque Anatolium, qui eidem successit, ab ipso vivente in sacerdotii consortium cooptatus. Narrat paucis qua ratione Alexandriam venerit, nempe ut fideles accuratius doceret de rebus in Concilio Antiochiæ celebrato contra Paulum Samosatenum gestis: & eos in fide confirmaret. Obfessa urbe, postquam publicæ calamitati quantum in ipso fuit subvenisset, senes, mulieres, pueros, urbe eduxisse, & ad Anatolium misisse, qui eorum egestatem sublevavit. Diocletianum, cujus persecutione fervente credidit Severus obfessam Alexandriam, milites præfidiarios quod tot homines exire passi fuerant, iussisse interfici.

Anatolius non modò viva voce, sed libris etiam editis fideles instituit, nam præter Catecheses scripsit Canonem Paschalem. De eo, Eusebius Hieronymus, & alii; extatque Operis istius de Paschate fragmentum à Bucherio editum: at illud Arabice reperiri non existimamus. Reliqua huius Maximi vitæ, nomina tantum & laudes continent Episcoporum & Martyrum qui eodem tempore vixerunt aut passi sunt, sed ut in superioribus plerumque contra temporum & historiæ rationem, cū Diocletiani persecutionem illis temporibus assignet. De Maximo nihil præterea legitur, nisi quòd postquam sedisset annos 18. diem suum obierit. Elmacinus 12. tantum numerat, ut & Makrizius: 19. Catalogus Kircherianus: alius indiculus apud Abulbircat annos 13. menses 5. tanta est Autorum inter se discrepantia. Obiit 14^{is} mensis Farnuthi ex Elmacino & Makrizio, 19^a ex Abulbircat. Eusebius 18. annos Episcopatus ei assignat, atque ex illius & Hieronymi testimonio obitus ejus assignatur an. 281. vel 282. J. C. Dominica quæ erat 9^a Aprilis, in quo Orientales cum Græcis Latinisque consentiunt.

Inter Maximum & Theonam vacasse Sedem Alexandrinam anno uno, neque Severus neque Eutychius, aut alii Autores testantur, præter Chronicon & Indiculum Abulbircat, ubi scribitur mortuo Maximo constitutum fuisse quemdam nomine Babnuda, hoc est Paphnutium, qui sex mensibus Patriarchatum tenuit; sed cū seipsum castrasset, dejectus est: nulla tamen ejus mentio sit in vitis Patriarcharum, nempe in Severi historia; sed tantum in quadam collectione, quam Scriptor ait transulisse ex exem-

MAXIMUS
Patr. X V.

50

HISTORIA

H. B. Patr.
p. 32.

plari Iounes seu Iouannis Damiatensis. Ita locus se habet non ut à Wanflebio versus est, neque enim fuit *quidam Bebnudensis*, quæ vox nihil significat; neque expunctus ex Catalogo Patriarcharum, in quo nunquam fuerat, ut certe in nullo reperitur, sed notatur nullam ejus memoriam esse in vitis Patriarcharum, ut ratio constet cur inter eos non sit numerandus.

THEONAS
Patr. XVI.

THEONAS PATRIARCHA XVI.

Electus sta-
tim post Ma-
ximum.

MA X I M O, cum ex hac vita migrasset, suffectus est Theonas unanimi plebis Christianæ consensu: neque apud Severum, Eutychium, Elmacinum, Makrizium aut alios Autores, mentio est vacationis Alexandrinæ Sedis per annum integrum, quam assignat Autor Chronici Orientalis. Sed omnes Eusebio consentientes, statim eum ordinatum esse statuunt post prædecessoris ejus obitum, an. scilicet J. C. 282. aut 283. Atque ita constabit Chronologia Severi, qui ejus initium alligat anno 1^o *Aurelii*, inquit, *Carii & Cariani*: nempe Aurelium, quod erat nomen utriusque Cari & Carini, pro tertio Imperatoris nomine accepit.

Ecclesiam
ædificat.

Pauca sunt admodum de Theona memoriæ prodita: Illud præcipuum quòd cum hac usque Christiani in speluncis locisque remotis preces & synaxes celebrare cogerentur, ob persecutionis sævitiam, ipse Ecclesiam sub nomine B. Mariæ ædificavit, quam *Tamaoutha* appellavit: nempe *θαύματα*, ut conjicere licet, à miraculis. Sane Alexandriæ antiquissimam fuisse Ecclesiam *Mual-laca* dictam, aliàs Catholicam, ut ex Pontificali Coptico discimus, quæ Dei genitricis titulo consecrata esset, docent nos omnes Arabum Christianorum historiæ. An ipsa sit quam à Theona constructam scribunt Severus, Eutychius, Elmacinus, aut ea quam Theonæ nomine appellatam testatur Athanasius, & ab Alexandro consummatam, affirmare non possumus. Neque sane videtur convenire temporum rationi, ut tunc sub Invocatione S. Virginis sacra ædes erigeretur. Fieri autem potuit ut cum Edictis Imperatoriis Ecclesiæ pene omnes dirutæ forent, nova à Theona excitata fuerit. De ea intelligenda sunt verba Synaxarii Æthiopici, ubi turrim ædificasse Theonam B. Mariæ, Æthiops vel potius Ludolphus scripsere.

Eutych. l. 1.
p. 369.

Ath. Apol. 1.
p. 369.

A D. Marco, inquit Severus, *ad annum 3 Patriarchatus*

PATRIARCHARUM ALEXANDRINORUM. 51

THOMAS
Patr. XVI.

Theonæ fluxerunt anni 219. obiit autem 2^a Tubæ seu Tybi Ægyptiaci, cum sedisset annos 19. nempe an. J. C. 300. exeunte; neque enim Hieronymi Chronicon mendo carere credendum est, dum initia successoris ejus Petri removel ad an. usque 302. Nam is triennio circiter ante Diocletiani persecutionem Ecclesiam administravit: cœpta autem persecutio an. 303. Eo tempore Theonæ, cum Patriarchæ à Juliani tempore Alexandriæ vix comparent, in publicum prodit.

Entych. t. 1.
p. 399.

Sub eo Patriarcha natus est Petrus Martyr, qui deinde Alexandrinam Ecclesiam sanctissimè gubernavit, & fuso sanguine illustravit. Ejus nativitatem miraculo impetratam narrat Severus hunc in modum. Erat Sacerdos quidam pius cum uxore sua sanctissima fœmina; ambo firmi in fide, vitamque juxta Christianæ religionis præcepta in bonis operibus transigebant. Carebant prole, quod non mediocri dolore illos afficiebat: unde Sacerdos jejuniis precibusque continuis, & elemosynis intentus Deum supplicabat, ut filium suscipere posset. Cum verò celebraretur festivitas Apostolorum Petri & Pauli, quam Christiana plebs magno ad Ecclesiam concursu celebrabat, Sacerdos ille & uxor ejus viderunt fideles adducentes filios suos coram sanctorum imaginibus, oleoque lampadis quæ ardebat è conspectu, eos captandæ benedictionis gratiâ linientes. Eo spectaculo magis commoti, quod orbitatis suæ memoriam renovaret, susceptis sacris mysteriis Deum laudantes domum reversi sunt. Ipsâ nocte, viderunt per somnium viros duos ornatu Patriarchali, qui mulieri dixerunt, ne tristitiâ afficerentur; fore enim ut auditis eorum precibus daret ipsis Deus filium, qui non modò oculos eorum clauderet, sed pater foret magnæ hominum multitudinis, cujus fama & sanctitas tanquam Samuelis Prophetæ inclaresceret, quia filius promissionis futurus erat. Igitur cum lucefceret, vade, inquit, ad Theonam Patriarcham, & hæc omnia illi significato, ut benedicat tibi: nam Deus per misericordiam suam dabit tibi filium benedictum. Quæ cum fecisset mulier, paulò post gravida facta, toto tempore quo uterum gestavit, in orationibus, jejuniis, continentiaque perseveravit, usque ad festum Apostolorum: atque eo ipso die peperit puerum, maxima parentum, ipsiusque Theonæ Patriarchæ letitia. Jussit ille puero Petri nomen dari. Cum ad tertium ætatis annum pervenisset, obtulerunt eum Patriarchæ, qui eum baptisavit. Cum annum quintum ageret, magistris ad erudiendum traditus, tantum brevi tempore

Petri Martyris
nativitas.

profecit, ut septimo ætatis anno Lector ordinatus fuerit : 12^o Diaconus. Tandem 17^o anno completo Sacerdos ordinatus est, cum inter Diaconos doctrina morumque sanctitate emineret, præsertim verò die nocteque ab Ecclesiæ ministerio non recederet. Hæc de Petri vita antequam ad Episcopatum assumeretur, Severus ex Actis quæ apud Arabes conservata sunt, qualia multis exemplis extant, tam apud Græcos quàm apud Latinos, & pauca dicentur de illis in ejus historia.

Hæresis Sabellii.

Theona sedente, orta est Sabellii hæresis, qui Personarum divinarum Trinitatem impugnabat, unamque personam Patrem, Filium, & Spiritum sanctum esse asserbat. Is Alexandriam cum venisset, multis jam in errorem suum abductis, impudenter ad Ecclesiam venit, cum in ea Theonas esset, misitque qui eum provocarent, ut cum eo de fide disputaret, ita ut si Theonas eum convincere erroris non posset, ad ejus sententiam accederet; ipse verò Sabellius demonstraturus postea foret apud populum, quàm graviter in rebus fidei Theonas hallucinaretur. Is contempto hæreliarcha, misit Petrum Sacerdotem, mandans ut illius audaciam compesceret. Sabellius de Theonæ superbia conquestus est, qui nullum alium ad se mitteret quàm adolescentulum. Petrus Dei auxilio confisus se tanquam David adversus Goliath gigantem adversus eum prodire dixit, ejusque blasphemias confutaturum. Cumque ad eum verba fecisset, ejusque impietatem redarguisset, Sabellius vertigine correptus, in terram lapsus & mortuus est : & simul ejus hæreseos memoria prorsus extincta est. Hæc frustra quisquam ex Græcis Latinisve Autoribus elucidare aggrediretur, cum veritati manifestè repugnent; neque de Sabellii rebus gestis certi quidquam apud Arabes reperiatur. Fieri potuit ut Alexandriam veniret; erat enim ex Lybia Pentapolitana; sed reliqua ex eorum incredibilem genere sunt, quibus magnopere delectantur Orientales, adeo ut magis hoc in genere attenti sint ad quisquilias omnes colligendas, quàm ad veritatem illustrandam.

Tandem refertur miraculum de energumeno per eum sanato : qui cum ad Ecclesiæ limen tumultuaretur, & in obvios conjiceret lapides, jussus est Petrus dæmonem ejicere. At is prius aquam in vase Theonæ obtulit, ut eam crucis benedictione signaret : tum ad hominem accedens, eum liberavit.

Aiunt Theonam in extremis positum, convocatis fidelibus, Sacerdotibus & Laicis, cum eos flentes videret quòd orphanos eos

relinqueret; Non, inquit, orphani eritis: ecce enim pater vester Petrus, qui post me Patriarcha futurus est: & cum, antequam obiret, ab eo ordinatum.

Pleraque eorum quæ Severus de Theona refert circa Petri ordinationem ad Sacerdotii ministerium anno ætatis decimo septimo, & alia miracula leguntur in variis Orientalium libris, neque tamen idcirco certiora habenda sunt; nam ex Severo, Elmacinus & alii describere. Non videtur autem fieri potuisse ut contra Canonum auctoritatem ordinatio ejusmodi facta fuerit. Verùm conjectura satis verisimilis est, eos qui primi quam retulimus historiam confarcinaverunt, seu Græci, seu Latini, seu Arabes, cum eum sub Theona natum esse statuerint, ut totam miraculorum seriem uno filo pertexerent, addidisse eum in ipsa pueritia & adolescentia ordinatum, quod vix patitur temporum ratio. Et sane, secundum Autores, quorum certior quàm Arabum omnium fides est, Petrum majorem natu fuisse, quàm ut sub Theona natus sit, videtur certissimum.

Superest ut moneamus non aliter ab Eutychio quàm ab aliis vocari hunc Patriarcham: sed ridiculè prorsus, Pocockio factum, ut codices suos secutus, quos non admodum antiquos fuisse fateatur ultro, *Neronem* eum appellaverit, cum ipse in Indice Patriarcharum veram nominis scripturam agnosceret Theonam reposuerit. Nempe si quis eadem superstitione potius quàm religione omnia librorum Arabum in nominibus propriis portenta exprimenda arbitretur, Utopiæ historiam non Ecclesiæ scribet. Id tamen perpetuò observavit, Autor cætera diligentissimus, magno sane lectorum incommodo, eorum præsertim qui Latina tantum versione uti possunt.

De Sabellio & ejus hæresi agunt præterea Autores Præfationum in Concilia: Abulbircat, Ebnassalus, & multi alii quorum testimoniis recensendis superfedemus, quia nihil habent quod non melius & accuratius Græci Latinique tradiderint.

Circa annos Episcopatus consentiunt Severo Scriptores reliqui præter Autorem Chronici Orientalis, qui novem tantum annos numerat cum diebus 263.

Memoriam ejus celebrant Coptiæ, 2^a mensis Tybi seu Tubæ, ut scribunt Arabes: & eadem die recolitur apud Æthiopes: neque emendandum Kalendarium illud à Seldeno editum, ut Theonas loco Thomæ substituat. Non tamen ea est illius Kalendarii

P. 33.

fides, ut ex eo quidquam stabiliri debeat, cum ab homine Muhamedano confarcatum ne mediam quidem partem sanctorum, quorum in Ecclesia Coptica memoria est, contineat : qui defectus in altero quoque observatur ex vitioso exemplari descripto. Adde perpetuas in interpretando Seldeni hallucinationes, qui non necessario labori supersedere debuisset, cum nec Arabice satis sciret, & in rebus Orientalium Ecclesiasticis esset plane hospes. Quid enim commune fuit Kalendario Coptitarum, cum jure successionis apud Hebræos ? Itaque frustra sæpe torquet se vir clarissimus, ut Seldenum cum Fastis Ecclesiasticis conciliet, aut Ludolphi Synaxarium : is enim non Seldeno magis in Ecclesiasticis rebus videbat : quod semel monuisse sufficiat.

Petri electio.

DE ejus nativitate non sine miraculo, pia institutione, maximaque etiam in ætate puerili virtutis & doctrinæ fama, adeo ut antequam annos legibus Ecclesiasticis præscriptos attingisset, ad Diaconatum moxque ad Sacerdotium promoveretur, dictum est in Theonæ vita, ex Severi solius testimonio. Neque enim sanctissimi Antistitis primordia ex aliis historicis quorum fides minus vacillet, agnosci possunt. Cum autem Severus scribat cum ordinatum à Theona moribundo fuisse, ita illud accipiendum est ut successorem sibi designaverit, id enim à multis sanctis Episcopis factum : nam aliter Autor ipse sibi contradiceret : qui post obitum Theonæ scribit *congregatos fuisse Alexandriae Sacerdotes & plebem, manusque imposuisse super Petrum filium ejus spiritualem & discipulum, sacerdotem, eumque collocasse in solio Patriarchali Alexandrino, juxta Theonæ mandatum, anno 10^o Diocletiani Imperatoris.* Ne quis autem suspicetur esse quidquam illis in verbis præsidii ad confirmandam Seldeni de Presbyteris Patriarcham ordinantibus opinionem, animadvertendum est, Laicos quoque manus imposuisse censendos esse, quod nemo sane Ecclesiasticæ disciplinæ vel leviter peritus existimabit. Habent enim Canones Apostolicos, quorum auctoritatem ne vel suspensione quidem levissima lædi patiuntur, in quibus ordinari Episcopum à tribus saltem Episcopis constitutum legitur, quod & omnes Ecclesiæ religiosissime observant. Neque unquam apud Ebnasialum, Echmimensem, Abulfaragium, ullosve alios Cano-

num collectores & interpretes, aut eos qui omnia ad Ritus ordinationis spectantia collegerunt, præsertim ad ordinationem Alexandrini Patriarchæ, quidquam occurrit quod laïcarum manuum impositionem vel obscure significet. Nec opus est ut Abrahamum Echellensem secuti, hæc & quædam similia testimonia interpretemur, non de χειροθεσία ad ordinationem, sed de χειροτονία ad electionem: quam vocum differentiam ex Lexicis Græcis confirmare satagit, de qua etiam accuratè disputatum est à viro clarissimo Joanne Morino. Etsi enim discrimen aliquod in ἐπιμαρ delitescit, at nullum omnino in ipsa re deprehendi potest, præsertim in usu Ecclesiastico: ex quo similium vocum significatio petenda est, non ex Athenis Atticis. Verba enim Arabica χειροθεσίας seu impositionem manuum, propriè notant, non χειροτονίας seu manuum extentionem ad suffragia ferenda, quam nec in Alexandrino, nec in Antiocheno Syro, nec in Nestoriano, nec in Græco ritu observare licet. Omnis enim suffragii à Laïcis & Sacerdotibus ferendi forma in acclamatione consistebat, τὸ δέξιον, *dignus est*, ut alibi monuimus. Simplicissima igitur loci hujus & aliorum similium interpretatio est, quod Arabes impersonalia verba, impersonalemque orationem per pluralem tertiam exprimere solent: quod Anglicæ linguæ & Teutonicæ Dialectis, tum aliis etiam plerisque vulgaribus commune est. Itaque *imposuerunt illi homini manus*; idem est ac si diceretur, *impositæ sunt illi manus*, nempe ab illis ad quos jus ordinandi pertinebat: ut pari sensu sæpe legimus, *convenerunt in Ecclesiam Sacerdotes cum Episcopis & plebe, Liturgiamque celebraverunt*: nempe illi qui eam celebrare ex ordinis sui munere debebant & poterant, in reliquorum præsentia. Tam facile quippe demonstratu est Laïcos Missam celebrasse, quàm Sacerdotes aut Episcopos ordinasse.

Annus porro quem Severus assignat, conciliari non potest cum Eusebio, aut cum certa Chronologia. Nam Diocletiani 18^o initia Episcopatus assignat in Chronico, & alibi docet eum 3^o persecutionis anno passum, & 19^o ejusdem Imperatoris. Unde suspicari licet irrepsisse mendum, quod in Arabica scriptura facilè fit ex punctorum Diacriticorum omissione aut transmutatione, ita ut vox שנה ex unius puncti defectu, substituta sit loco alterius שנה quæ sex significat: nam Græcæ Chronographiæ aliquot huic anno 16^o assignant Petri Episcopatum aut martyrium, quod Arabibus

Eutych, Vin-
dicali.

Annus elec-
tionis.

Enk. Eccl.
Hist. l. 7. c. 32.
L. 8. c.

quorum major quàm credi potest, in exscribendo indiligentia est, errandi occasionem videtur præbuisse.

Cùm scivisset Petrus Arium impietate sua turbas ubique excitantem, cum deposuit & Ecclesiâ pepulit.

Persecutio
Diocletiani.

Anno verò 19^o Diocletiani, ut rectè legitur apud Eusebium, literæ Imperatoriæ Alexandria & per totam Ægyptum publicatæ sunt, adversus Christianos; cœpitque dirissima persecutio, in qua multa eorum millia cæsa sunt, Ecclesiæ solo æquatæ: adeo ut fideles fugere in deserta speluncasque coacti sint. Constituit autem per totam Ægyptum superiorem & inferiorem apparitores qui Christianos conquirerent, statimque supplicio afficerent. Illi cùm Petrum Patriarcham apprehendissent, eum in carcerem conjecerunt; cùmque id Imperatori significassent, mandavit, ut ei caput absunderetur. Cùm illi mandatum exequi festinarent, maximus Christianorum concursus ad carcerem undique factus est, qui se prius occidendos clamaverunt, quàm ut Pastoris sui cædem paterentur. Ita factum, ut satellites cogitarent quomodo absque tumultu educi posset, ne promiscuam tot hominum, senum, juvenum, monachorum, virginum, mulierum cædem facere cogerentur, & tamen Diocletiani mandatum de supplicio Petri exequerentur. Causa quæ eum moverat ad illius necem imperandam, hæc secundum Severum fuit. Erat Antiochiæ vir quidam inter officia Palatina militans, magnaque apud Imperatorem dignitate, Socrates dictus, qui cùm amicissimus fuisset Martyris, cujus nomen legi non potest; ejusque soror Irene martyrium constantissimè pertulisset, fidem abnegavit. Uxor ejus fidelis permanens, cùm duos ex eo filios habuisset, qui jam ad eam ætatem pervenerant, ut baptisari eos oporteret, ab eo rogavit ut Alexandriam proficiscerentur, atque ibi filii ejus baptismum acciperent, ne si absque sacramento decederent, iram Domini J. Christi incurrerent, quòd eorum saluti per suam negligentiam non providissent. Negavit licentiam proficiscendi Socrates, veritus Imperatoris sevitiâ. Illa assumtis pueris, servisque duobus fidelibus, Deo se commendans, secretò ad mare profecta, navem conscendit, & Alexandriam tendit. Orta ingenti tempestate, mulier vultu ad Orientem converso, cùm ardentes ad Deum preces fudisset pro filiorum incolumitate, arrepto cultello: *Tu Deus, inquit, nosti quid in corde habeam: tum dextram mammam pupugit, è qua tres guttas sanguinis eliciens, illis signavit in formam crucis filiorum frontem in* nominè

Historia puerorum in mari à matre baptisatorum.
Chron. Or.
p. 116.

nomine Patris & Filii & Spiritus sancti; atque eos in mari baptisavit, dicens: Baptiso vos, filii mei, in nomine Patris & Filii & Spiritus sancti: adjungens, *jam tandem si moriendum est, moriamur ô filii.* Sedata tempestate post triduum Alexandriam appulerunt, ipso die Parasceves Dominicæ 6^e Jejunii Quadragesimalis, quo infantibus baptismus administrabatur. Accessit mulier ad Diaconum, rogans ut se ad Patriarcham deduceret; causamque rogata, respondit nihil aliud negotii sibi ad illum esse, nisi ut duos istos filios suos ad baptismum offerret. Jussit eam Diaconus in Ecclesia sedere, mox adventurum Patriarcham qui cum aliis parvulis ejus quoque filios baptisaret. Advenit Patriarcha: cumque Liturgiam perfecisset, oblati sunt ei parvuli ad baptismum suscipiendum, quorum multos in aquam immerisit. Post illos oblati sunt filii duo mulieris Antiochenæ: quos cum accepisset, ut in aquam mergeret, ea statim congelata in modum lapidis obduruir. Stupefactus Patriarcha illos seorsim constitui jussit, & alios admoveri; nemo enim observaverat aquæ congelationem: quæ statim atque alii admoti sunt, dissoluta rediit in priorem statum, infantesque baptisati sunt. Iterum reductis duobus illis, aqua obduruir; aliis adductis, resoluta est: quod tertio contigit. Majorem in modum miratus rei novitatem Petrus, jussit Archidiacono ut eorum matrem accerferet: Ea cum venisset, rogata cujus esset, quodne peccatum commisisset; respondit se esse Antiochenam, Christianam ex Christianis parentibus. Quid, inquit Petrus, fecisti? ecce enim Dominus non suscipit filios tuos ad baptismum. Mulier rem ut erat confessâ est: eam bono animo jussit esse Patriarcha. Deum ipsum ejus filios baptisasse asserens, eâque causâ non iterandum in illis baptismum, quia unus est; filios ejus jam fuisse baptisatos, nec dubitandum de baptismo, quem Deus tam insigni miraculo comprobasset.

Refert hanc historiam in pauca verba contractam, ex vita Petri à Severo scripta Elmacinus, ita tamen ut Socratem martyrium subiisse dicat, cum alter fidem eum abnegasse testetur. At vera scribit Elmacinus, si Socrates ille est qui laudatur in Actis SS. Philæ & Philoroni, aut alius; nam aliquot ejus nominis Martyres occurrunt in Fastis Ecclesiasticis. Mirum tamen est apud Antiquos nullam historiæ tam celebri extare memoriam, præsertim cum magna sit apud Ægyptios Petri Martyris auctoritas, cujus Canones, seu Epistolam Canonicam, laudant omnes

Quid de hac historia judicandum.

Tillem. Hist.
Ecd. t. 4. p. 439.
Martyr.
p. 549.

qui de Disciplina Ecclesiastica scripserunt. Nam exemplo viri sanctissimi probassent valere collatum in maximis angustiis à muliere baptismum, quem omnes prope tanquam nullius efficacie videntur reprobasse, ut videre est apud Echnimensem, Ebnassalum & alios.

Ut porro ad historiam revertamur, & qua ratione occasionem dederit Diocletiano, ut Petrum ad necem quæri juberet, explicemus, ita Severus prosequitur. Mulier cum Antiochiam reversa esset, interrogata unde veniret, confessæ est se Alexandriam ivisse, non ad adulteria exercenda cum Christianis, ut Imperator exprobrabat, sed ut filios ad baptismum offerret. Jussit Diocletianus, ut ligatis manibus, injectisque desuper filiis, in ignem conjiceretur: atque ita martyrium consummaverunt. Cum autem ita rescivisset Diocletianus Petrum, contentis edictis, baptismum Alexandriæ celebrasse, iratus jussit ut de eo supplicium fumeretur: atque ea causâ fuit cur tanto studio Petrus à persecutoribus quæreretur.

Quid Petrus
egerit ante
martyrium.

Alf. Gr. Com.
bes. p. 193. 197.
Till. Hist. Eccl.
1. 5 p. 438. 755.

Cum interea fama percrebuisse de capitali sententia quam in Petrum Imperator protulerat, timens Arius, ne executioni mandaretur priusquam ab anathemate quo eum innodaverat absolveretur, multos Sacerdotes, Diaconos & Laicos compulit, ut precibus absolutionem ejus impetrare conarentur. Illi igitur ad carcerem magno numero congregati, Patriarcham instantissime rogaverunt, ut eum absolveret. Ille alta voce respondit: *Arius sit excommunicatus in hoc sæculo & in futuro, à Domino nostro Jesu Christo.* Cum igitur magno omnes timore percussi forent, nulus deinde cum pro Ario interpellare ausus est. Cumque eos consternatos videret, surgens, duosque discipulos suos Achillam & Alexandrum seorsim ab aliis assumens, dixit illis: *Deus adjuvabit me ut martyrium citò consummem: tu verò Achilla Sacerdos post me sedebis in hac sede: & post te frater tuus Alexander. Ne porro existimetis me licet peccatorem inclementer agere: sed Arius fraudem occultam dissimulat, neque ego eum excommunicavi, sed Christus. Dicam porro vobis me hac nocte postquam orationem meam perfeci, obdormisse, vidisseque in somnis juvenem cujus facies solis instar splendebat, opertum veste quæ discissa erat, cujus latera colligens, tegebat corpus ut poterat. Tum ego, Quis, inquam, Domine, vestem tuam ita discidit? Arius, inquit: atque adeo cave ne eum suscipias, aut eum eo ullam communionem ha-*

beas. Monuit me, inquit postea, *venturos postridie, qui pro Ario intercederent, sed ne illis acquiescerem, verum Achillam & Alexandrum qui mihi successuri essent, instruerem, ne eum reciperent*: atque eam causam esse docuit cur anathema olim prolatum adversus Arium, iteratâ sententiâ confirmasset. Monuit præterea ut quandoquidem Deus eos elegisset ad regendam plebem ejus, darent operam ne per talium hominum scelus Ecclesia quidquam detrimenti caperet. Scire enim se post ejus mortem futuros, qui blasphemias suis occasionem darent schismati, quo Ecclesia divideretur, sicut jam à Meletio Lycopolis Episcopo factum erat, qui multos ad se pertraxerat. Hortatus est igitur eos ut vigilanter & strenuè Ecclesiam Dei defenderent, prædecessorum suorum exemplo, præsertim Dionysii, qui tanto animo adversus Sabellium pugnaverant; & aliorum qui non modò ab idololâtris multa passi erant, sed etiam ab hæreticis quibus acriter restiterant, sicut Heraclas & Dionysius Origeni & aliis. Tandem eos osculatus, illis benedixit, asserens se faciem ejus postea non visuros, commendavit eos Deo; & ad reliquos qui ad eum venerant conversus, habito sermone quo eos in fide confirmaret, oratione super illos facta, dataque benedictione, omnes à se dimisit.

Añ. Gr. p. 200.

Cùm verò major adhuc tumultus excitatus esset, eò quòd milites non paterentur Christianos ad eum accedere; veritus Petrus ne ea occasione cades in plebe fieret, misit ad milites, jubens ut nocte intempesta ad parietem carceris accederent, & quo loco ipse signum percutiendo daret, eum perforarent, & mandatum Imperatoris perficerent. Cùm igitur Christiani fores carceris obfiderent, milites ad locum designatum venerunt, parietemque perfoderunt. Tunc Petrus signo crucis factò, melius esse ait ut ipse moreretur; quàm tanta multitudo ipsius causâ mali quidquam pateretur. Educto igitur capite per ipsum foramen, martyrium consummavit, nemine animadvertente: tunc enim ventus ingens fecit ne strepitus militum exaudiretur.

P. 206;

Aliud exemplar, inquit Severus, refert Petrum per illud foramen eduatum fuisse ad locum *Bucolia* appellatum, Marci Evangelistæ martyrio & sepulcro apud Christianos insignem: ibi precēs ad Deum fudisse, D. Marco se commendasse, orasse etiam Deum ut tam dira persecutio finem haberet; & mors quam pro ejus nomine passurus erat, tanquam sacrificium pro commisso sibi

Alia historia
martyrii.
Añ. Gr. p. 208.

grege acceptaretur. Erat prope domuncula, in qua virgo Deo dicata sanctissimè vivebat. Hæc cum oraret, audivit vocem dicentem : *Petrus primus Apostolorum ; hic autem Petrus ultimus martyr.* Finita oratione, Petrus osculatus est sepulcra D. Marci, & aliorum Patriarcharum qui illic sepulti erant : processitque ad milites, qui cum viderent faciem ejus tanquam Angeli, non audebant ad eum accedere. Ille sublati ad cælum oculis, factoque crucis signo, dixit, Amen : tum abjecto pallio, nudam cervicem listis præbuit, qui cum timerent, inter se statuerunt ut qui ei caput amputaret, viginti quinque aureos quos in medium contulerunt, acciperet. Unus igitur illorum audacior caput illi abscidit ; deinde collectæ multitudinis metu fugerunt. Corpus beati Martyris eodem in loco mansit, quod fideles tunica sua involutum repererunt ; virginem de qua superius dictum est, & senem quemdam ejus patrem, illud custodientes. Illi caput corpori conjungentes, & sindone involventes, grabatoque in quo Petrus cubare solitus erat imponentes, in Ecclesiam detulerunt. Ibi dum mysteria sacra celebrabantur, collocatum fuit in Throno Patriarchali, tandemque sepultum cum reliquis Patriarchis.

Passus est 29^a mensis Athyr, qui respondet 25. mensis Novembris, cum 26^a in Ecclesia Latina ejus memoria celebretur in Romano Martyrologio. Græci VI II. Kal. Decemb. nempe 24. Nov. eam celebrant. Coptitæ in Calendario suo ad 2^{am} mensis Athyr : in Seldeniano ad 25^{am} ejusdem.

Atque hæc ferme sunt præcipua historię capita, quæ Severus pluribus verbis complexus est, excerpta ex Eusebio & veteribus Actis quibus eadem ferme continebantur, quæ in vulgatis, ab Anastasio Bibliothecario versis, sed quorum antiquissima interpolatio est. Jam enim factam fuisse ante Severum testis illa ejus in narratione diversitas, dum alia exemplaria prodiisse illum perfollo pariete ad Bucolia, ibique martyrium consummasse, referre testatur : alia per ipsum foramen caput abscindendum protulisse. Sed prior narratio magis convenit cum Actis quæ Baronius tanquam sinceriora secutus est ; ubi & locus martyrii, & reliquæ circumstantiæ satis conveniunt cum illis quæ ex Severo retulimus.

De Ario excommunicato idem habent eadem Acta vetera, nisi quod, ut rectè conjicit Baronius, non tam hæresis causâ, quæ sub Alexandro primum producta est in medium, quàm quod Mele-

Tillem. Hist.
Eccles. t. 4. p. 432.
763.

310. f. 8. & seq.

tiano schismati adhereret, pulsus Ecclesiâ est. Nam quod Meletii meminerunt Acta Arabicè scripta, non inane argumentum est fuisse in antiquis libris unde translata sunt, quædam ad schisma illud pertinentia, cujus non particeps solum, sed defensor Arius foret, quæ Arabes non intellexerunt. Sed cum de Ario sermo esset, non aliam excommunicationis illius causam fuisse suspicati sunt, quam hæresin, quæ nonnisi sub Alexandro erupit in publicum. Eâ quoque historiæ Ecclesiasticæ ignoratione factum, ut Arium Presbyterum appellarent, qui nondum eum dignitatis gradum obtinuerat, etiam secundum Acta interpolata, quæ Surius publicavit, sed Diaconum: cum ab Achilla Petri successore Presbyter ordinatus fuerit. Antiquam porro hanc interpolationem esse facit manifestum, Actorum quæ Severus exscripsit, & Surianorum de hæresi Arij jam à Petro damnata conformitas: quam ne dubitemus, quin ad historiæ fidem emendanda utraque sint, cogit contrarium Athanasii testimonium, qui excommunicatum Arium hæresis causâ primum fuisse scribit ab Alexandro Achillæ successore. Et sane vestis Christi discissio, quæ per visum Petro representata est, schisma potius quam hæresin significare videbatur.

Tom. 6. die
25. Nov.

Præter illa quæ Severus complexus est, habemus communem Orientalium omnium traditionem de Epistola Canonica Petri Alexandrini: ea extat in omnibus Canonum Collectionibus, sed ut vetera ejusmodi monumenta, ut plurimum solent, valde interpolata. Antiquissima omnium & magis accurata versio, Syriaca est, quam nobis subministravit Codex optimus membranaceus Bibliothecæ Medicæ. In eo tamen inter Canonem 13^{um} & 14^{um} inseritur fragmentum exhortationis ad poenitentiam, quo carent Græci Codices, fortè quia legem nullam continet. Ejus testimoniis utuntur Echmimensis, Ebnassalus, Abulfaragius, & alii cujuscunque sectæ Orientales Christiani, apud quos etiam extant quædam ex aliis ejus operibus fragmenta, in illis Collectionibus anonymis quæ vocant responsa; sed ita ut ad posteriorum temporum disciplinam accommodata sint. Cum enim pleraque illa Juris Canonici syntagmata seriùs tacta sint, nec tam ad doctrinæ Autorum commendationem, quàm ad usum Ecclesiarum, Canones ferme omnes qui ad lapsos in persecutione Gentilium pertinebant, accommodaverunt ad eam quam sæpe à Muhamedanis Christiani sustinuerunt. Ita Canones aliquot disciplinam spectan-

Petri Epistola Canonica, edita cum Gr. Thaum.
p. 10.
Till. p. 450.

tes, erga apostatas qui abnegato Christo, Muhamedanam impietatem professi erant, Petro Alexandrino, Basilio, & aliis primorum sæculorum Patribus tribuunt.

De aliis ejus operibus quorum antiqui Autores meminerunt, nihil apud Orientales extat, aut memoriæ proditum est: nisi quod nonnulla fragmenta laudantur à Jacobitis in Opere quod vocant *Fidem Patrum*, in quo multa veterum testimonia ad hæresis de una natura suæ defensionem collegerunt. Homilia de *Baptismo Christi* laudatur in alio opere, cui titulus *Unio pretiosus*.

De Ario & visione quæ Petro martyri oblata est, scribit quoque ex communi Ecclesiarum traditione Maris Salomonis filius in Historia Nestorianorum.

Passus est Petrus secundum Eusebium Hist. l. 9. c. 5. nono persecutionis anno, hoc est, ut posteriorum accuratum calculum sequamur, an. J. C. 311. Nempe ut docet idem Eusebius l. 8. c. 11. nonus decimus agebatur annus Imperii Diocletiani, cùm mense Dystro quem Romani Martium vocant, appetente die festo Dominicæ Passionis, proposita sunt ubique Imperialia Edicta. Hæc nempe nota designat annum æræ vulgaris 311. ut probat D. Theodoricus in Notis ad Acta Martyrum sincera.

P. 317.
Æra Martyrum.

Neque omitti debet ab illa tam insigni persecutione quæ tot Martyres cœlo inferuit, duci Epocham quæ in tota hac historia frequentissime recurrit, nempe Martyrum, quæ aliter vocatur *Æra Ægyptiorum* seu Coptitarum, quia soli Ægyptii ea uti dudum solent, quam consuetudinem servant adhuc hodierni Copticæ Jacobitæ: ab Ægyptiis Æthiopes acceperunt qui eam vocant *Annum Gratiae*. Græci Alexandrini, ut omnes ferme ritus proprios immutaverunt, eos suscipiendo qui Constantinopolitanæ Ecclesiæ singulares erant, quod post decimum sæculum fieri cœpit, ita quoque morem annos numerandi, secundum Æram Martyrum omiserunt, quorum loco annos mundi ex communi Græcorum calculo numerant. Epochæ illius initium assignando in errorem inductus ab Ignatio Patriarcha Antiocheno Josephus Scaliger, alios fefellit dum illud ab anno 19^o Imperii Diocletiani sumendum arbitratus est. Recte sane Abulfaragius. *Ab anno 1^o Imperii Diocletiani qui est Alexandri 595^m, initium habuit Æra Diocletiani, quæ annos supputant Copticæ, eamque vocant Æram Martyrum.* Idem confirmat Makrizius Autor diligentissimus, qui in 1^a parte Descriptionis Ægypti tractans de variis an-

Scalig. Emend.
Temp.
Ludolph. Comment. p. 385.

Hist. Dynast.
p. 84.

norum formis, & Epochis, annum primum Diocletiani initium habuisse scribit medio an. 595. Alexandri, quod deinde accuratius his verbis exponit. Postquam dixit persecutionem sub Diocletiano decimam fuisse, omniumque longe gravissimam, cum toto ejus imperii tempore vix unum diem intermissa fuerit, hæc subjungit: *Idcirco initium Imperii Diocletiani caput Epochæ constituerunt Egyptii. Incepit porro regnare die veneris, inter quem, & feriam 2^{am} quæ erat 1^a dies Toth, simulque primus dies imperii Alexandri F. Philippi Macedonis 594. anni, cum undecim mensibus & diebus tribus, intercurrunt. At inter feriam 6^{am} quæ fuit prima dies Æræ Diocletiani, & feriam 5^{am} quæ fuit prima dies Hegiræ Muhamedanæ, intercedunt anni lunares 338. diesque 39.* Atque hæc verè à Makrizio dicta, nam ex Ulug-Beigi institutione quæ typis edita est à Joanne Gravio, ejusque tabulis constat, primum diem Æræ Muhamedanæ fuisse 15. Julii feria 5. an. J. C. 622. Seleucidarum, seu quod idem est Alexandri 934. Itaque de annis J. C. 622. si detrahamus annos 338. supererunt an. 284. atque hoc anno exeunte, nempe post x v. Kal. Octob. Diocletianum renuntiatum esse Imperatorem ex Chronico Alexandrino aliisque Autoribus probavit Dionysius Petavius. Qui quidem calculus deficit, siquidem annos numeramus lunares, qui 354. dierum sunt. Primus annus Diocletiani incidit in annum J. C. 284. cum post Cari & Numeriani obitum Imperator salutatus est. Primus annus Hegiræ est 622. J. C. Itaque inter unamque Epocham intercedunt anni 338. sed solares, non lunares, nam isti non eandem summam annorum efficiunt, sed undecim circiter annis minorem. Unde non dubitandum, quin vel librarii vel ipsius Autoris culpâ factum fuerit, ut lunares Makrizius pro solâribus annos scriberet. Quod attinet etiam ad alteram supputationem secundum quam Autor ait 594. annos, menses 11. & dies tres intercedere inter initium Alexandri, & primum diem Æræ Diocletiani difficultate non caret. Nam non ita vulgo numerant Astronomi & Chronologi Orientales, qui ut etiam Censorinus, annos Seleucidarum numerant ab excessu Alexandri. Hic Autor anno 238. scribens numerabat annos illius Æræ 562. adde 46. qui inde fluxerunt ad J. C. annum 284. Diocletiani primum, fient anni 608. detrahe annos 12. regni Alexandri, fiet an. 596. atque ita facilis erit Makrizii cum Chronologis accuratioribus conciliatio; in quorum ta-

Ita Elmaci-
 nus.

Doctr. Temp.
 l. 14. c. 31.

Cap. 21;

bulis annus *Æræ* Christianæ 284. respondet Seleucidarum anno 596. Verùm hæc omnia turbatissima esse sciuntur. Nam ut Ulug-Beigus, & alii Autores monent, initium *Æræ* Alexandri, seu *Epochæ* Græcorum quam vocant *Tarich El-Roum*, non ab Alexandri magni Imperio, non ab ejus morte, sed à duodecim annis post ejus mortem constituendum est. Neque juvant quæcunque à doctissimis Chronologis huc usque de illa *Æra* disputata sunt; nam etsi initia Diocletiani, aut Alexandri seu Seleucidarum *Epochæ*, multis rationibus & calculis explicare aggressi sunt: nemo tamen eam Martyrum de qua nunc agitur, rectè definivit, cum eorum calculus cum communi *Ægyptiorum* non conveniat: id autem certissimè definitur ex ipsis Orientalibus qui jam à multis sæculis solas illas Epochas usurpant; nempe Syri & quicumque Antiochenæ Jacobiticæ, vel Nestorianæ Ecclesiæ subiecti sunt, annos ab Alexandro numerant. Græci & qui ritum eorum sequuntur, præterquam Syri Melchitæ seu Orthodoxi, annos ab Orbe condito: soli *Ægyptii* Christiani, & inter illos etiam soli Jacobitæ Coptitæ, annos computant secundum *Æram* Martyrum; atque eos Abyssini imitantur, utpote qui disciplinam omnem, fidem & ritus à Coptitis acceperunt. Itaque cum non alii melius quàm ipsi Coptitæ *Æram* suam intelligant, etsi fortassis Chronologicis rationibus errare deprehendantur, morem hunc tamen constantissime servant, ut annum primum *Æræ* Martyrum, Coptitarum seu Diocletiani numerent ab anno Alexandri 595. qui respondet annis J. C. 295. & 296. nam annus *Ægyptiacus* initium habet à mense Toth qui Septembri respondet. Ea ratione conciliantur Abulfaragius, Euty chius, Makrizius, & alii cum Tabulis eorum annorum qui à Kal. Januariis habent initium, atque eadem ratione annum Hegitæ 1^{um} qui incepit 15. Jul. an. J. C. 622. numerant 934. Alexandri. Videndæ Notæ Golii ad Alfraganum, & *Epochæ* Ulug-Beigi. Sed ut verum fateamur, intricatissima est apud ipsos Arabes *Epochæ* illius cum aliis comparatio, in qua non minora ab illis contra accuratæ Chronologiæ regulas, quàm à nostris hominibus peccata sunt. Computum Ecclesiasticum ignorare plerique Muhamedani: Christiani sæpe in annis Alexandri seu Seleucidarum comparandis hallucinati sunt. Recentiores Chronologi, qui hæc omnia emendare poterant, libros Orientales ignoraverunt, neque ullus magis Scaligero, qui tamen Orientalis eruditionis lacinias ubique ostentavit, Ipsi Christiani

PATRIARCHARUM ALEXANDRINORUM. 65

PETRUS
Patt. XVII.

stiani Orientales sæpè cùm annos Arabum cuni annis Martyrum componunt, aberrare deprehenduntur. Itaque in hac historię Epitome eos ad veriorem calculum expendimus, nempe ut æra incipiat ab anno J. C. 284. quæ est Bollandianæ continuationis Autorum sententia.

Hist. Patr.
Alex. p. 31. 6.

ACHILLAS PATRIARCHA XVIII.

ACHILLAS
Patt. XVIII.

ITA ab Eusebio aliisque Græcis Autoribus appellatur Petri Martyris successor proximus, quem Copticæ suis Indicibus ἀρχιλλας vocant, & Arabes Archillam & Archelaum, malè profus, nec nisi ex aliquorum codicum vicio, quod in alios omnes irrepsit. De eo autem pauca admodum Severus habet: *Mortuo, inquit, Petro, Alexandrini Christiani, missis ad Episcopos nuntiis, eos convocaverunt in urbem, ubi ordinatus est Achilles Presbyter secundum Petri morientis mandatum; statim multi rogaverunt novum Patriarcham, ut Arium reconciliaret Ecclesiæ: ille verò facilis nimium ad importunas eorum preces, eum Diaconum ordinavit. Ita cùm præter patris sui Petri mandatum Arium suscepisset, non diu cathedram Episcopalem tenuit, sed post sex ab ordinatione menses obiit 19^o mensis Bounæ seu Bâini.* Ita Chronicon.

Euty chius nonnisi 5^o post Petri martyrium anno, Achillam constitutum fuisse Patriarcham scribit, qui sex menses federit. Gelasius Cyzicenus unius anni vacationem fuisse ait: sed fides ejus vacillat, Arium, implorata ope amicorum, ab Achilla veniam impetrasse, & sacerdotem ab eo fuisse ordinatum, cùm simulasset poenitentiam de pristinis erroribus. Sex annos habet Latina Euty chii versio, sed per errorem; nam in Arabico, menses legitur: ut etiam apud Elmacinum, qui sex menses & aliquot dies numerat: atque ita Makrizius, & Indiculus apud Abulbircat. Magna sanè etiam in Græcis Autoribus conciliandis difficultas est circa Achillæ Episcopatus initium, & tempus quo sedit. Abulbircat ejus ordinationem & mortem eidem anno assignat, quem ait fuisse 19^{um} Æræ Martyrum. Ea si, ut mox ostendimus, deducenda est ab initio Diocletiani, hoc est ab anno 284. J. C. & Diocletiani propositis ubique adversùs Christianos edictis notissimus idem sit quo passus est Petrus, quod ex Eusebio & Arabicis Autoribus certissimum omnino videtur esse, idem erit annus ille 19^{us} Æræ Martyrum, qui respondet anno Alexandri sive Seleucidarum 614.

P. 407.

Hist. Nic.
c. 26. l. 2. 4.

is autem est an. J. C. 303. Nam ex calculo Makrizii inter initium Æræ Seleucidarum, licet malè ab eo assignatum, à 1^o an. Alexandri, sed ita tamen ut numerus sibi constet, & cum accuratiori Chronologia concilietur, intercedunt anni 595. paucis diebus exceptis. Atque ita cum annus Ægyptiacus, qui solus locum habet in Æra Martyrum, incipiat à Septembri seu Toth, 1^{9^{us}} illius Æræ incidit in annos Seleucidarum 614. & 615. J. C. 302. & 303. qui ultimus est Diocletiani 1^{9^{us}}, quo passus est Petrus Alexandrinus. Huic si statim successit Achillas, ut ex Severo meliorum Autorum defectu intelligitur, sexque tantum mensibus Cathedram tenuit, rectè eodem anno 19. Martyrum: J. C. 303. Seleucidarum 614. & 615. assignatur Petri martyrium, Achillaque ordinatio & obitus. Is etiam calculus alia ratione confirmatur: nam Alexander Achillæ successsor obiit an. J. C. 326. Constantino Aug. VII. & Constantio Cæsare Coss. Sedit Alexander secundum Severum & alios Autores Orientales annis 23. Igitur initium ejus incidit in an. J. C. 303. Arabibus consentit Nicephorus Patriarcha & multi alii, circa annos Alexandri. In Indiculo Coptitarum apud Abulbircat assignatur obitus Alexandri an. Martyrum 30^o, sed malè ut infra dicetur, cum de Athanasio loquendum erit.

Verum adeo confusa est Orientalium Chronologia, ut eorum calculos cum Græcis Latinisve Autoribus conciliare operam sit abuti suam, Achillam ordinatum Patriarcham Alexandrinum anno J. C. 311. obiisse anno 312. verisimile videtur: ad annum sequentem debere produci aliorum sententia est, non inanibus argumentis fundata. Cum verò non omnino perspicua sint Græcorum Latinorumque testimonia, Orientales parum inter se consentire mirari nemo debet, præsertim cum in comparandis annis Ægyptiacis, cum Græcis & Seleucidarum Æræ propriis, sæpè errare deprehendantur.

Sub Achilla statim scilicet post Petri martyrium Antonium in eremum se recepisse scribunt plerique Autores Orientales, nempe quia faviente persecutione Alexandriam cum venisset ut se martyrio offerret, eà sedatâ in solitudinem suam reversus est, ut scribit Athanasius in ejus vita. Indiculus apud Abulbircat, sub Maximo Patriarcha ejus Monachatus primordia collocat.

*Tillm. Hist.
Ecc. 1.6. p. 213.
Hist. Petr.
Alex. p. 36.*

ALEXANDER PATRIARCHA XIX. ALEXANDER
PATR. XI X.

MORTUO Achilla, convenit Christiana multitudo, ordinatusque est Alexander Sacerdos, juxta mandatum Petri Martyrum postremi. Statim atque in sede D. Marci Alexander collocatus est, quidam eum interpellaverunt de Ario suscipiendo: sed eos rejecit cum indignatione, neque ut Arium susciperet adduci potuit. Verum illis ita locutus est: Petrus Pater cum esset in carcere, mihi & Achillæ fratri meo dixit, Christum Dominum anathematizasse Arium, prohibuitque ne illum reciperemus: quia verò Achillas huic mandato inobediens fuit, sex mensibus tantummodò dignitatem retinuit. Igitur nunquam omnino illum recipiam: atque ita mansit Arius anathemati subiectus, donec poenitentiam errorum suorum simulans Constantinopolin venit, atque ad Constantem Constantini M. filium se applicuit, perfidiam suam occultans; sed ejus impietatem Deus tandem ultus est, perierit enim effusus per posteriora visceribus. Ejus causâ habitum fuit Nicænum Concilium, in quo anathema Ario dictum est, fidesque orthodoxa confirmata: promulgatæ etiam Constitutiones de jejuniis diebus & de Paschate. Huic Concilio præfuit Alexander, si Severo credimus, qui plura de illo non habet, nisi quòd obiit 22^a Farnuthi, cum sedisset annos 16. nec plures Eutychius numerat. Elmacinus 23. cum Nicephoro & aliis Græcis, qui Indices Episcoporum primariorum sedium scripserunt.

Quæ verò de Ario commemorat paucis verbis Severus, eadem fusiùs relata ab Eutychio inveniuntur, quem consulere quisque per otium poterit; neque enim sunt ejusmodi, ut quidquam novi docere nos queant, narrationes verò parùm accuratas magno labore cum antiquis & melioris notæ Autoribus conciliare non videtur operæ pretium. Sed ut paucis ea complectamur quæ ad historiam seriem pertinent, hallucinantur Orientales cum id videntur designasse, quod aut planè incertum, aut veritati contrarium esse multa demonstrant, nempe Alexandrum statim atque in sede Alexandrina collocatus est, Arium communionem privasse: nam sacerdotio functum per annos aliquot certissimum est antequam ejus blasphemiarum erumperent in publicum, quod anno 315. assignat Cardinalis Baronius. Cum verò idem Alexandri annum 1^{um} referat ad 311. J. C. nonnisi post quadriennium circiter innotescere cœpit Ariana

De Ario.

Ejus historia
ex Eutychio.
T. I. p. 432.

In Nomenclat.
Copt. Arab.

T. I. p. 432.

Or. t. contra
Ari.

hæresis, quam Spiritu sancto illustratus Martyr Petrus præviderat. Non igitur statim atque Alexander Pontificatum iniiit, pulsus ab eo Arius est; sed faciliè intelligitur Severum, qui annorum pluskam viginti historiam non integrâ pagellâ complexus est, nullum rerum gestarum ordinem observasse, imò ut superius notatum est, ignorasse quæ vera fuerit excommunicationis Arii causa, scilicet quòd Meletianæ factioni adhærens, Ecclesiam turbaret. Tetigit illam tamen Eutychius, sed ita ut Arianum fuisse dicat, Meletium, Asiutæ, aut ut Arabes pronuntiant, Osiutæ, Episcopum, hoc est Lycopoleos, ut sane ejusdem urbis Episcopum fuisse constat eum, non Bubasti, ut Kircherus Asiutam interpretatur, aut Arment, quam nullo argumento Lycopolin esse dixit. Atque ca occasione monere non pigebit, malè in Versione Latina Eutychii legi *Asynto*, ut multa alia propria nomina mirè perversa sunt, adeo ut inextricabiles nodos lectoribus, nisi Arabicè doctis, interpreter reliquerit. Verba ejus sunt: *Præerat autem urbi Asynto, (Asiutæ) è ditione Egypti Episcopus nomine Meletius, qui Arii sententiam amplexus est; eidem ergo etiam maledixit Alexander Patriarcha*, hoc est anathema adversus eum pronuntiavit. Verùm diu ante, nempe sub Petro Patriarcha Meletius excommunicatus est non ob hæresin, nam contrarium asserit Athanasius, sed quod schismatis Autor fuisset, quo Ecclesia Alexandrina etiam persecutionis tempore vexata est: nam ut ex ejusdem Athanasii Oratione 1^a contra Arianos discimus trigésimo sexto anno postquam Ariana hæresis erupit in publicum, quinquaginta quinque anni effluxerant, ex quo Meletius ab Ecclesia secessionem fecerat, nempe ut idem nos docet, cùm à Petro ob alia multa crimina, quæ diluere non potuit, tum maximè quòd idolis sacrificasset, depositus fuisset. Verùm hæc omnia accuratius persequi, & Severum aliosque Autores Orientales emendare longissimi & planè inutilis laboris foret; atque ideo ad ipsos fontes Lectorem remittimus: nam cui hæc nota non erunt ex Historia Ecclesiastica, exiguum aut nullum omnino fructum, is ex Commentario hoc nostro percepturus est.

Idem potiori jure dicere possumus de Historia Concilii Nicænæ, quæ ad hujus Patriarchæ tempora pertinet, & in qua mirum in modum nugati sunt Orientales, quorum traditionem ad pauca capita revocabimus, autores indicasse contenti, quorum aliqui Latine prodierunt, reliqui suâ linguâ in Bibliothecis delitescunt.

Arii potissimum causâ congregatum esse Concilium sub Constantino Imperatore communis omnium sententia est. Ita Præfatio omnium quæ apud Orientales extat antiquissima in Cod. Bibliothecæ Regiæ, ubi quod in hoc genere rarissimum est, Græcè legitur & Arabicè. Fuit olim is Codex Gilberti Gaulmini viri doctissimi Libellorum supplicum Magistri; & sive ille, sive alii, qui eum familiariter noverant, dederunt occasionem opinioni, quam nos admodum juvenes audivimus firmissimè teneri ab eruditis, & quam didicimus ante annos multos à viro clarissimo Claudio Hardy, licet falsa nobis tandem deprehensa sit: vidisse enim aiebant in Gaulmini manibus Codicem Canonum Nicænorum Græcum, cum Versione Arabica, & ex eo commento multa alia conficbant. Attamen, si ut vulgò fit, hæc opinio ad alios permanaverit, monere debemus, nihil omnino præter titulos prolixiores, & Confessionem fidei ex Edicto Justiniani expressam, extare Græcè in illo libro: neque alteros Græcè & Arabicè conscriptos alibi quisquam, opinor, vidit. Ut igitur ad illum titulum revertamur, docet paucis verbis primum illud fuisse universale Concilium trecentorum decem & octo Patrum, contra Arium, de Filio Dei blasphemantem adversus quem definitionem fidei seu Symbolum ediderunt. Sequitur Præfatio alia Arabica quæ numerum cccxviii. Episcoporum pariter confirmat: adjungitque præfuisse Alexandrum Patriarcham Alexandrinum, adfuisse Eustathium Antiochenum, Macarium Hierosolymitanum; & Vicarios Julii Papæ Romani. Canones editos fuisse viginti, variasque Constitutiones quæ aliis Canonibus continentur. Codex antiquissimus Bibl. Medicæ Syriacus, qui Canonum Collectionem complectitur, trecentos decem & octo tantum Patres numerat, ut Autor antiquus Fidei Patrum qui brevem cap. 1^o Nicæni Concilii historiam recenset, atque hæc sanè traditio à Græcis & Syris conservata potior omnino est quàm reliquæ omnes Arabum historiæ, quæ Patres 2048. adfuisse commemorant. Ita Præfatio quam Latine à se versam edidit, & Canonibus Arabicis vulgò dictis præmisit Echelenfis; & eadem apud Beveregium, tum in variis Codd. Regiis & Colbertinis: Eutyechius, & multi alii, sed tamen non omnes: nam Abulfaragius 318. tantummodò numerat, ut etiam Isâ F. Zaraa, Severus noster, uterque in Epitome historica primorum Conciliorum, Maktizius, & Autor Historiæ Generalis Persicè scriptæ titulo *Mogemal Touarich*, & plures alii quos enu-

Mf. A. 5e-
guir.

Pardess. con.

merare necesse non est, trecentos decem & octo quoque numerant. Ebnassalus in Collectione principiorum fidei aliam de bis mille & amplius Episcopis opinionem refert, sed ita ut non approbare videatur. Et sanè contra absurdam illam & nullo argumento idoneo fundatam traditionem opponitur omnium Ecclesiarum non solum Occidentalium, sed etiam Orientalium consensus,isque non in libris quorum mediocris autoritas est, sed in Diptychis conservatus, quorum testimonium omnia aliorum Autorum evertit. In illis porro inter sanctos quorum memoria celebratur, nominantur 318. Patres Nicæni, & 150. Constantinopolitani, aliique item qui in Ephesino adfuerunt. Ita Liturgiæ Syriacæ Jacobitarum & Melchitarum : Copticæ Basilii, Gregorii & Cyrilli : Æthiopica, Armenica, tandem omnes. Quod verò trecentos illos decem & octo electos dicunt, ex majori illa multitudine, gratis, & absque ulla autoritate dicitur : neque magis fidem meretur, quàm quod apud Autores aliquot Muhamedanos legitur, Christianæ fidei articulos, cum nondum perscripti essent, fuisse tunc scripto consignatos ; neque ea & quæcunque sunt hujus generis, quia apud Autores raros leguntur aut in peregrina lingua, alicujus idcirco pretii esse censenda sunt, ut refelli oporteat. Idem statuentum de tota illa Præfatione quam attexuit Abraham Echellensis versioni illius Arabicæ, quæ Latinè primum apud nos, tum utraque lingua in Anglia edita est : nec unius assis æstimanda quæ Joannes Seldenus doctrinæ ostendendæ gratiâ disputavit ad fragmentum Eutychiei à se editum.

Epocha Concilii.
P. 86.

Circa Epocham Concilii, Abulfaragius habitum esse scribit anno 636. Alexandri seu Æræ Seleucidarum ; atque eundem annum habet Maris Salomonis filius in Historia Nestorianorum, atque ita alii plerique : quem annum fuisse affirmant Constantini 19. J. C. 325. Is autem calculus satis convenit cum rationibus ex Chronologia deductis : nam secundum tabulas vulgares annus Alexandri 636. convenit an. J. C. 326. quæ differentia exigua est, & facile conciliari potest ex diversa annum inchoandi methodo. Eandem Epocham repræsentat Præfatio ejusdem Concilii Syriaca in antiquissimo Codice Mediceo, ubi Synodus habitae dicitur anno D C X X V I. Græcorum Epochæ à Seleuco Nicatorum Rege Syriæ, quam sequuntur Edeseni sub Consulatu Paulini & Juliani VV. CC. mensis Hoziran 19. A. D. XIII. Kal. Julius an. XX. Constantini Imperatoris. Eadem Epochæ confirmatur tē-

PATRIARCHARUM ALEXANDRINORUM. 71

ALEXANDER
Patr. XI X.

simonio Concilii Calchedonenfis, Act. 2. ubi omnia cum Syriaca Præfatione conveniunt. Eadem Epocha notatur in libro Fidei Patrum.

Canones præter legitimos viginti qui ab Ecclesiis omnibus suscipiuntur, Orientales omnes Ecclesiæ dudum alios agnoscunt, & quidem non unos, qui apud eos Nicæni quoque appellantur. Eorum etsi hoc loco Severus non meminit: at alii omnes Autores, præsertim qui de Jure Ecclesiastico scripserunt, eos recensent, eorumque autoritate utuntur. Primus, quantum huc usque perspicere licuit, eorum in Occidente meminit Isidorus Mercator, licet obscurius, nec ita ut eos vidisse intelligatur, sed accepisse tantum extare apud Orientales Concilium Nicenum, habens potius quatuor Evangeliorum magnitudinem. Nec videntur eo tempore quo Franci Palestina magnaue Syriæ & Mesopotamiæ parte potiti sunt, ad Canonum illorum noticiam ullatenus pervenisse. Ita nihil de illo thesauro abscondito auditum est ante sæculi nuper elapsi finem; cum editi sunt à Francisco Turriano, tanquam legitimi & de quibus dubitare fas non esset. Autoritatem quam ipsi non habent, tantum absuit ut commendatoria ejus præfatio illis conciliaret, quin potius, Criticos omnes, Ecclesiæque antiquitatum peritos in contrariam penitus sententiam abduxit. Nec pluris valuit longa & inanis Disputatio Abrahami Echellensis, quam novæ suæ eorundem versionis præmisit. Eas expendere non est hujus loci, præsertim cum singulari Dissertatione quantum præstari à nobis potuit, eorundem Canonum originem explicaverimus. Etsi porro apud omnes propemodum Theologos una de illis sententia sit fictos esse, inanes & suppositicios, aliter tamen omnino de illis judicandum videtur. Eos quidem à Nicænis Patribus sancitos fuisse, & toto triennio elaboratos, quæ Orientalium quorundam, Echellensisque sententia est, absurdissimum esse jam dudum à viris doctissimis judicatum est, neque ad paradoxam illam opinionem confirmandam, quidquam est in antiquitate præsidii. Verum suppositos omnino illos esse, æquè falsum est. Nam Ecclesiæ Orientales omnes; Melchitica, hoc est Syri Orthodoxi; Jacobitæ cujuscunque ritus aut linguæ; Nestoriani, omnes tandem iis utuntur, ab annis amplius nongentis: usque ille non libris & lectione circumscribitur, sed etiam in judiciis locum habuit, cum causæ Christianorum plerumque ab Episcopis, aut si majores essent, à Patriarchis judicarentur, ex diversis Califarum, Sultano-

Canones
Nicæni.

T. 2. Concil.

rumque privilegiis. Cùm igitur auctoritatem illorum Canonum certissimam apud Christianos Orientales viguisse constet ante annos tam multos, dubium esse nullum potest, quin seriò apud illos hæc collectio facta fuerit, non ab otioso aliquo homine confarcinata. Etsi enim apud nos nemo jam negat suppositas fuisse intra octavum & nonum sæculum Decretales veterum Pontificum Epistolas, nec tamen auctoritas quam in judiciis postmodum habuerunt, earum veritatis argumentum est, nihil tamen inde adversus opinionem nostram de Canonibus Arabicis simile deduci potest. Neque enim illi ficti, sed veri sunt, licet aliquatenus interpolati: neque inauditam & suo sæculo parum convenientem disciplinam continent, sed eam quæ quotidiano usu confirmata erat, imò quæ aut ex ipsis Nicænis Canonibus, aut ex posterioribus, vel aliqua ipsorum interpretatione ad sequentia tempora accommodaretur. Ut igitur paucis aperiatur quæ de illis sententia ferenda videatur, ita post diligentem eorum cum aliis comparationem constituimus.

Nicænorum
Arabicorum
Canonum ori-
go.

Codex Canonum qui Nicæni Arabici vulgò appellantur, non est opus aliquod studio compositum, ut fraus Ecclesiæ fieret: sed antiqua versio Codicis Canonum Ecclesiæ universæ, qui quidem ut multi alii, eò quòd Nicænos Canones initio præfixos haberet, titulum communem dedit subsequenter, qui Nicæni non essent. Talem porro fuisse Codicem primævum illum, editiones illius variæ, Vonnaciensis 1525. Parisienses, Tiliæna, Justelliana, & aliæ satis ostendunt, in quibus Nicænis, Sardicenses, Antiocheni & alii Canones, numeris tantummodo distincti subjiciuntur. Ita videmus Augustinum, Antiochenos quibus prohibitum ne Episcopus vivens successorem deligeret, pro Nicænis habuisse. Ita Sardicenses sub eodem nomine intelligendi sunt in Epistolis 15. & 16^a Innocentii Papæ I. Talem apud Græcos extitisse Codicem, non modò editi, sed Mss. Codices multi confirmant: at usum illiusmodi Codicis apud Antiochenos Syros fuisse docet nos locus insignis apud Photium in Excerptis ex Ephræmio. Ait enim adduci ab illo Canonem 2^{um} Concilii Oecumenici Constantinopolitani I. numerarique 166^{um} quod non se intelligere Photius testatur: at 165^o numero est in Codice Ecclesiæ universæ: 3^{us} que qui est 165^{us} cùm etiam ad fines Dioeceseon pertineat, potuit in antiquis exemplaribus præcedenti coherere, ut in aliquibus quæ supersunt observatur. Cùm verò vir Juris Canonici peritissimus

tissimus Photius hæc ignoraverit, mirum esse nemini debet Orientales, qui vix ullum doctrinâ, præsertim Criticâ, parem habuerunt, cum in ejusmodi Collectiones incidissent, quæ Nicænorum Canonum titulum præferrent, magnaue inter eas varietas deprehenderetur, quæ adhuc in versionibus, ex Græca & Syriaca linguis major omnino erat, in eum errorem incidisse, ut sicut primos, ita & omnes reliquos ad Nicænum Concilium pertinere judicarent. Nam 2^{us} Codicis Arabici ex 1^o Græco Nicæno factus est, & ita plerique alii viginti in capite collectionis reperiuntur, ut fusiùs ostensum est in singulari Dissertatione. Itaque cum legitimis Canonibus suam auctoritatem decedere nolent, reliquos qui in Codice universali reperiiebantur admitterunt, tanquam Nicænos, quia titulus ita ferebat. Sciunt porro eruditi his Collectionibus adjuncta esse multa quæ ad primævum codicem non attinerent, adeo ut magna sit exemplarium diversitas, dum singulis Ecclesiis propria disciplina, ex posterioribus Canonibus etiam ex Imperatorum Edictis, in Paratitla, aut leges breves digesta adjungebatur. Hos posteriores Canones cum Syri & Arabes suâ linguâ interpretarentur, ut accommodarentur ad temporum suorum disciplinam, interpolaverunt; quod præcipuè observari potest in illis, qui ad Sedium primarum dignitatem spectant. Nam præter constituta antiquitùs de quatuor Patriarchis, in Nicæno Constantinopolitanoque Conciliis, de Seleuciæ Catholico, qui nonnisi sub Justiniano institutus est, multa habent, & ea inter se maximè diversa. Nam vetustissimæ versiones, Seleuciæ Ctesiphontisque meminerunt, quia Episcopis illarum urbium, hæc primùm prærogativa honoris jurisdictionisque collata est. Posteriores Bagdadum aut Modaienam nominant, præsertim si à Nestorianis factæ sunt, quia eorum Primas qui adhuc Catholicus vocatur, illic sedem habebat: Jacobitarum Syrorum versiones Takritam substituunt, quia sedes erat eorum Primatis, seu Catholici, quem *Mosrian* appellant. Ita de reliquis.

Col. est. Syr.
Ms. Medicea.

Eam igitur Collectionem ex Græcis exemplaribus factam non dubitamus, nempe ex Codice Ecclesiæ universæ multis additionibus interpolato: & à Græcis primùm ad Melchitas seu Orthodoxos Arabicè loquentes translata, ad reliquas sectas pervenisse. Omnes enim in admittendis illis Canonibus consentiunt, Melchitæ Jacobitæ, Nestoriani cujuscunque linguæ. Illud etiam originis illius quam designamus, certissimum occurrit indicium, quod Ca-

Ea collectio
ex Græcis facta.

nones quidam ex Ephesino, & ex Calchedonenſi Conciliis deſumpti ſunt, ut 43^{us} ex Ephesino ultimo : 53^{us} ex 2^o Calchedonenſi, ut 57^{us} ex 13^o, quos quidem non admiſſiſſent Neſtoriani aut Jacobitæ, quorum hæreſes in illis Conciliis damnatæ ſunt, niſi unde accepti fuerant, ignoraveſſent. Huc accedit quod in antiquiſſima omnium verſione Syriaca, quæ ut in quodam loco notatur, facta eſſe potuit anno Græcorum 998. J. C. 686. cùm quædam eo anno ex Græcis interpretata contineat, nulla Canonum illorum memoria eſt.

Quo tem-
pore.

Cùm verò in antiquiſſimis editionibus horum Pſeudo-Nicæ-
norum Canonum occurrant quædam quæ vetuſtiorẽ Muha-
medanorum initiis temporum notam contineant, ut ea quæ
de Cteſiphonte & Seleucia mox obſervavimus, tam Collection-
nem factam arbitramur longè poſt ſchiſmatum Jacobitici & Ne-
ſtoriani media tempora, nec niſi poſt Muhamedani Imperii fun-
dationem, ita ut primæ verſiones unde reliquæ propagatæ ſunt,
Arabiz fuerint, quæ Armenicæ, Æthiopicæſque pepererunt.
Copticæ ſi haberemus, eſſet unde certius de illarum Collection-
num antiquitate judicium ferri poſſet : at qui earum meminere
huc uſque legimus neminem. Unde conjectura noſtra non levi-
ter firmatur : ſi enim ante Muhamedana tempora, Collectionis
iſtius in Eccleſia Alexandrina uſus fuiſſet, procul dubio ea in Co-
pticam linguam non minus quàm Liturgiæ, & ſacræ literæ tranſ-
lata foret : niſi id omiſſum exiſtemus, quia tunc communis
apud Ægyptios Græca lingua erat ; atque adeo neceſſe non eſſet
ut Canones, qui legum vicem obtinebant, extarent linguâ ver-
naculâ, quia publicè non legebantur, ut de ſacris literis & Litur-
gia fieri oportebat. Nam discrimina ſectionum, interpretationis,
& numeri, quæ notant Echmimeneſis & Ebnaffalus reperiri inter
Codices Coptitarum Arabicos, & aliarum ſectarum, ſuadere poſ-
ſent factam eſſe illorum verſionem ex Coptica quæ ut aliorum
Canonum, temporis injuriâ perierit : ſed certum eſt Autores illos
non alias diverſas lectiones, quàm quæ ad Arabicos codices ſpe-
ctarent, allegaſſe.

Quorum-
dam Cano-
num explica-
tiones, Cano-
nibus adnu-
meratæ ſunt.

Præter illos Canones veterum Conciliorum præſertim Oecu-
menicorum, qui hanc Pſeudo-Nicænam ſurraginem conſtituunt,
nam τὸ μὲν vix ullus apparet, irreperunt etiã quorundam
explicationes, quæ in Canonum quoque numerum venerunt, ut
ille de Chorepiſcopis alienus plane à Græca diſciplina : alia etiã

ex non scriptis traditionibus, quorum omnium vestigia relegere conati sumus in jam dicta Dissertatione. Atque ex illis compactus est Codex ille Canonum Nicænorum Arabicorum, quorum etiam collectio duplex est. Prima Canones continet 80. 83. aut 84. nam ea est inter sectarum diversarum codices discrepantia. Sequuntur alii quorum in variis codicibus 33. aut 34. sectiones reperiuntur; majorque adhuc est illorum diversitas. Utrosque dedit Latine explicatos Abraham Echellensis. Tandem Nicæno quoque Concilio Orientales abscribunt *Canones* quos vocant *Imperatorum*: eosque tum à primis viginti, tum à secundis, distinguunt, & illorum neque certus est numerus, neque exemplaria similia. Illi verò Canones nihil aliud sunt quam excerpta ex Nomocanonibus Græcis, Digestis, Codice Theodosiano & Justinianæo, Novellis Constitutionibus & Basilicis, eo ordine disposita, ut Corpus quoddam Juris constituent, unde lites inter Christianos possint judicari. Quamvis porro multas leges complectantur quæ ab illis Imperatoribus latæ sunt, qui à Jacobitis & Nestorianis Orthodoxi non existimantur, habent tamen maximam inter omnes Ecclesias autoritatem. Illi autem Canones ad Nicænum Concilium relati sunt, quia quasdam Constitutiones continent, quæ à Constantino Magno editæ sunt, circa Concilii tempora.

Ebnass. Præf.
Collect. Can.
Abulbircat.

* De Concilio Nicæno etiam eadem ferme apud omnes autores reperiuntur, singulare edidit Opusculum Severus Episcopus Ashmonin; & cum de eo nihil ferme scripserit in vita Alexandri Patriarchæ, fusiùs illam historiam illic persecutus est. Adjungi possunt Præfationes editæ tum ab Echellensi, tum à Beveregio, præter ineditas multas: Euty chius, Elmacinus, Abulfaragius, Maris Salomonis filius in vita Mar Paphæ Catholici, quem Concilio interfuisse existimant Nestoriani: tum in singulari Capite de Conciliis: Abulbircat, Ebnassalus uterque, primus in Collectione Principiorum fidei; alter in Præfatione Collectionis Canonum, Fergealla Echmimensis in sua: Abulfaragius in Nomocanone Syrorum Jacobitarum: Chronicum Orientale: tum alii quos non habemus, & quos citat Elmacinus ut Menbigenis seu Hierapolitanus quidam Episcopus, quem ex aliis Autoribus discimus vocatum fuisse Muhabub Constantini filium qui nobis ignotus est, atque anonymi alii multi qui in Bibliothecis reperiuntur. Illi prope omnes eadem scribunt de numero Patrum bis mille ducentorum

Orientales
qui de Con-
cilio Nicæno
scripserunt.

Orig. Ecd.
Act. p. 70. &
seq.

quadraginta octo ; de biennio & amplius, quo Nicææ sederunt in Canonibus conscribendis occupati, tandemque in aliis circumstantiis consentiunt. Consuli etiam potest Præfatio Echellensis, qui omnia collegit quæcumque potuit ad fidem Autoribus Orientalibus conciliandam. Videri quoque potest Commentarius Seldeni ad eum Eutychii locum qui de Nicæno Concilio est, etsi pauca admodum habeat quæ sciri interfit. Dedit eo loco nomina Patrum 318. ex Codice Græco Sambuci, quæ deinde in novam Conciliorum editionem translata sunt. Adjecit alia ex Codd. Arabicis, sed ita interpolata ut agnosci nequeant. Plura ejusmodi subscriptionum exempla nacti olim sumus ex variis Codd. Mss. quæ quidem luce digna nemo existimabit ; deteriora longè tot antiquis eorum nominum indiculis, quæ Latini Codd. antiquissimi repræsentant. His adjungere licet quæ Gulielmus Beveregius adnotavit ad versionem Præfationis Arabicæ à se editam post Pandectas Canonum.

Quæ Muhamedani scribant de Nicæno Concilio.

Ita Ebn. Chetab. Abulfeda. Mss. Pers.

Ea colligere quæ Muhamedani de Nicæno Concilio chartis illeverunt suis, nemo sustinebit, nisi qui peregrinas ejusmodi merces ut extrudat facilius, laudandas arbitrabitur. Quid enim ab illis disci poterit, quorum nemo Christianas res aliunde quas ex Arabicis Scriptoribus didicit, præter ea quæ Pseudopropheta somniavit, aut primi nugarum ejus interpretes de suo addiderunt? Quidam, ut alibi dictum est, in Nicæno Concilio stabilitam esse scribunt Christianam fidem, quæ antea incertis variisque hominum opinionibus ferebatur. Ita Autor satis antiquus *Mogemal Toiariach*, nempe quia legerant factum fuisse in eo conventu *Symbolum*, quod ut Græci *πισμ* uno verbo, ita Arabes *Amanet* vocant. Reliqui aut Eutychium aut Severum exscribunt ; atque inter eos magis accuratè scripsit Takieddin Makrizius, ultimâ rerum Ægyptiacarum parte.

De Eutychii circa Episcopos 3048. auctoritate digressio.
Eutych. l. 1. p. 440.

Verum etsi Arabicè scribentibus nugari impunè huc usque licuit : cum illorum in antiqua historia supinitas & ignorantia doctis omnibus dudum explosæ sint, quod Eutychius de suo ad istius bis mille & amplius Episcoporum concursum adjecit, ferri non potest, præsertim cum non aliunde quàm ex Muhamedanorum lacunis illud haurire potuerit. Ait enim Episcopos illos bis mille quadraginta octo, sententias circa religionem habuisse diversissimas ; quarum nonnullas enumerat & inter eas hæreticorum, qui vix Christiano nomine censebantur. Commotum Constantinum

eos in varias classes distribuisse, ut inter se disceptarent: trecentosque decem & octo divinitatem Christi asseruisse, ad quorum ipse sententiam accesserit: unde sequeretur negasse reliquos Divinitatem & Consubstantialitatem Filii, quod arripuit Arianorum ultimi sæculi impudentissimus Sandius, ut inde argumenta contra sanctissimæ Trinitatis perpetuam fidem eliceret. Ita Seldenus qui ubique opportunè & importunè merces Orientales laudat, laureolam in mustaceo quærens, arma hostibus Christiani nominis imprudens subministravit. Verebatur quippe ne si Eutychium qualis fuit, veris coloribus depingeret, caderet tam gravis testis autoritas qua Episcopatum subvertere nitebatur, adeoque sublevanda erat hominis fides, aliorum testimoniiis, & quorum tandem? Josephi, inquit, Ægyptii & Ismaelis filii Hali Muhamedani, nec enim alios habuit testes quos appellaret. Potuisset autem adungere Makrizium, & non paucos alios, præter eos Persas quos indicavimus.

Nuclens Hist.
Eccles. p. 166.

Josephus ille Ægyptius larva est & *ἰσδωλον ἀμαυρόν*, quod somniare viri illi eruditi: possessor scilicet Codicis illius Arabici quem Seldenus, Pocockiusque tractaverant, & quo ad versionem suam concinnandam usus est Beveregius. Is porro Josephus ordinatus dicitur an. J. C. 1316. Versio tamen ipsa aliquot sæculis est antiquior, & Codices Regii duo, unusque Colbertinus, hanc ætatem longè superant. Ita nulla illius autoritas est non magis quàm Præfationis ipsius, cujus diversissima sunt exemplaria, nec in omnibus reperitur inmanis ille Episcoporum mille quadraginta octo, vel etiam bis mille trecentorum & quadraginta octo numerus. Accedit quod accuratissimæ Præfationes Græcæ, quæ extant in Melchitarum Codicibus, & Syriaca Jacobitarum, nihil simile continent, sed trecentorum decem & octo, Ecclesiarum omnium Diptychis consecratum numerum confirmant.

Josephus
Ægyptius Ca-
nonum inter-
pres non fuit.

Ismael ille filius Hali, Abulfeda est Hamæ satrapæ ex Yubidarum stemmate, opere Geographico suo notissimus; sed non minorem laudem consecutus ex historia, quam à rerum initio ad suam usque ætatem perduxit, ad annum scilicet circiter 1300. Æræ Christianæ. In rebus porro Muhamedanorum tractandis satis diligens & accuratus est; at in vetustis Originibus quæ Hegiram antevertunt, nihil habet unde reliquis præferatur. Tanta autem illius fuit rerum peregrinarum ignorantia, ut veteris Testamenti libros Arabicè conversos nesciret, quod viro doctissimo Eduardo

Ismael filius
Hali quis hæ-
rit.

Pocockio fraudi fuit, dum ex illius testimonio de antiquitate versionis Arabicæ conjecturam fecit. De Concilio Nicæno æquè sciebat Abulfeda; sed Makrizium aut Eutyrium exscripsit, de cujus absurdissima narratione judicare non poterat. Quantum autem ignoræ illi forent Christianorum res, argumento perspicuo demonstrabimus. In ditissima Mss. librorum omnis generis Bibliotheca Seguieriana extat Codex illius historiæ, qui non modò ætati Autoris æqualis est, sed ad eum pertinuisse & illius manu multis in locis emendatus fuisse videtur. In eo enim lituræ plures occurrunt, & emendationes, non quæ antiquarii librum recensentis, sed Autoris ipsius sua retractantis manum indicant. Literæ etiam grandiusculæ, quales vulgò sunt hominis de calligraphia parum solliciti, & quæ ab elegantia qua totus liber scriptus est, longè absumunt, Principem ipsum, Autorem operis designant potius, quàm Criticum recensentem, præsertim cum multa deleta, adjuncta quoque non pauca animadvertantur, quibus nemo alienum opus inficere solet. Non dubitamus igitur omnia illa esse ab Autoris Abulfedæ manu. Inter additamenta præcipuum unum est de variis Christianorum opinionibus, confarcinatum ex hæreseon catalogis, qualis ille qui legitur initio Præfationis Concilii Nicæni Interprete Abrahamo Echellensi, cui similes multi extant in variis Mss. Codicibus, omnes nullo judicio scripti, à viris Theologiæ non minus quàm Historiæ Ecclesiasticæ imperitissimis. In aliquem Catalogum similem cum incidisset Abulfeda, thesaurum existimavit nactum se fuisse, unde perspectissima Christianorum dogmata habiturus esset. Ex illa igitur errorum omnium colluvie Christiana dogmata describere aggressus est, quasi æqua esset veri falsique apud omnes existimatio. En hominem infidelem & barbarum, quem sæculo 14^o nugas alterius, qui nono vivebat, transcribentem audire nos jubet Seldenus, omnium antiquorum testimonio insuper habito. Neque enim aliud judicium de Autore ferri potest, qui Eutyrii fabulis auctoritatem comparare nititur ex aliquot Scriptorum testimoniis, qui de trecentorum decem & octo Patrum numero non consentiunt, quorum tamen nullus immanem illum alterum somniavit, qui ut istud saltem recte monet Seldenus, ex omnium quos Notitiæ Episcopatum totius orbis repræsentant, vix conficeretur. Hæc paulò fusiùs à nobis tractata sunt, ut novi Ariani quorum Sandius Bibliotheca est, Eutyrii auctoritate ad blasphemias suas confirmandas non abutantur, quam adeo contempnit

Gregorius Abulfaragius, qui postea Historiæ compendium dedit, ut ne mentione quidem dignam judicaret, cùm trecentos decem & octo tantum convenisse scribat.

Reliqua ad historiam Pontificatus Alexandri pertinentia petenda sunt ex melioribus Autoribus. Neque enim scivisse quidquam Ægypti illi videntur de Episcoporum plusquam centum congregato Alexandriæ Concilio, à quo primum sententia in Arium prolata est, neque de Encyclicis Epistolis septuaginta duabus quas Alexander ad omnes Ecclesias scripsit, de quibus Socrates qui duas servavit, & alii Scriptores Ecclesiastici. Pauca tantum adducit Severus in sequente Athanasii historia tanquam ex ejus Epistola ad Virgines Alexandrinæ. In ea refert Alexandrum in cella sua, sive aliocumque in loco Evangelium non legisse sedentem, sed stantem : fuisse diligentissimum in sacræ Scripturæ lectione, Deumque singularem illi gratiam ad eas interpretandas contulisse.

Reliqua ad
Alexandrum
spectantia.

L. 1.

Idem Severus retulit, quòd quadam nocte cùm stans oraret & Evangelii lectioni incumberet, venerunt ad eum Virgines Deo sacratæ interrogantes quid sentiret de quibusdam ex eodem Virginum ordine, quæ jejunia usque ad sextum diem continuarent, sed ita ut nullum interea opus facerent, omisso prorsus labore manuum, unde Solitariis necessaria ad vitam suppeditarentur. Tum ille, Scitote, inquit, Sorores, me nunquam per biduum jejunasse, neque interdiu jejunium solvisse, neque manducasse nisi ex præscripta mensura; sed neque meipsum nimio labore affixisse, aut corpus vehementius vexasse, quia optimum est ut jejunium cum moderatione fiat, quæ etiam in potu & somno observari debet. Cùm enim quisque comederit quantum opus est, firmius in oratione perseverat, ita etiam cùm cibo, potu & somno utitur moderatè. Dicite ergo Virginibus illis ut jejunium solvant, cum moderatione cibum capientes, & omnia quantum in se est recte agant.

Eodem loco refertur qua ratione Alexander egerit cum Ario, & hæc Severi verba sunt. Dicitur Arius aliquando ad Alexandrum venisse; petentique ut admitteretur, jussisse responderi in hunc modum: Præcepit mihi pater meus Petrus, ut te non susceperem, neque ad me adire sinerem, aut tecum sermonem miscerem. Ille quippe pater meus Martyr Christi Domini, cùm vidisset eum per somnum, vestemque ejus à te laceratam didicisset, prohibuit ne te susceperem. An ignoras linguam tuam ipsam esse quæ

Ejus collo-
quium cum
Ario.

ab illo te alienum fecit, per illa quæ de illo protulisti. Roga ergo Christum Dominum Salvatorem, & confitere peccatum tuum; cumque te ille susceperit, præcipiet quoque mihi ut te suscipiam, sicut præcepit patri meo Petro ut te non susceperem, quamvis ab ipso Christo Domino mandatum fuerit, ut ne quis creditum in eum aditu Ecclesiæ prohiberetur. Sed quando aliquis peccatum aliquod commisit, separamus eum à communione ut respiscat & poenitentiam agat: postquam verò illum suscepit Christus, nos quoque illum suscipimus. Cum hæc Arius audivisset, iratus magnopere recessit, collectaque magna hominum multitudine, proposuit sententias blasphemias, linguæ abscissione dignas, asserere enim Filium Dei creatum esse. Habitum itaque est illius causâ Concilium Nicææ, ad quod convenerunt Antistites quatuor primarum Sedium nempe Patriarchæ Romæ, Alexandriæ, Ephesi & Antiochiæ. Confedit pariter cum illis Constantinus Imperator fidelis; cumque absolvissent, quæcumque pertinebant ad stabiliendam fidem Orthodoxam, Jejuniique & Paschatis disciplinam, dixit illis Imperator: Rogo vos ut Constantino-
polin, urbem Patriarchalem esse jubeatis, quia est regia civitas Imperatoris veri cœlestis. Illi mirantes ejus modestiam, id fecerunt: & Arium impium deposuerunt, & anathemati subjecerunt: cui sententiæ Imperator propria manu subscripsit, dicens Arium perdidisse illos quos sanguine suo Christus redemerat. Fugit autem Arius in Africam, nec requiem ullam consecutus est tempore Constantini Imperatoris & Alexandri Patriarchæ. Quam verò in multis peccet contra historiam, ea narratio satis quisque intelligit.

De templo
Alexandrino.

l. 1. p. 435.

Tillem. l. 6.

p. 216.

Aliam, ne quidquam omittatur quod apud Autores Orientales præcipuos legitur, referemus, sed longè infictiorem, quam refert Eutychius, & ex eo alii. Fuit, inquit, Alexandriæ templum magnum, quod exstruxit Cleopatra Regina, nomini Saturni dedicatum, in quo Idolum æreum magnum erat, Michael appellatum, cui Alexandriæ & Ægypti incolæ, die 12^o mensis Athyr qui est Tisrin posterior, festum magnum celebrabant, multas ei victimas immolantes. Cum vero Alexandriæ Patriarcha factus esset Alexander, ibique obtinuisset fides Christiana, voluit ille confringi Idolum & tolli sacrificia. Cumque obfisterent ipsi Alexandrini, ille astutiâ ipsos aggressus est. Idolum, inquit, istud nulli omnino rei utile est; quod si festum illud Michaeli Angelo celebraveritis,

lebraveritis, cique victimas istas constitueritis, ipse pro vobis apud Deum intercedet; majorisque vobis boni causâ, quàm Idolum istud futurus est. Annuentibus ergo illis ex Idolo confraçto, crucem fecit; templum verò, Michaelis Ecclesiam appellavit: estque illa Ecclesia quæ Cæsarea vocata est & igne periit, cum Occidentales Alexandriam ingressi eam vastaverunt: consecrataque sunt festum & sacrificia Michaeli Angelo. Unde & adhuc Coptis in Ægypto & Alexandria, eo die festum Michaeli Angelo celebrant, & victimas quàm plurimas cædunt. Hæc Eutyechius autorem neminem alicujus dignitatis secutus, qui tam absurda memoriæ prodiderit, sed obscuras fortassis traditiones, quarum originem investigare nullius ut satis quisque intelligit operæ pretii foret. Ab Eutychio eandem narrationem desumpsit Makrizius Muhamedanus, sed sive meliora exemplaria viderit, seu absurditatem intellexerit, Idolum quidem Saturno & ædem dedicata fuisse antiquitûs scribit, sed quod Michaelis nomen habuerit, non commemorat, nempe quia fieri vix ac ne vix quidem potest, ut ita Eutyechius scripserit. Quid enim Michaeli cum Saturno, cujus etiam cultus Ægyptiis non proprius, sed à Græcis acceptus? At Michaelis & Angelorum cultus in Ecclesia antiquissimus, multaque in Ægypto Ecclesiæ sub eorum invocatione consecratæ reperiuntur. Illam verò quod Eutyechius scribit incendio periisse, cum Occidentales Alexandriam occupaverunt, explicat Makrizius, dum Occidentales illi quales fuerint designat: nempe non Græci aut Latini à quibus aliquando Alexandria capta est, sed Arabes Africani quos *Mogrebitas* vulgò vocant, unde Hispani in vulgari sua lingua *Almoravides* fecerunt. Illorum autem à quibus Alexandria capta, Ægyptusque sublata Abbassidarum dominatione, in potestatem redacta est, princeps fuit Muazus caput familiæ Fatimidarum, quæ regnavit ab an. Hegiræ 358. J. C. 968. ad an. 567. J. C. 1171. quo Nassereddin Yuceph Salaheddin, Latinis Scriptoribus Saladinus vulgò dictus, rerum in Ægypto solus potitus est. Alexandrum verò virum sanctissimum instituisse, ut sacrificia cruenta & quæ superstitionis nefariæ quam Constantinus Edictis sustulerat, contra Christianorum mores & instituta celebrarentur, nemo, opinor, existimabit. Eandem porro historiam refert Elmacinus, ex Menbigi seu Hierapolitano Chronographo anonymo.

¶ Eo tempore inventam esse Crucem Jesu Christi Salvatoris ab Helena jidem Autores referunt, eodem ferme modo ac apud Græc.

Inventio
Crucis.

cos Latinosque legitur, imò & apud Muhamedanum Makrizium. Hujus inventionis Historiæ complures extant in Codd. Ms. omnes multis fabulis contaminatæ. Festum apud omnes Ecclesias Orientales celebratur.

Atque hæc sunt quæ de Alexandri Patriarchæ Historia colligere potuimus; quem anno 326. J. C. diem suum obiisse existimavit Baronius. Cum viginti tribus annis Alexandrinam Ecclesiam gubernasset, mortuum esse plerique Catalogi Chronographorum Græcorum statuunt, quos sequuntur Orientales, nempe Eutychius, Elmacinus: Severus sexdecim tantum, sed contra aliorum fidem, annos numerat: Autor Chronici Orientalis, laudatus hoc loco ab Elmacino, ordinatum eum fuisse dicit anno Constantini 1^o, qui si incidat in an. 306. evertitur calculus illorum Autorum, atque annos tantum viginti & aliquot menses Pontificatus reperientur: at eundem calculum sequuntur Autores illi, quandoquidem 19^o Constantini anno habitam scribunt Nicenam primam Synodum Oecumenicam, quæ, ut apud omnes in confesso est, convenit an. J. C. 325^o. Cum verò apud omnes Historicos alicujus autoritatis constet eodem anno quo incepta est, finem habuisse; & ex Athanasio certum sit paucis mensibus superstitem fuisse Alexandrum, duo sequi necesse est: nempe ut secundum probatiorem Chronologiam obierit Alexander an. J. C. 326. vel si quod soli Orientales illique nullius autoritatis, post aliquot sæcula temerè & absque veterum consensu scripserunt, sederunt Nicanæ Patres per solidum triennium; numerus annorum viginti trium integer constabit, quibus Pontificatum Alexandri definiunt. Nullum omnino præsidium ex Tabula quæ extat apud Abulbircat ad annorum supputationem rectè constituendam haberi potest: nam manifestè corrupti numeri sunt, quod eò facilius fuit, quòd illi non vocibus integris, sed notis tantum seu sifis descripti sunt. Petri martyrium assignant anno Martyrum 19^o, qui incipiendo ab anno 1^o Diocletiani, ut Coptizæ volunt, incidit in eundem ejus Imperatoris annum 19^{um}, quo passum esse Petrum docet Eusebius. Eidem anno Achillæ mortem alligant, quem tantum mensibus sex sedisse scribunt: & eodem Alexandrum ordinatum. Annus Martyrum 19^{us}, est Alexandri 614^{us}, aut 615^{us}, quia initium anni Ægyptiaci seu 1^{us} Toth incipit à Septembri, nempe numerando secundum Abulfaragii testimonium superius relatum, 1^{um} annum Martyrum à 595^o Alexandri. At illius Ætæ an. 614^{us} responderet annis. J. C. 303^o & 304^o: addantur anni

22. cum novem mensibus, aut diebus 308. juxta Chronicon, fiet annus J. C. 326^{us}, in quem incidisse ex Athanasio mortem Alexandri probatur: atque ita Elmacino, Makrizio, Benelrahebo & aliis cum Chronologia conveniet. Verum Autor Tabulæ quæ est in opere Abulbircat, cum ejus ordinationem constituat anno 19^o, Martyrum mortem anno ejusdem Æræ 60^o, annos Pontificatus numerat quadraginta & menses novem: atque si calculus ille verus esset, mortuus esset Alexander circa an. Alexandri 656^{um}, J. C. 344^{um}, aut sequentis, nempe annis viginti aut circiter post Concilium Nicænum, quod absurdissimum est, & cum Athanasii certissima narratione pugnat. Hæc verò quæ alioquin silentio potius quàm observatione digna forent, ob eam præcipuè causam adjecimus, ne sint, ut facile fieri solet, qui Codices ejusmodi raritate potius quàm merito suo æstimantes, historiam novis commentationibus perturbatum eant, nec apud Orientales quærendas arbitrentur dotes illas diligentia, & φιλαλθείας, sine quibus nulla est omnino laus Historici, quam tamen illi planè negligunt.

Mortuus est Alexander 23^a mensis Farmuthi, quæ respondet 18^a diei Aprilis, quo die ejus memoria colitur in Coptico Calendario: at 26^a Februarii in Romano aliisque Martyrologiis.

Citantur à Jacobitis Heortastica ejus, seu Paschales Epistolæ, & quartæ fragmentum refert inter alia veterum testimonia Autor *Unionis pretiosæ*, qui est Tractatus apologeticus Jacobiticæ doctrinæ, ut etiam Autor similis & fusioris operis quod *Fides Patrum* inscribitur: extant illi in Bibliotheca Seguieriana. In isto citatur Oratio ejus de Paschate.

ATHANASIUS APOSTOLICUS PATR. XX.

ATHANASIUS
PATR. XX.

SI quis fuit inter Alexandrinos Patriarchas, doctrinâ, sanctitate, Serenæ gestarum gloriâ, longaque pro fidei veritate certaminum adversus Hæreticos susceptorum serie commendatus, is certè Athanasius fuit, vir summo ingenio, pari facundia, in quem tot dotes divina providentia contulerat, ut ab Apostolorum temporibus majorem Ecclesia non habuerit, unde non immeritò Apostolicus ab Orientalibus appellatus est. Cum tamen tanta scripserit & gesserit longo Episcopatus laboribus plenissimi decursu, vix ullus est de quo pauciora legantur in Historicis Orientalibus. Causa, quantum conjectari possumus, ea est, quòd cum omnis rerum anti-

De Athanasio pauca sciunt Orientales.

quarum notitia, Ecclesiasticarum præsertim, literis Græcis consignata foret, atque à Dioscoro usque ad Muhamedanorum tempora, Episcopi ejus sectatores, quorum historiam repræsentamus, urbe caruerint, & in Sahid seu Thebaide ad sanctum Macarium lauerint, ubi nullus aut exiguus erat linguæ Græcæ usus, eo intervallo codices antiqui quos habere potuerant, perierint: si qui evaserant, qui eos intelligerent aut interpretari possent, pauci admodum reperirentur; atque ira omnium Actorum quæ ad Athanasii Pontificatum spectabant memoria paulatim interierit. Quamvis enim habeant Copticæ diversorum ejus Operum Arabicas interpretationes, & ea integra fortassis olim habuisse existimandi sunt, jam ramen sæcula complura effluxerunt, ex quo nonnisi particulas illorum conservant, easque non integras, sed excerpta potius, & ut Græci vocant *ἀναθλιγμένα* seu florilegia eo consilio facta, ut adversus Melchitas, seu Orthodoxos, in controversia circa Incarnationis mysterium illis ad manum esse possent, quia ex usu erant. Quæ adversus Arianos eximia opera scripserat, cum illorum hæreticorum nullus superesset, prorsus neglexerunt. Ea verò quæ turbulentissimorum temporum sub Imperatoribus Arianis historiam spectabant, cum non plenè à Græcis tractata, literis quoque Latinis elucidari necesse foret, Orientales in summa illarum ignorantia huc usque manserunt. Ea igitur quæ Orientales de eo habent, pauca in verba contrahentes, cum aliunde hæc Historia notissima sit, in medium proferemus.

Fabulosa de
pueritia ejus
narratio.

De ejus nativitate & infantia hallucinatus est Severus, & cum secutus Elnacinus, qui Athanasium ex parentibus idololatriæ natum fuisse scribit. Mater, inquit, ejus erat primariæ apud Alexandrinis nobilitatis, sed Idolorum cultui addicta, quæ eum patre orbatum in prima pueritia oprime educaverat. Cum ad justam ætatem pervenisset, volebat illa ut filius uxorem duceret, quod ille constantissimè recusabat. Itaque ut eum faciliùs à sententia dimoveret, pudicitiam ejus labefactare aggressa est: immisit in filii cubiculum meretrices speciosæ & unguentatæ, quæ dormientem ad stuprum pellicerent, quas ille, Deo ipsum ad res maximas destinante, verberatas eiecit. Mater infelix cum eo modo nihil profecisset, magicis artibus eum aggressa, Magum ex eorum numero qui Sabæorum religionem profitebantur, accersivit; & cum filio ad convivium adhibuit. Is cum Athanasium intuitus esset, mulieri in hunc modum locutus est: *Ne, inquit, frustra labo-*

PATRIARCHARUM ALEXANDRINORUM. 85

ATHANASIUS
PAUL. XX.

res, neque enim filium tuum superare poteris, quippe jam Galileus factus est, & in eorum religionem transiit, futurumque est ut vir maximus evadat. Quinam, inquit mulier, Galilaei isti sunt? Homines, inquit, Ecclesiae sodalicii, qui templa destruxerunt & idola everterunt. His auditis illa apud se judicans, si ulterius Athanasio molesta esse pergeret, illum ab ea discessurum, eo secum adsumto Alexandrum adiit, cui totam historiam narravit, simulque cum eo baptisata est. Eâ paulò post mortuâ, Athanasius apud Alexandrum mansit, qui cum filii loco habens, instituit in omni doctrinarum genere. Tunc coepit sacrarum Scripturarum lectioni diligenter incumbere, & Evangelia memoriter didicit. Tandem cum ætatem legitimam attingisset, Diaconus ordinatus est ab Alexandro, qui eum quoque Scribam seu Syncellum & Secretarium suum constituit; factusque est tantquam interpretas Alexandri, quândocumque verba facere vellet. Eo loco observandus est locus in versione Eurychii, qui ab Interprete non satis explicatus est: ubi eadem verba ita vertit, qui scriptor fuit: quæ de Athanasio dicta non alium sensum lectoribus offerre possunt, nisi quòd multa scripserit, quasi hæc ad doctrinæ, famæque quam scribendo Athanasius consecutus est laudem pertineant, cum nihil magis alienum sit ab Autoris mente. Scribam sive Secretarium apud Patriarchas eum appellant Arabes, quem vulgo Græci Syncellum & Protosyncellum; nempe Diaconum aut Sacerdotem qui in Cella Patriarchali cum Patriarcha vivebat, eratque illi ab Actis & Epistolis: qui sensus ex multis hujus historiæ locis manifestus est. In ea porro quam suprà retulimus Severi narratione, quam in pauciora verba Elmacinus contraxit, multa peccata sunt. Neque enim Athanasium parentibus gentilibus natum credi potest, cum nullus Autor fide dignus id tradiderit; neque id Athanasio objectum ab Arianis aliquando fuisse legatur.

Eurych. c. 2.
p. 415

Vit. Athan.
Tillam.

Ruffinus retulit Alexandrum eo die quo Petri Martyris anniversaria commemoratio celebraretur, dum invitatos ad convivium Sacerdotes & alios Ecclesiasticos expectaret, vidisse eminus in litore maris pueros ludentes, inter quos Episcopum Athanasium ageret; ad quem ab aliis qui Diaconorum personam agebant ducti alii tanquam Catechumeni, ab eo baptisati sunt, quem baptisatum esse voluit Alexander: pueros verò, & præcipuè Athanasium, Ecclesiae commendatos, summâ curâ institui præcepit.

De Baptismo puerorum per Athanasium.

Socrat. l. 2.
c. 15. Sozom.
l. 2. c. 17.

Ruffinum exscribere Socrates, Sozomenus, & quidam alii, quorum tamen autoritas non tanti visa est viris nostra ætate doctissimis, ut historiæ illi fidem adhibendam existimarent. Impugnant & suspectissimam habent Autores vitæ S. Athanasii, Tillemontius & alii: propugnavit dudum Papebrochius, & nuper eam iterum vindicavit Bollandiani laboris continuator: cui Dissertationem opposuit D. Bernardus de Montefalconis à Congregat. S. Mauri vir doctissimus. Sufficit nobis annotasse ignotam esse Severo & aliis melioris notæ Autoribus Arabicis hanc historiam. Neque quod sciamus occurrit hujus rarissimi exempli memoria in Canonum Collectoribus, vel Canonicis responsis, etsi non minimæ autoritatis sit, ad difficillimas de Baptismo quæstiones explicandas.

Eum ab Alexandro tanquam alterum Samuelem ad sanctæ Ecclesiæ ministeria optimè educatum omnes consentiunt: cumque Nicænum Concilium convenisset Athanasius cum Episcopo suo Nicæam profectus, jam pro fide decertare adversus hæreticos coepit. Verum graviter quoque hallucinatus est Severus, dum contra suas ipsius rationes, Alexandri vitam ita producit, ut Constantino magno superstitem fuisse dicat, dum ita scribit: *Cum verò mortuus esset Constantinus Imperator fidelis in senectute bona, successit illi Constantius ejus filius, qui in Orthodoxa fide non perseveravit, timore & vitioso hominum pudore victus. Eam occasionem nactus Arius Imperatorem adiit, ejusque gratiam sibi concilians, cor ejus corrupit, eumque ad sententiam suam inclinavit, adeoque prævaluit fraus Arii, ut Alexandrum Imperator Constantinopolin accerferet. Nesciebat quanta esset Alexandri dignitas, & quam ob causam Arium anathemati subjecisset, atque Ecclesiæ pepulisset. Erat Alexander annis & senio debilis, sensibus tamen integris. Athanasius ejus scriba & interpres, ejus nomine loquebatur per virtutem Spiritus sancti, quia fidei Orthodoxæ summam scientiam habebat. Consedit Alexander coram Imperatore, præsentè Ario, qui multa secundum opinionem suam futiliter & impudenter locutus est. Athanasius contra eum disputavit, resellens oratione sua quæcumque ab illo dicta fuerant. Unde turbatus est Arius, solutusque confessus: & mox, inquit, alius nobis confessus dabitur. Cum verò intelligeret Arius vires se adversus Athanasium habere nullas, datâ pecuniâ illis qui januæ regie præpositi erant, pepigit cum eis, ut in proxima Collatione excluderent Athanasium. Postridie Imperator cum eos adesse*

Error Severi
de Alexandro
dum post Con-
cilium Nicæ-
num supersti-
te.

jussisset, intrassetque Alexander, janitores Athanasium ingredi non passi sunt. Imperatore confidente, & presente Alexandro, cepit Arius multis sermonibus de fide disputare. Alexander ad dextram & sinistram oculos convertens, nec videns Athanasium secretarium suum, obtinuit. Tum Imperator: Cur, inquit, non loqueris? Respondit Alexander: Quomodo loquerer absque lingua? Intellexit Imperator designari ab eo Athanasium, quem statim introduci jussit. Illum ut vidit Arius, protinus egressus, in loco consistere ausus non est. Tunc Alexander Imperatori dixit: Scias velim, ô Princeps, Arii istius depositionem factam fuisse in Concilio: neque ego illum solus deposui, sed parens tuus pia memoria Imperator, & omnes qui Concilio intervenerunt, deposuerunt eum. Ipse etiam Imperator sententiae anathematis adversus Arium pronuntiatae, sua manu subscripsit: cumque oculis observaveris scripturam patris tui, statim ejus manum agnosces. Haec autem paucis verbis mea est sententia. An eum quem deposuit Constantinus Imperator & totum Concilium, ego absolvam? Hoc si fecero, schisma inducam: nam pater tuus verè contra eum sententiae anathematis prolatae, & ejus depositioni subscripsit in Nicæno Concilio. Haec cum audisset Imperator, simulque fratrem metuens, noluit irritum facere mandatum patris sui Imperatoris. Hujus enim rei gratiâ frater ejus legationem ad eum miserat, quò eum à tali sententia dimoveret. Itaque Alexandrum dimissum ad sedem suam redire permisit: mansitque Arius depositus & anathemati subiectus, quamvis antea existimasset se autoritate Principis, & pecuniarum inter ejus domesticos largitione superiorem futurum. Mortuus est deinde Alexander, & quietem accepit cum patribus suis, postquam sacerdotibus & plebi moriens praecepisset, ut Athanasium in Sede Patriarchali, se defuncto, collocarent: magnâ omnium letitiâ ob propensam erga eum voluntatem. Huc usque Severus, in cujus narratione nihil occurrit omnino quod eum certa rerum gestarum serie conciliari queat, præterquam quòd educatum constat Athanasium in Ecclesiae ministerio, ordinatum eum esse Diaconum ab Alexandro, quem ad Nicænum Concilium secutus est tanquam secretarius & interpret: & à quo sexto circiter mense postquam Alexandriam reversi sunt, successor designatus est.

27. Berit Severus. Postquam verò Athanasius sedit in Throno Apostolico, ejecit sequaces Arii ab Ecclesia, productaque ana-

Narrationis
Severi conti-
nuatio.

thematis sententiâ , quam Constantinus Imperator , & qui sancto Concilio interfuerant , subscriptionibus suis firmaverant , legic eam in Ecclesia coram frequente populo. Hæc Arius cùm audi-
visset , valdè iratus , & furore incensus , venit ad Imperatorem &
dixit ei : Si Alexander Patriarcha Constantinopolitanus me susce-
perit jussu tuo , causam obtinui. Accersito ad se , Imperator dixit :
Iste Alexandrinus Patriarcha recusavit Arium suscipere , & man-
data mea insuper habuit. Scis autem quòd te constituerimus Pa-
triarcham , & in Sede Constantinopolitana collocaverimus : oportet igitur te nobis non contradicere alterius exemplo , vir enim
mitis es , atque adeò ut Arium tecum assumes , eumque suscipias
rogamus. Tum Patriarcha dixit ei , quod Ecclesia Arium non
susceperet : sed neque oportere quenuquam suscipi , nisi qui
eamdem cum Ecclesia fidem profiteretur ; istum verò qui Trinitatem creatam esse constituat , jure merito ab Ecclesia rejectum.
Non ita est , inquit , Imperator , sed Trinitatem constituitur. Tum Pa-
triarcha : Det , ait , mihi professionem fidei suæ , manu propria
subsignatam , ut qualis illa sit , certò sciam. Vocari jussit Arium
Imperator , & hoc divinitus fiebat ; ille autem professionem fidei
manus suæ subscriptione firmavit , licet animo contraria sentiens.
Mox Patriarcha petiit ut juraret nullum sibi in animo dubium
circa fidem superesse , quod Arius juravit. Tum Imperator ad
Patriarcham : Quid superesse tibi suspicionis adversus illum po-
test ? Respondit ille : nempe quod Pater Alexander Patriarcha
Alexandrinus , renovavit Alexandriæ sententiam anathematis
adversus Arium , firmatam subscriptionibus patris tui piæ me-
moræ Constantini Imperatoris , & Concilii Nicæni quam pu-
blicè iterum legi jussit , Ariique sectatores ab Ecclesia ejecit.
Quòd si mali nihil acciderit Ario isti ab hac die , usque ad proxi-
mam Dominicam , ego illum suscipiam , & ad communionem
cum Sacerdotibus admittam. Exivit Arius expectans diem Do-
minicam ; quæ cùm advenisset , ingressus est in Ecclesiam indutus
veste splendida , unguentis delibutus , seditque in Sacerdotum
Ordine. Patriarcha & qui ei consentiebant , perseveraverant je-
junantes & orantes coram Christo Domino , precantes simul ut
non imputaretur illis peccatum Arii , quia Imperator juraverat ,
quòd si Dominicâ ante horam octavam Arius susceptus non fuisset ,
Ecclesia magnam pecuniæ summam multæ nomine pendere
cogeretur. Cùm igitur convenissent Ecclesiastici & Sæculares

eo die in Ecclesiam, Patriarcha valdè moestus Liturgiam inchoavit. Jam Lector coeperat legere, cum Ario intestina commota sunt, adeò ut foras in angulum ad alvum exonerandam secesserit; atque ibi viscera omnia sua eiecit. Cùm igitur ille ex conspectu se subtraxisset, quæsierunt eum nec invenerunt: tandemque postquam diligenter quævisissent, repperunt eum sedentem, frigidum, artubus solutis, ventre projecto, siccum, & omnia intestina ejus egesta coram eo. Significaverunt hæc statim Patriarchæ, qui stupens & silens gratias egit Domino Jesu Christo, quòd Arium judicasset, subitoque exitio perdidisset, propter perjurium ejus fidemque perversam. Imperatori quoque & universæ multitudini apparuit veritas eorum quæ Petrus Martyr Patriarcha Alexandrinus prædixerat. Itaque Alexander Constantinopolitanus Patriarcha, Liturgiam eo die absolvit, cum lætitia, hymnis & laudibus; misitque ad Athanasium Patriarcham Alexandrinum, qui hæc omnia suo nomine nuntiarent, in hæc verba: *Glorificamus Deum, tibi que, frater, notum facimus, Arium morte stupenda extinctum esse, heresin ejus excisam, & sectatores dispersos.* Imperatori hæc maximè displicuerunt propter Arianos amicos, Georgium, & illorum sequaces qui Alexandrinam Ecclesiam invaserant. Siquidem Georgio dedit Imperator, equites ex copiis suis quingentos, quos misit cum illo, ut cum Patriarcham Alexandria constituerent. Scripsit etiam literas ad omnes Provincias, doctrinam Arianam in illis publicans, nempe quòd Deus creatura esset. Eum tamen nullus suscepit in terra Ægypti: sed communionem accipiebant à Sacerdotibus quos Athanasius ordinaverat. Is porro Georgius dolo ingressus est in Ecclesiam Alexandria, aut, ut alii dicunt, introductus per milites qui cum illo venerant, à quibus occisi sunt ex Christiana plebe plurimi, qui cum Athanasio consensiebant, ita ut sanguis inundaret Ecclesiam, & ad genua pertingeret, vasa etiam sacra prædati sunt; & virginibus quæ erant in Ecclesia, vitium obtulerunt. Athanasius latebat interea; & diu Christiani in speluncis, desertis, & latibulis per universas usque ad Thebaidem Ægypti Provincias sacra Mysteria celebrabant. Ariani verò, favente Imperatore cui adhærebant, ubique primas obtinuerunt. Serapion tunc erat Episcopus Tmuceos. Is ad Athanasium & universum populum literas scripsit, monens ut ab Arianis caverent. Elapsis annis sex, Athanasius prodiens in publicum, adiit

Imperatorem, judicans se ab illo morti addicendum, atque adeo martyrii coronam percepturum. Iussit Imperator ut naviculæ imponeretur absque pane & aqua, nautis aut gubernatore; sed ipse solus in eam injiceretur, & in altum deduceretur: quod factum est. Fluctus verò, Deo custodiente illum & gubernante, deduxerunt eum, ita ut Alexandriam die tertio pervenerit. Clerus & plebs ad eum profecti, occurrerunt ipsi cum gaudio, & honorifice susceperunt usque dum in Ecclesiam ingressus est, ex qua Georgium ejecit, & eos qui perversam ejus fidem sequebantur. Eo die Athanasius festum Deo celebravit, omnisque populus per totam Ægyptum in summa lætitia fuit. Post annos septena venit in Ægyptum vir quidam Gregorius nomine, cum duobus militum millibus, qui Ecclesiam spoliavit, & Athanasium comprehendit, quem Imperator tradidit impio cuidam viro Idolorum cultori. Illum etiam occidere designaverat, ut & Liberium Romanum Patriarcham & Dionysium Antiochenum, qui Patres, & columnina erant Orthodoxæ fidei: sed illos Deus ex manibus ejus liberavit, incolumesque præstitit. Venit postea Athanasius cum Liberio Romam, atque apud eum mansit, donec mortuus est Constantius; & successit illi filius ejus Constans. Is Orthodoxus cum esset, statim atque Imperium obtinuit, jussit ut Athanasius sedi suæ restitueretur.

Cyrillus
Hierosoly-
mitanus.

Euty. h. l. 1.
p. 475.

Erat eo tempore Hierosolymorum Patriarcha Cyrillus, per quem miracula magna edita sunt. Inter alia apparuit columna ignea super sepulcrum Christi Domini Salvatoris nostri, quam Ethnicis omnes, & quicumque tunc in urbe aut vicinis locis erant, observaverunt; duravitque ab horâ tertiâ usque ad noonam. Euty chius crucem lucidam, non columnam visam esse commemorat, & ita Elmacinus. Porro ad eam videndam ingens undique concursus hominum fiebat. Scripsitque Cyrillus ad Constantinum Imperatorem literas, quibus de hoc miraculo significabat.

Constans Imperator Athanasium diligebat, qui postea quàm Sedi suæ restitutus est, viginti quinque annos in pace & tranquillitate vixit, cum antea annos duos & viginti, ex quo eam obtinuerat, in exilio, certaminibus & persecutionibus transegisset. Mortuo Constante, Imperium ejus loco adeptus est Julianus Apostata, Ethnicæ religioni & Idolorum cultui addictus, qui Constantini Magni erat ex sorore nepos. Is Julianus statim Gentilium

PATRIARCHARUM ALEXANDRINORUM. 91

ATHANASIUS
Parr. XX.

templa aperiri iussit, Antiochiæque sedem fixit; neque enim dignus erat, qui domum Magni Constantini habitaret. Venit aliquando in templum Idolorum, & acceptum gallum gallinaceum, tradidit sacrificulo; quem cum dæmoni obtulisset, Julianus cor victimæ accepit, & comedit.

Erat Juliano nepos ex sorore, Julianus quoque appellatus, impietate avunculo par. Is Sacerdotem Theodorum comprehendens occidit; quod cum fecisset, avunculo significavit: qui adversus eum magnopere indignatus, dixit: Noluisset te illum occidisse, si quidem Christiani gloriantur cum occiduntur, dicentes se fieri martyres. Verum ita apud me constitui, ut cum rediero ex Persica expeditione, accipiantur pro quocunque Christiano tres unciae Naxæ, volens scilicet infundi super eos, donec idola ejus adorassent, existimans eos Naxam ardentem sustinere non posse.

Erat tunc Ecclesia dives, quatuor columnis suffulta, nempe Athanasio Patriarcha, Antonio & Pacomio Monachis, & Basilio Episcopo Cæsareæ in Cappadocia. Is & Liberius Patriarcha Romanus, familiares fuerant Juliani Imperatoris, in eadem cum illo schola instituti. Cum audissent verò pravas opiniones quas proferebatur, assumtis Episcopis ad eum profecti sunt, qui contemptus aliquandiu vestitum eorum & barbam, dixit eis: Quid queritis? Querimus, inquiunt, Pastorem bonum qui nos pascat. Tum ille ad Basilium: Ubi, inquit, reliquisti Fabri filium, dum huc ad me venisti? Reliqui illum, inquit Basilius, occupatum in compingendo tibi feretro, ut te in illud collocaret. Ad quæ Imperator: Nisi amicus meus esses, superessetque in me voluntatis erga te propensio, caput tibi præscindi juberem. Ad hæc Basilius. An non, inquit, doctrinæ quondam amore flagrabas? Cur igitur sapientiam deseruisti? Legi, inquit, quæ ad eam pertinent, memoriæ commendavi, & abjeci. At, inquit Basilius, neque legendo eam didicisti, aut memoriæ mandasti; si enim eam cognovisses, & animo complexus fores, nunquam abjecisses. Imperator dixit: Oporteret ut vos detineri in vinculis jubeam, donec ab expeditione Persica rediero; & expectabitis quodcumque de vobis statutum erit. Tum Basilius: Si profectus fueris, & sospes redieris, Deus in me locutus non est. Postea Julianus dixit: Quid faciam adversus Galilæum illum mendacem, qui dixit, Destruam templum quod Judæi ædificaverunt? Ædificabo illud regiâ magnificentiâ; atque ita falsitatis convincetur apud om-

Narratio Se-
veri de Julia-
no Apollatâ.

Reliquiæ
Elisæi &
Joannis Ba-
ptistæ,

nes ejus vaticinium, quasi non ampliùs ædificandum foret. His ita constitutis, Basilium & duos alios qui cum eo venerant, in carcerem conjecit: & in Persidem profectus, transivit per Hierosolyma. Ibi vidit templum destructum, adeo ut vix parietinæ superessent, ex quo Vespasianus Imperator illud destruxerat, Judæosque inter-
necione deleverat, & in servitutem abduxerat. Julianus verò jussit, ut loco mundato novum ædificium instauraretur, & profectus est, relicto qui operi præfesset. Is coepit eodem in loco ædificium construere; nam vastitas templi talis erat, ut ne quidem relictus esset lapis super lapidem, ut in Evangelio dictum est. Nova igitur ex integro fabrica excitari coepit, cogitante Juliano templum Idolorum illic facere. Operarii toto die usque ad noctem opus moliebantur; cùmque recessissent, & postridie reverterentur, inveniebant omnia destructa, non humanis manibus: sed parietes integros everfos à fundamentis, & in terram dejectos. Perseveraverunt tamen in opere per menses integros duos, neque quidquam perficere potuerunt. Dixerunt itaque ad illos Judæi: Ignem injicite sepulcris istis in quibus Christiani jacent, & solida erit ædificatio quam molimini. Ignem igitur injecerunt sepulcris, incipientes à duobus, in quibus erant corpora Elisæi Prophetæ, & Joannis Baptistæ: sed ignis nullo modo ea destruere potuit, unde majorem in modum stupefacti sunt, cùm diebus multis flamma ardens ea non attingeret. Fideles quidam interea Præfectum adcentes, oblatâ pecuniâ petierunt, & obtinuerunt, ut sibi liceret corpora duo è sepulcris transferre, quæ effossa miserunt ad Athanasium. Ille cùm ea suscepisset, non minore lætitia affectus est, quàm si sanctos viros viventes in conspectu habuisset. Accepta igitur corpora in quodam loco deposuit, donec Ecclesiæ illis ædificandæ copiam nancisceretur. Quodam die cùm Athanasius domi sederet, adessentque fideles multi ad audiendum sermonem ejus, in quo vita erat animarum illorum, levatis oculis vidit colles duos è regione loci in quo erat, dixitque: Tempus jam opportunum reperi, quo super illos colles ædificem Ecclesiam Joanni Baptistæ & Elisæo Prophetæ. Theophilus ejus scriba, sedebat ad mensam prope illum cum aliis fidelibus multis, & hæc verba cùm audisset, servavit apud se. Interea Julianum Imperatorem Apostatam, cùm in Persas profectus esset, tradidit Deus in hostium suorum manus, sanctorum causâ, quos ante profectiorem in vincula conjecerat, multa illis comminatus.

Mortis ejus talis ratio fuit. Nocte vidit quosdam milites defuper ex aere in se irruentes, quorum unus lanceâ percussit eum in capite, eamque adegit usque ad ventrem ejus. Intellexit illum aliquem esse ex Martyribus, implevitque manum suam sanguine, quem sursum jaciens, *Accipe*, inquit, *hoc Jesu, locum enim integrum capisti*. Has blasphemias cum effudisset, corruit mortuus, atque ita liberavit Deus populum suum, Romanique ad proprias sedes reversi sunt. Triduo autem ante mortem Juliani, Basilii cum esset in carcere, evigilans à somno dixit duobus qui secum erant: Vidi hac nocte sanctum Martyrem Mercurium intrantem in Ecclesiam suam, ibique accepit hastam suam, & dixit: *Certè, non patiar impium hunc blasphemare adversus Deum meum*. Hæc cum dixisset, evanuit, nec ampliùs eum vidi. Uterque eandem sibi visionem per somnum oblatam esse testatus est. Miserunt igitur ad Ecclesiam S. Mercurii, qui inspicerent an ibi esset ejus lancea: quæ inventa cum non esset, certam inter se habuerunt somnii significationem. Elapso triduo, literæ & nuntii de morte Juliani Antiochiam pervenerunt. Huc usque Severus, qui mox Jovianum electum ab exercitu, Juliani loco, à pietate commendat: quem etiam ad Athanasium literas dedisse laudibus plenas, quæ in Ægyptiacis Ecclesiis publicè lectæ sunt, ad confirmandos consolandosque fideles.

In illa porro narratione, quæ neque rerum gestarum, neque temporum rationi consentanea est, recensenda, & emendanda, non esset, opinor, operæ pretium, cum aliunde Athanasii historia notissima sit; in illis verò capitibus quæ ejus cum Arianis pro fide certamina complectuntur, talis sit Orientalium Autorum ignorantia, ut ne prima quidem earum rerum indicia noverint. Plura, sed non multò meliora leguntur apud Eutychium, ut disputatio Athanasii cum Eunomio qui ibi ex vitio codicis *Eumenius* appellatur, nimium frequenti errore circa propria nomina quem Interpres tollere sane debuisset, cum magnæ inde tenebræ lectoribus incommodent. Omnia ferme ex eo transulit Elmacinus.

Idem Eutychius ad ea tempora, finem scilicet Constantini, refert quòd ut Judæos agnosci facile foret, jussit carnes suillas circa Ecclesias proponi, adeo ut qui eas gustare detrectasset, tanquam Judæus occideretur; quæ ab eodem sumit quoque Elmacinus, nullo fulta veterum testimonio.

Eutych. l. 2.
p. 457. & 469.

De suilla
Judæis pro-
posita.

De Juliano eadem ferme apud alios reperias, nisi quod Eutychius & Elmacinus ea quæ de Basilio Cæsariensi ab eo in carcerem coniecto, & inter utrumque sermonibus habet Severus, non referunt, quæ sane cum iudicio ab illis rejecta sunt. Etsi verò uterque scribat, ut etiam Abulfaragius, opinionem quorundam esse, quod ab equite quodam Persa sagittâ transfixus fuerit, communis tamen Orientalium omnium traditio est eadem illam divinitus accidisse, per D. Mercurium, etsi rem aliter narrant, nempe imaginem ejus quam ante oculos Basilius habebat ex oculis sublatam, mox restitutam suo loco, ita tamen ut cuspis hastæ cruenta appareret. Ita fermè legitur apud Joannem Damascenum: & cum inter Martyres celeberrimum in Oriente sit Mercurii nomen, historiæque illius multæ extant, nulla est quæ hoc miraculum non referat: imò extant responsoria quædam, & preces Ecclesiasticæ aliæ, quæ illius memoriam contineant.

Damasc. de
Imag. Nov.
Ed. G. l. p. 327.

In Athanasii quoque vita referre solent Inventionem Crucis Christi ab Helena factam, de qua omnes Autores Christiani cujuscunque sectæ, imò Makrizius & alii Muhamedani. Eam pariter historiam fusiùs prosecuti sunt Ebnassalus in Opere suo Theologico, Maris Salomonis filius in Historia Nestorianorum: & Amrou Mathæi filius ex eadem secta, præter alios complures tractatus anonymos.

Ebnass. G. 47.

Cum verò tam in præcedentibus quàm in hujus Patriarchæ historia, Eutychius, & qui cum ubique sequitur Elmacinus, omnes fermè Epochas, & Canones suos Chronologicos accommodent ad annos Regum Persarum Chosroidarum, nullam illorum mentionem faciendam existimavimus, multis de causis. Prima quidem & certissima nobis visa est, ea quæ ex ipsius Persicæ Chronologiæ obscuritate & confusione ducitur, quam si Persas celebriores sequimur Leb-Tarich, Mogemal Tôarich, Tarich Kozida, Emir-Condum, Cond-Emirum, & Tôüarich El Agem, præter multos alios, vix cum calculis Eutychii conciliare possumus. Neque enim certam ullam habent Epocham Orientales, quam cum illa successione conjungant. Nam Elmacinus & quidam alii qui per annos ab orbe condito numerant, Græcos quosdam obscuriores nec accuratos Chronographos secuti, omnia turbant, & fere ubique errorum gravissimorum rei deprehenduntur. Annos Seleucidarum Mesopotamæni Syri, &

alii prope omnes usurpant, sed raro ante Muhamedana tempora. Muhamedani vix illâ Epochâ utuntur, nisi ubi disputant de Muhamedis sui nativitate. Æram Martyrum quæ 284. annis Christiana recentior est, soli Ægyptiî usurpant, & qui illos per omnia sequuntur Æthiopes. Aliæ omnes singulares insigniorum urbium, quæ in Chronologiis Græcis occurrunt, Cyclique & Periodi quibus certa annorum ratio colligitur, Arabibus, Persis, Syrisque ignorantur: neque enim ad hæc studia nisi serò & post Almamonem Califam scientiarum apud eos fautorem eximium adjecerunt animum. Imò si accuratius rem definire volumus, serius omnino adhuc, nec nisi sub Melik-Schah Seljukidarum Sultanorum tertio, Tabularum Chronologicarum, diligens descriptio facta est. Sed quod satis mirum est, præter Epocham Hegiræ Muhamedanis propriam, non aliam ad Canones suos conficiendos adhibuerunt, quam Isdigerdeam sive Persicam, Alexandri sive Seleucidarum, Cataiorum præterea, satis apud nos inutilem, nec magni quantum apparet apud alios quam Astronomos usus, & quæ ad Sinicam historiam cum Tabulis quæ ex Sina ante annos aliquot in Europam delatæ sunt comparatæ, possunt illorum historia lucem aliquam afferre, etiam prodesse nonnihil in Ginghiscanidarum Tartarorum rebus explicandis. Verùm neque Christianam Epocham à Christo nato vel passo: neque Diocletianæam, neque eam quæ dicitur ab orbe condito, aut Periodum quæ Julianæ respondeat ullam habent. Annos verò reducere ad Cyclos illos Cataiorum sive Sinarum, ut difficile admodum foret, cum præter Ulug-Begum vix ullus Autor idoneus de illis scripserit, ita planè inutile futurum esset in comparandis annis Regum Persarum qui Isdegerdem ultimum præcesserunt, cum annis Romanorum Imperatorum, sicut Eurychius & Elniacinus fecerunt. Neque enim Epocham communem ad quam Persicorum Regum anni accommodari possunt, habent Persæ aut Arabes Historici. Quod verò ad illos Reges spectat, quandoquidem nulla fermè inter eorum res & Ægyptiacas communio est, dicimus in Historia Catholicorum Bagdadensium, qui sub eorum potestate vixerunt.

Athanasii mortem anno J. C. 372. assignat Baronius, quem omnes fermè sequuntur: & sanè cum constet ex omnibus Autoribus fediisse eum annis 46. Sedem verò Alexandrinam obtinuisse altero post Concilium Nicænum anno, cum sex tantum

Athanasii
mors.

circiter mensibus Alexander supervixerit, ab anno 326^o usque ad 372^{um} hic numerus annorum intercipitur. Itaque error est in Canone Chronologico apud Abulbircat, qui ejus obitum assignat anno Martyrum seu Diocletiani 106^o: qui quidem error immensis est. Nam ab anno 284^o qui primus illius Imperatoris fuit, à quo ducitur Epochà illa usque ad J. C. 372^{um}, numerantur tantum anni 88. neque sanior est alterius Canonis Chronologici calculus quema edidit Kircherus, qui contra Cyrilli, Ruffini, Socratis, omnium ferme Autorum testimonia, quadraginta duos tantum annos Pontificatus, Athanasio tribuit, & ejus successoris initia quadriennio anteverit, cum eum anno 368. primum sedisse scribit. Sed consentiunt Autores omnes de quadraginta sex annis qui numerantur ex quo ille ordinatus fuit, usque ad ejus mortem, numero illo comprehensis annis pluribus, quibus ter exulare coactus est, ob Arianorum persecutionem. Ita Eutychius, Chronicon, Elmacinus, Makrizius: Severus annos quadraginta septem numerat, obiisseque ait 7^a mensis Pachonis, qui responderet 12. mensis Maii: Festum agitur 2^o ejusdem à Latinis & Græcis die ordinationis ejus, ut existimat Baronius. In Chronologico Canone Abulbircat, ejus obitus assignatur 20^o mensis Mechir, qui incidit in 14^{um} Februarii; qui dies etiam alius ab eo est, quo Græci alteram Athanasii commemorationem faciunt.

*Not. ad Mart.
1^{re} R.*

*Scripta
Athanasii.*

De scriptis Athanasii indiligenter omnino Orientales loquuntur. Multas dicunt eum Orationes scripsisse, Epistolasque Paschales seu Heortasticas, quadraginta septem: qui numerus à Severo conservatus, responderet annis quibus sedem obtinuit; nempe ut 47^o anno Episcopatus labente obierit. Item de Cruce, de Christo Domino, multa quoque alia quæ ad fidei defensionem spectabant: Epistolam ad Virgines, Vitam S. Antonii Eremitæ, & plura alia. Sanè non pauca Athanasii scripta contra Arianos olim in Syriacam linguam esse conversa, deinde in Arabicam, probant multa & satis proluxa testimonia, quæ ex illis referunt Theologi ferme omnes, atque inter eos præcipue Autor anonymus, sed antiquus Expositionis fidei secundum Jacobitas qui extat in Bibliotheca Regia, ut alii in Seguieriana: Isahia filius Zaraa in Opere Theologico ad ejusdem fidei defensionem. Iahia filius Adæi, Ebnassalus, Abulbircat, Dionysius Barsalibi, omnes tandem qui vel Theologicos Tractatus, vel Commentarios in scripturam ediderunt. Extant pariter in diversis Codicibus

Homilia;

Homiliæ ejus variæ, sed ut plurimum ex illarum genere, quæ non genuinis ejus operibus accensentur. Imò quod sæpe monendum est, ne temeraria quorundam Arabissantium *ὁμηολογία* fraudi sit, vix quidquam illius integrum apud eos extat, quod nativum & legitimum haberi possit. Quæ ergo in Theologorum quos indicavimus, & aliorum scriptis occurrunt ex Athanasio desumpta, non tam ex integris ejus operibus in Arabica interpretatione lectis expressa esse censenda sunt, quàm ex locis illis communibus controversiarum, quorum syntagmata habent plurima. Ea autem, quantum colligere possumus, Græcè primum facta sunt à Severianis, ut haberent unde adversus Catholicos & Nestorianos disputarent; dudum enim erat, cum nulli jam supererant Ariani illis in provinciis, qua ratione factum ut negligerentur aurea illa magni Ecclesiæ Doctoris scripta, quæ tandem in Imperiorum mutatione, quam Græcæ linguæ interitus secutus est, tum ob molem, tum ob sublimitatem, oblivioni tradita fuerunt, adeo ut nihil quidquam ex illis jam apud Syros & Arabes integrum supersit.

Habent Canones Athanasii nomine numero centum & septem, qui extant in amplissima Collectione Coptitarum Jacobitarum in antiquo Codice Bibliothecæ Seguerianæ: & in alio quem Wanflebuius dum in Ægypto esset describi curaverat, qui extat in Bibliotheca Oratoriana. Eos autem Canones Coptitis notissimos fuisse argumento est testimonium Ebnassali, Echmimensis, Abulbircat & aliorum qui eos in locos communes digesserunt, aut sicut is quem ultimo loco nominavimus, in compendium redegerunt. Extant quoque alia ex illis testimonia in variis Collectionibus, Quæstionibusque & Responsionibus. Non reperiuntur autem illi in Collectione Melchitarum, cujus habentur antiquissima exemplaria. Inde facilè conjectura duci potest, eam quæ Athanasii nomine extat apud Ægyptios Jacobitas, non tam acceptam esse ex Græcis Codicibus, quàm ex usu Ecclesiarum quotidiano in literas relatum, sumtis hinc atque inde Canonibus, datumque illi Collectioni titulum, quò major illi accederet auctoritas. Sunt porro inter illos multi qui ætati Athanasii convenire non possunt, & posterioris temporis disciplinam repræsentant: atque inde conjectura duci potest, Athanasio Canones illos adscribi, quòd Alexandrinæ Ecclesiæ mores & instituta spectarent.

Symbolum Athanasii habent Melchitæ seu Orthodoxi in libris

Symbolum
Athanasii.

Ecclesiasticis suis à Græcis acceptum, ut pleraque alia, & illud in quotidianis precibus dicere solent. At neque Jacobitæ, neque Nestoriani idem observant, aut in publicis privatisve eorum precibus locum habet, quod certum, nisi vehementer fallimur, argumentum est symboli illius originem non tam in Græca quàm in Latina Ecclesia repetendam: qua de re videnda sunt quæ à Viris doctissimis, Catholicis & Protestantibus scripta sunt. Occurrit quidem ejus editio Arabica in Codice Jacobitarum Ægyptiorum Seguieriano, notavitque librarius translatum esse ex Latino; atque ita sciri potest, symbolum illud quod quibusdam nonnulla continere videtur Monophysitarum doctrinæ consentanea, ipsis etsi probetur, non servari tamen apud eos ex antiqua traditione. Notatur autem verba illa de Spiritu sancto, *qui ex Patre Filioque procedit*, ita à Latinis pronuntiari, cum symbolum Constantinopolitanum ea non habeat.

Atque hæc fermè sunt quæ ex Autoribus Orientalibus ad Athanasii historiam colligi possunt, quæ etsi fabulis & *anecdotes* maximâ obscurantur, longè tamen meliora sunt, quàm quæ leguntur in Anonymis quibusdam Historiis, quarum minor adhuc quàm Severi autoritas esse debet. Is sanè variis locis agnoscit ignorare se multa quæ ad illam historiam tam vitæ quàm operum pertinerent. Refert in fine eam olim inter suos opinionem fuisse quæ ad sua usque tempora pervenerit, quod cum Athanasius persecutionis metu sæpe fugere cogeretur, Angelus Dei eum quò volebat deferret, sicut olim Habacuc Prophetam, qui Hierosolymis Babylonem delatus est.

Adjicit tandem fuisse Alexandriæ Idolum nomine *Rasail*: cum verò Athanasii jam ex febre decumbentis quies appropinquaret, dixisse illum: *Si invenio misericordiam apud Christum Dominum meum, procidam coram eo, neque faciem meam levabo donec claudantur fores templi Idolistris*. Testatos verò esse Sacerdotes Alexandrinos, quòd septem diebus elapsis ab ejus obitu, miserit Jovianus Imperator fidelis mandata secundum quæ templum illud occlusum est. At Jovianus diem suum obierat diu ante Athanasium, nempe anno J. C. 364. secundum Baronii calculos. Et Jovianum quamvis Christianum & à pietate commendatum, culpant tamen non pauci, quòd nullam adversus Paganorum superstitiones legem ediderit, sed Maximum aliosque Philosophos & Magos Juliano familiares nimium coluerit: adeoque laudatur

PATRIARCHARUM ALEXANDRINORUM. 99

à Themistio in Oratione Consulari, quòd liberum reliquerit, ut in sua religione quisque viveret. Unde nulla ipsius Constitutio adversùs Gentilium sacrificia, extat inter alias Imperatorias. Hæc ergo illius tempori aut moribus nequaquam conveniunt. Idolum porro illud quale fuerit, divinare non possumus, neque magni interest. Verùm hæc & alia quàm plurima, quæ de Idolis & superstitionibus Ethnicorum passim occurrunt apud Arabes, & temerè exscribi ab Arabibus tam Christianis quàm Muhamedanis solent, à Græculis accepta sunt, quorum Commentarios non satis intellexisse videntur interpretes. Nam idololatriæ detestatio, quæ inter Arabes fuit sane maxima, fecit ut ne Deorum quidem præcipuorum quos colebat Gentilitas nomina satis intelligerent, atque ita facile fuit ut portenta nominum quæ nusquam fuerunt excogitarent : ea autem Arabicis characteribus expressa magis adhuc absurda quædam pepererunt, quale illud Razail, Michail de quo in vita Alexandri, & multa alia.

ATHANASIOS
PATR. X X.

V. Jacob. Go-
tosiedum De
statu Pagano-
rum sub Christi-
anismo p. 8.

PETRUS PATRIARCHA XXI.

PETRUS
PATR. XXI.

DE illo pauca admodum leguntur apud Severum. Defuncto, inquit, Athanasio, congregati Christiani ejus loco ordinaverunt sacerdotem nomine Petrum, qui multas calamitates perpassus est à Lucio impio, qui falsò ita appellabatur. Hæc fortassis accepta ab Autore aliquo, qui ad etymon vocis attendit, vel secundùm Græcam, vel secundùm Latinam etymologiam. Eam autem persecutionem suscitaram fuisse testatur à Dadiano, (Palladium dicere debuerat) qui erat Ægypti Præfectus, ut ex Petri Epistola quæ apud Theodoretum extat, intelligi potest, absque Imperatoris jussu. Postea quàm ille intellexisset quæ adversùs Petrum gesta erant, misit qui Lucium & Palladium comprehensos in exilium ducerent, ubi ad finem usque vitæ suæ permanserunt. Sedit Petrus annis octo, obiitque 20. mensis Mechir.

Eutychius anno Valentis 8º scribit constitutum esse Petrum Patriarcham Alexandrinum, quem cum animo ipsum occidendi, Ariani aggressi essent, ipse fugâ se proripuit. Tum illi Lucium exulem reduxerunt, qui sedit annis tribus. Irruentibus autem in eum Orthodoxis, ut eum occiderent, fugit Lucius, & ab illis reductus est Petrus, & loco suo restitutus, sedit annos sex & mortuus est. Hæc ille, quo loco monere oportet hunc esse Typographum,

Socr. l. c. 21.
Ed. Vales.
Theodor. l. 4.
c. 20. Ed. Val.
Hisor. Patr.
Alex. p. 253.

T. I. p. 489.

ut verisimile est, errore Pocockii versionem, in qua de Lucii per Arianos restitutione nihil legitur.

Elmacinus etsi secutus satis intelligatur Eutychii narrationem, ab ea tamen recedit, dum unum tantummodo annum Petro in sedem restituto tribuit. Sed videtur ea omisso unius vocis esse, quæ aliter punctata *annum*, aliter *sex* significat. Chronicon *sex* quoque illi annos attribuit, quod ita intelligendum, ut sex annos in pace federit, reliquos in exilio transegerit.

Aliter adhuc Makrizius. Successit, inquit, Athanasio Petrus, adversus quem post annos duos Ariani insurrexerunt, qui eos fugiens, se subtraxit. At illi reduxerunt Lucium, qui sedit per triennium. Eum verò inimici ejus aggressi cum ad fugiendum compulissent, Petrum reduxerunt 20^a mensis Mechir: & sedit annum unum. Ibi sane erratum fuit cum dies mensis ille sit, quem illius mortis Severus fuisse scribit: tum etiam in unius anni numero. Pergit Makrizius. Tempore Valentis Romanorum Imperatoris Arius (legendum Euzoius) Episcopus Antiochiæ, Alexandriam venit, multosque ex Græcis, sive Romanis, nempe qui ei communicare recusarent, annuente Imperatore eiecit; Petrum Patriarcham in carcerem conjecit, & loco ejus constituit Arium Samosatenum. Petrus è custodia elapsus, Romam confugit, & ab ejus urbis Patriarcha susceptus est. Hæc quæ sola ferme de Petro Athanasii successore reperiuntur, satis ostendunt quàm leviter ejus historiam ut remotiores alias omnes attigerint Scriptores Orientales. Quæ Lucium Sedis Alexandrinæ invalorem nefarium spectant, ea accuratè tractata sunt à Scriptoribus Ecclesiasticis. Extat apud Theodoretum ejus Epistola de invasione Ecclesiarum per Arianos facta. Paschaliū Epistolarum & aliorum quorundam opusculorum meminit Hieronymus. Obitum Petri assignat Baronius cum plerisque aliis, anno J. C. 380. atque ita sedisse reperitur annis octo ab ejus electione supputatis. Canon Chronologicus apud Kircherum numerat duodecim.

Memoria Petri secundi, ut appellatur, assignata est in Calendario Coptitarum ad 11^{am} diem mensis Mechir, seu ut Arabes scribunt, Amſchiri, qui ex parte Februario respondet. Poeta Æthiops 20^{am} habet. Ludolfus nomen ejus in suum Kalendarium transtulit, ex Seldeniano, quod nauci non est, & in quo tamen festus dies assignatur 19^a Bainsi seu Bunæ, contra meliorum Kalendariorum fidem, nempe ex autoritate Hagiologiū, & quia eo die mortuus videtur.

An. 380. 5
16.

H. B. Patr. Al.
p. 119.

TIMOTHEUS PATRIARCHA XXII. ΤΙΜΟΘΕΟΥ
Patr. XXII.

MORTUO Petro, Episcopi cum Orthodoxa plebe congregati elegerunt sacerdotem nomine Timotheum. Hujus tempore habita est Synodus secunda Oecumenica, adversus Macedonium Patriarcham Constantinopolitanum & Eunomium hæresiarchas, qui Spiritum sanctum blasphemantes, creatum illum esse dicebant. Habita est autem Synodus Constantinopoli sub Theodosio Imperatore. Sedit Timotheus annos novem, menses sex, in summa Ecclesiæ tranquillitate, obiitque 26^a mensis Epiphi, hoc est 20. Julii. Hæc ex Severo : Eutychius quem sequitur Autor Chronici, fratrem Petri eum fuisse dicit : atque ita Elmacinus. Septem tantum annos Pontificatus Eutychius assignat, ut Elmacinus : statuentes eum ordinatum esse anno Valentis 2^o, & ejus anno 7^o habitum fuisse Constantinopolitanum Concilium. Sed eum anno 385^o obiisse ex pari Consulum Arcadii Aug. & Bauronis docet Socrates, atque adeo annos tantum quinque sedisse agnoscitur. Malè in Tabula Abulbircat, annus obitus dicitur fuisse 118^o SS. Martyrum. De eo plura non habentur. Extant Canones ejus aliquot, seu Canonica Epistola Græcè, at eam ignorant Arabicæ Collectiones, tam Melchitarum quàm Jacobitarum.

*Ita Chron;
apud Abulbircat,
Eutych. t. I.
p. 490.*

De Concilio secundo Oecumenico multa habentur in Canonum Præfationibus Arabicis, Eutychio, Ebnaßalo, Amro Mathæi filio & aliis quæ suo etiam more satis fideliter descripsit Makrizius.

*Concilium
Constantino-
opolitanum
primum.
Eutych. p. 511.*

Sub his postremis Patriarchis notant floruisse sanctos viros doctrinâ conspicuos, nempe jam sedente Athanasio, Macarium quem vocant Magnum, & alium Alexandrinum, præter quem tertium antiquiorem agnoscunt ; quos magnopere venerantur Ægyptii, adeo ut in Diptychis eorum Liturgiæ, memoria occurrat trium Macariorum. Præterea Basilium Magnum ; & Gregorios quatuor, Thaumaturgum, Armenum, Nyssenum fratrem Basilii, & Theologum Nazianzenæ urbis cognomine designatum, qui ad Sedem Constantinopolitanam translatus est : Mar Isaac Syrum, Ephrem ex eadem regione Edessenum Diaconum, & alios sanctitate doctrinaque celebres.

De Timotheo Patriarcha illud etiam scribit Eutychius, jussisse ut Episcopi & Monachi carne vescerentur saltem diebus Dominicis, ut ea ratione dignosci possent Catholici à Manichæis, qui

*Eutychius
refelicitur de
licentia ves-
cendi carn-*

bus Monachis
concessa die
Dominica.
P. 519.

Coll. can.
c. 10. Mf. Ar.

inter Ægyptios multi non solum Monachi, sed etiam Episcopi, Manichæorum hæresi infecti erant. Ita enim sciri poterat, an recta fides eorum esset, cum Manichæi carnibus perpetuo abstinere. Ea occasione Euty chius longam *ἡσυχαστήν* instituit, quam consulere quisque potest; neque enim tanti visa est ut describi mereretur. Istius modi disciplinæ apud antiquos nemo est qui meminerit: imò Severus aut alii Jacobitæ scriptores de ea silent, quam quidem consuetudinem si obtinuit aliquando, nec ubique per totam Ægyptum, nec diu perstitisse existimandum est, cum contrariam aliam extitisse multis argumentis deprehendatur. Extant enim de Monasticæ vitæ legibus Collectanea quàm plurima, & in illis ad certa capita revocandis secundæ partis suæ Collectionis, multa capita impendit Ebnassâlus, de iis quoque Echmi-
menis, & alii Canonistæ. Monachos autem semper à carnibus abstinuisse, communis Orientalium omnium disciplina est, quam aliqua lege immutatam fuisse non liquet. Imò & in Episcopatu, ut nunc adhuc Græci faciunt, Monastica illa abstinencia servabatur. Unde de quodam ut inferius referetur, inter alia accusationis capita, querebantur sui, quòd in Cella Patriarchali carnes comedisset. Ea autem disciplina non pervenit ad Episcopos, nisi postquam plerique ex Monastico Ordine quasi sanctiori, assumi cœperunt. De Manichæis autem scimus Euty chium multa scribere quæ aliis Scriptoribus, præterquam Elmacino qui cum ubique exscribit, nisi ubi de Jacobitarum rebus agitur, prorsus ignota sunt, quale illud de tot Episcopis & Sacerdotibus Manichæis Ecclesias Ægyptiacas occupantibus, quasi ita soleret Ecclesia cum hæreticis agere, ut eos eduliis probaret, non alio inquirendi modo dignoscere conaretur. Tum & illud plane absurdum discrimen Manichæorum qui pisces ederent, aliorum qui averfarentur, quia pisces Idolis offerri victimarum loco non possent. Notum est enim ex melioris notæ Scriptoribus, Manichæos omnia animalia aliis omnino rationibus profana existimasse, & immunda, atque ab eorum usu abstinuisse. Elmacinus ad solam Paschatis diem hanc licentiam carniū edendarum restrinxit, non magis verè ut existimamus. Eum sequitur Makrizius.

Addit Euty chius Timothei Patriarchæ tempore multas Ecclesias Alexandriae ædificatas esse: *Et monumenta non pauca*, ut veritè interpres. Vox Arabica est purè Græca *ναός*, quæ nihil minus significat, sed templa, seu Ecclesias; tandem ex Arianis multos ad

PATRIARCHARUM ALEXANDRINORUM. 103

fidem Catholicam rediisse : quod Elmacinus quoque scribit.

TIMOTHEUS
PAUL. XXII.

Omnes præter Severum scribunt Concilio Constantinopolitano præfuisse Timotheum Alexandrinum Patriarcham, Eutychius, Elmacinus, Chronicon, Abulbircat, Makrizius & alii, nempe quia Damasus Patriarcha Romanus aberat, cujus literæ lectæ in Concilio, & tanquam Orthodoxæ approbatæ sunt. De Ordinatione Sedium Patriarchalium adeo ut Romanus Patriarcha primas teneret, secundus esset Constantinopolitanus, tertius Alexandrinus, quartus Antiochenus : tum ut Hierosolymitanus Episcopus honoris prærogativam, post quatuor Patriarchas haberet, fusè scribunt Orientales in Canonum Collectionibus, ubi & Nicænum sextum primo loco referunt, tum eos qui de reliquarum sedium prærogativis editi sunt, & quorum numerus non idem est in omnibus codicibus, nec semper est eadem lectio. Nam secundum diversas Collectiones, diversa quoque est interpretatio vel potius paraphrasis ejus qui numero 5^{us} extat in Græcis Latinisque Codicibus, quo Constantinopolitano Patriarchæ dignitas attribuitur secundi loci post Romanum. At tam in Collectionibus per locos communes, quàm in aliis, tanquam Constantinopolitani Concilii Canon refertur Constitutio de ordine primarum Sedium. Ex iis etiam Collectionibus translatus est Canon ille inter eos qui Nicæno Concilio attribuantur, quique vulgò dicuntur Canones Arabici.

T. I. P. 494

In eo Canone præscribitur quem honoris gradum habere debeant Catholici Seleuciæ & Ctesiphontis, tum Metropolita Æthiopiarum, quod quidem à Constantinopolitano 1^o Concilio statutum fuisse nemo exstimabit, cum non nisi post annos multos Catholicorum nova dignitas instituta fuerit : Bagdadum quod in plerisque libris legitur Seleuciæ loco, post annos trecentos & octoginta conditum sit ab Almanfore Califa Abbassidarum secundo.

TEOPHILUS PATRIARCHA XXIII.

TEOPHILUS
Petr. XXIII.

HUJUS Patriarchæ qui ex Græca Latinaque antiquitate notissimus est, res gestas ita Severus narrare incipit, ut statim atque Timotheus diem suum obiit, convenisse dicat Episcopos cum Laicis, ordinatumque fuisse ejus loco Theophilum, qui Athanasio ab Epistolis fuerat. Eutychius verò ut lectoribus suis narrationes, quod amat, jucundas objiciat, longam de ejus initiis

Fabulosa
narratio de
ejus primordiis.

Eutych. t. I.
p. 499.Eutych. t. I.
p. 521.

fabulam verbosè describit, quæ paucis explicata, ita se habet. Theodosium Imperatorem & Theophilum Constantinopoli simul vixisse antequam ille ad Imperium, hic ad Patriarchatum pervenisset, magnaque inter se amicitia conjunctos, cum in summa egestate forent, quotidie lignatum in sylvam exivisse; ex lignorum quæ vendebant pretio, mediam partem dedisse pauperibus; alteram in usus suos ad vitæ necessaria comparanda reservasse. Quodam die cum Theophilus ad Theodosium ex more excitandum venisset, audivisse ab eo somnium, quo ipsi quidem Imperatoria dignitas, Theophilo Patriarchalis portendebatur, interprete Theophilo ipso, qui non aliud præmium poposcit, quam ubi rerum ipse potiretur, sui quoque meminisset. Qui totum somnium ab Eutychio evigilato quidem, sed somniantem, scire avertit, adeat ejus historiam. Postea cum indictus esset conventus in Ecclesiam ut à Deo publicis precibus Imperator postularetur, iverunt & ipsi, sed in turba pone reliquos consistendo, ob vestium squallorem. Finita Liturgiâ, avis magna coronam lucidam ore præferens advolavit; & post horas duas, cum interea populus magna voce *Kyrie eleison* inclamaret, eam coronam capiti Theodosii imposuit; qui statim ad altare ductus, exutis vestibus fordidis, regiusque ornatus, acceptâ coronâ ab Episcopo in Palatium deductus est. Oblitus amici Theodosius, cum ad januam per annum integrum reliquit; tandemque inter orandum vocem audit de illius oblivione monentem: statimque introductum benignè accepit: significavitque audivisse se vocem quasi dicentis, Sicut te Imperatorem constitui, ita Theophilum Patriarcham constituio: quam pariter audivisse per somnum Theophilus testatus est. Interea advenerunt Alexandriâ, qui Timotheum obiisse nuntiarent, postulantes designari sibi ab Imperatore, qui in ejus locum succederet. Is statim Theophilum designavit & Alexandriam misit. Hæc porro fabula quàm putida sit, satis intelligitur, cum Theodosius non modò non ignobilis, ita ut ex lignatione victum parare cogeretur, fuerit; sed primæ ex Hispania Nobilitatis, filius Comitis Theodosii qui in Africa adversus Firmum prosperè pugnaverat: ipse ejus filius ad consortium Imperii fuisset adsumptus, postquam Scythas ingenti strage debellasset. Et Athanasii Syncellum seu Scribam ab Epistolis fuisse Theophilum communis Ægyptiorum traditio est, quam etiam Severus, Eumacinusque cum secutus servaverunt, explosa longa illa fabula, quam

quam, ut existimamus, designat Severus, dum ait historiam Theophili cum Angelo Raphaele, cujus forsitan nomine eadem narratio, ut miraculi plus haberet, insignita fuerat, non extare in ejus vita, hoc est in antiquis exemplaribus, quæ ut ipse suum opus conscriberet, præ manibus habuerat.

Cum Theophilus Alexandrinæ Ecclesiæ administrationem suscepisset, audivit quosdam Idolorum cultores Hierosolyma profectos, ut illic templa eorum aperirent. Tunc misit Anachoretas qui dæmonia ex suis delubris ejicerent; quod cum perficere non potuissent, seniores alios ex Monasterio S. Paconii in Sahid seu Thebaide illuc misit, qui facta oratione malignos illos spiritus pepulerunt; & ipsum delubrum mutatum est in Monasterium, quod erat in ipsa Hierosolymorum urbe.

Postea ex voto quod Athanasius habuerat, ut ex eo ipso didicerat, cogitavit qua ratione ædificaret Ecclesiam supra colliculos duos, quos vivens designaverat, ut in ea Reliquias S. Joannis Baptistæ, & Elisæi Prophetæ cum honore collocaret. Dum mandatur locus, reperta est inscriptio quæ tria Θ habet, quæ, inquit Severus, interpretatus est Theophilus. At Eutychius pluribus, significat adjunctum fuisse, ut qui tres illas litteras interpretaretur, quæcunque sub pavimento defossa erant, acciperet. Theophilum tria illa intellexisse, ita ut primo significari dixerit Θεός; secundo, Theodosium Imperatorem, tertio seipsum. Effosso igitur loco, repertum aiunt magnum auri pondus, quod ex Imperatoris concessione Theophilus ædificandis Ecclesiis impendit. Severus simpliciter narrat eum, cum pavimentum effodi jussisset, magnam pecuniæ vim reperisse, quam sacris ædificiis destinavit. Inter alias Ecclesiam erexit in quam translata sunt ab eo deinde corpora S. Joannis Baptistæ, & Elisæi Prophetæ, non sine multis erga infirmos miraculis.

Videre solitus fuit virgam lucis, quæ in modum crucis formata apparebat super baptisterium, quoties baptismum celebraret. Quodam anno cum Orationibus baptismalibus esset intentus, adstante baptisandorum multitudine, lucidam illam crucem non comparere animadvertit: quæ res cum anxium eum reddidisset, divinitus accepit, ne expectaret solitum miraculum fieri, antequam advenisset Arsenius Diaconus, qui cum eo preces suas conjungeret. Dimisso igitur conventu, misit qui eum perquirerent; eo invento in Regione Aschmoun, & adveniente, statim crux lucida sicut solebat apparuit. Miratus Theophilus Arsenii humilitatem, volebat eum sa-

Ecclesiæ ædificatæ.

Eutych. l. 2
p. 527.

P. 528.

De Cyrillo
Alexandrino.

cerdotem ordinare; at ille preces adhibuit, ut eum in ordine suo relinqueret, & ad cellam suam redire pateretur: quod tandem obtinuit. De Arsenio cujus sanctitas notissima est, plura habet Eurychius, ubi Arsanēs ab interprete appellatur: extat quoque ejus vita in collectaneis variis Legendarum; & ejus nomine plura olim extabant in Ægypto Monasteria.

Erat Cyrillus Theophili ex sorore nepos: quem apud se educatum & liberalibus studiis institutum, misit ad Montem Nitriæ, quænam Arabes *Natron* vocant, in Eremito S. Macarii, ubi quinque annis in Monasterio mansit, scripturarum lectioni intentus. Ibi quoque sub Serapione Ecclesiasticæ doctrinæ operam dedit: tanto studio, ut sæpe insomnis una nocte quatuor Evangelia, Catholicas Epistolæ, & eam ad Romanos legeret; cùmque memoriâ polleret, scripturas omnes fermè didicit. Postea Theophilus Alexandriam illum revocavit, & apud se in Cella Patriarchali habuit, scripturas in Ecclesia legere & interpretari jussit, magna sua laude, tum ob vocis suavitatem, tum ob formæ dignitatem: accedebat magna rerum Theologicarum peritia, quæ omnes in illum amorem & admirationem rapuit. Legerat enim magno studio & profectu scripta Patrum Orthodoxorum, Athanasii & Dionysii Alexandrinorum, Clementis & Eusebii Patriarcharum Romanorum, Basilii Episcopi Armeniæ, & Magni Basilii Episcopi Cappadociæ. Horum, inquit Severus, Orthodoxorum Patrum doctrinam sequebatur: Origenis verò libros ne attigerat quidem, sed nec ullum qui eos legisset, admittebat. Hæc sunt quæ ad commendandum Cyrillum, quo potissimum Magistro Jacobitæ gloriantur, præmittuntur apud Severum. Reliqua ad Theophili historiam spectantia adeo negligenter pertractantur, ut nihil fermè monumentorum veterum ad Christianos Arabicè scribentes pervenisse, vel eo solo manifestum sit. Nam postquam de Cyrillo, autor dicendi finem fecit, subjungit historiam vitæ Theophili multa alia completi, quæ silentio prætereat; ea sunt quæ ipsi cum Theodosio Imperatore Alexandriæ contigerunt; miracula Raphaelis Angeli: historia mulieris viduæ, cujus duos filios Episcopos creavit: tria & quæ inscripta pavimento reperta sunt; pecunia sub eodem reperta, & mirabilia multa quæ Raphaelē revelante & adjuvante, in Ecclesia à se ædificata facta sunt; tum quod ipsi concesserit Imperator pecunias omnes repertas in Idolorum templis ab Asiæ usque in Syriam, hæc omnia autor designasse contentus non profecit; neque quo tempore obierit, aut annos Pontificatus assignat.

Ut verò paucis quæ superius exposita sunt attingamus, & ad veritatis historiciæ simplicitatem revocemus, absurdam esse totam somnii Theodosio oblata fabulam certissimum est, cum is jam in magna apud Imperatores dignitate foret, rebusque adversus Scythas, & alios Romani nominis hostes præclare gestis commendatus, antequam ad Imperii consortium assumeretur. At quod spectat ad everfionem templi, notum est ex Socrate, Theodorito, Ruffino & aliis Autoribus, imò ex Ethnicis Eunapio & Ammiano everfionem fuisse Theodosii principatu famosum illud templum Serapidis Alexandrinum: ablata ex eo donaria quæ in pios usus impensa Christiani docent: Ethnici, tanquam prædæ avarorum Antistitum cesserint, conqueruntur. Videndus de illa everfione Baronius ad an. 389. ubi hæc fusè persequitur. Theophili ipsius tanquam primas eo in negotio partes sustinentis meminit Eunapius. *In Ædici. p. 77.* Reliqua nullius autoritatis sunt.

De illius inimicitiiis adversus Chrysofomum ne verbum quidem apud Severum extat. Eutychius illarum causam fuisse dicit, quod Monachi duo quos Theophilus Diaconos ordinaverat, & apud se tanquam discipulos & syncellos aliquandiu retinuerat, cum licentiam redeundi ad solitariam suam vitam petissent nec impetrassent, fugerant: eos à Theophilo excommunicatos, à Chrysofomo literas impetrasse, ad Theophilum commendatitias; quæ cum frustra fuissent, Chrysofomus eos ad communionem admisit. Eam fuisse contentionis causam, quam paucis Jacobitæ explicant, ne Theophili & Cyrilli famam in dubio relinquunt. Itaque acta omnia illegitima contra virum sanctissimum, Synodos latrociniales, exiliumque, quorum malorum præcipua causa Theophilus extitit, silentio involvunt.

De inimiciis
cum Chryso-
fomo nihil
scribit Seve-
rus.

*Hist. Patr.
Alex. f. 267.
& seq.*

De Cyclo Paschali, quem Autores Græci & Latini Theophilo attribuunt, nihil etiam apud Autores Orientales legitur: neque apud eos extat quidquam eorum quæ Theophilus scripsisse perhibetur, præter quasdam Homilias valde interpolatas; aut fragmenta quæ leguntur inter testimonia Patrum veterum inter alia collectanea de Incarnatione, & ab Isâ filio Zaræ in Apologia Jacobiticæ sententiæ, unum refertur ex Homilia de Nativitate.

*Genad. Vir.
lib. 6. 101.*

Ejus temporis adscribunt evigilationem septem Dormientium, Eutychius, Elmacinus, Chronicon, & alii, de quorum historia superius dictum est.

P. 5311

Sedit Theophilus an. 27. obiitque secundum Makrizium 18^a mensis Paophi, anno, ut existimat Baronius, J. C. 412. Chronicon apud Abulbircat menses 2. & an. 28. habet : & annum obitus 147. SS. Martyrum 18. Paophi, qui numerus, ut de aliis ejusmodi suprà diximus, stare nullatenus potest. Obiisse cum anno 412^o communis sententia est.

CYRILLUS PATRIARCHA XXIV.

Cyrilli initia.

DE ejus apud Theophilum avunculum institutione, secessu per annos aliquot in Monasteria Nitriæ, indefessoque sacrarum literarum studio jam superius dictum est : in eo autem differunt Autores Græci ab Arabibus, quod Cyrillum Theophili non ex sorore sed ex fratre nepotem fuisse existimant. Statim atque obiit diem suum Theophilus, triduo nempe elapso, ordinatus est ejus loco Cyrillus ; & Episcopi Evangelia attollentes super caput ejus, oraverunt super eum, ut Deus qui illum elegerat, ipsum confirmaret virtute necessaria ad regendam Ecclesiam, quam summâ prudentiâ statim administrare aggressus est. Coepit autem secundum eam qua pollebat sacrarum literarum peritiam, multos ad populum suum habere sermones, plenos spiritu qui in eo loquebatur, tanto Alexandrinorum applausu, ut primores urbis mitterent librarios, qui homilias ex illius ore exciperent, quæ postea in codices transferrentur.

Scripta contra Julianum.

Cùm essent Alexandria multi Philosophiæ studiosi, sciretque ab illis avidè legi quæ Julianus Apostata contra Christianam fidem scripserat, *deteriora*, inquit Severus, *illis quæ ab Origene aut à Porphyrio scripta fuerant* : scripsit ad Theodosium Imperatorem, qui ejus rogatu libros Juliani conquestos cremari jussit, eosque Cyrillus confutavit. Eo loco notanda est stolidi & impetrata comparatio Origenis, qui adversus Celsum Epicureum tam strenuè decertavit, cum Porphyrio hoste Christianorum insensissimo. Nempe cùm ignorent Orientales qui Græcè nescierunt, quæcumque ad Origenis historiam pertinent, in communi illo errore sunt, quod Origenes, cujus indefessus labor fuit in sacrarum literarum explicatione & illustratione, etsi fortasse humanitus erravit, non alio tamen consilio scripserit, quàm ut Judæorum more, omnes quæ de Christo erant prophetias exploderet, Religionemque Christianam everteret.

Statim Severus transit ad historiam Nestorii, de quo cum ad Cyrillum fama perlata esset, scripsit ad eum Epistolam, cujus pauca verba ex initio Severus recitat in hunc modum : *Cyrillus Patriarcha Alexandrinus Nestorio Patriarchæ Constantinopolitano, salutem fraternam in Deo vero qui dedit nobis gratiam unam, totumque orbem concordem & unanimum effecit per effusionem sanguinis sui in una fide in filium Dei Jesum Christum.* Reliqua præterit tanquam notissima : attamen neque hanc primam Epistolam, neque alias quæ inter Acta Synodi Ephesinæ reperiuntur, jam faciliè quisquam inveniet in Codicibus Arabicis, quia jam à Severi tempore multa interciderunt eorum quæ ad historiam illius temporis spectabant, quorum maxima pars in Arabicam linguam conversa non fuit.

Ad has literas nonnisi blasphemias reposuisse Nestorium Severus ait. Quapropter datis Cyrillus ad Episcopos literis, certiores eos fecit de rebus Nestorii. Illi ad eum convenientes dixerunt, se jam auditu accepisse quæ innovasset adversus antiquam fidem : id verò esse eò majoris difficultatis & periculi, quòd Arius, Paulus Samosatenus, Manes, & alii hæretici, non fuerint Patriarchæ, magnam tamen hominum multitudinem in errorem induxerint ; ille verò in tanta dignitate constitutus, quid non posset. Iterum igitur ad eum Cyrillus scripsit, monens, & quantum minis atque adhortationibus fieri poterat, excitans eum ad retractationem eorum quæ impiè protulerat. Epistolæ initium tale erat. *Fratri & comministro. Non credidi verum esse quod de te dictum est antea ; neque Epistolam quæ ad me tuo nomine perlata est, à te scriptam esse existimaui, cum in ea sententias falsissimas & blasphemie plenas sanctis attributas repperim. Moneo igitur ut à similibus blasphemis, contentionibusque desistas ; neque enim vires tibi tales sunt, ut possis pugnare adversus Deum qui verè crucifixus est pro nobis, & mortuus est in corpore, vivitque per potentiam divinitatis suæ : ipse est qui sedet ad dexteram Patris, & eum adorant Angeli, Principatus & Potestates : ipseque est rex æternus, cui omnia dedit Pater in manus : ipse est creator omnium, adversus quem exurgere aut eum impugnare non vales. Neque opus est ut tibi in memoriam revocem quæ Judeis ejus hostibus acciderunt, cum ea tibi satis perspecta sint, aut quæ hæreticis Simoni Mago, Juliano Imperatori & Ario. Ecce Job justus dicit : Videte plagam meam ; timeite & laudate Deum.*

Ego autem denuntio tibi quòd Ecclesia passura non sis tuam adversus Deum suum impudentiam : atque illa ipsa Ecclesia est adversus quam porta inferi praevalere non poterunt. Ipse quoque scis, quantas illa tentationes perpeffa sit, ita tamen ut nullus praevaluerit adversus eam, quia fundata est supra petram fidei. Vide ergo quæ facturus sis, & vale. Talis est Epistola quæ extat in Codicibus Arabicis earum loco quæ Græcè & Latinè leguntur in antiquis Codicibus Actorum Ephesinorum. Ad secundam illam respondit Nestorius arroganter, & similes prioribus blasphemias literis suis complexus est. Illas cum Cyrillus accepisset, rescripsit acriter, in hæc verba : Nisi esses Episcopus, nemo præter familiares & propinquos tuos te novisset. Jam verò quia sedes super thronum filii Dei, unusquisque te novit, ob Ecclesiæ cui præes dignitatem. Nunc verò Dominum aggredieris per verba blasphemiarum, quæ neque explicare, nec comprobare poteris. Cum verò scripturas utriusque Testamenti veteris & novi scrutatus fueris, non invenies in illis Christum purum hominem appellari, sicut existimas. Tu porro videris existimare posse te resistere Deo creatori tuo, qui redemit te sanguine suo, qui est Deus filius Dei Patris, ut appellatur in veteri novoque Testamento, & qui in Joannis Evangelio unigenitus filius vocatur, qui est in sinu Patris. Matthæus quoque Evangelista, dicit eum esse Emmanuelen cujus interpretatio est, Nobiscum Deus, sicut in Prophetia sua Isaias dixerat. Subjunguntur diversa alia scripturæ testimonia ad probandam Christi divinitatem. Has literas cum legisset Nestorius, neque eos qui eas detulerant admisit ad se, quamvis secundum Cyrilli mandata per mensem integrum expectaverint donec admitterentur ; sed neque ad eas respondit ; verum tanquam alter Pharao obduravit cor suum.

Erat Nestorius antiqua familiaritate cum Imperatore Theodosio conjunctus, eò quòd simul olim literis operam dederant : atque ea occasione exprobravit illi Imperator, quòd ea assereret, quæ nulli antiquorum Ecclesiæ doctorum in mentem venerant. Cyrillus, cum illi quos ad Nestorium miserat reversi essent, absque responso, neque ad illum admissi, scripsit ad omnes Episcopos, qui pariter ad Imperatorem scripserunt, postulantes, ut congregaretur Concilium in quo Nestorii causa tractaretur : hortando simul ut prædecessorum suorum exemplo, daret operam, ne fides Orthodoxa quidquam detrimenti caperet, hominis illius occa-

PATRIARCHARUM ALEXANDRINORUM. III CYRILLUS PAP. XXIV.

sione qui non deterius errare videbatur quam Idololatram; cum assereret Christum esse purum hominem, prophetamque & nihil amplius: venisse jam multos prophetas in mundum; neque ullum adoratum fuisse: qui verò homini adorationem impenderet, verè esse idololatram. Indicta est ab Imperatore Synodus in urbe Epheso, ad quam Episcopi ducenti conveniunt, unusquisque cum Presbytero & Diacono suæ Ecclesiæ.

Cum igitur convenissent, Nestorius per plures dies expectatus adesse noluit; & cum de ea dilatione questi per literas essent apud Imperatorem Episcopi, Nestorius significans, timere se eorum multitudinem, vitæque periculum, obtinuit ut Patricius quidam Candidianus, illius opinione imbutus, præsidii causâ cum eo mitteretur. Is ad Synodum profectus, Cyrillum, & qui ei adhærebant, comprehensos conclusit in quemdam locum qui apotheca farinæ erat: unde omen accipiens Cyrillus, suos in bona spe patienter hanc calamitatem ferre jussit, quasi de victoria adversus hostem fidei securos, qui in domum vitæ, cibariis nempe ad vitam sustentandam necessariis refertam, detrusi essent. Interea Candidianus videns eos firmiter in proposito suo persistentes, morique paratos prius quam à fide propugnanda desisterent, eos quidem libertati restituit, sed veritus ne si res ad Imperatorem referretur, temeritatis suæ poenas daret, custodes in viis statuit, qui omnes literas interciperent. Ita Cyrillus, Ephesus Episcopus & alii, plures dies congregati permanserunt, orationibus intenti; seorsim agente Nestorio, nec ad illos accedente, etsi tres Episcopos ad eum misissent, qui invitarent illum, ut cum illis ad orationem veniret. At militare præsidium, quod ad fores domus illius Candidianus collocaverat, eos ingressu prohibuit. Cum verò mora longior molesta esset omnibus, quos à propriis Ecclesiis tandiu abesse magnopere tædebat, coacti sunt tandem hostem Ecclesiæ ab ea pellere. In medio igitur confesso allata sunt Evangelia, tum producta sunt Nestorii scripta blasphemis plena, quæ Diaconus nomine Petrus, vir doctus qui Cyrillo erat ab Epistolis, cum locos impietatis suspectos probè nosset, coram Synodo proponebat. His intellectis, agnoverunt omnes impietatem Nestorii, atque ita illi anathema dixerunt, eumque deposuerunt, & instrumento anathematis, sententiæque in eum prolatae subscripserunt. Ejus deinde exemplar ad Nestorium miserunt, qui nec illud suscepit, nec à sua sententia impietateque recessit. Supererat

Synodus
Ephesina.

ut illius anathematis exemplum ad Imperatorem mitteretur ; quod fieri non potuit ob custodias quas Candidianus collocaverat. Itaque literas suas cavæ arundini inferuerunt, & in vestimentis latoris occuluerunt, qui ita Constantinopolin pervenit, & eas Imperatori tradidit. Illæ scriptæ erant in hunc sensum. *Synodus Ephesi congregata hæc dicit : Scimus Emmanuelem esse Deum hominem factum, & quia Nestorius non communem in eo nobiscum habet fidem : ipse alienus est à Patre & Filio & Spiritu sancto : alienus etiam ab hereditate Apostolorum, alienus ab una & sancta Ecclesia. Quicumque dixerit Jesum Emmanuelem, non esse Deum hominem factum, anathema sit ; & quicumque non dicit, virginem Mariam peperisse Deum Verbum incarnatum, verè anathema sit. Christus creator, Christus victor, Christus salvator omnium, cui sit gloria in æternum. Amen.* Hæc cum lecta essent ab uno ex Comitibus quem Victorem nominant, cujus tamen inter Acta legitima nomen non occurrit, hortatus est Imperatorem ut Episcopos Constantinopolin evocaret, & ei fausta adprecarentur. Venerunt igitur, magnoque cum honore suscepti sunt. Nestorius exilio damnatus, Echmimam urbem Ægypti quam Panos esse verisimile est, deportatus, ibi ad finem usque vitæ in hæresi sua obstinatissimus functum vitæ finem sortitus est. Atque ea sunt, paucis admodum prætermisissis quæ de Concilio Ephesino & tota illius historia habent Christiani Arabes in suis libris, præsertim Alexandrini, apud quos certior gestorum memoria esse debebat. *Etsi verò in præcipuis capitibus conveniat hæc narratio cum Græcis & Latinis Autoribus, eam tamen imperfectissimam esse satis quisque intelligit, præsertim cum neque de Joanne Antiocheno, & concertatione cum Orientalibus quidquam contineat. Eam porro aliunde supplere, inutile prorsus nobis visum est, in re notissima, & quæ propriè ad Orientales Ecclesias non pertinet, nisi ad Nestorianos qui tunc ab Ecclesia recesserunt, & Nestorio adhæserunt. Verùm quæ sit apud illos traditio de rebus Concilii Ephesini, in qua omnia per vim & fraudem gesta calumniantur, dicitur in dissertatione de Nestorianis, ubi ex Mari Salomonis filio & Amro Mathæi, retulimus quas in eorum libris legimus de Ephesino Concilio ineptissimas narrationes. Qui alios consulere cupiet, legere poterit Eutychium, qui fusiùs hæc accuratiusque profequitur, & paucis attingit dissidia quæ inter Joannem Antiochenum

Eutych. An.

t. 2.

tiochenum suosque Orientales, & Cyrillum, intercefferunt. Ita quoque, sed brevius, Elmacinus ex Eutychio; quibus adjungendæ præfationes Arabicæ Canonum, tam ea quæ extat in Codice Melchitarum, quem versione sua Beveregius expressit, quàm alix quæ passim reperiuntur in Codd. Mss. His addendus Ebnassalus, qui de eo quoque Concilio agit in *Principiis fidei*, Severus in opere singulari de Synodis, & alii, quorum nemo tamen eam historiam nisi leviter admodum tetigit, tantùm abest, ut ab illis quidquam haberi queat unde ea quæ in Græcis Latinisve obscura sunt, lucem aliquam possint accipere. Neque tamen in longo illo Cyrilli Episcopatu reliquarum rerum ab eo præclare gestarum ullam attingunt.

Hæc autem opera ejus recensent: Epistolam ad Joannem Antiochenum, quæ incipit *Latentur celi & exulet terra*: aliam ad Cyrum Melitenum, seu Malatensem Episcopum: aliam ad Valerianum Episcopum Iconiensem; item ad Sacerdotes, Diaconos, Monachos, post depositionem Nestorii: ad Eulogium Alexandrinum: item ad Anastasium, Alexandrum, Martinianum, Joannem, Paregorium Sacerdotem, & Maximum Diaconum, ad defensionem fidei Orthodoxæ, refutationemque errorum Nestorii, præter eas quas ad Nestorium ante ejus exilium literas scripserat. Plura non memorat Severus, etsi ex aliis Cyrilli operibus non pauca occurrant testimonia in Tractatibus polemicis Jacobitarum, & in Codicibus Mss. Homiliæ varix: sed integra ejus opera etsi olim apud eos extitisse non dubitamus, jam tamen non reperiuntur, nisi fragmenta pauca, quæ etiam, quantum judicare potuimus, non ex integris libris Arabicè conversis excerpta sunt, vel ex Severi Antiocheni qui multa scripserat, vel ex aliorum Monophysitarum Collectaneis Græcis, quæ antiquitus in Syriacam & deinde in Arabicam linguam translata sunt. Habent præterea Copticæ Liturgiæ quæ ordine apud eos tertia est, atque Cyrilli nomine prænotatur, ut etiam altera Syriaca reperitur, sed apud solos Jacobitas.

De reliquis rebus ad Cyrilli historiam pertinentibus, præferunt contra Joannis Chrysostomi memoriam, ne litera quidem occurrit: neque enim qui sanctissimum illum Ecclesiæ doctorem eo quem apud omnes Ecclesias obtinet honore prosequuntur, suspicati sunt ullam ipsum à Cyrillo injuriam passum esse, adeo obscura est apud Orientales rerum antiquarum historia,

Cyrilli scri-
pta.

Hæres. Nest.
Syr. Mf.

Nestorianos nihil moramur, quos ob zelum Catholicæ fidei in expugnando Nestorio, non æquos fuisse erga Cyrillum, mirari nemo debet. Habuerunt enim antiquitus Irenæi historiam seu Tragædiam, cujus meminit Hebedjesu, tum alios multos qui probris omnibus eum onerant: imò & in Officio quotidiano seu Horologio Nestorianorum, laudatur Nestorius, *quod bellum gesserit cum Cyrillo maledicto, ejusque contumaciam fregerit.* Verùm hæc omnia cum ad istius sectæ historiam pertineant, in singulari Dissertatione à nobis aliquando exponentur.

Sedit Cyrillus an. 32. atque adeo cum ordinatus fuerit an. 412. obitus ejus incidit in an. 444. De numero annorum consensit Elmacinus, ut Abulbircat in Canone Chronologico suo: Chronicon dies adjicit 155. Euty chius annos 33. nempe inchoatum pro integro numerans. Obitus dies 3. mensis Abib seu Epiphi, quo die memoria ejus assignatur in Calendario Coptico.

Elmacinus & ex eo Makrizius aiunt eum primum imagines in Ecclesia collocasse, quod neque cum ista historia, neque cum aliis consentit; antiquior enim est Imaginum mentio, ut in vita Petri Martyris, & in vita Athanasii imaginum Christi, & B. Mercurii martyris: neque varii Tractatus Syriaci vel Arabici hanc traditionem confirmant.

Ejus ætate Elmacinus floruisse scribit S. Isaac Syrum, scriptis & sanctitate nobilissimum, discipulum S. Ephræm. Is Antiochiæ vitam egit, cum Edeßâ oriundus esset: scripsit Orationes & Tractatus multos Homiliasque de præcipuis festivitibus, quæ passim extant in variis Codd. Eodem quoque tempore floruisse aiunt Symeonem Stylitem, cujus extant varix apud Arabes Christianos historiæ ex Græcis corruptissimis translatae, novisque fabulis cumulatae.

Dioscorus
Patr. XXV.

DIOSCORUS PATRIARCHA XXV.

Ab eo divi-
so Ecclesiæ in
Melchitas &
Jacobitas.

JAM ad eam hujus historiæ partem pervenimus, in qua sicut Ecclesiarum divisio initium habuit, ita quoque rerum gestarum narrationes diversissimæ inter Catholicos & Hæreticos esse coeperunt. A Dioscoro quem injustè damnatum Jacobitæ ejus discipuli existimant, successionem Patriarchatum suorum ducunt: alios omnes tanquam intrusos & hæreticos rejiciunt, nec habent pro legitimis Episcopis. Pari ratione Melchitæ seu Orthodoxi, qualis

erat Eutychius, Dioscori successores damnant, nec in Episcoporum numero habent. Inde ingens perturbatio ex successionis istius diversitate, quam explicare conabimur, quoad fieri poterit: ita tamen ut cum non tam Ecclesiæ Alexandrinæ quàm sectæ Jacobiticæ res prosequamur, de hæreticis illis Patriarchis, quorum huc usque memoria obscurissima fuit, plura omnino quàm de aliis dicamus.

De Dioscoro hæc habet Severus. Post obitum Cyrilli constitutus est ejus loco Dioscorus Patriarcha Alexandrinus. Is multa & aspera sustinuit certando pro fidei defensione, à Marciano Imperatore & ab ejus uxore, qui eum sede sua expulerunt, ita suadente Concilio Calchedonenfi, illis qui ad illud convenerant ad Imperatoris ejusque uxoris placita, consentientibus. Eam ob causam tam ipsi, quàm qui perversam eorum fidem secuti sunt, *Melchitæ* sunt appellati, eò quòd Imperatoris opinionem secuti, ei consenserunt circa publicam professionem & renovationem hæresis Nestorii. Postea questus, quòd cum olim Scriptores multi fuerint qui res Judaicas jam ab initio scripserint, quos Ecclesiastici Auctores complures exceperunt; & inter eos aliqui res gestas Cyrilli, & ejus pro fide certamina adversus Nestorium: tamen ab eo tempore nemo occurrat qui de Dioscoro & iis quæ à Concilio Calchedonenfi passus est, quidquam in literas miserit, adeo ut jam divisis Ecclesiis nullæ illorum temporum memoriæ superfuerint. Itaque excusat se quòd de Dioscoro nihil ipsi amplius dicendum occurrat, nisi cum postquam Gangras in exilium deportatus est, fidem Orthodoxam, hoc est unius naturæ, ad mortem usque constantissimè retinuisse, & ibidem obiisse. Cum Severus ingenuè falsus fuerit, non extare in Jacobitarum manibus historias rerum sub Dioscoro gestarum, mirum est posteriores ex ea secta scriptores habuisse tamen unde longam illarum seriem contexerent, qualem Severus ipse in singulari Dissertatione adversus Eutychium, Ebnassalus in Collectione Principiorum fidei, Elmacinus & ex illis Makrizius Muhamedanus, quorum narrationem compendio referemus.

At quoniam Eutychis Archimandritæ occasione qui novam hæresin commentus est, Ecclesiæ scissæ sunt, scire primum oportet, Jacobitas non modò illius dogmata non probare, verum illum haberi apud eos tanquam hæreticum, cui anathema dixerint. Si quidem existimant illius propriam opinionem fuisse quòd Christus de cœlo corpus habuerit, subtile, impassibile, nostrisque

Quæ de eo
Severus.

De Eutychæ
quid sentiant
Jacobitæ.

omnino dissimile ; atque Incarnationis mysterium ita perfectum fuisse, ut Dei filius per Mariæ Virginis uterum, tanquam per canalem transiverit, nec ab ea quidquam acceperit : adeo ut Eutyches in Apollinari errores, paucis immutatis incidisse secundum illos censeatur. Dioscorum, cum novitate istarum opinionum percussus esset, coegisse Synodum Ephesi, quam Ephesinam secundam vocant, in qua Eutyches hæresin suam ejuraverit, & fidei orthodoxæ professionem ediderit, etsi de ejus sinceritate non multum laborent Jacobitæ. Cum verò Eusebius Dorylæi Episcopus & Flavianus Constantinopolitanus, eum condemnassent, & fidem quam tenebant exponentes, duas in Christo naturas, unamque personam esse dixissent, Dioscorus existimans illa confessione Nestorianam hæresin renovari, eos excommunicavit. Ut hæc causa tractaretur, convocata est à Marciano Imperatore Calchedonem Synodus Episcoporum sexcentorum & triginta, ad quam convenerunt Patriarchæ, Anatolius Constantinopolitanus, Dominus Antiochenus, Juvenalis Hierosolymitanus, & Legati Leonis Romani, qui Epistolam ejus sive *Tomum* detulerunt. In eo cum duas naturas, unamque personam Leo exponeret, Dioscorus eam sententiam quam reliqui, sex exceptis, sanam judicabant, approbare noluit, quasi pugnantem cum doctrina Cyrilli prædecessoris sui & Concilii Ephesini, *unam Dei Verbi naturam incarnatam* profitentium. Communi igitur omnium sententia statutum est deponendum & excommunicandum esse Dioscorum : sed prius Marciano visum est, ut si fieri posset, induceretur ad subscribendum Tomo Leonis, & Synodi definitioni, quæ eundem probaverat. Accersitum illum Imperator coram Patriciis & Episcopis hortatus est, ut ad aliorum sententiam accederet, nec pertinaciâ suâ occasionem daret Ecclesiarum divisioni. Tum Dioscorus frustra primum Imperatori adprecatus liberè monuit, ne in rebus ejusmodi subtilibus, & quæ captum illius superarent, judicium suum interponeret : curaret publica negotia, Ecclesiastica verò Episcopos tractare sineret, & de recta fide consultare, cum ipsi sacras literas nossent : nullam igitur aliam curam haberet, nisi ut quæ ab illis circa fidem constituta forent, accuratè sequeretur. His verbis offensa Pulcheria dixit, fuisse olim virum cerebrosum Joannem, Dioscoro similem, qui excommunicatus, & sede sua pulsus fuisset : at illum respondisse, matrem ipsam Pulcheriæ, quæ exilii causa illi fuerat, magnis divinitus malis afflictam, non prius sani-

tatem obtinuisse, quam ad Joannis sepulcrum orasset, & ab eo veniam postulasset. Ea responsione scribunt incensam Pulcheriam colaphum ipsi impegnisse, quo duos illi dentes excusserit, barbam ejus apprehendisse, & evellisse. Statim Imperatorem jussisse ut sententia anathematis in eum proferretur, & Gangras in exilium deportaretur. Addunt Historici aliquot, & Theologus Isa F. Zarea, eum cum in Concilio frequenti adesset, noluisse legi *Tomum* Leonis; cumque exilium ipsi, post anathematis sententiam, Imperator minaretur, nisi subscriberet eidem Tomo, illum in manus quidem accepisse, verum subscriptionis loco confessionem suæ fidei, & anathema adversus eos qui aliter crederent, scripssisse. Hæc fermè Elmacinus & ex eo Makrizius. De Concilio Calchedonensi cum notissima historia sit, nihil dicemus, nisi quòd ficta illa narratio quæ paucis verbis exposita est, adeo Jacobitarum omnium occupavit animos, ut non alia huc usque inter eos de illo opinio sit, quanquam ex ipsis temporum locorumque circumstantiis multa falsa in ea observari facile possint. Eutychius satis accuratè eam historiam explicavit secundum Orthodoxorum traditionem; quam secutus, Dioscorum accusat quòd Eutychis hæresin comprobaverit, etsi id constanter negatum fuerit, ab antiquis recentioribusque Jacobitis, qui ipsi ut Apollinario anathema dicunt. Unde (contra quod Thomas à Jesu & Autor historiæ Alexii Menesi, & multi alii scribentes, aliis suaserunt licèt falsissimum) Eutychis memoriam nullam agunt in sacris Officiis, sed potius eum numerant in hæreticorum catalogo, Ebnas-salus, Abulbircat, Severus, Autores diversorum Tractatuum de hæresibus & alii.

Æthiopum de Concilio Calchedonensi traditio, cum ab *Ægyptiis* Jacobitis accepta sit, eadem omnino est, nec in ea recensenda aut refellenda laborandum. Quæ de dentibus fractis & barba vulsa Dioscoro habent Synaxaria illa Poetica Ludolfo laudata, ex narratione quam paucis complexi sumus, desumpta sunt : & ab Autoribus Historiæ Patriarchalis eo quo tales quiesquiliæ merebantur, pretio æstimata. Quod porro circa Concilium Calchedonense, & Jacobitarum opinionem in Historia sua *Æthiopica* & Commentario multa scripsit Ludolfus, ut illos quoad ejus fieri poterat excusaret, non attigerunt. Rectè quidem eos Eutychianos non esse probavit, qui Eutychio anathema denuntient, dum scilicet Apollinarii hæresim laborasse pro certo habent. Neque minus rectè

Ebn. Zarea in opere adversus Melchias. Severus. Abulbircat 1. p. titulo de causa divisionis Ecclesiarum. Ebnas-salus &c.

T. 2. 88. & seq.

Gouges hist. l. 1. c. 6. f. 17. c. 4. Ed. Lusitan.

Æthiopum de Concilio Calchedonensi traditio. Ludolf. Hist. Æth. l. 3. c. 8. Comm. p. 451. §. 278.

quædam testimonia ex eorum Liturgia & Organo protulit, ex quibus eos commisionem, confusionem & alterationem rejecisse manifestum est. Id quippe probant Coptitarum & Jacobitarum libri complures, exponuntque fusè Theologi, quorum ne unum quidem vidit Ludolfus præter Abulfaragium & Eutychium, nec utriusque Theologicos libros, sed historiam tantùm consuluit. Torquet tamen se ut sententiam Jacobiticam ab omni erroris suspitione purget, non sine Concilii Calchedonensis injuria, etsi sancta apud Protestantes illius autoritas semper fuerit. Eo sine *Concilium Ephesinum*, vocat Latrocinium illud, quod Dioscorus congregavit, & pari quodammodo loco haberi vult, cuius Acta interiisse dolet, quamvis maxima eorum pars Calchedonensibus inserta reperitur. Porro si constat illius pseudo-synodi autoritas, Calchedonensis quæ huc usque legitima ab omnibus habita est, fides non vacillat modò, sed plane corrupta Nestorianismo fuit, quæ vulgaris & vetusta Monophysitarum nœnia est. Hæretici itaque fuere Leo Romanus & sexcenti triginta totius orbis Episcopi, qui duas in Christo naturas professi sunt, quamvis præter eosdem hæreticos unius naturæ defensores, nemo non agnoverit Orthodoxam ab illis doctrinam fuisse stabilitam. At eandem Jacobitæ & ipsi Æthiopes, tanquam Nestorianæ affinem damnant, & anathemata in Leonem Calchedonensesque conjiciunt: rectè, si Ludolfus audiendus est de eorum *ὁρθόδοξία* & pseudo-synodo Ephesina: nam illi soli legitimam eam esse agnoscunt. Appellet igitur Ludolfus eorum exemplo Calchedonensem Synodum, *Conventum Apostatarum & factuorum*, Leonem Nestorianum, Martianum & Pulcheriam Nestorianismi restauratores, habebimus perfectum Jacobitam, sed Confessionis Augustanæ proditorem. Tanti non erat lavare Æthiopes suos, ut Ecclesiæ universæ Nestorianismi labe inureretur. Quod si ut videri vult, Theologos Jacobitas consulisset, agnovisset procul dubio eos, quamvis Eutychiani propriè loquendo dici non possint, in eodem tamen ac veteres Monophysitas luto jacere, nec excusari ab eo posse, qui Calchedonensem fidem non rejiciat. Verùm hæc alterius operæ sunt: & si quando Dissertatio singularis nostra de Jacobitarum fide prodibit in publicum, demonstrabitur non ex Autoribus aliud agentibus, aut ex misero aliquo carmine Æthiopico, sed ex celeberrimis in Secta Jacobitica Theologis, propugnare illos eam hæresin, quam non modò Calchedonense Concilium, sed Græci posteriores Damas-

cenus, Anastasius Sinaïta, Leontius, tot alii tandem cum tota Ecclesia damnaverunt. Patr. XXV.

In eo consentiunt Autores omnes quòd ab hujus Concilii tempore originem habuit divisio Ecclesiarum in Melchitas & Jacobitas. *Melek*, licèt variè pronuntiatum, ut Hebraicè, ita Syriacè & Arabicè, *Regem*, & *Imperatorem* significat : inde *Melky regium* sive *Imperatorium*, quo scommate hæretici Orthodoxos infamare conati sunt, quasi non ex amore veritatis, & antiquæ fidei conservandæ studio, sed ex sola adulandi libidine in novam Leonis Romani sententiam cui favebat Martianus, & quam Nestorianorum erroribus redintegrandis opportunam judicabat, in Dioscori damnationem consenserint. Notatur hujus denominationis origo à Nicephoro, & antiquis aliis Græcis Autoribus : neque illius Orthodoxos puduit ; imò eam ita amplexi sunt, ut quod sæpe observatur apud Eutychium in historia rerum quæ multis annis Chalcedonenfè Concilium antecesserunt, Melchitarum appellatione Orthodoxos significet ; quod & alii Autores fecerunt. De Jacobitarum nomine quo à multis sæculis designantur omnes Monophysitæ, quamvis in diversas sectas olim divisi, quorum decem præcipuas Anastasius Antiochenus commemorat, ipsis Jacobitis non inter se convenit. Plerisque ut Græcis quoque persuasissimum est, placet derivatum esse à Jacobo qui magnam in propaganda illa secta navavit operam, quæ sane origo verisimillima judicatur. Non defuerunt tamen qui mallet à Jacobo Apostolo *Ἀδαμῶσι* sumtum videri, ut Patriarcha quidam Jacobita apud Muhamedanos judices dixit, si Nestoriano historico credimus : alii alias origines produunt, quas recenset accuratè Makrizius, mirà sane in homine Muhamedano diligentia. Ita quoque professus est Chaïl in lite contra Melchitas, ut in ejus vita diceretur. Melchitarum appellatione quando acciperet. Niceph. l. 18. c. 52.

Dioscorus simul conjunctis annis ab ejus electione usque ad ejus obitum Alexandrinam sedem Jacobitis tenuisse dicitur annos quatuordecim, quibus dies 69. seu menses duos & dies aliquot adjicit Autor Chronici Orientalis ; 14. tantùm Makrizius & Elmacinus : 16. ut Autor Canonis apud Abulbircat : dies obitus 4. Toth seu 1^a Septembris ex Makrizio, 6^a seu 9^a ejusdem mensis ex Abulbircat. Ita secundùm Jacobitas obitus ejus incidit in ann. circiter 458. J. C. Quia verò non priùs vacasse Sedem Alexandrinam censuerunt, quàm ille obiisset, nec Proterium pio legitimo Patriarcha agnovērunt Jacobitæ, idcirco annos Episcopatus ejus De Christi Dispensatio. ne. Sirmund. Not. ad Edicand.

Amron in Historia Mese Ar.

non numerant, sed statim Dioscoro successisse scribunt Timotheum.

Dioscori scripta nulla extant apud Jacobitas, neque Paschales Epistolæ, neque quidquam aliud ejus nomine insignitum, præter Æthiopicam Liturgiam quam ex Codice Pocockiano ante annos aliquot Æthiopicè & Latine Wanslebius edidit. Syriacam sed plane diversam reperimus in antiquis Codicibus Bibliothecæ Colbertinæ: utraque Autoris cui tribuitur ætate, multò est recentior.

Memoria ejus inter sanctos Episcopos Ecclesiæ doctores agitur apud Jacobitas in omnibus fermè Liturgiis, præsertim verò in tribus Coptitarum, & aliis Syrorum Jacobitarum. Festum ejus assignatur 6^a die mensis Toth, à quo Ægyptii deducunt anni sui initium: in Calendario festorum apud Abulbircar.

Eo tempore quo sedit Dioscorus, narrat Autor historiæ Chailis Patr. 46^a, vixisse Monachum quemdam Abu Hermanum, qui in Palestina Monasterium ædificavit, cui fratres suos Maximum & Diomedem præfecit, ubi erant Monachi mille. Is cum ad eum perlatus esset Leonis Tomus, ad sepulcra Patrum profectus, eos quasi viventes terribiliter adjuravit, edicerent num acceptare deberet Leonis fidem, an Nicænam retinere. Ajunt erupisse ex sepulcristis vocem in hæc verba: *Maledictus Leo impius, animarum secundum nominis sui rationem prædator, cum impuro Tomo suo: maledictus Marcianus, cum Pulcheria improba, & Calchedonensi Concilio DCXXX. Episcoporum hæreticorum: & qui cumque eos suscipit, aut qui in Christo filio Dei duas post unionem naturas agnoscit.* Hunc martyrio pro fide Jacobitica periisse cæsa cervice scribit Autor idem.

TIMOTHEUS
Patr. XXVI.

TIMOTHEUS PATRIARCHA XXVI.

Orthodoxorum Patriarcharum Jacobitarum non meminerunt.

Liberat.
Brev. c. 15.

OMITTITUR à Severo & ab omnibus Jacobitis Proterius Ordinatus post electionem ejus factam in Concilio Calchedonensi, loco Dioscori depositi & relegati. Ut verò de Dioscoro nihil fermè habent in suis historiis, ita neque de Timotheo & ejus successoribus Monophysitis. Severus hæc tantum scribit. Defuncto patre insignique athleta Dioscoro Patriarcha, constituit Christus Dominus Patriarcham ejus loco nomine Timotheum in Sede Alexandrina. Hic mala multa perpeffus est, graviter cum persequentibus

PATRIARCHARUM ALEXANDRINORUM. 121

TIMOTHEUS
Patr. XXVI.

quentibus hæreticis : & cum fratre suo Anatolio, Gangras deportatus est, ubi per septennium in exilio vixit. Deinde per gratiam Dei & mandatum Imperatoris, revocatus est Alexandriam. Ordinatio ejus facta est sub Leone Imperatore. Patriarchalem dignitatem obtinuit annis 22. obiitque 7^a mensis Mefori, hoc est 3^{1a} Julii.

Elmacinus, licet in eadem Jacobitica Secta vixerit, accuratius ejus vitam prosequitur, nec dissimulat scelera suorum hominum. Ita igitur ille. Cùm de morte Marciani Imperatoris, fama ad Alexandrinos perlata fuisset, concursu facto irruerunt in Proterium Patriarcham, qui Dioscoro subrogatus fuerat; eumque occiderunt, cùm annis sex cathedram Alexandrinam tenuisset. Tum Alexandrinum Patriarcham constituerunt Timotheum, qui erat Jacobita, & per triennium sedem obtinuit. Verùm cùm Præfectus quidam Constantinopoli missus Alexandriam advenisset, Timotheus in exilium pulsus est, ordinatusque in ejus locum *Surus* : ita ipse & Euty chius vocant Timotheum Solofaciolum, qui Proterio ab Orthodoxis suffectus est. Quapropter dubitare non possumus quin error irrepsit ex Scriptorum indiligentia in Codices Euty chii, ubi Jacobita fuisse dicitur, id enim perspicuè falsum est. Sedit *Surus* ille, seu Solofaciolus, annis septem; continetque Historia Patriarcharum, nempe illa Severi quam sequimur, rediisse Timotheum, alterum scilicet Jacobitam *Æluri* cognomine ab aliis designatum, ex quo male punctato fecit Pocockius portentum istud *Janurius* : eumque Patriarchatum obtinuisse per annos 22. mortuumque esse 9^a Mefori, cùm tamen Codex Regius habeat 7^{ma} mensis ejusdem : ordinatum fuisse anno Leonis Imperatoris 2^o, multa à Melchitis passum : atque sede sua pulsum, tandemque post annos novem, Imperatoris jussu eidem fuisse restitutum. Eadem ferme habet Makrizius, qui tamen addit Proterii corpus, postquam tumultu ab Alexandrinis excitato occisus fuisset, deportatum in Hippodromo, & igni traditum. Plura in libris Jacobitarum non reperiuntur, quorum majores, tot scelera in legitimos Antistes commissa quæ excusari non poterant, silentio tegere maluerunt : ut nulla quodammodo rerum in tanta Ecclesiæ calamitate gestarum memoria supereffet. Accedit etiam quòd usque ad Muhammedana tempora Hæretici quamvis sæpe Alexandrinam Ecclesiam invaserint, nunquam tamen ita integrè eam obtinuerunt, ut Orthodoxi tam Ecclesiastici quàm Laici ab ea penitus abessent, Verùm

Elmacini
testimonium.

T. 2. p. 1034

per multa & longa intervalla temporum, præsertimque totum illud quod à Justini Justinianique Imperio effluxit, usque ad captam Ægyptum, non modò Cathedram Alexandriæ non habuerunt Jacobitæ, sed nec Ecclesias in quibus sua sibi sacra facerent, habere per Leges Imperatorias illis licuit. Unde coacti sunt recipere se in Thebaidis Monasteria, ubi ad sancti Macarii sedem fixerunt eorum Patriarchæ, usque ad Benjaminì tempora, qui anno demum J. C. 640. ex illis latebris emerfit, & æqualem cum Orthodoxo Patriarcha libertatem dignitatemque obtinuit, quam adhuc successores ejus retinent. Cùm igitur rerum omnium quæ Alexandriæ gererentur, ignari essent exules illi Patriarchæ, & per longa illa exilia Græcæ linguæ usus apud eos obsolevisset, ubi integram à Romanis legibus securitatem nacti sunt, nihil ferme habuere unde præteritorum temporum historiam discerent. Neque enim quantum nobis percipere ex multorum librorum inspectione licuit, quidquam eorum quæ ad Historiam aut ad Theologiam spectant, si sacras Literas, & Officia Ecclesiastica excipimus, Ægyptiacè scriptum fuit, cùm omnes ferme Græcam linguam familiarissimam haberent. Unde, quod ex Severo satis intelligitur, qui Monasteriorum Thebaidis Scrinia & Bibliothecas lustraverat, omnium illorum Patriarcharum à Dioscoro usque ad Benjaminum, sola nomina servaverunt, de rebus eorum tempore transactis, nihil plane sciverunt. Quia igitur quæ ad Historiam Ecclesiasticam attinent, satis à nostris Autoribus explicata sunt obscura illa tempora, leviter admodum attingenda existimavimus, ut ad alia festinemus.

PETRUS PATRIARCHA XXVII.

Petri initia.

TIMOTHEO Patriarchæ qui Ælurus dictus est, Jacobitæ successorem dederunt Petrum, Moggum cognomine, ejusdem hæresis acerrimum defensorem, de quo pluscula quædam quàm de aliis Severus scribit in hunc modum. Mortuo Timotheo ordinatus est in ejus locum Petrus Sacerdos Ecclesiæ Alexandrinæ. Erat tunc Ecclesia Græca, & Romana, (nam vox *Roum* idem hoc loco significat) firmiter constans in continua commemoratione Concilii Calchedonenfis : unde mirum in modum agitata & concussa est, quia non erat fundata supra firmam petram, scilicet Verbum Dei Jesum Christum. De qua re scripsit postea Acacius Patriarcha Constantinopolitanus ad Petrum Ale-

xandrinum, per literas & internuntios petens ut eum ad communionem susciperet, quia Concilium Calchedonenſe contemtu habebat, eoſque qui in eo convenerant hæreticos appellabat: Tomum etiam Leonis plenum blaſphemiâ, & Neſtorii hæreſin damnabat. Petrus ad eum ſcripſit, ut certò ſcîret an verè, ut Acacius ſcribebat, ſentiret. Is literas Petri cùm accepiſſet, valde lætatus eas oſtendit omnibus qui eas videre vellent, Orthodoxam, hoc eſt Jacobiticam, fidem proſitentibus. Poſtea ſcripſit Synodicam Epiſtolam ad Petrum; ita autem vocant Arabes Chriſtiani in hiſtoriis ſuis, Epiſtolas quas novi primarum Sedium Epiſcopi ad alios ſcribebant, & in quibus Confeſſio fidei continebatur. Id cùm Epiſcopi quidam abſentes, cùm illæ inter utrumque Patriarcham literæ com̄earent, accepiſſent, magnopere indignati ſunt, ſatana diſcidiū occaſionem inde ſubminiſtrante. Eorum præcipui fuerunt Jacobus Epiſcopus Sa, & Mennas Epiſcopus *Moniet Tama*; qui venerunt Alexandriam, dixeruntque Petro Patriarchæ: Quomodo ſuſcepiſti Acacium, cùm ex eorum numero ſit qui Calchedonenſi Concilio interfuerunt? Ille id ſe feciſſe dixit, ut eum à priſtina ſua opinione ad confeſſionem Orthodoxæ fidei reduceret, multa addens ad eorum animos demulcendos, ſimulque literas ejus oſtendens, quibus ſinceritas confeſſionis ab eo factæ apud illos conſtaret, tum etiam affirmans ſe ad illud miſiſſe Epiſcopos qui ex illius ore eam exciperent, ſecundùm Eccleſiæ Canonem. Verùm illi ſuperbiâ inflati, ejus excuſationes non receperunt, ſed ſchiſmate factò ſeparaverunt ſe à communione Throni Apoſtoli D. Marci Evangeliſtæ. Unde cùm ſenuntiaſſent obedientiæ Petri Patriarchæ, vocati ſunt ab Orthodoxis *Acephali*. Ita Severus, & illorum Acephalorum mentio deinceps occurret in hac Hiſtoria ſub Marco Patriarcha 49°, qui ordinatus circa an. Heg. 193. J. C. 808. ſedit annos viginti: & Epiſcopos duos, quos eadem ſectâ ad illa uſque tempora tanquam unicos Antifiſtes Religionis Chriſtianæ retinebat, ad Eccleſiam Jacobiticam reduxit, ſimul cum plebe illis ſubjecta quæ *Bani Chemuſa*, ſeu Barſanuphianorum cognomine designabatur.

In illis verò quæ ex Severo relata ſunt inter falſa multa, occurrunt nonnulla quæ veritatis indicia præferant, ſed multis modis contaminatæ. Agebatur enim de Zenonis Imperatoris *Henotico*, quod cùm Petrus Moggus ſuſcepiſſet, ea ſola ratio concordiæ fuit inter eum & Acacium Conſtantinopolitanum, qui eo

Acephali.

nomine non modò male apud Catholicos audiit, sed Romanorum etiam Pontificum communione privatus est; adeo ut Ephremius, ejus post Flavitam hæreticum successor, ea caruerit, quòd ejus nomen ex Diptychis tollere recusasset, quæ multorum inter Occidentalem & Orientalem Ecclesias discidorum causa fuit.

Quod verò à communione Petri ob susceptum *Henoticon*, & dissimulatam Concilii Calchedonenfis damnationem, ex Monophysitis plurimi se subtraxerint, docent accuratè Liberatus, Leontius, & alii Autores Ecclesiastici. Quod illos qui ultra trecentos annos in eo schismate perstiterant, Episcoposque qui Patriarchis Jacobitis non communicarent habebant, *Barfanusianos* vocent Arabes Christiani, erratum videtur: nam eo nomine singularem quamdam illius sectæ partem significari testatur Anastasius qui de Barfanuphio quodam erroris singularis architecto loquitur.

Addit Severus Petrum multa ab hæreticis, hoc est Calchedonenfis fidei defensoribus, passum fuisse; sede sua expulsus, in qua collocati fuerunt Timotheus, & quidam alii, sed quorum nomina ita deformata sunt, ut agnosci non possent, nisi aliunde de illis constaret: tandem Sedi suæ restitutus est: seditque annos 8. Obiit 2^a mensis Athyr aut 4^a, ut Elmacinus scribit. Opera ejus servari dicit Severus in Monasterio D. Macarii, ex quibus recenset tantum Epistolas, quarum una est ad Zenonem Imperatorem cum ejus responsione: Orationes aliquot, & Liturgiam. Operum illorum fragmenta quædam occurrunt in Collectaneis Testimoniis, de quibus antea dictum est. Liturgiam habent ejus nomine Syri Jacobitæ, etsi in antiquis Codicibus Petro Principi Apostolorum attribuitur. At in Coptitarum Codicibus, talis occurrit omnino nulla. Obitus ejus in Annalibus Ecclesiasticis anno J. C. 490. assignatur, & Sedem Alexandrinam annis 13. occupasse dicitur. Cave autem ne cum Kircherò existimes Petrum illum Gnapheum esse: is enim Antiochenus fuit, non Alexandrinus, Jacobitarum Episcopus. Chronicon Abulbircat annos 7. menses 2. Kircherianum annos 9. Makrizius annos 8. menses 7. Elmacinus annos 8.

ATHANASIUS PATRIARCHA XXVIII. ATHANASIUS
Petr. XXVIII.

DE isto Patriarcha Petri Moggi successore ejusdemque hæresicos defensore nihil ferme habet Severus. Mortuo, inquit, Petro ordinatus est in ejus locum Athanasius Ecclesiæ cujusdam Alexandriæ præpositus, vir bonus, & plenus Spiritu sancto; qui munere sibi credito præclare functus est. Nulla ejus tempore persecutio, turbæ nullæ Ecclesiam agitarunt: sedit annos 7. obiitque 20^a mensis Toth. Indiculus Kircherianus 20. Pontificatus annos illi assignat, initiumque anno J. C. 486^o, quadriennio ante prædecessoris mortem. Elmacinus annos 7. Catalogus apud Abulbircat annos 2. menses 9. Makrizius 7. quoque annos: tanta est Autorum diversitas.

Ejus meminerunt Autores omnes Ecclesiastici, qui etiam Heretico cognominatum esse testantur, sed ejus non minus apud Orthodoxos quàm apud Hæreticos obscurissima memoria est. Obitus ejus vulgò assignatur an. J. C. 497^o. Memoria ejus celebratur apud Coptitas 9^a Toth, ut patet ex Calendario apud Abulbircat: nam illius quod à Ludolfo confectum est, quasi recepto apud Æthiopes, nulla autoritas est, cum ex Seldeniano Arabico & Synaxario constatum sit: unde de eo cum aliis conciliando non est laborandum.

*Hist. Patr.
Alex. n. 320.*

JOANNES PATRIARCHA XXIX. JOANNES
Petr. XXIX.

DE eo ita Severus. Postquam obiit Athanasius junior, ordinatus est Patriarcha Joannes Monachus, qui Patrum prædecessorumque suorum secutus est exempla. Illius tempore Ecclesia, plebs urbana, & deserti incolæ, hoc est Anachoretæ, in summa pace vixerunt sub Zenone Imperatore, quem veluti suæ sectæ addictum magnis laudibus Jacobitæ prosequuntur; adeo ut memoria ejus occurrat in aliquibus Calendariis.

Aiunt Zenonem suo tempore constituisse, ut ad Monasterium S. Macarii in Valle Habib, quod Canopi vocant Liberatus, & alii, quotannis deferretur quantum farinæ, vini & olei ad sustentandos monachos satis esset. Mortuus est sub eodem Imperatore 4^a mensis Pachon, cum sedisset annos 8^o. Elmacinus qui eadem ex Eutychio refert, eundemque obitus diem, ait tamen ordi-

JOANNES
Patr. XXIX.

126

HISTORIA

natum eum fuisse 6^o anno Anastasii, sedisseque annis 9. Abulbircat 5. Kircherus tribus, Joannis nomine appellatis decem annos tribuit, quod stare non potest. Nam duo tantum hæretici fuerunt; Joannes Talaia ejectus à Petro Moggo, Orthodoxus fuit. Elmacinus an. 9. numerat, vacasseque ait sedem anno uno post ejus mortem.

Joannes is *Mela* cognominatus est, suscepitque Zenonis Henoticon; & anathema dixit Concilio Calchedonensi, Leoni Papæ, & aliis Orthodoxis Episcopis, ut ex Liberato intelligitur. Obitus ejus incidit in an. 16. Anastasii Imperatoris, J. C. 507. cum sedisset annos novem, ut ex Nicephoro & aliis colligit Baronius. Fallitur autem Severus cum ejus Pontificatum collocat sub Zenone. Sedisse annos 9. testatur quoque Eutychius.

T. 2. p. 133.

Memoriam ejus celebrari apud Coptitas eodem quo obiit die 4^a Pachon, hoc est 29. Aprilis, testatur Kalendarium eorum.

JOANNES
Patr. XXX.

JOANNES ALTER COGNOMINE RECLUSUS, PATR. XXX.

ITA vocant eum Arabes seu *Habis*, quæ vox propriè eos Monachos significat quos Græci ἡγλεισμοί, nostri Latini *Reclusos* appellant. Neque alia nominis etymologia quærenda est, aut ex sententia Ludolphi existimandum verbum Arabicum quod hic usurpatur, ita intelligendum quasi significet *Semet devovere* vel *Deo dicare*. Significat vox *Habis* Monachos qui in singularibus cellis vitam ducebant, οἱ δὲ Θεὸν ἡγλίσαι καὶ συνωτᾶν τοὺς οἰκιστοὺς κατ'ἰδίαν αὐτοῖς: de quibus Cangius in ea voce Glossar. Græco-Barbaro, & in Latino voce *Inclusi*. Illum Liberatus *Maciotam* vocatum ait, ubi vetera quædam exemplaria legunt *Nikiotam*, & rectè; nam Nikious urbs Ægypti, à qua cognomen habuit: Nikiotam quoque appellat eum Theophanes, & ita Kalendarium Copticum. De eo ita Severus.

Hist. Patr.
Alex. p. 61.
No 323.

Postquam decessisset Joannes Patriarcha, ordinatus est ejus loco vir reclusus, nomine quoque Joannes, qui defunctum cognitione attingebat. Scripsit libros & orationes complures. Cum verò nulla omnino scriptorum hujus Joannis Patriarchæ memoria, quantum adipisci legendo potuimus, apud Coptitas aut alios Jacobitas occurrat, existimamus alium elici sensum ex Severi ver-

bis posse; nempe ut ejus sententia sit scripta fuisse sub illius Pontificatu permulta ad Jacobiticæ fidei defensionem, & Orthodoxorum Calchedonensis Concilii defensorum impugnationem. Eo enim sane tempore cum præcipui Monophysitarum Theologi floruerint, Severusque Antiochenus, præ reliquis omnibus plura scripserit, quorum adhuc in Catenis aliisque Græcis Collectaneis fragmenta reperiuntur, præter illa quæ apud Græcos cum Autoris sui memoria perierunt, & apud Syros Arabesque conservata sunt, ad ea potius quæ communi totius Ecclesiæ Jacobiticæ nomine prodierunt, quàm ad singulares Joannis Patriarchæ lucubrationes, Severum respexisse verisimile est.

Eo tempore ut Severus prosequitur, mirabilia multa contigerunt, conspirantibus simul ad Ecclesiæ defensionem Imperio & Sacerdotio, Anastasio nempe Imperatore & Severo Antiocheno Patriarcha, qui, inquit, sedens super Thronum magni Ignatii, factus est cornu salutis Ecclesiæ Orthodoxæ: hoc est sectæ Jacobiticæ. Scripsit Severus Literas Synodicas ad Joannem Alexandrinum, de communione fidei, quibus significat consensum cum illo suum circa unam fidem Orthodoxam, quam sancti Patres tenuerant. Eas literas suscepit Joannes cum Episcopis suis, atque illas publicè legi per totam Ægyptum in Ecclesiis curaverunt; gratiasque Deo egerunt, qui divulsa Ecclesiæ membra in locum suum restituisset. Respondit deinde Joannes Severo, per literas Orthodoxâ doctrinâ secundum sanctorum Patrum regulam plenissimas, quæ cum honore & gaudio susceptæ sunt. Sedit Joannes Nikiota annis 11. obiitque 27^a mensis Pachon. Huc usque Severus. Ex eo vero primum tempore initium habuit consuetudo mutuarum de fide Epistolarum inter Alexandrinos Antiochenosque Patriarchas Jacobitarum, quæ per sæcula subsequenter perseveravit, & nisi fecerunt nos peregrini ex Oriente de ea re interrogati, etiamnum observatur. Synodicas, ut suprà dictum, est vocant illas Epistolas; atque antiqui moris fuit, ut in ista historia sæpè observabitur, mitti illas per Sacerdotes, & aliquando per Episcopos, qui Patriarcharum suorum nomine communis Jacobiticæ fidei publicam in Ecclesia professionem facerent.

De Severo
Antiocheno.

De illo Joanne nihil habet Eutychius, nisi quod alteri Monacho suffectus fuerit, & annos 11. sederit, Jacobitarum fidei professor. Consentit Elmacinus qui præterea ordinationem Severi

Antiocheni refert ad illius tempora, & de mutuis Epistolis eadem cum Severo scribit. Ita de annorum numero Makrizius. Indiculus Chronicus apud Abulbircat contra alios Autores annos Episcopatus sex tantum numerat cum mensibus 11. ordinatumque fuisse testatur an. Martyrum 234°. obiisse ejusdem Epochæ an. 240°. qui numerus respondens an. 524°. Æræ Christianæ stare non potest. Nam obiisse Joannem an. 516°. communis opinio est: anni autem Martyrum in libris Christianorum, præsertim vero in isto Indiculo, ita turbati sunt, ut revocari ad Canones Chronologicos nequeant, quod ex multis locis comparatis manifestum est.

Joannem istum suscepisse Zenonis Henoticon, sed simul anathematizasse Synodum Calchedonensem & Leonis Tomum testatur Liberatus & alii: atque ea de causa cum Anastasio Imperatore non plane consensisse: quod Jacobitæ silent. Utriusque tamen memoria celebratur, Joannis quidem 27^a mensis Pachon, quo die obitus illius contigisse scribitur: atque ita legitur eo die in Calendario Coptitarum, Joannis Nikiositæ Patriarchæ Alexandrini: unde emendari, ut videtur, debet nomen Machiotæ pro quo, ut supra dictum est, Niciotæ legitur in aliis Codd. in Calendario Nikiositæ. Anastasii Imperatoris memoria fit 13^a mensis Atyr, his verbis *Anastasi Imperatoris*, Φιλοχριστῶ. Ita vocatur in libello Archimandritarum, in vita S. Sabæ per Cyrillum.

Coel. 1. 3.
p. 314.

Refert Eutychius, & qui cum exscripsit Elmacinus, testimonium ejus adducens, Eliam Patriarcham Hierosolymitanum scripsisse Anastasio Imperatori, ut cum ad Catholicam fidem reduceret: misisseque Sabam illustrem Archimandritam cum aliis. Hæc fuisse & accuratè scripta leguntur in ipsius Sabæ vita per Cyrillum Scythopolitanum, quam legisse Eutychium & quosdam alios verisimile est.

Addenda unica observatiuncula de nomine Joannis hujus, qui Machiotas dicitur fuisse cognominatus. At ut dictum est, cum esset Ægyptius, vera lectio videtur esse Nikiotas, ut in aliis Codd. scribitur: quam lectionem adjuvat id cognomen notatum in Calendario, Nikiousi. Ita enim constat gentilicium esse à patria, nempe Nicio seu Νίκιον. Stephanus Νίκιον καὶ μη ἀγρόπτη... ὁ οὐκ ἄπορ νικίωτης. Νικίως scribit Copticum Onomasticum & Ragotum seu Ragdam aliter dictam. Neque est cur cum viro doctissimo

P. 206.
Not. ad Stephan.
p. 101. de Urb.

Luca

PATRIARCHARUM ALEXANDRINORUM. 129

JOANNES
Patr. XXX.

Luca Holstenio dubitemus, an *Niciu* sit pars nominis. Suadere id poterat gignendi casus, nisi obstaret similis Ægyptiacorum locorum appellatio, ut in *παπας*, Panopolis *αντιπολις*, Antinoopolis, & alia: à *Νικίου* igitur juxta Arabicam analogiam formatur *Nikioufi*, ut ab eodem nomine juxta Stephanum *Nikioume*; quod verum cognomen Joannis hujus à patria fuisse videtur potius quàm *Machiota*: nam Arabes legisse *Nakis* indicat forma nominis *Nikioufi*, quæ respondet Græcæ, ita à *Merou* urbe Chorasanae *Meroufi*, & alia ejusmodi.

De Severo Antiocheno multa scribunt Jacobitæ, inter quos post Cyrillum quem frustra erroris sui patronum existimant: postque Dioscorum Alexandrinum præcipuo honore colitur. *Patriam ejus Sozopolin tali cive gloriari* canunt in Horologio suo Syri Jacobitæ: ejus pro fide certamina non modò adversus Justinum & Justinianum Calchedonensesque, hoc est Orthodoxos, commendant: sed etiam quod *somnia phantastica Juliani Halicarnassæi confudit*. Ejus memoria est in Diptychis Liturgiis Ecclesiæ Alexandrinæ: & singularis solennitas 7^a mensis Tori cum commemoratione Dioscori. Uteum plurima scripsisse constat ex Græcis Autoribus, fragmentisque variis quæ ex ejus libris excerpta sunt in Catenis manuscriptis & editis, ita multa occurrunt in Jacobitarum Tractatibus Theologicis ejus testimonia. Laudatur præcipuè ejus Epistola ad Anastasium Imperatorem, quam is, inquit, acceptam in Thesauro Imperiali seu Bibliotheca deposuit, ut esset in Ecclesiâ, tanquam fidei lex, quâ contrariæ opiniones destruerentur. Item alia Epistola ad Julianum Halicarnassæum: Sermo in verba Ps. 21. *Deus meus, quare me dereliquisti?* Synodica ad Joannem Patr. Alexandrinum: Responsio ad Theodosii P. Alexandrini Synodicam, & multa alia, quæ *σολύγωρον* fuisse Severum demonstrant. Sanè longè plura, quàm quæ indicantur ab Arabibus, cum scripsisse solis Seguierianæ Bibliothecæ Codicibus confirmatur: quorum longum indicem confecit vir eruditissimus D. Bernardus de Montfaucon.

Severi memoria & scripta.

Herol. Ms. Syr.

DIOSCÓRUS JUNIOR PATR. XXXI.

Diosc. Jun.
Patr. XXXI.

POSTQUAM Joannes Niciota diem suum obiisset, ejus loco à Jacobitis constitutus est Dioscorus Junior, de quo hæc habet Severus. Joannes à secretis & epistolis habuerat virum omnibus animi dotibus insignem, pium, humilem, Dioscorum nomine, cui inter Ecclesiasticos similis erat nullus: illum igitur Alexandrini or-

Hist. Alex.
p. 326.

dinaverunt sibi Patriarcham. Statim atque in sede D. Marci collocatus est, scripsit ad Severum Antiochenum Synodicam de communi fide Epistolam, significans simul de obitu Joannis Patriarchæ, suæque in ejus locum ordinatione. Respondit Severus, consolando eum de obitu decessoris sui, adjungens quæ magis opportuna videbantur ad confirmandum eum in fide Orthodoxa, hoc est Jacobitica: monensque ut in docenda plebe sibi commissâ esset assiduus. Sedit Dioscorus an. 3. vel ut habet alia ejus vita, annum unum, menses sex; obiitque 17^a mensis Paophi, seu Babæ. Elmacinus qui nihil habet præterquam ejus nomen & successionem post obitum Joannis, sedisse ait illum annos 2. menses 5. atque ita Makrizius. Chronicon an. 2. dies 146. Abulbircat an. 2. menses 4. obiisseque anno Martyrum 144^o, 17^a Paophi: J. C. 528^o, qui etiam numerus ut alii propè omnes Chronologici stare non possunt in illa Epocha, quocumque tandem modo initium ejus deducatur. Eutychius constitutum fuisse Patriarcham Dioscorum Juniorem scribit anno Anastasii Imperatoris 26^o: atque ita Elmacinus. Hic annus est Christi 516^o: atque ita conveniunt Orientales, modò calculos suos rectè instituant cum antiquis Autoribus qui eo anno obitum Joannis Niciotæ prædecessoris ejus assignant. At annus J. C. 516^o, si Æræ Diocletiani, ut debet, initium ducatur ab anno J. C. 284^o, respondebit anno Martyrum 232^o. Si ab anno 276^o, ut vult Eutychius, respondebit anno eorundem 240^o: atque ita absque melioribus Codicibus emendari numeri, qui toto hoc Canone Chronico exhibentur, non possunt.

Liber. 4. 18.
 19.

Atque hæc nec plura docent nos Orientales de Juniore Dioscoro, quem Liberatus scribit mortuum fuisse, cum Severus Antiochiâ pulsus Alexandriam venit: nempe 2^a Justinî Imperatoris anno, secundum Baronii sententiam, cum sedisset annos tres. Dioscorum porro tanquam acerrimum Calchedonenfis fidei hostem repræsentant Autores omnes Ecclesiastici. Cum autem non modò suscepisset Zenonis Henoticon, sed Synodo etiam Calchedonenfi anathema dixisset, gesta que apud Defensorem civitatis coram eo confecta essent, in iis testatus est *in expulsiōne Synodi se suscipere Edictum*. Verba Liberati sunt, quorum sensus est, Dioscorum Henoticon suscepisse, sicut ejus ad Petrum usque Moggum Monophysitæ antecessores: sed præterea actis publicis apud Defensorem testatum voluisse, se non aliter nec alio sensu Henoticon suscipere, quàm ita ut intelligeretur anathematizare se & rejicere Synodum Calchedo-

PATRIARCHARUM ALEXANDRINORUM. 131

DIOSC. JUN.
PATR. XXXL

nensem. Unde, ut idem Autor prosequitur, *cum satisfactum fuisset his, qui propter Petrum Moggum, extra illam Ecclesiam communicabant, adjuncti sunt ei. Nam usque ad istum Dioscorum in divisione erat Alexandrina Ecclesia.* Contraria tamen prorsus est Jacobitarum traditio, qui ut superius in Petri Moggi vita dictum est, eos qui secessionem ab illo fecerant, eò quòd suscepto Henotico, non satis Synodum Calchedonensem condemnasse videretur, diu adhuc privatos conventus egisse, neque ante Marci XLIXⁱ Patriarchæ tempora ad Jacobiticæ Ecclesiæ communionem rediisse testantur. Quamvis ita scribunt Orientales: major tamen omninò videtur Liberatori auctoritas, quàm Arabum omnium. Unde facili fieri potuit, ut cum essent inter ipsos Jacobitas schismata admodum varia, illud quod Marci Patriarchæ curâ compositum est, non tam Accephalos illos veteres spectaret, quàm alios, nempe Barfanuphii sectatores, ut ab ipsis Arabibus *Accephali* illi appellantur.

In Calendario Coptitarum, nulla die 17^a Paophi occurrit ejus memoria.

TIMOTHEUS PATRIARCHA XXXII.

TIMOTHEUS
PATR. XXXII.

IS est quem Jacobitæ statim post Dioscori Junioris mortem Patriarcham Alexandriæ constituerunt, vivente adhuc Anastasio; etsi jam cum obiisse ex certioribus monumentis constare videatur. De eo hæc Severus.

Patriarcha Alexandriæ Timotheus constitutus est, obiitque Anastasius Imperator fidelis. Ejus loco imperium capessivit vir quidam impius & hæreticus, nomine Justinus, qui statim omnem conatum adhibuit, ut fideles Orthodoxos, hoc est Jacobitas, reduceret ad fidem Concilii Calchedonensis. Primum igitur jussit Severum Antiochenum comprehendi, deinde privata sua auctoritate convocavit Synodum, Constantinopolin. Aderant Patriarcha Romanus: Apollinarius Patriarcha Alexandrinus ab Imperatore creatus, & Eutychius Constantinopolitanus, cum subiectis eorum jurisdictioni Episcopis. Misit quoque ad Severum Antiochenum, invitans eum ut cum Episcopis suis adesset, existimans se blanditiis effecturum, ut cum Orientalibus fidem Calchedonensem approbaret. Severus Constantinopolin libenter profectus est, sperans confirmaturum se fidem contrariam, Imperatoremque ad suam sententiam pertracturum. Ubi Constantinopolin advenit, magno honore susceptus est,

De Justiniano Imperatore Severi insula narratio.

frustra que ab Imperatore ad mutandam fidem tentatus, in ea retinenda constantissimus fuit. Cum verò ad conventum Episcoporum invitaretur, negavit se adfuturum, nisi definitionem Concilii Calchedonenfis, Leonisque Tomum condemnarent. Eâ causâ magnam ab Imperatore persecutionem sustinuit: & post annos duos intercedente Theodora Imperatrice fidei, in sedem suam restitutus est. Cum verò in exilium pulsus foret, venit Alexandriam cum multis Episcopis Orientalibus, sedem obtinente Timotheo. Eodem tempore venerunt Episcopi alii in eandem urbem, qui sanctimoniales multas ex Monasteriis eiecerunt. Severus interea fugere coactus est ex urbe una in aliam, modò latens, modò prodiens in publicum: monasteriaque diversa pertransiens. Ex fuga tamen & exilio plurimas ad Episcopos suæ sententiæ Epistolas scripsit, quibus eos & ad fidem suam conservandam, & ad ferendas alacriter calamitates hortabatur.

Julianus
Halicarnasensis.

Erat inter fugitivos illos Episcopos Julianus quidam, non tamen Episcopus, qui odium Calchedonenfis Concilii præ se ferebat, negans se illi communicare, eò quòd Episcopi qui in eo convenerant, unum Jesum Christum divisissent, dum in illo duas post unionem, naturas esse statuerant. Is observata occasione cum Severus abesset, libellum edidit, in quò renovabat Eutychis, Apollinarij, Manetis, Eudoxijque blasphemias, accedens ad eorum sententiam, qui phantasticam solummodo fuisse existimabant passionem Christi Domini, atque adeo veritatem illius negabant. Eum libellum Julianus ad Monachos & Anachoretas per totam Ægyptum misit, à quibus avidè susceptus est, septem exceptis qui voce divinitus lapsa, de doctrinâ quam continebat impietate moniti, eum rejecerunt. Alii errore infecti, in septem illos impetu facto, duos ex illis occiderunt: ipsi seorsim in cellis suis apud S. Macarium sacra faciebant, quinque reliquis indefessè laborantibus, ut eos ad sanio rem mentem reducerent. Severus scriptis ad omnes literis Julianum condemnavit, tanquam draconem pessimum; & eos qui ejus fallacis decepti fuerant, ab errore revocavit. Magna tamen inde in Ægypto, aliisque provinciis turbatio fuit, quæ nonnisi difficulter composita est.

Eo tempore obiit Timotheus firmus in fide Jacobitica, pro qua multum decertavit, simul cum Severo Antiocheno. Sedit annos 17. obiitque 13^a mensis Mechir: neque de eo plura Severus: cuius narratio quàm obscura & imperfecta sit, satis quisque intelligit.

PATRIARCHARUM ALEXANDRINORUM. 133

TIMOTHEUS
Patr. XXXII.

Quæ enim sub Justiniano gesta sunt, Justiniani temporibus assignant errore apud eos satis frequenti, Orientales Historici : nam Justinianum à Justino non distinguunt, nisi quòd illum Juniorem appellant, & utrumque nomen pro eodem habent. Porro Constantinopoli Concilium convocatum fuisse certum est 1^o Justiniani anno, quo Severus cum aliis damnatus est : sed quàm diversa sit narratio Jacobitarum ab ipsis ejusdem Actis quæ inserta sunt Actis Concilii sub Menna an. 536^o congregati, satis apparet : integram eorum temporum historiam scribere oporteret, ad illustranda pauca illa quæ Severus retulit, quod in rebus notissimis inutile prorsus foret.

Severum in Ægyptum venisse non solum in libris historicis consignatum habent Jacobitæ, sed in Calendario etiam Ecclesiastico Coptitarum, ubi 2^a mensis Paophi, hoc est 29. Septembris, celebratur commemoratio adventus ejus in Ægyptum. Juliano Haliarnassæo non Severus modò, sed etiam Officia Syrorum Jacobitarum inter hymnos ad Severi festum recitandos, non *ἀφ' ἁπαρδὸς καὶ τῶν* hæresin quæ propria ejus erat, attribuunt, sed *Phantasiaistarum*, quam Apollinaristarum, Eutychis, Manetisque volunt esse similem : atque eo nomine anathemata multa in eum conjiciunt. De aliis hæresibus ex eadem Severiana colluvie propagatis, Agnoetarum, & Tritheitarum pauca scribunt. De studio Theodoræ Augustæ erga Severum & Severianos multa Baronius ad an. 535. at restitutum Sedi Antiochenæ ejus opera Severum non legimus.

Severi ingressus in Ægyptum.

Liber. c. 19.

Obitus Timothei assignatur ab eodem an. J. C. 535^o. Justiniani Imperatoris 9^o. De numero annorum Pontificatus, & die obitus consensit Elmacinus. Abulbircat in Catalogo suo an. 16. menses 6. numerat : annumque assignat 260^{um} Martyrum, quod nulla ratione cum vera Chronologia conciliari potest.

Timothei Junioris Patriarchæ Alexandrini commemoratio assignatur in Calendario Coptitarum 13^a Amschiri, seu Mechir.

Ad hanc historiam referenda sunt quæ de Jacobo Severi discipulo scribunt omnes fere Historici. Zanzalum eum appellat Nicephorus : *Baradeum* vulgò Orientales, quæ vox ex qua *Baradatus* quam Græci usurpant, originem habet, eum significat qui centonibus confutam vestem haberet, qualis erat Jacobi illius. Ab eo nomen accepisse Jacobitas multorum sententia est, quos tamen Elmacinus hallucinari testatur, etsi ejus testimonium suspensissimum est, nec cum aliorum antiquiorum autoritate comparandum. Illum porro Jacobum, totam Syriam circumeuntem, venena doctrinæ

Jacobus Zanzalus.

L. 18. c. 52.
Eutych. l. 2.
p. 144.

Severi, Dioscori & Eutychis, Mesopotamenis, Armenis, vicinisque populis inspirasse testatur Eutychius Alexandrinus. Multos ab eo Sacerdotes ordinatos fuisse & Diaconos usque ad octoginta scribit Amrus Matthæi filius Nestorianus. De eo Severus alibi, Isā filius Zaraa, Elmacinus, & omnes ferme qui de Jacobitarum rebus scripserunt.

Cædes Ale-
xandriz,
Eutych. l. 2.
p. 152.

Ad istius Patriarchæ Timothei tempora referunt plerique Historici, Melchitæ & Jacobitæ, magnam cædem Alexandriæ factam, occasione illius ordinationis, quæ invito Justino sive Justiniano facta fuit. Aiunt scilicet missum è Patriciis unum Apollinarium nomine, qui esset Alexandrinus Patriarcha. Cùm verò à Jacobitis, quorum magna erat autoritas, non susciperetur, adjunctum illi militare præsidium, quo stipatus urbem habitu Patricii ingressus est, & ad Magistri militum ædes divertit. Ibi expectata occasione diei solennis, quo populus ad Ecclesiam convenire debebat, præsidium ita disposuit, ut copiarum pars ad fores Ecclesiæ staret, alia lateri ejus circumfusa eum sequeretur, tertia variis in locis collocata dato signo conveniret. Itaque Apollinarius in publicum procedens, Patricii ornatu venit in Ecclesiam; & cùm ambonem conscendisset, solutis fibulis quibus paludamentum militare astrictum erat, apparuit indutus veste Patriarchali. Tum cùm ad populum pauca verba fecisset, protulit *Tomum* seu Definitionem fidei factam in Concilio Calchedonenſi, eumque legere coepit. Inde ortus est tumultus ingens clamantibus Alexandrinis, se talem fidei Confessionem non suscipere. Apollinario signum militibus dante, illi continuò in multitudinem inermem irruentes, tantam in Ecclesia stragem fecerunt, ut sanguis eam inundaverit, adeo ut ad genua usque pertingeret. Ducenta hominum millia in Ægypto caesa esse jussu Apollinarii vulgò scribunt, eorum qui Fidem Calchedonenſem suscipere recusabant. Cæteri dilapsi in varias regiones se receperunt; quorum plerique, præsertim Ecclesiastici, in Monasteriis latitaverunt, præcipuè in Valle Habib ad S. Macarium; unde Eutychio teste, Cathedra Patriarchæ Jacobitarum eò translata fuit, usque ad Muhamedana tempora. Historiam verò cum diversis aliquot circumstantiis recitat, & sub Justiniano refert: cùm è contrario Elmacinus eam ad ultima Justiniani tempora referat: affirmetque Apollinario *Tomum Fidei Calchedonenſis* acceptare cogenti omnes ferè Jacobitas obtemperasse, atque adeo magnam illorum Ecclesiæ vastitatem contigisse. Attamen hæc omnia ad sequentis Pa-

T. 2. p. 156.

PATRIARCHARUM ALEXANDRINORUM. 135

triarchæ tempora referenda potius videntur esse, cum turbæ illæ Alexandrinæ majores prorsus sub Theodosio Patriarcha quàm sub Timotheo fuerint : nempe si quæ de Apollinari narrantur vera sunt, nam ille non nisi longè post obitum Timothei Alexandrinam Sedem occupavit, scilicet an. 551^o.

De Joanne Grammatico cognomine Philopono scribit Elmakinus eum sub Timotheo vixisse, deque divinis personis novum errorem publicasse, nempe quod Pater, Filius & Spiritus tres Dii essent, tresque naturæ, quas una substantia comprehenderet. Ita de eo Græci Latinique Scriptores.

Sub Anastasio Imperatore atque adeo circa hujus aut præcedentis Patriarchæ tempora additam fuisse scribunt Jacobitæ à Petro Cnapheo Antiocheno, ultimam Trisagio clausulam *Qui crucifixus est pro nobis*, quam deinde Jacobitæ Coptitæ in sua officia transulerunt. De ea Severus, Isa filius Zaraa, Abu Raïta Takritensis in singulari opusculo, Ebnassalus & alii : quorum sententiæ cum Græcorum & aliorum Melchitarum doctrina comparatæ, à nobis expositæ sunt in singulari de Trisagio Jacobitico Dissertatione. Videnda etiam excerpta ex Ephræmio Antiocheno apud Photium, & Epistolæ plures quæ extant in Collectione Conciliorum, & editæ primùm fuerunt cum Actis Constantinopolitani sub Meuna : de quibus tamen dubitant eruditi.

Eam porrò novitatem in hymno Ecclesiastico introductam magno Christianorum aliorum scandalo, ab Anastasio Jacobi Severique consilio scribit Maris Nestorianus, & ex eo Amrus Mathari filius in vita Acacii, quem Catholicorum suorum 22^{um} numerant. Addunt Severum, cum undique pelleretur, substituisse in quodam Monasterio ab Eutychiis aedificato : atque ad illud baptisimatis recipiendi causâ convenire solitos omnes Jacobi, Severique Sectatores, nec alibi suscipere voluisse, quod existimarent fidem ubique corruptam ob duarum naturarum confessionem, definitam in Concilio Calchedonenfi. Severus à sectæ suæ Episcopis adjutus, Antiochenam Sedem invasit : habitoque eorum concilio, anathema pronuntiavit in eos qui duas naturas assererent. Inde ad omnes Christianos, præsertim Persidis, litteras misit, ut eos ad fidem suam amplectendam hortaretur. Jacobus Serugenis qui prius fidem Orthodoxam, hoc est, ut ipsi existimant Nestorianam, sequebatur ; & in Schola Edessena literis eruditus Barsomam Nisibenum Metropolitam condiscipulum habuerat, cum vidisset Imperatorem

TIMOTHEUS
Patr. XXXII.

Joannes
Grammaticus.
Phot.
Cod. 55.
Abulfarag.
Hist. Dynest.
p. 114.

Joann. Damasc. l. 1. p. 103.
Nov. Ed.
Leant. de Sect. Ali. 5.
Additio
Trisagio facta.

Phot. Cod.
228.

De Severo
Nestorianorum traditio.

Anastasium propensum in Severi sententiam, eam amplexus est, multosque tractatus edidit ad illius opinionis confirmationem.

Idem Nestorianus autor docet, magnam à Phirouzo, seu ut Græci vocant Pherose Persarum Rege, Jacobitarum eadem factam, præsertim Takriti, Mansilæ, & in vicinis regionibus, multos poenarum metu Fidem Christianam abnegasse, & Magicam sive Perlicam superstitionem professos fuisse. Eisdem ab Acacio Catholico suo excommunicatos fuisse testatur. De Jacobo Baradæo præter ea quæ superius dicta sunt, ab iisdem Nestorianis proditur ipsum, cum simplex sacerdos esset, Georgium & Sergium socios suos ordinasse Episcopos, à quibus vicissim renuntiatus sit Catholicus: quæ tamen dignitas nondum erat in rerum natura, cum Jacobus turbare Orientem cœpit, ut alibi dictum est.

Meminerunt Autores iidem Conciliorum adversus Severianos Jacobitas, Hierosolymitani, triginta Episcoporum sub Joanne Patriarcha: Tyrii Episcoporum quadraginta: Constantinopolitani, Episcoporum quadraginta trium, à quibus damnati Severus, Jacobus, eorumque Sectatores Monophysitæ. De iis Synodis videnda Acta Concilii Constantinopolitani sub Menna & alterius Oecumenici. Cum Justinianus edicto suo illos hæreticos exilio damnaasset, multi in Syriam & Mesopotamiam venerunt: cum quibus aiunt disputasse Mar Abdam celebrem Monasterii Rectorem, & Silam qui Catholicatum obtinuit, & aliquos ad duarum naturarum sententiam reduxisse. Hæc sunt quæ ex Nestorianorum memoriis excerpta ad hanc historiam pertinere visa sunt.

De controversiis de corruptibili & incorruptibili Christi corpore, mirum nihil à Severo aut à reliquis scriptum fuisse: quicquid enim ad illam inter Monophysitas agitatam litem spectat, videntur Arabes scriptores ad Juliani phantasticas ut vocant opiniones retulisse: ea porro ex Græcis Latinisque Autoribus plenius illustratur.

Liber. c. 19.
H. fl. Patr.
s. 337.

CUM Theodosii istius apud Orientales historia turbatissima sit, adeo ut intelligi vix queat, eam prius ex Liberato qui vicinus illorum temporum fuit, paucis describemus; ex cujus certissima narratione explicari facilius poterunt ea quæ Severus & alii Jacobitæ obscurissimè tractaverunt.

L. lib. c. 19.

Defuncto, inquit Liberatus, Timotheo Episcopo Alexandrino, Theodosius

Theodosius ordinatur : qui licet haberet Cleri Decretum , contradicere volentibus non permisit certamen populi & Monachorum quos non habuit : hi enim pro Gaïano fuerunt , consuetudo quippe est Alexandriae , illum qui defuncto succedit , excubias supra defuncti corpus agere : manumque dexteram ejus capiti suo imponere , & sepulco manibus suis , accipere collo suo B. Marci pallium , & tunc legitime sedere. Dum hæc Theodosius pertentat , cognoverunt populi & Monasteria , quod esset factum vespere in Episcopo , studio Calotychi & Judicum , id est , Aristomachi Ducis & Dioscori Augustalis mox Theodosium persecuti sunt , ne colligeret funus Timothei : inthronisaverunt autem Gaïanum qui fuit Archiepiscopus ex parte assertorum incorruptibilitatis : habens autem consentaneos aliquos ex Clero. Postea scribit pulsum cum esse à Judicibus ; Theodosium , postquam in Sede mansisset annum unum , menses quatuor , non ferentem seditiones & bella quæ contra eum exercebantur à populo , jubente Theodorâ Augustâ missum esse Constantinopolin cum honore , nempe illa Imperatori promittebat posse Theodosium induci ad Calchedonensem Synodum suscipiendam : sed pertinaciter recusantem pulsum in exilium ad sextum ab urbe milliare , adhucque cum hæc Liberatus scriberet , in vivis fuisse. Jam ad Severi narrationem veniendum est , quæ ab Historici sincerissimi testimonio longè discrepat.

Postquam , inquit , Timotheus Patriarcha diem suum obiit , Deo jubente congregati sunt Episcopi & plebs Orthodoxa , Christoque ita gubernante ordinatus est Pater sanctus Theodosius Patriarcha , qui ab incunte ætate virginitatem servaverat , & librorum Ecclesiasticorum peritiâ erat commendatissimus. Eum statim atque ordinatus est , Synodicam de communi Jacobitarum fide ad Severum Antiochenum scripsisse , testantur Autores alii ; Epistolæque istius pars refertur in Collectione , quæ Fides Patrum inscribitur. Postea Dacianus , vel Accaianus , (corruptum utrumque nomen pro Gaïano) Archidiaconus Alexandrinæ Ecclesiæ , postquam Theodosius Episcoporum , Clericorum plebique consensu in Sede D. Marci collocatus esset , agitato cum multis consilio , juvante præferim Julianò Halicarnassæo , & Theodoro quodam sacerdote pecunioso , Patriarchalem dignitatem invasit. Præfectus & alii qui publicam autoritatem habebant , muneribus corrupti à Theodoro , adversus Theodosium insurrexerunt ; & eum Alexandriâ eiecerunt in locum dictum *Harismanos* , ubi per sex menses substitit ,

Severi mors.

ignorante omnia Imperatore, quia Præfectus curaverat, ne de alterius Ordinatione ad eum referretur. Dum in hac calamitate & persecutione confisteretur, cum Severus per literas consolatus est, ostendens Paulum Apostolum similia ab hostibus fidei perpeffum, initio vocationis suæ ad Apostolatam. Agebatur tunc annus Diocletiani 242^{us}; cum interea Severus Justiniani Imperatoris metu, lateret in pago quodam Ægypti, *Saca* appellato: apud Dorotheum pium hominem qui lenum Monachorum res procurabat, eorum scilicet qui Juliani errores rejecerant. Is ad præfectum qui Aristomachus dicebatur, profectus, rogavit ut Monachis qui in deserto erant facultatem concederet ædificandi Ecclesias, & cellas earum loco, quas Juliani Sæctatores ipsis abstulerant, quod ille concessit. Severus interea cum multa scripisset ad eversionem opinionis duarum naturarum, & per triginta annos ex quo Antiochenam Sedem adeptus erat, fortissime laborasset, magnis persecutionibus afflictus, ex hac vita migravit: accepturus, ut Jacobitarum opinio est, coronam gloriæ cum sanctis Patribus.

Cum verò Theodosius continuis seditionibus eorum qui Gaiano adhærebant, vexaretur, Joannesque Alexandriæ præfectus & alii frustra in illis componendis laborassent, tandem optimum factum existimaverunt, ut secretò navem conscendens, in locum quemdam Melicha dictum se reciperet; ubi per biennium subsistit. Sed tumultuantibus adversus Præfectum Alexandrinis, quod pastorem suum illis abstulisset, veritus ille ne res ad Imperatorem referretur, Gaianum urbe pepulit. Interea Theodosii familiares Theodoræ Augustæ, quæ *fidelis*, id est Severianorum hæresi ad dicta erat, significaverunt omnia quæ per vim adversus eum Alexandriæ gesta fuerant, quæ ipsa Imperatori renuntiavit, tanquam absque illius mandato temerè facta. Gavissus secretò ille ut Severianis infensus eò quòd fidem Calchedonensem suscipere detrectarent: uxori nihilominus concessit, ut quod ipsa vellet, de Theodosio constitueret. Misit itaque Alexandriam legatos, qui de ordinatione ejus inquirerent, num scilicet secundum Canones Ecclesiasticos facta fuisset. Illi magnâ diligentia adhibita, cum cognovissent qua ratione Acacius, hoc est Gaianus, per vim ordinatus fuisset; corruptis pecuniâ multis qui ad ejus ordinationem consenserant, quique etiam tunc affirmabant eam priorem fuisse: quod tamen probare non potuerunt: legati interrogatis sacerdotibus, & primariis civibus centum viginti, quorum testimonia subscriptionibus

Firmata habuerunt, ordinationem Theodosii, tanquam prius factam & canonicam pronuntiaverunt. Deinde congregatis in Ecclesia majore Episcopis, Sacerdotibus, Imperatorisque ministerialibus, Ducibus, primoribusque civitatis, allata sunt in medium Evangelia, tum sigillum Imperiale cum Augusti imagine: adfuit quoque Theodosius; & cum omnes scorsim interrogati fuissent, confessi sunt illum primò ordinatum, accedente Episcoporum, Sacerdotum & populi consensu, secundum Canones Ecclesiæ: elapsisque duobus mensibus, auditum esse quod Gaianus ordinatus fuisset. Advenit ipse Gaianus, & coram frequenti multitudine factus est rem ita se habere, peccatique veniam postulavit. Alexandrini quoque rogaverunt Theodosium, ut poenitentiam ejus acceptam haberet, modò confiteretur, manusque suæ subscriptione restaretur, quæ ausus fuerat, facta esse contra Canonicam Ecclesiæ disciplinam. Petierunt etiam ut susceptâ illius poenitentia, ipse gradum Diaconatus, quem antea habuerat, dignitatemque Archidiaconi retineret, modò Patriarchæ obediret, ad finem usque vitæ. Hæc annuente Theodosio, & Gaiano consentiente, concordia inita est, facto publico instrumento cui omnes subscripserunt: atque ita pax Ecclesiæ Alexandrinæ reddita est, magnâ Jacobitarum lætitiâ, quòd Patriarcham suum reducem viderent, à quo pacificè Ecclesiam gubernatum iri sperabant. Julianus tamen, Theodorus, & alii hæretici à pervicacia sua rebellionequè non recesserunt. Gaianus in subjectione permansit. Theodosius sedi suæ restitutus, scripsit ad Justinianum & Theodoram literas, gratias agens de restitutione sua: quæ cum per legatos ad aulam pervenissent, cœpit Imperator queri apud uxorem quòd nimiam auctoritatem Theodosio tribuisset, qui fidei quam unicam esse in Imperio oportebat, infensus, maximas Diececes Ægypti & Asiæ obtinens, non modò consilia sua non juvaret, sed ea potius irrita redderet, circa unitatem fidei. Scripsit ergo Justinianus ad Theodosium Patriarcham, ad Præfectum Ægypti, & viros primariæ in Provincia dignitatis literas quibus significabat ut Theodosius Tomum Leonis susciperet, seque adjuvaret ut ejus exemplo alii quoque eum susciperent: quod si faceret, duplicem ei potestatem futuram non modò Patriarchalem, sed etiam sæcularem in Ægypti præfectura, adeo ut omnes Episcopi Asiæ sub ejus auctoritate forent, amplissimamque in omnibus negotiis haberet auctoritatem. Quod si obtemperare delectaret, ut statim Alexandria excedens abiret quòd vellet: neque

enim passurum Imperatorem, ut qui secum circa fidem non consentiret, ullam vel in Ecclesia vel in Republica dignitatem obtineret. Hæc cum accepisset Theodosius coram præfecto & legatis dixit, Diabolum, cum sustulisset Christum Dominum in montem excelsum, ostendisse ei omnia regna mundi & gloriam ejus, dicendo: Hæc omnia tibi dabo, si adoraveris me. Ita porro quodammodo rem nunc se habere, cum ea omnia quæ sibi Imperatoris nomine pollicerentur, futura essent in animæ suæ perniciem, si alienus esset à Christo rege vero. Mox manum elevans coram præfecto & legatis, ingentique adstantium multitudine, dixit: *Verè anathematiso Tomum Leonis, & Concilium Calchedonense: & quicumque illius confessionem approbat, anathema esto, nunc & usque in æternum.* Postea ad eisdem conversus dixit, Imperatori potestatem esse in corpus suum, non in animam: Jesum Christum verum Imperatorem jus habere in utrumque: Ecclesias jam in eorum manibus esse, facerent quodcumque ipsis videretur: paratum se sequi decessorum suorum exempla, Athanasii, Cyrilli, Dioscori & Timothei, qui tam multa pro fide passi erant. Tandem exivit, hortatus omnes, ut qui Deum amarent, sequerentur se: nudum se egressum ex utero matris, & nudum in terram reverfurum; & eum qui perdiderit animam suam propter fidem, salvaturum illam. Ejectus itaque secundum mandatum Imperatoris, nocte sequenti in custodia habitus est: postero die navem conscendit Aristomacho præfecto viaticum præbente & in Thebaidem pervenit. Illic Monachos qui in variis Monasteriis erant, per literas hortatus est ad retinendam Jacobiticam fidem persecutionemque pro ea constanter sustinendam.

Imperator de iis omnibus certior factus, veritusque ne tali constantiæ exemplo ceteri adversus fidem Calchedonensem magis obfirmarentur, literas ad Theodosium scripsit benevolentiae plenas, secum Constantinopolin ad se venire jussit, quo ille assumptis secum duobus Presbyteris, doctrina & virtute præstantibus, profectus est, & in conspectum Justiniani & Theodoræ statim admittus. Illi ejus modestiam humilitatemque admirati, comiter exceperunt eum, locumque ipsi & comitibus ejus assignaverunt. Postea accersitum eum sexies, Imperator semper interpellavit, ut auxilio sibi esset ad confirmandam fidem Concilii Calchedonensis. At ille quamvis blanditiis & promissis oppugnaretur, firmiter recusavit, negans iota unum vel apicem immutaturum se, in iis quæ

Patres & decessores sui scripto tradiderant, à Marco Evangelista usque ad Timotheum, à quo ordinatus fuerat Diaconus, & cui postmodum successerat. Cum vidisset igitur Imperator fieri nullomodo posse ut Theodosius ad suam sententiam pertraheretur, iussit illum in exilium pelli, & ejus loco constituit Patriarcham Alexandrinum, Paulum quemdam Tennesitam, seu ex Tani oriundum, qui à Menna Constantinopolitano ordinatus est. Eum cum militari praesidio Alexandriam deduci praecipit, ubi à nemine receptus est: verum Alexandrini novum Judam eum esse dicebant. Eo modo per annum integrum Alexandriae commoratus est, ita ut nullus eum audiret, nullus ab ejus manu communionem acciperet, excepto praefecto, legatoque qui praeerat militibus cum eo missis, & qui cum eis consuebant. Verum omnes convitiis illum proscindebant: quod cum Imperatori per literas significasset, eosque illum averfari, & ab eo fugere, sicut oves à lupo fugiunt, Imperator iratus misit alium Patricium cum mandatis quibus jubebat ut Ecclesiae omnes clauderentur, sigilloque fores obliquarentur, collocatis etiam custodiis, ut nemo ad illas posset accedere. Inde ingens tristitia per totam urbem, cum Jacobitis ingredi Ecclesias non liceret, adeo ut per annum integrum permanerint absque Eucharistia, neque locum habebant ubi ad orationem convenirent, aut baptismum acciperent. Interea venerunt à Theodosio scriptae ex loco exilii literae quibus eos consolabatur, hortabaturque tum ad ferendam persecutionem, tum ad fidem constanter retinendam. Cum verò tumultus inter eos invalesceret, congregati Sacerdotes, cum Laicorum praecipuis consilium ceperunt de Ecclesia aedificanda. Igitur novam Ecclesiam struxerunt in latere urbis Occidentali, loco qui *Souari* dicebatur; alio nomine appellatur *Angelium*. Alii quoque priorum exemplo alteram nomine SS. Cosmae & Damiani aedificaverunt, ad Orientem Hippodromi, & ad Orientem Phari, quae absoluta est anno Diocletiani 248°, J. C. 632°. Manfit Theodosius in exilio annos 28. quorum quatuor transegit in Sahid sive Thebaide. Multas orationes & catecheses aliaque opera scripsit toto Patriarchatus sui tempore quod triginta duorum annorum fuit, fidem Jacobiticam ad obitum usque conservans, qui incidit in 28^{am} mensis Bani. Huc usque ex Severo, cujus prolixiorum narrationem in pauciora verba contractam refert Elnacinus, in omnibus ferme consentiens, nisi quod annum aedificationis Ecclesiarum non assignat, mortem Theodo-

sui Patriarchæ refert ad annum 27^{um} Justiniani Imperatoris, qui est J. C. 553. Porro in illis quæ ex Severo relata sunt satis agnoscitur summa Jacobitarum etiam in rebus suis ignorantia, qui res multis annis transactas, uno spiritu effundunt, tanquam una eademque temporis intercapedine accidissent. Cùm verò plerique Autores Jacobitæ, ipse etiam Eutychius Orthodoxus, Apollinarij adventum referant ante occupatam à Theodosio Sedem Alexandrinam, falluntur proculdubio, seque ipsos satis refellunt, cùm Paulum qui *Tabennesiota* dictus est à celebri Monasterio, ut eum vocat Elmacinus, non *Tennisita*, ordinatum scribunt Theodosij loco. De eo & depositione ejus Liberatus cap. 23^o. Missum quoque Constantinopolin Theodosium jubente Justiniano, cùm Calchedonensem Definitionem suscipere detrectaret, in exilium pulsum ubi vitam finierit, scribunt Autores omnes Ecclesiastici. Quod verò in Thebaide exulaverit, ut communis est Jacobitarum traditio, facile fieri potest, ut vera illa sit, quod ea ratione probari videtur, quia Sahiditæ omnes, præsertim Monachi, eidem sectæ addictissimi fuerunt; atque in ea potissimum Ægypti parte conservata est successio à primis hæreseos Autoribus, usque ad eos qui ex Monasterio S. Macarii & aliis vicinis eruperunt, postquam Muhammedani Ægypto potiti sunt.

Ecclesiarum illarum quæ Theodosij tempore ædificatæ sunt, meminere Autores varii rerum Ægyptiacarum, & earum mentio occurrit pluribus hujus historiæ locis: Angelij, & istius Ecclesiæ à qua Angelitæ dicti sunt, meminit Timotheus Constantinopolitanus.

Reliqua quæ ad eorum temporum historiam pertinent alibi satis explicata sunt, nec plura habent Jacobitæ. Sunt qui Theodosianos dictos illos fuisse volunt ab isto Patriarcha, quod licet falsissimum sit, si de tota secta intelligatur, agnoscunt Severus in alio opere de Synodis, Isa filius Zaraa, & quidam alii: hic tamen, ita potius appellatos existimat à Theodosio Imperatore, cujus auspiciis congregata est adversus Nestorium Ephesina Synodus, in cujus fide perseverasse ad hæc usque tempora Jacobitæ sibi videntur. Sed hæc inanissima sunt: neque enim Theodosiani unquam appellati sunt Monophysitæ communi nomine, verum illi tantummodo qui Theodosio contra Gaiantum adhæserunt, aut illi qui dum in exilio Theodosius ageret, seorsim communicabant.

Obitus dies nempe 28. mensis Baini, seu Bounæ, adhuc celebris est memoriâ Theodosij Patriarchæ, quo etiam die comme-

De recepti.
beeth. p. 412.
Αγίου τῆς
ἐκκλησίας, ὑπὸ
τοῦ ἁγίου πνεύματος
καὶ τοῦ ἁγίου
πνεύματος
ἀποστόλων ἐν Ἀ-
λεξανδρείᾳ ἐν
τῇ ἐκκλησίᾳ τῆς
ἐκκλησίας, ἐν τῇ
ἐκκλησίᾳ ἐν Ἀ-
λεξανδρείᾳ ἐν
τῇ ἐκκλησίᾳ τῆς
ἐκκλησίας.

moratio fit depositionis Nestorii in Coptitarum Calendario. Abulbircat in Catalogo annos Pontificatus numerat 22. menses 6. contra aliorum Autorum testimonia : & obitum ejus assignat anno Diocletiani 266°, qui responderet an. J. C. 550° atque adeo triennio ab ita calculis Baronii. At cum seriùs obisse probat Autor novæ historiæ Patriarchalis, nempe an. 567.

Præter Synodicam ad Severum, citatur ejus Oratio de Trinitate, adversus impios sui temporis, quam pronunciaffe dicitur post exilium : item Epistola ad Alexandrinos sibi addictos scripta in exilio.

*Hist. Patr.
Alic. I. 344.*

PETRUS TERTIUS PATRIARCHA XXXIV. PETRUS PAT. XXXIV.

QUÆ ad istius Patriarchæ vitam spectant, ita describit Severus. Cùm in exilium missus fuisset Theodosius, successus est in ejus locum Paulus Tabennesiota, Constantinopoli ordinatus. In ea enim Ecclesiæ turbatione Melchitæ hanc consuetudinem habuerunt, ut Alexandriam Episcopos mitterent Constantinopoli à se ordinatos. Cùm verò Paulus infelicem vitæ exitum habuisset, substitutus est ab Imperatore Apollinarius. Ita scripssit Auctorem verisimile est, nam extat illud nomen in aliis libris, & pars ejus in scriptura Arabica quamvis corruptissima agnoscitur. Sed etsi Apollinarium Patriarcham Alexandriæ Orthodoxum fuisse legamus, Theodosii illius hæretici tempore, non sub Timotheo, ut Arabes plerique volunt, tamen Paulo successus non est, sed Zoilo qui in ejus depositi & exulantis locum Justiniani mandato ordinatus est.

Hic Apollinarius Ecclesias omnes Alexandriæ occupavit, vetuitque ne ullus Episcopus Jacobitarum in urbe appareret. Erat tunc arctissima conjunctio Antiochenæ illorum Ecclesiæ cum Alexandrina, cùm Theodosius & ejus comites coram Justiniano confessi essent idem se credere ac Severum Antiochenum : suscipereque se omnia quæ Joannes Chrysostomus, & Cyrillus docuissent. Mortuo Theodosio, Apollinarius magnâ lætitiâ affectus est, eaque occasione epulum magnificum sacerdotibus & primariis civibus præbuit, sperans eò faciliùs in ejus sententiam consensuros, quod nullus Episcoporum contrariæ sententiæ Alexandriæ aut Antiochiæ dare se in publicum auderet, ob Imperatoris interdicta. Divinâ potro clementiâ factum aiunt, ut præfectus Alexan-

diæ designaretur homo à secta illorum non alienus, cujus consilio & patrocinio ordinaverunt sibi Patriarcham loco Theodosii defuncti. Accersitis igitur in Monasterium quoddam tribus qui Litebant in inferiori Ægypto, Episcopis, ordinatus est Sacerdos quidam, nomine Petrus, ex eodem asceterio, quod *Zejage* vocant. Is cum Apollinarii metu in urbem introduci non posset, novem ab ea miliaribus sedem suam constituit. Illuc Jacobitæ quæ Patriarchæ suo ad vitam necessaria erant, deferri curabant. Hæc secreta Petri ordinatio cum Apollinario renuntiata esset, vehementer iratus, de ea ad Justinianum scripsit : sed priusquam literæ ad Aulam pervenissent, funesta morte extinctus est, qualis, inquit, Herodis fuit.

Petrus cum inter alias animi dotes, magnam scientiæ divinarum rerum existimationem haberet, quæsitit inter Ecclesiasticos hominem Canonum peritum, qui sibi Syncelli & Secretarii loco esset. Indicaverunt ei Damianum, Ascetam in Monasterio Tabor, quem secum habuit, ita tamen ut quia Patriarchæ tutum non erat in publico videri, aut Alexandriam ingredi, maneret in Monasterio, tanquam Episcopus.

Tuiffe tunc ait Severus sexcenta Monasteria in Ægypto, tam virorum quam feminarum, præter ea quæ in agris erant *Scatina* dicta, quæ vox quid significet ignoramus : quamvis eam à Græca *Στήνη*, quæ aliquando Cellam anachoreticam significat, deductam conjicere proclive sit. In omnibus illis erant Orthodoxi, hoc est Jacobitæ, qui sub autoritate Petri Patriarchæ vivebant. Porro cum Antiocheni ejusdem sectæ audivissent Alexandrinos Patriarcham sibi constituisse, elegerunt quoque in Severi locum Theophanem, quem in Monasterio Ammonii ordinaverunt, ubi sedem collocavit ; neque enim Antiochenis Jacobitis major libertas quam Alexandrinis erat, adeo ut Patriarchæ duo in Monasterio extra urbes proprias sedem haberent. Petrus obiit cum sedisset annos duos, 25^o mensis Bains : quo die notatur ejus commemoratio in Calendario Coptitarum. Elmacinus, Chronicon, Makrizius, & alii consentiunt de Pontificatus biennio, & die obitus. At Canon Chronologicus apud Abulbircat menses tantum decem ei adscribit, contra aliorum testimonia.

DAMIANUS

DAMIANUS PATRIARCHA XXXV. DAMIANUS
Patr. XXXV.

PETRO mortuo successus est à Jacobitis Damianus Diaconus ex Monasterio Tabor, vir potens opere & sermone, qui monasticam vitam in deserto vallis Habib ab ineunte ætate professus, sub disciplina Archimandritarum per annos septemdecim institutus fuerat. Postea à Petro prædecessore suo adsumtus in Syncellum, post ejus mortem ordinatus, in Monasterio Montis Tabor habitu episcopali sumto se continuit, vacans scribendis sermonibus spiritualibus, tum mystagogicis, nempe Catechesibus: præter Eortasticas, seu Paschales, aliasque Ecclesiasticas Epistolas. Venerunt ad eum hæretici, disputandi gratiâ, quos adeo solidè refutavit, ut omnia eorum argumenta, tanquam araneorum telas, facillè dissolverit.

Anno 8° Patriarchatus ejus, Acephali ex eorum reliquiis qui à Petro Moggo secessionem fecerant, cum apud illos quatuor tantum sacerdotes superessent, diabolo inspirante, habitis inter se consiliis statuerunt ut unum ex-se Episcopum crearent, ne perirent prorsus, quandoquidem jam dudum absque Episcopis erant. Habitabant autem in Orientali parte Ægypti; atque ita seniores quatuor illorum sacerdotum, nomine Aristocham, ordinarunt tres reliqui. Alii ex eadem secta qui erant in Occidentali parte, indignati quòd se inconsultis Episcopum ordinassent, ab illis secessionem fecerunt; & alium sibi Episcopum ordinarunt.

Acephali Sacerdotes Episcopum sibi ordinant.

Eo ferme tempore Mauricius Severus refert ad Imperium pervenisse, qui Jacobitis infensissimus fuit. Eorum quoque res turbata per intermissionem antiquæ communionis inter eorum Ecclesiam Antiochenam & Alexandrinam; eò quòd Petrus qui Theophilo, inquit Severus, successerat, in Synodica Epistola quam ad Damianum scripsit, nova quædam contra fidem Trinitatis inferuit, quem cum ad saniores mentem reducere Damianus non potuisset, magna inter utramque Ecclesiam contentio exarsit, adeo ut demum post annos viginti, hæretici illius morte finita fuerit. Sane post Petrum Fullonem nullum Petrum Patriarcham Antiochenum historia nobis repræsentat. Ut hæc de Petro Apatmeno accipiantur, non permittit temporum ratio. Itaque hæc in obscuro sunt, ut reliqua illius Patriarchæ historia, cujus tempore ait Severus floruisse multos Episcopos virtute conspicuos, inter

Mauricius Jacobitis infensus.

quos numerat, Joannem Borlesitam, hoc est Paraloi Episcopum, Constantinum, Callistum & alios, de quibus nihil occurrit. Damianus orationis assiduitate, jejniis & laboribus in ætate ingravescens confectus, in paralyfin incidit, & obiit 18. mensis Bains, cum 36. annis Jacobiticæ Ecclesiæ præfuisset: atque ita ejus obitus incidit in annum J. C. 591^{um}, Mauricii Imperatoris 6^{um}. Verum hæc & pauca quædam alia quæ ex Jacobitarum traditione ad obscuri illius temporis historiam sciri possunt, adeo ignota & notis certis temporum destituta sunt, ut de illis statui vix quidquam queat.

In Canone Chronologico apud Abulbircat, contra Severum, Elmacinum & Makrizium sedisse tantum dicitur an. 24. mens. 10. obiisseque an. 309^o SS. Martyrum, qui respondet an. J. C. 593^o: atque ita numerus qui in illo usurpatur, propius accedit ad Chronologiæ veritatem, cum in aliorum Patriarcharum annis nulla omnino cum conciliandi via reperiatur.

In Kalendario Coptitarum ad 18. mensis Bains notatur memoria Damiani Patriarchæ Alexandrini, serpentum interfectoris, quæ denominatio fortassis referenda est ad aliquam historiam quæ nobis incompta est.

Concilium
V. Oecumenicum.
Eutychi, t. 2.
p. 171.

Sub hoc Patriarcha vel sub ejus prædecessore, nam Autores variant, habitum fuit Concilium quintum Oecumenicum, anno Justiniani 27^o, ut scribit Eutychius, nempe an. J. C. 553^o, quo ut superius observatum secundum Elmacinum, & Autores quorum calculos sequitur Chronici Autor, Menbigensem & alios, mortuum esse agnoscunt Theodosium Patriarcham. Ratio diversitatis est, quia multipliciter ab illis erratum est in supputatione annorum Æræ Diocletiani. Nam secundum Canonem Chronologicum quem exhibet Abulbircat, obitus Theodosii incidit in an. ejusdem Æræ 263^{um}, J. C. 547^{um}, qui non est Justiniani 27^{us}, sed 21^{us}. Cumque Petrus qui ei successit, duos tantum annos Sedem Alexandrinam tenuerit: imo vix annum integrum, si Canonem Abulbircat sequimur, idcirco secundum eorum Chronologiam Synodi Constantinopolitanæ initium incidet in Patriarchatum Damiani qui longissimi temporis fuit.

De eo Concilio cujus nulla apud Jacobitas autoritas est, silet Severus, sed nec ab antiquioribus Jacobitis, qui etsi in illo probant damnationem errorum Origenis, & aliorum qui Eutychis & Apollinarij hæresin sequebantur, & phantasticam existi-

mabant fuisse totam Jesu Christi Domini dispensationem, seu *ἰουδαῖος οἰκονομία*, tamen quòd in eodem confirmata fuerit Calchedonenfis fides, duarumque naturarum sententia, illud aspernantur, & condemnant. Quocirca nulla illius ut neque Calchedonenfis mentio est aut in Diptychis aut in Canonum Collectionibus, etsi quosdam ex illis qui Quinisexti Concilii dicuntur Canones, nam in 5^o nulli editi sunt, suos in Codices transtulerint. Attamen Elmacinus, etsi Jacobita, illius meminit, sed ex Eutychio transcriptis quæ ad rerum adversus Hæreticos gestarum memoriam pertinebant. Inficeta sane admodum & turbata narratio est, quam tamen quia omnes Orientalium libros pervasit, nec de ea Synodo præterea quidquam sciunt, ex Eutychio referemus. Fuit, inquit, tempore Justiniani Imperatoris Origenes Episcopus Manbagenfis, seu Menbigenfis, hoc est Hierapolitanus, qui Mectempychosin asseruit, resurrectionem negans. Fuerat etiam Ibas Episcopus Rohenfis, seu Edessenus, Thadæus Episcopus Messisæ: legendum Theodorus, Episcopus scilicet Mopsuestiæ, quam Arabes Messisam appellant, Theodoretusque Episcopus Ancyrensis; sed potius Cyri, qui asseruerunt corpus Christi Domini phantasticum fuisse, seu imaginarium, nihil in se veri habens. Quorum sententiâ audacè mittens Imperator, ipsos Constantinopolin accersivit, ipsis ac Eutychio Patriarcha convenire iussis: & post pauca subjungit, illos ab ipso excommunicatos fuisse. Jussit etiam Imperator indici Concilium, in quo anathemate ferirentur: scriptis idcirco ad quatuor Patriarchas literis, nempe Apollinarium Patriarcham Alexandrinum, Domnum Patriarcham Antiochenum, Eutychium Hierosolymitanum, & Vigilium Romanum, ut Constantinopolin venirent, & istorum Episcoporum damnationi adessent. Interfuit huic Concilio Eutychius Patriarcha Constantinopolitanus. Non adfuit quidem Patriarcha Hierosolymitanus, sed qui locum ejus tenerent, misit. Ita nec interfuit Patriarcha Romanus, nec suo nomine Vicarium legavit: cum ipsis tamen consensit, eorumque sententiam amplexus est. Fuit numerus Episcoporum qui in hoc Concilio quinto convenerunt, centum sexaginta quatuor: illi in Episcopos istos & omnes qui idem cum ipsis assererent, anathema dixerunt, scilicet in Origenem Episcopum Manbagensem, Theodorum Mopsuestenum, Ibam Edessenum, & Theodorum Cyrensem. Definierunt corpus Christi Domini nostri verum fuisse, non phantasticum; esseque ipsum Deum perfectum & homi-

T. 2. p. 171.
§ 69.

nem perfectum, in naturis duabus, voluntatibus duabus, duorum generum actionibus, vel potius operationibus duabus, & personâ unâ agniti: confirmarunt etiam sententiam quatuor Conciliorum præcedentium. Ita paucioribus verbis Elmacinus, & nonnullis immutatis Makrizius, sed ita ut Concilium referat ad Theodosii Patriarchæ tempora.

Infalsa nar-
ratio de Con-
cilio quinto
Œcumenico.

Quàm verò falsa sit hæc Eutychii narratio omnes satis agnoscunt. Origenes enim de cujus doctrina quæsitum est, & in quæ anathema pronuntiatur à Synodo, non alius fuit à famoso illo Adamantio qui aliquando Hierapoli vixisse potuit, sed nunquam illius urbis fuit Episcopus, aut ultra Presbyterii gradum promotus est. *Menbige* seu *Menba* esse Hierapolin docent nos Geographi, & probavit Jacobus Golius; sed uno simplicique argumento demonstratur, quia famosus ille inter Jacobitas Philoxenus, Xenaïas aliter dictus, qui tot turbas in Oriente excitavit, cum esset Hierapoleos Episcopus, semper ab Arabibus vocatur Episcopus *Menbige*, & à Syris *Mabouge*. Illud æquè ridiculum quod Origenem, Theodorum Mopsuestenum, Theodoritum, & Ibam, tanquam viventes ad Concilium vocati dicuntur esse, cum ante multos annos in vivis esse defuissent: neque de metempsychosi, aut veritate resurrectionis ullatenus agebatur, sed de Origenis aut Origeni attributis erroribus: quæ omnia Orientales non satis intellexerunt. Reliqua spectabant famosam de tribus Capitulis quæstionem, in qua etiam judicium quintæ Synodi penitus ignorasse videntur Orientales, præsertim Jacobitæ, illud tamen omnino secuti sunt: Nam circa Origenem, ne dubitari quidem volunt non modò multis illum & quidem gravissimis erroribus contaminasse Orthodoxam fidem; sed, ut in Demetrii vita observatum est, literales ejus in scripturam Commentarios, tum labores immanes in sacris literis ex diversarum Editionum collatione illustrandis, ita acceperunt, ut eum ad Judæos defecisse, & veterem de Prophetiarum in Christo consummatione sanctorum Patrum doctrinam corrupisse existimaverint. Atque hæc semper fuit communis omnium, præsertim Alexandrinorum, de Origenis opinio. Theodorum Mopsuestenum non modò damnant, sed velut semi-Judæum execrantur, & mira de eo narrant Autores gravissimi, qualis fuit inter Jacobitas Dionysius Barsalibi, in Tractatu adversus Nestorianos. Hi soli eum in pretio habent, & quasdam ex ejus in scripturam commentariis particulas conservant, quarum nonnullæ

Not. ad Al-
frag.

in Evangelia extant in Bibliotheca Seguieriana. Memotiam ejus agunt Nestoriani, & cum *Interpretem* per excellentiam vocant. Ibam Edeffenum, & Theodorum Nestorianis Jacobitæ quoque accensent, & ipsi Nestoriani licet immeritò, eos ultimo excepto inter sectæ suæ Doctores numerant: tantam quippe in antiquarum rerum historia caliginem patiuntur, ut major esse non possit, etsi Melchitæ plura scire potuerint, quàm Jacobitæ aut Nestoriani.

Autor Melchita Collectionis Canonum quæ extat in Bibliotheca Regia, & in Colbertina, cum titulis Conciliorum Græcis, quod in ejusmodi libris rarissimum est, nihil habet in Græco titulo de Origene illo Hierapolitano, sed tantùm in Præfatione Arabica, ubi nomen illud mirum in modum depravatum est, vocatur enim *Arganalius*. In Græca Synopsi dicitur congregata fuisse Synodus contra sectatores Nestorii, & contra Origenem qui asserbat *πρωτοπαρξιν* seu præexistentiã animarum: confirmasse sententias præcedentium Conciliorum, circa Nestorii hæresin, definitivisse B. Mariam esse matrem Dei, anathemæque Nestorio & Origeni dixisse, quibus addit Arabica Præfatio, Arganaliũ illum Menbigensem seu Hierapolitanum, Theodorum Mopsuestenum, Theodorum Cyri, Ibam Edeffenum.

Ad eadem quoque tempora referunt Eutychius, Ebnassalus, Elmacinus, Makrizius, & omnes tandem quoscumque vidimus Autores Orientales, initia hæresis Monothelitarum, in quo longe abeunt à compuni Græcorum & Latinorum historia. Illi Sergium Constantinopolitanum Episcopum & Cyrum Alexandrinum veluti primos illius architectos agnoscunt: Orientales Maronem quemdam Syrum Monachum qui sub Mauricio Imperatore vixit, & urbium Hamæ, Kennaferin, Awasim, & aliorum vicinorum in Syria locorum incolas ad suam sententiam perduxit: cui sectatores ejus eo mortuo Monasterium extruxerunt, quod vocatur Maronis, & ab eo dicti sunt Maronitæ. Ita Eutychius, Elmacinus, Ebnassalus in Collectione, Autoresque de hæresibus varii, cujuscunque sectæ sint. Adeo verò invaluit apud omnes hæc opinio, ut si recentiores Maronitas exceperis, concordia de hujus hæreseos origine mira sit inter Autores, unde nec aliud nomen habent, quo Monothelitas designent præterquam Maronitarum. Ea ratione dum Cyrum, Pyrrhum, Macarium & alios Monothelitas nominant, Maronitas fuisse dicunt. Imo ne quidquam dubii superfit, aut id ex eorum ignorantia factum esse videatur, obstat lu-

DAMIANUS
Pact. XXXV.
Hebrd Jesu.
Kal. Nestor.
Abu. bircat.

Monotheli-
tarum initia.

Eutych. l. 2.
p. 191.

Vall. Tyr.
l. 22. c. 8.

Maronitz
recentiores
negant.

Pref. Gram.
Syr.

Pref. in Psalt.
Syr.

Fausl. Nai-
nus Dissert. de
Maronitis Ro-
ma 1679.

culentum Ebnaßali testimonium, qui de Maronitis agens, eosque à Melchitis qui sunt Græci Orthodoxi, & à Francis qui sunt Latini, distinguens, observat eos nuper ad Francorum religionem transivisse. Cum verò hæc scriberet, habebat in animo eorum ad Catholicam fidem conversionem per Aimericum Antiochenum Patriarcham, de qua Willelmus Tyrius testis omni exceptione major verba faciens, eos à Monothelitica hæresi respuisse confirmat.

Attamen adversus tot certa testimonia exclamatur à recentioribus Maronitis, quorum primus, aut saltem inter primos qui suos populares Libaniticos ab omni hæreseos suspitione purgari voluit, Georgius Amira Edenienfis fuit, vir doctus & pius: quem secuti sunt, Joannes Hezronita, & Gabriel Sionita in libello de Moribus Orientalium, Abraham Echellenfis passim; tandemque ejus in Cathedra Arabica Collegii Sapientie successor Faustus Naironus in Dissertatione de origine, nomine ac religione Maronitarum Romæ edita an. 1679. & in alio cui titulus *Euoplia Fidei Catholice Romane*, ibidem edito an. 1694. In utroque illo opere argumenta omnia collegit, quæ alii ante ipsum leviter admodum attigerant: cumque eum premeret Willelmi Tyrii auctoritas, curam omnem adhibuit, ut cum non tam proprio quàm Eutychiei judicio quem legerat, ea scripisse quæ Maronitas suspectos Monotheliticæ hæreseos redderent, demonstraret. Adducit in hanc sententiam Autores aliquot, ex quibus probare conatur Maronitas semper Catholicæ fidei fuisse defensores acerrimos, pugnasse contra Jacobitas & Nestorianos sub auspiciis sancti Maronis Abbatis, cujus nomine celebre extabat circa Apamiæ Monasterium, quod Archimandritas habuit zelo fidei Orthodoxæ conspicuos. Nomen istud Maronitarum ad omnes deinde Orthodoxos Syros pervenisse. Hæc & alia multa hujus generis Autor ille producit, ita ut caritas in patriam, majoresque suos, bonum civem fuisse non obscure demonstret; rationes tamen ejus & auctoritates non plane rem expédiant. Verùm cum totam originum illarum disquisitionem instituerimus in singulari de Maronitis Dissertatione, ad eam remittimus, pauca tantùm quæ ad hunc locum pertinent designasse contenti. Ea verò sunt quòd Eutychieus Alexandrinus Orthodoxus cum esset, accusandi de hæresi gentem tot laboribus de Ecclesia bene meritam, causam habebat omnino nullam; Jacobitæ contrà, quibuscum Eutychieo commune nihil erat,

PATRIARCHARUM ALEXANDRINORUM. 151

DAMIANUS
Petr. XXXV.

Muhamedani quibus utraque pars eodem erat loco, eandem hif-
toriam tanquam veriffimam fecuti funt : quam tandem Willelmus
Tyrius teftis oculatus confirmavit : neque enim falli poterat, circa
conversionem totius populi Maronitici ex hærefi Monothelitarum,
fi ea falſa fuiſſet. Autore vero quorum teſtimoniis pugnat Nai-
ronus, aut ignotiſſimi funt, aut recentiffimi, præterquam quod in
eorum narrationibus non pauca occurrunt, quæ ad tempora qui-
bus ſcripſiſſe perhibentur, pertinere nulla ratione poſſunt. Verum
de his plura alibi ; ſufficiat hoc loco traditionem Orientalium de
Maronitarum initiiſ ex eorum ſententia ſignificaffe.

Damianum hunc, cujus vitam ſcripſimus, cum eſſe cujus men-
tio eſt apud Timotheum Conſtantinopolitanum, à quo Damianitæ
dicti ſunt, qui etiam *Angelus* ab Angelio ubi Jacobitæ Eccleſiam
ædificaverant, verifimile proſus eſt.

Mon. Eccl.
Gr. t. 3. p. 412.

De Patriarchis Orthodoxis, cum Jacobitæ nihil ſcribant, eos
enim ut inſaſores & hæreticos deſtantur ad eorum res illuſtran-
das, nullum eſt in hiſtoricis Orientalibus ſubſidium : nam Euty-
chius ipſe eorum ſucceſſor vix nomina eorum fideliter refert. Igi-
tur quæ ad Chronologiæ illorum temporum rationes ſpectant, peti
poſſunt ex Hiſtoria Chronologica à Bollandianis ſociis edita, in
qua hæc accuratè tractantur.

Hiſt. Patr.
Chron. ſ. 349.
& ſeq.

ANASTASIUS PATRIARCHA XXXVI.

ANASTASIUS
Petr. XXXVI.

POST Damiani mortem conſtitutus eſt à Jacobitis ejus loco
Anaftaſius Alexandrinæ Eccleſiæ Preſbyter, quem à doctri-
na ſcripturarum, zelo fidei Jacobiticæ, animique fortitudine
commendat Severus, eo potiffimum quod cum Melchitæ ſeu
Orthodoxi omnes Eccleſias obtinerent, neque Jacobitas præſertim
Epifcopos in urbe verſari paterentur, ipſe tamen nihil veritus in eam
ingreſſus frequentes Sacerdotum imò & Epifcoporum ordinationes
ſecundum Eccleſiaſticum Cænonem fecerit ; multos etiam ad ſuam
fidem cohortationibus & diſputationibus adduxerit. Sacerdotes
præpoſuit duabus Eccleſiis Angelii, & Coſmæ & Damiani, quas
Jacobitæ ædificaverant, tum etiam Monaſteriis Virginum, & mul-
tis aliis. Cœpit quoque ad alias Eccleſias conſtruendas animum
adjuccere, quarum una fuit Michaelis nomine.

Interea magnas turbas perpeſſus eſt à Gaiani ſectatoribus, qui
duos illic Epifcopos ab eo ordinatos habebant : quorum nomina

Eulogius
Alexandrinus
Petr. Ortho-
doxus.

ANASTASIUS
PAT. XXXVI.

Phot. Cod.
230.
Eutych. t. 2.
p. 195.

Id. 208. 211.

Synodica
Epistola ad
Antioche-
nos.

152

HISTORIA

Severi Codex Mss. exhibet quidem, sed ita corrupta, ut legi aut divinari non possint. Plura adhuc passus est ab Eulogio Calchedonensi, nempe pio illo & legitimo Antistite Alexandrino, qui, ut scribunt, nihil non egit ut eum perderet.

Eo tempore Phocas ex Patriciorum ordine præcipuus, adversus Mauricium rebellavit, & eum occidit. Eo regnante, quidam Patricius qui in Ægypto erat, cum audisset quæ Anastasius egisset, plenas calumniæ & mendacii ad Phocam literas scripsit, inter alia significans quòd cum à suis ordinatus fuisset in Ecclesia Joannis Baptistæ, statim anathema in Imperatorem & Synodum Calchedonensem pronunciaisset. His auditis, Phocas Præfecto Provinciæ mandavit, ut Ecclesiam Cosmæ & Damiani, omniaque ad eam spectantia Anastasio ablata, Eulogio traderet.

Cum vehementer optaret ut scisso jam à tempore Petri Antiocheni Episcopi, illius quem superius diximus, qui errorum circa Trinitatis mysteria gravissimorum ab eis accusatur, quæ Alexandrinæ Ecclesiæ cum Antiochena communionem sustulerat coalesceret, statim atque audivit, sedisse illius loco Athanasium virum doctum & sincerum, cujus inter alia extabat oratio de Severi Antiocheni laudibus, ut ejus benevolentiam colligeret, primus ad eum scripsit Synodicam de fide Epistolam. Eam Athanasius cum gaudio suscepit, convocatisque Episcopis suis eam ipsis exhibuit, præfatus de antiqua utriusque Ecclesiæ concordia, à tempore Severi & Theodosii, & antiquissimæ inter Petrum Apostolum fundatorem Ecclesiæ Antiochenæ, & Marcum primum Alexandrinæ Episcopum, familiaritatis. His auditis, consenserunt Episcopi ut Synodica susciperetur, arctiorque inter utramque Ecclesiam societas contraheretur. Athanasius Patriarcha assumtis secum Episcopis quinque, Alexandriam navigavit, ut Anastasium inviseret, qui tunc erat in Monasteriis, unde ad suscipiendum Anastasium, qui eò profectus erat, pedes egressus, occurrit ei cum Hymnis & Canticis. Mox in Monasterium quod erat ad litus maris Orientale divergerunt: in quod Anastasius Sacerdotes Alexandrinos convocavit, ut simul sacra celebrarent, sacrisque mysteriis communicarent. In eo Episcoporum Sacerdotumque concilio verba fecit Athanasius, multis extollens consensum duarum Ecclesiarum, in unam fidem. Mansit deinde cum Anastasio per mensem, & postea in urbem suam reversus est. Ab eo tempore summa inter Antiochenos & Alexandrinos Jacobitas concordia servata est, imò ad hanc usque

usque diem. Inde etiam quasi lege, stabilita est consuetudo religiose in utraque Antiochena & Alexandrina Jacobitarum Ecclesia dudum servata, ut novi Patriarchæ alter ad alterum scriberent, statim postquam ordinati erant, literisque illis quæ non tam privatim, quàm publicè scribebantur, fidei professio continebatur. Illæ legebantur in Episcoporum præsentium ad Ordinationem Synodo; atque ea ratione Synodice appellabantur, magnamque habebant inter Jacobitas auctoritatem. Inde factum ut servatæ sint in Ecclesiarum tabulariis, & ex illis varia testimonia à Theologis proferri solent, præsertim in libro cui titulus *Fides Patrum*. De illis sæpe dicitur inferius.

Anastasius toto Pontificatu suo pacem habens, totus fuit in scribendis, Sermonibus, Catechesibus Mystagogicis, Epistolisque Paschalibus, & aliis ejusmodi. Obiit cum sedisset annos 12. 22^a mensis Cohiac, anno 330^o Diocletiani; quod legitur etiam apud Makrizium: & Elmacinum, qui omnia ex Severo transcripsit; neque enim qui de rebus illius sæculi scripserit præter illum, alius reperitur. Cum autem sub Eulogio Alexandriæ Orthodoxo Episcopo res Ecclesiæ florentissimæ forent, neque ullam hæretici haberent in urbe auctoritatem aut libertatem, quæcumque ab isto Pseudopatriarcha Anastasio gesta sunt clanculum, vel cum Athanasio Jacobita Antiochenæ Sedis invasore transacta, apud antiquiores Autores vix reperiuntur. Quod porro à Gaiianistis turbas sustinuerit, ut faretur Severus, argumento est Jacobiticam Ecclesiam, non ut ipse & alii suadere conantur, in pace fuisse, cum multis inter unius naturæ defensores, hostesque fidei Calchedonensis schismatibus turbata fuerit, de quibus præter Liberatum, Leontium Scholasticum & alios fusè loquitur Timotheus Presbyter Constantinopolitanus in libro de Receptione hæreticorum, quem edidit Cotelerius.

Eccles. Græc.
MOMM. L. 3.

Anastasi Patriarchæ Alexandrini commemoratio assignatur 22^a mensis Cohiac in Calendario Coptitarum, qui dies respondet 18^a Decembris in Canone Chronologico Abulbircat: sedisse dicitur ann. 11. mens. 6. ordinatus fuisse mense Abib, seu Epipi, qui incipit à 25. Julii, an. Martyrum 309. obiisse 22. Kohiac, an. ejusdem Æræ 320^o. qui calculus decennio differt ab eo Severi, Elmacini & Makrizii. Annus 320^{us} Martyrum respondet anno J. C. 604^o: annus 330^{us} J. C. est 614^{us}. At Severi numerus potior est, cum ut ex eodem mox dicitur, Persæ Ægyptum ingressi fuerint sub An-

drónico ejus successore, quæ clades ad an. J. C. 615^{ma}, Heraclii 6^{um} pertinet, quo Cosroes Ægyptum & Africam populatus est.

ANDRONICUS
P. XXXVII.

ANDRONICUS PATRIARCHA XXXVII.

POST Anastasii mortem à Jacobitis in Sede Patriarchali collocatus est Andronicus Diaconus Ecclesiæ Angelii, vir doctus, pius, dives, & erga pauperes beneficus. Cum verò ex præcipua Alexandrinorum nobilitate originem duceret, adeo ut quidam ejus affines magistratum obtinerent, inter alios frater ejus patruelis ob ejus dignitatem & autoritatem, non potuerunt Orthodoxi obtinere, ut Andronicus urbe pelleretur, & in Monasteria se reciperet, quod decessores ejus fecerant : & in cella ad Ecclesiam Angelii habitavit, toto Patriarchatus sui tempore.

Perse Ægyptum vastant.

Verum ingens calamitas non modò Ægyptum, sed Syriam, Palestinam & Africæ magnam partem oppressit, Persarum Rege Cosroe, quem *Perwiz* ad aliorum discrimen appellant, eas provincias invadente, magnamque ubique Christianorum stragem faciente. Sexcenta erant circa Alexandriam aut in vicinis locis Monasteria quæ vastata sunt, adeo ut deinde restituta pauca admodum fuerint. Octoginta Alexandrinorum millia cæsa fuisse scribit Severus : Monachos præterea septingentos. In tanta tamque gravi calamitate Andronicus, cum sex annis Jacobiticam Ecclesiam gubernasset, obiit 8^a mensis Tybi, anno Martyrum 325^o, si Canoni Chronologico credendum est : sed qui proculdubio erratis plenus est : nam si eo anno qui est Christi 609^{us} obiit Andronicus, cladem Ægypto à Persis illatam non vidit : quod tamen Severus, Elmacinus, & alii testantur.

cedr. p. 408.

Eutyph. t. 2.
p. 219.

De illa Persarum expeditione scripserunt Theophanes, Cedrenus & multi alii, eamque contigisse anno Heraclii sexto vulgaris Græcorum opinio est, sub Cosroe rege qui *Perwiz* cognominatur : Eutyphius omnia turbat. De Persarum Regibus fuisset fortasse dicendi locus, cum eorum historia nonnihil juvari ex Orientalibus libris queat, & Eutyphius multas passim ejus lacinias operi inferuerit suo, quibus tamen meliora sunt ea quæ ex Emir-Condo, & Cond-Emiro, tum aliis Persicis Autoribus, conquiri possunt, præsertim, cum in propriis nominibus peccata multa sint à Librariis, quæ doctissimus Interpretes neglexit. Sed cum ea vix ad Alexandrinæ Ecclesiæ res pertineant, omittere visum est, cum

in Epitome Historiæ Nestorianorum, quorum majores sub illis Regibus vixerunt, eorum seriem accuratam daturi sumus.

De Andronico plura non suppetunt: nam quod in Synaxario illo Æthiopico ex quo Ludolphus multa viro eruditissimo Danieli Papebrochio transmisit, Ecclesias ædificasse Christianis, & Idolorum templa destruxisse dicitur, primum valde dubium est, cum Severus & alii nihil simile scripserint; nec videtur id tulisse turbatissima rerum conditio. Unde suspicari possumus, ad Andronicum retulisse Poetas illos quæ ad ejus decessorem Anastasium pertinerent. Alterum, quòd Idolorum templa everterit, quæ dum in Ægypto nulla erant, absurdissimum est; præsertim cum talem potestatem, homo hæreticus, Præfecti patrocinio destitutus, & per leges Imperiales proscriptus, habere non potuerit; cum satis illi foret, affinium beneficio, in urbe manere. Sed nulla, ut alibi diximus, Synaxarii illius autoritas est, nisi quando cum Historia Ægyptiaca consentit. Unde multa quæ ex eodem referuntur, consultò prætermisimus, tum ob eorum futilitatem, tum quòd ex ipsa versione (illam quippe cum Manuscriptis conferre tanti non erat) multa deprehendimus, in quibus hallucinatum esse interpretem certissimum est. Neque potior censerì debet Kalendarii Æthiopici autoritas, quod à Ludolpho compositum potius quàm ex veteri, & bonæ notæ exemplari transcriptum fuit: ita nempe ut ex Synaxario nomina sanctorum colligeret, & in latercula digereret, adjuncto Kalendario Seldeniano, huiusmodi multis in locis & imperfectissimo, ut ex comparatione constat quam cum aliis accuratè scriptis fecimus. Quod si ingenuè fassus, historiam Alexandrinæ Ecclesiæ frustra quæri apud Æthiopes, qui neque ipsam suam satis compertam habent, collectancis inficetis viros doctissimos lactare noluisse, consultius, opinor, fecisset. Id porro ex sequenti parte historiæ fiet manifestum.

*Hist. Patr.
Alex. §. 365.*





HISTORIÆ
PATRIARCHARUM ALEXANDRIÆ
JACOBITARUM
PARS SECUNDA.

A Muhamedanorum Imperio ad postremā temporā.

BENJAMIN PATRIARCHA XXXVIII.

Status Ec-
clesiæ Jacobi
tæ sub Mu-
hamedanis.



OVUS jam nobis rerum ordo nascitur, cū sub isto Patriarcha dominos Ægyptus mutaverit, avulsaque à Romano Imperio, Arabibus, non feritate modò & crudelitate, sed nova eaque terribissima omnium superstitione detestandis, servire coacta est: quam servitutem jam ab annis plusquam mille non modò Jacobitæ qui eam blasphemis suis, & Ecclesiarum divisione accersiverunt, sed omnes Christiani serviunt. Ab illa tristissima Epocha, omnium Ecclesiasticarum rerum immutatio facta est: hæreses per Imperatorias leges coercitæ, sed ita ut dum in urbibus extinguerentur, in Monasteriis Thebaidis scintillæ hujus incendii reviviscerent, jam caput erigere cœperunt, & communi libertatis jure quam Muhamedani omnium religionum contemptores, Christianis cujuscunque sectæ concedeabant, Jacobitæ

eo jam loco esse cœperunt, ut æqualem imò & statim majorem Orthodoxis haberent auctoritatem. Inde cœpit Alexandria duos habere Patriarchas, Orthodoxum qui vulgò Melchitarum appellatur; & hæreticum, Jacobitarum, quæ unius Cathedræ divisio ad ultima ista tempora perseverat. Nam Joanni *Ἰωάννης*, qui paulò ante Muhamedanorum Imperium floruit, successerunt Græci Antistites, qui post annum millesimum & centesimum Constantinopolitano Patriarchæ, non minus quàm omnes alii Græci Episcopi, ita paruerunt, ut plerosque ritus antiquos Alexandrinæ Ecclesiæ proprios, Constantinopolitanis mutaverint. A Benjaminò, cujus mox historiam dabimus, successionem ducunt Copticæ omnes Patriarchæ, qui quantum adipisci potuimus, jam ab illo sæculo omiſſis Græcis ritibus, Copticis uti cœperunt: atque ita præter fidei diversitatem, novum adhuc inter duas illas Ecclesias linguæ discrimen inductum est, cum alii Græcè, alii Copticè sacra faciant.

Orta est sub Heraclio Imperatore ingens illa Orbis Christiani calamitas, quæ ab anno quo Muhamed Pseudopropheta Mecca Medinam fugit, initium ducit. Is annus est 1^{us} Muhamedanorum Imperii, nempe Hegiræ, ut vulgò dicunt, seu fugæ Muhamedis, qui incipit à 15^a Julii, anno Æræ Christianæ 622^o, qui erat annus Alexandri 934^{us} juxta accuratissimas Joannis Grævii Tabulas, 933^o secundum Eutychium: Diocletiani seu Martyrum secundum eundem 338^o, qui numerus exactè convenit cum illius Epochæ initio, quod ut superiùs observatum, ab an. 284^o J. C. seu 1^o anno Diocletiani ducendum est, non à primo persecutionis, ut volebat Ignatius Antiochenus Patriarcha, cujus literarum fragmentum Josephus Scaliger edidit, & quem temerè magno operis sui detrimento secutus est.

Muhamedanorum initia.

Emendat.
Temp.

Quæ ad Muhamedis primordia pertinent, quantum ad hujus nostræ historiæ intelligentiam necesse est, paucis exponemus. Natus est Muhamed inter Arabes Scenitas illos, quorum vita pastoricia fuit: quique nec literis, nec religione exculi in summa libertate vivebant, pascuis, negotiationibus, latrocinii, mutuisque sæpe inter se bellis occupati. Longam ab Ismaele genealogiam ejus Historici exhibent, ex qua nobilem inter Meccanos fuisse se apparet, cum mulieris opulentæ matrimonio adauctis divitiis animum ad mercaturam adjecisse, & usque ad annum 40^{um} ætatis, nihil minus quàm Prophetam fuisse. Postea tandem cum Medi-

nam fugere coactus esset, ob venditam prophetiam viris stolidis, ferocibus, & ad omne nefas paratis facile persuasit, divinitus se inspiratum, ut ab Idololatria superstitionisque syderum cultu, quibus Arabes addictissimi erant, eos ad unius veri Dei cognitionem adduceret: præsertim cum suos hortaretur, ut sive Judæos, sive Christianos, aut Gentiles, contumaces adversus propositam à se novam religionem reperirent, eos armis aggredierentur & interfectione delerent. Ita paucis admodum annis, lacerato undique Romano Imperio, pestis illa totum ferme Orientem invasit.

Forum religio.

Specim. Hist. Arab.

Doctrinam Muhamedis satis multi explicaverunt apud nos, atque inter alios præcipue qui est in omnium manibus, Eduardus Pocockius, in specimine Historiæ Arabum, quod opusculum omnium loco esse potest erga illos, qui Autores ipsos Arabicè scribentes consulere non possunt. Quod verò Alcorani putidissimo libro pleraque fidei eorum dogmata contineantur, ita intelligendum est, ut sicut ex sacra Scriptura sectæ omnes, opiniones suas probare satagunt, ita quoque Muhamedani inter quos sectæ olim diversissimæ fuerunt, ex illo libro deducant omnes fidei suæ, jurisque regulas. Hunc, quæ est prurigo nostri sæculi, ab omnibus olim explorum multotiesque confutatum, cum errores turpissimos circa veteris novique Testamenti historiam contineat, & infinitam rerum ridicularum copiam: sunt tamen qui mirari nos velint, quia scilicet audiverunt, stupori fuisse Arabibus naturalem quamdam facundiam, quæ non sine miraculo eos ad credendum compulerit. Possunt qui Arabicè nesciunt Versionem Gallicam Andreae du Ryer, quæ omnium præstantissima inter vernaculas fuit, consulere; ita tamen ut Maraccii Latina, Patavii cum commentariis edita, eam longe superare censenda sit, & apud se sic habere, præter verba nihil esse in quo oratio Arabica ab alia quavis differat. Neque quisquam, opinor, existimabit, illud quod per se ineptissimum est, posse orationis nitore ita expoliri, ut sapientissimum & à Deo inspiratum appareat. Aliter sane Prophetæ, non Isaias modò aut Hieremias, aut David, sed Amos pastor loquuntur, aliter impostor Muhamedes: qui perpetua redundantia fastidiosaque eorumdem verborum repetitione lectores obtundit: nullam methodum, nullam sublimitatem, imò nec in gravissima sua barbarie simplicitatem habet; adeo ut liber ille, nisi gladii cervicibus Arabum impendissent, ne ullum quidem apud eos profectum fecisset, præsertim qui literas sciret, quas ignorabat

nebuloso, ut ipse sæpè testatur admodum inutiliter, cùm satis qui ejus quisquiliis intentus est, ubique Camelarium potius Agafonem, quàm Prophetam audire se intelligat. Vestuntur hæc inania potentia longissimis Commentariis; & Deo poenales cæcitates spargente super illicitas cupiditates, quibus tartarea illa hæresis nimium indulgit, factum est ut quæ ineptissima sunt, miraculis plena appareant, præsertim inter eos qui nullâ scripturarum, nullâ Theologiæ scientiâ imbuti, flagitioso impostori fidem dederunt. Verùm ornatus ille in quo interpretum millia multa tantopere laboraverunt, fucum nemini facere potest, qui in commentarios illos altius penetraverit; semidoctis sæpe illudunt, qui peregrinas illas literas quò minus intelligunt, eò magis mirantur, & in pretio esse volunt. Ea præpostera eruditio etsi satis per se ridicula ita videatur, ut moneri lectores ne se decipi patiantur, necesse non sit: ea tamen nostri sæculi licentia est, ut non desint qui ejusmodi ineptiis delectentur, & Muhamedanæ religionis aliquam existimationem haberi velint, quia tantam Christianorum multitudinem tam paucis annis corrumpit. Contremiscant illi ad tremenda Dei judicia, nec quærant in funesta illa peste, prudentiæ humanæ, multo minus veræ sapientiæ quidquam, neque suspicentur homines qui cædibus, latrociniiisque grassati sunt, ut novam suam sectam propagarent, vel umbram doctrinæ aut pietatis habuissent. Itaque nullum illa nisi in acinacibus suis præsidium invenit: neque ullus unquam Muhamedanus quacumque doctrina polleret, potuit eam argumentis ullis confirmare, quæ non uno verbo diffari queant. Unde semper cavatum apud eos est ne de fide disputaretur, verùm ut crederentur omnia, etiam absurdissima quæ in Alcorano continerentur: nempe fabulæ ex ridiculis legendis excerptæ; anachronismi immanes, corruptio manifesta & stupida sacræ Scripturæ quam vix ex librorum numero noverunt; tum inanes superstitiones Judaicis deteriores, peccandi libertas, poenitentia præter lotiones, & precum immurmurationes nulla; omnia tandem quæ si vis abfuisset, ne auditorem quidem ullum habuissent. Hæc sunt religionis illius miracula, quam peccatis Christianorum irritatus Deus tanquam flagellum Orbis ex Tartaro prodire permisit, quæ tamen Christianam fidem non ita deleavit, quin inter calamitates innumeras, maxima usque ad hanc diem Christianorum in Oriente multitudo perseveraverit, quorum si omnia sectarum trium in quas dividuntur differentia, numerus

ineatur, superabit ille longo intervallo Muhamedanorum multitudinem. Jam igitur ab istius Patriarchæ historia narrare incipimus, quæ fuerit Christianorum conditio sub infidelibus dominis; nam illa magnopere discrepat ab eo statu, in quo Ecclesia sub Christianis Imperatoribus florebat: imò ab continua illa conficiatione quam sub Ethnicis patiebatur. Etenim sub istis, etiam qui Christianos tolerabant, pax Ecclesiarum ita plena nunquam fuit, ut liberæ plane essent: in persecutionibus quotidie moriendum pro Christo erat, amittenda bona, exilia, carceres, tormenta acerbissima Christianis impendebant: sub Muhamedanis summa libertas, ut quam quisque sectam profiteretur, in ea liberè viveret, modò tributum solveret: nulla vulgò ad ejurandam fidem coactio, poenæ nullæ: verum cum infidelium Magistratus, summam in Ecclesias & Ecclesiasticos auctoritatem haberent, Arabesque inter alia vitia, præcipuum perpetuumque à natura traxerint avaritiæ malum; nullo unquam flagello tam miserè Ecclesiæ vexatæ sunt, quàm exactionibus pecuniarum, tum ab Episcopis, ut dignitatem suam retinerent; tum ab alijs, ut contra Canones vel absolutionem à criminibus, vel dignitates in Ecclesia consequerentur. Hinc imminuta auctoritas Episcopalis: hinc eversio disciplinæ; simoniæque labes gravissima quæ totum Orientem corripuit: quæ omnia fusiùs intelligentur ex iis quæ scripturi deinde sumus.

Benjamini
initia.

Benjamin parentibus divitibus ortus, illis relictis venit ad Monasterium vocatum *Dir Kyrios*, quod ex multis solum fermè supererat post reliquorum vastationem à Persis factam, quia erat ad Orientalem partem oræ maritimæ. Ibi à sene quodam Monacho Theona habitum monasticum suscepit; tantumque in virtute & doctrina profecit, ut brevi tempore Magistros suos longo intervallo superaret. Cum in oratione frequentissimè pernoctaret, facta aliquando ad eum in Ecclesia vox dicitur, qua significaretur futurum eum Pastorem gregis Christi, hoc est Patriarcham. Quod cum ad Theonam retulisset, monuit ille ut caveret ab insidijs Satanæ, neque enim sibi qui à quinquaginta annis in Monasterio vivebat, simile quidquam accidisse, aut de alijs audivisse. Ejus tamen consilio rem Andronico Patriarchæ ut referrent in urbem venerunt: qui gratiâ quæ in Benjaminio apparebat, hominisque humilitate & modestia commotus, Theonæ quidem redeundi licentiam dedit, Benjaminum retinuit, quasi electum à Deo ad Ecclesiæ

Ecclesiæ ministerium & eum Sacerdotem ordinavit, maximamque negotiorum Ecclesiasticorum partem ejus curæ commisit. Tandem cum exitus vitæ instaret, illum successorem designavit. Unde post ejus obitum Patriarcha à suis constitutus est.

Postquam Heraclius Persas sex annorum continuo bello profugasset, in Provincias ab illis recuperatas novos Præfectos misit, atque inter alios Cyrum, qui Præfecturam simul & Patriarchatum obtineret, Alexandriam proficisci jussit. Erat, ut ex variis Autoribus collegit Baronius, annus J.C. 630^m, Heraclii 21^m; cum Cyrus post Gregorii mortem Patriarcha Alexandrinus renuntiatus est. Cum advenisset, monitum aiunt Benjaminum ab Angelo, ut ex urbe profugeret atque alia in loca se cum suis reciperet; imminere enim persecutiones gravissimas, quæ post decennium finem acciperent. Scripsit ergo ad Episcopos ut laterent, donec transiret ira Domini; simulque per literas eos hortatus est ad retinendam constantissimè fidem Jacobiticam: mox ordinatis, quoad fieri poterat, rebus Ecclesiæ, ipse per viam Marcotidis, pedes, comitantibus discipulis duodecim, venit ad Moni, inde ad Vallem Habib; ubi pauci Monachi supererant à tempore Damiani Patriarchæ; neque enim per Barbaros licebat augeri eorum numerum. Postea ulterius abiit in Sahid, sive superiorem Thebaidem, ibique annos integros decem delituit in exiguo Monasterio, non longè à Kus, urbe satis celebri, ut docet Abuselah Armenus, qui adhuc suo tempore superfuisset ejus memoriam testatur. Toto illo intervallo quamdiu Heraclius Ægyptum obtinuit, & ejus Vicarius quem Arabes Mo-caucasum vocant, Jacobitæ magnas calamitates sustinuerunt, adeo ut ingens eorum multitudo ad fidem Calchedonensem transiverit, dum alii malis victi, alii præmiis & pollicitationibus delin-ti, vinci se passi sunt. Inter eos memorantur Episcopi duo, Petrus Episcopus Nikioufi, & Victor Fiumensis. Alii, inter quos Men-nas Benjaminus frater, post multa tormenta in mare demersi sunt. Persecutionis ea occasione adversus Jacobitas cœptæ meminerunt Æthiopes in suis Synaxariis, aiuntque Maxirianum quemdam Præfectum misisse in desertum ducentos milites ad investigandos Episcopos, & cogendos Monachos ad suscipiendam Calchedonensis Concilii fidem: Abbatem Samuelem cæterorum nomine respon-disse: *Non recipimus chartam impuram, neque obtemperamus Concilio Calchedonensi, neque admittimus alium Patriarcham quàm Abba Benjaminum, Doctorem & Pastorem nostrum.* Et

Factus Pa-
triarcha fu-
git.

paulò post: *Et dixit, Anathema sit libro Imperatoris Romani heretici, & anathema sit Calchedonensi fidei, & omnibus qui credunt in eam; & sic dilaceravit illum librum, & projecit eum ante januam Ecclesie.* Heraclius præterea Episcopos constituit in singulis Ægypti urbibus usque ad Anina, omnique calamitatum genere gregem *Theodosianorum*, nam eo loco ita suos majores Jacobitæ vocant, dissipavit. Monitus ille fuerat per somnium, ut caveret à gente circumcisa, quæ adversus eum insurrectura esset, magnamque terræ partem occupatura. Id vaticinium ille cum existimaret ad Judæos pertinere, eos ubique locorum occidi jussit, etiam Samaritanos. Verum frustra, nam significabantur Arabes, qui eo tempore duce Muhamede cum Idololatrias ex ea regione multos ad unius Dei cultum convertissent, arma in Syriam Palæstinamque transfulerunt, easque provincias occupaverunt. Heraclius cum sæpè adversus eos exercitus ingentes in aciem eduxisset, semper victus est, in pœnam, ut existimant, eorum quæ adversus Jacobitas fecerat, ad stabiliendam fidem Calchedonensem.

*Eutych. l. 2.
 P. 244. &c.*

*Arabum ex-
 peditio Ægy-
 ptiaca.
 Eim. in Abu-
 becre, p. 17-23.
 &c.*

*Almed. F.
 AyoZ, Makriz,
 &c.*

Palæstina in potestatem Saracenorum venit anno Hegiræ 13° J. C. 634°, jam mortuo Muhamede, sub Califatu Abubecri ejus successoris : an. 14° expugnata est Damascus : an. 15° Hemesa & aliæ urbes : an. 16° Amrus filius Alasi, Hierosolymam cepit, reliquamque Palæstinam subegit. Anno 18° qui erat J. C. 639^{us}, idem Amrus ducto in Ægyptum exercitu, Misram seu Memphin obsedit, eamque cepit eodem anno, vel sequenti secundum alios Historicos; posteaque pax cum Mocaucaso sancita, adeo ut quicumque ex Romanis, sive nativis Ægyptiis manere vellet, aurei solidi tributum capitatum pendere cogeretur. Anno demum 20°, qui incipiens à 20° Decembris respondet an. J. C. 640° & 641°, Alexandria capta est, cum per quatuordecim menses obsidionem tolerasset : ab Amro filio Alassi, qui quidem annus 641^{us} accuratè convenit cum anno Diocletiani 357, quo eundem scribit Severus inquisivisse de Beniamine Patriarcha, plenamque ei securitatem dedisse, de qua mox dicitur. Venisse Arabes in Ægyptum cum potentissimo exercitu idem notat, die 12^a mensis Baimi : atque contra Misram, seu Memphin castra posuisse : Romanos fugisse & in castrum quoddam inter Sahid & Elrif se recepisse, quod *Babylon* & *Fostat* vocabatur, servato usque ad Severi tempora nomine. Romani cum ter adversus Muslemanos acie decertassent & in fugam acti essent, priores civitatis Amro se dederunt, concessa lege

securitatis, ex præscripto Muhamedis, ut modò tributum solverent securi essent, neque ulli injuriæ essent obnoxii : rebellantes aut obsequium detrectantes perderent, & spoliarent : Romanos, hoc est Græcos, præsertim Patricium eorum, interneccione delerent. Ea lege tanquam à Muhamede promulgata, jus victores Arabes victis Ægyptiis dixerunt. Tertio anno postquam Amrus Ægyptum ingressus esset, capta est Alexandria an. 360° Martyrum, J. C. 644°. Urbe capta muros everterunt Muslemiani, plurimasque Ecclesias incenderunt, inter quas fuit antiqua divi Marci, in qua corpus ejus repositum erat, eo loco ubi Petrus Martyr, antequam martyrium compleret, benedictionis gratiâ, preces ultimas fuderat. Tunc factum fuisse miraculum, ait Severus circa reliquias D. Marci, nempe quòd conflagrante Ecclesia, cùm navium præfecti in eam intrassent, pallia quæ super arcam ejus erant posita sustulerunt, cùm in ea nihil invenissent, postea verò caput D. Marci inter pallia repertum est.

Statim Amrus cùm audiisset quàm multa à Græcis passus fuisset Benjamin Patriarcha, jamque alter qui ab Heraclio missus patriarchalem simul dignitatem & præfecturam obtinuerat, veneno sumto vitam finivisset, misit per omnes Ægypti Provincias, literas securitatis ad eum in hæc verba, ut Severus refert : *Omnis locus in quo erit Benjamin Patriarcha Christianorum Coptitarum, plenam habeat securitatem, pacem & fidem à Deo : veniat ipse securè & tuto, resque Ecclesiæ suæ, & populi sui liberè administret.* Referunt eundem securitatis libellum Abuselah Armenus, Elmacinus, & alii ; sed ita ut quædam, quod in Orientalibus libris frequentissimum est, discrepantia lectionis reperiatur. Meminit etiam illius Makrizius : qui dum rationem exponit qua Arabes Ægyptum occupaverunt, quædam habet notatu dignissima & verisimilia, quæ alibi vix reperiuntur.

Ait eo tempore Ægypti incolas in duas quodammodo factiones divisos fuisse : Romanorum seu Græcorum Constantinopoli missorum, qui non modò præcipuas militiæ forique & tribunalium dignitates obtinebant, verùm etiam magna pars militum & ministerialium, Græci erant aut Græcæ originis : nempe illud erat quod docet nos Isidorus Pelusiota, legem fuisse quæ Ægyptios à gerendis magistratibus repellebat. Græci omnes isti, quorum numerus trecentorum & amplius millium erat, Melchitarum religionem sequebantur. Alia pars nativorum Ægyptiorum erat, qui

Securitas
Benjamino
concessa.

Jacobitz
Muhamedanis
dedunt.
Descript.
Æg. l. 2.

Coptitæ dicebantur, communi nomine, quamvis diversæ essent originis; nam alii erant Ægyptii, alii Nubii, alii Habessinii seu Æthiopes, imò nonnulli à Judæis prognati, qui omnes Jacobiticam sectam profitebantur. Erant ex illis scriptores, & ministeriales, agricolæ, artifices, mercatores; & quod majus erat, plerique Episcopi & Sacerdotes. Inimicitia inter utrosque continuæ erant, tamque acerbæ, ut nulla haberent inter se per matrimonium commercia: sæpè mutuis cædibus inter se commissis eas exasperabant, & Coptitæ erant longè superiores numero. Cùm verò Amrus in Ægyptum venisset, opposuerunt se Græci cum ingenti exercitu, sed sæpè victi sunt. Coptitæ cùm pacis condiciones ab Amro accepissent sub tributî pactione, Muslemis ad Græcos debellandos auxilium præbuerunt, eosque ex provincia pepulerunt. Id etiam significare videtur Severus, dum Sanutium quemdam fidelem, hoc est Jacobitam, memorat, qui inter Amrum & Benjaminum sequester pacis fuisse dicitur.

Benjamin
Alexandriam
venit.

Reversus Benjamin Alexandriam post annos tredecim quam inde fugerat, Amrum salutavit à quo benignè susceptus est; aiebat enim Amrus in tot provinciis quas Muslemis armis subegerat, neminem se vidisse cujus augustior & homine Dei dignior species foret. Illum igitur Ecclesias suas habere, & subjectæ sibi plebis curam agere jussit: mandavitque ut dum ipse in Africam interiorē, Pentapolinque proficisceretur, oraret, ut quemadmodum Ægyptus, ita & illæ Provinciæ in Arabum potestatem venirent, ipseque salvus inde remearet. Statim atque Benjamin Alexandriam rediit, multi qui sub Heraclio à Jacobitica fide recesserant, ad eam reversi sunt: alii qui persecutionis metu in Pentapolin & Africam fugerant, in urbem rediere, quorum plures atque inter alios Episcopi & Sacerdotes, cum lacrynis & dolore pristinam conversionem deprecari sunt: alii humano pudore victi, in fide Calchedonenſi quam antea professi fuerant, permanserunt.

Fusè narrat hoc loco Severus oblatam Benjaminō per somnium speciem eo ornata quo Discipuli Christi representantur, monuisse ut pararet sibi locum. Degebat tunc in quodam Monasterio dicto Matara, sive Stephanio, quod solum ex omnibus supererat à tempore Heraclii, ab hæreticis, hoc est Calchedonenſibus, non contaminatum; neque enim Ægyptii qui illud incolebant, adduci ullo modo poterant, ut à sua religione deficerent, extraneumque neminem receperant. Postea cùm is qui flagrantē Ecclesia D.

Marci, caput ejus abstulerat, navim conscendisset, ea nunquam in altum deduci potuit, quo miraculo stupens, illud Patriarchæ tradidit, qui cum honore susceptum in arca ex ebano collocavit. Ut verò opportuno tempore nova illi Ecclesiæ ædificaretur, magnam pecuniæ vim contulit Sanutius ille, de quo superius. Animum quoque adjecit Benjamin ad colligenda membra Ecclesiæ suæ, Monasteria tam virorum quàm mulierum restituenda, moresque plebis suæ in melius reformandos.

Reversus paulò post Amrus successorem accepit in Ægypti Præfectura, Abdallam filium Sahid qui primus Divanum exstruxit, ubi tributa colligerentur; & Ægyptios magnopere vexavit.

Facta est sub eo fames valida per totam Ægyptum: & Arabia cum eadem annonæ raritate premeretur, magna ex Ægypto frumenti copia deportata est, effosso alveo qui in Arabicum sinum pertingeret, quem vocant *Alveum Imperatoris fidelium*. Ingens post famem tota Ægypto mortalitas.

Habuit secum Benjamin Sacerdotem Agathonem, qui successor ejus fuit: is verò tempore Heraclii seculari veste indutus, ne agnosceretur, domos Jacobitarum circuibat, eos consolabatur, ipsique Eucharistiam deferrebat, instrumenta fabri lignarii circumferens, ut Melchitas falleret. Cum per decennium huic operi intentus fuisset, eum Benjamin apud se retinuit, præcipuaque Ecclesiæ negocia ejus fidei commisit. Ipse Benjamin biennio vitæ suæ ultimo, cum senio gravis, munia sua obire non posset, rogarunt Deum sui ut eum ex infelici hoc sæculo educeret in quietis locum. Morienti adfuisse scribunt Athanasium, Severum & Theodosium, qui ejus animam in cælos deferrent. Obiit 8^a Tybi, cum sedisset annos 39. quo die commemoratio ejus assignatur in Calendario Coptitarum.

Huic Severi narrationi subjicitur alia satis proluxa & verbosissima Agathonis successoris Benjaminini, ejusque dum viveret discipuli, multa in laudem ejus continens, res novas admodum paucas. Inter alias memorat eum dedicasse novam Ecclesiam S. Macarii in montis radice ædificatam, eò quòd Monachi multi senectute debiles, qui cellas à Monasterio satis remotas habebant, vix poterant in cacumen montis evadere. Eo consilio cum in desertum profectus fuisset, occurrisse illi magnam Monachorum turbam, juvenum cum ramis palmarum, senum cum thuribus, Sacerdotesque simul advenisse, & cum illis Basilium Episcopum Nikioufi,

Elmac.

Agathonis
historia.

Consecra-
tio Ecclesiæ
sancti Maca-
rii.

Canones
promulgati.Ecclesiarum
consecratio.

doctorem celebrem. Cùm dedicatio Ecclesiæ perageretur, apparuit senex venerandus, quem S. Macarium esse intellexerunt: tum mira alia ejusmodi multa narrantur, quæ ut apud hæreticos fieri non possunt, ita non dubitamus ex eorum genere esse quibus ignara plebs ab Episcopis suis in errore detineri solet. Omnia verò spectant ad commendandam novæ istius Ecclesiæ à Benjamino consecratae dignitatem; cujus etiam conservandæ causâ, Canones aliquot ad ritus Ecclesiasticos spectantes ibidem promulgavit. Illi præcipui sunt: Ne Sacerdos ullus ad sanctuarium illius Ecclesiæ, seu *βήμα*, accedat, nisi pallio seu stola sacerdotali ornatus, antequam incensum adolendum inferat: ne quis Sacerdos aut Diaconus in eodem sanctuario communionem accipiat, nisi amictus Omophorio sive pallio: nullus sub hoc sancto recto loquatur: nullus in eo sedeat etiam ad sacros libros legendos: nullus Sacerdos aut Monachus illud sanctuarium ingrediatur, nisi ordinatus ad illius ministerium: quæ omnia ut quædam alia, statuta ab eo sunt sub æterni anathematis pœna; quod etiam denuntiatur adversus eos qui vel temerè, vel gloriæ causâ Sacerdotes, aut Monachos peregrinos eum in locum inducerent, aut partem ejus occuparent. Illæ verò comminationes non videntur ætati Benjaminii convenire. Verùm hæc omnia à Coptitis recentioribus inventa esse non dubitamus, ut novo suo Monasterio D. Macarii dignitatem conciliarent: ad illud enim ex tota Ægypto, & toto etiam Oriente, magnus est peregrinorum concursus; antiquum verò magis neglectam est. Nihil porro in longa illa sub Agathonis nomine fabula dignum observatione legitur, nisi quod Ecclesiæ illius novæ consecratio facta est, Episcoporum & ipsius Patriarchæ ministerio, Chrismatismis tam ad altare quàm ad parietes consignationibus, precibus tandem quæ continentur eo in libro qui Arabicè *Takriz* appellatur, quique omnia ad Ecclesiarum consecrationem spectantia, ritus scilicet orationesque, complectitur. Id enim etiam in ridicula narratione certissimum esse debet, quod verum an falsum sit, Coptitarum non interest. At talis est consecrandæ Ecclesiæ ritus, qui ipsis cum aliis omnibus Christianis communis est, nulla nisi cæremoniarum & orationum innoxia differentia; quod tamen probat non adeo recentem aut à Romanis Pontificibus exco-gitatam hanc esse cæremoniam, quæ à juratis Romanæ fidei hostibus, tam religiosè servetur. Hujus consecrationis Ecclesiæ S. Macarii commemoratio fit in Calendario Coptico 8^a Tybi, quo die

PATRIARCHARUM ALEXANDRINORUM. 167

fit etiam Benjamini memoria, quæ pariter consignata reperitur in Kalendario Æthiopico.

BENJAMIN
P. XXXVIII.

Ludolf. Com-
ment. p. 404.

Observari etiam debet ex Agathonis narratione dies istius consecrationis, quæ dicitur facta fuisse 8^a mensis Tybi : atque paulò ante obitum Benjamini: Confirmatur quippe traditio hæc, testimonio Coptici Calendarii, in quo ad eandem diem, quæ respondet 13^a Januarii, notatur : *Commemoratio Benjamin Patriarchæ Alexandrini : Et consecratio Ecclesiæ S. Macarii in Chiba Scetis* : ita enim vocari desertum quod vulgò S. Macarii, & vallem Habib, seu Natron, quæ est Nitria veterum, docet nos Makrizius in Ægypti descriptione ; ex Chanechi alio Muhamedano, qui de Monasteriis scripsit, ut Abuselah Armenus & alii. Atque ea sunt quæ de Benjamin legantur, tam in isto fragmento sub Agathonis nomine, quàm in ejus vita.

Obiisse eum scribit Makrizius Alexandria an. Hegiræ 39^o, qui est J. C. 659^m, cùm sedisset annos 39. Canon Chronologicus Abulbircat an. 38. menses 10. Pontificatûs numerat, annumque Martyrum 364^{um} supremum illi fuisse : ordinationem factam an. 325^o asserit, qui quidem numerus consistere non potest, nam ita mors ejus incideret in an. J. C. 648^{um}, toto decennio citiùs quàm Elmacinus, & alii eandem assignant. Tanta est autem apud Auctores nostros Græcos & Latinos earum rerum, quæ sub Muhamedanis principibus gesta sunt ignorantia, ut ne nomina quidem eorum qui Muhamedi successerunt, sana legantur in libris fere omnibus. Cùm porrò res Ecclesiasticas non Politicas prosequamur, brevem tantummodo notitiam dabimus successione Principum, ut sub quibus quæque contigerint, possit intelligi : tum ne ex illarum rerum obscuritate confusio in historia oriri possit, quæ magna sit necesse est cùm supremi Imperatores qui Califæ appellati sunt, pro Præfectis accipiuntur, ut sæpè in Græca Latinaque historia observari potest, nec dignitatum ratio satis intelligitur : quæ omnia paucis explicare conabimur.

Ut ergo superiùs diximus & ipse annorum calculus manifestum facit, cepit Benjamin Jacobitarum Alexandrinam Sedem obtinere anno Hegiræ 1^o, J. C. 622^o : & cùm annos 39. fèrmè integros federit, obitus ejus incidit in an. 659^m aut 666^{um} J. C. Eo intervallo quatuor Muhamedanorum Principes sibi invicem successerunt.

Successio
Muhamedanorum
principum.

Muhamed obiit anno fugæ suæ sive Hegiræ 11^o, J. C. 632^o.

Abubeker ejus successor obiit anno 13°, J. C. 634°.

Omar Califatum obtinuit per annos decem, occisusque est an. 23°, qui incurrit in an. J. C. 643^{um} & 644^{um}. Othman 4^{us} periit an. 34°, J. C. 654°.

Hali gener Muhamedis, Fatimæ ejus filix maritus, Califa renunciatus est an. Heg. 34°, J. C. 654°; multisque bellis civilibus impetitus, tam ab Aïscha Muhamedis vidua, quàm à Muavia & aliis Ommiæ filiis, à sicario Abdelrahmano occisus est sub finem anni 39°, J. C. 660ⁱ: atque eo tempore Amrus filius Alassi qui Ægyptum nomine Saracenorum primus occupaverat, primusque Provinciæ præfectus fuerat, secundam præfecturam obtinuit, qui character est anni quo obiit Benjamin. Ita sub illius Patriarchatu præter eversionem Romani in Ægypto Imperii, quinque Muhamedanos principes, numerato Pseudopropheta, viderunt Ægyptii.

De Califa-
rum & Præ-
fectorum Æ-
gypti autori-
tate.

Cùm porrò Califa supremam tam in rebus religionis, quàm in Republica haberet auctoritatem, mos primorum illorum sæculo-
rum fuit, ut provincias per Præfectos suos regerent, quod ad Fa-
timidarum usque regnum qui adversus Califas rebellaverunt, con-
stantissimè servatum est. Erat talium Præfectorum magna, nec
ullis fermè legibus adstricta auctoritas: cùm omnia Califarum no-
mine gererentur, qui procul aberant, & quos donis pecuniisque
placabant, si qui rem publicam malè administrassent. Erant tum
ingentes opes Ægypti, licèt diuturnis bellis exhaustæ viderentur;
nam quando ea provincia primùm in Muhamedanorum potesta-
tem venit, denariorum aureorum trices centena millia ex tribu-
tis omnibus conficiebantur, ut Autores varii scriptum reliquerunt.
Hinc perpetuæ Præfectorum mutationes, dum quisque nummo-
rum plenam provinciam sibi decerni conatur. Hinc pariter exa-
ctiones tributorum omnis generis quotidianæ, omnia apud avaros
Magistratus venalia; quæ calamitas non modò fertilissimam pro-
vinciam civibus divitiisque exhaustit, sed omnem funditus disci-
plinam Ecclesiasticam abolevit. Nam sicut exulabat sub Heraclio
& ejus prædecessoribus Patriarcha Jacobitarum, ita sub Muhame-
danis primas ille obtinuit, adeo ut annis prope centum Melchitæ
seu Orthodoxi Græci sine Antistite fuerint; & quando in illud jus
antiquum postliminio reversi sunt, quod nonnisi favore Principum,
largitionibusque obtinuerunt, non minora ab Hæreticis quàm à
Muhamedanis passi fuerunt.

Obtinuerunt

PATRIARCHARUM ALEXANDRINORUM. 169

BENJAMIN
P. XXXVIII.
Status Chri-
stianorum.
V. Elmacin.
P. II.

Obtinerunt quidem Christiani securitatem ab ipso Muhamede, qui deleri illos vetuit, ut ostendunt diversa ejus apophthegmata in Traditionum libris conservata, quæ inter ejus sectatores sacræ cujusdam legis vim habent, quorum aliqua occurrunt apud Elmacinum in ejus vita : plurima in Alcorano passim. Extat præterea lex quædam plenariæ securitatis, vulgò Testamentum Muhamedis dictum ; melius *Præceptum*, quod ab Gabriele Sionita olim Lutetiæ editum est utrâque linguâ ; & quod extat passim in variis Codd. Mss. de cujus veritate, cum ne quidem ipsi Muhamedani dubitent, mirum est doctos aliquot viros, sed in Arabica litteratura mediocriter versatos, non ambigere modò, sed tanquam supposititium scriptum arguere. Et tamen secundum hujus legis dispositionem res Christianorum ordinatas, tum à Califis, tum ab eorum Præfectis ubique fuisse, extra controversiam est. Verum cum non displicerent Infidelibus Christianorum inter se dissidia, neque ea componere satagerent, aliam ex primariæ hujus legis interpretatione induxerunt circa Christianos, ut omisiss inter sectas quæ tunc temporis Ecclesiam dividebant controversiis, omnes indifferenter foverent : Ecclesiarum, Monasteriorum, dignitatum possessio confirmaretur, modò quicumque Episcopus, Archimandrita, aut Laici probare possent, se eam ante sublatum Romanorum Imperium habuisse. Probationes autem nullo negotio fiebant, numeratâ pecuniâ. Ita Jacobitæ cum probassent nemine reclamante, quia Græci fermè omnes auferant, se esse legitimos Cyrilli successores, & per injuriam spoliatos Ecclesiis suis ab Orthodoxis fuisse ; non modò eas quæ ab ipsis Imperatorum mandato ablatae erant, sed multas alias invaserunt. Tandem cum Melchitæ antiquitatem possessionis suæ probassent, & jure & gravissimis impensis restitutionem earum consecuti sunt. In Perside, Mesopotamiaque, ubi magnus erat Nestorianorum numerus, cum eorum Primas, quem Catholicum appellant, in omnes fere Christianos supremam obtineret auctoritatem, eam quoque illis in Provinciis Muhamedanorum beneficio conservavit, cum alibi nullas fermè Ecclesias haberent. Hæc primorum illorum sub Muhamedana tyrannide temporum conditio fuit, non planè misera, cum nondum edicta plura adversus Christianos promulgata essent, quos deinceps multa pati necesse fuit, quæ suis locis referemus.

Lutet. 1630.

Ad istæ tempora referri oportet historiam de Joanne Grammatico, vulgò Philopono, quæ apud Abulfaragium & multos alios

De Joanne
Philopono.

*Abulfarag.
p. 114.**In Ædipso.**Benjamini
memoria.**Comm. XL
P. 430**Telles Hist.
de Ethiop.*

legitur : nempe petivisse illum ab Amro Præfecto , ut librorum qui in Bibliotheca Regum Ægypti repositi erant copia sibi fieret , quandoquidem inutiles Muslemannis futuri erant. Consultum Omarem Calisam respondisse ; illis in libris ea contineri quæ Alcorano contraria essent , vel quæ in eodem legerentur , aut essent similia : atque ita aut impios esse , aut inutiles , & idcirco abolendos ; quod factum est , distributis illis per balnea publica , atque combustis. De illa veteri Bibliotheca Alexandrina notissimum , eam Alexandrino primo bello periisse , ab igne navibus injecto , & navalia , mox urbem pervadente consumtam : restitutam fuisse à Cleopatra , translatâ Pergamenâ , & in Serapeo collocatam , Autores antiqui tradunt. An ex ea quidquam superfuerit post destructum sub Theophilo Patriarcha Serapeum , non plane liquet : nec Eunapius qui de ea re plurimum questus est , librorum meminit. Fuisse præterea Alexandrinæ Ecclesiæ Bibliothecam , in qua multi fuerint eximii Codices , præsertim Versionum sacræ Scripturæ , Commentariorum , Hexaplorum , & aliarum ejusmodi lucubrationum , dubitari non potest. An de his historia intelligenda sit non multum interest : nam habet aliquid *arabum* , ut Arabibus familiare est. Eam alibi huc usque non reperiimus.

Benjamini quoque celebris apud Æthiopes memoria est , cujus ut superius observavimus , commemoratio agitur ad 8^{am} mensis Ter , qui Tybi Ægyptiorum respondet , initiumque habet à 27^a Decembris : altera item 13^a Nahase , qui est Ægyptiorum Mefori , nempe ut is sit dies depositionis ; alter , ut diximus , consecrationis altaris in Monasterio S. Macarii. Itaque unus est atque idem Benjaminus , quod dubium Ludolfus superfuisse sibi , agnovit. Ejus autem memoria præcipuè celebratur multis de causis , tum quia Patriarcha Alexandrinus fuit ex Jacobitarum secta , quorum insigniores solent Æthiopes ex Diptychis antiquis translatos Kalendario inferere , & annuis festis celebrare eorum laudes. Secunda ratio fuit , quòd Jacobiticæ sectæ in Alexandrina Ecclesia instaurator habitus , quia eam sedem ex qua Imperatorum Græcorum edictis Jacobitæ pulsi fuerant , favore Muhamedanorum recuperavit : tertia , quòd Metropolitam Cyrillum nomine in Æthiopiam miserit. Docuerunt nos id Patres Societatis Jesu ex libris Axumensibus , cum nec Severus , nec poeta illi Æthiopes Martyrologiorum & encomiorum metricorum Autores , quidquam de illa missione memoriæ mandaverint ; tantaque sit obscuritas historiæ

Æthiopica, ut Metropolitaram suorum catalogum non habeant. Quarta etiam causa est honoris eximii quo Benjaminum Æthiopes prosequuntur, quod Teklahaimanot qui apud eos pater existimatur Vitæ monasticæ, à Beniamino missus ad eos fuerit, atque ea ratione Lusitani melius quàm huc usque factum fuerat, de illius ætate judicaverunt: nam antea ignorabatur quando vixisset, constansque sanctitatis fama quam ipsi omnes tribuunt, multos fefellerat, adeo ut facilè crederetur fuisse ex antiquorum Monachorum numero, qui ante Ecclesiæ Æthiopica corruptionem floruerant. Unde Æthiopes qui Romæ decimo sexto sæculo Novum Testamentum & Liturgias suâ linguâ ediderunt, professi sunt in variis epigraphis, filios se esse Teklahaimanot, ne levem quidem de ejus oportheiæ aut sanctitate suspensionem habentes. In ipsius vita, qualis legebatur in libris Axumenisibus, Arabicaque ejus versio extat in Bibliotheca Regia, dicitur eum anno ætatis 15^o à parentibus ductum ad Abba Cyrillum qui Metropolita Æthiopica fuit, quando Benjamin Alexandrinæ Ecclesiæ præsidebat.

In Concilio vi^o inserta reperitur Actis, Epistola S. Sophronii, quam etiam refert Baronius ad an. 633^{um}, sed non integram, in qua anathema pronuntiatur adversus hæreticos multos, Monophysitas præsertim & Monotheletas; inter quos recensetur Benjamin Alexandrinus.

De eodem quædam observavit Jobus Ludolfus annotationibus ad Calendarium Æthiopicum ex Autore vitæ Samuelis cujusdam Mss. Æthiopica: ex quo hæc refert. *Postea facta est magna persecutio jussu Imperatoris Romani propter Orthodoxam fidem. Et expulerunt sede sua Abba Benjaminum Patriarcham Alexandrinum: quem occidere volebat homo quidam missus ab Imperatore Romano. Et attulerunt librum Calchedonensem, & jusserunt ut omnes Presbyteri subscriberent fidei Calchedonensi: & constitutus est alius in locum Abba Benjamin. Sequitur deinde, inquit Ludolfus, persecutio Benjamin ejusque affectuum manu militari per sylvas & saltus, per invia & avia usque in desertum. Tum refert Elmacini testimonium, de quo superius.*

Longam & accuratam disquisitionem de Epocha Muhamedanorum inseruerunt suæ Patriarcharum Alexandrinorum historiæ doctissimi Continuatores operis Bollandiani; cò spectantem præsertim, ut annus expeditionis Ægyptiæ, & captæ per Infideles Alexandriæ certò constitueretur. Multa præclare observata, errorisque

Y ij

 Teller l. 12
c. 33. p. 84.

Com. p. 429.

Chronologorum multiplices confutati : & rectè, ut quæ ad susceptæ historiæ seriem pertinebant, ex Elmacino potius, quem solum Autorem Arabem habuerunt præ oculis, quam ex Græcis aut Latinis, temporum ratio stabiliretur, constituerunt. Sed qui Elmacinum sequuntur si Arabicè nesciant, non ipsum, sed interpretem Thomam Erpenium sequi deprehenduntur, qui ut in multis sæpè falsus est, ita circa annorum Arabicorum cum Romanis comparationem sæpissimè.

Hist. Sarac.
P. 4. Gravini V.
lugbeg.
Gr. in Al-
frag. p. 55.
Statim enim ad annum primum Hegiræ offendit. Incidit, inquit, Hegira seu fuga Muhamedis, in 16^{am} Julii anni Æræ Christianæ 622ⁱ. At certissimum est caput illius Epochæ constituendum an. 622^o, 15^a Julii, feria v^a, ut accuratissimis tabulis suis expressit Joannes Gravius : quamvis in eundem cum Erpenio errorem iniegerit Eduardus Pocockius. Itaque in hujus operis decursu annos Hegiræ secundum Gravianas tabulas ad Romanos comparabimus. Cum enim Autor non modò Arabicæ Persicæque linguarum peritissimus foret, sed etiam insignis Mathematicus, accuratius omnino illos in tabulis digessit, quam quisquam alius. Neque si aliquando calculi illius cum Autoribus, Orientalibus non consentient, ab eo recedemus, cum infinitis exemplis constet hallucinari sæpissimè Elmacinum, & eo præstantiores historicos, cum annos Hegiræ comparant annis Martyrum aut Alexandri, licet rarior illius æræ sit apud eos usus, qui vulgaris est apud Antiochenos & Syros reliquos.

In Can. an-
norum Abul-
faug.

Laudantur à Jacobitis Epistolæ Heortasticæ seu Paschales aliquot Benjaminii illius sui Patriarchæ, & ab Autore tractatus *Fidei Patrum* refertur testimonium ex v¹a adversus eos hæreticos, qui asserbant divinitatem verbi Dei esse mortuam.

AGATHO
Pat. XXXIX.

AGATHO PATRIARCHA XXXIX.

Agathonis
initia, perse-
cutio,

POSTQUAM Benjamin ex vita migravit, elegerunt Jacobitæ ejus loco Agathonem sacerdotem ejus discipulum, qui cum eo per multos annos constanter laboraverat, eumque Patriarcham constituerunt. Magnam ille in colligendis ovibus dissipati gregis sui curam adhibuit, cum multi à Jacobitica fide defecissent, Heraclii & aliorum Imperatorum qui Calchedonensibus favebant, metu. Supererant præterea sectarii ex Gaiianistis & Barsanuphiensis complures, in quibus reducendis, aut compescendis,

fuit ipsi magnopere laborandum. Accessit gravior difficultas ex autoritate quam vir inter Calchedonenses primarius, nomine Theodosius, à Muhamedanorum principe Yezid Muaviae filio obtinuit, in omnes Christianos Alexandriae, Mareotidis, vicinæque regionis, ita ut Praefecto Ægypti, jus nullum in eum foret. Is Theodosius statim Agathonem aggressus est, & ab eo tributi nomine annuos aureos denarios triginta sex exegit, pro se suisque discipulis: nec iis contentus exigebat præterea expensarum in Nautas Classariosque nomine, & sub aliis ejusmodi causis, plurima: adeo ut præter tributa ordinaria septem denariorum millia ab eo expresserit. Ita coactus est Agatho, intra cellam, seu domum Patriarchalem, continere se, veritus Theodosii injurias, præsertim cum significasset, ut quicumque Agathonem diu vel noctu ex-cuntem reperiret, lapidibus eum obrueret, & occideret, se pro eo responsurum. Tot injuriis nihil aliud quam summam patientiam opposuit Patriarcha.

Ejus tempore ædificata est Ecclesia nomine S. Macarii; cumque numerus fratum, hoc est Monachorum Jacobitarum, magis ac magis augetur, cellas ædificaverunt variis in locis, earum loco quæ in Persica strage everse fuerant.

Narrat deinde Severus longam historiam Joannis Semnudæi Sacerdotis & Archimanditæ, cujus ex diuturna & gravi ægritudine sanationem per miraculum factam refert, oblatâ per somnium visione. Eundem postea, divina quoque revelatione cognitum, ad se Agatho accersivit, scriptis ad Minam Episcopum Fiumensem literis, quia Monasterium erat in ipsius Diocesi. Ut advenit, Ecclesiasticorum negotiorum maximam ei partem commisit, sciens ex facta prius revelatione, fore ut sibi in Patriarchatu Alexandrino succederet. Ea propter cum instarent multi ut eum Episcopum ordinaret, vel in superiori Thebaide, vel in alia quacunque Ecclesia vacante, noluit, ne ita aditum illi ad supremam dignitatem præcluderet. Ea verba notanda sunt, ut intelligatur summa olim religione & dudum post Muhamedanorum imperium, ab Alexandrinis observatam fuisse sanctissimam de non transferendis Episcopis disciplinam: quæ quidem apud Jacobitas diutissime permansit; apud Nestorianos, quantum ex illorum historia colligere potuimus, prorsus neglecta est.

Magnam diligentiam adhibuit in ordinandis Sacerdotibus & Episcopis, qui vitæ merito, sacerdotio digni essent. Orta est co-

dem tempore hæresis impura Iconomachorum, ita enim interpretanda videtur vox quæ hoc loco occurrit, ad eosque referenda nova illa hæresis: sed nondum ortam illam fuisse constat ex certioribus monumentis.

Obiit Agatho post longam ægritudinem, cum sedisset secundum Severum annis 19. Paophi 16^a, qua die memoria ejus assignatur in Calendario Coptitarum. Elmacinus obitum ejus assignat an. Hegiræ 58°, J. C. 677°. Makrizius an. 56° Hegiræ, sexdecimque annos Pontificatus ipsi attribuit, nec plura de eo occurrunt.

Eo temporis intervallo quo ille Sedem Alexandrinam obtinuit, obiit Hali filius Abutaleb an. Hegiræ 40°, J. C. 66°, occisus à sicario, post continua bella cum Ommiæ filii, unde nata est controversia de Pontificatu quæ adhuc viget, cum Haliadæ Ommiadas, quasi Califatus invalores detestentur, & Pontificatum in ejus familia permansisse existiment, qui sæpè à diversis repetitus sit: tandemque, ut stolidi hodiernorum Persarum opinio est, in Mehedio ultimo quem superesse credunt, reviviscet.

Hacen Halis ex Fatima filia Muhamedis, filius, post mortem patris Califa renuntiatus, anno sequenti abdicavit imperium.

Muavia primus ex Ommiæ filii Califa eodem an. 41°, J. C. 661°, Imperium iniit, quod ad mortem usque retinuit, quæ contigit an. Heg. 60°, J. C. 679°; atque adeo Agathonis supervixit. Successere Yezid Muavia secundus, Abdalla victus à Meruano.

Nulla sub illis Califis mutatio rerum quoad res Ægyptiacas, quæ per Præfectos administratæ sunt, sicut ab initio Imperii factum fuerat.

JOANNES
SEMNUDÆUS,
Patr. XL.

JOANNES SEMNUDÆUS PATRIARCHA XL.

Joannis
initia.

MORTUO Agathone, Theodorus quem eundem esse non dubitamus qui superius Theodosius appellatus est, cum Calchedonensis fidei tenacissimus foret, ut Jacobitis molestiam crearet, omnibus quæ in Patriarchio erant sigillum publicum apposuit, adeo ut ipso mortis die, ne panem quidem quo vescerentur haberent domestici Patriarchæ. Hanc injuriam aiunt à Deo statim vindicatum, à quo percussus sit morbo insanabili, dolore viscerum, & fame siti que inexplibili, adeo ut duodecim panis rotulos seu libras Ægyptiacas, viginti quatuor carnis, duos sicuum

cartillos comederet : ebiberetque utrem vini Mareotici , nec satiaretur , unde paulò post horrenda morte extinctum eum esse scribunt. Joannes Semnudatus in Agathonis locum successit. Theodoro successit filius ejus , sed diversæ fidei , nam erat Jacobita , qui Joannem Patriarcham magnopere diligens , eum tanquam filius patrem observabat. Cùm verò totus Oriens bello continuo inter Græcos & Muslemas arderet , Merüan Califa provinciarum præfecturam filiis suis dedit , & Abdel-Azizo Ægyptum regendam commisit : duos ille scribas seu secretarios assumpsit , quorum unus Athanasius vocabatur , Syrus Edeffenus : alter Isaac ex Sebraini , uterque Jacobita. Statim atque Abdel-Azizus Ægyptum ingressus est , scripsit Joannes ad Secretarios de obsignatione omnium bonorum Patriarchii : illi verò rescripserunt , ut ablatis sigillis , quæcumque ad Ecclesiam pertinebant Patriarchæ Joanni restituerentur.

Venientem Abdel-Azizum cùm Joannes non salutasset quia ejus adventum ignoraverat , ea occasio calumniandi oblata Theophaniciuidam Melchitæ , qui Theodori sororem habebat in matrimonio. Is enim eum apud principem detulit , quasi per superbiam obsequium detrectasset , tum quòd opes ingentes accumulasset. Unde accersito & graviter increpato , mandavit Abdel-Azizus , ut centum aureorum millia fisco repræsentaret : donec multæ satisfecisset , in custodia servaretur à Ministeriali quodam duro & barbaro , qui statim jussit pedes ejus ignitis carbonibus admoveri , ut supplicio illo ad pecuniam quæ imperata erat solvendam cogretur , cùm professus fuisset Joannes , ne centum quidem drachmas habere se. Ea nocte uxor Principis magnis doloribus vexata , misit ad Ministerialem illum , vetans ne quid mali Joannes pateretur. Postero die Princeps jussit , ut quod blanditiis ab eo extorquere posset , illud acciperet. Ille minatus se cum veste Judæi indutum , vultuque cinere insperso per urbem ignominiosè circumducturum ; cùm nihil proficeret , Joanne paupertatem excusante , quinquaginta millia denariorum aureorum petiit , moxque decem millibus contentum se fore dixit. Eam pecuniam Christiani Jacobitæ , qui in officiis Divani erant , collaturos se polliciti sunt , ne majus Ecclesia detrimentum caperet. Postea Joannes ad Principem ductus est , à quo benignè exceptus , reliquæ pecuniæ remissionem accepit. Ex palatio à suis cum honore deductus , statim in Ecclesiam venit ; & quia eo die FERIA 5^a hebdo-

Persecutio,
exactio pecu-
niz, liberatio.

Ecclesiæ S.
Marci ædifi-
cata.

madæ sanctæ celebrabatur, statim ille lavit pedes suorum ex Ecclesiastica consuetudine; tum Liturgiam celebravit, sacraque mysteria circumtulit: & Eucharistiâ populo distributâ, in Patriarchium reversus est. Paulò post Theophanes ille Præfectus Marcotidis, accusatus & in carcerem conjectus, post dira tormenta, jussu Abdel-Azizi interfectus est, in poenam, ut existimant, eorum quæ contra Joannem perpetraverat. Mandatum quoque est, publicato Edicto, ut nemo Patriarcham verbo vel injuriâ læderet, ut liberè in urbem venire, & ex ea egredi ipsi liceret, omnes ei honorem deferrent. His ita transactis, primores Christianorum, & qui in aulicis officiis erant, pecuniam quam polliciti fuerant, Principi detulerunt. Nec minus liberales fuerunt in conferendis quæ ad Ecclesiæ D. Marci quam moliebatur restitutionem erant necessaria. Eam ædificationem triennio absolvit, vasa & ornamenta ad divinum cultum, quantum opus erat, comparavit. Domo etiam & possessiones, tam Misræ, quàm in Mareotide, & Alexandriæ acquisivit, & Ecclesiæ donavit, molendinum, furnum, torcular olearium. Ingruente autem fame, quæ per triennium totam Ægyptum vehementer afflixit, ex eadem Ecclesia panis & drachma bis per hebdomadem egenis distribuebantur summâ liberalitate, sine qua maxima hominum pars periisset.

Eo tempore recepti sunt ad communionem Ecclesiæ Jacobiticæ populi Ahzoua & Scitos, qui prius Calchedonensem fidem sequebantur: qui verò his corruptis nominibus designentur ignoramus. Cùm autem in tanta calamitate Orthodoxi Episcopos non haberent, facile fuit eos ad hæresin transferri, quæ omnes paulò post Coptitas infecit.

Cùm audisset esse in Monasterio D. Macarii Monachum doctrina & pietate insignem Isaacum, petiit à Zacharia Episcopo ut eum ad se mitteret. Ubi Alexandriam venit, eum in præcipuis negotiis Ecclesiasticis adiutorem & consiliarium adhibuit, jamque de eo sibi successore designando cogitavit.

Ejus mors.

Abdel-Azizi salutandi gratiâ Misram profectus cùm esset, pleuritide afflictus, navique Alexandriam reductus, in febrem incidit: quod ubi notum fuit Episcopis, venerunt ad eum Gregorius Episcopus Kis, Joannes Nikioui, Jacob Arouiat, Joannes Saca, Theodorus Melitusæ, & ex populo multi. Ab illis in Ecclesiam D. Marci quam ædificaverat delatus, & ad altare collocatus, Liturgiam inchoavit; sed vix perfecta Oratione *Gratiarum actionis*, deliquit

PATRIARCHARUM ALEXANDRINORUM. 177

liquium passus est : & translatus in proximum conclave, expiravit 1^a mensis Cohiac, 27^a Novemb. cùm sedisset annos novem; sepultusque est in Ecclesia D. Marci quam ædificaverat : Elmacinus octo annos, Abulbircat novem numerat : & is obitum ejus as-
signat anno 392^o Martyrum, J. C. 676^o, sed perperam : obiisse debuit an. Heg. 67^a, J. C. 686^a.

ISAAC PATRIARCHA XLI.

ISAAC
Patr. XLL

VACANTE Alexandrinâ Jacobitarum Sede per obitum Joannis Semnudæi, convenerunt Episcopi, quorum præcipui fuerunt Gregorius Episcopus Kis, Jacob Episcopus Arowat, Joannes Nikiusi, cum aliis Episcopis, & Laicorum primoribus; habitoque cum Sacerdotibus Alexandrinis consilio, simulque adhibito Scribâ rationum regiarum Præfecto, consenserunt in ordinationem Georgii Diaconi Ecclesiæ Saca, urbis Episcopalis, quæ aliter *Ἐπίσκοπος* ab Ægyptiis appellatur: absque consensu prævio Abdel-Azizi Emiri seu Principis. Ita enim apud se constituerant, ut si illa electio Principi displiceret, excusarent se, quòd Joannes ante mortem eos sacramento obstrinxerat, ut Georgium sibi successorem eligerent. Illum igitur sacerdotem ordinarunt, & schemate seu habitu monastico induerunt, publicatâ in sequentem diem ejus in Alexandrinum Patriarcham ordinatione. Jamque illum veste patriarchali indutum in Ecclesiam introducere parabant, cùm obstitit Marcus Archidiaconus, vir prudens, qui negavit moris esse aut ecclesiasticæ disciplinæ, Episcopalem ordinationem alio die quàm Dominico fieri. Unde graviter errasse certum est Elmacinum, qui ab Isaaco statutum fuisse dicit, *ut Patriarcha non nisi die Dominico ordinaretur*: vetus hæc enim disciplina est & ipsius Ecclesiæ Alexandrinæ libris & canonibus confirmata, ut eo tantùm die & festis solemnibus ordinationes celebrentur. Nec omittendum peccatum interpretis, qui *instituere* Patriarcham vertit, quod *ordinare* significat. Venerunt interea mandata ab Abdel-Azizo jubente Georgium & eos qui cum elegerant, Misram ire, rationem eorum quæ designaverant, apud eum reddituros. Cùm in conspectum ejus venissent, non literis modò, sed testimoniis diversis probatum est, Georgium, cum non esse quem Joannes successorem designaverat, sed Isaacum, quem statim Princeps Patriarcham ordinari jussit, irritamque Georgii electionem pronuntiavit. Du-

Electio ab
Emiro reje-
cta.

Elm. p. 68.

Ecclesia D.
Marci restituta.

Gal. Notis
ad Afrigen.
p. 224.

Scribit ad
Reges Nubie
& Æthiopie.

* Emir Chri-
stianos vexat.

Quis ergo Isaac Alexandriam, omniumque consensu probatæ electione, ab Episcopis ordinatus est.

Magnum opus aggressus est, dum Ecclesiam majorem D. Marci Kamiscia dictam, vetustate penè collapsam, & Episcopium ex integro restauravit: atque ita Liturgiæ celebratio, quæ ob ruinam locorum intermissa diu fuerat, renovata est. Edificavit quoque Ecclesiam Holianæ, ubi Abdel-Azizum Emirum convenerat: erat is locus in inferiori Ægypto, *Fostata*, sive *Cahira*, distans parasangis duabus, ex alto Nilum prospiciens. Geographus noster Persa duas stationes inter utrumque locum esse scribit, quæ major omnino distantia est: nam *parasanga* tria milia, sive milliaria continet, statio triginta milliaria, atque adeo decem parasangas. Hortatus est etiam Sahidis & aliarum regionum Christianos, ut domos sibi Holianæ construerent.

Scripserat ad Regem Nubiæ & ad Regem Æthiopie literas, quibus eos ad concordiam hortabatur: quæ tamen occasione magnum apud Abdel-Azizum periculum adiit, cum à quibusdam eo nomine accusatus fuisset, atque iratus Princeps eum accersitum jam capitis condemnasset: at amici Patriarchæ missi qui literas Legatis ejus datas reciperent, aliasque nihil nisi officia continentes substituerent, eum immunem fecerunt. Nubiam olim Christianam fuisse passim apud Orientales fermè omnes Autores legitur; & antiquiorem adhuc apud Æthiopes Habessinios fuisse Christianæ fidei professionem certissimum est: at quando Christiani illi Jacobitarum errores acceperunt, incertum planè est: neque occurrit in hac historia quidquam de Nubiorum erga Alexandrinos Jacobitarum Patriarchas subjectione, hoc exemplo vetustius: sed de illis Ecclesiis erit uberior & opportunior dicendi locus. Verisimile porro omnino videtur, in tanta Ecclesiarum vastitate cum nullus Alexandria esset Episcopus Orthodoxus, Jacobitas, à quibus Æthiopes Metropolitæ suos semper acceperunt, simul cum hæreticis Antistitibus hæresin quoque accepisse, quod Nubiis quoque ut accideret facile omnino fuit; idque confirmat Abulfaragius.

Abdel-Azizus contra prædecessorum suorum exempla Christianos vexare cœpit, jubens confringi cruces omnes in tota Ægypto, etiam aureas & argenteas, quarum usus erat in sacris Officiis. Jussit etiam Ecclesiarum ostiis adfigi inscriptiones blasphemæ, in quibus *Muhamed* prædicabatur tanquam *magnus Apostolus Dei*; *Jesus Christus Apostolus Dei*: tum solennis illa & toties repetita

PATRIARCHARUM ALEXANDRINORUM. 179

in Alcorano nœnia , *Deus non gignit neque gignitur* : quibus vehementer afflicti sunt Christiani.

ISAAC
Patr. XL.

Obiit tandem Isaac, cùm sedisset annos 2. menses 9. 2^a mensis Athir : secundùm alia exemplaria sedisse dicitur annis tribus. Makrizius habet an. 2. mens. 11. Elmacinus obiisse eum affirmat an. Heg. 69^o, J. C. 688^o.

Regnum seu Califatum obtinuit eo tempore Abdelmelicus ; Meruanis filius , undecimus Califa , quintus Omniadarum , ab an. Heg. 65^o, J. C. 684^o, usque ad 89^{um}, J. C. 707^{um}, quo fere tempore Abdel-Azizus Præfecturam Ægypti gessit ; nempe ab anno 20^o usque ad obitum suum qui contigit an. Heg. 86^o, J. C. 705^o. Illi successor datus est in Præfectura eadem ab Abdelmelico fratre , Walid ipsius Abdelmelici filius , qui eo mortuo Califatum obtinuit usque ad an. Heg. 96^{um}, J. C. 714^{um}, quo vitâ functus est.

*Elmac. p. 64.
Makrizius.*

SIMON PATRIARCHA XLII.

SIMON
Patr. XLII.

POSTQUAM Isaac diem suum obiit , agique coepit de successore ipsi deligendo, magna inter sacerdotes Ecclesiæ D. Marci & Clerum Ecclesiæ Angelii de qua superius dictum est, contentio exorta est , aliis Joannem Abbatem Monasterii dicti *Elzejae* , Græcè montis *Natron* sive Nitriæ , ut vocari solet in Viris Patrum ; aliis Victorem Archimandritam alterius Monasterii : nec ad concordiam facile adduci poterant, cùm in utroque æqualis propemodum virtus & dignitas reperiretur ; primus etiam , patrius foret scribæ publici , qui Præfecto ab actis & epistolis erat. Ejus igitur autoritate , & consensu sacerdotum Ecclesiæ Angelii qui tunc erant centum quadraginta , cùm omnes ad aliorum sententiam accessissent , deductus est Joannes ad Abdel-Azizum Præfectum , ut ejus electio confirmaretur.

Erat inter Monachos ejusdem Asceterii , cujus Abbas Joannes à Clero & Laicis ad Patriarchatum postulabatur , vir quidam pius , & doctrinâ omnes ætatis suæ superans , Simon nomine , Syrus origine. Eum , cùm admodum puer esset , parentes ejus Alexandriam deduxerant , & Ecclesiæ obtulerant velut alterum Samuel , eâ præsertim ratione quòd in eo Monasterio corpus Severi Antiocheni in loculo quiescebat , ad quod magnus erat Syrorum Jacobitarum concursus , qui vota & oblationes eo loci facie-

*Abasileb
A. men.*

bant. Theodorus vir inter Alexandrinos primarius, de quo superius dictum est, Simonem, cum adhuc esset Diaconus, ad Joannem Archimandritam deduxerat, ut apud eum in sacris literis erudiretur; quo in studio tantum diligentiae adhibuit, ut totum Novum Testamentum & magnam Veteris partem memoria teneret. Cum verò Agathon Patriarchæ non doctrinam modò, sed præclaris moribus placuisset, eum sacerdotem ordinavit, secundumque ipsi locum in Monasterio post Joannem assignavit. Ubi electio Joannis facta fuit, jussusque est ad Emirum proficisci, Simon, quem filii spiritualis loco habebat, in ejus comitatu fuit, simul cum sacerdotibus, Theodoro & reliquis Jacobitarum primoribus: cumque Joannes, quem in conspectum suum admisit, eum salutasset, delectatus Princeps ejus modestiâ & omni venustate, quæ magnam dignitatem habebat, postulavit ab illa Jacobitarum multitudine, an eum Patriarcham optarent. Responderunt omnes se illum petere; jamque acclamatione publicâ sententiam suam significaverant, cum inconsultis aliis, Episcopus quidam clamavit hunc non fore illorum Patriarcham. Omnibus stupentibus & silentibus, Princeps Episcopum dicere jussit, quisnam tali ministerio dignus sibi videretur: Episcopus Simonem nominavit. Princeps eo advocato, quæsit ut ejus esset: responderunt eum esse Orientalem Syrum. Quæsit an Patriarcham eligere aliquem ex indigenis non possent: dixerunt eum quem elegerant, adesse coram eo, ab ipsis adductum; quod supererat, rem à divina voluntate & Principis nutu pendere. Simon interea dixit Principi, neminem in Ægypto & Oriente reperiri, qui Joanne dignior ad Patriarchale munus sustinendum foret, qui pater ipsius spiritualis fuerat, vitamque angelicam ducebat. Hæc Simonis modesta oratio multitudinem Christianorum in admirationem ejus rapuit, adeo ut statim una voce Patriarcham illum dari sibi poposcerint, quod Princeps concessit; atque ita à Clero & Primoribus Alexandriam deductus & ordinatus est in Ecclesia Angelii magnâ Jacobitarum lætitiâ. Statim Joannem, sub cujus obedientia in Monasterio vixerat, designavit adjutorem sibi in præcipuis Ecclesiæ rebus administrandis; & humiliter adeo erga illum se gessit, ut in suprema dignitate constitutus ipsi adhuc obediret, patremque, ut prius, appellaret.

Synodice literæ ad Antiochenos.

Scriptis post ordinationem suam ad Julianum Patriarcham Jacobitarum Antiochenum Synodicas de Fidei communione literas

PATRIARCHARUM ALEXANDRINORUM. 181

SIMON
Patr. XLII.

doctrinā Scripturarum & sanctorum Patrum referas, quas per Episcopos misit. Literæ publicè lectæ Antiochiæ, magna cum Simonis laude, cujus nomen, ad significandam communionem utriusque Ecclesiæ, inter Diptycha pronuntiatum est: responditque Julianus, & literas per eisdem Episcopos misit, qui honoribus cumulati in Ægyptum redierunt.

Vixit Joannes apud eum annis tribus, quibus elapsis cum obiisset, Simon, qui per dies quadraginta decumbenti semper adfuerat, oculos mortui composuit, sepulcrum ipsi extruxit, jussuque ut prope eum, cum mortuus foret, sepeliretur.

In dignitate positus, nihil ex asperitate vitæ monasticæ remisit; præter panem salque cum cymino contritum, nihil comedeat; atque ita cum Episcopis & aliis ex plebe Jacobitica rarò conveniebat, ut majus otium haberet, quod orationibus impenderet. Ea austeritas multorum offendit animos, tandemque tale Alexandrinorum odium adversus eum excitavit, ut quidam veneno eum tollere aggressi sint; immisso in vas ex quo bibebat: verùm cum bibisset, postquam Eucharistiam sumisset, nihil mali passus est, etiamsi iterum & tertio infusum illi eodem modo venenum fuisset. Itaque sicut infectas ei porrexerunt quodam die, cum Eucharistiam non percepisset; quas cum sacerdotes quatuor conjurati obtulissent & gustare coegissent, magnis doloribus cruciatus per dies quadraginta in summo vitæ discrimine fuit, tandemque miraculo quodam sanitati restitutus est. Ita rem Severus narrat: Elmacinus aliter; scribit enim ter ei venenum præbitum post functionem Eucharistiæ nihil nocuisse, quartò cum absque sumta Eucharistia acceperisset, obiisse. Neque aut Elmacinus aut alius quidquam habent, unde suspicari liceat, mortem fuisse penam violati ritus communicaturis præscripti, ut jejuni ad sacra mysteria accedant, de qua disciplina cautum est multis Coptitarum Ecclesiasticis legibus. Hæc porrò discrepantia inter Autores duos, quorum primus antiquitate commendatior est, parum aut nihil refert, cum de miraculo per Eucharistiam facto conveniant, qualia tamen non extare apud Orientales, communis est Protestantium hallucinatio: nempe quia temerè id affirmatum est à viro magni inter eos nominis, qui in reconditionibus literis, præcipuè in Orientalibus, planè hospes erat. Nec interest vera an falsa Severi & Elmacini narratio sit; faciliè enim concedimus dubitari cum ratione posse de miraculis inter hæreticos factis. Sufficit

Vita aspera
Simonis in
Pontificatu.

Miraculum
per Eucharis-
tiam.

P. 68.

H. B. Patr.
f. 403.

eam verissimam existimari ab illis apud quos scripta est, & à quibus legitur, ut inde constet cerissimè eos de Eucharistiæ Sacramento, eadem quæ nos Catholici, credere, nempe veram & realem transmutationem elementorum in corpus & sanguinem Christi; quæ nisi credatur, impossibile prorsus est venire hominibus in mentem, quidquam de sanctitate & efficacia elementorum, multò minus ejusmodi miracula quæ naturæ vires adeo superent, ut divinæ tantùm in ipsis Sacramentis præsentia describi queant. Neque est causa suspitionis ulla, quasi temerè id à nobis asseratur ex præjudicatis opinionibus, quas in Ecclesiæ sinu ab incunabulis accepimus: cùm Orientales in eadem ac nos elementorum consecratorum veneratione, sacrilegiorum, aut negligentiarum vindicatione, aliis tandem omnibus doctrinæ de reali corporis Christi præsentia appendicibus, potiore disciplinæ suæ Eucharisticæ partem constituant, ut alibi fusè probavimus.

Princeps, cùm Patriarcha ad eum salutandum venisset, & in vul-
tu ejus agnovisset eum à vehementi morbo recens convales-
se, causam sciscitatus, eà perspectâ Sacerdotes quatuor qui ve-
nenum præbuerant, & Magum quemdam veneficum qui illud
paraverat, vivos comburi præcepit propè Pharym. Cùm ad sup-
plicium ducerentur, Simon prostratus cum lacrymis ab Emiro pe-
tiit, ut illis pœna capitalis remitteretur, alioqui futurum se de-
positione dignum, si sui causâ necarentur. Id cùm ab eo obti-
nuisset, Magus solus pœnas dedit: Sacerdotes in exilium pulsi
sunt.

Episcopi
depositio.

Joannem Episcopum Nikiousi præfecit Monasteriũ ob sum-
mam canonum disciplinæque Ecclesiasticæ peritiam: & magna
tunc erat multitudo Monachorum, ita ut Cellæ quotidie ædifica-
rentur: primores sæcularium quæ ad vitam necessaria erant ipsis
subministrabant. Accidit tamen ut quidam Monachi ex valle
Habib secretò foeminam abducerent; quod cùm palam factum
fuit, magnæ inter eos turbæ secutæ sunt. Joannes Episco-
pus autorem facinoris comprehensum, tam vehementer ver-
berari jussit, ut decimo die mortuus fuerit. Episcopi, cùm res
innotuisset, congregati apud Patriarcham penerunt, ut Joannes
deponeretur; regabant enim licere secundum Ecclesiæ disci-
plinam ut ad altare accederet, sed sufficere ut ad Monasticam
communione admitteretur; quod ille impatienter tulit, impre-
catus ut sicut eum à Sede sua expellebant, ita quoque à sedibus

fuis expellerentur. Alium tamen Minam seu Mennam ex Monasterio D. Macarii ejus loco ordinaverunt.

Eo tempore prodierunt sectarii quidam turpissimi, qui Christianorum nomen præferebant, etsi legitimas uxores dimitterent, & alias acciperent. Illos Episcopi à communione prohibuerunt, illi verò ad Emirum profecti conquesti sunt se ab Episcopis ejectos, qui eos nubere vetarent, fornicari permetterent. Ille Episcopus ex sedibus omnibus Alexandriam convocavit, ubi adfuerunt sexaginta quatuor, quibus ignotum prorsus erat quam ob causam accersiti fuissent. Congregati itaque sunt eum in modum per dies multos, singulisque hebdomadibus sextâ feriâ Principi salutationis obsequium deferrebant. Cùm verò convenire jussisset omnes Episcopos, aderant non modò Jacobitæ, sed etiam ex aliis sectis, Melchitæ nempe seu Calchedonenses, quos etiam Theophylactos, Episcopo, cujus non meminit Eutychius, qui in eadem Cathedra sedens, successionem suorum prædecessorum ignorare vix poterat. Aderant etiam ex Monophysitis, Gaianitæ quidam : Theodoros Barfanusianorum & alii Pseudoeπισκοποι.

Sectarii.

Episcoporum
64. Synodus.

Interea allatum est de rebellionē Græcorum exercituum adversus Justinianum, Rhinometum scilicet, quem Leontius Imperio spoliaverat : quibus tumultibus cùm res Romanæ turbatissimæ forent, convocavit Christianorum primarios Præfectus Ægypti, Muslemanosque, ut illis significaret ruinam Græcorum, qui mutuis se conjurationibus conderent, depositis Imperatoribus, aliisque substitutis. Hinc superbus adversus Christianos, vetuit ne officia divina celebrarentur, increpans etiam eos quòd errarent gravissimè, Deo filium attribuentes, tum quòd in varias sectas divisi, de propria religione sua inter se discordes essent. Mox interrogavit Episcopum Gaianitarum, quis ex illis Episcopis propior rectæ doctrinæ esse videretur, quemve aliis præferret. Respondit ille, Simonem. Deinde cùm à Theophylacto Melchitarum Episcopo idem quævisset : præferre ille se religionem Simonis testatus est : ita quoque Georgius Barfanusianorum Episcopus, suam, deinde Simonis religionem reliquis prætulit. Tandem Simon sententiam de aliis Episcopis eorumque religione dicere jussus, alta voce negavit ullam probare se : verum omnes æqualiter vocè & scripto, anathemate condemnare.

SIMON
Patr. XLII.
Episcopi ab
Indis postula-
ti.
E'mar. p. 68.

Venit paulò post sacerdos quidam ex India ad Simonem Patriarcham rogans ut Episcopum Indis ordinaret, qui non erant tunc sub Mahamedanorum potestate. Respondit Simon facere se id non posse absque Principis licentia: cum igitur adiret, &, si permitteret, faciendum se quod postulabatur. Adjunxerunt se Legato quidam Gaianitæ, à quibus deductus est ad Theodorum Antistitem sectæ Phantasiatarum, qui nihil moratus, hominem quemdam ex Mareotide Episcopum Indis ordinavit, adjunctis duobus sacerdotibus, qui simul in Indiam profecti sunt. Post viginti dies ab itinerum custodibus Muslemanis, missi sunt ad Abdelmelicum supremum Emirum, nempe qui Califatum obtinebat. Sacerdos Indus fugâ se proripuit, tres alii vincti ducti sunt, quorum Abdelmelicus jussit amputari manus & pedes, mittique in Ægyptum, scribens ad Abdel-Azizum: Cum homines isti comprehensi sunt ex Ægypto proficiscentes in externas regiones, satis intelligi, nescire Præfectum quid in provincia sua gereretur; nempe quod Alexandrinus Patriarcha in Indiam usque nuncios mitteret, qui de rebus Ægypti referrent: jubere igitur ut statim atque istæ litteræ ad eum pervenissent, Patriarcha ducentas plagas acciperet; & centum aureorum millia fisco inferre cogeretur. Jussus adesse Patriarcha, rem ut gesta erat narravit; cùmque fidem non inveniret, obtentâ tridui morâ, eo intervallo repertus est Sacerdos Indus ille niger, qui primò ad eum venerat, & postea ad Gaianitarum Episcopum Theodorum veniens, Episcopi & duorum Sacerdotum ordinationem obtinuerat; qui Sacerdos ad Emirum ductus & veritatem confessus, Simonem suspitione supplicique periculo liberavit. Sacerdotem Indum Emir in carcerem trudi imperavit; Theodorum Pseudoepiscopum cruci affigi: quæ omnia Abdelmelico Califæ fratri suo per literas significavit, in quibus Simonis Patriarchæ innocentiam testatus est, simulque insigne de ejus probitate & modestia testimonium dedit.

Erat Abdel-Azizus publicis operibus occupatus, multaque ædificia tam Holianæ quàm Misræ & Alexandriæ moliri coeperat, foras, hospitia, balnea, muros, aquæductus quibus illas urbes exornari, & juvari satagebat. Jussit porrò Episcopis quos per tricennium ad anam vocatos retinuit, ut duas Holianæ Ecclesias ædificarent, ad quod opus contulerunt quidquid pecuniarum habebant; Episcopo Kis Gregorio, ædificationis curam suscipiente. Illis tamen operibus Ægyptus mirè gravata est, cùm Emir non minus

PATRIARCHARUM ALEXANDRINORUM. 185

Simon
Patr. XLII.

minus quàm alter Pharaò populos durissimis laboribus impensissime vexaret. Tamen Simon, ne quæ novi adversùs Christianos scandali esset occasio, omnem curam adhibuit ut ædificia ipsis imperata absolverentur quàm citissimè.

Narrat postea Severus miraculum, quod paucis verbis & dubitanter attingit Elmacinus, de Sacerdote quodam Simonis precibus suscitato. Vocabatur Minas, eratque œconomus Ecclesiæ Alexandrinæ, cui etiam Diaconiam, seu custodiam suppellectilis sacræ commiserat. Is subita morte extinctus, jam in feretro collocatus erat, ornatus sacerdotali veste, sicut, inquit, mos est Alexandrinis, sacerdotes sepelire. Cùm verò jam sacerdotes & alii ad ultima pietatis christianæ officia persolvenda congregati essent, advenit Simonis discipulus, qui cùm ad eum osculandum procubisset, revixit mortuus: vitamque sibi Patriarchæ precibus restitutam testatus est. Adjecit se, statim atque animam efflasset, ductum esse ante tribunal Christi, à quo interrogatus, cur Ecclesiæ bona apud se retinisset, ea propter damnatum esse ad tenebras exteriores. Statim Patriarchas qui circumstabant pro eo intervenisse, ut vitæ restitueretur, ne Simon eorum filius ob fraudatam bonis suis Ecclesiam, calumniam aut damnum pateretur: tandem Christum eorum precibus vitam illi concessisse, modò ablata restitueret, & poenitentiam ageret. Hæc cùm dixisset Minas, surrexit è feretro sanus, ablata restituit, & veniam deprecatus est. Istius miraculi meminit quoque Chronicon, cujus non major quàm Severi & Elmacini est in hoc genere autoritas.

Mortuus
suscitatus,

Ordinavit Simon Episcopos qui doctrinâ sacrarum literarum maximè conspicui essent; Zachariam Episcopum Saca, & Ptolemæum Menus superioris, & alios multos istis similes.

Tandem ipso Pentecostes die cùm in morbum incidisset, sentiens finem vitæ suæ proximum, misit discipulum ad Monasteria Vallis Habib, ut benedictionem Monachorum postularer, significans se eos amplius non visurum, postquam ad eos ultimam professionem instituisset; quod fecit, statim atque Holiana reversus fuit, postquam Episcopos in sedes suas tenuisset. Ibi susceptâ Monachorum benedictione Alexandriam rediit, & obiit 24^o mensis Abib seu Epipi, anno secundum Severum 416^o Diocletiani, cùm sedisset annos septem, menses sex. Sepultus est in Monasterio Elzegeage, seu Nitriæ, ubi Joannem prædecessorem suum deposuerat. De numero annorum Patriarchatus consentiunt

Aa

Abulbircat, & Makrizius, qui eundem annum Diocletiani 416^{um} illius vitæ supremum fuisse scribunt. Is annus incidit in an. J. C. 700^{um}, Hegiræ 81^{um}. Cum igitur prædecessor ejus obierit secundum Elmacinum an. Heg. 69^o, sederitque annos 7. menses 6. obitus ejus incidit in an. Hegiræ 76^{um} aut 77^{um}, qui annus non convenit anno Diocletiani superius designato; multo minus anno 402^o, quo mortuus esse scribitur in Canone Chronologico apud Abulbircat: tanta est Orientalium in ejusmodi calculis inconstantia: pejus adhuc erratum in eo quem edidit Athanasius Kircherus, ubi dicitur obiisse an. Diocletiani 426^o, qui est J. C. 710^{um}. Obiit enim sub Abdelmelico, imò sub Abdel-Azizi Præfectura, qui vixit usque ad an. 86^{um} Heg. J. C. 705^{um}: atque adeo non potuit usque ad an. 710^{um} pervenire.

Memoriam Simonis celebrant Coptiæ in suo Calendario 24^o mensis Abib, quo die vita functus est, ut Æthiopes in suo Synaxario.

In hac porro historia jam animadvertere licet formam etsi non plane absolutam, imperii circa res Ecclesiasticas, quod Muhamedani sumere sibi in Christianos, adeo ut Patriarcha is demum eligeretur, qui principi placuisset, non qui aptior ad Ecclesiam administrandam: quæ eversio disciplinæ omnium deinde malorum causa fuit. Tunc etiam a Muhamedanis coëptum est fiscale illud adversus Christianos bellum, quod huc usque exercent, dum quacumque occasione gens avarissima pecunias illis imperare solet.

Notanda quoque disciplina quæ nusquam interrupta est subjectionis Monachorum erga Episcopos; privilegia enim quibus à communi lege Monasteria solverentur, etsi quædam in Ecclesia Græca fuerint, reliquæ Orientales ut plurimum ignoraverunt.

Nec omittenda est Epocha renovatæ per literas Synodicas communionis inter Jacobitas Alexandrinos & Antiochenos, cujus non pauca deinde occurrunt exempla: quæ quidem inter Patriarchas illos duos ita conservata est, ut unusquisque propriam dignitatem retineret, neuter alteri subesset: adeo ut quamvis Romani Pontificis supremam auctoritatem non agnoscerent, quod ob Chalcedonensis Concilii fidem quam Nestorianismi condemnant, eum extra Ecclesiam esse crederent, illius tamen Sedis prærogativam in suis Canonum Collectionibus testatam fecerint. Id ex Ebnassalo, Echmimensi, Abulfaragio & aliis certissimum est, ne-

Monachi
Episcopis
subditi.

Renovata
communio
cum Jacobi-
tis Antioche-
nis.

moque supremam illam auctoritatem ad se traxit, Constantinopolitanorum Episcoporum exemplo, qui Sedes Patriarchales suæ communionis reliquas sibi subjecerunt, adeo ut non modò leges ipsis dixerint, tanquam Occumenici Patriarchæ, sed omnes tandem consuetudines, ritus Ecclesiasticos, disciplinamque immutaverint, ut nulla alia superesset, quàm quæ erat Constantinopolitanæ Ecclesiæ propria. Ea ambitione factum, ut apud Alexandrinos, & Antiochenos Orthodoxos, veteres Ritus, Liturgiæ, sacramentalesque libri penitus interierint, substitutis aliis qui Constantinopolitanis similes forent, imò & apud Ægyptios usus omnis veteris linguæ, tam in Sacramentis quàm in Psalmodia interciderit, qui in Jacobiticis Ecclesiis huc usque servatur. Prope par Nestorianorum Patriarcharum qui Catholici appellantur, ambitio fuit, etsi casu potius quàm certo consilio. Neque enim primarias Sedes post damnatum Nestorium hæresis illa infecerat, cum Jacobitæ in duabus Alexandrina & Antiochena, Episcopum suæ sectæ semper habuissent. Verùm cum Nestoriani Modainæ seu Seleuciæ Parthorum Ecclesiam occupassent, ad quam veluti religionis suæ præcipuam consuebant Syri ferme omnes Mesopotameni, ab Orthodoxis & Jacobitis æquè excommunicati, adeo ut Syriacos ritus, Syrorumque linguam in Synaxibus usurparent: brevi tempore factum est ut alia non usurparetur in omnibus sacris officiis: tandemque ubicumque hæresis illa recepta est, Syriaci ritus & Syriaca lingua obtinuerunt.

Miraculum erga Simonem factum de præbito ei veneno, quod per Eucharistiæ sumtionem vires suas amisit, præter Severum & Elmacinum, Chronicique Orientalis Autorem, quidam alii commemorant; cui non absimile narrant Maris Salomonis filius, & Amrus filius Mathæi Nestoriani in ejus Epitome de Hanan-jehia Catholico Nestorianorum, qui sub Califa Abdelmelico vixit, quo regnante, Simon Alexandrinam cathedram obtinebat. Dissenserunt autem, quòd isti præbitum fuisse venenum dicunt in ipsa Eucharistia, à quo tamen nihil mali passus fuerit. De altero isto miraculo eadem quæ de priori dicere possumus: nempe quòd etiam si dubitare possumus & debeamus de ejusmodi signis apud hæreticos factis, certam tamen probationem contineant illorum de Eucharistia fidei apud quos scribuntur & leguntur. Neque enim de veritate transmutationis elementorum in Corpus & Sanguinem Christi dubitaverunt, qui ea scribebant, & qui cum admiratione legunt.

Aa ij

*Be'um Resp.
ad Quæstionem
Marci Alexand.
drin.*

*De miraculo
circa Eucharis-
tiam.*

SIMON
Patr. XLII.
Hæretici
Manichæi.

De Hæreticis illis qui nuptias contaminabant, quales fuerint dicere non possumus: Manichæorum fortassis reliquias fuisse conjectari licet; cum in tanta Ecclesiarum calamitate, facile omnino fuerit Christianos pastoribus destitutos, & inter Orthodoxorum, & Jacobitarum dissidia fluctuantes, sub sævissima Muhamedanorum tyrannide, amisisse rectæ fidei depositum, & variis erroribus infectos fuisse.

Indis Episcopus postulat & quibus.

Indi qui à Simone Patriarcha ordinari sibi petierunt Episcopum, quales fuerint scire admodum difficile est, cum aliunde vix quidquam occurat ex quo conjectura capi possit, an Sacerdos ille ex India propriè dicta venerit, an ex Æthiopia, an verò ex virginis Insulis quæ ad Indias propriè pertinent, aut in Mari Erythræo sitæ sunt. Omnes quippe præsertim à nostris Autoribus Græcis & Latinis Indorum nomine appellantur: qua ratione, ut multorum virorum doctissimorum sententia est, Nilus Virgilio dicitur, *Usque coloratis amnis devexus ab Indis*: quem ex Æthiopia originem ducere ut scimus, ita principem Latinæ poeseos scivisse non immerito judicamus. Usus tamen illius vocis in lingua Arabica nullus, opinor est, præsertim apud Ægyptios Christianos, quibus res Æthiopix notiores fuerunt. Itaque non ex Æthiopia venisse hunc Sacerdotem, ed facilius credendum est, quòd non Episcopum, sed Metropolitam qui Alexandriæ ordinari solebat antiquitus, Æthiopes postulassent. Accedit altera ex hac historia ratio, quòd Sacerdos ille cum illis quos Gaianitarum Episcopus ordinaverat, non in via quæ ducebat ad Æthiopix regionem, sed in Abdelmelici ditione captus est, nempe in Syria vel Mesopotamia, per quas iter erat secundum Euphratem & Tigrin ad Indiam propriè dictam. In vastissimis sanè illis provinciis Christum olim annuntiatum fuisse multis antiquorum testimoniis docemur, sed tamen Christianæ Fidei vestigia nulla reperta sunt, ex quibus non agnosceretur, hæresin simul illic ita viguisse, ut coeva quodammodo primæ fidei prædicationi censeretur debere. Nam Malabares jam ante nongentos annos, Nestorianam hæresin professos fuisse dubitari vix potest: imò eandem ad Sinas sub hoc ipso de quo mox loquebamur Hananzechua, aut alio ejusdem nominis Nestorianorum Catholico penetrasse, ex Inscriptione Syro-Sinica aliisque monumentis demonstratur. Nihil igitur nobis verosimilius occurrit, quàm quod in publica totius Asiæ calamitate quæ Muhamedanorum Imperium consecuta est, pauci qui in India erant Christiani,

Kircher. Chin.
jussu.

PATRIARCHARUM ALEXANDRINORUM. 189

aut Malaharenfes, aut Taprobanenfes, de quibus Cosmas Monachus in Indoplcuste testatur eos integram Liturgiam habuiffe, jam sub Justino Imperatore, cū defeciffent apud eos Epifcopi, miffiffe in Ægyptum, quò pervenire facilius poterant, atque eodem cū à vicinioribus Neftorianis tandem Epifcopos accepiffent, Neftorianos factos fuiſſe.

Eutychius Alexandrinus quædam aliis autoribus prætermiffa refert, quæ ad res Chriftianorum illius temporis pertinent. Ait quippe Abdel-Azizo cubicularios duos fuiſſe Melchitas, quibus petentibus ut ſibi exſtruendæ Ecclefiæ copiam faceret, conceſſit. Illos igitur ædificaffe Holianæ parvam Eccleſiam nomine S. Joannis, quæ ab illis, *duorum cubiculariorum* nomen retinuit. Habuiſſe præterea ſcribam, ſeu ab epiftoſis, Athanaſium quemdam Jacobitam, qui licentiâ ſibi ab eo factâ in *Cafferelchema*, ſeu *Arce candelæ*, intra Cahiram duas alias Eccleſias conſtruxit; alteram nomine S. Georgii, alteram dictam Abukir. De illis Eccleſiis mentio eſt apud Autores rerum Ægyptiacarum. Tunc autem Alexandrinum Patriarcham orthodoxum nullum exiſtiſſe argumento eſt, quòd nullius nomen legatur apud eundem Eutychium, cui prædeceſſorum ſuorum ſucceſſio ignota eſſe vix potuit.

SIMON
Patr. XLII.

T. 2. p. 369.

Makrizi, l. 2.

ALEXANDER PATRIARCHA XLIII.

ALEXANDER
Patr. XLIII.

SEVERUS, Elmacinus, & alii ſcribunt, poſt obitum Simonis Syri vacante Sedem Alexandrinam per triennium: & eo temporis intervallo Athanaſium ſcribam qui Divano præfectus ab Abdel-Azizo fuerat, impetraſſe ut uſque dum Patriarcha in deſuncti locum ſubſtitueretur, res Eccleſiæ, quæ tributi nomine multa Sultano debebat, fidelis alicujus diſpenſatoris curæ committerentur. Miſſus eſt igitur Alexandriam Gregorius Epifcopus Kis, Eccleſiæ vacantis bona adminiſtraturus, ſub principis autoritate, qui literis ſigillo ſuo munitis, illud ei munus commiſit. Cū tandem Jacobitæ præſentibus Epifcopis, Sacerdotibus, & Divani Miniſterialibus Alexandriam conveniſſent, elegerunt Alexandrum Monachum ex Monasterio *Elzeftage*, ſive Montis Nitriæ, caſtitate quam à pueritia coluerat, cæterisque præclaris dotibus commendabilem, qui ordinatus eſt anno Diocletiani 420°, ipſo die feſto S. Marci. Annus Diocletiani convenit an. J. C. 704°: Annus Hegiræ 81^{us}, quo eum ordinatum fuiſſe ſcribit Elmacinus, eſt

Vacatio Sedis.

Aa iij

J. C. 700^{us}. Annus obitus est secundum eundem, Hegiræ 108^{us}, J. C. 726^{us}; sedit autem annis 24. aut 25. quos si ab an. 700 J. C. numeramus, reperiemus duntaxat annum 724^{um} vel sequentem. Itaque fatendum est, ut in aliis, ita hoc in loco turbarissimam esse Jacobitarum Chronologiam; nec modò in assignandis initio & fine istius Patriarchatus, sed etiam in intervallo Sedis vacantis, quod annorum trium fuisse scribunt, cum quinquennii ferme fuerit. Illud verò calamitosum maximè fuit, cum Ecclesia pastore viduata maximis turbis agitata fuerit, quas excepit dura à Muslemanis persecutio.

Persecutio
ab Ægypti
Præfeto.

Erat Abdel-Azizo Præfeto Ægypti filius natu maximus Asaba, cui omnem negotiorum publicorum curam commiserat, quique successor ipsius futurus esse videbatur, atque eà ratione omnibus terrori erat, præsertim cum esset crudelis, rapax, & immuni odio Christianos prosequeretur. Admiserat inter familiares suos Diaconum quemdam Benjaminum, qui in ejus amicitiam intimam receptus, mysteria Religionis Christianæ ei aperiebat; adeo ut ipsi Evangelium Arabicè explicaret, libros quoque de religione diversos, Patriarchalesque Epistolas, non alio fine quam ut blasphemandi occasionem quæreretur; tum dispiceret an quidquam, præsertim in illis Epistolis, contineretur quod ad Muhamedanorum contumeliā pertineret. Audiebat etiam Ignicolarum, hæreticorumque adversus Monachos calumnias, quasi ederent & biberent, ad alia inutiles forent. Misso igitur ex aulicis suis Yezido, Monachos omnes censi jussit, illisque unius aurei tributum capitatim imposuit, quod tunc primum fuit illis imperatum: vetuitque ne ullus post censum illum à se institutum in Monasticum ordinem reciperetur. Episcopis quoque præter commune tributum, duorum millium aureorum multam imposuit, quam quotannis fisco inferre tenerentur. Instigabat eum ad Christianorum perniciem Benjamin Diaconus & Monachus, omnibus aliis deterior: tantaque & tam gravis persecutio fuit, ut multi ejuratâ Christianâ fide ad Muhamedanos deficerent, atque inter alios Petrus Thebaidis Præfetus, & Theodorus ejus frater, filius etiam Theophanis qui Mareotidis Præfetus erat, sacerdotes magnæque laicorum multitudo. Majora etiam ab eo homine pericula Christianis imminabant, nisi Christus ejus adversus Religionem odio poenas justas inflixisset. Venerat Asaba Sabbato Luminum in Ecclesiam Heliā; ibi contemplatus imaginem B. Virginis Mariæ Jesum in

Imaginem
cultus.

finu gestantis, ornatam ut oportebat, interrogavit Episcopos & alios qui aderant, quænam esset hæc imago. Responderunt esse imaginem Mariæ matris Jesu Christi. Tum ille post blasphemiam, imaginem conspuit, dixitque fore sibi aliquando tempus quo Christianos ex hac regione prorsus deleret: Quis enim, inquit, est Christus, ut eum divinis honoribus prosequamini? Eadem nocte per somnium vidit speciem sedentis super thronum, vultu terribili & fulgurante, radiosque tanquam solis emittente, adstantibus millibus multis armatorum in vestibus candidis: tum adducit eum se cum Abdel-Azizo patre catenis vitæ: & querente Christo de injuria sibi per eum illata, unum ex armatis lanceâ eum transverberasse. Hæc ille patri ipso die Paschatis referebat: statimque ardentissima febre correptus cum decubisset, secundâ horâ noctis expiravit. Abdel-Azizus ipse dolore amissi filii post quadragesimum diem extinctus est. Rem aliter narrat Elmacinus, qui Abdel-Azizo impietatem adversus imaginem commissam tribuit, aitque eum ipso die post somnium quo se lanceâ transfigi videbat, obiisse, filiumque ejus post quadraginta dies mortuum fuisse. Cum autem testimonium huic historiæ petat ex Vitis Patriarcharum, diversis cum codicibus usum fuisse oportet, nisi memoria lapsus est.

P. 691.

Post Abdel-Azizi mortem, quæ à Makrizio & aliis autoribus refertur ad annum Hegiræ 86^{um}, J. C. 705^{um}, atque adeo contigit sedente Alexandro, Athanasius Jacobita, qui inter Divani Ministeriales præcipuum locum tenebat, Damascum profectus est, ut Abdelmelicum Califam salutaret, eique rationes officii à se gesti redderet: at ille eum bonis omnibus spoliavit. Postea Ægypti Præfecturam contulit Abdallæ filio suo, juveni annosum novemdecim, qui pejor adhuc decessoribus suis, Christianos statim durissimè vexavit; tantaque erat illius crudelitas, ut nova tormentorum genera excogitaverit; quotidieque in convivio homines jugulari imperaret, adeo ut mensa sanguine respergeretur, quo spectaculo gaudebat.

Alexander illius salutandi causâ Misram ex more profectus, vix in conspectum illius admissus est. Eum interrogavit Abdalla, an is esset quem veluti Patrem Christiani agnoscerent. Cum annuisset, tradidit illum uni ex stipatorum suorum numero, jubens ut quantamcumque pecuniam posset ab eo extorqueret. Ille in custodiam conjecto, tria aureorum millia imperavit, neque

per triduum, frustra intercedentibus pro Patriarcha suo Christianis, quidquam ex imperata pecunia remittere voluit. Georgius Nemraïæus Diaconus, cum eos nihil proficere animadverteret, neque spes ulla esset libertatis obrinendæ, nisi numeratâ pecuniâ, rogavit ut Patriarcha sibi comitteretur, ea conditione ut post duos menses illum repræsentaret: atque eo intervallo pollicitus est circuiturum se cum eo urbes & pagos, ut Christianos ad liberandum illum, collata stipe exhortaretur. Id cum obtinisset, circumducto secum Patriarcha per totam Ægyptum inferiorem, collectis pecuniis ab Episcopis, Monachis, virisque inter Laicos primariis, tria aureorum millia fisco intulerunt.

Tributum
duplicatum.

Abdalla his non contentus cum Christianis exprobrasset, eos non meliori apud se loco esse, quam Romanos aut Græcos, imò se illos habere tanquam Dei hostes, quos impunè occidere liceret, aurei capitale tributum duplicavit, imò & ter in anno exegit: unde multæ Ecclesiæ spoliatæ & vastatæ sunt. Jussit etiam convenire omnes juvenes ab anno vigesimo & infra, ut eos censeret: peregrinos omnes notâ in fronte & manibus signavit: tributum imperavit persolvendum pro mortuis, antequam sepelirentur: tantaque sub illius præfectura calamitas Christianorum fuit, ut multi qui fugâ salutis suæ consuluerant, fame perirent, & insepulti abjicerentur. Neque ullus tot malorum finis fuit, nisi elapsis annis duobus, cum extincto Abdelmelico, successit Walid filius ejus natu maximus, qui Præfectos Provinciarum omnes in ordinem redegit, & Abdallæ successorem misit Korahum filium Seriki. Is omnes Abdallæ amicos in carcerem conjecit, cosque fortunis omnibus spoliavit, sive Muslemani essent, sive Christiani. Sed etsi paululum persecutio conquievisset, nihilo melior eorum conditio sub Koraho quam sub Abdalla fuit.

Hist. Ægypti.

Nova per-
secutio.

Statim enim atque Korahum adiit, ut ei fausta adprecaretur; jussus est sicut Abdallæ, ita & sibi tria aureorum millia solvere. Cum Patriarcha paupertatem suam testaretur, neque sibi quidquam superesse, præter aureos quingentos, pecuniam verò quæ ab Abdalla imperata fuerat, mendicando se collegisse: jurassetque nullam apud se repositam habere, nihil motus Præfectus, permisit ut in superiorem Ægyptum proficisceretur, experturus an ex elemosynis Christianorum conficere tria denariorum aureorum millia posset. Eò igitur profectus est, susceptusque magnâ suorum lætitiâ, qui à tempore Benjamin Patriarcham in Sahid
sequ

seu Aegypto superiori non viderant. Interea cum Solitarius quidam senex duobus Monachis discipulis suis præcepisset ut cellam sibi extra desertum ædificarent; dum fodiunt, repperunt arcas æreas quinque, pecuniâ Græcorum veteris numismatis plenas, quarum unam sepelierunt, quatuor reliquas seni indicaverunt. Jussit ille ut pecunia illa omnis tanquam divinitus missa, ad Patriarcham deferretur in tantis angustiis sublevandum; quæ cum ejus Oeconomo Georgio Monacho & Secretario tradita foret, illi eam retinuerunt & in quodam loco defoderunt, ignorante Patriarcha, qui in Thebaidis extrema profectus, aberat. Monachi qui quintam capsam furati fuerant, abjecto vitæ Monasticæ instituto, vestes splendidas, puellas & cætera quæ ad luxum pertinebant, eementes luxuriari cœperunt; eorumque alter ex suspitione comprehensus, & tormentis adhibitis interrogatus, unde illi ad tot sumtus pecunia suppeteret, furtum fassus est, simulque de quatuor aliis arcis indicium dedit. Hæc omnia cum Korahus rescivisset, Alexandria Ecclesiam Jacobitarum & Episcopium claudi jussit, omnemque suppellectilem ejus auream & argenteam, libros, pecora, jumenta diripuit; Patriarcham vincitum adduci cum suis imperavit, quasi perjurii reum, quod nihil apud se nummorum esse interpolito jurejurando affirmasset; ei etiam mortem minabatur: tandem post septidui carcerem jussit tria aureorum millia fisco repræsentare; quibus cum solvendo non esset, post biennium magno labore mille collegit & dedit.

Vix eam calamitatem evaserat, cum accusatus est de monetaria officina, quasi eam haberet in Patriarchio, aureosque cuderet. Hæc calumnia avidè excepta, fecit ut nulla inquisitione habita, missis militibus, omnes ex illius contubernio comprehensi, & ipse cum illis, ad terram prostrati verberati sint, adeo ut sanguine manarent, & prope ad necem usque caderentur, etsi nullo indicio calumnia confirmata fuerit. Tales angustias perpeffi sunt usque ad annum Martyrum 430^{um}, J. C. 714^{um}.

Interea cum Alexandrinis gravissima Patriarchæ controversia intercessit: venerunt enim ad eum tertiâ Paschæ feriâ Sacerdotes, Monachi & Laici, distributionem, quæ quotannis fieri solebat, postulantes. Excusabat ille se his verbis: *Videtis, fratres, quanta Ecclesiarum spoliatio facta sit, adeo ut pro calicibus aureis & argenteis in quibus offerebatur sanguis pretiosus, fecerimus vitreos; & discos seu patenas sacras, ex ligno.* Ita, sed nonnisi post

Calices vi-
 treï pro au-
 reis.

asperas contumelias, quas patienter admodum tulit, recesserunt.

Erat inter Jacobitas vir quidam primarius, Jounes nomine, qui cum Christianos multis & quotidianis pecuniarum exactio- nibus oppressos videret, pro ea, quâ apud Præfectum valebat, autoritate, ab eo obtinuit, ut curam tributi ab illis colligendi ad se transferret, cum essent quibus facultates abundantes forent, alii solvendo impares reperirentur. Permisit etiam ut erga eos qui neque Christianorum Coptitarum, neque Muhamedanorum fidem sequerentur, ageret Romanâ lege, nempe ut illis tributum duplicaretur. Patriarcha profectus in Diocesin Episcopatus Sa, multos illic hæreticos cum invenisset, Ganatas & Semidalitas, qui benedictionem seu sacramenta non habebant, cum ab foedo errore illos revocasset, baptisari curavit in nomine Patris & Filii & Spiritus sancti. *Ganata* vocem corruptam esse patet, quæ quidem hoc loco de Gaianitis accipi non potest, cum de illis paulo post sermo futurus sit. Igitur *Agnoetas* designari existimamus Themistii discipulos, qui Christo ignorantiam attribuebant, & de quibus Joannes Damascenus. Aliâ voce Semidalitas significari non dubitamus, de quibus idem N° 86°, ubi eos ita dictos hac de causa docet. *σημιδαλις ὃν προσέθεσαν τοῖς ἀπὸ Διοσκορο δίδου θεοσκομιδαῖσι, καὶ τὸ ἀπὸ διατύλου ἱεραπίδομοι γίνονται τὴν ἀλοῦν, καὶ τὸ το αὐτὸ μυστήριον διχοῦναι, θεοσκομιδὴν καὶ δούλη μὴ ποιέμενοι.* Hoc est interprete Cotelerio, *Similam enim addunt iis quæ à Dioscoro oblata sunt, & consecrata, acque summo digito attingentes degustant farinam, & hoc pro Sacramento suscipiunt, oblationis sacrificium omnino non peragentes.* Illud nempe significatur quod Severus ait eos benedictionem non habuisse; hac enim voce expresserunt Græcam *ἰερογίας*, quæ ad Latinos quoque migravit ut sæpè Eucharistiam significaret, etsi rariùs, quàm *panem benedictum*, cum nempe ex quo Eucharistia conficeretur. Ita cum Eucharistiæ quampridem, ut mos antiquus ferebat, apud se reservaverant, farinam adderent, ex ejus contactu, & commitione eam quoque consecrari censiebant. Hunc ritum etsi non in Eucharistia, attamen in fermento, quo panis eucharisticus confici solet, servant à multis sæculis hac usque Nestoriani, qui singulare officium habent, quod *Innovatio fermenti sancti*, apud eos appellatur: veteri nempe massæ noviter conspersam farinam adjiciunt. Atque ex duplici illo testimonio, tum Joannis Damasceni, tum Nestoria-

Hæretici
conversis

Tract. de ha-
res. n. 85.

Agnoetæ &
Semidalitæ.

norum cognoscimus morem apud hæreticos conservatum, qui antiquæ disciplinæ de fermento per Parochias, & Eulogiis mittendis vestigia repræsentet.

Altera nec minor occurrit difficultas, quomodo Themistianis & Semidialitis illis, qui procul dubio circa Trinitatis mysterium non errabant, atque adeo baptisabant in nomine Trinitatis, iteratus apud Jacobitas baptismus fuerit, præsertim cum utrique essent ex Monophysitarum secta. Occurrit statim conjectura simplicissima, quæ sanè vera esse potest, nempe quòd hæretici illi præter primævos errores, alios quoque superaddidissent, ut facile fuit in tanta Ecclesiarum clade, qualis illata est à Muhamedanis, dum Ægypto potiti sunt. Verùm alia, ut videtur, ratio quærenda est ex communi errore qui à multis sæculis Orientalium pervasit animos, circa baptismatis administrationem. Nam multi negant suscipiendum esse hæreticorum baptismam, quamvis in alia sententia sint Abulfaragius, Ebnassalus & alii: cæteris baptismam non videtur sufficiens, si desit Eucharistia; atque ea ratio, ut videtur, fuit cur apud sectarios illos qui Eucharistiam non haberent nec sacerdotes, sacramentum ex integro dandum judicaverint: quanquam multoties ab Orientalibus ex ignoratione disciplinæ peccatum fuisse dubitare non possumus. Verùm si malè aliquando de baptismi ministro sentientes, aut potius Ecclesiæ certam regulam ignorantes, illi iterare aggressi sunt, quia nullum existimabant; factum id, quia de summa hujus sacramenti necessitate, deque sacerdotalis ministerii dignitate certi, iterari maluerunt illud, quàm in æternæ salutis periculo relinquere eos, quibus deesse aliquid ad illius gratiam consequendam suspicari poterant.

Cor illi
rebaptizati.

Venit etiam ad Dioccesin Mena, ubi Episcopus erat Honorius, ibique multos monachos baptisari curavit, qui huc usque baptisari neglexerant, fortè ne ab aliis quàm suæ communionis hominibus baptisarentur. Ita enim interpretanda nobis videntur hæc verba. Barsanufianos quoque qui illic erant, ad Orthodoxorum, hoc est Jacobitarum, communionem reduxit.

Monachi
non baptisati.

Tum ad Vallem Habib profectus, magnam illic Gaianitarum multitudinem reperit ab Ecclesia segregatorum ante annos centum septuaginta, per Julianum Halicarnassæum. Alibi etiam ubicumque hæreticos reperit alienos à Theodosianorum fide; eos ad Jacobiticæ Ecclesiæ unitatem reduxit: quod præstitit præsertim,

Gaianite
Hæretici.

in urbibus Panos, seu Bana, Abusir, Semnoud, Rechid, Damietæ vicinisque regionibus.

NOVÆ EX-
ARIONES.

Iterum Korahus Christianos vexare cœpit, nam primatum qui in Palatinis officiis fuerant, aliorumve ditiorum opes, cum obierant, rapiebat; imo & ipsorum Episcoporum: tributum etiam centum millibus aureorum auxit. Plerique tot malis oppressi cum uxoribus & liberis sedes mutare coacti sunt, locum ubi conquirerent non reperientes: cum præterea Abdel-Azizum quemdam præfecisset, qui erat ex urbe Saca, ut omnes qui ex suis locis fugiebant, victos, & cæsos reduceret. Ortâ pestilentia gravissima, periit in Ægypto ingens hominum numerus, præsertim Muhamedanorum, & inter alios Korah pessima morte extinctus est.

RES ANTIO-
CHENÆ JULI-
ANI PATR. AN-
TIOCHENI OBI-
TUS.

Obiit interea Julianus Jacobitarum Patriarcha Antiochenus, qui pridem Synodicas de communione fidei literas Alexandriam miserat. Sedemque Antiochenam obtinuerat ab eo tempore quo Joannes Alexandrinus Patriarcha renunciatus fuerat, usque ad hunc de quo scribimus Alexandrum. Cum verò vetuisset Walid, ne in Juliani demortui locum alter subrogaretur, Episcopum quemdam Eliam in Sede Antiochena communi consensu constituerunt; qui Synodicas literas ad Alexandrum scripsit, & per Episcopum Stephanum misit. Eo loco observari dignum est, hanc Eliæ Antiocheni electionem non haberi quasi legitimam, & more majorum factam, quippe qui jam Episcopus, & Ecclesiæ alligatus, ad Antiochenam transferri secundum Canones non poterat, qui adhuc in Alexandrina Ecclesia Jacobitica vigent: in Antiochena citius oblivioni traditi, in Nestoriana prorsus neglecti sunt. Illa igitur Eliæ non tam ordinatio fuit, aut legitima electio, quam commendatio vacantis Sedis Patriarchalis. Ea translationum prima inter Orientales Schismaticos origo fuit: quæ apud Græcos à multis sæculis frequentari cœperunt, etiam cum in Latina Ecclesia locum non haberent. Erat Alexander in Monasteriis Vallis Habib, cum literæ Synodicæ ad eum pervenerunt: quas cum accepisset, congregatâ suorum frequentia publicè illas legi jussit, simulque significavit, Orientales consensisse, ut Patriarchæ loco Episcopus Elias constitueretur qui ordinationes celebraret, idque factum ex necessitate, sicut olim Gregorius Theologus Nazianzo Constantinopolin evocatus erat, ut ei Ecclesiæ illius cura committeretur; qua ratione animi Ægy-

ELIAS EPI-
SCOPUS ANTIO-
CHENÆ ECCLE-
SIÆ ADMINI-
STRATOR.

priorum placati sunt : scriptaque ad Synodicas responsio.

Refert ad eadem tempora Severus, satagente quodam Theodoro, qui Alexandriæ præerat nomine Korahi, fuisse in eadem urbe Medicum nomine Hono... (reliqua legi nequeunt) quod, inquit, *faciem asini* significat, quem Theodorus petiit ordinari Patriarcham, & obtinuit : erat autem Calchedonensis seu Melchita: dedit etiam ejus causâ scriba quidam Anastasius, Emiro aureos mille. Ita adversarii illius Patriarchæ causâ magnas turbas expertus est Alexander, fremente Jacobitarum plebe, eumque è medio tollere conante. Sed paulò post ille poenitens ad Alexandrum venit, & fidem Jacobiticam professus est, ab eoque susceptus. Quid de hac narratione judicandum sit, in obscuro est; nec enim Eutychius, Orthodoxi seu Melchitæ ullius Patriarchæ Alexandrini, sub Walido constituti meminit.

Alexandriæ
Patriarcha
per vim im-
positus.

Major adhuc deinde quàm sub Koraho Christianorum persecutio facta est : jussit enim columnas marmoreas & porphyreticas auferri ab Ecclesiis, quarum plurimæ dirutæ sunt : sed cum ille obiisset, missus est ad regendam provinciam, Asama antecessoribus crudelior, à Walido secundum Severum, à Solimano ejus successore, juxta Elmacinum : anno circiter Martyrum 431°, J. C. 715° : etsi in Indiculo Præfectorum Ægypti apud Makrizium ille non occurrat. Verùm istud patum aut nihil refert. Ingens fames Ægyptum oppressit, quam dira pestilentia secuta est. Jussit ne exteri admitterentur, in portubus, neque in foris, aut in privatis domibus. Vetuit ne Monachi, ullum ad Monasticum habitum susciperent. Omnes Monachos censu habito numeravit, eosque manicam ferream in dextra ferre jussit ut agnoscerentur; inscripto simul nomine Ecclesiæ aut Monasterii, & anno secundum æram Muhamedanam. Anno 96°, qui est J. C. 714°, sævit majorem in modum adversus Monachos; & si qui fugientes, aut absque manica ferrea reperirentur, eos aut membris truncatos inutiles reddebat, aut oculos eruebat : multos occidit, capite amputato, aut vi tormentorum, adeo ut sub ipsis verberibus expirarent. Avaritia incredibili, omnes spoliare cupiens, licentiam ministerialibus tribuit occidendi & spoliandi quoscumque vellent, modò spolia ad se deferrentur. Ita populares, Episcopi, Ecclesiæ vastari cœperunt; & omnia ad pecunias corradendas modico pretio emtoribus addicta, unde ingens annonæ raritas, auctumque aurei denarii pretium, adeo ut triginta quinque drachmis

Ecclesiæ spolia-
tae & diru-
tae.

Elmacin. p. 69.

argenteis æstimaretur. Multi ad tales angustias redacti sunt, ut filios in servitutem vendere cogerentur. Etiam illud commentus est, ne quis absque literis comatus in viam se daret: si literæ interciderent, aut aliquo casu ruptæ, vel accisæ essent, novas decem aureis emere cogerantur, aut manus ipsis amputabantur. Ea occasione narratur exemplum mulieris, quæ cum iter faceret, filiusque ejus bibendo, à crocodilo abreptus fuisset, cum in sinu haberet literas, vestes vendere & mendicare coacta est, ne poenam nefariæ illius legis pateretur. Ecclesiarum ostia ferreis catenis claudi jussit, minatus earum everisionem, nisi mille aureos Monachi penderent, & unum capitatum præter ordinaria tributa. Tandem aliquod in tanta calamitate solatium Christiani acceperunt, mortuo Solimano filio Abdelmelici, qui obiit an. Heg. 99°, J. C. 716°, cum duos annos & menses octo Califatum obtinisset.

Successit illi Omar filius Abdel-Aziz, qui Asiam in vincula conjici jussit; isque paulò post cum Alexandriâ Misram ducere-
tur, dolore & pædore confectus periit. Initio imperii benignus erga Christianos fuit, Ecclesias & Episcopos à tributis immunes esse voluit. Sed paulò post literas misit, quibus edicebat, ut qui securi in Ægypto manere in suo statu vellent, Muhamedanam religionem amplecterentur; qui nollent, regione excederent. Hinc nova & acerbior adversus Christianos persecutio: sed eum citò Deus è medio sustulit, an. Hegiræ 101°, J. C. 719°.

Successit ei Yezid filius Abdelmelic, 16^{us} Califa, sub quo non melior fuit Christianorum conditio; nam tributum quod Episcopis & Ecclesiis Omar remiserat, ipse renovavit, inauditis gravissimisque vestigalibus subditos exhaustit. Nec his contentus cruces frangi, imagines aboleri in Ecclesiis, præcepit. Periit ille post annos duos, menses quatuor: an. 105°, J. C. 723°.

Res Antio-
chenæ.

Hisham ei successit frater ejus, vir, inquit Autor, timens Deum, quantum in Muhamedana religione fieri potest, sub cujus imperio Christiani paululum quieverunt. Statim cum accepisset Antiochenos Jacobitas Patriarcham non habere, obierat enim Elias ille, qui, ut superius dictum est, cum Episcopus esset, Patriarchatum consensu suorum susceperat: alium Episcopum elegit, nomine Athanasium, quem Patriarcham constituit. Nomen illius ita scribitur apud Elmacinum; apud Severum aliter, sed corruptis literis: ita ut suspicari possimus Ignatium legi

p. 81.

debere. Illi igitur Episcopi manus imposuerunt, & Patriarcham constituerunt. Is ad Alexandrum Synodicas de communi Jacobitarum fide literas misit; quibus cum gaudio susceptis, ipse respondit, ad testandam Ecclesiasticæ communionis continuationem.

Sub isto Califa venit cum Præfecti autoritate in Ægyptum Obeidalla quidam, Jacobitis, ut initio videbatur, favens, qui tamen alios feritare superavit. Nam tributa duplicavit: Christianos sigillum plumbeum, in quo leonis figura erat, ex collo pendens, ferre jussit; qui eo carerent, manus illis præcidi imperabat: numerari quoque fecit non modò homines, sed & animalia. Tum ad ædificia animum adjiciens, ex tota Ægypto collegit homines, quos infans suis substructionibus operam dare cogebat. Cùm ad eum Alexander adductus esset, ut, sicut alios Christianos, illum quoque notâ in manu impressâ signaret; rogavit Patriarcha tridui moram concedi sibi, quam cùm ægrè obtinuisset, fugit navi; & cùm ad locum dictam *Paraout* pervenisset, jamque in morbum gravissimum incidisset, obiit, solo Episcopo Vissim Aba-Hamouli eum comitante. Hunc comprehensum & ex fuga retractum Obeidalla mille aureos pendere jussit; quos cùmolvere non posset, militibus duobus traditus, post multa verbera per plateas Misræ usque ad portam Ecclesiæ D. Georgii tractus est; ubi ex brachiis suspensus, nudatus, taureisque penè ad mortem cæsus est, vixque semianimis liberatus est ab illis barbaris, cùm Christiani circumstantes trecentos aureos contulissent.

Nova persecutio.

Sedit Alexander annis 24, mensibus 6: & sub ejus Pontificatu aiunt floruisse multos Monachos & Anachoretas in eremo & speculuncis & monasteriis, non modò vitæ sanctimoniâ, sed etiam miraculis conspicuos. Inter alios enituit maximè Domitius ex urbe Asfent, qui ægrotos sanabat, mortuos suscitabat: puellam, quæ ex incesto fratrum suorum concubitu uterum ferens parere non poterat, cùm cognito crimine increpasset, vivam coram se hiatus terræ absorboit. Hoc autor vitæ quem Severus secutus est, accepisse testatur à viris fide dignis qui interfuerant, superfuisseque eum loco hiatum per menses sex, unde fumus & odor terribissimus erumperent. Addunt multos quoque sanctos Monachos tunc fuisse miraculis claros, in monasterio Semidæ in monte Aderbana, cujus Monasterii Makrizius meminit, sed ita ut suâ ætate Ecclesia tantum superesset. Ibi Archimandrita fuit nomine Aba-Sebeb, sepultus illic, ad cujus tumulum multa quoque miracula facta fuisse

Miracula
Monachorum
Jacobitarum.

Disciplina
Vallis Habib
inconstituen-
do Abbate.

Jacobitarum traditio est. Alios fuisse in Valle Habib quibus sæpè apparitiones Christi, Apostolorum, Angelorumque, & revelationes offerrentur; & inter illos senem nomine Junes, sive Joannem, qui ter à Barbaris captus & abductus, toties in Monasterium suum D. Macarii, mirabiliter restitutus est, cujus postea Hegumenus fuit; nam sacerdos erat. Ea enim, inquit Autor, lex seu canon obtinebat in deserto Vallis Habib, ut inter sacerdotes quicumque ordine prior esset, eum ordinarent Abbatem seu Hegumenum: neque tamen Eucharistiæ communionem postea accipiebat, donec ei per somnium apparuissent Christus, aut B. Virgo, aut aliqua mysteria revelata illi fuissent. Erat istius senis discipulus Epimachus, qui postea *Komos*, sive Archimandrita, fuit; miraculis quoque celebris, qui vitam usque ad annos, fere centum produxit. Duos spirituales fratres habuit, Abrahamum & Georgium, Antonii Magni imitatores strenuos, qui futurorum secretorumque cognitionem divinitus habebant. Fideles in Ecclesiam introeuntes videbant tanquam agnos candidos: si quis in peccatum incidisset, in nigrum color ille commutabatur; atque ita eum monebant, ut poenitentiam ageret. Atque hæc fusè admodum à Severo & antiquioribus tractata contraximus, ut etiam in falsis illis miraculis agnosceretur Jacobitarum traditio, quos mirari non debemus, si in tanta tamque immani calamitate, qualem sub Muhamedanis sustinent, ea emblemata frequentius interserunt, ut suos ita ad fidem conservandam cautiore reddant & alacriores. Nec inutilis censenda est nostra opera in colligendis illorum, qui sanctitatis famâ apud Jacobitas Ægyptios commendantur, nominibus: nam cum aliunde quàm ex ista illorum historia noti non sint, sæpè ex eorum similitudine Itinerariorum scriptoribus & Apostolicis Missionariis accidit, ut pro sanctis habeant eos qui extra Ecclesiam Catholicam vixerunt; quod exemplis aliquot, si necesse foret, confirmare possemus. Existisse autem in desertis Ægypti Monasteriisque Anachoretas & Monachos plurimos, Acephalorum, sive Theodosianorum hæresi infectos, & ex antiquis monumentis, & ex sola Cyrilli Scythopolitani autoritate in vita Euthymii & Sabæ, satis intelligimus, ut nihil certius sit. Cum verò per annos plurimos Orthodoxi in Ægypto Episcopos non haberent, nec Alexandriæ Patriarcham, omnes ferme Episcopi hæretici jam ante Benjaminum in Sahidem & Monasteria Vallis Habib se receperant, nihil propius erat quàm ut omnes hæresi inficerentur.

Canon

PATRIARCHARUM ALEXANDRINORUM. 201

ALEXANDER
PATR. XLIII.

Canon apud Abulbircat Alexandrum obiisse testatur 2^a Amfchiri seu Mechir, anno Martyrum 430°, J. C. 714°: sedisse annos 24, menses 9. Makrizius annos 24, menses 6. Elmacinus anno Heg. 108° mortem ejus assignat, qui erat J. C. 726^{us}, Makrizius an. 106°, J. C. 724°; atque adeo, ut sæpè monuimus, decennio errat Abulbircat: neque aliorum calculus vitio prorsus carere censendus est.

De gravissima sub hoc Patriarcha Christianorum persecutione, Makrizius ex Elmacino & aliis satis accuratè scribit: docetque Obeidallam, & Aslamam, qui tum à Severo, tum ab Elmacino, quasi præfecti describuntur; tamen non comparent in eorum historia, fuisse vestigalibus colligendis præpositos: notam verò quam barbari illi Christianos Monachos ferre jusserunt, ait fuisse annulum seu manicam ferream, in qua nomen Monachi Monasteriique inscriptum esset. Reliqua ut apud Severum & Elmacinum.

Abrahami & Georgii Monachorum, de quibus suprà dictum est, commemoratio fit ad S. Macarium, 9^a Tybi, hoc est 4^a Januarii, in Calendario Coptico.

COSMAS PATRIARCHA XLIV.

COSMAS
PATR. XLIV.

MORTUO Alexandro, electus est in ejus locum Cosmas Monachus ad sanctum Macarium Panopoli oriundus, inconsultus & renuens: qui idcirco quotidianis precibus Deum interpellare non desinebat, ut se ex hoc mundo transferret. Elapsis igitur mensibus quindecim, obiit ultima die mensis Baisi: sextam ejusdem mensis habet Canon Abulbircat. Plura de isto Patriarcha non occurrunt, quem obiisse anno Hegiræ 109° scribit Elmacinus, J. C. 727°.

THEODORUS PATRIARCHA XLV.

THEODORUS
PATR. XLV.

ERAT ille Monachus in Monasterio quodam Maræotidis prope Temnua, sub disciplina senioris viri, sanctitate & revelationibus clari, apud quem in durissima poenitentia catenis ferreis corpus macerans, se exercuerat. Is senex, Joannes nomine, Theodoro prædixerat fore, ut quo anno moreretur Alexander, ipse quoque Joannes diem suum obiret; postea verò illum, decedente ejus æcessore, collocandum in Cathedra D. Marci. Igitur Jacobita-

Cc

rum Alexandrinorum præcipui, cum Clero & Episcopis post longam de eligendo Patriarcha deliberationem, consenserunt tandem ut Theodorus Monachus eligeretur; quem ex Monasterio extractum, Alexandriam duxerunt, ubi ex more ordinatus est.

Ecclesiæ pax
sub Theodoro.
ro.

Sub ejus regimine Ecclesia tranquilla fuit, adeo ut ex pristina calamitate planè recreata, restitutaque in priorem statum fuerit, quasi ex frequenti per tributorum exactores & præfectos spoliatione nihil detrimenti passa fuisset: tamen paulò post Obeidalla duplicatis tributis, novisque vexationibus, omnes adeo premere cœpit, tam Christianos quàm Muhamedanos, ut ingens calamitas consecuta sit; præsertim cùm auri argenteque species admodum imminutæ fuissent & rariores effectæ. Verùm cùm Ægyptii de ejus tyrannide apud Hishamum Califam querelas detulissent, potestate privatus est: ejusque filius Ismael, in Barbarorum regionem missus; ut etiam ipse postea ad Africæ præfecturam, tanquam in exilium relegatus. In ea provincia cùm insolentiùs se gereret, & sævitiâ rapacitateque omnes adversum se concitasset, orta adversus eum seditione interfectus est ab Africanis cum filiis, uxoribus, & pellicibus, quas in oculis illius occiderunt, uteris discissis, foetibusque coram eo projectis: tandemque Ismaele filio majore in conspectu ejus trucidato, extractisque intestinis, quibus Obeidallæ caput & vultum post omnia contumeliarum genera deturpaverunt. Hæc omnia vivente Theodoro gesta sunt; qui obiit postquam sedisset annos 11. menses sex, 7^a mensis Mechir, hoc est 1^a Februarii: an. Hegiræ 120°, qui numerari incepit à 28^a Decembris, an. J. C. 737ⁱ, quique convenit cum Epochâ ejus ordinationis, quæ facta fuit, ut suprà dictum est, anno Hegiræ 109^o nondum elapso, cùm mense Junio contingerit. Canon Abulbircat assignat annos 11. menses 7. ordinationem factam mense Abib, die non adnotato, an. Martyrum 432°, J. C. 716°, mortem 7^o Mechiri an. 444°, J. C. 728°.

Nihil præterea docet nos Severus de rebus gestis Theodori, nihil Elmacinus. Sed apud Makrizium legitur ejus tempore renovatam fuisse Ecclesiam S. Mennæ vulgò Abu Mina, extra Misram. Ea autem, ut ex alio ejusdem Autoris loco discimus, erat prope mare, tresque ejus tempore Ecclesias separatas habebat: quarum una erat Jacobitarum Ægyptiorum, altera Syriarum, tertia Armenorum: & in ea quotannis festum celebrabatur, ad quod omnes Christiani conveniebant.

CHAIL PATRIARCHA XLVI.

CHAIL
Patri. XLVI.

ANTIQUUM aliquem & æqualem Autorem in hac vita describenda secutus esse Severus videtur, verboſum ſanè plus quàm opus erat : in quo excerpto ita verfabimur, ut, quæ ſcitu neceſſaria erunt, deſcribantur ; reliqua, præſertim ad politicam hiftoriam ſpectantia, paucis explicentur ex certioribus Autoribus. Nam Muhamedanorum hac in parte potior omnino eſt autoritas, quàm Chriſtianorum, quos ſæpè hallucinatos eſſe, non uno loco deprehendimus. Præcedentium Patriarcharum hiftoriam à Cyrillo uſque ad Simonem ſcriptam eſſe teſtatur à multis, atque præſertim à Georgio Monacho Archidiacono & Secretario Simonis Patriarchæ, de quo ſuperius, qui perſecutus eſt ea, quæ à Marciano Imperatore Jacobitæ ſuſtinerunt, & quæ deinde Patriarchæ eorum paſſi ſunt, uſque ad Solimanum Abdelmelici filium ; quibus ipſe autor adjecit quæ uſque ad Theodori mortem, ſub Aſama & aliis Ægypti Præſectis aut veſtigialium exactoribus ſecuta ſunt. Longam deinde narrationem incipit eorum, quæ à Kacemo Obeidallæ filio, qui patri ſucceſſit, Chriſtiani atque alii etiam paſſi ſunt ; qui tamen Theodorum Patriarcham amare videbatur, & ſæpè ad ſe accerſebat ; offerebatque parvulos è concubinis filios, ut ipſis manus imponeret, ita tamen ut pecuniam imperaret. Narrat præterea quomodo Kacemus aliquando venerit ad Eccleſiam ſancti Chenudæ ſeu Sanutii, equo veſtus, ſimulque una ex pellicibus, quam maxime diligebat : eos cùm fruftrà monuiſſet Archimandrita, ne Eccleſiam ingrederentur ; neque enim in eam ſœminas unquam ingreſſas, quin præſenti ultione Deus injuriam domui ſuæ factam vindicaret ; mulier ſtatim mortua concidit : Kacemus dæmone correptus & furiiſ agitatus, nuſquam plenè convaleſcit. Trecentos aureos Eccleſiæ dedit, totidemque adjecit, cùm arcam ex ebano ornatam teſſellis ex ebore, in quâ ſacri libri reponerentur, quæque à Chenuda magnis impenſis fabrefacta fuerat, auferre tentaviſſet, nec valuiffet, etſi adhibitis hominibus triginta, qui eam loco movere non poterunt.

Ultio divi-
na in Eccleſia
ſancti Che-
nudæ. •

Illo tempore ingens annonæ caritas Ægyptum oppreſſit, quam ſecuta eſt graviffima peſtilentia, quæ duo millia hominum aliquando uno die conſumiſ ; aliàs mille & ampliùs. His calamitatibus conſtitata eſt Ægyptus per annos ſeptem. Increviſſe quoque ſcri-

Cc ij

bunt majorem in modum inopiam rei frumentariæ per Magi cujusdam præstigias, qui, ut mercatoribus nequissimis faveret, nefanda sacrificia adhibuerat; atque inter alias artes, puerum à matre in adoptionem petiit, multis diebus excarnificaverat, pellem vivo membratim detrahens: quod ubi Kacemo innotuit, Magum lapidari, & igne cremari jussit.

Persecutio
à Barbaris.

Eo etiam tempore novas Ægyptii Christiani injurias sustinuerunt ab Arabum Muhamedanorum tribu, quæ in montana regione ad Orientem Misræ, à Balbais usque ad Kolzum, quæ est Clyfma veterum, congregata, cum equitibus plus triginta millibus Ægyptum prædari cepit, duce quodam Abuharagio. Ille castra fixerat prope Monasterium Deiparæ, non longè ab urbe Taneos, ubi magna erat Monachorum multitudo, sub Abbate Epimacho, qui Monachus fuerat ad S. Macarium in Valle Habib. Ingressi Monasterium Arabes, omnia quæ ad Ecclesiæ ministerium pertinebant abstulere, ducibus fratribus Abuharagii, quorum unus cum crucem conspuisset, paulò post in secessu, ejectis visceribus mortuus est, veluti olim Arius: unde alii perterriti omnia restituerunt.

Interea Alexandrina Ecclesia Pastore viduata erat, convenientesque Episcopi, præsentibus quibusdam Calchedonenfibus seu Orthodoxis deliberaverunt de eligendo Patriarcha: neque inter se convenire potuerunt, cum tres propositi fuissent, quorum nullus à Deo huic honori capeffendo destinatus erat. Interea missi sunt à Califa, qui Kacemum in vincula coniectum ad eum deducerent. Cumque ille per urbem Balbais duceretur, occurrerunt Episcopi, iterumque postulaverunt ab eo licentiam constituendi Patriarcham: quam negavit, cum imperatas pecunias pro ea facultate concedenda non obtinuisset. Theodoro Episcopo Misræ, qui antiquior trium ejusdem nominis Episcoporum illius urbis fuit, exclamanti adversus hominis improbitatem, quasi nihil quidquam pejus commisisset, prædixit Moses Episcopus Wiffim, Kacemum in Ægyptum non amplius reversurum: quod impletum est: nam ille fortunis omnibus spoliatus, in carcerem à Califa detrusus fuit.

Cosmas Mel-
chitarum Pa-
triarcha.

Cum in Kacemi locum alius cum autoritate missus fuisset, redierunt Misram Episcopi, solliciti de eligendo Patriarcha; inveneruntque Calchedonenfes rem consecisse, datà Kacemo, antequam dignitate spoliaretur, pecunià; & eo annuente, constituisse

Patriarcham ex suis Cosmam nomine, artificem ex foro, qui acus conficeret. Eo loco observatu necessarium est, cum primum Patriarcham inter Melchitas seu Orthodoxos fuisse, ex quo Ægyptus in Arabum potestatem venit. Cum autem hæc melius Jacobitis Eutyechius scire potuerit, verba ejus apponemus, quia multum ad obscurissimum illius temporis historiam conferunt. Anno, inquit, Calisatus Hishami 7º, constitutus est Cosmas Patriarcha Alexandrinus, qui viginti octo annos sedit, dein mortuus est. Orabant autem Christiani Melchita Alexandria in Ecclesia sancti Sabæ, cum Jacobitis jam omnes Ecclesias occupassent. Cosmas autem qui Patriarcha constitutus est idiota fuit, qui nec legere posset nec scribere, cum ars illi esset acus conficere. Huic cum Damascum ad Hishamum filium Abdelmelic profectus esset, concessæ sunt, ope quorundam qui in aulico ministerio ab actis & epistolis erant, (non eruditorum, ut malè in Versione Pocockii legitur) Ecclesias quas occupaverant Jacobita, scripsitque Hishamus ad Praefectum Ægypti suum, qui fuit Abdalla filius Gihani Sakiensis, ut Ecclesias quæ in manu Jacobitarum erant repetitas Cosma Patriarcha traderet ; & quodcumque earum nomine comprehenderetur. Accepit ergo Cosmas Patriarcha à Jacobitis Ecclesias, atque inter ceteras Ecclesiam Kasaria. Siquidem ab eo tempore quo Georgius Patriarcha Alexandria Constantinopolin fugit, anno 3º Calisatus Omari filii Elkittabi, donec constitueretur Cosmas Alexandria Patriarcha anno 7º Calisatus Hishami, fuit Cathedra Alexandrina absque Patriarcha Melchita, spatio scilicet annorum nonaginta septem : occupaverantque Jacobita omnes Ecclesias, tam Ægypti quàm Alexandria. Cumque opus haberent Nubii Episcopis, ordinavit Patriarcha Jacobitarum ipsis Episcopos ; atque ex eo tempore Jacobitarum sententiam amplexa est Nubia : & quotiescumque moreretur in aliqua urbe Ægypti Episcopus, alium ipsis constituit Jacobitarum Patriarcha. Adeoque facta est Ægyptus, tam superior quàm inferior, Jacobitica : exceptâ Ecclesiâ Michaelis, quæ est in Kasser Elchema, hoc est Arce candelarum seu luminum. Illam scilicet retinuerunt Melchita, atque in ea orabant : cumque moreretur ipsis Episcopus, ad Tyri Metropolitam mittebant, qui ipsis Episcopum ordinabat. Neque ita se habere desuit Melchitarum in Ægypto & Alexandria status, usque ad Cosmam Patriarcham. Hæc fusiùs à nobis descripta sunt, ipsius Autoris verbis, quia multa

T. 1. p. 379

Ecclesiæ
Melchitis
restitutæ.

nos docent, quæ apud Autores alios frustra quærerentur : nam qui res Melchitarum descripserit, præter Eutychium habemus omnino neminem.

Ex illius igitur narratione constat, per annos nonaginta septem aut circiter, nempe ab initio Imperii Muhamedanorum in Ægypto, Orthodoxos nullum habuisse Patriarcham, neque in tam longa calamitate adduci potuisse, ut cum Jacobitis communicarent, aut eorum Episcopos agnoscerent.

An Cosmas
Monothelita
fuerit.

Annus 7^{us} Hiscami est Hegira 112^{us}, J. C. 730^{us} : quo tempore nulla hujus Patriarchæ apud Græcos memoria occurrit; tanta fuit rerum in Oriente gestarum per Arabes obscuritas. At circa an. 742^{us}, Theophanes scribit Cosmam Patriarcham Alexandrinum cum suis abnegata Monothelitarum hæresi ad Ecclesiæ Catholicæ communionem accessisse : quod Eutychius ignoravit, etsi plura quam Autores Græci aut Latini, de prædecessoribus suis scivisse videatur. Neque est quod suspicemur ignoratam illi fuisse Monothelitarum sectam, cujus originem ad Maronem quemdam Monachum refert, à cujus nomine non aliter eos appellat, quam Maronitas; reclamantibus tamen, ut alibi observatum est, recentioribus è Libano Maronitis. Mirum est autem Eutychium, qui eam sectam graviter ubique infectatus est, adeoque non modò notos ex Historia Ecclesiastica illius defensores, sed obscuros quosdam aut famæ dubiæ, eo nomine exagitat, ignorasse Cosmam in eodem pariter cum aliis errore versatum. Sanè Melchitæ cum pro suo, nempe Orthodoxo, agnoscunt : neque Elmacinus qui eadem Eutychii verba paucioribus contraxit, Monothelismi Cosmam insinuat. Verisimile igitur omnino est avulsam à Romano Imperio Ægyptum, cum Melchitæ ob religionis conformitatem cum Græcis Constantinopolitanis, suspecti apud Muhamedanos essent, omniaque ut plurimum commercia interclusa forent, non potuisse per annos multos conventum Episcoporum facere ad Patriarchæ electionem, cum ultimus Alexandriâ profugisset; atque ita, dum non haberent Episcopos, ex summa necessitate confugisse ad vicinorem Tyri Metropolitam, eò facilius, quòd Syria erat tunc in Arabum potestate.

Ubi Cosmas ordinatus est, jus antiquum Ecclesiæ suæ vindicavit, dum omnia quæ tum per vim, tum per ignorantiam facta erant sub Beniamino Jacobitarum Patriarcha, rescindi obtinuit. Cum enim plerique Alexandrini non minus erga Imperatorem

quàm erga Deum fideles fuissent, Jacobitæ contrà Arabibus se adjunxissent, ut ex Makrizio Autore non suspecto observatum est, vacuam urbem, Ecclesias, dignitates, invaserunt Jacobitæ, omnia hæc ad se olim pertinuisse mentientes, quia suos à Diofcoro Patriarchas omnem auctoritatem accepisse pretendebant, Muhamedanosque non bonos Ecclesiasticarum causarum iudices fallere nullo negotio poterant, cum has lites omnes ex sola possessione dirimerent, in qua videbantur esse Jacobitæ, cum Catholici profugissent. Retractato itaque priori illo iudicio, redditæ sunt Melchitis omnes Ecclesiæ, quas antiquitus obtinuerant: addit etiam Elmacinus Ecclesiam Evangelii, qua voce designatur *ἀρχαίον* vel *ἀρχαίον*, locus Alexandriae, ubi Ecclesiam habebant ædificatam Theodosii Patriarchæ tempore, cujus meminit Timotheus Constantinopolitanus, loquens de Angelicis ab ea Ecclesia denominatis. Eam autem vocem cum ita decurtatam sæpè usurpent Christiani Arabes ad significandum *Evangelium*, hæc *ἐκκλησία* Elmacino fraudi fuit. De Nubiis dicitur inferius; erit enim proprius de illis agendi locus. Eos autem ut & plerosque in Ægypto, Jacobitas præsertim in Thebaide, Episcopatus obtinuisse verisimile omnino est: Melchitis in inferiori tantum Ægypto conservatis. Jam ad Chailem revertendum est.

Cum Hases Walidi filius, Ægypti præfecturam post Kacemum obtinuisset, convenerunt Misram Episcopi, Sacerdotes & reliqui Clerici Alexandrini cum Laicorum primoribus, anno Diocletiani 459°, die 28^a Mesori, hoc est J. C. 743°, qui responderet anno Hegiræ 126°, 21^a Augusti: ut de eligendo Patriarcha consultarent. Episcopi qui eo in conventu interfuerunt, ab Autore historię isti recensentur: Abraham Fiumensis, Moses Wissim, Minas Nemi, Jacobus Busridos, Theodorus, sed absque urbis nomine: Maraius Misræ, seu Cahiræ: Victor Demilage, Jacobus Saharcat, Isaac Semnudæ, Abraham Balbaïs, Petrus Parceout, Chail, seu Michael Atrib. Postquam convenissent, Hasesum adiverunt, petieruntque licentiam eligendi sibi Patriarcham. Respondit ille, ut prius communibus votis in aliquem consentirent; postea ad se referrent, ut statueret quid optimum factu sibi videretur. Itaque Misram redeuntes, confederunt in Ecclesia juxta ordinem suum Episcopi, & Sacerdotes prope Episcopos suos: Alexandrini Sacerdotes in medio coram illis, magno omnium silentio: & post factam orationem usque ad horam sextam, re infecta discesserunt,

Synodus
Episcoporum
ad electionem
Patriarchæ.

ad diem sequentem dilata electione. Eo die precibus peractis, Protopresbyter Alexandrinus paucis hortatus est Episcopos, ut negotio, quod impendebat, finem darent. Tum Theodorus Episcopus interrogavit quemnam ipsi designarent, iussitque edicere: Hunc, inquit Protopresbyter simulque chartam dedit, in qua nomen perscriptum erat. Respondit Episcopus, optimum sanè illud esse, modò Concilii Episcoporum consensus accederet. At, inquit Protopresbyter, nostrum omnino negotium est, non Episcoporum, ad quos tantummodo pertinet manuum impositio ad ordinationem; electio verò nostri juris est. Abraham Episcopus Fium, dixit eis cum Episcopis qui prope erant, Præfite nobis quemcunque elegeritis: quem, si dignus fuerit, ordinabimus; si indignus, rejiciemus. Decem dies, atque etiam ipsas noctes, in colloquiis, concertationibusque consumpserunt, ita tamen ut in sententia quisque sua perseveraret. Verùm cum Alexandrinis, & Episcopis inferioris Ægypti non displiceret is qui à Protopresbytero propositus fuerat, Episcopi superioris Provinciæ contrà obstitabant, testati se alium ordinaturos, nisi constaret nullum præterea dignum reperiri, qui ad Patriarchalem dignitatem promoveretur. Obstitabant Alexandrini cum Episcoporum parte, negantes consensuros se in alterius cujuscumque ordinationem. Hunc in modum multis diebus frustra consumptis, utraque pars postulavit ut advocarentur Episcopi duo, qui morbo detenti non advenerant, Moses Wissim, & Petrus Parœout; quorum primus cum equitare non posset, neque vehiculi copia foret, feretro deportatus est Cahiram. Neque ex illorum arbitrio statim res compositæ, Alexandrinis, & Abrahamo Fiumensi Episcopo negantibus consensuros se, primis quidem in alterius quàm illius cujus nomen proposuerant ordinationem; illo cum suis asserente nullam se cum illo communionem habiturum. Alexandrinos cum ferociùs instarent, Episcopus Wissim è lectulo in quo decumbebat in medio confessu surgens, postquam graviter increpasset, baculo cui innitebatur abegit; sicut vendentes & ementes in Templo, Christus flagello expulerat. Tum ad Episcopum Minam conversus, exprobravit quòd nimis importunè urgeret electionem hominis, quem Christus non approbabat. Ille testatus se non obstare quo minus consensu communi qui dignior videretur, eligeretur; facta prostratione discessit. Multi deinde nominati, quorum nullus placuit; atque ita solutus confessus, etiam eo die. Ipsa nocte Diaconus qui prope Mosem Episcopum

Icopum cubabat, ei dixit nosse se virum dignissimum, simulque Chailem sacerdotem ex Monasterio S. Macarii nominavit. Die sequenti cum iterum convenissent, neque major quam antea concordiae ineundae spes apparet, Episcopus Moses Chailem sacerdotem nominavit; statimque omnes una voce clamaverunt dignum illum esse, & in ejus electionem consenserunt: attestante etiam pio quodam viro, se dum in Ecclesia S. Macarii oraret, vocem coelitus missam audivisse, quae Chailem Patriarchatu dignum significaret. Omnes igitur ad Hafesum Praefectum profecti rogaverunt, ut electionem ejus ratam haberet, daretque ad Abbatem & seniores S. Macarii literas, quibus juberet mitti sacerdotem Chailem: quod Hafesus libenter concessit.

Accidit ut eo ipso tempore Monachi, tributis gravissimi ab Kacemo impositi remissionem postulaturi Misram proficiscerentur, advenirentque 13^a mensis Toth, qua die missi à Praefecto cum literis ad desertum tendebant. Cum igitur Monachorum seniores ipsis occurrissent, atque inter eos Chail, cum gaudio & stupore in urbem regressi sunt, & cum Episcopis & Sacerdotibus cum ad Palatium deduxerunt. Hafesus re intellecta Deum laudans, dixit illis, habere illos pastorem & patrem, quem Deus elegisset, abirent in pace, eumque deducerent. Profecti Cahirâ navibus 14^a mensis, ejusdem 16^a Alexandriam appulerunt, Chailemque solenni pompa per urbem deduxerunt, cum cereis, crucibus & Evangeliiis. Tunc cum à biennio imber nullus cecidisset, toto triduo pluit; omen accipientibus omnibus, quod faustus & felix adventus futurus esset illius viri, quo adveniente, publica calamitas tam insigni miraculo levaretur. Ordinatus est 17^a Toth, ut cum Autore istius vitae Elmacinus quoque testatur, licet in Versione Latina error occurrat: nam 7^a legitur per Typographorum officiantiam, cum lectio Arabica rectè se habeat. Erat autem secundum Elmacinum annus Martyrum 460^{us}, nempe quia annus Ægyptiacus à mense Toth ducit initium: atque ita consentit cum Autore hujus vitae, qui anno 459^o convenisse ait Episcopos, pluresque dies consultando consumuisse: sed ut superius observatum est, annus iste Martyrum seu Diocletiani non convenit cum anno Hegiræ 120^o, quem Elmacinus cum eo componit: nam additis ex certa regula annis 284, fit numerus annorum J. C. 744. qui est annus Æræ Arabicae 127^{us}: multò minus ad veritatem accedit supputatio Canonis Chronologici apud Abulbircar, qui ordi-

nationem Chailis refert ad annum Martyrum 445^{um}, J. C. 729^{um}, Hegiræ 111^{um}: sed nihil mirum, cum ut supra monuimus, non uno loco turbatissima sit hæc Chronologia, ea ut verisimile est ratione, quod tota in tabulas redacta, numeros habet non integrè scriptos, sed Ziferis Ægyptiacis consignatos, in quibus à Librariis facillimè peccari solet. Makrizius abit ab utriusque Autoris Chronologia, & Chailem quem integro nomine Michaellem appellat, ordinatum fuisse scribit anno Hegiræ 117°, J. C. 735°, qui est Martyrum 451^{us}; sed ipse quoque aberrare judicandus est, cum certos caractères habeamus, in quibus hanc Epocham figere possimus: nempe, ut ex tota hujus narrationis serie manifestum est, sub Hæfeli Præfectura ordinatus est Chail, & sub Hischamo Califa; itaque neque ante annum Hegiræ 114^{um}, J. C. 741^{um}, Martyrum 457^{um}: nam eo anno, ut testatur Elmacinus, Hæfesus Ægypto præfectus est: neque post annum Hegiræ 125^{um}, J. C. 742^{um}, Martyrum 458^{um}. Cum verò annus Arabicus inceperit à die tertia Novembris, Ægyptiacus à mense Toth, cujus 17^a ordinatione Chailis celebris incidit in diem 14^{am} Septembris, pertingebat idem annus Martyrum ad annum sequentem, J. C. 743^{um}. Eo autem anno Hegiræ 125° obiit Hischamus. Hæc, quantum colligere potuimus, notæ sunt certissimæ, ad constituendam illam Chronologiam intra certos limites: atque ex ea observatione emendari debet Autor historiæ Chailis, sive Severus est, sive alter quispiam: nam ex ejus narratione intelligi debet, Cosmam, qui post longam Sedis Alexandrinæ vacationem Melchitarum Patriarcha constitutus est, non, ut Jacobitis placet, irrepsisse quasi per fraudem, dum ipsi inter se de eligendo sibi Antistite consultarent: sive enim 3 Hischami anno Cosmas constitutus est, ut scribit Elmacinus, sive ut habet Eutychius, 7^o anno: quod certius omnino est, & ita apud Makrizium legitur; illum Melchitæ Patriarcham habuerunt annis viginti, aut circiter, antequàm Chail apud Jacobitas fuisset ordinatus. Obiit igitur Hischamus, ut dictum est, anno Hegiræ 125°, successitque illi ex patris testamento Walid filius Yezidi filii Abdelmelici, qui anno uno solum regnavit; & amoto Hæfeso, alium Præfectum in Ægyptum misit. Is ab Elmacino vocatur Isâ filius Abuhata, ut etiam à Makrizio. Autor hujus historiæ aliter nominat, nempe Haçan filium Hatahiah, qui tamen nonnisi anno 127°, extincto Walido, Præfecturam obtinuit: tanta est in rebus politicis, illorum Historicorum Ecclesiasticorum negligentia.

PATRIARCHARUM ALEXANDRINORUM. 211

CHAIL
Patt. XLVI.
Res Antio-
chenæ.

Sed, antequàm ulteriùs progrediamur, necesse est ea, quæ de Jacobitarum Antiochena Ecclesia occurrunt, paucis referre. Athanasio, de quo superiùs dictum est, mortuo, suffectus est, ita peremptente Hîschamo, annoque Califatûs ejus 1°, Joannes, de quo nihil legitur præterea, nisi quòd ab Episcopis suis vexatus est; tandemque pace inter eos factâ obiit: neque ullus Antiochenus Jacobitarum Patriarcha fuit usque ad Abbassidarum initia, nempe sub Abdalla filio Safah. Scripsisse ad Chailem Patriarcham literas Synodicas Joannem illum Antiochenum probatur ex excerptis quæ occurrunt ex illis, quas Chail ad eum scripsisse dicitur, & cuius magna pars extat in Tractatu *de fide Patrum*.

Ut jam ad res Ægyptiacas revertamur, statim atque Chail Patriarcha ordinatus est, tanta Præfectorum Ægypti sævitia fuit in tributis exigendis, ut, cùm paulò pòst orta esset gravissima pestilentia, ea calamitas fuerit ut plerique non modò pecora sua, sed liberos etiam in servitutem vendere cogerentur. Edixerat Hæfesus ut omnes in tota Ægypto Orationem Muhamedanorum solennem dicerent, quod ipsum erat eorum Religionem profiteri; qui obtemperassent, eos à tributis immunes esse jubebat. Ea occasio fuit multis abnegandi Christianam fidem, magno Patriarchæ dolore, reliquorumque Episcoporum, qui multa passi sunt.

Nova per-
secutio.

Plerique Sedes Episcopales suas reliquerunt, ut in deserta se reciperent & in Monasteriis laterent, ubi continuis precibus à Deo postulabant, ut Christianorum misereretur. Moses Episcopus Wissim cùm à suis discipulis retentus ad Sedem suam non rediisset, Christianos afflictos hortabatur ad constantiam, & fidem in tot calamitatibus conservandam: cùmque præcipui ad eum retulissent numerari jam hominum viginti quatuor millia, qui fidem abnegassent; consolatus est eos, pollicitus instare persecutioni finem, & Hæfesum qui eam excitaverat, tum rebellem quemdam nomine Reja, brevi perituros, primumque in ipsa urbe Cahira igne consumendum; quæ secundùm illius prædictionem paulò pòst contigerunt. Nam Kauterus Dux, cum quinque armatorum millibus à Califa missus, Hæfesum dignitate & vita privavit, ejusque corpus igni consumpsit: Rejam occidit: utriusque facultates omnes fisco addixit; & Hæfano auctoritatem ex Califæ jussu restituit. Gesta hæc fuisse anno Hegiræ 1310, ex Makrizio & aliis Autoribus intelligimus, in magna Imperii Saraceni turbatione, quæ ab Hîschami morte usque ad Meruani principatum omnes ferè provincias invasit. Hæfesus au-

Dd ij

tem ter Præfecturam obtinuit : pulsus iterum & semel, atque restitutus, tandem eo quem diximus anno occisus, Præfecturam Hæçano vacuam reliquit.

Res Muham-
edanæ.

Paucis annis multi Calife regnaverunt, quos ad historiæ intelligentiam recensere operæ pretium est.

Walid qui Hîschamo successerat, 18^{us} Califa & 11^{us} Ommiadarum, occisus est ob improbitatem & impietatem post annum & menses duos, anno 126^o, J. C. 743^o.

Yezid ejus ex fratre nepos, filius Walid filii Abdelmelic, eodem anno salutatus, post quinque menses obiit ex peste, 19^{us} Califa, & ex Ommiæ filiis 12^{us}.

Ibrahim ejus frater 20^{us} Califa, 13^{us} Ommiadarum, statim ab ejus morte Imperator renunciatus, anno 127^o, J. C. 744^o : sed rebellante Meruane & adversus eum copias ducente, omni auctoritate spoliatus est, eo ipso anno.

Meruan 21^{us} & 14^{us} Ommiadarum, cùm Ibrahim, ut communis opinio est, an. 131^o occidi jussisset, eodem anno occisus est ab Abbassidis, ad quos translatus est Imperium : & de quibus dicetur inferius.

Pœnitentiæ
Apostatis da-
ta.

Hæçan igitur qui extincto Hæfeso Ægyptum obtinuit ; Christianos, Episcopos, Monachosque diligebat : Chailen Patriarcham frequenter accersebat, & cum eo familiariter colloquebatur. Kauterus Dux non minori favore Christianos prosequabatur, & cùm prope per triennium circa urbem Wîssim cum copiis suis castra habuisset, cum Abrahamo quodam Episcopo qui illic erat, sermones habuit, ad salutem animæ suæ spectantes, Jacobitasque dilexit. Eo tempore potius, quàm turbatâ sub Hæfeso Republicâ factum existimandum est, quod paucis verbis perstringit Autor historiæ, Chailen Christianis qui in persecutione fidem abnegaverant dedisse pœnitentiam. Obscurè sanè locutus, ignorare nos sinit quæ tunc esset apud Copitas disciplina pœnitentialis, de qua antiquius apud Arabes Christianos testimonium non observavimus. Dura sanè sequentibus sæculis illa fuit adversus eos qui fidem abnegaverant : quippe recipi vix solebant, nisi postquam eo ipso loco, ubi Muhamedanæ impietatis publicam professionem fecerant, eidem renunciassent, quod tunc non videtur in usu fuisse. Verùm quantum conjectando assequi possumus, ea tunc pœnitentiæ dandæ ratio fuit, ut exomologesi facta, quas olim pœnas canonicas sustinebant qui Idololatriæ rei forent, ex Canonum præscripto ; eadem *nis* *mu* *za* :

PATRIARCHARUM ALEXANDRINORUM. 213

CHAP. XLVL
Patr. XLVL

plurim, hoc est qui ad Agarenorum sacra transuissent, per Episcopos imponerentur. Mitiores tandem poenas Græci imposuerunt, ut patet ex Canonibus qui continentur in Cotelieriano Nomocanone: nempe annorum sex, erga illos qui nemine cogente, trium erga eos qui coacti, ad impietatem illam defecissent. Eos autem Chrismate ungebant, ut olim recipiebantur per Chrismationem plerique hæretici, non per iteratum baptisma, quod prohibetur in eadem Collectione. Sed de his omnibus fusè dicitur in singulari Dissertatione de Pœnitentia.

Mon. Eccl.
Gr. 3. 138. 157.

P. 77. §. 48.

Cum verò aliquandiu Ægyptus conquievisset, præsertim restituto Haçano, qui æquitatem præ cæteris Præfectis colebat eximie, ubi Merian imperio potitus est, omnium præsertim Christianorum, sub crudelissimo domino luctuosissima conditio fuit. Interea cum haberet in aulico ministerio Diaconum quemdam Calchedonensem sive Melchitam, Theophylactum nomine, is grandi pecuniâ obtinuit, ut Græcorum suorum Patriarcha constitueretur. Istius Theophylacti nulla apud Eutychium memoria est, qui suorum antecessorum nomina saltem, ignorare vix poterat: atque etiam Alexandrinum Patriarcham non fuisse dicitur Autor qui nomen urbis præterit, quamvis de Alexandria loqui videatur. Eum verò Antiochenum fuisse docet nos Theophanes; Presbyterumque Ecclesiæ Edesenæ, qui à Meriano ad eam dignitatem evectus sit, in defuncti Stephani locum. Attamen ex hac historia satis intelligitur Autorem in alia sententia fuisse, existimasseque quòd Theophylactus fuerit non Antiochenus Patriarcha, sed Alexandrinus Melchitarum, qui alio nomine Cosmas sit appellatus.

P. 353.

Narrat autem & quidem multis verbis, eum & alios Melchitas à Meriano postulasse, ut Ecclesias quæ in Ægypto dirutæ olim fuerant, iterum ædificare ipsis liceret: tum ut occupatæ à Jacobitis Ecclesiæ, quos hoc loco *Theodosianos* vocant, sibi restituerentur, præsertim S. Mennæ in Maræotide, miraculis celebrem. Iussi sunt adesse Patriarchæ duo, Melchita & Jacobita, causamque suam scripto & viva voce defendere. Longa hinc & absurda prorsus istius controversiæ narratio texitur, quasi tradita ab homine qui testis illius fuerit; sed ita ut fraudis imperitia satis appareat, dum ea dicta Catholicis attribuit, quæ nemini unquam illorum venire possint in mentem; sed ad conciliandam illis invidiam excogitata facillè agnoscantur. Gesta hæc sub Abdelmelsi oo filio. Moïsi filii. Nacir, ex familia Haçan Judæi, quem Elmaci-

Contentio
inter Othod
doxos & Ja
cobitus.

Dd iij,

nus à Judaica religione ad Muhamedanam transivisse scribit, & à quo mala multa Christiani sustinuerunt. Intererant ex Melchitarum seu Orthodoxorum parte, præter Cosmam quem & Theophylactum vocant, alter Episcopus Græcus Jacobitis infensissimus, Constantinus nomine, cum Diacono Anastasio, ex Ecclesia Jacobitarum Alexandrina: ex alia parte Chail Jacobitarum Patriarcha, Theodorus Episcopus Misræ seu Cahiræ, qui antea fuerat Archidiaconus Ecclesiæ S. Macarii, & alii. Postquam utrique verba fecissent, jussit Abdelmelicus, ut scripto rationes suas exponerent. Chail congregatis Episcopis suis, ex communi sententia Apologiam scripsit Copticè & Arabicè, in qua doctrinam Ecclesiæ suæ rationibus, & Scripturæ sacre testimoniis confirmabat: tum ex historia prædecessorum suorum ostendebat, à quibus ædificata foret Ecclesia S. Mennæ: quanta passi fuissent Jacobitæ à Chalcedonensibus exilia, & tormenta; tandem ereptionem Ecclesiarum per vim factam auctoritate Romanorum Imperatorum. Melchitæ scriptum paucis verbis comprehensum dederunt. Ex eo quòd Chail obtulerat, refert Autor hæc verba. *Chail per gratiam Dei Episcopus urbis Alexandriae & populus Theodosianus: Dominis Imperatoribus, circa Ecclesiam S. Mennæ in Maræotide. Olim Christianorum Imperatorum Arcadii & Honorii tempore sub Theophilo Patriarcha, incæpta est ab eodem ædificari Ecclesia S. Joannis Baptistæ. Eam cum perfecisset Theophilus, Ecclesiam S. Mennæ in Maræotide ædificavit: & aliam inchoavit nomine Theodosii junioris, qui eum ad id opus suscipiendum juverat. Illud opus inchoatum prosecuti sunt successores ejus Patriarchæ, usque ad Timotheum qui extremam manum imposuit. Successit tandem Imperator Marcianus, à quo Ecclesia ob perversam ejus fidem scissa est: expulsusque Dioscorus qui pro fide orthodoxa Patrum suorum, tam strenuè decertavit. Inde prodiiit fidei novitas detestanda, adjuvante Leone Romano Patriarcha, quem Dioscorus excommunicavit, percussâ quoque anathemate doctrinâ ejus blasphemâ & impiâ. Ab eo tempore cæperunt Imperatores Romani Orthodoxos persequi, exiliis, cædibus, omnique penarum genere in eos faciundo; quæ calamitas finem nullum habuit, donec ad Muhamedanos Imperium transferretur: nec interea contentiones & inimicitie inter Jacobitas & Romanos conquieverunt. Chalcedonenses contra nihil aliud opponebant, nisi quòd antiquitus simul cum Imperio, omnes Ecclesias, & earum bona*

possederant, quæ Muslemanni, cum Provinciam armis obtinuissent, Coptitis Jacobitis attribuerint. Iudex utramque partem remisit, asserens eos causam non attingere, iussitque alias scripturas parari; quod semel atque iterum à Jacobitis factum est, nullo tamen fructu, cum eum, ut affirmant, muneribus Melchitarum corrupissent. Cum verò Mosis Episcopo Wissim quidam autor esset ut Iudicem datâ pecuniâ placabilem redderent, renuit testatus, neque Patriarchis, neque Episcopis convenire ut munera darent vel acciperent; Deum auxilio suis futurum. Ejus miraculis & prædictionibus tribuunt, quòd Ministerialis ille Jacobitis iniquus, officio quod in Divano seu Prætorio sustinebat, paulò post privatus successorem accepit alium, nomine Abulhucein, justitia & integritate commendatum. Coram eo post consultum in alterius Iudicis tribunali mensem integrum, venit Chail, simulque Melchitarum Patriarcha. Primùm interrogatus est an fidem teneret Jacobi Hierosolymorum Episcopi; quod Chail affirmavit indubitanter. Melchitarum Patriarchæ hanc deinde responsionem stolidissimi falsarii attribuunt. *Fidem sequor Marciani Imperatoris. Num, inquit Iudex, credis in Imperatorem & non in Deum? Quæ tandem sit fides tua palam facito, ut vos iudicem.* Tum ille: *Pater meus, inquit, à quo doctrine meæ fundamenta jacta sunt, Nestorius fuit, contra quem congregata est Synodus Ephesi, cui Cyrillus pater & antecessor hominis istius præsidebat: intervenit etiam Monachus quidam Ægyptius ex provincia Echmim; illi verò favente Imperatrice, illum ex Ecclesia pepulerunt. Paulò post suscitavi Deus Marcianum & Leonem, qui Nestorio & ejus sequacibus conjuncti, omnes Ecclesias obtinuerunt, & in illis Episcopos constituerunt, qui ad hunc usque diem subsisterunt. Episcopus porro noster erat Proterius, quem Alexandrini cum interfecissent, missis copiis, unâ horâ triginta illorum milia occidi jussit. Cum adhuc Iudex, tanquam sævitiam detestatus obstupuisset, iterum jussi sunt utrique scriptis causam propugnare; & interea Constantinus Episcopus Mistræ, Melchita, Chailem adiit, hortatusque est ut concordia inter se inita in unum ovile coalescerent. Communicato cum Episcopis consilio, obnixenteque Episcopo Wissim Mose; missi tamen sunt, eo consentiente, Mina seu Mennas sacerdos, qui ipsi erat à secretis, & Autor hujus historiæ, ut cum Melchitis collationem instituerent. Cum Mennas exposuisset Symbolum Patrum Nicænorum, illudque ut erat doctissimus autoritatibus sacræ Scri-*

pturæ, sanctorumque Patrum Athanasii & Cyrilli testimoniis confirmasset, professus est Constantinus eam esse suam fidem, futuramque ad ultimum vitæ spiritum: unicam agnoscere se unionem; unum Deum, unum Dominum, naturam unam, quæ est Christus Dominus: si quis aliter crederet, Judæum esse: qui duas naturas post unionem in uno Christo confiteretur, alienum esse à Patre & Filio, & Spiritu sancto, partemque ejus futuram cum Juda proditore.

Concordia
inter Ortho-
doxos & Ja-
cobitas pro-
posita.

Cùm inde spes aliqua concordiæ affulgere videretur, cum Cosma colloquium habitum est: qui statim petiit, ut ea conditione fieret unio duarum Ecclesiarum, quod Chail Patriarcha sacris solennibus interveniret, Melchita adesset cum eo: finitis officiis Jacobitæ ad sua loca reverterentur, ipse cum Melchitis in omnibus Ecclesiis suo in gradu reciperetur. Relatione facta ad Chaillem & Episcopos, Moses Episcopus Wissim consuluit ut Cosmas Episcopus constitueretur per totam Ægyptum, quibus verbis intelligi videbatur Ægyptus inferior, ita ut nova quædam Diœcesis ipsi constitueretur, Metropolitani autoritate regenda, secundum aliarum Provinciarum Ecclesiasticarum disciplinam, quæ in Ægypto non erat, atque hunc in modum dignitas ejus, Episcopali quidem superior, Patriarchali inferior foret, atque simulachrum Patriarchatus, quem amore concordiæ deponere cogitabat, retineret. His ita constitutis, venerunt omnes ad Abdelmelicum, magna undique multitudine confluente in Palatium. Ibi cùm Constantinus Episcopus Misræ Melchita inter Jacobitas locum cepisset, nihil propius fuit, quàm ut à Sahiditis occideretur, nisi eum Jacobitæ Episcopi vestibus suis texissent. Nihil tamen promotorum: sed tumultu ingenti excitato, cùm Abdelmelicus omnes pelli jussisset, postmodum Patriarchæ duo accersiti, jussi sunt interposito juramento causam de Ecclesia S. Mennæ dicere. Chail negavit licere sibi jurare omnino: Cosmas audacter juravit. Chail interrogatus quos testes produceret, allegavit Theophilum & Timotheum, quorum ultimum ædificium absolverat, unde etiam nomen ejus Ecclesiæ inscriptum legebatur. Missi Ministeriales cum interpretibus, qui scripturam agnitam veritatem confirmaverunt; quæ ex aliis argumentis à Chaille adductis palam facta, tandem Ecclesia Jacobitis attributa est. Atque hic finis est prolixissimæ narrationis, ex qua quæcunque ad originem Ecclesiarum, disciplinamque pertinent, decerpimus, reliqua prætermisimus; illud tantummodo adjiciendum

cum existimantes, ex illa tam corrupta fabula agnosci posse qualiter afflictissimis illis Hæreticis, sed tamen Christianis, illudi ab Antistitibus suis soleat etiam doctis, qualis certè erat Severus Episcopus, illius historiæ collector, qui hoc fragmentum quasi panum purpureum tot inanibus lacinis adjunxit, ut eos in errore suo retineret. Quis enim nescit æquè exhorrere Melchitas Nestorium & ejus blasphemias, quàm Jacobitæ possint. Sed illud etiam animadversione dignum, & ad illorum sequentiumque temporum mores cognoscendos haud inutile, quòd in illo judicio de Ecclesiæ S. Mennæ possessione, secuti sint Muhamedani jus illud suum erga Christianos commune, ut eam Ecclesiam attribuerent Jacobitis, quia consummatum ædificium esse constabat ex inscriptione, à Timotheo qui in ea secta vixerat. Multa enim ejus generis exempla obvia sunt, quæ nisi ad hanc regulam referantur, arbitrarii potius judicii, quàm ex præscriptis consuetudinibus pronuntiati speciem habere viderentur.

Posteaquàm hæc apud Abdelmelicum gesta, narrata sunt, refert Autor venisse Alexandriam literas Synodicas à Joanne Patriarcha Antiocheno ad Chailèm scriptas, flagrante inter Episcopos & Joannem discordiâ, quòd eum suscipere nollent quasi Patriarcham, quippe qui Episcopus cùm esset, eam dignitatem secundum Canones adipisci non poterat. Convocatis Episcopis, legi jussit Chail literas, quibus significabatur quanta esset circa illius Patriarchæ electionem inter Antiochenos contentio. Communis Episcoporum sententia fuit, nullam responsionem debere fieri; sed operam dari ut Antiochenis liceret eum ejicere, si ipsis videretur: alioqui, si scriberetur ad eos, & postea Joannem ejicere detrectarent, dari occasionem scissioni Ecclesiarum. Itaque arbitrio Chailis relictum est, ut, quocumque modo vellet, procuraret per literas rem in eo statu in quo erat, conservari. Et sanè, ut ex aliis hujus historiæ locis intelligitur, Elmacinio testimonio, nulla inter Joannem & Antiochenos Jacobitas, quamdiu ille in vivis fuit, concordia coaluit: tantus adhuc erat sacris Canonibus, qui Episcoporum translationem tam severè prohibent, honor apud omnes Ecclesias, etiam ab Catholica separatas; cujus disciplinæ cùm minima apud Nestorianos, ut ex eorum historia discimus, ratio habita sit, satis ipsi & novitatem suam & corruptelam agnoscunt.

Magna rerum omnium tam civilium quàm Ecclesiasticarum turbatio secuta est, ob bella inter Muhamedanos civilia, cùm Abbas-

Res Antiochenæ turbatissimæ ob Patriarcham qui Episcopus dudum erat.

Abbasidarum initia.

Ec

fidæ, qui jam in Chorasana defectionem nudaverant. eâ provinciâ occupatâ, ad vicinas arma transfulerunt, Ommiadasque & ultimum eorum Merüanem, castris & exercitibus non semel exutum, fugere in Ægyptum compulerunt, ubi tandem occisus est in regione Busrîtide. Tantæ mutationi occasionem dedit nimia Præfectorum Provinciarum potentia, quæ cum ex Imperii amplitudine coerceri vix posset, indulgebantur illis omnia, adeo ut non modò bellicarum rerum, sed civilium supremam, Califa inconsulto, haberent auctoritatem. Eam auxit magnopere ultimorum ex Ommiadis Califarum, fœcundia, crudelitas, avaritia, apud quos libidine & luxu perditos, nulla virtutis aut æquitatis ratio, nulla subditorum cura erat; verum, ut eodem exemplo apud Turcas hodie fieri assolet, qui provincias spoliaverant, bonis omnibus fisco addictis, deteriores successores accipiebant, nulla erga populos compensatione injuriarum facta. Siquis bello strenuus, aut justitiæ amore commendabilis foret, is in suspitionem affectati regni veniebat; atque ea ratione multos Califæ duces exercituum, præfectosque provinciarum è medio sustulerant. Dederat Merüanus reliquis exemplum, cum adversus Yezidum & Ibrahimum Hemese rebellaverat, eosque vita & imperio spoliaverat; vir improbus, sævusque ad horrorem omnium: & quem ut legitimum Dominum ferre Muhamedani cum vix potuissent, cœnidem ubique oppugnaverunt.

Delatum est igitur Imperium Abbassidis in urbe Meru Chorasana primaria, anno Hegiræ 129°, J. C. 746°; paulò post quàm Merüanus illud occupasset. Abu-Muslimus & alii Abbassidarum duces usque ad annum 131^{um} Ommiadas tot præliis attriverunt, ut centum & ampliùs eorum millia in Chorasana perierint: pulsi inde ex vicinis provinciis, & Yezido filio Bira, Merüani exercitus duce, ad Euphratem prope Wastam cum ingenti clade profligato, tandem Califa Cufæ proclamatus est Abul-Abbas Safah, qui primus ex ea familia, quæ etiam Hachemidarum dicitur, eam dignitatem obtinuit, anno Hegiræ 132°, J. C. 749°. Erat autem in ea familia quædam ab Ommiadis & eorum sectatoribus in religione diversitas: quarum præcipua fuit opinio de Hali Muhamedis genero & successore, ad quem Pontificatum & Califatum simul, quo omnis secularis spiritalisque in Muhamedanos auctoritas continebatur, spectare Abbassidæ credebant, atque adeo Muaviam, & alios omnes ex stirpe Ommiæ, qui Halim & Hacenum ejus filium vita & Califatu spoliaverant, non modò rebellionis, sed hæresis quoque reos judi-

Abul-Abbas
Safah primus
ex Abbassidis
Califa.

cabant. Nam inter antiquos fidei articulos, unus erat, quem adhuc Persæ sequuntur, circa Pontificatus lineam, ut scilicet eam ab Hali & ejus posteris deducendam crederent: atque hos reliqui Muhamedani *Chiaet* vocabant, hoc est *Sectarios*; cujus quidem sectæ varii adhuc rami propagati sunt, de quibus Autores Orientales multa tradunt, quæ minus ad institutum nostrum pertinent. Omniadæ qui Imperium ad se transfulerant, exigebant à subditis quamdam formulam, quæ maledictionem & anathema in Halidas contineret. In Corasana maximus erat ex eorum secta numerus, quos ut sibi Abbassidæ conciliarent, formulam illam sustulerunt, seque Halis sectatores, sanguisque ejus vindices professi sunt. Hinc mutata in ritibus & consuetudinibus multa, præsertim verò color sacer ex antiqua superstitione habitus, in vexillo vestibulæ principum & militum, tum etiam in tapete illo seu stromate, quo Ambo seu pulpitum unde *Cotbet* seu prædicatio & oratio publica per Calisum fiebant. Dederat Muhamed Pseudopropheta Hamzæ avunculo suo vexillum candidum: colorque ille in Halidarum familia, & sectis quæ Halim sequuntur, perseverat: at discriminis causâ Abbassidæ vestes, vexillum, stroma Ambonis, nigra esse voluerunt, qui color ad ultima usque tempora quandiu Califarum titulus superstit conservatus est. Safih qui primus inter eos Abbassida numeratur, an. 136^o ex morbo obiit, cum quatuor annos regnasset, post Meruani cædem. Plura de illis rebus qui volent, legere poterit omnium brevem historiam in Bibliotheca Orientali sub variis titulis; qui verò libros Orientales consulere per se possunt, præter ea quæ apud Elmacinum & Abulfaragium reperiuntur, invenient in variis Abbassidarum historiis, Emir-Condo, & ejus Epitome, aliis historiis Persicè scriptis, Ismaele Abulfeda, Ebn-Chechna, & tam multis aliis, ut indicem illorum contexere non mediocrem faciliè liceat.

In tanto tumultu Abdelmelic Egypti Præfectus Chailam comprehendit & in carcerem conjici jussit sub prætextu tributi quod ab Ecclesia debebatur. Catenis ferreis constrictus fuit, simul cum Mose Episcopo Wissim, Theodoro Episcopo Misræ, Isa & Paulo Mosis discipulis, & aliis, inter quos se fuisse scribit Autor historiæ. Ita in obscuro carcere detenti sunt ab 11^a Toth, usque ad 12^{am} Paophi, hoc est diebus triginta duobus: nec interea solis lucem viderunt. In eundem detrusi sunt trecenti viri aut feminae: quos omnes consolabatur, hortando ut poenitentiam de pec-

E e ij.

Confessio
peccatorum
apud Patriar-
cham facta.

catis suis agerent, præsentem calamitatem patienter sustinentes; prædixitque finem illius ante annum certissimè futurum. Omnes autem cum peccata sua apud eum confessi essent, & iurejurando se obstrinxissent, se non amplius ad ea relapsuros, vix toto verterente anno in libertatem restituti sunt. Quidam interea ex Aulico Comitatu Christianus, quæ ad victum necessaria erant ipsi & aliis subministravit: Episcopis scilicet duobus qui cum eo victi erant, quibus toto illo tempore ministerium suum non defuisse testatur Autor narrationis. Ea occasione refert se illum interrogasse de peste, quæ omnes fere infantes eo anno abstulit, quos Chail ad Paradisum translatos respondit, quia sine peccato essent, nempe de Christianorum filiis baptizatis loquebatur: neque enim inter tot errores, qui vel falsò vel verè Coptitis impacti sunt, auditum est accusatos eos fuisse quòd peccatum originale negarent, de quo testimonia multa sunt in officiis baptismalibus. Subjungit alia satis infusa ex colloquiis ejus cum noctu vigilent, quæ cum ad Patriarchæ sui doctrinam commendandam pertineant, levia admodum ejus argumenta præbent: eaque non minus quàm ejus in morbis sanandis miracula, aut similia Episcopi Wissim, & tales fabulas omittimus. Tandem cum eductus è carcere urgeretur ut pecuniam daret, obtinuit libertatem proficiscendi in superiorem Provinciam, ut eam à Christianis corrogaret. In eo itinere incommoda multa passus est, tamen multos ad fidem reduxit. Reversus Misram est 21^a Tybi, festo Dormitionis Deiparæ: qua nocte ingens terræ motus multas domos subvertit, naves plurimæ tempestate demersæ: quæ calamitas à Gaza usque ad extremos Persidis fines pervasit. Urbes cum pagis numerabantur sexies centum, quæ in hoc terræ motu perierunt: hominum & pecorum innumera multitudo. In Ægypto, præterquam Damietæ, nihil mali accidit: sed omnes in summo metu fuerunt: Ecclesias & domos Jacobitarum in Oriente, ubi omnes ferme urbes aut dirutæ aut concussæ sunt, incolumes perstitisse, Autor ait accepisse à viris fide dignis: non tamen magis quàm sunt alii historiarum Autores, tam Christiani quàm Muhamedani, quibus nihil simile perscriptum est. Abdelmelicus, acceptâ quam Chail ex Christianorum suæ sectæ collatiâ stipe collegerat pecuniâ, liberum eum abire permisit.

Res Nubiæ.

Hoc loco Autor ad res Nubiæ stylum convertens, scribit ea in Provincia fuisse Regem, quem Mercurium appellat, qui ob eximiam pietatem & bona opera Constantinum novi nomen meruerit.

Is filium habebat Zachariam, qui post patris obitum, ut orationi salutique suæ liberius vacaret, regnum propinquo cuidam suo Simoni reliquit. Is vitâ laudabiliter institutâ paulò post defunctus, successorem habuit juvenem strenuum Abrahamum, à Zacharia designatum. Ille tamen cùm pravis moribus esset, magnas cum Episcopo Cyriaco inimicitias exercuit, monita ejus impatenter ferens, adeo ut ad Chailem Patriarcham literas scripserit, quibus mirabatur, se totam Regionem Idolorum cultui mancipaturum, nisi Episcopus deponeretur, quem multis accusationibus falsis impetebat. Lectis literis in Synodo Episcoporum, visum est rogare Episcopum, qui ad dicendam causam venerat, ut in Monasterio aliquo quiesceret, donec ira Regis deferbuisset. Cùm renueret Episcopus, eum dimiserunt; sed ita ut eum in Ecclesiis Ægypti Liturgiam celebrare non siverint, tum Joannem quemdam qui cum eo venerat, Episcopum ejus loco ordinaverint. Factum aiunt miraculum, nempe quoddam imago Joannis Chrysostomi supra sedem Patriarchæ suspensa, ter in confessu Episcoporum ceciderit: Episcopus autem virum sanctum oris lineamentis referebat: significabaturque displicere Deo alterius ordinationem. Unde cùm antiquior Episcopus in quoddam Nubiæ Monasterium se recepisset, alter ad Regiam profectus esset, quandiu primus in vivis fuit, Nubia imbris caruit, & quotannis pestilentiam gravissimam experta est: qui eum in exilio adibant, visu privabantur. Post annos aliquot cùm quartum & centesimum vitæ annum explevisset, obiit. Nubii ad sepulcrum ejus profecti, rogantes ut orationibus suis Deum placaret, siccitate & peste liberati sunt. Zacharias qui antea regnaverat, quique tanquam Pater Regum, auctoritatem in eos conservabat, Abrahamum in Insulam relegavit, alium Marcum loco ejus constituit. Hujus familiares quidam, Abrahamo sicarios summisserunt, quod cùm alii qui illi favebant intellexissent, Marcum sexto regni mense, in Ecclesia coram altari orantem interfecerunt. Suffectus ipsi est Cyriacus vir pius, qui, ut aiunt, dum hæc historia scriberetur, superstes erat. Cùm verò ad eum scriptum esset, Chailem ab Abdelmelico in vincula conjectum, profectus est versus Ægyptum cum exercitu numerofo, in quo erant equi centum mille: camelorum æqualis numerus: equi verò pusilli asinorum staturam non excedentes, sed pugnacissimi, adeo ut calcibus hostes impeterent in prælio, nec minus quàm equites nocerent. Ita cum copiis Nubiæ Rex progressus in Sahid, prædas agere & ma-

Ec iij.

Elmac. p. 83.

De Nuborum
Christianifi-
catione.

gnam Muslemanorum stragem facere cœpit; & ad locum, qui etiamnum Piscina sive Stagnum Æthiopum dicitur, castra posuit. Tum legatum ad Abdelmelicum misit, rogans ut Patriarcham liberaret: at illum Abdelmelicus cum Patriarcha conjecit in carcerem. Territus tamen ejus adventu, Chailem jussit ad eum scribere, ut in regionem suam reverteretur, data ipsi benedictione: quod Cyriacus fecit. Eamdem historiam paucis refert Elmacinus, eamque assignat anno Diocletiani 461°, J. C. 755°; Autor noster 64° post exortum Muhamedanorum imperium: neque alterutra numerandi ratio locum hic habet, cum facta hæc esse, si vera sunt, oporteat sub Abdelmelico Præfecto & Chaile, hoc est circa annum 120^{um}, J. C. 737^{um}. Meminit quoque Abuselah Armenus in Chronico: omnes, opinor, ex hac ipsa historia, quæ omnium antiquissima est. Addit Autor, *subjectos fuisse Cyriaco Nubiæ Regi alios tredecim, inter quos primum locum obtinebat Rex Elchera Orthodoxus, hoc est Jacobita: potens, qui coronam habet ætæ delapsam, quique est Rex Yunani: & cujus ditio pertingit ad ultimas usque Australes regiones: alios quoque Reges Æthiopiæ sive Habessinæ, in quos omnes auctoritatem habet Patriarcha Alexandrinus, qui illis Metropolitam ordinat, à quo Episcopi & Sacerdotes ordinantur.* Hæc ad verbum transtulit Abuselah Armenus, qui quædam addit, de quibus, quia ex *amison* numero sunt, dicendum erit alibi, nam ad Æthiopicas res pertinent: de Nubiis pauca observanda sunt.

De antiquitate Christianismi apud eos nihil ferme scitur. Cum autem Patriarchæ Alexandrini Jacobitæ coeperunt Episcopos illis ordinare, eos ad sua sacra transtulerunt, quod factum esse eo intervallo temporis, quod inter captam à Muhamedanis Ægyptum, & ordinationem Cosmæ effluxit, suprà ex Eutychio, Elmacino, Makrisioque observavimus. Quæcumque verò fuerit antea illius Ecclesiæ conditio, certum est ab eo tempore Nubas omnes Jacobitæ sectæ addictos, Patriarchæ Coptitarum solius auctoritatem agnovisse. Testantur id autores omnes qui de Jurisdictione illius scripsere, sed ita tamen ut vix scire agnoscantur quinam illi Reges forent, imò qui forent Nubiæ propriè dictæ limites. Sunt enim viri docti quibus non immerito visum est, ea quæ de Cyriaco aut aliis Nubiæ Regibus sparsim in Orientalium libris occurrunt, ad Æthiopes pertinere. Et sanè huic conjecturæ favet, quod Cyriacus autor noster aliis Regibus imperasse testatur, quod de Habessinorum Regibus

ubique legitur, de Nubiorum, alibi non faciliè occurrit. Neque habita ratione ad sterilitatem & angustias Nubiæ, faciliè quisquam adducetur, ut credat tantam fuisse illorum Regum potentiam, ut exercitum, qualem Autores describunt, in Ægyptum ducerent, nisi cum Nubia, Æthiopiam simul obtinuissent. Verisimile igitur omnino est, cum quem Nubiæ Regem Autor noster, Elmacinus, & Abuselah appellant, fuisse Æthiopem: nam eos Reges ad extremos usque Australis continentis fines olim imperasse communis opinio est: nomen illud *Regis Tunani*, quo eum Autores designant, ad alium referri non potest; quis enim nescit à simili denominatione atavis nostris non intellectâ, formatum illud esse nomen *Joannis Presbyteri*, Æthiopum Regibus attributum, quod eruditos hujus & superioris sæculi tantopere exercuit. Quidquid enim excogitaverint, ut illam Presbyteri appellationem corruptam esse ostenderent, & aliud omnino significare quàm Sacerdotii dignitatem, refelluntur omnes illorum conjecturæ, Abuselahii testimonio, qui Reges illos Sacerdotes fuisse, altaria in tentoriis habuisse, tandemque Liturgiam celebrasse scribit, tum etiam Alvarezii qui Reges quosdam Sacerdotes fuisse testatur. At hæc accuratiùs exponentur in hujus historiæ serie, ubi non pauca occurrunt ad res Æthiopiarum Ecclesiasticas spectantia, quæ à nobis obscuræ illius antiquitatis illustrationem exigent.

Quidquid tandem statuatur, etsi fabulæ quàm historiæ propior ea narratio sit, quam de Cyriaci in Ægyptum expeditione retulimus, est tamen in hoc Arabicarum literarum genere antiquissima, cum plerique, imò quantum scire possumus, omnes historiæ qui Arabicè scripserunt, sint hoc nostro posteriores. Illud sanè certissimum Muhamedanos omnes, quorum ad nos scripta pervenerunt, Nubas inter Christianos numerasse; & statim Jacobitas fuisse, sive quod à Jacobitarum Episcopis Evangelium ad eos pervenit, sive, quod verisimilius est, in publica Orientis & Ægypti calamitate, quâ Romanum his in Provinciis Imperium eversum est, cum aliunde quàm ex Ægypto habere Episcopos non possent: Orthodoxi verò nullum per annos ferme centum Patriarcham Alexandriæ habuerint, ab hæreticis Episcopos & Sacerdotes acceperint, à quibus hæresin Jacobiticam didicerint: ut Eutyechius scripsit, qui id scire certò poterat, & quem Autores alii secuti sunt. Quod si de Nubiis illis Christianis rara aut nulla est apud Antiquos memoria, nihil mirum esse debet: id enim nomen illis fere incognitum, quippe qui Æthiopus vocent, non eos modò qui Ha-

Quid de ea
historia sentiendum.

besiniæ propriæ dictæ limitibus continentur, sed alios multos, quorum nec una, nec eadem semper appellatio fuit. Æthiopiarum verò Regem potentissimum olim fuisse credendum est, aut deneganda omnibus Autoribus fides, qui ingentem populorum multitudinem in Africa interiori agnoverunt; sed de istis rebus erit adhuc dicendi locus: ad historiam redeundum est.

De Eucharistia à jejunis sumenda.

Cùm ex carcere liberatus fuisset Patriarcha, confluerunt ad eum sui magno numero, rogaveruntque ut Liturgiam celebraret, communionemque ipsis impertiret. Celebratâ igitur Synaxi in Ecclesia SS. Martyrum Sergii & Bacchi, ad eam convenerunt, & ex manu ejus acceperunt corpus & sanguinem pretiosum. Inter eos quidam venit ante alios, cui cùm Patriarcha communionem semel atque iterum negasset; egressis omnibus, accessit ille flens, causamque repulsæ sciscitatus est. *Non ego, inquit Chail, prohibui te à communionem, sed ipse Christus Dominus, qui impedivit ne eum acciperes: sed palam facito coram Fratrum tuorum multitudinem id quod commisisisti, ne quisquam illorum tale quid in posterum perpetrare audeat.* Exclamavit ille: *Rogo te Domine Pater, ut si peccatum admisi, mihi illud remittas, nam in illud idem non recidam.* Tum Chail: *Verum omnino illud confiteri te oportet. Ille ad hæc. Domine eram, inquit, & jentaveram; veni in Ecclesiam ut Eucharistiam acciperem, quemadmodum feci hodie. Postea cùm audissem daturum te communionem populo orthodoxo, dixi intra me: Ibo & accipiam Eucharistiam ex manu ejus sancta; atque ut id facerem, caritate christiana compulsus sum: quod cùm tibi manifestum fuisset, mercepulisti. At in Salide multi ita agere solent, nescientes peccatum esse. Hæc cùm Chail didicisset, scribi jussit literas ubique publicandas, ne quis, nisi jejunus, aut bis in die communionem acciperet.* Hæc ipsius Autoris verbis referenda existimavimus, ut disciplinæ Ecclesiasticæ capita duo illius testimonio constarent. Primum est de confessione peccatorum, quæ ut singulari Dissertatione ostendimus, in Ecclesia Jacobitica Alexandrina à schismatum initiis more majorum servata est, donec perversorum aliquot hominum & nequissimorum Episcoporum, inter quos numerandus est Marcus filius Zaræ Patriarcha, & quidam alii, audaciâ factum est ut intermitteretur, de qua fusè dictum est eo loco. Alterum disciplinæ caput est, quod Eucharistia nonnisi à jejunis suscipiatur, quæ etiam constantissimè observata est, in Orientalibus Ecclesiis omnibus, ut docent Canones Ecclesiastici & Poenitentiales multi, quos referemus breviter in

Notis

Notis ad Anaphoram Basilii Ægyptiacam, & fusiùs in Dissertatione de Eucharistia.

Abdelmelicus Præfectus cùm antea Christianos variis modis oppressisset, repente mutatus, eos benignè fovit: Chaillem præfertim in honore habuit, qui ejus filia quæ ab immundo spiritu vexabatur, sanitatem restituit, cùm eam oleo benedicto inunxisset. Juvenis quidam Muhamedanus, cùm imaginem Christi crucifixi lanceâ transverberasset, ex columna in quam ascenderat pendens, quasi ipse cruci affixus esset, & in latere punctus, cùm ex alterius Muhamedani consilio professus esset Christianam Fidem, liberatus est; & ad Monasteria profectus, Baptismum accepit.

Imaginis
miraculum.

Multa hoc loco Autor scribit circa Imperii ad Abbassidas translationem, absurda penitus, & contra omnium aliorum fidem: nempe Abdallam visione quadam coelitus oblata vocatum esse ad Meruanum bello laceßendum: Abumuslimum jussisse ut omnes milites signum crucis assumerent, quo victores essent, simulque nigras vestes induerent: quia, ut videtur Autor intellexisse, color is ad Christianorum cultum proximè accedebat, quorum Sacerdotes & Monachi pullis vestibus utebantur: Christianis ubique securitatem præstitisse. Hæc omnia fingi potuerunt à Christianis Orientalibus, aut ex rumore ad Autorem pervenisse, qui nimium credulus, ea de Abbassidis memoriæ mandaverit, quæ à vero alienissima sunt. Neque enim crudelius quidquam duobus illis ducibus: neque ulli hominum tenaciores Muhamedanæ superstitionis: neque inermes Abbassidæ imperium ambierunt, verùm tractis ad partes suas copiis Chorasanae & Iracæ præcipuis, Provinciarum illarum amplissimarum exercitibus, pecunia & robore Omniadas oppresserunt, justis præliis sæpè decertarunt, & tandem Meruanum spoliatum, in Ægyptum ubi periit, expulerunt.

Falsa narratio de Abbassidarum incursis.

Narrat Autor in fuga cum monasteria multa eventisse, postquam prædam militibus suis concessisset: inter alia illud quod *Abu-Hermanos* dicebatur in Palæstinæ finibus, de quo mira fabulantur: Eum scilicet tempore Marciani Imperatoris vixisse; cùmque Tomus Leonis proponeretur, eo sumpto ad sepulcra Patrum perrexisset, mox erupisse ex illis vocem, quæ Leoni, Marciano & Concilio Calchedonensi anathema diceret. Exiitisse prope illud Monasterium, Styliten Anachoretam Theodosianum, prophetiæ dono insignem, qui cùm Meruano cladem & interitum proximum prædixisset, eversâ columnâ, vivus ejus jussu crematus

Narratio contra Calchedonense Concilium.

fuerit. Anno Martyrum 467°, J. C. 751°, Meruan in Ægyptum fugisse dicitur : at Hegiræ 131^{ua}, quo mors ejus assignatur ab Elmagino & aliis, triennio anteverit.

Ægyptiorum
Christianorū
rebellio.

In tanto rerum tumultu Coptitæ, seu Christiani Ægyptii, adversus Abdelmelicum rebellaverunt, duabus in Provinciis : Bschammyritæ quidem ex Sahide, duce Menna filio Bekiræ, alii circa Osiout : adversus quos cum duxisset exercitum Abdelmelicus, magna suorum parte amissa, debellatus est. Cum Meruan adversus eos collectas tam ex Ægypto inferiori, quàm adductas ex Syria copias misisset, Coptitæ inaccessible loca obtinentes expugnari non potuerunt, multos imò hostes ceciderunt, cum improvisè ex munitionibus egressi eos adorirentur. Patriarcha Melchitarum Cosmas, & Chail Jacobitarum, & alii Christiani capti, cum Meruanis copiæ Alexandriam occupaverunt, & in vincula conjecti sunt à Kuzaro ejus duce. Cosmas mille aureis se redemit : Chailem pecuniâ carentem, postquam fuisse ab eo percussus ducenties, & in terram prostratus jaceret, nec tamen damni quidquam sustinisset, gladio feriri jusserat. Jam cervicem extenderat, licetorque signum acceperat, cum Præfectus : Quid, inquit, utilitatis percipiemus ex seniculi istius cæde : imò ad Bschammyritas scribet, efficietque ut nos impugnare desinant : itaque Rechidam deductus est. Bschammyritæ captivos Muslemeanos quos in munitionibus suis habebant, partim occiderunt, partim ejecerunt. Adversus eos Meruan partem copiarum misit, quæ regionem incendiis, cædibus, rapinisque vastaverunt : Monasteria spoliata diruerunt. Inter illa celeberrat quoddam Virginum, inter quas una formosissima fuit : quæ ne injuriam à barbaris pateretur, simulavit habere se unguentum, quo si se quis inunxisset, ferro lædi non posset : cùmque in se experimentum fieri voluisset, caput ei abscissum est : mori quippe maluit, quàm violari. Refert hanc historiam Elmacinus, quasi Meruano ipsi virgo tradita & ab eo occisa fuerit : Autor noster ad alium transtulit.

Elm. p. 99.

Patriarcha
à Meruano
multa passus.

Abbasidis in Ægyptum properantibus, jamque castris ad Farnapositis, Meruanus incensa Misra seu Cahira veteri, omnibusque horreis, Chailem comprehensum ad se adduci jussit. Episcopus Wissim Moses clavis ferreis contusus est : Chailem jussit Meruanus verberari eique barbam avelli coram exercitu Chorasaniorum, qui erat ex altera Nili parte, quia inter eos erant Bschammyritæ seu Coptitæ, qui inter alias rebellandi causas præ se ferebant vindictam.

injuriarum quas Christiani & præcipuè Patriarcha à Meruani factione & ejus ducibus passi fuerant. Tum variè tortus, ardentique per totam diem soli expositus, postridie adductus est coram Meruano, simul cum Mose Episcopo & aliis qui venerant ex monasterio S. Macarii : allata simul varia suppliciorum instrumenta. Tunc Moses Episcopus, & autòr qui hæc scribit, rogaverunt Patriarcham ut recitaret super eos *orationem absolutionis* juxta Canonem Ecclesiæ, quod ipse fecit. Extat hæc oratio, quamvis in versione Maronitarum valde interpolata, in Missa Basilii Coptica, sub falso titulo *orationis glorificationis* : est autem absolutio quædam generalis, quæ etsi propriè sacramentalis non magis esse videatur, quàm solennes apud nos ejusmodi orationes Feria v^a in Coena Domini : habet tamen ex Coptitarum sententia virtutem remittendi peccata, & in omnibus Liturgiis, sacramentalibusque Officiis adhibetur. Abdalla filius Meruani major, patrem aggressus est, monens periculosum esse, talem cædem Patriarchæ committere, coram utroque exercitu qui Nili tantum alveo dirimebantur : futurum inde ut Coptiæ jam satis infensi, omnes undique Chorasaniis se adjungerent ; aut si fugiendum esset, vindicturos proculdubio sanguinem ejus quem patris haberent loco, Nigritas præsertim in quorum regionem evadendum erat, si victoriâ Chorasaniis potirentur. Ita urgente Abdalla, in carcerem remissi sunt Chail, Moses Episcopus Wissim, Joannes Diaconus autòr istius historiæ, Mennas Episcopus Tinûa, forè Antinoou ; Zacharias Atribæ, Petrus Busridos, Georgius Diaconus, postea Episcopus Nesrat : Athanasius Archipresbyter S. Macarii, Jacob postea Episcopus Sinjaræ, & alii numero undecim : ibi catenis ferreis vincti magnam ex tenebris & pædore carceris, molestiam sustinuerunt, consolante eos Episcopa Wissim, cujus prophetiarum frequentissima toto hujus narrationis decursu mentio est. Fiebant quoque preces continuæ in monasterio S. Macarii : inde nonnisi post victum fugarumque Meruanum liberati sunt 1^a mensis Memorii. Chorasanii edixerunt, ut Christiani omnes crucem pro signo gestarent, & domorum ostiis adfigerent, atque ita plenam securitatem obtinuerunt : & tributa quæ Christiani pendebant, ab novis dominis multum imminuta sunt. Occiso Meruano qui in Busride secundum Eutychium & Elmacinum obruncatus est, vel in loco quem vocant *Dautoun*, secundum hunc historicum, prope columnam in qua senex ille stylites erat, quem vivum combussit, Chail

cum suis in libertatem redditus est, confirmatusque in libera & integra Ecclesiarum possessione. In re porro seria rem admodum ridiculam adiungunt, quod scilicet barba quæ ipsi per contumeliam evulsa fuerat, miraculo crevit, post somnium quod inquirunt ipsum narrasse.

Deterior
subAbbasidīs
Christianorū
conditio,

Rebus compositis stabilitoque Abbasidarum Imperio, Christiani deterius habere cœperunt ob principum, præfectorumque avaritiam. Cum enim prius levata tributa fuissent, anno 4^o duplicata sunt: cumque immunitas ab iisdem publicata fuisset, in eorum gratiam qui Muhamedanam religionem profiterentur, multi fidem abnegaverunt. Questus est Chail apud Præfectum Naronem nomine, quod contra promissam securitatem, & privilegia ab Abbasidis concessa, Christiani tanta mala quotidie experirentur. Respondit ille suggestum id Sultano fuisse, ne Egyptii si vel uno anno quiescere immunes à tributis sinerentur, in eum rebellarent, sicut Bschammyritæ contra Meruanum. Nec minor deinde calamitas ex bellis civilibus quæ Præfecturæ causâ inter Naronem quem alii Abuhoun vocant, & alios duces intercessere. Sed cum hæc ad institutum nostrum non pertineant & obscurè admodum atque inconstanter ab illo Autore scripta sint, ea prætermittimus, paucas tantum necessariaeque observationes adiecisse contenti, sine quibus historia illorum temporum intelligi vix potest.

Mutatio Imperii quod eo tempore ab Ommiadis ad Abbasidas; seu Hascemitas ut aliter appellantur ab autore familiæ, translatum est, nullam aut religionis aut politici regiminis novam formam induxit. Certatum erat de Califatu, quem à Meruano vi occupatum esse constabat: cum verò nunquam ita quievisset Muhamedani, ut de legitima vocatione Ommiadarum ad eam dignitatem consensus inter eos fuisset, plurimi populi, & tribus nobiles in familiam Halis propensissimam voluntatem haberent, ejusque sanguinis vindicta semper causa justa belli esse videretur, eo titulo Abbasidæ novas res moliti sunt, cum eam familiam cognatione attingerent. Ommiadis usque à Muavia Califæ ex illis primo, solennis erat publica quædam abjuratio Halis, Huceini & aliorum Haliadarum quos *Ahal-Brit* vocant, quasi dicas *domesticos* & *consanguineos*. Eam Abbasidæ sustulerunt, benedictionemque & laudem ejus loco substituerunt. Nihil præterea in Religione mutatum, præter colorem vexilli, tapetis sacri & vestium, quem nigrum esse voluerunt Chorasaniæ, ut dictum est supra; unde

Μαυροπόρος à Theophane & Græcis aliis Autoribus vocati sunt. Permansit consuetudo hæc ad ultima tempora, ubicumque Califarum autoritas viguit: mutata est in Ægypto, ut suo loco dicetur, post annos ducentos & viginti circiter, cum Fatimidæ qui se Haliadas dicebant, regno occupato, ejuratisque Abbassidis, se Califas appellarunt: alboque colore uti cœperunt. Quæ verò postea de quibusdam religionis articulis controversiæ fuerunt, ut circa creationem Alcorani, circa excellentiam Halis præ creaturis omnibus, excepto Muhamede, ea potius inter doctos disputata, quam ex communi omnium sententia, proposita ad credendum sunt.

In politico regimine ut sub Ommiadis, Califa omnem auctoritatem habuit & Imperatoria jura omnia, quorum hæc erant præcipua, ut ex Ambone in Meschitis oratio pro eo fieret: ut ejus nomine pecunia signaretur, vexillum ejus deferretur, jus ejus nomine diceretur: Præfecti provinciarum ab ejus nutu penderent: in ærarium ejus quotannis inferretur pars tributorum. Eam formam Abbassidæ non mutaverunt: cumque ob Imperii amplitudinem illud per seipfos regere non possent, Præfectos Provinciarum instituerunt, quorum auctoritas eadem ferme fuit ac Præfectorum Prætorio, sub Romanis Imperatoribus. Omnis enim potestas civilis & militaris ad eos pertinebat: ipsi Duces, Urbium Præfectos, Judices, Quæstores, omnes tandem Ministeriales instituebant: exercitus regebant, delectus habebant, tributa imperabant. Si quid contra leges peccarent, erat ad Califam appellatio, sed ut plurimum inutilis: nec alia de repetundis, aut injuriis poena, quam destitutio, aut bonorum omnium fisco acquisitio. Hinc factum ut plerique Præfecti rebellaverint, à quibus Dynastiæ Muhamedanorum varix deinceps constituta sunt. Itaque sub Præfectis mansit Ægyptus, regnantibus Abbassidis non minus quam antea: si quis inter eos, quod rarissimum fuit, justitiam colebat, erant non Christiani modò, sed reliqui, in summa tranquillitate: fecus erat, si avarus, si crudelis: nec melior Christianorum conditio, etiam sub bonis principibus, quando nimium religiosi in sua superstitione erant.

Anno tertio Abbassidarum, hoc est Safahi, qui primus Califa in ea familia fuit, cum Christiani qualemcumque libertatem obtinerent; Nilus ad eam altitudinem, quæ necessaria erat ut terras inundatas fecundaret, non excreverat, & in cubitis quatuordecim constiterat: cubitos verò saltem quindecim superasse oportet.

Imperii administrationis ratio.

De Nilotico incremento.

CHATEL
Patr. XLVI.
Jul. Ep. 50.

bat ut fertilitas sequeretur, quod docet Juliani ad Ecdicium *Ægypti* Præfectum Epistola. Convenerant eo tempore Episcopi ad Synodum in festo Crucis habendam juxta consuetudinem, quæ, ut ex hoc loco manifestum est, observabatur adhuc quotannis, quando licebat, ita ut Episcopi bis ex Canonum præscripto ad Synodum convenirent. Vigesima-septima mensis Toth, 24^a Septembris, quo die festum Crucis apud Coptitas celebratur, Patriarcha, Episcopi & Clerus summo mane ante solis ortum ad ripam Nili conveniunt, Cruces, Evangelia, thuribula, imò reliquias Martyris cujusdam (si Makrizio credendum,) magnâ pompâ deferentes: ibi preces pro Nili exundatione fuderunt, *Kyrie eleison* inclamantes. Processerant autem ex Ecclesia magna Misra, quæ dicebatur *Catholica*, sub invocatione divi Petri olim consecrata: tantaque Christianorum multitudo convenerat, ut Ecclesia eos capere vix posset. Posteaquam preces ad horam dici tertiam productæ sunt, Fluvius uno cubito increvit, stupentibus Judæis & Muhamedanis, Deoque gratias agentibus. Tamen Præfectus, cum miraculum ad suæ sectæ contumeliam spectare judicaret, Muhamedanos edicto congregavit, ad preces pro communi beneficio postulando faciendas. Cum in eo essent, advenit ex Nilometrio nuntius, qui aquam quæ pridie creverat, imminutam referret. Postridie egressi sunt omnes Judæi, Samaritani, Muhamedani, ad montem urbi vicinum: sed frustra, nam aqua nec aucta nec imminuta est. Vexit Præfectus, ne quisquam ad orandum foras prodiret: nec aqua incrementum accepit. Tandem prodire Christianos jussit; qui cum urbem circuissent, precesque fudiissent tota die ad litus, aqua tribus cubitis aucta est; tandemque ad justam septemdecim cubitorum altitudinem excrevit. Eo miraculo commotus Præfectus, Christianis tributa imminuit; eosque benigniùs habuit: adeo ut Ecclesia in summa pace per aliquot annos fuerit. Erant insignes Episcopi eo tempore, quorum alii scripturarum peritiâ, alii eloquentiâ, omnes virtute, non pauci miraculorum dono commendabantur. Hos Chail visitabat, omnemque plebem curæ suæ commissum verbo & exemplo confirmabat; præsertim Monachos humilitatem reliquasque virtutes docens, inimicitias componebat, ignaros instruebat.

Meletiano-
rum reliquæ.

Erant in quibusdam locis monasteriisque residui ex antiqua Meletianorum secta non pauci, ad quos cum scripisset literas ut eos ad veritatem agnoscendam compelleret, frustraque fuisset; ad

eos ipse profectus est. Fuisse autem ejus hæresis sive schismatis reliquias in Nomo Arsenoite prope Calamonem docet Collectio Apophthegmatum Gerontici edita à Viro clarissimo Joanne Baptista Cotelerio, sub titulo Abbatis Sisois : eos quoque Ariana hæresi imbutos fuisse, discimus ex Tractatu de Hæresibus ibidem edito sub nomine Joannis Damasceni. Dicit verò Autor hujus historiæ in monasteriis, speluncis vicinisque locis fuisse illorum tria circiter millia ; eosque præter doctrinam antecessorum suorum, quam abnegaverant, aliis perniciosis erroribus laborasse. Cum frustra eos ad poenitendum, agnoscendamque veritatem Chail hortatus fuisset, ad orationem conversus petit à Deo ut eos perderet. Deleti sunt igitur, sicut deleverat Dominus Sodomam & Gomorram, cum Monasteriis ubi erant tria circiter eorum millia ; decem tantum qui aliorum mala opera non imitabantur, servati sunt. Eos verò in Diocesi Wissim fuisse magno numero, Autor scivisse se ait ab Episcopo Mose : habuisse antiquitus Monasteria in quibus habitarent, verum multos ex illis Schemate seu habitu monastico caruisse : cum eo tamen aliquando ob vicinitatem concordiam coluisse ; quæ abrupta fuisset, cum nefandas eorum superstitiones magicas rescivisset. Hanc inter alias refert, quòd pueros in loco deserto ligatos, fame & siti necarent : tum capita eorum exsecta reservarent, ex quibus dæmones responsa illis dabant : & ejusdem magicæ superstitionis artificio mira multa facerent. Verum hæc & multa alia nugacitatem auctoris confirmant, non minus quàm miracula, in quibus commemorandis modum non tenet ; quæ si ab hæreticis ederentur, moniti sumus à Christo Domino venturos esse, qui miracula falsa facerent. Sed tentatio sanè hoc in genere mediocris, cum alii scriptores ejusdem sectæ non tam multa in sexcentorum annorum historiis recitent, quàm iste in sola vita Chailis. Itaque illis omissis, referemus tantummodò nomina Episcoporum, quos cum laude commemorat, præter eum de quo sæpe loquitur, Mosem Episcopum Wissim. Illum ait solo fabulato & die Dominica adeundi sui copiam fecisse, cum reliquam hebdomadam in oratione & afflictatione corporis consumeret.

Floruit eodem tempore Epimachus Episcopus Pharmæ, doctrinâ insignis, præsertim in confutandis hæreticis. De eo memorant, quòd sacerdos quidam Calchedonenfis, cum fidam apud eum fidei Jacobitica professionem edidisset, & unctionem accepisset de oleo consecrato è corpore Severi Patriarchæ, statim à dæmone correptus

De Severi reliquis & miraculis fabula.

fit, quo ad finem usque vexatus est. Ibi observandus mos antiquus ungendi hæreticos, nam tales Jacobitis videntur Calchedonensis fidei defensores: atque inde confirmatur disciplina multis locis consignata de suscipiendo eorum baptismo, etsi sæpè ab Orientalibus ut & ab Occidentalibus contra eam peccatum est. Illud verò oleum non aliud esse intelligendum est, quàm Myrum quo ungi poenitentes apostasie & hæreseos rei solent, ut fusè scribitur in Canonum Collectionibus, & apud Dionysium Barsalibi Episcopum Amid Jacobitam, in Tractatu de suscipiendis poenitentibus. Judicamus autem captandæ funestæ cujusdam benedictionis causâ depositum fuisse apud sepulcrum Severi Jacobitarum partium Antesignani, quasi insensibilissimi Calchedonensium hostis intercessio valeret ad fidem quam semper impugnavit extinguendam. Et in hac etiam sacrilega superstitione vestigium antiquæ disciplinæ apparet circa sanctorum venerationem. Floruerunt simul Joannes Episcopus Souma: Kyras Episcopus Tama, quem perhibent cum de fide cum hæretico disputaret, provocasse ad ignis experimentum: quod cum alter renueret, orarium suum in ignem coniecisse, & illæsum recepisse. Zacharias Episcopus Athribæ, Stephanus Episcopus Chetabæ, Paulus Echmimæ. Alius Episcopus Misræ, qui infantulum cujus mater Sacerdotis vidua de adulterio accusabatur, loqui jussit. Isaac Episcopus Semnudæ, qui multum laboravit ad Barsanufianos ad sedem D. Marci reducendos, & multos ad Jacobitarum fidem convertit.

Res Antio-
chenæ Eccle-
siæ.

Magnæ hinc in Ecclesia illorum Antiochena turbæ fuerunt: nam Episcopum non habebat ab obitu Joannis, illius quem supra diximus synodicam scripsisse ad Chailem. Obstabat contentio inter Episcopos, tum adhuc magis civilia toto Oriente inter Omniadas & Abbassidas bella, eligi novum Patriarcham non sinebant. Cum isti rerum potirentur, Isaac Episcopus Harran, qui præcipuè ejus uxori carus erat, quia cum sterilis esset, & ad Monasterium utpote Christiana religionis causâ profecta esset, viderat in somnis viros duos qui prolem illi pollicerentur, quam paulò post obtinuit. Horum alterum ex facie existimavit fuisse Episcopum Harran. Ea ex causa jussit illum Abdalla Patriarcham Antiochiæ constitui; & si quis obstitet ejus ordinationi, statim occidi. En hominem qui, si Jacobitis credendum est, miracula faciebat, & vivus per somnia apparebat; qui cum per ambitum omni anathemate dignum Cathedram invalisset, etiam in Episcopos sævit, qui impietati ejus

ejus se opponerebant. Occisi sunt enim ex Abdallæ mandato duo Metropolitæ seniores, eò quòd dixissent: *Quomodo Episcopus Harran audeat Canones violare, & Principis potestate suffultus, sedem Patriarchalem per vim occupare: quandoquidem te, ô Episcopo, deponi oporteret secundum Canones qui ita præcipiunt fieri adversus eos qui favore principum dignitates Ecclesiasticas ambiunt.* Libertas Metropolitanorum duorum crudeliter repressa est: uterque enim occisus est Sultani jussu, cum apud eum Isaacus de illorum oppositione querelam detulisset. Hinc magna turbatio illis in provinciis. Isaacus diplomate regio munitus, literas synodicas in Ægyptum ad Chailem misit, acceptis simul ad Præfectum literis quibus jubebat Abdalla, ut si Chail eas, legatosque Isaaci, qui erant Metropolitæ Damasci & Hemessæ, Sacerdos & Diaconus Secretarii ejus, non reciperet, in Syriam ad Sultanium mitteretur. Legati cum advenissent, mandataque & literas exposuissent, negavit Chail licere sibi ut absque Episcoporum suorum consilio quidquam in tanti momenti negotio definiret. Convocavit igitur Misram omnes Episcopos inferioris & superioris Ægypti; qui post aliquam sententiarum diversitatem, tandem statuerunt ut Chail erga virum ejusdem dignitatis, & comministrum ageret quid ipsi optimum factu videretur. Mensis tamen in deliberando consumtus, antequàm de literis systaticis quibus respondere solebant Patriarchæ ad synodicas, quidquam statueretur. Ad hoc concilium vocatum se ait Autor historiæ, nec laudes suas præterit, dum insulsum inter se & Orientales colloquium referendum arbitratus est. Tandem Chail pronuntiavit, se neque gladii, neque ignis, aut bestiarum, aut exilii metu commissurum, ut quod ipse subscriptione sua confirmaverat, interminatâ anathematis poenâ, revocaret, seque ipse retexeret. Anathemate pronuntiato, se declarasse eum qui Episcopus esset, Patriarcham secundum Canones fieri non posse: neque etiam ignorare se anathemati subjectos eos à SS. Patribus, qui ad dignitates Ecclesiasticas autoritate principum pervenirent: Orientales quoque Episcopos sub Joanne qui antea obierat, inter se constituisse, ut quicumque Episcopus postea Patriarchatum ambi- ret, anathemati subiceretur, quas literas ipse subscriptione sua confirmasset; non posse igitur hodie probare quod heri damnaverat, ne anathema à se pronuntiatum incurreret, illud approbando quod sancti Patres condemnassent. Ita solutus est confectus; & quamvis urgerent Legati Antiocheni, ut secundum Sultani man-

data statim ad eum proficisci cogeretur ; Præfectus, qui ei Christianisq; favebat, spatium deliberandi concessit : Chail tamen licet infirmus, ad iter se paravit, cum Mose Episcopo Wissim, Theodoro Episcopo Misræ, & Joanne autore historię. Ea ipsa nocte allatus est nuntius de morte Isaaci Harranensis infaustis sedis Antiochenę : cujus ipso die ante solis occasum, Athanasius quidam locum invasit : at is tertio die mortuus est. Metropolitę Damasceus & Hemesenus, audita Isaaci morte, fugerunt ; nec ampliùs in Ægypto visi sunt.

De Athanasio isto refert historicus, eum fuisse Episcopum primitus ordinatum, cujus Diœcesis esset ultra Harranię limites, quam urbem olim amplissimam, jam à quadringentis & ampliùs annis dirutam Abulfeda & alii Geographi testantur, & quam veterum Charras esse, clade Crassi insignem, doctorum omnium sententia est : ibi Sabaitę seu antiquorum Magorum Idololatrięque prima incunabula. Nec longè distabat urbs ab asperrimis montibus Armenię, ubi Arcam Noe requievisse ex scripturis docemur. Athanasius igitur ille, vir robustus & validus, Diœcesin habuit in montana illa regione, quam circuibat pedes, calceatus solcis ferreis, ita ut in avia quęque loca penetraret. Ibi cum multos ad fidem convertisset, seu quod verisimilius est in tanta Ecclesiarum præsertim Orthodoxarum calamitate, qualis per Persas & Arabes illata fuit, Jacobitis adjunxisset, Metropolitę dignitatem & auctoritatem accepit in Synodo, ita ut Episcopos in longinquis illis regionibus posset ordinare. Factum id aliquando, atque inde apud Jacobitas originem duxit, constitutus postea iisdem in Provinciis Mosian, seu Catholicus, qui Takritę sedem habuit. Ita Nestoriani ab iisdem initiis progressi, cum Episcopos tantum in sua secta haberent, Seleucię Parthorum, sive ut Arabes eam vocant, Modainę, ubi sedes erat Catholici Persidis, hoc est Primatis, qui Metropolitę subiectos haberet, eodem titulo sectę suę supremum Antistitem cohonefatarunt : quam dignitatem deinde ad Apostolica usque tempora, ne scilicet nota certissima Christianismi, quę est Apostolicę successionis linea, ipsis deesset, referre conati sunt. Is igitur Athanasius statim atque Cathedram Antiochenam invasisset, mortuus est. Post ejus obitum venit ad nos, inquit Historicus, Georgius quidam antea Calchedonensis, hoc est Orthodoxus, qui fidem Jacobiticam professus est & electus, ordinatusque est Patriarcha Antiochenus. An verò id factum in Ægypto, an verò Antiochię, ex verbis Autoris divinare non possumus. Paulò post Episcopus qui-

dam nomine Abu Daoud, cujus mater nutrix fuerat Abujafari Almanforis Califæ, in ejus locum intrusus est, Georgio in carcerem conjecto, neque ab illis synodicæ Epistolæ ad Alexandrinos Jacobitas missæ sunt, neque ad Antiochenos ab Alexandrinis. Id verò intelligendum est usque ad finem vitæ Chaïlis, in qua Joannes definit : nam communio illa utriusque Ecclesiæ aliquandiu interrupta, postmodum renovata est, & in hunc usque diem perseverat : ut ex diversis exemplis in hujus historiæ serie fiet manifestum. Mors Chaïlis.

Obiit tandem Chaïl cùm sedisset annos 23. 16^a mensis Phamenoth : quo die mortem ejus designat Canon apud Abulbircat, & eodem fit ejus commemoratio in Coptico Calendario. Elmacinus eundem diem mensis habet, quamvis per errorem operarum in Latina interpretatione denarius numerus omisus sit : at ipse sibi contrarius est, dum eum annos 23. sedisse scribit & paulò post 24. Eam difficultatem solvit Chronicon Abulbircat, dum accuratius menses 10. & annos 23. numerat : quos menses alii ut Makrizius omiserunt. Ab anno Hegiræ 120°, qui cùm inceperit à 28. Dec. J. C. 737ⁱ, à 738° ducendus est, si numerentur anni 24. mors Chaïlis incidit in an. J. C. 762^{um}, Heg. 145^{um}, ob differentiam annorum solarium quibus constat numerare Ægyptios, & Lunarium quibus utuntur Arabes : sed cùm initio hujus vitæ ostenderimus aberrare Elmacinum, Makrizium & alios, multò magis historicum, qui Chaïlis *ὠντατος* fuit, aut esse voluit, nec ordinationem ejus fieri potuisse ante annum 124^{um} Heg. J. C. 741^{um} : annoque incunte, nempe 14^a Toth secundum Ægyptios, exeunte verò eodem anno Hegiræ, quia Muharram primus mensis Arabicus incidebat eo anno in 14^{am} Noyembris feriâ tertiâ, atque ita nondum numerabatur an. J. C. 742^{um}, cùm ordinatus est Chaïl : itaque obitus ejus, numeratis annis 24. incidit in an. J. C. 766^{um} non in 763^{um} ut ex Elmacino, nec tamen indicato autore, sed tanquam ipse authenticam Chronologiam promeretur, scripsit Kircherus. Quia verò liber ille est in omnium manibus, nec facillè spissi quibus scætet, errores animadverti possunt, nisi ab illis qui multum operæ in istis ingratis studiis consumserunt, monendus est lector ne illum sequatur, dum Cosmam inter Chaïlem & Minam collocat. Ignoravit enim Catalogum omnem suum à Dioscoro ad ultima usque tempora neminem Patriarcham repræsentare, qui Jacobita non esset. Cosmam verò ex Elmacino discere poterat Orthodoxum fuisse, ut qui à Theophane nominetur. Sed non intel-
G g ij

lexit qua ratione duo simul Patriarchæ sedere potuerint, quod ex tota hac historia satis intelligitur.

Et si verò in ea describenda operam dederimus, ut paucis exponerentur quæ fuisse tractata sunt; brevius tamen id fieri non potuit, cum de istis Jacobitarum rebus altum ubique sit apud auctores silentium: imò & quæ Imperii apud Muhamedanos mutationem spectant, si Theophanes excipiat, auctores reliqui aut nescierunt penitus, aut omnino pervertesunt. Is verò, modò adsit interpres priorum nominum, qui corrupta illa in Græcis codicibus ad Arabicam scripturam emendet, veriùs de illis rebus scripsit, quàm omnes reliqui.

De miraculis illud monendum est, pauca admodum esse attributa Jacobitis, quæ non legantur in Γεγονηκῶ & aliis ejusmodi Collectioneis sub aliorum nomine, ut illud de puella in asinam mutata magicis artibus, & quædam alia: nec dubitamus Autorem Jacobitam in sectæ suæ commendationem ea ad se transtulisse, cum multa ejusdem generis legantur, accepta non modò ex Græcis Autoribus qui plerique olim Arabicè translati sunt, sed etiam ex illis qui primum Latine scripti per Græcos Interpretes ad Arabes pervenerunt, qui φιλόμυθοι sunt præ reliquis mortalibus. Ut verò alia occasione observatum à nobis est, etiam ex fabulosa narratione veritas colligitur: nam qui miraculum signo crucis, imagine sacra, oleo consecrato, impositione manuum Episcopi factum refert, fallere potest falsa referendo; sed falli non potest, qui ex ea historia, qualiscunque sit, certam haberi probationem existimat opinionis, qua tenebatur is qui talia scriberet: ut circa aliquot miracula per Eucharistiam facta monuimus.

Ex hac usque dictis emendari facillè queunt obscuri quidam loci apud Elmacinum, qui nostram, opinor, historiam viderat; sed admodum negligenter exscripserat. Eutychius et si Alexandrinus de illis rebus nihil omnino scripsit, quippe qui Jacobitas ut legitimos Patriarchas agnoscere non poterat. Paucis turbas Ecclesiæ Antiochenæ tetigit Elmacinus, sed admodum imperfectè. Interpretes porro ejus verba Arabica ita transtulerunt, ut intelligi non possint: imò spissum errorem intulerunt, dum *Metranim* numero duali, quæ vox *duos Metropolitans* significat, quos Isaaci causâ occisos esse dicunt historici, nomen proprium existimantes verterunt, *Occisus est ejus causâ Matratinus*, ubi non minus à Gallico Interprete peccatum est.

MINAS, seu MENNAS, PATR. XLVII.

MORTUO Chaile & Alexandria sepulto cum reliquis Patriarchis, electus est communi consensu Mennas sacerdos & monachus S. Macarii, unus ex discipulis ejus qui apud eum in pietate & doctrina institutus fuerat. Ecclesia sub ejus regimine cum in pace esset, breviter in tantum profecit, ut calamitatum quæ nuper eam oppresserant oblita, majorem in modum floresceret. Verum scelere Petri cujusdam Diaconi, qui pariter sub Chailis disciplina fuerat, magnopere ista tranquillitas turbata est. Is cum Episcopatum à Menna petiisset, nec obtinisset, consensu navi in Syriam profectus, falsas ad Georgium Antiochenum Patriarcham subjectosque eidem Episcopos literas detulit, quibus significabatur Ecclesiam Ægyptiacam contineri Præfectorum tyrannide oppressam, esse in summis angustiis, subsidiumque postulabat. Georgius cum eum læto animo suscepisset, pecunias illi quantas potuit subministravit, deditque ad Metropolitam & Episcopos suos literas, quibus eos hortabatur, ut Collectam facerent quasi in levamen publicæ apud Ægyptios calamitatis. Petrus corrasâ pecuniâ ad Principem profectus est, accusavitque Patriarcham, atque inter alia illud objecit, eum artis chymicæ peritum esse, atque Chrysopoeæ beneficio replevisse Ecclesias suas vasis aureis & argenteis, quibus Christiani in officiis suis uterentur: quæ in thesaurum regium deferenda potius essent, quàm sinendum ut illis abuterentur ad profana sua mysteria.

Turbæ post
electionem.

Sufficiebat talis accusatio apud avarissimum Dominum, qualis erat Abu jasar Almanfor, de cujus fardibus mira narrant; sed simplicior historico videbatur narratio, nisi quidpiam incredibile adderet, nempe Diaconum à dæmone, cui se per magicas artes devoverat, immutata specie factum esse simillimum filio, quem nuper amissum Califa & uxor ejus lugebant, atque ea ratione in aulam adductum plurimam autoritatem habuisse: ita literas ad Ægypti Præfectum obtinuisse, quibus jubebatur ut illum Patriarcham constitueret. Cum advenisset, mandataque Sultani exposuisset, Alexandria evocatus est Misram Patriarcha: Præfectus qui ei favebat non minus quàm ejus prædecessori, dedit illi licentiam convocandi Episcopos, ad deliberandum an Ecclesiæ & Altaria nefario illi viro traderentur. Cum advenissent & in Ecclesiâ

Nova persecutio.
Euseb. p. 104.

Misæ convenissent die Dominica, ausus est militari manu stipatus in eam ingredi, & ad sanctuarium accedere ornatus cidari Patriarchali, quam ab Almanfore acceperat, in qua nomen ipsius Almanforis perscriptum erat, & incipere orationem gratiarum actionis & pacis, quæ primæ sunt in Liturgia. Hoc cum vidissent cum summa indignatione Episcopi, irruerunt in eum Mennas Episcopus Tanboua, & Moses Episcopus Wissun, &ique cidarim eripuerunt, eumque ex altari dejecerunt. Eâ causâ omnes in carcerem carenis ferreis onusti coniecti sunt, ubi nihil aliud quàm mortem expectabant. Attamen paucis diebus interjectis educti sunt; iussitque Præfectus, impellente nefario illo Diacono, ut vasa omnia aurea & argentea Ecclesiæ traderent deferenda in thesaurum Calisæ. Respondit Mennas nescire illum quo in statu res Ecclesiæ forent; vasa quæ antiquitus multa habuerat, ab hæreticis aut aliis hostibus ita direpta, ut Alexandriæ ad offerendum sacrificium vitrei tantum & lignei calices superessent: tum de libro interrogavit, qui scientiam Chrysopœæ contineret, qualem Patriarcha habere se negavit. Ipse & Episcopi coacti sunt ad navale proficisci, ubi per annum integrum manibus suis laborabant ad navium constructionem, solis ardorem & alia incommoda sustinentes. Postea in carcerem reducti sunt: ex quo paucis diebus elapsis liberati sunt, cum Diaconus ille scelestus impudenter adversus Præfectum insurrexisset, minitatusque esset delaturum se eum apud Calisam. Is verò eum in carcerem conjici iussit, ubi triennio detentus est; Mennas cum Episcopis suis Alexandriam reversus est.

Apostata
pœnitentia
negata.

Elapso triennio Præfectus Ægypti cum successorem accepisset, is quæstione de victis habita, Petrum in vinculis repertum misit ad Calisam questurum de injuria sibi à prædecessore illata. Ibi, inquit Autor, eadem arte diabolica figuram sub qua Principi placuerat recepit: benigneque exceptus ut malitiam omnem compleret, fidem abnegavit. Unde honoribus & muneribus cumulatus est; mutatoque nomine, Abulhari appellatus est: & acceptis literis regiis, cum amplissima auctoritate Ægyptum petiit, ulturus se de Patriarcha & Christianis: sed antequam advenisset, allatum est de morte Calisæ; atque ita omnia consilia ejus perniciose evanuerunt. Igitur coactus in patriam se recipere, ibi ab omnibus exagitabatur, tanquam apostata & Judas alter. Adivit quosdam Episcopos, interpellavitque illos ut orarent pro eo: sed nihil ab ipsis aliud audivit, nisi quæ de Juda Christus discipulis suis di-

PATRIARCHARUM ALEXANDRINORUM. 239

xerat, non periturum nisi filium perditionis. Ipse paulò postquam mortuus est Mennas, horrenda morte consumtus est.

MENNAS
Patr. XLVII.

Obiit Mennas cùm sedisset annos 9. ultimâ mensis Tybi. Cùm verò, ut ex Makrizio suprà notavimus, vulgò assignent mortem Chailis anno Hegiræ 146°, J. C. 763°. secundum eam supputationem obitus Mennæ incidet in annum Heg. 155^{um}, qui cùm inceperit à 12^a Decembris anni 771ⁱ J. C. ultima autem Tybi sit 25^a Januarii, incurrit in an. 772^{um}. Verùm Makrizius non novem, sed septem annos Pontificatûs numerat : atque ita, si sedere coepit anno 146° statim post Chailis obitum, vivere desit anno Hegiræ 153°, J. C. 770°. Verùm si, ut suprà monuimus, obiit Chail anno 766°, Heg. 149° : si septem annos numeres, habebis J. C. 773^{um}, Heg. 157^{um} aut 158^{um}, ob mensis Tybi ab Arabico mense differentiam : nam ultimus ejus mensis dies incidebat in 25^{am} Januarii ; annus verò Arabicus cùm inciperet à 20° Novembris, excurrerat in sequentem. Atque hæc est verior Chronologia, cujus certum characterem habemus in Epocha mortis Almanforis, quæ secundum Autorem hujus vitæ proxima fuit mortì Patriarchæ. At obiit Almanfor anno Heg. 158°, J. C. 774°, sed mensis Dulhage 9°, qui cùm anni Arabici sit ultimus, hic verò à 10° Novembris initium habuerit, ita ut in eum diem incideret 1^{us} Muharram : ideo mors Almanforis pertinet ad annum sequentem, J. C. 775^{um} ; & ad eundem referendus erit obitus Mennæ Patriarchæ, si novem annos Pontificatûs ejus numeremus, ut Autor noster, Elmacinus, Abulbircat & alii numerant. Hæc observare necesse fuit ob turbatissimam omnium historicorum supputationem. Abulbircat assignat mortem Mennæ an. Martyrum 478° ex perpetuo errore, nam is annus est J. C. 765^{us} : neque quocumque modo accipiantur anni hujus Epochæ, numerus rectus efficitur : in quo sæpè hallucinatos esse Autores hujus historiæ multis locis ostendimus : unde existimandum esset peccatum in nota numerali.

Mors Men-
næ.

An Kircherus hoc vitium odoratus fuerit, affirmare non possumus, sed verisimile est non aliam eum habuisse causam eo loco post Chailis mortem ita scribendi. *Hic Cosmas Patriarcha idiota ponitur, vacat sedes annis quindecim* : in qua lineola triplex peccatum admisit. Nam sedem vacasse à nemine proditum est, sed omnes Autores consentiunt Mennam statim electum : 2° Cosmas, ut diximus, Orthodoxorum Patriarcha fuit, non Jacobitarum : neque mortuo Chailè ordinatus est, sed antequam Chail

P. 415. Sup-
plem. Prodra-
mi.

à Jacobitis eligeretur. 3^o tandem, cùm vacationem sedis annorum quindecim constituat; & Chailis mortem assignet an. J. C. 763^o, Mennæ an. 772^o, cui novem annos tribuit, manifestum est nullum inter utriusque tempora intervallum fuisse.

Patriarcha
Melchitarum.
T. 2. p. 399.

Eodem quo apud Jacobitas tempore Mennas Patriarchatum obtinuit, imò antequam ordinaretur, 4^o scilicet Calisæ Almanfortis anno, Eutyechius ait ordinatum fuisse Patriarcham Melchitarum nomine Balatianum : quod nomen cùm neque Græcum esse, neque Ægyptiacum statim quisque intelligat, aliud quoddam eadem proximum querendum est. Sed neque in Synodo Nicæna secunda, neque in antiquis Autoribus mentio ejus occurrit. Tamen in Epitome Historiarum Græco barbara Mathæi Cigalæ Venetiis edita an. 1637. invenitur nomen istius Patriarchæ, nempe *Poli-tianus*, sumtum ex antiquis Catalogis. Eum verò Eutyechius Medicum fuisse scribit, & quadraginta sex annis sedisse. Quartus annus Almanfortis est Hegiræ 140^{va}, J. C. 757^{va}.

P. 509.

De poenitentia Apo-
statae negata.

Observandum porro est, antequam ad sequentem vitam transcat, severissimæ erga Diaconum Petrum qui fidem Christianam abnegaverat, disciplinæ exemplum, qui cùm Episcopos adiisset, quamvis sincerè poenitentiam petere videretur, dum ait Autor *cor ejus fuisse relictum*, verisimile omnino videtur eam ipsi denegatam. Karissimè tamen id factum, docet nos tota hujus historiæ series, quamvis communis expiandæ Apostasiæ regula ea esset, ut ubi quis Muhamedanam impietatem professus fuerat, eodem in loco eam publicè detestaretur, quamvis ut ex aliquot Canonibus constat, ad eam observandam nemo cogeretur. Illius disciplinæ exempla occurrunt non pauca, & sanctiones de ea canonicæ. Eam autem penitus denegatam à Jacobitis, Nestorianis, Melchitis aliisque Orientalibus Christianis, huc usque à nobis non est observatum.

Commemoratio Mennæ Patriarchæ occurrit in Calendario Copico non ultimâ mensis Tybi, verùm Koïac præcedentis : errore forsân librariorum, qui quod initio columnæ quæ 30^æ Tybi refertur pondet scribi debebat, in finem sequentis transulerunt.

De Alman-
fort.

Supereft ut de Almanfore dicatur : fuit is secundus Calisæ ex Abbassidarum familia. Regnare incepit fratre Saffio extincto an. Heg. 137^o, J. C. 754^o. Regnum multis victoriis confirmavit : rebellesque oppressit, sed magna cæde : nam à solo Abumuslimo, quo præcipuo adjutore Abbassidæ rerum potiti sunt, sexcenta milia

lia

PATRIARCHARUM ALEXANDRINORUM. 241

lia hominum in præliis occisa esse, aut alibi, docent Historici. Eundem res novas molientem, & ex privatis inimiciis suspectum, dolo attractum Almanzor necavit. Bagdadum condidit an. J. C. 762°. Sedem Califarum & Imperii caput futuram. Etsi verò Haliadarum familiæ Abbassidæ faverent, multos tamen eorum occidit: vir crudelis, avarus, doctis tamen favens, præsertim Medicis. In gratiam Georgii filii Boctiechua Jondisaburensis Nestoriani, multa huic sectæ privilegia concessit, cujus supremus Antistes, vulgò Catholicus, Bagdadi, eversâ Modainâ, sedem fixit: Videndi ex Autoribus editis Eutyrius, Elmacinus qui multa de eo refert, Abulfuragius: & inediti absque numero tam Arabes quàm Persæ.

Sub hoc Patriarcha Coptitas iterum tumultuatos fuisse adversus Ægypti Præfectum an. 150° scribit Makrizius: contra eos missum Yezidum Hatemi filium, cujus copiarum magna pars cæsa, reliqui in fugam versi. Hinc aucta persecutio; dirutæque Ecclesiæ multæ, inter quas nova Misræ Mariæ Virginis, prope eam S. Chenudæ.

MENNAS
Patr. XLVII.

Eutyrb. l. 2.
p. 397.
Elmacin.
p. 100. G
seq.
Hist. Dynest.
p. 152.

JOANNES PATRIARCHA XLVIII.

JOANNES
Pat. XLVIII.

POST Meunæ mortem convenerunt Episcopi, & Alexandriæ consilium habuerunt ad eligendum ejus successorem. Multorum nomina delata sunt, neque ullus eorum placuit. Tandem cum in ista sententiarum diversitate dies aliquot lapsi fuissent, visum est candidatorum nomina schedulis inscribi, quæ super altare positæ sunt. Deinde, celebratis precibus publicis, adductus est infans innocens; constitutumque, ut cujus nomen educeretur, is ordinaretur Patriarcha. Cum jam nomina scripta fuissent; senior quidam Sacerdos Alexandrinus Episcopos interrogavit an meminissent Joannis Oeconomi Ecclesiæ S. Mennæ sacerdotis, qui vitam monasticam ad S. Macarium olim professus fuerat, quique Chailis olim discipulus à Menna ad eam dignitatem promotus erat. Itaque nomen ejus schedæ inscriptum est, quam infans primam eduxit: semelque & iterum repetita sortitione, eandem traxit stupentibus omnibus, eumque dignum Patriarchatu contestantibus. Atque hoc primum exemplum est sortis illius, quam vocant *Heikeliet*; hoc est, ad sanctuarium seu altare factæ, quæ non modò in Ægypto usurpata est, sed etiam apud Nestorianos,

Ann. J. C.
DCCCLXXV.
Heg. 258.

Electio Pa-
triarchæ per
sortem.

Hh

quamvis seriùs : nam primùm adhibita legitur ad electionem Joannis filii Isæ , 54ⁱ Catholici an. Heg. 286^o , J. C. 899^o ordinati. Verùm alia ejusdem fortis forma deinde instituta fuit : nempe ut cum aliis schedulis , una Jesu Christi Domini nomine inscriberetur : si illa prior exiret , omnes rejiciebantur , & aliorum nomina scribebantur : neque ter , sed semel sortitio fiebat. Hanc formam alibi fusiùs explicabimus , non modò ex hac historia , sed etiam ex Ebnassalo qui illius meminit in Collectione sua , agens de electione Patriarchæ Alexandrini. Electus igitur hunc in modum Joannes Bana seu Panopoli in Busiritide oriundus , ordinatus est mense Mechir , ut habetur in Canone Abulbircar , sed die non indicato.

Epistola synodica ad Antiochenos.

Statim post ordinationem scripsit synodicam Epistolam ad Georgium Antiochenum Patriarcham Jacobitarum , significans electionem suam , & communionem fidei. Verùm Georgius accusatus apud Calisam à quodam Episcopo suo qui ejus sedem invaserat , in carcere detentus scribere synodicam non potuerat. Mortuo in vafore restitutus fuit , tuncque advenientes Joannis Legatos cum gaudio & honore excepit : literas congregato Episcoporum & Metropolitanorum magno numero legit , & ad eas respondit.

• Ecclesiæ in-Bauratæ.

Cùm Christiani pacem haberent , prima Joannis cura fuit ut Ecclesias instauraret , easque quantum fieri poterat exornaret , consentientibus Præfectis , Christianisque ad opus concurrentibus. Omnis ædificationis , ornatûsque Ecclesiarum laborem commisit Marco Diacono , cujus laudes ob vocis suavitatem , legendique Evangelium & Mystagogiam , hoc est Catecheses mystagogicas , pluribus verbis Autor commendat.

Erat Sultano Medicus , Jusabus nomine , Hæreticus , hoc est Melchita , seu Orthodoxus ; qui cùm ob artis peritiam in magna dignitate foret , Joannem accusavit , quòd ædificiis suis loca ad principes pertinentia occupasset : unde magnâ pecuniâ multatus est , nec tamen opus intermisit ; adeo ut post quinquennium absolveret ædificationem Ecclesiæ magnæ Alexandriæ , quam sub nomine Michaelis Archangeli dedicavit ; quæ , cùm historia scriberetur , mutato nomine appellabatur *Ecclesiæ penitentis*.

Res Antiochenæ.

Cùm dira fames Ægyptum invalisset , ipse apertis Ecclesiæ horreis , pauperibus quotidie manè & vespere cibos distribui jussit ; hortatusque divites ad eleemosynas , publicam calamitatem levavit.

Obiit interea Georgius Antiochenus , cui successit Cyriacus. Is statim synodicas ad Joannem literas scripsit , ut communio fidei

jam à tempore Severi inter utramque Sedem instituta conservantur : nomina quoque Patriarcharum Alexandrinorum antea defunctorum ex Diptychis ad altare commemorata sunt : quod vicissim erga Patriarchas Antiochenos Jacobitas in tota Ægypto factum est. Delatæ sunt literæ synodice ad Joannem per Anastasium Metropolitam Damasci, comitantibus Episcopis duobus ; qui cum gaudio suscepti, mirati sunt disciplinam & ornatum Ecclesiæ Alexandrinæ, & accepto responso in patriam redierunt. Illæ literæ, sive, ut vulgò vocant, *Synodice*, referuntur ab Autore Tractatus *Fidei Patrum*, & in ipsis præter fidem de Trinitate exponitur Jacobitarum, de Unione naturarum sententia, & in Leonem Pontificem maledicta congeruntur.

Mortuo Georgio Episcopo Misræ, cives postulaverunt ordinari sibi Marcum Diaconum : cum Joannes annuisset, eum primò facerdotem ordinavit ; recusantemque ferreis vinculis constrictum custodiri iussit. *Is cum vehementer orasset ut se episcopali onere liberaret, solutis miraculo vinculis fugit. Consuluit de eo Monachum quemdam senem Georgium, qui in Paraloo habitabat : *Barles* vocant Arabes. Joannem Patriarcham, Monachus, qui donum prophetiæ habebat, monuit ne adversus Marcum irasceretur ; fugisse, Deo ita inspirante, quia futurum erat ut ipsi in Patriarchali dignitate succederet. Marcus postea ad eum rediens, veniamque deprecatus, ab ejus postea latere non recessit.

Erat tunc temporis Præfectus Christianis infensus, qui Ecclesias in Ægypto diruere aggressus est : sed repentina morte sublatuS, consilium perficere non potuit : successoremque accepit melius affectum erga Christianos ; non ita tamen ut Ecclesias restaurari aut novas ædificari sineret, contentus ab earum eversione, quam prædecessor ejus designaverat, abstinere.

Cum Misræ eo tempore aliquandiu commoratus Joannes fuisset, causis Christianorum judicandis intentus, ut ferebat consuetudo quæ passim ubique perseverat, ut non apud sæculares iudices, coque à fide alienos, sed apud Episcopos judicentur, Alexandriam redire cogitavit. Die autem 25^a mensis Choiac, cum festum B. Mariæ Virginis celebraretur, quod quale sit non intelligimus ; eo enim die nullum Deiparæ festum assignatur in Calendario Ægyptiaco : rogaverunt eum cives, ut antequam proficisceretur, Liturgiam apud eos celebraret, ipsisque communionem distribueret. Præstabant enim quodammodo tunc eos ultimam

H h ij

accepturos ab ejus manu sancta mysteria, antequam ex hac vita discederet. Cum venisset in Ecclesiam, eamque absque tecto vidisset, eò quòd Præfecto prohibente eam reparare non licebat, ingemuit, oravitque pro Ecclesia, ne Deus eam à tyrannis Diocletiano Julianoque similibus opprimi pateretur, utque talem Principem concederet, qui ædificia ad templorum reparationem ornatumque necessaria continuari permetteret. Interea vocem cœlitus ad eum factam esse tradunt, quâ, sicut olim Davidi, significabatur successorem ejus hæc omnia perfecturum. Postea Liturgiâ celebratâ, communionem populo dedit, ipsisque pacem apprecatus est: Episcopi ad sedes suas redierunt, duobus exceptis, Georgio Misræ, & Chaile Memphis. Illi cum Patriarcham maximè sollicitum de ædificiis Ecclesiarum viderent, consolabantur eum quantum fieri poterat: ille tamen solatium nullum accipiebat, memor vocis ad eum delapsæ, quæ de proxima morte illum admonerebat. Quo loco mirare, Lector, sanctorum ejus generis hæreticorum inanitatem, & eorum qui talibus fabulis plebes ignaras in errore detinent, ineptam mendacitatem. Quis enim unquam sanctus cœlestes revelationes de proximo fine vitæ accepit cum molestia & anxietate, qualem in suo Patriarcha repræsentant? Joannes interea febre correptus Alexandriam statim cogitavit, navique inpositus est, comitantibus Episcopis illis duobus & aliis Ecclesiasticis, cum jam novus Præfectus in provinciam venisset, Christianis favens, Labithalla vocatus: eum tamen fuisse potius tributorum coactorem existimare licet, cum ab Autoribus Muhamedanis inter Præfectos non numeretur. Joannes igitur ad Episcopos & alios verba faciens, revocavit ipsis in memoriam quæ & quanta pro fide passus fuisset: ex tot laborum tædio oravisse se Deum, ut se ex hoc mundo educeret; ita tamen ut anni spatium ipsi concederet, donec actâ peccatorum suorum poenitentia paratior ad mortem esset, tum ut videret Egyptum sub potestate Præfecti iusti, & Christianos diligentis. Jam verò cum intellexisset advenisse talem hominem, agnoscere quòd tempus sui discessus instaret, eosque non amplius cum in corpore visuros: hortari igitur ut statim post ejus obitum Patriarcham constituerent, quem Dominus elegeret. Post multas lacrymas, rogaverunt ut quandoquidem revelante Deo nosset, quis in illius locum deberet eligi, de eo ipsis significaret. Dixit eum esse quem Episcopum facere voluerat, & quem contra suum desiderium Deus reservaverat ad tale ministerium, Marcum.

PATRIARCHARUM ALEXANDRINORUM. 245

JOANNES
PAT. XLVIII.

sacerdotem, discipulum suum. Cum Alexandriam pervenisset, morbo ingravescente, accedentibus etiam variolis 16^a mensis Tybi, qua natus erat, & qua Patriarcha ordinatus, diem suum obiit, eum sedisset annos 25, anno Martyrum 515^o: celebratis super corpus ejus Orationibus & Liturgia, sepultus est cum aliis Patriarchis.

De eo Elmacinus paucis verbis eadem retulit, nisi quod annos tantum 13 ei attribuit, Canon Abulbircat 23, menses decem; 23 Makrizius. Elmacinum sequitur Chronicon apud Kircherum. Ordinatus dicitur Elmacino, anno primo Califatus Musæ filii El Hadi Abbassidarum quarti, qui incidit in an. Heg. 169^{um}, J. C. 785^{um}. Annus Martyrum 515^{us} est J. C. 799^{us}: denuptis 13, supersunt 786. Sed cum ostenderimus Mennæ mortem, quam Joannis electio proximè secuta est, incidisse in an. 774^{um}, aut sequentem 775^{um}; numeratis annis 24, efficitur annus J. C. 798^{us}: qui nonnulli ex parte respondet anno Martyrum 515^o, anno Ægyptiaco, ut omnes sciunt, incipiente à Toth, qui incidit in Septembrem: ea ratione, 16^a Tybi incidebat in Januarium anni sequentis. Unde apparet certiore omnino hanc esse Epocham in annis Martyrum, quam omnes quæ occurrunt in Canone Abulbircat.

E/m. p. 111.

Quod adjicitur ab Elmacino de annonæ caritate, quæ tunc Ægyptum oppressit, & in qua pauperes à Joanne magnis largitionibus sublevati sunt, testatur ille ex Historia Patriarchali transulisse. At nihil simile legitur in nostra historia, ut neque de nova Coptitarum rebellionem in Balaib, adversus quos missus sit Musa filius Halis Ægypti Præfecti: quod quidem factum asserit sub Joanne, anno Heg. 156^o: sed cum ostensum sit non ordinatum cum ante ann. 158^{um}, hæc historia ad Patriarchatum Mennæ referenda est.

E/mac. p. 111.

Sedit Joannes sub Califis Muhamede Mehedi tertio Abbassidarum, & filio Abujaferi Almanforis, qui obiit anno Hegiræ 169^o, J. C. 785^o. Musa cognomine Hadi, filio Mehedi, qui obiit an. 170^o, J. C. 786^o: & Harone Reschido, de quo mox dicitur. Cavendum autem, quod mediocriter docti satis intelligent, ne Kircheri fides habeatur, qui hunc Joannem eum esse credidit, qui à summa erga pauperes charitate Eleemosynarius appellatur, quique sub Heraclio vixit, atque adeo annis fere ducentis antea istum Jacobitam: cum quo temerè confundi non debebat, ut Bollandianis rectè observatum fuit.

Sub isto Patriarcha contigisse existimaverunt doctissimi Bollandiani

H h iij.

dianæ Collectionis Continuatores restitutionem plurimarum Ecclesiarum Melchitis ſectam juffu Reſchidi Calife, cū antea Jacobitæ illas occupaffent. Vixit ſanè Joannes ſub illo Califa: ſed cū eandem hiftoriam alii Autores referant ad tempora Marci XLIX. eam in illius vita accuratiùs expendemus.

MARCUS
Pat. XLIX.

MARCUS PATRIARCHA XLIX.

A ſucceſſore
d. ſignatus.

CUM peractis exequiis Epifcopi & Sacerdotes ſimulque Laicorum primarij conveniffent Alexandriam, habita inter ſe de ſucceſſore eligendo deliberatione, Epifcopi dixerunt audiviſſe ſe quòd Joannes ante-obitum prædixiſſet fore, ut ſibi Marcus in Patriarchatu ſuccederet: ſtatim omnes una voce clamaverunt eum eſſe dignum tali miniſterio, & in ejus electionem conſenſerunt. Scripſerunt quoque ad Chailem Epifcopum Miſræ, nempe ad ejus tanquam Epifcopi Eccleſiæ cui Marcus ſerviebat, conſenſum obtinendum, vel ut ipſi ex legitima cauſa abſenti, conſenſus omnium ordinum ſignificaretur. Verùm Marcus audita electione ſua, in deſertum S. Macarii fugit, & ad Monafteria ſe recepit. Epifcopi & primores Jacobitarum, Miſram proſecti, Præfectum adierunt; & Chaile Epifcopo verba faciente, rogaverunt dari ſibi licentiam ordinandi Marcum, quem communibus ſuffragijs omnes expetebant, ut eſſet Antiſtes ſupremus in ſua Eccleſia. Annuit Præfectus, nomenque Marci ut novi Patriarchæ Divani tabulis inſcriptum eſt. Verùm cū quæſitus eſſet, non comparuit: Epifcopus Miſræ, qui omnium Monafteriorum præfecturam habebat, Epifcopos miſit cum ſacerdotibus, ut eum, ſi neceſſe foret, carenis vincitum Alexandriam deducerent. Illuc pervenit ſecunda die Mechiri, quæ erat Dominica, eādēque ordinatus eſt.

Marci ſermo
& proſeſſio
fidej.

Cū in Sede Patriarchali collocatus fuiſſet, omneſque iteratis acclamationibus τὸ ἀξίον cum ſalutaſſent, legit ad populum ἐξήγγειλον, quæ, inquit Autor, apud Orthodoxos, id eſt Jacobitas, λόγος appellatur. In eo ſermone prolatis ex ſcriptura teſtimonijs, autoritatibusque ſanctorum Patrum, invectus eſt in Synodi Calchedonenſis doctrinam, erroresque ejus defenſorum ita repræſentavit, quaſi purum hominem adorarent: eos quoque reſutavit, qui negare veritatem Dominicæ Paſſionis, ſed eam phantaſticam tantummodo fuiſſe, cum antiquis Eutychanis exiſtimarent. Erat ſcilicet in uſu illarum Eccleſiarum, ut novi Antiſtes rationem fidei ſuæ coram

Episcopis, Sacerdotibus & plebe, simulque doctrinæ specimen darent: atque hæc erant *Exegetes*, quarum aliquæ adhuc extant in Codicibus manuscriptis, quamvis præsertim apud Nestorianos, qui Bagdadi sedem primi fixerunt, major postea eloquentiæ Arabicæ, quàm doctrinæ ratio habita fuerit. Postea novus Patriarcha Liturgiam celebravit, omnibusque *sacramenta sancta, corpus & sanguinem scilicet pretiosum*, communicavit. Profectus statim erat vix elapsâ ordinationis suæ septimanâ, ad Monasterium Elzejage, sive Nitriæ, ibi quadragesimale jejunium in solitudine precibusque transacturus, cum accepit literas à Chaile Episcopo Misræ, quibus consulebat, ut Paschatis festo celebrato, eam in urbem veniret Præfectum salutaturus; daturusque operam, ut licentia, si fieri posset, obtineretur ad Ecclesias restaurandas, quæ vetustate collabebantur. Obviam venienti processerunt Episcopus & Christiani Jacobitæ, cum crucibus, Evangelii & thuribulis: postredie à Præfecto admissus est, & amanter susceptus. Altero die petiit ut Ecclesias quas decessores illius dirui jussierant, & Monasteria instaurare liceret, ut in illis pro incolumitate & felicitate Principum preces fieri possent. Id concessit Præfectus: atque ita magnâ Jacobitarum lætitiâ Ecclesiæ, quæ tam in veteri quàm in nova Cahira dirutæ fuerant, restitutæ sunt.

Cum prima hæc initia feliciter successissent, scripsit synodicam ad Cyriacum Patriarcham Antiochenum de communione utriusque Sedis in fide Jacobitica, disputans in his literis adversus hæreses & adversus Synodum Calchedonensem, tanquam causam turbaram totius orbis, Nestoriumque & ejus sectatores. Delatæ sunt per Episcopos duos, Marcum Episcopum Taneos, & alterum Marcum Episcopum Farma, doctos & sermonis Græci peritos, comitante Georgio Diacono, Oeconomo Ecclesiæ Alexandrinæ. Antiochiæ magno cum honore recepti sunt; acceperuntque munus ad Marcum literas, quæ in Ecclesiis Ægypti ad significandam communionem utriusque sedis, publicè lectæ sunt.

Literæ ad
Antiochenos.

Erant in Ægypto scismatici quidam, Barfanusiani dicti, qui alio nomine *Acephali* vocabantur: quæ hæresis longo tempore perstiterat à diebus Petri Patriarchæ, Moggi scilicet, qui post Timotheum sedit. Erat inter illos quidam Episcopus, cujus filius, Abraham nomine, primus in ea secta censbatur. Cum omnes ad Marcum accessissent, hæresin abjurantes, dixit ad illos qui episcopatum gerebant, non posse illos talem dignitatem obtinere,

Barfanusiani
hæretici.

quam habebant in hæresi, neque id permittere Canonum disciplinam, aut illos veros Episcopos censerî posse: *Nam*, inquit, *non descendit super vos Spiritus sanctus, qui super Episcopos descendit, cum recitatur super eos Oratio Canonica, quam pro eis constituerunt Apostoli.* Illi duo cum summa modestia & humilitate testati sunt, se nullum dignitatis gradum petere, sed tantum ut pro illis orationes fieret, quò prætorum peccatorum schismaticisque veniam consequerentur: postulantisque chartam & atramentum, anathemati seiplos subjecerunt, si episcopatum, sacerdotiumve ambirent ullatenus. Cùm verò Marcus fidem illorum vidisset, certusque sibi videretur de sinceræ eorum conversione, utrumque, Georgium scilicet, filiumque ejus Abrahamum, Episcopos ordinavit, pronuntiata super eos Oratione Canonica, & vestimentis episcopalibus eos induit. Factum id in Ecclesia D. Mennæ in Maræotide, cùm in ea festus dies ejus celebraretur 25^a mensis Athyr, populique magna multitudo ad festivitatem convenisset. Postea cum Alexandriam rediret, eos secum duxit, & apud se habuit, donec mortuis Episcopis duobus, Bekira Episcopo Talbæ, & Menna Atribæ, huic urbi Abrahamum, alteri patrem ejus Georgium Episcopos dedit. Porro cùm Barfanusiani qui in Ægypto supererant, nullos jam haberent Antistites, miserunt literas ad Marcum, rogantes ut ad eos veniret. Ille ad eos profectus consecravit illorum Ecclesias & Monasteria, deditque eis Liturgias juxta legem Ecclesiasticam; celebratisque mysteriis, distribuit eis communionem corporis & sanguinis Christi: nempe postquam eos ad unitatem fidei Jacobiticæ reduxisset. De Barfanusianis superiùs dictum est: alios verò fuisse ab *Acephalis* propriè dictis, ostensum est alibi. Paucis diebus elapsis, omnes qui in ea olim secta pertinacissimi fuerant, se reliquorum societati ad unionem amplectendam conjunxerunt; cùmque Ecclesia quam ipsis consecraverat, eos capere non posset, eam novis ædificiis adjunctis ampliorè reddidit, atque ipsa est, quæ etiam nunc, inquit Autor, vocatur *Ecclesia Patriarchæ*. De iisdem Barfanusianis, seu filiis Chenufæ, nam utroque modo appellantur ab Autore nostro, descriptis Elmacinus quæ apud eum leguntur.

Elmac. p. 122.

Hæresis de
sacramento
Eucharistiæ.

Interea Orientales Provinciæ Antiocheni Patriarchatus Jacobitici, turbatæ sunt novâ & inauditâ quadam hæresi, cujus artifex fuit Abrahamus quidam Metropolitæ Cyriaco subiectus: cujus verò sedis Autor non commemorat. *Eò verò usque impietas ejus progressa*

gressa est, inquit idem, ut de Christi sacramentis multa absurda peruersaque protulerit, quæ commemorasse noluissemus, nisi necessitas postulasset. Quæ verò fuerit illius sententia, non explicandum arbitratus est. Cum de illius Metropolitæ blasphemia adversus sacramentum Eucharistiæ fama ad Marcum pervenisset; illam ad se Alexandrinamque Ecclesiam pertinere arbitratus, ob fidei cum Antiochena communionem, scripsit ad Cyriacum, adversus novam hanc hæresin, alienam prorsus ab antiqua utriusque Ecclesiæ doctrina; hortatusque est ut pro officii sui debito, morbo teterrimo convenientem medicinam adhiberet. Ille omnem operam adhibuit ut hæreticum illum ad sanam sententiam reduceret: verùm frustrà, nam in errore suo obstinatus, multos etiam Episcopos Patriarchatus Antiocheni ad se pertraxit, adeo ut ab Ecclesia Jacobitica secessionem fecerint: eosque Orientales *Abrahamæos* vocaverunt. De eadem secta Elmacinus pauciora adhuc scripsit, ab Abrahamo quodam scilicet originem habuisse, & sub Cyriaco Antiocheno exortam; de ejus verò dogmatibus, præsertim circa Eucharistiæ communem doctrinam, nihil prodidit. Cum verò qui res Jacobitarum Antiochenorum scripserit, nullus huc usque nobis autor occurrerit, plura de ejusdem hæreseos capitibus dicere non possumus; nisi quòd primùm hoc loco, nec alibi quidquam legitur simile, adeo ut adversus Eucharistiæ, nemo aliter quàm Ecclesia Catholica inter Jacobitas & Nestorianos sensisse videatur. Verba Autoris nostri, quibus peregrinam & inauditam apud omnes Ecclesias Abrahami blasphemiam condemnat, satis arguunt, eam ipsi & suis Egyptiis horrore fuisse; tantùm abest ut commendaretur, cum solà novitate displiceret, & aliena ab Ecclesiæ perpetua traditione judicaretur. Quærant Protestantes quænam fuerit Abrahami Novatoris illius doctrina, si possunt, quam ne referre quidem voluit Autor historici, nisi sub indefinito nomine blasphemix contra sacram Eucharistiæ. At cum ipse multis locis, & omnes cujuscumque sectæ Christiani, quorum ad nos scripta pervenerunt, testentur credere se & ubique credi Eucharistiæ esse ipsum corpus & sanguinem Christi Domini, quidquid suspicari de hujus Abrahami hæresi possumus, eo refertur, ut intelligamus impugnatam ab eo fuisse eam doctrinam; quæ, ut Autores de sectis, Ebnel-Taib Nestorianus, Natif filius Yemen Melchita, & qui utriusque testimonia referunt, Ebnaßalus & Abulbircat Jacobitæ, testantur, recepta semper fuit apud omnes Christianos. Qui igitur eandem insectantur, qui ver-

Elmac. p. 113.

Tract. de Paschate & Euh. M. Art. De officio Christi. &c.

ba Christi Domini ad tropos figurasque referenda, non literali sensu intelligenda existimant, qui sensus & rationis humanæ angustis finibus Dei omnipotentiam circumscribunt, illi magis cum Abrahamo illo, quàm cum Ecclesia Jacobitica Antiochena & Alexandrina sentire judicandi sunt: & idcirco non minùs quàm ille, hæreseos condemnandi.

Ecclesia Salvatoris ædificata & consecrata,

Cùm instarent Alexandrini, ut Ecclesiam Salvatoris, quæ in media urbe erat, novis ædificiis ampliorem ornatoremque redderet, confisi eâ qua pollebat apud Solimanum Præfectum gratiâ, Marcus etsi sæpè eos monuisset timendum ne inimicorum invidia persecutionibus locum daret; victus tamen eorum precibus, operarios admovit: Ecclesiamque, postquam opus consummatum fuisset, solenniter consecravit 17^a mensis Toth, Festo sanctæ Crucis, convocatis ad eam solennitatem vicinis Episcopis, eademque die amplissimas eleemosynas in pauperes effudit.

Subjungit Autor, ut in præcedentibus historiis factum erat, miracula à Marco facta erga Oeconomum qui coram imagine Dei paræ perjurio calumniam confirmare ausus fuerat; quòd dæmoniacum quemdam signo crucis liberaverit, infirmos olei unctione sanaverit, locustarum agmina oratione depulerit: neque mirum esse debere ait, quòd ad patientiæ suæ probationem, longa gravissimaque infirmitate, tanquam alter Lazarus, vexatus fuerit. Verùm major omnino calamitas & tristitia ejus fuit ob turbatam Ecclesiarum pacem, quæ toto Patriarchatûs ejus decursu summa fuerat.

Califarum successio.

Almanfor successorem habuerat Mehedin filium, qui anno Hegiræ 169°, J. C. 785°, mortuus est: tertius Califa ex Abbasidarum familia. Huic successit Hadi filius, qui annum unum & menses tres regnavit, cùm pater annos 10 regnasset: mortuus est anno 170°.

Haron seu Aaron.

Successit ei Haron, cognomine Reschid, ejus frater, vir magnus, Historicis nostris Græcisque notissimus, apud quos Aaron Rex Persiæ vulgò appellatur: inter quem & Carolum Magnum Francorum Regem & Imperatorem Legationes mutux interfecerunt. Vir fuit, quantum in Muhamedana Religione fieri potuit, magnus, literis & literatis favens, autoritatis suæ tenax, crudelis in suos, qui Imperium Saracenorum gloriosè & fortiter tenuit. Sub eo autem florere celebres Medici, Bochiechua Georgii filius; Joannes filius Masowiah, vulgò Mesue; Salehus Indus:

quorum duo priores Christiani fuerunt ex Nestorianorum secta,
 & eorum gratiâ apud Principes res Nestorianorum Bagdadi maxi-
 mum incrementum acceperunt, adeo ut in reliquos Christianos
 primatum quemdam dignitatis haberent. Cùm verò ob Haronis
 auctoritatem magna etiam in remotis provinciis tranquillitas sub
 ejus imperio fuisset, statim ab ejus morte bellis civilibus omnia
 turbata sunt. Obiit autem anno Hegiræ 193°, J. C. 808°, non
 Bagdadi, ut scribit Autor hujus historiæ, sed Tarsi, dum expedi-
 tionem adversus Græcos moliretur, cùm annos 23 cum aliquot
 mensibus imperasset. Porro cùm ei Abu-Abdalla El Amin ex prima
 uxore filius testamento designatus successisset, isque Almamonem
 fratrem, qui ex eadem lege succedere ei debebat, excludere de-
 signaret; adversusque eum, ducem cum equitibus decem mil-
 libus misisset, eum ad rebellionem compulit; & ab eo tandem
 victus, imperio & vitâ spoliatus est, anno Hegiræ 198°, cùm
 jam Almamon in Chorasana Imperator salutatus fuisset.

Elmal. p. 120.

Eo anno ille toto Imperio potitus est: verùm cùm tota belli
 vis in Chorasana & Syria, Mesopotamia vicinisque Provinciis exar-
 sisset, Ægyptus in Præfectorum potestate relicta dum externo be-
 lo careret, intestinum experta est. Nam in diversis Provinciis re-
 belles, quos *Khowarege* vocant, Elmacinus *Karigeos*, neutri prin-
 cipum qui inter se de Imperio decertabant addicti, tributa ordi-
 naria occupaverunt, nova imposuerunt; obsessisque itineribus,
 mercatores & alios qui ex Syria in Ægyptum veniebant, spolia-
 verunt, & in omnes impunè grassati sunt. In hunc modum Ab-
 del-Azizus quidam ex Chetnouv oriundus, inde ad Farma, orien-
 talem Misræ tractum, Pelusiumque & vicinam regionem occupa-
 vit: alius dictus Sevri, filius El Kakem, à Misra usque ad Assouan:
 alii Alexandrinam oram & adjacentia loca occupaverunt: atque
 interea non rarò factiones illæ inter se pugnabant, prædasque age-
 bant. Eam calamitatem prædixisse dicitur Joannes quidam reclusus
 in Monasterio Nitriæ, suam accepturam, sublatis tyrannis, sed ma-
 jori quadam calamitate, quod ita successit. Nam ex Romanorum
 insulis, hoc est ex Archipelago, vel etiam ex omni tam Græco-
 rum quàm Latinorum ditione conflatus exercitus Alexandriam
 appulit, urbemque depopulatus est, tum multa captivorum millia
 in servitutem abduxit. Erant inter cos Andalufeni multi ex *Insu-
 la*, inquit, *quadam Romani Imperii*: Hispaniam Arabes An-
 dalusiam vocant, ducto à Vandalis nomine; Insulam autem, quia

 Almamonis
Imperium.

 Græcorum
expeditio Æ-
gyptiaca.

Peninsula est: nam idem apud eos nomen significat Insulas & Peninsulas. Jam verò post integram Meruani cladem translatumque ad Abbassidas imperium annis octo circiter, nempe an. Heg. 139^o, J. C. 756^o, Muavias filius Hiscam, filii Abdelmelic, filii Meruan, atque adeo ex stirpe Imperatoria filiorum Ommiæ, in Hispaniam fugiens, ab Arabibus qui eam obtinebant, Califa agnitus fuerat; atque ab eo Ommiadarum in ea Provincia familia continuata erat. Cum igitur in Hispania res Christianorum afflictissimæ forent, non poterant tunc temporis copias in Ægyptum mittere, unde expeditionem illam ab Arabibus Hispanis susceptam verisimile omnino est.

Eâ porrò occasione quædam de Andalusenis illis Arabibus observare erit operæ pretium, cum non modò illorum historia turbatissima sit apud Hispanos Historicos veteres & recentiores, sed ipsi Arabibus prope sit incognita. Nam qui res Ægyptiacas scribere, vix earum meminerunt quæ in Hispania gestæ sunt; multò minùs, qui generalem Califarum historiam, Africanæ quæ cum Hispanica conjunctissima erat, cum duces & copię à quibus Hispania subacta est, ex Africa transferint. Fuerunt historici complures, atque inter alios unus qui eam, collectâ ex antiquioribus materiâ, multis voluminibus complexus fuerat: sed ab ultimis Principibus ex familia Elmeirin Autor occisus est, libri ejus cremati, & alii qui ad historiam pertinerent suppressi sunt. Inde factum ut qui de Africanis aut Hispanicis rebus agant, autores sint paucissimi & rarissimi. Testatur id Nuveirius, qui brevem illius historiæ Epitomen dedit, & ipsa librorum raritas idem abundè confirmat.

Cum igitur, ex quo Hispania in Arabum potestatem venit, nempe post Ruderici regis cladem, quam anno J. C. 714^o assignant historici, per varios duces, qui singulas urbes occupaverant, gubernata fuisset, illi nemini obnoxii erant, nisi Califæ remotissimo qui vix eos noverat: neque enim occurrunt exempla missorum in Hispaniam Præfectorum, ut in alias viciniores provincias mittebantur: verum quantum conjecturâ assequi licet, erant Andaluseni illi Arabes sub dispositione Præfectorum Ægypti aut Africæ, quorum amplissima autoritas erat. Nihil enim in Arabum monumentis occurrit, unde sciri certò possit, quæ illius provinciæ administrandæ forma esset. Turbato bellis Oriente per Abbassidarum rebellionem, occisioque tandem Meruano ultimo ex Ommiadarum stemmate Califâ, res Hispaniæ eodem quo priùs loco fuerunt,

donec Muavias ex eadem familia, fugâ elapsus, post annos octo in eam provinciam pervenit, & ab Arabibus Califa est salutatus, ut Elmacinus docet; ita enim vertenda sunt Autoris verba, non ut Erpenius vertit, *cujus incolæ Imperatorem suum eum agnoverunt*. Et sanè Autores alii bene multi testantur Muaviam illum, non imperium modò, sed Califatum, quo suprema potestas spiritualis & secularis continebatur, sibi arrogasse. Erat quippe ex Omniadid, quæ familia quindecim jam Califas habuerat, atque adeo Pontificatum non minus quàm Imperium sibi vindicabat. Utrumque contra fas & jus sanguinis, quod Hali gener Muhamedis habebat, & filiis transierat, occupatum querebantur Haliadæ, quorum ingens erat toto Oriente numerus. Nam quicumque aliquem ex filiis aut nepotibus Hali, marem aut feminam cognatione attingebat; quod erat facile, cum plerique illi ex pellicum aut justarum uxoribus numerosam sobolem reliquissent; statim is se de familia domestica, seu ut dicunt Arabes, *Ahal-beit* esse gloriabatur. Itaque quoties aliquis defectionem adversus Califas Omniadas moliebatur, ut Abbassidæ fecerunt, vindicem se sanguinis Hali, Huceini ejus filii & aliorum profitebatur, simulque publicato stemmate ad eorum se pertinere familiam jactabat: nempe ex vetusta lege & consuetudine ab antiquis ante Muhamedem ducta temporibus, inter Arabes, ultor legitimus patræ cædis esse nemo poterat, qui mortuum cognatione non attingeret. Unde post Othmani quarti Califæ necem, cum rebelles multi adversus Halim qui ad Califatum erat electus magno tribuum ducumque consensu, instigante Aischa impostoris vidua, quam sui *matrem fidelium*, Haliadæ *matrem canum* appellabant, bellum movissent in ultionem cædis Othmani: quid, inquit Hali, ad vos pertinet, cum Othman & vos ex diversis tribubus familiisque sitis. Eo colore quæsitò, Omniadas tanquam cædis Hali scelere pollutos, & Pontificatus invasores Abbassidæ interfectione deleverunt; ipsi ut ex ejus familia prognati supremam dignitatem sibi vindicaverunt.

Muavias igitur qui in Hispaniam se recepit, à Muhamedanis Hispanis susceptus est, eò faciliùs, quòd ipsi pridem in Omniadarum Califarum verba juraverant: atque ita ille non modò principatum, sed Califatum apud eos obtinuit, insignitus titulo *Emir el Moumenin*, seu *Principis fidelium*, qui Califarum erat proprius. Ita non modò Hispani illi Arabes rebellionis erga Abbassidas, qui

in Califarum jura involaverant, sed hæreseos etiam rei judicabantur ab istis, qui se Pontifices esse jactabant. Hos hæreticos multis solent nominibus Arabes designare, atque uno inter alia quod hic occurrit, *Karegi* scilicet; & in plurali numero *Kowarege*, quo Autor Alexandrinæ historiæ hoc loco usus est, ut Andalusenos illos significaret, qui in Ægypto tantas strages ediderunt. Ea vox & rebellem significat, & eum maximè qui absque jure successione aliquid sibi vindicat. Duplici illo crimine adversus Abbassidas tenebantur Arabes Hispanienses; & quòd non ipsis, sed illorum hostibus obtemperarent; & quòd eos Pontifices agnoscerent. Non ad alios igitur quàm ad eos qui Muavia & ejus successoribus tanquam supremis dominis & antistitibus parebant, pertinere posse videntur quæ ex historia Alexandrina retulimus; præsertim cum eo ipso tempore quo Abbassidæ Ommiadas extinxerunt, testetur Rodericus Toletanus cismarinos ab illis defecisse. *Et post Mahomet Abenallabeci*, inquit, hoc est Ebnel Abbas, *cismarini ab Africano Imperio discesserunt, & sedem regni Cordubæ statuerunt.* Sanè ex Hispanicis Autoribus, ut etiam ex Arabicis discimus Muaviam illum Ommiadam (*Amaveus* malè appellatur in versione Erpenii) Cordubæ regnasse, aliquot annis citius quàm scriptum est ab Elmacino. Alii enim historici anno Hegiræ 139°, J. C. 756°, Abdelrahmanis ejus filii initia assignant, quem non pauci primum ex Ommiadis qui in Hispania regnaverit, esse testantur. Regnum obtinuit annis triginta duobus & mensibus aliquot: obiitque anno Hegiræ 172°, J. C. 788°. Paulò ante mortem perfecit Meschitam Cordubensem, loco ubi Ecclesia quondam fuerat, impensâ centum millium denariorum aureorum, quæ postea infidelibus debellatis repurgata, in Cathedralem Ecclesiam conversa est. Atque hæc observare visum est necessarium, ut lux obscurissimæ historiæ fieret; nam expeditionis istius Ægyptiacæ Arabes, præter Historicum Alexandrinum, non meminerunt, neque vulgò rerum Hispanicarum Scriptores. Jam ad Patriarchalem Historiam revertendum est.

Rod. Tolet.
H. st. Arabic.
cap. 18.

Ebn. Cheneq.

Elmac. p. 113.

R'et'ayeflav-
a-
cion de España.
lib. 3. c. 9.

Marci erga
captivos cha-
ritas.

In publica illa calamitate summa Marci caritas erga captivos fuit: cum enim Andaluseni quoscumque ceperant, tanquam mancipia Alexandria venderent; Sacerdotes, Diaconos, Monachos, Virgines, Matresfamilias, omnes tandem, quoscumque poterat, redemit; adeo ut numerus eorum quos ita in libertatem restituit, sex millia excederet. Statim chartam libertatis eis scribebat, facie-

batque potestatem unicuique vel redeundi in patriam, vel apud se manendi : qui abire volebant, illis viaticum dabat; qui subsistebant, eos committebat instituendos magistris, qui Religionis capita præcipua eos docebant, ut etiam psalmos & doctrinam Ecclesiasticam.

Conjunxerant se factiones duæ potentissimæ rebellium, Locmiadæ scilicet & Gedanii, cum Andalusenis, & Alexandria Præfectum Amrum filium Maleki per insidias occiderant. Ortâ deinde inter eos contentione, inter ipsa urbis mœnia pugnatum est, Andalusenique superiores fuerunt. Alexandrini incautos eadem nocte in plateis, balneis & domibus adorti, promiscuam eorum cædem fecerunt; atque ita octingentos circiter viros jugulaverunt. Verùm Andaluseni in suorum vindictam tota urbe furentes, quoscumque obvios habuerunt, sive Muhamedanos, sive Christianos, aut Judæos, occiderunt. Cùmque ad Ecclesiam Salvatoris à Marco nuper ædificatam pervenissent, invenerunt projecta suorum quorundam ab hostibus occisorum cadavera prope Ecclesiæ portam : eos enim cùm occidissent Muhamedani, illuc projecerant. Mox apparuit supra murum senex quidam vel, ut Autor existimat, Satan ipse senis specie, qui Andalusenis dixit se vidisse illius Ecclesiæ Præfectum multos ex eorum sociis occidentem, hortatusque est eos ad ignem injiciendum; quod statim fecerunt : atque ita Ecclesia cum vicinis domibus conflagravit, magno dolore Marci qui eam tanto labore ædificaverat & ornaverat. Mox dispersi per urbem, ingentem civium stragem fecerunt, & postquam omnem prædam, quantam poterant, sustulissent, ignem variis locis injecerunt. Marcus post lamentationem de vastatione urbis & incendio Ecclesiæ, & peractis media nocte consuetis precibus, egressus est cum duobus discipulis; & per annos quinque, tanquam exul, variis in locis delituit, confluentibus interea ad illum Episcopis, Sacerdotibus & Laicis, ut ab eo consolationem in tantis malis acciperent. Inter Primarios quidam Macarius filius Tiab, Birouaita in Diocesi Semnudæ, profectus ad Abdel-Azizum, quem ait fuisse Orientis Præfectum, impetravit ab eo plenæ securitatis libellum, ut Patriarcha ad sedem suam liberè redire & auctoritatem suam exercere posset : ita reductus est in Vallem Habib. Errare videtur hoc loco Historicus ut in multis aliis; neque enim dicere possumus quis esset ille Orientis Præfectus, nisi fortè intelligendus sit qui Orientali Ægypto præerat ad tributa exigenda. Verùm hæc parum aut nihil ad Ecclesiæ res pertinent.

Cædes Alex-
andriæ.Ecclesia Sal-
vatoris incen-
ta.

Dionysius
Antiochenus.

Cum verò tot malis conflictaretur, Ecclesiarum curam non deponebat, dolebatque de scissione Jacobiticæ Ecclesiæ Antiochenæ per Abrahami hæresim; quæ à Cyriaco, quamdiu in vivis fuit, compesci non potuerat. Cum is obiisset, substitutus ei est Dionysius, qui Abrahamianos & eorum Antistitem benignè ad colloquium invitatos adduxit ad poenitentiam errorisque sui confessionem: unde gratulatus est ipsi Marcus per literas, quibus etiam Alexandrinæ urbis misérias significavit: *Similes*, inquit, *vastitati Hierosolymis per Titum illatæ, & à Iosepho filio Gorionis descriptæ*. Respondit Dionysius, scriptâ synodicâ de unitate fidei inter utramque sedem.

Monasteria
ab Arabibus
vastata.

Paulò post Arabes in desertum Vallis Habib effusi, Monasteria & Ecclesias vastaverunt & incenderunt, Monachos, etiam senes in servitutem abduxerunt: quæ calamitas Marcum tam vehementer afflixit, ut paulò post in febrem inciderit. Ea verò nocte quæ festum Dominicæ Resurrectionis præcedebat, quod eo anno incidit in mensis Farmuthi diem 17^{um}, somniavit se videre Marcum Evangelistam, qui ei proximum suum obitum prædixit; significavitque fore ut post susceptam sanctorum mysteriorum communionem, ex hac vita decederet. Advocatis igitur Episcopis, iussit ut sacram Liturgiam celebrarent, eisque facto crucis signo benedixit. *Eâ finitâ, attulerunt ad eum calicem, & communionem accepit corporis & sanguinis Christi Dei nostri*: verba ipsa Autoris sunt, quibus significari videtur eum communionem accepisse, quemadmodum in Ecclesia Coptica omnibusque aliis Orientalibus fieri antiquitus solet, nempe particulis ex consecrata hostia intinctis in calicem, & cochleari ministratis, de quo ritu fusè dicetur ad Liturgiam: nec tamen hæc conjectura ita certa est, quin potuerit ultima Patriarchæ morientis communio singulares ceremonias habuisse, de quibus tamen nihil huc usque nobis occurrit. Verùm quod observat Autor delatum esse calicem, conjecturam nostram magnopere confirmat: tum etiam argumentum eximium præbet veteris disciplinæ apud Coptitas servatæ circa infirmorum communionem; & Eucharistiæ delationem extra altare, post Liturgiam; extra quam Protestantes, etiam qui de Eucharistia minùs perversè sentiunt, consecrationem nullam esse, aut in elementis peristere existimant. Paulò post Marcus emisit spiritum; corpusque ejus in Ecclesia Tabroûa depositum est: unde ad commune Patriarcharum sepulcrum, deinde Alexandriam translatus est. Obiit 22^a mensis

mensis Farmuthi, anno Martyrum 535°, cum sedisset annos 20, menses duos, dies decem; quo temporis intervallo scripsit Mystagogicas Catecheses viginti & unam, Heortasticas sive Paschales Epistolâs viginti. Elmacinus annos decem Pontificatûs numerat, exemplaris, ut videtur, vitio; nam Makrizius 20 annos habet, dies 70. Anno Rechidi 23°, qui est Hegiræ 193^{um}, ordinatum cum fuisse scribit Elmacinus, qui est J. C. 808^{um}: at annus Martyrum 535^{um} est J. C. 819^{um}: quæ ratio fortasse fuit decurtati apud eum numeri; nam aliter incideret obitus Marci in annum 829^{um} aut 830^{um}. Verum ex historiæ serie liquet initium Pontificatûs Marci assignandum esse decennio priùs, quandoquidem Ecclesia Jacobitica Alexandrina in summa pace per annos aliquot fuit, donec post Haronis Rechidi mortem turbata est. Canon Chronologicus apud Abulbircat annum obitûs assignat aræ Martyrum 525°, contra aliorum autorum fidem: sed, ut sæpè monuimus, nulla omnino huic Autori fides est. Alio loco Elmacinus obiisse Marcum scribit an. 211^o Hegiræ, J. C. 826°, qui non respondet anno Martyrum 535°, sed 542°: tanta est Arabum in rebus Chronologicis oscitantia.

Pag. 149.

Narrat paucis verbis Makrizius calamitates Christianorum sub isto Patriarcha, spoliationem Ecclesiarum, vastationemque Monasteriorum Vallis Habib, adeo ut pauci admodum Monachi superfuissent, nempe post Arabum incurfionem. Paucis etiam attingit quæ fusiùs ab Eutychio descripta sunt, de Melchitarum prosperis rebus, sub Harone Rechido: scribit autem eum, cum inter pellices haberet quamdam formâ eximiâ, ex inferioribus Ægypti provinciis oriundam, & frustra adhibitis medicis ea semper deterius haberet, audivisse Balatjanum seu Politianum, de quo superiùs dictum est, Patriarcham Melchitarum Alexandrinum, artis medicæ peritiâ reliquos antecellere, eumque Bagdadum evocasse, ut puellæ auxilio foret. Eâ sanatâ per diætâ cui olim assuetâ fuerat, escu scilicet paximationum & muræ, Patriarcha magno in honore habitus, obtinuit sigillum sive Diploma Imperatorum, quo Jacobitis jubebatur ut Ecclesias Melchitis ablatas restituerent; quod & factum, redeunte in Ægyptum Balatiano, qui obiit cum hanc dignitatem obtinuisset per annos quadraginta sex. Obitus autem ejus assignari debet anno 16° Rechidi, cum eodem constitutum scribat ejus successorem Eustathium. Annus ille incidit in an. J. C. 802^{um}. Eustathium illum lini seu gossypii artificem primò fuisse tradit Eutychius; & cum in domo sua thesaurum invenisset, monasticam

Christianorû
calamitates.

Eutyc. l. 1.
p. 411.

vitam professum in Asceterio *El-Kafir*; mox Abbatem factum, Ecclesiam Apostolorum nomine ædificasse, cellamque seu domum Episcopalem; tandem creatum Patriarcham Alexandrinum, post quatuor annos obiisse, anno Haronis Rechidi 20°, J. C. 806°; Christophorum ei successisse. Is paralyti correptus est, adeo ut manibus gestaretur: quare quidam, nomine Petrus, Episcopus constitutus est, qui Patriarchale officium tanquam Vicarius administraret, Episcoposque ordinaret. Vixit autem Christophorus annos 32. Nec plura de Melchitis seu Orthodoxis Patriarchis habentur: de quorum rebus mirum est quanta sit apud omnes Autores Græcos & Latinos oblivio, adeo ut ne nomina quidem eorum facile alicubi reperiantur. An verò Medicus ille idem sit, quem Jacobitis apud Calisam plurimum nocuisse commemorant, profus incomptum est.

De Ecclesiarum
restitutione.

Hanc Ecclesiarum restitutionem Melchitis factam jussu Haronis Rechidi, quamvis ad Marci tempora retulerit Elmacinus, ad Joannis Pontificatum retulerunt Bollandi Continuatores, rectius omnino & historicæ veritati convenientius. Neque enim ullam accuratioris Chronologiæ rationem habet; sed cum omnia, quæ de Christianorum rebus historiæ suæ interferit, ex Vitis Patriarcharum aut Eutychio describat, ut suis locis reponerentur, non satis curavit. De Medico illo qui tantâ apud Haronem Rechidum gratiâ valuit, ut Ecclesias à Jacobitis olim occupatas restituere Orthodoxis obtineret, nihil in historia Patriarchali legitur, nisi fortè ad illum pertineant, quæ initio vitæ Joannis leguntur, Joasabum quemdam Medicum hæreticum, eum apud Calisam accusasse, quod ædificiis suis loca publica occupasset. At hæc sunt diversissima: nam de isto Medico non proditur eum fuisse Orthodoxorum Patriarcham, & is non Joasabus, sed Balatianus, ab Eutychio appellatur. Porro cum hæc sub Harone Rechido contigerint, rectè Eutychiûs illius Califatui ea alligavit: quod verò neque nomen Patriarchæ Jacobitarum, neque tempus assignavit, factum id ex perpetua consuetudine, quam autores diversæ sectæ constantissimè tenent, ut de suis tantum loquantur, aliorum vix meminerint. Haron Califa salutatus est anno Hegiræ 170°, qui respondet anno J. C. 786°: obiit anno Hegiræ 193°, J. C. 808°. Hadis, qui eum præcessit, regnavit anno uno, mensibus duobus; ita si ordinatus est Joannes anno ejus 1°, quod, ut supra notavimus, Elmacinus prodidit, cum viginti quatuor annis Se-

dem Alexandrinam tenuerit, implevit totum Califatum Haronis qui viginti trium annorum & paulò plus fuit; atque adeo ad Joannis tempora rectè referetur hæc narratio. Cùm verò vacillet ibi, ut ubique prope semper, Elmacini Chronologia, & in historia Patriarchali Joannis obitus assignetur anno 5150 sanctorum Martyrum, qui est J. C. 799^m, tredecim annos sub Haronis Califatu transegerat. Annos Martyrum ex perpetua regula numeramus additis ad annos æræ Christianæ annis 284: nam in componendis illis cum æra Muhamedana sæpè falluntur, non Elmacinus modò, sed historiæ Patriarchalis autores & Orientales ferè omnes reliqui.

Post hujus Patriarchæ vitam, *Parergon*, live longam observationem, inseruerunt Bollandiani operis Continuatores, quam expendere paucis necesse est. Titulum hunc habet: *De consensu Ecclesiæ Alexandrinæ Jacobitice cum aliis Patriarchalibus Sedibus Orientis & cum Romana, sæculis v III^o & IX^o*. Probare autem nititur Autor diligentissimus, fuisse aliquando, cùm Alexandrina Ecclesiæ Jacobitica unionem cum reliquis Sedibus Patriarchalibus redintegraverit, quamvis obscurissima sit renovatæ illius concordiæ memoria. Statim dubitari non posse affirmat Alexandrinos Patriarchas cum Antiochenis & Hierosolymitanis Catholicam veritatem circa cultum sacrarum imaginum constantissimè adversus Iconomachos propugnasse. Id confirmat productò Elmacini testimonio, in quo dicitur Patriarcha scripsisse ad Theophilum Imperatorem, quæ ad cultum illarum vindicandum facere videbantur. Quis porro aut cujas Patriarcha ille fuerit, *pro comperto non habeo*, inquit vir doctissimus: *caterum cum de Jacobitis Elmacinus agat plurimum, verosimile est hoc ad eorum dogmata pertinere*. Laudat præterea Epistolam Constantini Porphyrogeniti de Imagine Edefsenæ, in qua refertur Job Alexandrinum, Christophorum Antiochenum, Basilium Hierosolymitanum scripsisse Theophilo Imperatori in eandem sententiam. Certum esse ait quoque ex Autorum propè omnium testimoniis rectè sensisse Coptitas circa cultum sacrarum imaginum. Inde dubium sibi suboriri, num, ut in hoc articulo, ita in aliis non consenserint cum Ecclesiâ Catholica: suadere id quodammodo, tot mutuas inter Alexandrinos Jacobitas & Antiochenos Synodicas Epistolas, quarum Elmacinus meminit non uno loco: *Antiochenam porro Ecclesiam illorum temporum, nemo, inquit autor, quod sciam, Eutychetis vel Jacobitarum erroribus infectam memoriæ prodidit*. Tum probata

Observatio
de Alexandria
Ecclesiæ
cum aliis Or-
thodoxis con-
sensu.

Elm. p. 152

Conc. l. 7.
p. 718. §. 441.

In Synodo.

Nulla fuit
inter Copti-
tas & alios
concordia.

aliunde Hierosolymitanorum Patriarcharum, cum cæteris, Roma-
naque Ecclesia communione, rem demonstratam esse verè affirmat, si
Antiocheni Patriarchæ Orthodoxi fuerint, & cum iis Jacobitæ in
unitate fidei communicaverint, *propemodum vera & indubitata est*
Jacobitarum resipiscentia. Verùm ingenuè agnoscit inextricabilem
esse Antiochenorum Patriarcharum successionem, adeo ut faciliè cre-
dat Antiochiæ, ut Alexandriæ, duos fuisse Patriarchas, Orthodo-
xum unum, Jacobitam alterum. Tamen in Epistola Tarasii quæ
extat inter Acta Nicæni 2ⁱ Concilii, quædam agnoscere sibi visus
est quæ ad unionem Coptorum pertineant, quia Ecclesiarum Ægy-
pti & Syriæ meminit, tanquam ab Iconomachorum opinionibus
alienissimarum. Pendet tamen animi, quòd nomina Patriarcha-
rum Alexandrinorum à Photio relata, diversa omnino sint ab illis
quæ retulit Elmacinus. Tandem conjecturas illas, alterâ quadam
confirmat, nempe quod Macara, seu Macarius, nobilis Ægyptius,
suscitato per miraculum ejus filio, precibus Jacobi Patriarchæ
magnam pecuniam in pios usus erogaverit, & Hierosolymis Ec-
clesiam construxerit: quod, ut existimat Autor, Jacobitis non li-
cuisse, nisi eandem cum Melchitis fidem habuissent, *postremis*
hiscæ apud Hierosolymam Religionis principatum, ut ita dicam,
obtinentibus sub nomine Syro-Græcorum. Atque hæc sunt argu-
menta præcipua, quibus viri doctissimi conjectatio nixitur, de qua
jam dicendum est.

Ac primò quidem verè ab Autoribus observatum fatemur in
quæstione de cultu sacrarum Imaginum, Coptitas Orthodoxam sen-
tentiam tenuisse, cùm in antiquis traditâ disciplinâ persevera-
verint, ut in aliis omnibus fidei disciplinæque capitibus, unicâ
exceptâ Monophysitarum hæresi, quam pertinacissimè retinuerunt.
At concordia plena inter eos Orthodoxosque sedium aliarum Pa-
triarchas esse nulla poterat, qui mutuis anathematismis se devo-
verunt, ob fidei in Concilio Calchedonensi stabilitæ, & ejus quam
Dioscori Severique successores profitebantur, differentiam. Exem-
pla non pauca occurrunt in hac historia Patriarchali, anathema-
tum adversus Leonem Papam, Calchedonensesque Patres, jacta-
torum, quæ rem expediunt. Quòd si rectè senserant circa sacras
imagines Coptitæ ut reliqui Jacobitæ, eam doctrinam non à
Græcis Orthodoxis, sed à patribus suis didicerant. Nulla quippe
autoritas apud eos est secundæ Nicænæ Synodi, cujus ne memo-
riam quidem habent, sicut nulla Joannis Damasceni, Sophronii,

Nicephori aut aliorum qui contra Iconomachos pugnaverunt, quos ut Calchedonenses, hoc est hæreticos, detestantur. Neque si fides & disciplina hoc in genere apud Jacobitas, non minùs quàm apud Nestorianos rectè se habuerunt, minùs idcirco erraverunt circa Incarnationis mysterium.

Quòd Patriarcham, cujus Epistolæ ad Theophilum particula refertur ab Elmacino, Jacobitam suspicatus fuerit observationis Autor, conjectura eum sua sefellit. Elmacinus, qui licèt Jacobita aliquando Eutychium exscribit, hanc ex eo laciniam sumpserat, tanquam ex Epistola ad Imperatorem Theophilum scripta à Patriarcha, quem non nominat: Eutychius vocat Sophronium Patriarcham Alexandrinum, quem inter decessores suos numerat, atque adeo Orthodoxum illum fuisse, successoris testimonio certum est. Is verò initia ejus assignat Califatus Motasemi anno 4°, qui respondet anno J. C. 836° & 837°; obitumque post annos Pontificatùs tredecim: unde erratum esse à librariis suspicari non possumus. Veruntamen Sophronii Patriarchæ Alexandrini Orthodoxi, nemo præter Eutychium meminit. Sophronii Hierosolymitani celebrissima est apud Græcos memoria: is verò sub Heraclio, & primis Arabum principibus vixit; atque adeo ad Theophilum qui anno J. C. 829° regnavit usque ad 842^{um}, talem Epistolam adversùs hæresin, quæ nondum prodierat, scribere non potuit. Illius cum laude meminerunt etiam Arabes Historici; nam eo Hierosolymitanam Ecclesiam gubernante, urbs ab Omaro filio Alkittabi capta est. Itaque etsi alter ejusdem nominis fuerit post annos prope ducentos Alexandrinus Patriarcha, quod solo Eutychii testimonio constat, is cujus verba, tum ab isto, tum ab Elmacino, pro defensione imaginum recitantur, diversus omnino esse debet. Viderat, opinor, Eutychius Acta Synodi Nicænæ secundæ, in quibus aliquot Sophronii Hierosolymitani sententiæ recitantur; eas, quæ Orientalium incogitantia esse solet, ad cognominem illum suum Alexandrinum retulit: sed quocumque tandem modo accipiantur, ad nullum Jacobitarum Alexandrinum Patriarcham pertinere queunt, quorum successio tam perspecta est, quàm aliorum confusa & interrupta. Uno verbo, qui ad Theophilum cum Christophoro Antiocheno, & Basilio Hierosolymitano scripsisse dicitur, Alexandrinus Patriarcha, Job à Constantino Porphyrogenito appellatur, non Jacobus, non Sophronius, & nullus tunc eo nomine designatus, Sedem Alexandrinam Jacobiticam tenuisse legitur.

De Sophronii ad Theophilum Epistola.

Eutych. l. 2.
p. 420. 451.

Eutych. l. 2.
p. 284.

Const. Porphyrogenito.
Ep. p. 51.

MARCUS
Patr. XLIX.
De commu-
nionē Ale-
xandrinorum
& Antioche-
norum,

Sensit vir clarissimus quàm parum firma prima illa conjectura foret, unde ex communionis circa Orthodoxam fidem literis quas inter Alexandrinos Antiochenosque Patriarchas frequenter commesse ab Elmacino didicerat, præsidium comparavit; ratus scilicet puram ab omni Eutychetis & Monophysitarum hæresi Antiochenam Ecclesiam fuisse, quia nullus Autor id prodiderat. Verùm ex Elmacino solo intelligi potest *Synodicas* illas, ut etiam Arabicè vocantur, Epistolas, nec ab aliis quàm Monophysitis, nec ad alios, quam qui Monophysitæ forent, scriptas fuisse. Uberem exemplorum copiam hæc nostra historia subministrat; & quæ inferius in vita Mennæ referetur, Joannis Patriarchæ Antiocheni, si quid dubii superesset, planè discuteret. Nulla prorsus eorum de quibus Historici Alexandrini, aut Elmacinus meminerunt, ab hæreticis scripta non fuit: neque perspicuam non habuit unius in Christo naturæ professionem, cum anathematismis adversus Leonem Papam & Calchedonensè Concilium. Nec illæ ad privatum officium pertinebant, ut novo Patriarchæ senior gratularetur; sed exigebantur tanquam communis fidei confessiones, sine quibus nomina novorum Patriarcharum ad altare inter Diptycha non recitabantur, quæ erat ex veteri disciplina communionis inter absentes significandæ ratio. Mitti præterea solebant per Episcopos, qui eam vocis suæ testimonio confirmarent; in Synodo Episcoporum legebantur, & in acta referebantur. Denique multas ejus generis *Synodicas* Epistolas habemus integras, fragmenta satis prolixa aliarum, quæ tam absolutam Jacobiticæ fidei explicationem continent, ut in libris ad eam confirmandam multis, præsertim in eo qui *Fides Patrum* inscribitur, post Scripturæ sacræ, & Ecclesiæ Doctorem testimonia, excerptæ ex illis Synodicis Patriarcharum autoritates referri soleant.

Duo Patriar-
chæ fuerunt
Alexandriæ
& Antiochiæ.

Quod Autor subjicit, à nemine proditum memoriæ fuisse Jacobitica vel Eutychiana hæresi infectam fuisse Antiochenam Ecclesiam, natum fortasse inde est, quòd Elmacinus Jacobita (quem ipse tamen Muhamedanum credidisse videtur) & alii ex eadem secta, Orthodoxæ fidei titulo Jacobiticam suam designant. Nihil porro certius quàm quod in Antiochena Sede Patriarchali, ut in Alexandrina, duo semper Antistites fuerunt, Orthodoxus & Jacobita, nisi quando Imperatores eidem sectæ addicti hæreticos intruserunt. Si porro Græcis & Latinis Scriptoribus pauca aut nulla de Antiochenis Jacobitis scripta reperiuntur; at multa Arabes

Christiani de illis nos docent; de Orthodoxis silent ut plurimum. Ita vix de Jacobitis Alexandrinis Eutychius loquitur; vix de Orthodoxis Severus & alii: nempe quod alteri alteros ut legitimos Patriarchas non agnoscerent. Sed neque soli Christiani Arabes Antiochenos Jacobitica hæresi infectos fuisse prodiderunt; cum plerique belli sacri Historici id abunde testatum reliquerint. Itaque quod dubitabundus profert Autor de duplici illa Cathedra Antiochena, ex historia Orientali certissimè demonstratur; & cum indubitata sit Antiochenorum illorum Patriarcharum, qui cum Alexandrinis communionem renovaverunt sæpius, in hæresi pertinacia, *Jacobitarum*, ut vocat, *resipiscentia* fabulæ, quàm veritati propior haberi debet.

Neque juvat quidquam Tarasii Epistola, cum ea omnia, quæ pacem & concordiam Ecclesiarum designant, ad eam referenda sint, quam Constantinus & Irene convocato Concilio perfecerunt, factaque Episcopis potestate statuendi quæcumque ad sãnanda vulnera per Iconomachos fidei & disciplinæ inflicta spectabant, omnia in integrum restituerunt. Nam si aliquando Jacobitæ Alexandrini vel Antiocheni ad unitatem fidei reversi fuissent, quis existimet nullam tam insignis eventus memoriam superfuisset, cum Maronitarum ad Ecclesiam reversio, populi, si cum Ægyptiis comparetur, parvi & numerabilis, & à nostris & ab Orientalibus scriptoribus prætermissa non fuerit. Imò in ipsa, qualiscumque sit, historia Alexandrina, Gaianitarum, Barfanufianorum & obscuriorum quorundam hæreticorum cum Jacobitis conversio consignata reperitur. Majus quiddam omnino fuisse reconciliationem cum Ecclesiis Græcis Orthodoxis, si quæ ulla unquam fuit, nemo non fatebitur: fieri autem illam ita potuisse, ut ne levis quidem memoria rerum ad eam perficiendam gestarum apud Latinos, Græcos & Orientales superesset, prorsus videtur impossibile. Verùm demus initam esse qualemcumque cum Jacobitis concordiam; aut illa statim dissiluit, aut nunquam fuit: nam semper continuata successione Jacobitæ suos Alexandriæ & Antiochiæ Patriarchas habuerunt, quorum illi se Dioscori, isti Severi successores & eorum fidei imitatores defensoresque professi sunt, simulque hostes Calchedonensis Concilii & Leonis Papæ. Quis tales homines ad unitatem fidei rediisse existimet; quod fieri non poterat, nisi damnata, quam profitebantur, fide, & pronuntiato adversus eos, qui sanctorum numero apud eos huc usque fuerant, anathemate? Sed neque recurrendum est

De Tarasii
Epistola.

ad intricatam & inexplicabilem Jacobitarum, qui Antiochenam Sedem tenuerunt, successionem; quippe quæ, si apud Græcos Latinosve Historicos agnosci vix potest, plana est nec interrupta in Jacobitarum libris, eo præsertim tempore, quo concordiam coa-
luisse Autor existimavit.

Unionis tem-
pus assignari
non potest.

Neque minùs laborandum conjecturæ illius vindicibus foret, in designando tempore quo Jacobitæ Alexandrini & Antiocheni ad pristinos errores suos redierint, in quibus eos perseverasse tam certum est, quàm quod maximè. In illorum historia nullius in melius aut in deterius mutationis memoria est: sed fides unius naturæ semper eadem; anathemata adversùs Calchedonensè Concilium similia; cultus religiosus Dioscori & ejus successorum hæreticorum, ut Severi, Petri Gnaphæi, tandemque Benjaminæ, quos omnes damnavit Ecclesia Catholica: nullam Latini vel Græci Orthodoxi cum illis Jacobitis communionem habuerunt, neque illi Jacobitæ cum Græcis aut Latinis; imò cum Franci Hierosolymis regnarent, capitale & apostasiæ proximum inter Ægyptios Jacobitas crimen erat nimia cum ipsis familiaritas, ut in hujus historiæ serie manifestum erit. Tunc etiam Episcopi Orientales illi formulas diversas reconciliandis poenitentibus hæreticis instituerunt, quales extant in Collectione Dionysii Barsalibi, & inter illas nonnullæ ad absolvendos Calchedonenses, sive Orthodoxos, referuntur; quod non communionis Ecclesiasticæque concordiæ, sed discordiæ dissensionisque certum argumentum est.

Si quid igitur communi consilio inter Alexandrinos Antiochenosque & Hierosolymitanos aut Constantinopolitanos Patriarchas gestum fuit, tum adversùs Iconomachos, tum adversùs alios hæreticos, de Orthodoxis solis intelligendum est. Nam licèt, Constantinopolitano excepto, qui in eandem ac reliqui postremus calamitatem incidit, gement omnes sub Muhamedana tyrannide, distinctas tamen Ecclesias habebant Orthodoxi, suos Episcopos & sacerdotes, plebem propriam, nihil quidquam commune cum hæreticis. Cùmque tres Patriarchæ sub iisdem dominis essent, non modò communionem Ecclesiasticam inter se fovere poterant, sed etiam inter se consultare de iis, quæ ad communem fidem pertinerent, etiam ad Constantinopolitanos scribere.

De Ecclesia
Hierosolymis
constructa.

Tandem superest argumentum ex Ecclesia quam Macarius, is Ægyptius de quo Elmacinus, Hierosolymis ædificavit; ex quo nihil omnino ad Autoris sententiam confirmandam deduci potest.

Nam

Nam ex quo Muhamedani sanctam urbem ceperunt, Christianis omnibus cujuscumque sectæ aditus ad eam patuit, & ob peregrinorum frequentiam unaquæque suos illic Sacerdotes & aliquando Antistites habuit. Græci antiquitus Patriarcham habuerunt, ea dignitate quæ per Canones Nicænos illi decreta est, Nestoriani Metropolitam, Jacobitæ Episcopum, qui, ut ex vita Cyrilli filii Laklaki apparet, ab Antiocheno solebat ordinari. Ita statim à capta urbe sancta, omnibus cujuscumque sectæ & gentis Christianis singulares ex Muhamedanorum Principum concessione Ecclesiæ fuerunt, ut etiam nunc observatur. Illic enim sunt Græci, Syri tam Melchitæ quàm Nestoriani & Jacobitæ, Armeni, Æthiopes, Colchi, Iberi, præter Latinos, quo modo sub Francis Regibus fuerunt, quamvis tunc sacra loca in istorum potestate forent, atque inde nonnullos excludebant, quod erga se factum aliquando Coptitæ questi sunt, ut inferius videbitur. At sub Muhamedanis principibus qui Christianos Orthodoxos aut hæreticos eodem loco habebant, liberum omnibus fuit Hierosolymam adire ibidemque habitare, Monasteria aut Ecclesias ædificare, modò autoritas principum accederet; nam Hierosolymitano Patriarchæ, qui Græcus erat & Orthodoxus, prohibendi facultas nulla erat, cum in suæ tantum communionis Christianos jus haberet. Ita Macario illi licuit Ecclesiam construere ea in urbe ubi religionis principatum Patriarcha Orthodoxorum amiserat, extinctis cum Imperiali potestate Romanis legibus, per quas olim hæreticos coercere potuisset.

Certum itaque & exploratum est non modò ex Autorum Græcorum, Latinorum, Arabumque silentio, sed ex indubitatis Coptitarum & Antiochenorum Jacobitarum monumentis, nullam inter ipsos, & Græcam Ecclesiam, communionem sæculis octavo aut nono fuisse: sed neque ullam postmodum usque ad legationem Gabrielis ad Clementem VIII. de qua dicitur suo loco. Quòd porro Jacobus vocatus fuerit Patriarcha Alexandrinus, à quo Macarii filium revocatum ad vitam esse perhibent, testis historia Patriarchalis, ut Elmacinus & Chronicon Orientale; adeoque sollicitandum nomen illud non est, ut in alterum, Jobi nempe, reformetur, quod Græci Scriptores, Constantinus scilicet Porphyrogenitus & alii retulerunt, ut Eutychius Arabicè scribens, qua in lingua major omnino literarum differentia est, quàm ut librariorū vitio commutari potuerint. De aliis, quas Autor Parergo

sequenti tetigit, Coptitarum cum Ecclesia Orthodoxa conciliationibus, dicitur suo loco, de quibus observare possumus, nullam non magis quàm præcedentium exstare apud Orientales memoriam: ut etiam legationes aliquot, quas ad concordiam ineundam pertinuisse Autor existimavit, Jacobitarum non fuisse, sed Orthodoxorum Græci Ritus.

JACOB
Patr. L.

JACOB PATRIARCHA L.

Revelationes
Jacobæ factæ
ante electionem.

CUM paulò ante Marci Patriarchæ obitum Monasteria Vallis Habib ab Arabibus direpta & vastata essent, omnesque cellæ igne consumptæ, Monachi qui barbarorum furorem evaserant, (multi enim ab illis occisi sunt,) per civitates, pagos & Monasteria tam inferioris Ægypti quàm Thebaidis, dispersi sunt: paucis admodum relictis, inter quos fuit Jacobus sacerdos ad S. Macarium. Is, cùm Arabes omnia depopularentur, in quoddam Thebaidis Monasterium se receperat. Ibi cùm in oratione esset, aiunt apparuisse illi B. Virginem cum Angelorum multitudine, quorum unus Jacobi custos illum monuit, ut ad locum suum revertetur; quod fecit: secundaque visione monitus est à S. Macario, ut in priori factum fuerat, de proxima sua electione ad Patriarchalem dignitatem, futurumque ut ipsius filios Monachos dispersos colligeret. Aliam quoque revelationem attribuunt ei de instante morte Marci Patriarchæ, qui, cùm annos quadraginta Sedem Alexandrinam tenere debuisset, precibus obtinuit ut tantis calamitatibus subtraheretur. Idem Marcus, antequam è vita excederet, interrogatus ab Episcopis de successore suo, respondere quidem statim noluerat, sed cuidam urgenti vehementius, submissa voce Jacobum nominaverat, interposito jurejurando per Deum & Ecclesiam ne cuiquam id secretum aperiret, donec res opere perfecta fuisset. Post mortem ejus convenientes Episcopi, Sacerdotes & Laici disquirere cœperunt, quis ad munus Patriarchale sustinendum esset idoneus; multorumque nomina commemorata, atque inter alios Jacobi sacerdotis: cùmque ea occasione Episcopus ille cui Marcus prædixerat futuram illius electionem, secretum suum coram omnibus manifestasset, publica acclamatione dignus pronuntiatus est. Tum ad S. Macarium profecti, illum adduxerunt Alexandriam, sentem rogantemque ut è mundo transferretur prius quàm tanto oneri succederet. Deus verò eadem nocte illum con-

solatus est, dicens ei per somnium, sicut Jacobo Patriarchæ, ne timeret in Ægyptum accedere, futurum illum secum & eum auxilio suo confortaturum, sicut Dioscoro & Severo, quorum ipse mores imitabatur, olim auxilio fuerat. Illum igitur, cum Alexandriam pervenisset, ordinaverunt per manuum impositionem, totumque Ecclesiasticæ ordinationis seu *hierarchicæ* officium, quam vocem Arabes retinuerunt. Cum verò juxta consuetudinem expanderetur super caput ejus liber Evangeliorum, apparuerunt figuræ duæ, quarum una ex altera parte, alia ex altera librum tenebant, inscriptis nominibus Severi & Dioscori, ipsiusque Jacobi inter utrumque, unde omen acceperunt futurum illum talibus similem, quos singulari cultu prosequitur erroribus eorum miserè involuta Jacobitarum Ecclesia.

Statim atque in Sede Patriarchali collocatus fuit, sermonem habuit in quo refutavit omnes hæreses, tum Synodi Calchedonenfis defensores; Phantasiastas etiam Gaiani sectatores, qui negabant filium Dei verè in corpore passum fuisse. Erat autem apud Alexandrinos Jacobitas in more positum, ut ad festa solennia, cum majori pompa apud eos celebrabantur, Hæreticos advocarent, quò scilicet augustior quodammodo Ecclesia ipsorum appareret. Id fecerant, cum Marcus Pontificale ministerium accepit. Eos à fide Jacobitica alienos cum ipse intermixtos è superiori loco animadvertisset, zelo succensus dicere cœpit verbis Pauli Apostoli: *Quæ societas lucis ad tenebras, aut Christo cum Satana: quænam pars fidelis cum infideli?* Tandemque edixit nullam etiam in rebus corporeis haberi debere societatem cum illis, cum quibus nulla spiritualium communio intercederet: tandemque omnes ex Ecclesia ejecit. Ea occasio fuit querelæ contra eum ad tributorum exactorem delatæ, apud quem unus ex illis hæreticis autoritate valebat: sed cum Marcus pœnam divinitus immittendam prædixisset, quæ mox consecuta est: (is enim in rixa cum homicidium perpetrasset, domus ejus spoliata) omnes magno metu perculsi sunt, adeo ut ne mutire quidem coram eo auderent, & cum summo opere observaret ipsorum Patriarcha.

Professio po-
blica fidei.

Erat inter ejus propinquos & concives vir quidam primarius, Macarius nomine, qui ex caritate in eum affectuque erga pauperes & Ecclesiam elemosynas largissimas faciebat, & Alexandriam mittebat quæ ad eorum sustentationem abunde sufficerent. Diaconus qui occasione famis, dum Ecclesiæ res administrabat, parum

Profectio
ad S. Maca-
rium.

reverenter erga Jacobum se gesserat, subita morte punitus est, ejusque familia brevi tempore extincta.

Ineunte Quadragesimâ profectus est ad Monasterium S. Macarii; ut mos erat Patriarcharum, ibi jejuniis & orationi vacaturus. Illuc ad eum confluerunt ex speluncis & montibus Monachi, quos persecutio Arabum fugaverat: & quia omnibus ad vitam necessariis spoliati erant, ipse illorum inopiam, quantis poterat elemosynis, sublevabat. Dum esset in ordine sacerdotum, ædificaverat altare, sive Capellam, sub nomine S. Chenudæ ad Austrum altaris S. Macarii: cum verò Ecclesiæ omnes dirutæ fuissent, ad S. Chenudæ altare Monachi synaxes suas agebant: illas igitur Ecclesias restaurare aggressus est; verum hæc omnia ejus consilia turbata sunt occasione cædis à Diacono ejus Syncello commissæ. Is enim vir durus & sævus, cum discipulum quemdam in culpa deprehendisset, tam crudeliter verberavit, ut paulò post mortuus fuerit. Arabes Monasterium ingressi Patriarcham apprehensum jussunt homicidam exhibere, ut de eo supplicium fumeretur: cum ille hominem apud se à pueritia educatum & quem carum habebat, periculo eximere conaretur, pecunias ipsi imperaverunt, quas cum Episcopi contulissent, liberatus est. Postea in Sahid, seu superiorem Ægyptum, abiit ad visitandum Ecclesias & Monasteria, occurreruntque ei passim Monachi & Anachoretæ.

Ægypti calamitas.

Ut continuaretur societas inter Alexandrinos & Antiochenos Jacobitas, omnem operam impendit: verum ne legationes Episcoporum aut literæ synodicæ liberè utrimque commearent, obstitit bellum quo Ægyptus per annos ferme quatuordecim vastata est, per Arabum & aliorum rebellium, Andalusenorumque, seu Hispanorum Abbassidis infestorum continuas deprædationes cædesque promiscuas, tum etiam sævissimam Abdel-Azizi tyrannidem, qui, dum Aminus, Almamon & alii post Haronis Rectidi mortem de Imperio decertabant, provinciæ partem armis occupaverat: quos divitiis spoliare vellet, eos occidebat: pecunias variis in locis defodiebat: conscios thesauri depositi, ne illum indicarent, interfecit. Inter alia sævitæ & avaritiæ argumenta postremum illud fuit quod, ut annonam incenderet omnesque Ægypti pecunias corraderet, frumentum omne comportari jussit in horrea, neque distrahi publicè sivit. Hoc verò consilium prætendebat; quòd ita Andalusenos, qui Alexandriam obtinebant, cum armis non posset, fame expugnaret. Hinc dira per totam Ægyptum

præfertim ea in urbe famēs; quam obsedit interea, compulsi in interiorē murum copiis, ubi eas arctissima obsidione cinxit, adhibitis contra arcem machinis bellicis. Quærebat interea Abdel-Azizus Patriarcham, iratus quòd quemdam à se commendatum noluisse ordinare Episcopum, quia id per Canones non licebat: rogatu tamen Christiani cujusdam pii, fecit quod prius renuerat. Abdel-Azizus juravit se Ecclesias eversum, occisurumque Episcopos omnes, nisi in conspectum suum veniret Patriarcha. Dedit se ille in viam hortatu Macarii illius, de quo superius dictum est, qui omnia bona sua impensurum se pollicitus est, priusquam mali quidquam ille pateretur. Sed juxta Jacobi vaticinium, priusquam in castra perveniret, Abdel-Azizus lapide ictus obiit: cui successit Hali ejus filius. Famem magna annonæ vilitas secuta est. Monachi suis Monasteriis & Cellis passim restituti. Cum autem altare S. Chenudæ*, seu adjuncta Capella, eos ob nimiam multitudinem non caperet, ædificavit Ecclesiam sub titulo S. Macarii, eo in loco ubi est altare Benjaminī Patriarchæ titulo appellatum, quia ille, ut superius in ejus vita observatum est, illud ædificaverat, &, quantum fieri potuit, ornaverat, ejusque dedicationem celebraverat 1^a mensis Farmuthi; cujus tamen dedicationis commemoratio non eā die, sed 8^a Tybi, agitur in Ecclesia Coptica, simul cum memoria depositionis ejusdem Benjaminī.

Jacobus rogatu Macarii ad ejus domum venit, benedictionis impertiendæ causā: ejus filius morbo correptus obiit: Patriarcha pectus ejus, frontem & alia ejus membra cruce signans, & preces ad Deum fundens, cum ad vitam revocavit. Ita narrant hanc historiam Jacobitæ, quam retulit Elmacinus: Macarius tertiam facultatem suarum partem orphanis, viduis & pauperibus distribuit. Cum verò miraculi fama Hierosolymam usque perlata esset, in eadem urbe Ecclesiam ædificavit, ubi Jacobitæ hospitium habent, quam Historicus testatur sua ætate superfuisse, vocatamque esse Ecclesiam Magdalenæ. Sed mira magis adhuc narratio est, quæ mox subjungitur: nempe quòd Macarius summa erga Theodorum Martyrem τὸν σεπτuάτου pietate commendatus cum esset, Haronis Rechidi tempore Cahiram venit, pecuniam satis magnam, quæ ipsi imperata fuerat, tributū nomine in ararium delaturus. In ipso itinere ædes magnificas sibi nunquam visas animadvertit, adeo ut aberrasse sibi videretur. Inde prodiens vir quidam augusta specie, cum quasi notum complexus, induxit in cubiculum interiori, ubi

Miraculum.

P. 140.

magna pecuniæ vis ; jussusque est accipere quantum ad negotium præsens opus haberet : postea ab eodem deductus ad Præfectum, statim admissus est ; & expedito negotio cum reverteretur , vir ille ex ejus oculis evanuit. Nec dubitavit Macarius illum fuisse Theodorum Martyrem , qui ejus angustiis subvenerat : nam magnam pecuniæ , quam ad ærarium deferrebat, partem in via pauperibus distribuerat. His & similibus narrationibus fecerunt Jacobitæ sibi fidem apud illiteratos & durissimam servitutem servientes populos, quos auribus delinitos in errore retinent.

Gesta hæc esse apparet ex Autoris narratione , antequam in Ægyptum advenisset Abdalla filius Taheri, cum summa autoritate missus à Califa supremo Muhamedanorum Imperatore , nempe Almamone , qui jam rerum potiebatur. Venit autem Abdalla in Ægyptum anno Heg. 210°, J.C. 825°, & Pelusii, seu Balbaisæ, substituit : anno sequenti Misram ingressus est : is autem turbas composuit , Andalufenos multis præliis attrivit : cumque secundum Religionem suam pius esset, ab injustitia alienus, sub ejus regimine res in meliorem statum restitutæ sunt.

E' mat. p. 136.

Patr. Antiochenus in Ægyptum venit.

Patatâ cum in modum Ægypto, Dionysius Patriarcha Jacobitarum Antiochenus, qui dudum famâ Jacobi excitatus cum videre optabat, advenit, & dies multos apud illum cum mutua utriusque consolatione transiegit.

Miraculum in calice.

Cum à Præfecto vestigalium pecunia exigeretur tributî nomine, neque ob malam Archidiaconi administrationem, tum etiam quod Christiani bellis impediti ad Ecclesiam liberè venire non possent, quidquam Jacobo superesset, unde solveret, vasa Ecclesiæ dare coactus est, atque inter alia calicem, quem cum Præfectus ab aurifice coram se confringi jussisset, magna statim sanguinis copia effluxit : unde is, cum paulò post in morbum quo obiit incidisset, jussit filio ut calix Patriarchæ restitueretur. Sit licet hoc miraculum ex eorum genere, quæ, tanquam apud Hæreticos facta, non temerè à Catholicis explodi possunt : at alterius omnino generis est, quàm tot alia, quæ ad rem non pertinent : nam qui ita scribunt, credunt procul dubio inesse calici ex sacris mysteriis quibus servierat, quamdam consecrationem ex Christi sanguine ; neque, etiamsi fabula sit, fingi potest ab aliis, quàm qui realem corporis & sanguinis Christi præsentiam in Eucharistia firmissimè teneant.

Mortuo Episcopo urbis Pham in Thelæide, venit ad Patriar-

PATRIARCHARUM ALEXANDRINORUM. 271

etiam vir quidam, postulans ut in ejus locum ordinaretur: cum verò esset ipse sibi conscius morum qui tali dignitati non conveniebant, timeretque ne repulsam pateretur, Præfectum Alexandriæ adiit, petiitque præceptum de sua ordinatione. Patriarcha eum repulit; & quamvis multi ex suis hortarentur ut Præfecto satisfaceret, ne quid calamitatis Ecclesia eâ occasione sustineret, adduci non potuit ut contra Canonum dispositionem viro indigno manus imponeret: instantibus tamen, quod postulabant concessit, & eum Episcopum ordinavit: sed novus ille Episcopus, antequam ad sedem suam perveniret, obiit, sicut Jacobus prædixerat: qui etiam si miracula edidisset, excusari non poterat ab immani sacrilegio, quandoquidem, ut de eo inferius dicitur, neminem Episcopum ordinabat, quin prius vigilasset & preces ad Deum fudisset, post jejunia, ut, quæ illorum antea vita foret, divinitus ipsi revelaretur. Non igitur poterat contra propriam conscientiam, contra disciplinam de illis repellendis qui favore Principum dignitates Ecclesiasticas ambiunt, infidelium maxime, talem absque summo scelere ordinare Episcopum: neque, etsi mortuos suscitaverit, morbos sanaverit, visiones viderit, potest excusari.

Consuetudinem habebat, ut commemorationem omnium Patriarcharum decessorum suorum celebraret à Marco Evangelista usque ad Marcum cui successerat, eorumque causâ Liturgiam celebrabat, quocumque in loco occurreret, in urbibus, in pagis & Monasteriis.

Paulò ante mortem apparuisse ei dicunt Christum Dominum cum Apostolis duodecim, invitantem eum ad requiem bono fideiique servo promissam: sed antea Archidiaconum illum suum, qui in officio suo, circa administrationem bonorum Ecclesiæ, nec diligens nec fidelis fuerat, Episcopum Bidæ ordinavit, prænoscentem futurum vas electionis. Tandem obiit 14^a Mechir, eo die quo fit commemoratio obitus Severi, quem ipsi cum Dioscoro instante morte apparuisse scribunt. Sedit annos 10, menses 8. consentit Elmacinus circa annorum numerum, ut etiam Makrizius: Canon apud Abulbircat assignat annos 18, menses 8. Ordinatus dicitur anno J. C. 2260, Hegiræ scilicet 2110: ita obitus ejus incidit in annum 221^{um} aut 222^{um}, nempe J. C. 836^{um} aut 837^{um}. Elmacinus illum obiisse anno Hegiræ 2220, qui 5^{us} fuit Imperii Mutacimi: respondet autem anno Martyrum 5530, non 5440, ut habet Abulbircat.

JACOB
Patr. L.
Episcopus
jussu Præfecti
ordinatus.

Elm. p. 142.

Makrizius paucis, ut solet, verbis scribit, ejus tempore restituta fuisse Monasteria & ad ea rediisse Monachos; tum ædificatam fuisse Hierosolymis Ecclesiam ad quam diverterent peregrini Ægyptii; quæ fusiis explicata sunt. Adjungit, eodem sedem Alexandrinam occupante, rebellasse Coptitas, & anno Hegiræ 216^o Afchinum adversus eos copias duxisse, neque subactos, antequam Alniamon in Ægyptum advenisset; qui causâ cognitâ multos supplicio capitis condemnavit, foeminas & pueros vendi jussit; unde maxima multitudo in servitutem abducta: atque inde res Coptitarum adeo afflictas fuisse, ut nusquam adversus Muhamedanos rebellare ausi fuerint. Eutychiû, qui plura de illis scripsit, verba referemus. *Post hec tumultuati sunt Bimaide, ut Coptiticè dicuntur, cujus interpretatio est progenies quadragenorum, siquidem Romani, cum Ægypto discederent, occupante eam Religione Muhamedana, relictis sunt ibi viri quadraginta, qui liberis ibi genitis multiplicati sunt, atque in inferiore terra Ægyptiaca parte, progenie aucti, appellati sunt Bimaî, id est quadraginta virorum progenies. Hi igitur rebelles facti, vectigal & tributum pendere noluerunt; quod cum Almamoni nuntiatum esset, misit ille Almotasemum copiis instructum in Ægyptum, quem pugna exceperunt Albimaide, ut ipse illos quos, & magna strage ipsorum edita, in fugam dedit, foeminasque ipsorum & liberos Bagdadum captivos abduxit.* Obscura sanè historia, & ad quam illustrandam subsidiiis literariis majoribus opus esset, quibus huc usque caruimus. Et initio quidem nomen istud *Bima*, quod exhibet Codex Eutychiû, quo usus est Pocockius & ex quo editionem suam adornavit, vocem nihili esse existimamus; neque enim significat n^o quadraginta virorum progeniem: nam ad scripturæ Sinicæ formam, monosyllabis multa Ægyptii non significant, & *coptita* vulgò dicunt, quod nomen corruptum est, ut apud Græcos posteriores ex *μαραξικωτα*. Itaque, cum ex punctorum diacriticorum defectu magna ubique sit in peregrinis vocibus Arabicè scriptis perturbatio, non dubitamus quin in hoc ipso corruptela sit, quod Codex Erpenianus Elmacinî confirmat, nam ibi *Taima* non *Bima* legitur, utrinque malè. Neque locum, ut Erpenio visum est, Elmacinus designat; sed populum aut gentem aliquam ab aliis discretam, ut ne ex Ægypto egrediamur, præter Muhamedanos erant Rumæi seu Græci, qui pauci admodum captâ provinciâ remanserunt: Coptitæ seu veteres Ægyptii, iique non uni, nam Bsammyritæ, & alii quorum memoria

moriam passim his in historiis occurrit, locis, genere, moribus plurimum inter se discrepabant. Istos verò *Bimaios*, ut eos vocare Pocockio placuit, ex Eutychio intelligimus Romanam, seu, quod idem est apud Arabes, Græcam originem habuisse: quod si à quadraginta patribus familias nomen habuerunt, certi sumus non *Bima*, sed *Nima* legendum, facili & quotidiana punctorum transmutatione: nam M litera in Ægyptiaco Alphabeto, ut in Græco, *quadraginta* significat, NI nota est pluralis: itaque dum *mv̄c* XL exprimunt, scribunt NIM; si NIMA scripserunt, XLI significare voluerunt. Inde judicamus non *Bima*, sed *Nima* scripsisse Eutyrium, & ex eo Elmacinum: ita quoque scriptum invenimus in antiquissimo codice Regio, ut in Seguieriano Syriacis literis descripto. Sed quinam illi fuerint, scire huc usque non potuimus, ob historiæ illorum temporum obscuritatem. Cum autem Romanos eos vocant, seu virorum Romanorum progeniem, dupliciter id potest intelligi, nempe quod Græci fuerint, ut plerique Alexandrini, qui, ut in Benjaminii vita dictum, capta Ægypto fugerunt; aut Romani, hoc est ex Romana vel Constantino-politana Aula missi, quia, ut ex Isidoro Pelusiota alibi observatum est, Ægyptiis magistratus Alexandriæ gerere non licebat. Cum autem facile fuerit quadraginta patres familias in Ægypto remansisse, & Melchitarum Ecclesiæ (nam & ipsi Orthodoxi erant) adhæsisse: fieri etiam potuit, ut intra annos ducentos liberis aucti, tribum quamdam fecerint, de qua Euty chius sit intelligendus, qui, utpote Alexandrinus & Orthodoxus, plura de illis sciverit, quàm Jacobitæ aut Muhamedani.

Adjiciendum est ex vita Yuçabi, Jacobum Metropolitam Æthiopibus ordinasse nomine Joannem, qui postea conspiratione inimicorum dejectus est.

SIMON PATRIARCHA LI.

SIMON
PATR. LI.

DEFUNCTO Jacobo, ordinatus est ejus loco Diaconus quidam Monachus, nomine Simon, Alexandrinus, apud eum, & antea ab ipsa juventute educatus apud Marcum ejus prædecessorem. Cum verò mensibus quinque tantummodo & diebus sexdecim Cathedrali tenuerit, nihil de eo memoriæ proditum est. Obiit 3^a Paophi. Citat Elmacinus Vitas Patriarcharum, in quibus scribitur dici *mensēs 7*: sed nostra exemplaria 5 legunt; quam-
Mm

vis 7 legerit quoque Makrizius, qui secundum quosdam ait eum sedisse annum unum, ordinatumque an. Heg. 222°, J. C. 836°, 13^a Decembris. Ecclesia Alexandrina tunc in pace fuit, expulsi Andalusenis & aliis qui Alexandriam occupaverant. Abulbircat contra omnes alios, tres annos & menses quatuor numerat. Quia verò nihil in hac Vita habetur præterea circa res Ecclesiasticas Jacobitarum, quæ ad Califarum successionem spectant, paucis prosequemur.

Almamon 7^{us} Abbassidarum obierat, paucis annis ante Jacobum Patriarcham, scilicet an. Heg. 218°, J. C. 833°: solus imperium obtinuit ab an. Heg. 198°, J. C. 813°, post debellatum fratrem Al-Aminum, qui 6^{us} inter Califas ejusdem familiæ numeratur. In Almamonis vita multa observata dignissima sunt; quæ cum fusè persequi non sit hujus loci, paucis verbis designabimus.

Almamon
literarum stu-
dia promo-
vet.

Præcipuum laudis, quam apud suos consecutus est, argumentum, ab ejus doctrina petitur. Nam cum ante illius tempora tota Arabum eruditio linguæ propriæ studio, Poeticâ, Alcorano ejusque interpretibus occuparetur, si paucos excipimus qui aliquam Græcorum librorum notitiam à Syris habuerant; sub hoc principe ad externas disciplinas adjecerunt animum: ejus enim jussu & liberalitate plurimi Græcorum libri in linguam Arabicam conversi sunt, quorum hi sunt præcipui, Aristotelis, Hippocratis, Galeni, Dioscoridis, & præcipuorum Medicorum opera; Euclidis, Archimedis, Theodosii, & aliorum Geometrica; Ptolemæi magna syntaxis & opera ferme omnia; tum multa alia quæ commemorare longum esset. Versiones autem, etsi nonnullæ factæ dicantur ex Græcis exemplaribus, longè tamen plures factæ fuerunt ex Syriacis, quia dudum multi antiquorum libri eam in linguam translati fuerant, ex quo Græca illis in provinciis, quas Arabes occupaverant, obsolescere cœpit, nec nisi apud eruditos conservari. Erant præterea Syri multi doctissimi, præsertim Nestoriani, reliquis non quidem in interpretando feliciores, sed Arabisimæ, qui in Yraca purissimus erat, peritiores. Ab illis illorumque discipulis interpretationes factæ sunt librorum Aristotelis in linguam Arabicam; ex Arabicis versionibus Hebraicæ factæ sunt bene multæ, sed nonnisi post annos circiter ducentos & amplius, quas deinde Judæi quidam Hebraicè expresserunt; & ex ejusmodi versionibus toties relictis, confuscinatæ fuerunt editiones Latine operum Ari-

stotelis, quæ diu apud nos in scholis expositæ sunt, usque ad studii Græcarum literarum instaurationem in Europa factam, postquam Constantinopolis in Turcarum potestatem venit; ad eam Alexander Halensis, Albertus, D. Thomas & reliqui è schola doctores commentarios adornaverunt suos, & cum ea Averroem, Avenpacem & alios interpretes legerunt.

Dedit etiam insignem operam Almanon in Astronomia restituenda, non modò translatis veterum Autorum libris, sed etiam factis observationibus, secundum quas Tabulæ ordinatæ sunt accuratissimæ, quæ *Almamonis Tabulæ* dicuntur, ut Elmacinus cum aliis autor est: sed in versione locus corruptus, nam ibi ex mala punctatione legitur *Ventus Almamonis*, nullo sensu. Observationes illæ factæ sunt in campis Sinjar, olim Sennaar, in Mesopotamia, cælo libero, ab Astronomis peritissimis, atque secundum illas tabulæ confectæ sunt, ex quibus omnes ferme antiquæ, præsertim Alfonso, prodierunt, tum aliæ multæ Arabicæ & Hebraicæ, quæ in Bibliothecis delitescunt; quas exceperunt Melikæ, seu quæ ordinatæ fuerunt jussu Gelaeddini Melik-chah, Seljukidarum 3ⁱ; & deinde Tartaricæ. Inter alia memoratu dignissima, quæ ad augmentum scientiarum ab Almamone procurata sunt, celeberrima illa observatio fuit, ejus jussu facta in iisdem campis Sinjar circa mensuram terræ, à tribus fratribus Astronomis Muhamed, Ahmed & Hacen, filiis Muçæ. Illi enim observata accuratissimè elevatione poli septentrionalis per planitiem progressi rectâ lineâ, fixisque per intervalla paxillis, tria millia passuum, sive parasangam unam confecerunt: observata deinde poli elevatione, gradus unius differentiam reppererunt: unde comparata observatione cum antiquorum sententia de ambitu terræ, statuerunt eum esse viginti quatuor millium milliarium, seu parasangarum octo millium. Iterum facta eadem observatio prope Cusam, cum priori exactè convenire deprehensa est.

Floruerunt sub Almamone Astronomi majoribus nostris notissimi Habas, Hamed filius Corair, Farganâ oriundus, vulgò Alfraganus, Messâhala Judæus, quorum opera Latine extant, & alij complures. Neque Astronomiæ tantum dabat operam, sed Astrologiæ judicariæ, in qua mirum est quanto studio Orientales omnes cujuscumque scetæ se exerceant, adeo ut neque Muhamedana Religio, quæ gentiles omnes superstitiones impugnat, neque Judaica quæ syderum vanas contemplationes prohibet, nec ipsa

Simon
Patr. Lib.

Almamoni
Astronomiæ
apud suos re-
stitutor.

V. J. Gravium
Præf. ad Abul-
sedam, Geinum
in Alfrag.
P. 139.

Ebn Chali-
kan Abulf.

Astrologiæ
studium.

Christiana, quæ Mathematicos illos hariolos tot pœnis canonicis sub-
jicit, eam vanitatem eradicare potuerint. Neque enim solum Christiani-
nis hæc profana studia placuerunt, verum aliquos ex diversis sectis le-
gimus Aulicorum Astrologorum apud Sultanos officium sustinuisse.

Scientiæ
novitates in
Muhamedana
religionem inve-
xerunt.

Ea peregrina studia multas in Muhamedanam Religionem
novitates invexerunt, adeo ut apud multos malè audierit Alma-
mon, quasi ita corruperit antiquam simplicitatem doctrinæ, quæ
sola Alcorani & Traditionum observatione continebatur. Verum
præterquam multarum suspectarum opinionum reus apud rigidio-
res Muhamedanos Almamon fuit, durissimam adversus eos cen-
suram exercuit, qui Alcoranum creatum esse negarent: nam ri-
dícula hæc opinio de Alcorano non creato, tam multorum animos
invaserat, ut plagas, supplicia, carceres, ipsam denique mortem
subierint non pauci, potius quam absurdam illam farraginem crea-
tam esse faterentur: qua de re multa leguntur apud Arabes &
Persas Historicos: hæc quippe nugæ seria duxerunt in mala docto-
res celeberrimos quàm plurimos. Nec in eo articulo constitit Al-
mamonis cura, ut creationem Alcorani publicatis edictis stabiliret,
& in eos qui aliter sentirent, graviter sæviret; verum aliud quiddam
publicavit an. Heg. 212°, J. C. 827°, circa dignitatem Halis, filii
Abitaleb, quodd scilicet agnosceretur tanquam creaturarum præ-
stantissima post Muhamedem, de qua etiam quæstione longæ &
cruentæ fuerunt controversiæ. Apud Elmacinum utriusque rei
mentio est, sed ita ut in Latina interpretatione sensus nullus
sit. Verba sunt: *Promulgavit Almamon locutionem per formulam*
Alcorani, & meliorationem Alis, filii Abutalibi, qui meliorave-
rat formulam post Legatum Dei: quæ ita vertenda fuerunt: Pro-
mulgavit Almamon sententiam de creatione Alcorani, & præcel-
lentiam Alis, filii Abitaleb: quippe qui esset præstantissima crea-
turarum post Apostolum.

Elm. p. 136.
138.

Obiit Almamon an. Heg. 218°, J. C. 833°: successit ipsi frater
ejus, Muhatecim Billa, qui fuerat sub ejus autoritate Ægypti præ-
fectus, obiitque anno Heg. 227°, J. C. 841°, atque adeo illi su-
pervixit Simon Patriarcha.

Ecclesia
ædificata.
Eutych. l. 1.
p. 437.

Refert Eutychius sub Almamone ædificatam esse prope montem
El-Moçtam, qui Cahiræ vicinus est, Ecclesiam, quæ à duobus
ejus cubiculariis Christianis nomen traxit, dicta *Kensset El-Pha-*
rachim; Ecclesia Cubiculariorum duorum, qui Græci, atque adeo
Melchitæ seu Orthodoxi cum essent, eam, ut proclive erat, suis

PATRIARCHARUM ALEXANDRINORUM. 277

reliquerunt ; unde ea postmodum vocata est Græcorum Ecclesia , de qua loquuntur Historici rerum Ægyptiacarum. Ædificata autem fuit prope Palatium dictum *Kobat-el-hawat* , seu Turris desiderii , ut vertit Pocockius , ea ratione quòd nimium distarent aliæ Ecclesiæ ab Almamonis aula , cui addicti erant , ut multi Christiani cujuscumque sectæ in aulico ministerio sæpe fuerunt.

Simon
Patr. LI.

YUCAB, sive JOSEPHUS, PATRIARCHA LII.

Yucab
Patr. LII.

IN hujus Patriarchæ initiis assignandis dissentiunt Historici : imo & illi , quos interpretatus vel secutus est Severus , inter se non consentiunt : nam in præcedenti dictum est Simonem ordinatum fuisse statim post Jacobi mortem , (quòd etiam ab Elmacino & Makrizio scriptum est ,) Autor verò vitæ Yucabi ait vacasse Sedem longo temporis intervallo antequam Simon eligeretur , ob contentionem de successore deligendo : cùmque paucis mensibus Simon supervixisset , rursus pari discordia certatum fuisse , renuentibus quàmplurimis ne quisquam ex Alexandriæ civibus eligeretur , quia rerum sæcularium amore nimio , fastu & deliciis male apud alios audiebant. In ista contentione venit quibusdam in mentem , ut Isaacum filium Andunæ , cognomine *Cid* , hoc est *Dominum* , virum nobilitate generis conspicuum , & divitiis affluentem , sed uxoratum , Patriarcham constituerent , autoritate Præfeti , qui tunc Ægyptum administrabat. Consentiebant Episcopi quidam , Alexandrinis placere potius quàm Deo studentes : atque inter eos fuerunt Zacharias Episcopus Wissim & Theodorus Episcopus Misræ , qui Isaacum adeuntes significaverunt , nullum se præter eum agnituros Patriarcham. Ex eorum consilio scripsit ad sacerdotes & cives Alexandrinos , multa pollicitus , atque inter alia , se , cùm Patriarcha constitutus foret , Ecclesias , quæ dirutæ fuissent , pecuniâ suâ restitutum , alia quoque ædificia ad eas pertinentia ; sacerdotes & pauperes statutis largitionibus sustentaturum , à tributo immunes præstiturum , & alia ejusmodi. Ita multi ad eum inclinabant , sed obnitentibus aliis pietate & scientiâ commendatissimis , Chaile Episcopo Belbais , altero cognomine Episcopo Sa , Joanne Episcopo Bana , seu Panopoleos , qui cum aliis profecti Alexandriam , Episcopos Misræ & Wissim Alexandrinisque graviter increpaverunt. *Quomodo , inquebant , abjecistis timorem Domini , & Canones violastis , adeo ut acquieveritis in*

Turbæ circa
Patriarchæ
electionem.

Uxorati à
Patriarchæ
repulsi.

M m iij

homine seculari uxorem habente, ad eum collocandum super Sedem D. Marci Evangelistæ, præter consuetudinem, & contra quam Canones definiunt. Illi præ pudore nihil responderunt, atque interea in medio confessu quidam nominavit Yuğabum sacerdotem, præpositum Ecclesiæ D. Macarii in Valle Habib, cujus præclara vita cum nota esset omnibus, missi sunt ad Monasterium qui eum adducerent, quod nonnisi per vim fieri potuit; nam injecta ei vincula ferrea, cum lugens indignum se esse, per humilem confessionem testaretur. Postridie celebratâ Liturgiâ, susceptaque sacra communione, (nam agebatur dies festus Michaelis Archangeli 12^a Athir J accepta à Monachis benedictione, Alexandriam profectus est. Audita vox pone eum, hortantis ad patientiam calamitatumque tolerantiam, quæ omnes turbavit: nam intellexerunt novas ab Ecclesiæ hostibus persecutiones imminere. Cum prope urbem advenissent, prodierunt obviam Alexandrini & Episcopi, cumque lætanter susceperunt. Verum, cum ad Præfectum Abdallam, filium Yezidi venissent, ut facultatem obtinerent illius ordinandi, negavit, nisi mille aureos, quos Isaac filius Andounæ pollicitus fuerat, exhiberent. Dixerunt illi se Fustatam, seu Cahiram, ituros, ubi nulla ipsius autoritas esset, & ab Episcopis Orientalis regionis ordinationem celebrari curaturos; atque ita tandem post longam molestiam facultatem illius faciendæ obtinuerunt. Itaque ordinatus est die 21^a Athir, an. 547^o Martyrum, qui ex vero calculo respondet anno J. C. 831^o, estque Hegiræ 216^{um}. Ita errat Elmacinus, dum eundem Martyrum annum componit cum anno Hegiræ 223^o. Proprius ad verum in Canone Chronologico Abulbiricat, ordinatus dicitur anno Martyrum 548^o. Makrizius post Simonis mortem ait vacasse Sedem annum unum, dies 27: ordinatumque Yuğabum an. 227^o, quod falsum est, videturque error esse librarii: nam antea ordinationem Simonis refert ad an. 222^{um}. Sedit ille menses 7, dies 16: vacavit Sedes annum 1, dies 21; fiunt annus 1, menses 8, dies 7: itaque aut vacavit Sedes diutius, aut ordinatus est Yuğabus ante annum 227^{um}.

Yuğabi initia.

Yuğabus natus erat in urbe Menus superiori, parentibus inter Christianos primoribus, quos puer amisit; pupillusque relictus, à Theodoro quodam Nikiosita, qui Præfecturam obtinebat, adoptatus & educatus est. Juvenis factus, ab eo licentiam petiit in eremum proficiscendi vitamque Monasticam amplectendi; quam eum ægrè obtinuisset, commendavit cum Theodorus per litteras

Marco Patriarchæ. Ille Diacono Syncello suo eum instituendum commisit, à quo linguam & scripturam Græcam didicit: sed cùm amor solitariæ vitæ semper eum teneret, petitiâ à Marco licentiâ, abiit ad Montem sanctum, seu Monasteria D. Macarii; & apud Hegumenum Paulum prophetiâ & miraculis clarum, vitam Monasticam amplexus est. Ibi cùm & doctrinâ & præclaris moribus in dies inclaresceret, Diaconus ordinatus, paulò post sacerdotio dignus judicatus est, & à Marco ordinatus, atque eo ministerio per annos plures functus est. Paulum Hegumenum longa infirmitate confectum diligenter observavit.

Cùm primum Ecclesiæ Jacobitæ præesse cœpit, magnas Christiani calamitates à Præfectis Muhamedanis sustinuerunt: qua occasione narrat Autor quomodo Bschammyritæ malis fracti, tandem locorum, in quibus degebant, asperitate confisi, adversus Muhamedanos arma sumserunt: quos ut compesceret Almamon, copias in Ægyptum misit, à quibus cæsa est ingens eorum multitudo. At si Elmacini & alterius vitæ Autoris calculo standum erit, hæc ad alium Patriarcham, nempe Jacobum, pertinent, sub quo etiam hæc contigisse ex illius vita ab aliis scripta superius diximus. Tamen si cœpit sedere Yuçabus an. Heg. 216°, quem respondere anno Martyrum 547° ostendimus, rectè prima illius tempora ultimis Almamonis conveniunt. Refert autem Autor, Patriarcham multis literis ad Bschammyritas scriptis, conatum esse eorum rebellionem compescere, monuisseque eum qui potestati resistit, Dei ordinationi resistere: sed illi, contempta ejus autoritate, non modò literis non obtemperaverunt, sed etiam Episcopos, à quibus deferebantur, contumeliosè habitos spoliaverunt. Inde vindicta in eos gravissima, cùm plerique gladio aut fame perierint; multi etiam in servitutem venum ierint.

Rebellio in
Ægypto;

Circa ea tempora adversus Isaacum Episcopum Tanis, & Theodorum Mistræ delatæ querelæ sunt à subjectis sibi Jacobitis ad Patriarcham; Tanitis minantibus se ab Jacobitica fide recessuros, nisi Episcopus suus deponeretur; aliis suum lapidaturos & occisuros, Illos cùm frustra placare aggressus fuisset & discordiam inter Episcopos & plebes componere, ad Episcopos scripsit, consilium petens. Interea Almamon in Ægyptum advenit, ad rebellionem Bschammyritarum compescendam, habebatque in comitatu Dionysium Patriarcham Antiochenum: erat enim, ut Autor hoc loco observat, Almamon doctus & curiosus circa Religionem Christia-

Patriarcha
Antiochenus
Dionysius in
Ægyptum
venit.

nam, habebatque apud se viros eruditos, quibus ad librorum interpretationem utebatur. Ad eum profectus est Yuçabus Fustatam, seu Cahiram, ut honorem principibus debitum ei deferret; magnamque voluptatem cepit, quod Dionysius, ad quem ob bella continua synodicas literas mittere non potuerat, advenisset: atque ita concordia, quæ à multis annis inter Jacobitas utriusque Sedis erat, majorem in modum ex eorum congressu coalesceret.

Iussit Almamon, postquam didicisset quales literas misisset ad Bschammyritas ut eos ad obsequium reduceret, ipsum simul cum Dionysio ad eos proficisci, pollicitus præteritorum veniam, si resipiscerent. Verùm, cum nihil profecissent, Almamon, misso Afschino cum exercitu, eos internecione delevit, postquam comiteatu omni prohibuisset. Præcipuam eorum arcem nominant; sed vox ita scripta est in codice manuscripto, ut, qua ratione legenda sit, quive locus intelligatur, divinare non potuerimus. Mulieres, parvulos & vulgus imbelles atque alios, qui eadem evaserant, in servitutem redactos, Bagdadum duci imperavit. Cum educerentur, interrogavit eos Dionysius Antiochenus, quæ causâ ipsis tot malorum fuisset: cumque respondissent factum id esse per Præfectorem in exigendis tributis sævitiam; ille, eâ quâ pollebat apud Almamonem gratiâ, id liberè significavit. Aderat Ibrahim, ejus frater, qui Ægypto præfuerat: unde Almamon consuluit, ut eadem horâ Dionysius proficisceretur, ne Ibrahimus libertatem illam vindicaret, cum tributis exigendis ipse præfuisset. Ita Dionysius, cum Yuçabo valedixisset, abiit; & post Almamonis mortem, ab Ibrahim ad necem quæsitus, fugâ salutem quærere coactus est, adeo ut aliquandiu Ecclesia Jacobitica Antiochena Episcopo caruerit.

Cum Isaac filius Andounæ, qui Patriarchatum ambierat, Alexandrinos, apud quos plurimum poterat, averteret ab obsequio Patriarchæ; is, ut animum ejus deliniret novisque turbis omnem occasionem tolleret, eum benignè allocutus est, significavitque velle se uti ejus consilio in administratione rerum spiritualium & temporalium, & sigilli Patriarchalis curam illi commisit: tum eum Diaconum ordinavit.

Episcoporum depositorum scelus adversus Patriarcham.

Episcopi depositi duo, illi scilicet de quibus superius dictum est, Afschinum Præfectum adierunt, Patriarchamque accusaverunt, quod rebellionis autor Bschammyritis fuisset; agitarique ab eo & suis consilia adversus Principes, atque ea de causa conventum haberi in Ecclesia. Iratus Præfectus fratrem suum in Ecclesiam

fiam miſit, ut occideret Patriarcham : quem cū acinace petiſſet, in columnam marmoream acinacis impactus, in fruſta diſſiliit : tum pugione eum petiit ; ictu veſtem & cingulum ejus diſcidit : ſed nullum vulnus inflexit, Deo illum conſervante. Poſtea violenter injecit in Patriarcham manus, eumque ad Aſſchinum deduxit, apud quem ille cauſā dictā, oſtendit calumnioſe ſe à duobus Episcopis depositis accuſatum, quos pro meritis ſuis dignitate privaverat. Cūque Aſſchinus ſupplicium de illis ſumi juberet ; interceſſit & obtinuit, ut illis parceretur. Quod cū Almamoni relatum eſſet, miratus illius clementiam, non modò liberum dimitti imperavit, ſed etiam Diploma ipſi conceſſit, quò tutus ab ſimilibus accuſationibus in poſterum foret, nec pro ſententiis quas inter Chriſtianos pronuntiaret, ordinationibus, aut depoſitionibus, in judicium trahi poſſet.

Almamon conquiſtos Bſchammyritarum reliquos deportari Bagdadum juſſit ; unde aliqui poſtea ſub ejus ſucceſſore in Ægyptum redierunt : alii ſedes eādem in regione fixerunt, qui, ut teſtatur Autor hitoria, ad ſua uſque tempora illic perſiterunt, adhucque nomen conſervaverunt. Scribit autem vocari eos Bſchardzōs inflexo nomine ; niſi, quod verſimilius exiſtimamus, hæc immutatio facta ſit à Librariis.

Yuſabus deinde Episcopum Wiſſim ordinavit, Iſaacum filium Andunæ, quem Diaconum antea ordinaverat, loco ejus qui depoſitus fuerat : Demetrium conſtituit Episcopum Tanis : Miſræ verò ſedem vacuam reliquit, eamque ſimul cum ſua, adminiſtrationi Episcopii Wiſſim commiſit ; quam ad finem uſque vitæ retinuit ; cū nemo ob ipſius apud Principes autoritatem, obſiſtere poſſet.

Episcopus
duas Sedes
ocupans.

Conſtitutis hunc in modum rebus, ad Nubiæ & Æthiopæ Ecclēſias ordinandas Patriarcha adjecit animum. Regnabat in Nubia Zacharias, ad quem Muhamedanus Ægypti Præſectus ſcripſit, uti tributum, quod ab annis quatuordecim ſiſco debebatur, repræſentaret ; ille cū metueret ne ſe abſente, regio pateret Barbarorum incurſionibus, Georgium filium, ſucceſſorem designatum, in Ægyptum miſit, cū prius ſcripſiſſet ad Patriarcham literas, quibus ſignificabat, ſibi per continua tot annorum bella, quæ omne inter Nubiam & Ægyptum commercium abruperant, non licuiſſe, ut ad eum ſcriberet. Eadem Georgius confirmavit, qui benignè ab Yuſabo ſuſceptus, poſtea Bagdadum ad Caliſum proſectus eſt.

Res Nubiæ,

Is obsequium ejus gratissimum cum habuisset, præteritorum annorum tributa remisit; honoreque & muneribus cumularum, tum vestibus pretiosis, ut fert Orientalium consuetudo, exornatum in Ægyptum remisit. Georgius habebat in manu crucem auream, quam unusquisque osculabatur.

Altare portatile Regi Nubiæ concessum, à Patriarcha consecratum.

Rogavit Patriarcham ut sibi consecraret altare ligneum, super quod Liturgia celebrari posset; illudque in Nubiam deferri, & in castris ubicumque Rex esset, circumferri. Novum id tunc videtur fuisse; neque enim antea habebant Orientales alia altaria quàm solida, ut in aliis Ecclesiis: *Antimensiorum* verò, ut Græci ea vocant, tabularum nempe ex ligno vel corio, quæ altaris vicem supplerent, usum apud Ægyptios fuisse, nullus autor, quem viderimus, memorix prodidit. Extant quoque in Jure Canonico Orientalium constitutiones variae de illis tabulis: sed hoc loco aliud quidpiam significari videtur, nempe altare ex ligno portatile, quod Nubiis & Æthiopibus concessum ab Alexandrinis Patriarchis fuit, cum illæ gentes ferè semper extra urbes in tentoriis agerent, ubi Ecclesias & altaria habere non poterant. Earum autem tabularum, sive altarium portatilium, eadem omnino disciplina est ac apud Græcos τὸν ἀντιστοιχίον, de quibus Balsamon ad Quæstiones Marci Alexandrini, & alii Græci Canonistæ passim, quorum plerosque indicat vir immensæ lectionis, amicus quondam noster, nunquam sine honore nominandus, Carolus Fraxineus Cangius in Glossario Græco-Barbaro. De iisdem Altaribus scripsit Jobus Ludolfus in Historia sua Æthiopica: sed parum accuratè.

Episcopi cum Rege Nubiæ: camparum pulsatio in Liturgia.

Erant cum Georgio Episcopi aliquot ex Nubia, qui ei Liturgias celebrabant, & ex quorum manu ipse & qui cum eo erant communionem accipiebant. Cum verò officia divina celebrarentur, campanas supra solarium arcis, in qua hospitium habebat, pulsari jussit, magno Christianorum gaudio, sicut in Ecclesiis fieri solet, nempe, ut ex variis Canonibus Coptitarum, Abulbircat & aliis autoribus intelligitur, quando elevatur Eucharistia. Patriarcha cum in itinere aliquamdiu comitatus est, non sine magno animi solatio, quòd post tantas calamitates, tria quæ in votis habuerat, consecutus fuisset: nempe quòd communionem cum Antiochena Jacobitarum Ecclesia non solum per literas, sed cum ipso Patriarcha Dionysio renovasset: quòd Ecclesiasticis Nubiæ & Æthiopiz rebus, quantum opus erat, consulisset; tandem

quòd Diplomata Imperatoria ad Ecclesiarum sibi subiectarum regimen necessaria obtinuisset.

Quod ad Ecclesiæ Æthiopice curam spectat, hæc Autor subiungit. Erat ordinatus à Jacobo Patriarcha Episcopus Æthiopie Joannes nomine, quem, cum Habessinorum Rex ad bellicam expeditionem profectus esset, multi conspiratione facta expulerunt, aliumque temerè contra Canones electum, ejus loco constituerunt. Joannes in Ægyptum rediit, & in Monasterio dicto Primo, quod ex Makrizio discimus, dicatum fuisse Mariæ Virgini, habitavit, ubi olim monasticam vitam professus fuerat. Verùm quia scelus illud in Episcopum suum Æthiopes à communionem Sedis Alexandrinæ alienos fecerat, illis non impunè fuit: nam peste non hominum modò, sed etiam pecorum ingens multitudo periit: Rex quoque infelicitè adversus hostes suos cum sæpè pugnasset, in patriam rediit, ignorans quæ se absente commissa fuissent, Reginæ autoritate, quæ tanquam altera Eudoxia Joannem contumeliosè expulerat. Igitur Rex scripsit ad Yuçabum veniam peccati postulans; quod Deus peste, siccitate aliisque flagellis vindicaverat: rogans præterea ut ad se mitteret, qui oraret super eos, & gratiam à Deo precibus impetraret. Accessit Yuçabus Joannem Episcopum, eumque viatico instructum cum fidis comitibus in Æthiopiam misit, ubi à Rege honorificè susceptus est. Verùm ejus hostes tumultuati iterum, negaverunt se suscepturos Episcopum qui circumciscus non esset: *Omnes enim, inquebant, in hac regione nostra præter eum circumcisi sunt.* Placuit hæc eorum expositulatio Regi, qui jussit illum circumcidi, quamvis senem. Verum, cum nudaretur, inventus est quasi octavo die à nativitate sua circumcisionem accepisset. Hoc ipse Episcopus ad Patriarcham scripsit, affirmans simul, se id huc usque nescivisse: unde nova auctori historię, miraculi celebrandi occasio nata est: quasi inter Coptitas, quorum plurimi circumcidebantur, ut alibi dictum est, & dicitur inferius, miraculo tribuendum sit, quòd aliquis in pueritia circumciscus foret: quando & multos ab ipsis Muhamedanis per vim circumcisos fuisse legimus, quod adhuc sæpius fieri à fide dignis viris audivimus. Hæc Autor de duplici regno, Ægyptiacis finibus contermino, & quoniam traditio de illarum Ecclesiarum primordiis obscurissima est etiam apud ipsos Orientales, de illis pauca dicenda sunt; ne, quod viris doctissimis in hoc literarum exoticarum genere ni-

Res Æthiopice.

Circumcisio apud Arabinos.

miū sæpè contigit, narrationes singulares & in quibus aqua hæret, etiam eruditissimis, absque necessaria explicatione tanquam ænigmata lectoribus solvenda relinquamus.

Observata
quædam de
Nubiis.

De Nubiis jam dicta sunt nonnulla, ex quibus intelligitur ignorari penitus an olim apud eos prædicatum Evangelium fuerit ante Arabum tyrannidem; an verò postquam in illorum potestatem Ægyptus venit, à Jacobitis Ægyptiis simul cum fide Christiana hæresin quoque didicerint. Omnino tamen verisimilius videtur, Nubios antiquitus Christianos fuisse; ignorari verò quando & quâ ratione fidem acceperint, quia apud Græcos & Latinos Autores Æthiopum nomine comprehenduntur; tum quòd, si Originum Æthiopicarum auctoritatem sequimur, erant illæ provinciæ sub Regis Æthiopiæ potestate. Amplitudinem enim illius regni majorem omnino olim fuisse certissimum est, id testantibus non solum Æthiopibus, sed Arabibus Christianis & Muhamedanis. Illorum Regum seriem qui tradiderunt primi, Damianus à Goez & Marianus Victorius eam non ita probaverunt, quin posterioribus vehementer suspecta fuerit; & ipse Jobus Ludolfus, qui res Æthiopicas pleno & laborioso commentario illustravit, de primis & antiquis regibus nihil fermè quod diceret reperit, nisi post illa quæ nunc illustramus tempora. Fieri igitur potuit, ut qui in Æthiopiâ regnabant, Nubiam quoque suprema cum auctoritate obtinerent. Id tamen minus omnino certum, quàm quod ex hac historia & aliis multis intelligitur, Nubiam proprios reges habuisse: nam eorum mentio est in Historia Omniadatum, primorumque Califarum, à quibus arma in hanc provinciam illata primis imperii Saracænorum armis, tributumque impostum communis opinio est. Factum id anno Heg. 31^a, J. C. 651^a, secundum Elmacinum & multos alios, sub Abdalla filio Saidi, Ægypti Præfecto. Cum Rege pax inita est, magno captivorum numero, imperato: mancipiis enim locuples, æris indigentissimus Rex ille, fuisse perhibetur ab omnibus historicis. Eo verò tempore, & proximis sæculis nullam adversus Nubios expeditionem factam legimus: nam nihil ab imbelli populo timendum videbatur; intererat quoque novorum Dominorum, ut commercia quæ ex tota Africa inferiori per Nilum fiebant, non abrumprentur. Nam usque ad *Jenadel* sive Caradupas Nili, Nubii & Æthiopes navigabant: inde camelis per stationes diurnas decem, Assuanam quæ erat ultima Sahiæ seu superioris Ægypti urbs, merces variæ de-

PATRIARCHARUM ALEXANDRINORUM. 285

ferebantur. Ita Geographus Nubiensis, Autor Mirabilium, Cazui-
nius, Abulfeda, Ebnelwerdi, Yacutus, Makrizius, Geographi Per-
sæ duo, omnes tandem quos vidimus.

Jam autem Nubas Christianos fuisse, testantur omnes : neque
esse aut fuisse in ea regione Muhamedanos præterquam paucissi-
mos : quod sane argumentum est eos, cum Muhamedani regio-
nem penetraverunt, jam fuisse Christianos. Unde Geographus
Nubiensis, nam de illis locus intelligendus est, *Dicuntur esse
Græci, religionemque Christianam profiteri à diebus Coptitarum,
ante exortam Muslemanorum sectam : verum deficiunt à fide
Christiana, sunt enim Jacobitæ.* Dicit Græcos rectè scripsit, ad
differentiam Romanæ religionis, quibus verbis absque dubio signifi-
catum voluit existimare illos se esse in antiqua Græcæ seu Orienta-
lis Ecclesie fide : ab ea tamen declinare, quia Jacobitæ essent.
Id verò præter hunc autorem testantur quoque Kazuinius, Abu-
selah Armenus, & alii, præter autores innumeros qui Nubiam
collocant in Dioecesi Patriarchiæ Alexandrini, ut alibi dictum est :
quod instrumenta ejus electionis, & alia Acta publica ubi ejus
tituli fusè describuntur, palam faciunt. Fieri autem potuit, ut
à Frumentio & aliis, qui primi, vivente Athanasio, fidem apud
Æthiopes Axumitas prædicaverunt, ad fidem Christianam con-
versi fuerint. Cum verò Jacobitæ Alexandriâ, & tota ferme in-
feriori Ægypto pulsî sub ultimis Christianis Imperatoribus, in su-
periores se recepissent, eamque totam hæresi sua infecissent, fa-
cile fuit, ut barbari incauti in eam traherentur. Nam statim at-
que memoria eorum occurrit in historia tam politica quàm Eccle-
siastica, Jacobitis adnumerantur.

Quamvis igitur de Nubiæ Regibus vix plura scire liceat, nisi quòd
fuerunt ante Muhamedum, & quidem Christiani : doceat quoque
Euty chius Jacobitas factos Nubios fuisse eo tempore quo cathe-
dra Alexandrina per annos multos absque Orthodoxo Episcopo
fuit, ut superius observatum; non est cur de historicorum nostro-
rum sinceritate dubitemus, cum Zachariam & Georgium Reges
Jacobiticæ sectæ professores, & Jacobitarum Patriarchæ conjunctis-
simos fuisse testantur. De altaribus portatilibus dictum est quan-
tùm satis : nec aliud notandum in hac disciplina, nisi quòd altaria
ejusmodi incognita olim erant : nec nisi cum licentia Patriarchæ
haberi poterant, aut in castris Liturgia celebrari : quòd simili exem-
plo Turkestanæ cuidam Regulo concessit Nestorianorum Catholicus.

Y o ç a s
Patr. LII.
Geogr. Nub.
Clan. 1. P. 4.
pag. 17.
Nubæ anei-
quirus Chri-
stiani.

Postea Ja-
cobiticam
hæresin sus-
ceperunt.
Euty ch. t. 2.
p. 387.

Hist. N. E. p. M. c.

Yusef
Patr. III.
Zacharias
& Georgius
Reges Nubiz.

Zachariæ, Georgique ejus filii in Ægyptum, & postea Bagdadum missi, consecrati item altaris, & eorum omnium quæ historia Patriarchalis continet, meminit Abuselah Armenus in Chronico. Is Autor refert quoque expeditionem Kyriaci Regis Nubiz contra Ægyptum, tempore Chailis Patr. 46ⁱ, de qua dictum est in ejus vita. Raphaelcm Regem Nubiz Christianum fuisse scribit, ædificasseque multas Ecclesias in urbe Dunkala, quæ secundum Geographos est Nubiz primaria, atque inter alias insignem unam, secundum Architecturam Yrakenscm : alias in urbe *Abrem* : præcipuamque B. Mariæ in qua testudo ingens, cui crux imposita. Tandem Georgium refert postquam in patriam rediisset, amplam Ecclesiam ædificasse, duxisseque secum Episcopos, Sacerdotes & Diaconos, qui ipsi sacra facerent; obtinuisseque ab Emiro seu Califa, ut campanas haberent, quarum sonitu Christiani ad publicas preces convocarentur; illæque, cum Liturgia celebraretur, pulsari possent. Videnda etiam quæ de Nubiis dicta sunt in vita Chailis.

De Æthiopica Ecclesia.

Cap. Ar. 36.

Quod Æthiopiam Ecclesiam spectat, qui in historia nostra Episcopus simpliciter vocatur, eum Metropolitam Provincie fuisse dubitare non possumus, qui scilicet Episcopos subiectos haberet, quorum tamen Dioceses ignorantur, sed ut ex antiquissima Orientalium disciplina in Canonibus qui Nicænis subjunguntur & dicuntur Arabici, Metropolitam alios ordinare non poterat, nec alibi quam in Ægypto ordinari, de quo more erit etiam inferius dicendi locus. Neque Episcopis aut Clericis Æthiopie jus erat eligendi sibi Metropolitam, nam sufficienti numero non erant ut eum rite possent ordinare. Juris istius antiqui, quam tenaces fuerint Alexandrini Patriarchæ Jacobitarum, multa exempla doceant; neque excusari poterant Æthiopes quoddam Metropolitam suum expulissent. Verum quoddam remissum ex Ægypto Joannem suscipere noluerint, eò quoddam circumciscus non esset, observatione dignum est. Hinc enim patet tunc apud Coptitas Ægyptios Circumcisionem in usu non fuisse, de qua deinde sæpe inter eos controversia fuit, eo tamen plerumque successu, ut inter indifferentia ille ritus haberetur, nemo ad circumciscionem cogeretur, imò post baptismum susceptum, criminis loco esset, ut ex variis Constitutionibus intelligitur. At inde etiam apparet, non adeo indifferenter circa hunc ritum Æthiopes se habuisse; ac multis videtur, præsertim ex verbis quæ occurrunt in Confessione Clau-

dii Regis Æthiopiz, quam ante annos aliquot publicavit Jobus Ludolfus, nempe esse tanquam incisionem faciei in Nubia, aut perforationem auris apud Indos. Neque tamen negandum, ex tumultuantis populi facto, argumentum idoneum capi vix posse, quo demonstretur Æthiopes in periculoso illo errore versatos fuisse, quod Circumcisionem necessariam esse judicarent. Nam ad hæc usque tempora mittuntur ad eos Antislites Alexandriæ, quibus Circumcisio non imperatur. Neque tamen absolvendi omnino sunt Æthiopes à communi adversus eos autorum omnium accusatione, quod Judaicæ isti observationi tam firmiter adhæreant.

Porro quis ille Joannes fuerit, cum non occurrant catalogi Metropolitum Æthiopiz, dicere non possumus, nisi forte is ipse sit cujus mentio est in Diptychis Liturgiæ Æthiopiz Romæ editæ. Quod verò jam dudum ante illa tempora Æthiopes Christianam religionem profiterentur, non minus Arabes tradunt, etiam ipsi Muhamedani, quàm Scriptores Christiani. Neque prætereundum est Metropolitam illum, quem Joannem historia nostra vocat, Jacobum vocari à Makrizio, qui rem paucis narrat: ut etiam ab Elmacino, quem alter, ut solet, secutus est.

De Joanne
Metropolita
Æthiopiz.
Lit. Æth.
p. 160. 3.

Elmac. p. 149.

Yucabo postquam Nubiæ & Æthiopiz res composuisset, visum est multos Episcopos ordinare, quos misit in Africam, Pentapolin, Cyrenen, seu Kirowan, Tripolin, Ægyptum, Æthiopiam & Nubiam, dicens periculum esse ne greges perirent, nisi multi pastores eorum custodiæ invigilarent. Hæc autem ordinatio Episcoporum plurimorum duplici ratione intelligi potest, vel quòd in sedes vacuas novos Præfules ordinaverit; vel quòd magis verisimile, Episcopos absque urbe, fixaque Diocesi ad barbaras illas gentes miserit, novosque Episcopatus instituerit. Id enim persèpe factum est ab Patriarchis hæreticis, ut à Nestorianis maximè, qui in Turkestan, Chorasana, India, Sinarum Imperio Episcopatus & Metropoles instituerunt, quorum ne nomina quidem apud alias Ecclesias audita sunt. Ita ab Alexandrinis Patriarchis factum esse non dubitamus: nam cum Lusitani in Oceanum Indicum penetraverunt, Christianos quosdam Jacobitas reppererunt in Insula Socotra & aliis ad Mare Rubrum; qui cum olim Orthodoxi fuissent, non aliam susceptæ hæreseos occasionem videntur habuisse, quàm cum ob Arabum tyrannidem Græci Episcopi ad eos miti non possent, Jacobitæ alios ex sua secta mise-

Episcopi ad
varias pro-
vincias ordi-
nati.

Barris Decad. 3.

rant, qui Catholicam fidem aboleverunt, ubi jam olim prædicata fuerat: ut Nestoriani in India suam mirum in modum propagaverunt. De Episcopis aut Ecclesiis in Africa interiori institutis, nihil apud Autores occurrit. Nam pauci qui ad Gregorii VIIⁱ tempora permanferunt, non Græcos ritus, qui in Carthagenensi Provincia nusquam fuerunt, sed Latinos sequebantur, Gothicos scilicet ex quibus ad nos illa officia pervenerunt, quæ Mosarabica appellantur, ab illis usurpata Christianis, qui sub Arabibus Africanis fidem suam servaverunt, ut in Hispania alii. Nam cum Carolus V. expeditionem Africanam suscepit, Christianorum familias aliquot reperit, sed qui Latinos ritus conservaverant. Si verò per Africam ad quam Episcopos ut ad alias provincias misisse Yuçabus dicitur, intelligamus vastam illam continentem, quæ Oceano cingitur ad Australes usque remotissimas regiones, quæ Barbaris, Zingis, Fungis, aliisque ignotis gentibus habitantur, nullum apud illos repertum est Christiani cultus vestigium. Nam qui ad Maris oras reperiuntur, jam ab aliquot sæculis ex commercio cum Arabibus, quorum multi negotiationis causâ sedes ibi fixerunt, ad Muhamedanam religionem perverſi sunt: Mediterranei verò, si paucos admodum excipimus, qui ex Nubiorum & Æthiopum vicinitate obscuram habent Christianismi notitiam, barbari plane & absque ullo exteriori cultu huc usque fuerunt.

Nova Jacobitarum calamitas.

Nova sub Almamone, ut videtur, vel Motasimo ejus successore, calamitas accidit: nam principis jussu (Ibrahimum vocat Autor, Almamonis fratrem, qui tamen nullam in Ægypto autoritatem obtinuit) venit in Ægyptum Eleazarus quidam Nestorianus, cum mandatis ab Imperatore, ut columnas marmoreas, præsertim quæ pretiosiores viderentur, auferri, & ad eum miti juberet. Intelligendum est autem istum quem Nestorianismi incusant, Orthodoxum fuisse; nam statim Calchedonenses se eidem conjunxerunt, ut communicatis consiliis Jacobitarum Ecclesias spoliarent. Invidiâ majori eos accendebat, Ecclesia S. Menæ in Mareotide, quæ sive columnarum pretium & raritas spectarentur, sive reliqua ornamenta, Alexandrinas omnes, atque adeo totius Ægypti longè antecellebat. Yuçabus contrâ orabat, ut eam saltem intactam relinqueret, nec quidquam profecit: nam ablatae sunt Eleazari jussu marmoreæ columnæ coloris varii, emblemata etiam quibus pavimentum distinctum erat, evulsa, & Alexandriam deportata. Patriarcha, conquisitis operariis, tabulas pictas,

pietas, & alia ornamenta substituit, detrimentumque quoad licuit, citissime reparavit. Eleazarus hydrope correptus in summa egestate periit, ab ipso Patriarcha sustentatus. Verum contradicit Autor Historiæ Sanuti, sive is ipse sit, sive alter: Joannes scilicet Diaconus qui ætate suppar fuit. Ait enim Eleazarum illum, quem in hac vita dicunt in summa egestate periisse, in Syriam vel Corasanam reversum obiisse, cum filiis mandasset, ut ad Patriarcham Yuçabi successorem proficiscerentur, magnamque pecuniæ vim ipsi restituerent, in compensationem eorum quæ ab Ecclesiis abstulerat.

Sophronium tunc fuisse Calchedonensium seu Orthodoxorum Patriarcham scribit Euty chius, constitutum anno Motalini 4^o, Hegiræ scilicet 230^o, J. C. 844^o; Sedisse annos 13, fuisseque Philosophum & sapientem: quem tamen cum pro defensione sanctarum Imaginum scripssisset adversus Iconomachos dicit, verendum est ne nomen similitudine deceptus, quæ de Hierosolymitano dicenda erant, ad illum transfulerit. Neque enim istius Alexandrini apud Græcos & Latinos occurrit memoria. Ejus tamen, historia hæc nostra meminit, sed ita ut si vera referuntur, non omnino Orthodoxus credendus fuisse videatur. Dicitur enim arctam cum Yuçabo amicitiam coluisse, & ad ejus quodammodo sententiam accessisse, territum miraculo, edito adversus Calchedonensem quemdam, qui ex Jacobitarum sententia blasphemaverat, quod artificem Jacobitam audivisset, dicentem se non posse laborare feriâ Parasceves magnæ, eò quod ipsa die Verbum Dei crucifixum esset.

Sophronius
Orthodoxus
Patriarcha.

Euty. l. 2.
p. 440.

Anno post ordinationem ejus 7^o, qui fuit Martyrum 554^o, & rectè, siquidem an. 547^o ea facta dicitur, J. C. 838^o, in Oriente Cometes ingens Occidentem versùs apparuit in modum ensis: secuta est animalium mortalitas, adeo ut nec arari, nec feri terra potuerit: tum fames ingens, & pestis.

Mortuo Isaaco filio Andunæ Episcopo Wissim, ordinavit Yuçabus ejus loco Joannem Diaconum, rogantibus Misræ civibus ut eam Ecclesiam regeret, quam cum altera Isaacus retinuerat: Wissimæ Bekiram, qui paulo post obiit. Huic substitui volebat Theodorus Isaaci discipulus: sed cum Patriarcha ordinare volebat sine plebis consensu, quæ eum rejiciebat. Theodorus à Præfecto Muhamedano petiit, numeratâ pecuniâ, ut ad ejus ordinationem Patriarcha cogreretur. Cum negaret id posse fieri, Præ-

Ordinatio
Episcopalis
per vim ob-
tenta.

etus Ecclesias Cahiræ, & primò eam quæ erat in Kacerelchema; seu Castro luminum, dirui imperavit. Jamque ad columnas usque perventum erat, cum omnes rogaverunt Patriarcham ut Ecclesias ordinatione hujus viri à ruina redimeret; cum itaque ordinavit: tria etiam aureorum millia Præfecto multæ nomine re præsentare coactus est, quæ Christianorum Primores contulerunt: at ille adversus Græcos missus, paulò post amissa exercitus parte, pessima morte extinctus est.

Diplomati-
bus calum-
niam repellit
Patriarcha.

Lis ipsi apud Cadium seu judicem intentata postmodum, Episcopo Misræ & quibusdam aliis secretò conjuratis, ut ejus auctoritatem imminuerent. Interrogatus à Judice quo titulo se super alios efferreret, respondit, auctoritate Dei, & Principum; simulque diplomata Almamonis & alia protulit; atque ita liberatus est. Ejusmodi Diplomatum, quorum extant exempla varia, tuti erant Patriarchæ primis Muhamedani Imperii sæculis, atque ita rarissima erat ipsorum depositio: nam præcipuum ejusmodi privilegiorum fundamentum communi & antiquitus observata lege nitebatur, ut Christiani suo jure suisque consuetudinibus uterentur, secundum quas Patriarcha nonnisi à congregatis Episcopis deponi poterat. Verùm ex quo Turcæ rerum potiti sunt, nihil frequentius est, quàm ut solo Sultani nutu, Patriarchæ indictà causâ deponantur, quæ vis ambitioni, fraudibus, & sceleribus omnibus viam aperuit.

Usus lingue
Copticæ.

Illud etiam in hujus narrationis serie animadvertendum est, quòd, cum Yuçabus & Episcopi coram judice causam dicerent, & ille Episcopos contrariæ factionis adstantes vidisset, eos linguâ Copticâ allocutus est; quam Muhamedani quidam cum intelligerent, verba ejus Judici retulerunt. Unde apparet adhuc in usu fuisse non modò inter Christianos, sed etiam in plebe, linguam illam veterem, quæ postmodum sublata prorsus ex communi sermone, in libris tantum Ecclesiasticis conservata est.

Idem Judex, cum prava adversus Patriarcham consilia successu caruissent, ex mancipiis Ecclesiæ addictis, aliquot abieptos ad Muhamedanæ religionis professionem coegit, vehementer illo reclamante; tùm quòd Ecclesia ut bonis suis quondam ex Imperatorum Edictis liberè fruebatur, ita mancipia in ejus potestate esse deberent, præsertim cum homines illi Christiani essent, sed nihil profecit apud iniquissimum judicem. Erant autem servi illi Græci, Nubii, Æthiopes, Africani.

PATRIARCHARUM ALEXANDRINORUM. 291

Obiit interea Dionysius Patriarcha Jacobitarum Antiochenus ; congregatique Metropolitæ, Episcopi, Clerus & plebs Jacobitica, elegerunt ejus loco Joannem anno Yuçabi 15°, Martyrum 562°, J. C. 846°. Is statim Synodicam Epistolam de unitate fidei scripsit, & per Athanasium Metropolitam Euphemiam, & Timotheum Damasci, qui multos in comitatu Sacerdotes habebant, in Ægyptum misit. Yuçabus, ut eos cum majori pompa reciperet, Misrâ Alexandriam profectus est : ubi Epistola in publico consessu recitata est. Verùm eodem ipso tempore novâ calumniâ iterum accusatus, & à nefario illo judice verberari jussus, coram Metropolitanis illis Antiochiâ missis, magnum patientiæ specimen dedit. Postea datis ad Synodicas literas responsis, eos remisit.

Dionysii Patriarchæ Jacobitarum Antiocheni Epistola Synodica ad Chaillem seu Michaellem Alexandrinum refertur in Tractatu *de fide Patrum* : is porro esse non potuit, qui an. 846° mortuus dicitur, si vera narrat historicus ; dum ejusdem Dionysii obitum refert ad Yuçabi tempora. Potuit tamen falli collectaneorum illorum Autor : sed parum interest, cum successionem Antiochenorum illorum Patriarcharum, nulla huc usque nobis monumenta satis expediant.

Magnam Monasteriorum curam gessit, præsertim eorum quæ sita erant in Valle Habib, quæ tunc florentissima erat magnâ Monachorum multitudine, inter quos non minus isto quàm præcedenti sæculo, si autoribus historiæ credimus, erant qui morbos, dæmoniaque oratione & signo crucis depellerent, qui futura præviderent ; atque inter eos præcipuus Ammonas in Monasterio S. Joannis in monte Hermon, qui hujus vitæ scriptori prædixit, fore ut ad Historiam Ecclesiasticam quam legebat assiduè, continuandam, aliquando animum adjiceret. Erat quoque inter alios insignis Samaius Oeconomus Monasterii S. Macarii, cujus curâ & prudentiâ factum, ut Christianorum elemosynis in pristino meliorem statum restitueretur, augeturque opibus, vinetis, olivetis, molendinis, torcularibus : omnibusque tandem ad vitam Monachorum sustentandam necessariis. Eò confluebant ob miraculorum frequentiam non modo Jacobitæ, sed etiam hæretici. Edificavit idem Ecclesiam majori contiguam, sub nomine Discipulorum : quam cum omnibus modis ornasset ; invitavit Patriarcham ad ejus dedicationem, quæ perfecta est 1^a die Farmuti, anno ejus 17°. Sanctorum

YUÇAB
Patr. LII
Joannes
Antiochenus
Patriarcha.
Em. p. 145.

Monasterio-
rum illicus.

cum magnopere commendasset, ob virtutes & curam Ecclesiarum quas instauraverat aut ornaverat, dedit illi baculum pastorem quasi futuræ dignitatis notam, quippe is ad Patriarchatum pervenit, ut insinuat dicitur.

Præf: Qi
insolentia.

Anno 18^o venit in Ægyptum Malek filius Nasser Præfectus, decessores suos nequitia & crudelitate superans, qui artifices & mercatores tam crudeliter vexavit, ut plerique ad summam inopiam redacti, urbes & patriam deseruerint, quærentes ubi vitam tolerare possent. Is Cellam Patriarchalem ingressus, non modò in ea cum concubinis suis comestatus est, verum etiam locum Patriarcharum orationibus tanquam incenso consecratum pollueret, turpia cum sceminis patravit. Neque hac injuria contentus, cum in vincula conjecit, accusatione adversus eum subornata, quasi ad Græcos scriberet, & ab illis pecuniam acciperet. Constrictum in angustissimo loco, quotidie multis plagis insitit debilem, neque dormire, neque medicinam vulneribus suis adhibere permittebat, petens ab eo mille aureorum mulctam: tandem quadringentos solvere jussus est; & in alium carcerem conjectus, in quem detrusum se cum eo testatur Autor historiæ. Septimo post numeratam pecuniam die, mors Præfecti publicata est.

Mors Yuçabi.

Paulò post Yuçabus febri correptus, septimâ postquam decubuerat die, obiit Dominicâ, cum sacram communionem recepisset, 23^a Paophi, anno Martyrum 566^o, J. C. 850^o, qui est Hegiræ 236^{us}, cum sedisset annos 18. & menses 11. Sepultus est Alexandriæ prope alios Patriarchas. Elmacinus quamvis annum eundem Martyrum numeret, mortem ejus assignat anno 242^o Hegiræ sub Motewakelo; qui calculus, ut aliis in locis pariter peccatum est, stare non potest, secundum Canonem de quo etiam ipsi Orientales consentiunt: numerandos esse annos Diocletiani seu Martyrum ab anno 284^o J. C. qui est Imperii illius 1^{us}, non à primo persecutionis, ut deceptus ab Ignatio Patriarcha Antiocheno Scaliger existimavit. Abulbircat annum 567^{um} morti Yuçabi assignat.

Res Muha-
medanz.

Ut verò secundum institutam methodum Epitomen rerum Politicarum cum Ecclesiasticis jungamus, post Mutasimi mortem ejus loco constitutus est Haron Wathik - billa ejus filius an. Hegiræ 227^o, J. C. 841^o, qui cum annos 5. menses novem regnasset, obiit anno 232^o juxta Leb Tarich &

PATRIARCHARUM ALEXANDRINORUM. 293

Yusa 2
Patr. LII.

alios inter quos Ebin-Chekna : Elmacinus 231°, J. C. 245°. Successit ipsi frater ejus.

Mutewakel Jasar 10^{us} ex Abbassidarum stemmate qui anno 247°, J. C. 861°, à sicariis occisus est, summis, ut vulgaris opinio fuit, à filio Mustansiro. Fuit princeps ineptus, supersticiosus, crudelis, vinolentus; tamen in bello adversus Christianos strenuus. Contra avi & aliorum ferme omnium Abbassidarum morem, Haliadas odio persecutus est, adeo ut sepulcrum Huceini filii Halis dirui jussit: sustulit quoque duram illam inquisitionem adversus literatos, circa Alcorani creationem, ita ut liberum reliquerit unicuique eum librum creatum vel increatum existimare, cum per annos fere quadraginta, nempe toto Almamoris tempore, gravissima persecutio instituta fuerit, tum adversus eos qui ex communi superstitione putidam illam farraginem, tanquam Verbum Dei è rerum creatarum numero eximi volebant: tum adversus alios qui Halin negabant esse creaturarum post Muhamedem præstantissimam. Reliqua ad illius Califatum pertinentia, quæ passim apud Muhamedanos Autores leguntur, ad Christianos nihil aut parùm pertinent: præter ea quæ à Makrizio referuntur, quasi sub Yuçabi Patriarchatu; quamvis Autores Christiani nihil de iisdem memoriæ prodiderint, aut ad posteriora tempora retulerint.

Scribit Makrizius anno Hegiræ 235°, nempe biennio vel triennio postquam Califatum adeptus est Mutewakelus, publicatum esse edictum illius nomine, quo jubebantur tam Judæi quàm Christiani, quos vocant *Clientes & tributarios*, vestes coloris survi induere, & zonis præcingi: tum etiam sellas jumentis, quibus veherentur, non alias imponere, quàm ligneas, & stapias ligneas: deferre etiam assumenta, seu fimbrias, diversi coloris in vestibus, ad mensuram digitorum quatuor: Mulieribus prohibebatur ne prodirent absque velo survi coloris: æquè prohibitus viris balteorum usus. Jussit etiam Califa Ecclesias recenter adificatas solo æquari, & ex earum fundis decimas exigi: super Christianorum domos affigi ligneas dæmonum imagines: vetuit ne ad ulla officia publica admitterentur: neve à Musulmanis literas doceri possent: ne crucem in Ecclesiis haberent: ne luminaria publicè prodeuntes accensa gestarent, ut in supplicationibus ex consuetudine fieri solebat: tandem, ut etiam erga mortuos sævitiam exerceret, sepulcra, quæ extabant, dirui præcepit. Anno 239°, J. C. 853°.

Notæ Christianismi imperatæ.

confirmata priori lege de vestitu, adjunctis etiam nonnullis, prohibuit ne Christiani equitarent, sed asinis tantum veherentur. Hæc ille, quæ, utpote accuratus rerum Ægyptiacarum scriptor, scire melius potuit; facta autem Motewakeli nomine ab Ægypti Præfectis credibile est: nam ea lex ab ejus successoribus sæpius renovata, tandem per omne Imperium Muhamedanum invaluit, critque de ea per sæpè dicendi locus.

CHAIL
Patr. LIII.

CHAIL, seu MICHAEL PATRIARCHA LIII.

AB istius Patriarchæ vita incipit 3^a pars, & Tomus secundus Historiæ Patriarcharum secundum codicem optimum Bibliothecæ Regiæ. Vocatur autem ille à Coptitis quidem in Catalogo Kircheriano Chail, & Chaial; à Makrizio & quibusdam aliis, Michael, quod idem est. Fuerat quondam scriba, seu, ut Græci vocant, Syncellus Yuçabi Patriarchæ, cum esset in ordine Diaconorum, multasque cum eo calamitates à barbaris præfectis sustinuerat. Postea petita ab eodem licentiâ recipiendi se ad Monasterium, Sacerdos ordinatus est, & paulò post factus Hegumenus, seu Abbas, Monasterii Joannis in Valle Habib. Erat autem in scripturis, & rerum Theologicarum scientiâ exercitatissimus. Igitur post Yuçabi obitum, votis omnium postulatus, ordinatus est Alexandriæ 24^a Athyr, cum sedes vacasset dies 30, ut scribit Elmacinus, & rectè; nam obitus alterius cum incidit in 23^m Paophi, qui est mensis immediatè præcedens, numerus ita convenit, ut electio præcesserit uno die ordinationem.

Statim ab Ægypti præfecto, & iis qui tributo exigendo prærant ita vexatus est, ut vasa sacra distrahere cogeretur: unde vehementer afflictus, accedente infirma corporis valetudine, continuis precibus Deum interpellare cœpit, ut se tot calamitatibus per celerem mortem subtraheret. Profectus ad Desertum sanctum, hoc est Monasteria Vallis Habib, ineunte Quadragesima juxta morem Patriarcharum; ibi celebrato Paschate, ægrotavit, obiitque 22^a Farmuthi, anno Martyrum 567, cum sedisset annum 1. menses 5. vel, ut habent alii codices, annos 2. menses 5. Sepultus est in Monasterii S. Macarii Ecclesia, primus, teste Elmacino, Patriarcha, qui ibidem sepultus fuerit: atque ita Makrizius. Chronicus Canon apud Abulbircat anno Martyrum 568^o mortem ejus assignat, & quidem rectius, si duos annos sedet; sed si unum &

PATRIARCHARUM ALEXANDRINORUM. 295

mensēs 5, in an. 567^{um} mors ejus incidit, nempe J. C 851^{um}. De eo præterea nihil memoriæ proditum est. Vixit sub Califa Mutewakelo.

COSMAS PATRIARCHA LIV.

COSMAS
Patr. LIV.

MORTUO Chaïle, Episcoporum & Populi consensu electus est Cosmas, Semnudâ oriundus, Diaconus Ecclesiæ S. Macarii : qui ordinatus est an. Martyrum 567^o, 14^a mensis Epiphi. Ita à decessu prædecessoris ejus, nempe 22^a Farmuthi, ad eam diem intercurrent mensēs integri duo, & dies 22 : quâ ratione vacavit sedes diebus 81, non numerato inaugurationis die, quem numerum dierum sedis vacantis refert Elmacinus, & ex eo Makrizius, qui tamen ex falsa aliorum supputatione annum Hegiræ 242^{um}, 1^o Patriarchatus Cosmæ alligat.

Elm. p. 152.

Eodem anno cùm ad festum S. Mennæ maxima hominum multitudo ex more confluxisset, accidit ut duo viri nequam cùm in Ecclesia rixarentur, unus alterum strangulaverit. Ea occasione Præfectus Alexandriæ Ahmed filius Dinar, Cosmam in vincula conjecit ; & variis tormentis cruciatum non priùs dimisit, quàm ab eo extorsisset omnia, quæ Christiani juxta consuetudinem ad Ecclesiam obtulerant, eleemosynarum nomine : tum vetuit ne Alexandriâ excederet. Interea duo Christiani Jacobitæ, unus Macarius filius Joseph, alter Abrahamus Severi, cùm primus in Divano Scribæ, alter in Officio Ærarii, coactoris Tributorum munus obtineret, effecerunt apud Ægypti Præfectum, ut Cosmas Cahiram vocaretur sub specie tributi persolvendi pro noviter adepta Patriarchali dignitate. Ita, cùm advenisset, habitatio ei assignata fuit ad urbis Orientalem partem in loco *Demura* dicto, ubi, præter Christianos, nemo habitabat. Postea duorum illorum favore, & aliorum Christianorum qui in Divano officia exercebant, res Ecclesiæ ex ejus voto compositiæ sunt.

Statim scripsit Synodicam ad Joannem Patriarcham Jacobitarum Antiochenum, de fidei concordia : & eam misit per Episcopos duos, Severum & Chaïlem, adjunctis Sacerdotibus, qui cum gaudio & honore ab Antiochenis suscepti sunt. Ejusdem Epistolæ magna pars refertur in Tractatu de fide Patrum.

Synodica ad
Antiochenos.
Elmac. p. 152.

Eo tempore missum est mandatum à Mutewakelo Califa, de quo dictum est superius ex Makrizio, qui illud perperam ad ulti-

ma Yuçabi Patriarchæ tempora retulit, quia scilicet deceptus parum accurata comparatione annorum Martyrum, cum annis æræ Muhamedanæ, quæ apud Elmacinum & alios Autores extat; eam persecutionem adnotavit in loco non suo. Eo Edicto prohibitum ait Autor noster, ne Christiani Jacobitæ, Melchitæ, aut Nestoriani, ipsi etiam Judæi, albis vestibus uterentur; iussum ut supra domos eorum tabellæ lignæ affigerentur; nempe cum figuris Dæmonum, ut Autores alii scribunt: ne publicum officium ullum tam in Aulico Ministerio, quàm in Divano exercerent, atque ut Ecclesiæ diruerentur. Ea persecutione factum, ut multi ambitionem & avaritiam anteponentes fidei, eam abnegaverint, Misit præterea in Ægyptum Abdel-Messiam quemdam, qui tributis colligendis præset, adjunctis mandatis, ut, quemadmodum Bagdadi factum fuerat, ita in tota Ægypto Christianos persequeretur. Falli in illius Præfecti missi extra ordinem nomine Autores nostros verisimile prorsus videtur: neque enim competit in hominem Muhamedanum, ut Abdel-Messias, hoc est servus Christi, appellatus fuerit. Tum quod adjiciunt eum Persicæ Religionis fuisse, quamvis Muhamedanam, & quidem usque ad superstitionem, præ se ferret, convenit Hanbassæ filio Isaaci, qui circa eadem tempora, nempe an. 238^o Hegiræ, Præfecturam Ægypti obtinuit à Mustansiro Motewakeli filio, vivo adhuc patre; sed qui illi Provinciam beneficiario jure obtinendam dederat cum aliis aliquot, ut apud Elmacinum videre licet, qui eam divisionem filiis à Motewakelo factam refert. Hunc autem Hanbassam fuisse Karegium, quod idem est ac Persicæ sectæ, testatur Ebnel-Verdi accuratus Ægyptiacarum rerum scriptor, quem alii sequuntur. Quia verò de Bagdadensi Christianorum persecutione nihil ferme apud Historicos legitur, pauca quædam ex Amro Mathæi filio, Nestoriano, quæ rem illustrent, in medium adducemus.

Persecutio
Bagdadensis.

Narrat ille an. Hegiræ 238^o, primo Seimentayæ, ubi Califa potissimum commorabatur, Ecclesias dirutas, & Monasteria vastata; aucta Christianorum tributa; vetitumque edicto ne ad aulica aut publica ulla officia admitterentur. Inde, atque etiam aliis ex urbibus, ejecti Sacerdotes & Diaconi: vetitum ne Liturgia celebraretur; ne Christiani equis veherentur, ne coloratam vestem induerent, ne absque nota, quam in brachiis amillarum loco deferrent, prodirent; ne in publicum ullus procederet die Veneris,

Veneris, qui est Muhamedanorum festivus; ne pueri literas Arabicas docerentur; ne denique psallentium voces audirentur. Destructa sunt vi illius edicti Monasteria plurima, atque inter alia S. Joannis & Cyriaci, ubi, ad festum Palmarum celebrandum magnus concursus erat: sepulcra solo aequata, & quorundam, qui sanctorum loco à Nestorianis colebantur, ossa in flumen projecta. Hæc à Motewakelo facta Bagdadi & Sermerayæ narrat Historicus Nestorianus, qui simul docet nos occasionem huic persecutioni dedisse suos, cum magna inter eos esset de eligendo Catholico controversia. Jam autem eò res pervenerat, ut ambitu potius & largitione favoreque aulicorum ad Ecclesiasticas dignitates eveherentur Nestoriani, quam liberis Episcoporum suffragiis. In aula porro Bagdadensi, jam ab Almanforis ætate, magna fuerat quorundam Medicorum gratia, qui plerumque Nestorianam sectam sequebantur, inter quos sub Motewakelo maxime floruerunt Bochtiechua, & Joannes filius Massotia seu Mesue, qui diversas partes sequebantur. Hinc magnæ calamitates, dum unusquisque calumnias in alium intenderet, accedente diversarum inter se Ecclesiarum bello. Nam Melchitæ, & Jacobitæ Nestorianos impugnabant: hi utrisque nocebant, quotiescumque se offerret occasio. Ipse Bochtiechua, cum Motewakelus ei coenam indixisset, tanto apparatu principem excepit, tanta opum ostentatione, ut ab eodem fortunis omnibus spoliatus fuerit: ita scribit Abulfaragius ex Autore Historiæ Medicorum: Ipsi Medici celebres illi non adeo religionis cultores fuerunt, quin sæpe in Episcoporum offensionem incurrerent. Unde Honain filius Isaac, qui eo vivebat tempore, à Catholico excommunicatus fuit, quod imaginem Christi conspuisset. Atque hæc sunt quæ ad Orientalis Ecclesiæ factam sub Motewakelo Bagdadi, Sermerayæ, & alibi passim, persecutionem spectabant.

*Abulfar. H. B.
Dyn. p. 171.*

Ille igitur novus Præfectus statim atque regionem ingressus est, cruces omnes ubique confringi jussit, nec eas in ipsis Ecclesiis suscepisse passus est: vetuit ne Christiani eas gestarent; ne in Ecclesiis orarent præterquam submissa voce; ne defunctorum exequiæ cum precibus & reliquis ritibus Ecclesiasticis celebrarentur; tandem ne campanæ pulsarentur. Paulò post prohibuit omnino ne Liturgiæ celebrarentur: atque ut consilium nefarium suum perficeret, specie summæ in sua religione pietatis, jussit ne in tota Ægypto, præsertim verò Cahiræ, vinum emeretur aut

*Vinum fa-
ctum ad Li-
turgiam.*

venderetur : adeoque accuratè invigilavit, ut dolia effunderentur, neque importaretur, ut defecerit prorsus : atque ita factum est, ut Christiani non haberent unde Liturgiam celebrarent. In tali angustia ne penitus sacrificio privarentur, palmites vitis, aquâ maceratos, exprimebant, atque eo succo ad Liturgiæ celebrationem utebantur.

Observatio
de hoc vino.

Quod in summa necessitate factum est à Coptitis, non debet, ut à quibusdam Itinerariorum scriptoribus, aut aliis qui de religionibus scripserunt, factum est, ita accipi, quasi indifferenter illi usurpare soliti fuerint aut vinum, aut liquores alios quoscumque, si vinum desit, ut ex abnormis Protestantium Theologiæ regulis fieri possit Beza existimavit. Nam negant Theologi & Canonistæ Orientales offerri Eucharistiam posse, etiam in necessitate, ex vino ejusmodi per macerationem expresso : ita Michael, Episcopus Melichæ, Ægyptius, in Responsionibus Juridicis. Permittunt tamen aliquando recentiores alii, & id facturi apud Æthiopes, non Europæi modò, sed Asiatici quoque & Ægyptii Autores testantur. Non est verò existimandum ex sicco ligno, aquâ macerato, expressum liquorem ad calicis oblationem adhibitum. Verùm cum vulgare sit illis in regionibus pensiles uvas cum ipsis palmitibus servare diutius, eas in aquam immittunt, tum iterum exficari sinunt ; mox torculari premunt, & ita fit vinum illud secundarium, quo in summa necessitate ad altaris ministerium usi sunt olim & utuntur etiamnum. An verò rectè faciant, nec nostra interest, nec est hujus loci disquirere ; cum de illa disciplina dictum sit in Notis ad Coptitarum Liturgiam.

Idem Præfectus, sicut in Oriente factum erat, larvas dæmonum porcis insidentium, & similia terroculamenta in tabulis ligneis repræsentata domibus Christianorum & Judæorum superponi jussit : vetuitque ne albis vestibus uterentur, ne equis veherentur ; omnesque, qui in Aula aut Divano ministeria exercebant, expulit : tandem Christianos tot calamitatibus affixit, ut plurimi fidem abnegaverint. Interea non solum à Patriarcha, sed etiam à Monachis & Anachoretis continuè ad Deum preces fiebant, ut plebem suam à tantis malis eriperet.

Miraculum
in imagine.

Anno Martyrum 569, J.C. 853^o, venit alius cum potestate simili adhuc Christianis iniquior, à quo insueta mala perpeffi sunt. Eo tempore imago Jesu Christi in Ecclesia Severi, latere aperto sanguinem emisit, quo cum infirmi inuncti essent, sanati sunt. Imagines in

Monasterio S. Macarii, & in multis locis lacrymas effuderunt : signum nempe fuit futuræ calamitatis ; nam eo tempore Græci in Ægyptum exscensione facta Damietam & ipsam Cahiram populati sunt, ignemque iniecerunt, abducta captivorum maxima multitudine, magnâque prædâ onusti recesserunt. Factum id an. Hegiræ 238, J. C. 852, secundum Abulfaragium & alios. Ea occasione Præfectus, cum classem adversus eos comparat, iterum Christianos acerbius vexare cœpit : nam tributum duobus aureis auxit : præterea plurimos ad nautica ministeria inhabiles, coegit naves conscendere absque ulla mercede, vix ipsis cibaria subministrans : alios allegit in milites, arma suo sumtu unumquemque asserre jubens.

Hist. Dynast.
p. 170.

Missus est in tyranni illius locum Yezid filius Abdallæ, sub quo Christiani paulum recreati sunt. Eo quoque Ægyptum administrante, Morewakelus urbes à Græcis direptas restaurari, & muris novis cingere aggressus est : Damietam scilicet, Tanis, Aschmoun, Taniat, Rechidum, Nesteruham, & Barles, quam Paralloou Ægyptii vocant, & quasdam alias. Ita etiam Elmacinus. Ducta quoque fossa ingens, ut aqua Alexandriam usque perveniret, navesque ad urbem commecarent, & in ea navale tutum haberent qua ratione mercatores undique confluerunt, & per maritima commercia urbs abundare & reflorescere cœpit.

P. 152.

Patriarcha Demiræ sedem fixit, & in ea urbe per aliquot annos commoratus est summa tranquillitate, rerum, quæ ad Ecclesiam spectabant, curam gerentibus Macario & Abrahamo, inter Alexandrinos primariis, quorum operâ habebat ipse quæcumque necessaria sibi & suis erant : tum eleemosynæ in pauperes erogabantur, omnia etiam quæ ad Ecclesiæ cultum & ministerium pertinebant suppeditabantur. Nec modò Patriarchalia negotia, sed aliquot Episcoporum administrabant, summâ fide & diligentia ; quod onus, Macario extincto, Abrahamus aliquamdiu solus sustinuit, Monasteriorum quoque & aliarum Ecclesiarum curam habens.

Paulò ante morbum, qui supremus illi fuit, recepit se in locum quemdam Ægypti inferioris in Diocesi Saca, dictum *Denucher*, ubi ædificavit Ecclesiam sub titulo S. Ptolemæi Martyris : quam cum perfecisset, obiit an. 21^o Athyr, cum sedisset annos 9, menses 5 : sepultusque est in eadem Ecclesia an. 575 SS. Martyrum, J. C. 859^o : atque ita Hegiræ 245^o, biennio ante Mo-

tewakeli mortem. Elmacinus, Chronicus Canon, Abulbircat, & Makrizius 7. annos, menses 5. numerant; & rectius: nam ab anno ordinationis, qui fuit an. 567^m, undecimo mense Epiphi labente, ad an. 575^m, non intercipiuntur nisi septem anni & menses aliquot.

Eutychii de
ex persecutio-
ne testimo-
nium.

Eutych. l. 2.
443.

Persecutionis sub Motewakelo meminit Eutychius Alexandrinus, qui ait: *Idem Baethishua* (ita scribere solet Pocockius; atque is est quem Boethichua rectius vocamus) *medico iratus, in omnes provincias scripsit ut compellerentur Christiani zonaria induere, & vestibus suis pannorum segmenta assuere, à parte anteriori alterum, alterum à posteriori: atque equis vehi prohiberentur, & in sellis suis haberent funes, ac stapedibus ligneis uterentur, adsumque ipsorum portis appingerent Diabolorum imagines, vel, secundum aliud exemplar, porcorum & simiorum.* Iræ erga Archiatrum causam retulimus ex Abulfaragio, nempe invidiam ex nimia divitiarum ostentatione: major adhuc, quod & ipse Boethichua, & Honain, Tifuri & alii Medici, qui apud Sultanum plurimum poterant, & omnes Ecclesias, & suam ipsorum conturbarent; suisque Antistitibus molesti, Jacobitis & Melchitis odiosissimi forent.

Referunt quoque ad ea Motewakeli tempora Eutychius, Elmacinus & Makrizius, initia turbarum circa cultum sacrarum Imaginum: quasi Theophilus Imperator eas ex Ecclesiis auferri iussit, postquam didicisset esse in quadam Ecclesia Sacerdotem, qui ficto miraculo plebi illuderet, dum, immisso in imaginem Virginis plumbeo tubulo, lac ex uberibus ejus stillare faciebat. Omnes porro Orientales, non modò cultum earum non exhorrescant, aut idololatriæ proximum existimant, ut potiùs in illis colendis aliquando modum excedant. Exempla multa nobis suppediat eorum Historia: & hoc ipso, de quo scribimus, Califa regnante, Honain filius Isaae, Medicus celeberrimus & famosus multorum Hippocratis & Aristotelis librorum interpres, à Catholico, supremo Nestorianorum Antistite, excommunicatus est, zonaque discissa: (erat hæc Christianismi nota) eò quòd imaginem Christi conspuisset, ut citato loco refert Abulfaragius.

Hist. Dynast.
p. 173.

SANUTIUS, seu CHENOUDA PATR. LV.

VA R I E hoc nomen apud Ægyptios scribi solet ; in Copticis quidem libris, ut in Catalogo Kircheriano, *Συνόδος*, Senodius : alii aliter : Arabicè vulgò scribunt *Chenuda*.

Ejus electio.

Cùm obiisset Cosmas ejus prædecessor, Episcopi & plebs Orthodoxa, hoc est Jacobitarum Laicorum primores, Alexandriam convenerunt de successore eligendo consilium habituri mense Cohiac, proximo scilicet post obitum alterius. Cùm esset verò magna inter Episcopos, Clerum Alexandrinum, & Laicos sententiarum diversitas, soluto consensu plerique Misram venerunt, ubi iterum frustra consultatum est, multis Sacerdotibus & Monachis nominatis, auditisque testibus eorum innocentiae, castimoniae, doctrinaeque, & virtutum, quibus Patriarcham ornatum esse oporteret. Venerat tunc in urbem Sanutius Monachus, Oeconomus Ecclesiae S. Macarii, de quo superius dictum est, vir pietate & curâ Ecclesiarum, quas ornaverât aut aedificaverat, commendatus : & itineris causa alia non erat, quàm ut cum Abrahamo transigeret circa pecuniam fisco debitam, Ecclesiae nomine, cujus res administrabat. Finito negotio, statim in desertum redire festinavit, 27^a mensis Kohiac, ut in Ecclesia sua festum Nativitatis Dominicae celebraret, quæ in Coptico Calendario ejusdem mensis 29^a celebratur : ea porro dies respondet 25^a Decembris. Vix abierat, cùm votis omnium postulatus est tanquam præ cæteris Patriarchatûs honore dignus : missi, qui cum Misram adducerent ; & advenit in Ecclesiam S. Sergii eo ipso tempore, quo, Anaphora incipiente, canebatur, *Dignum & justum est* : quæ verba, cùm ob neutrius generis differentiam, quæ apud Arabes & Coptas nulla est, non minùs ad Præfationis Liturgicae orationem, quàm ad Electi dignitatem commendandam pertinere viderentur, cum magnis acclamationibus sæpius repetita sunt : dignum esse eum dicentes, quem elegerat Dominus. Cùm se indignum, & verbis & lacrymis testaretur, vincit est ferreis compedibus ne effugeret, & Alexandriam deductus comitantibus senioribus Monachis ex Valle Habib. Illuc pervenit 11^a mensis Tybi, quo die post siccitatem copiosus imber decidit, quod fuisse omnis loco acceptum est. Ordinatus est 13^e ejusdem mensis anno 575^o Martyrum, J. C. 859^o.

Pp iij

Patr. LV.
Nomen Je-
su Actis & li-
teris præmis-
sum.

Inter alia quibus Sanutii pietatem commendant, notatur ejus consuetudo, quòd nomen Domini Jesu Christi semper in ore haberet, primusque instituerit, ut initio literarum nomen ejus præmitteretur; quod Episcopi, imò Christiani omnes illis sub-
jecti, secuti sunt. Et sanè in omnibus libris, aut Epistolis, quæ ad nos pervenerunt, & in Bibliothecis conservantur, semper initio nomen J. C. initialibus literis appingitur; & quidem apud Coptitas hunc in modum $\overline{\text{I}}\overline{\text{C}}.$ $\overline{\text{x}}\overline{\text{C}}.$ $\overline{\text{r}}\overline{\text{C}}.$ $\overline{\text{e}}\overline{\text{C}}.$ nam ita vulgò pro $\overline{\text{e}}\overline{\text{t}}.$ quamvis ea quoque pia observatio apud alias omnes Ecclesias cu-
stodiatur.

Simoniam
impugnata.

Inter primas Episcopatus sui curas nullam potiore habuit, quàm ut, missis quacumque ad Episcopos & Sacerdotes plebemque literis, omnes vehementer dehortaretur à simonia, quæ jam invalefcebat, commemorans apud ipsos pœnam Simonis Magi, Ananiam & Sapphiræ. Simoniam, seu peccatum quod committitur, dum aliquid pro ordinatione, dignitate Ecclesiastica, aut alia ejusmodi promotione datur vel accipitur, vocant Arabes Christiani *Chartoma*. Ea vox detorta est à Græca *χρηστία* quæ ordinationem sacramentalem cum impositione manuum significat, & pro ea etiam usurpatur in vetustis Canonum Syris & Arabicis versionibus. Quia verò peccatum idem totam *χρηστία* sanctitatem pessumdabat, factum est ut illa vox, pro ipsa malè data vel suscepta ordinatione usurparetur. Eam vocem intactam reliquit Erpenius interpres Elmacini, adeo ut sæpè de Patriarchis dixerit, quòd Sartoniam acceperint, obscurius quàm ut ab illis, qui Latine tantum hunc Autorem legunt, possit intelligi, cum scribere debuisset eos pecunias pro ordinatione accepisse.

Synodice
ad Antioche-
nos.

Scripsit Sanutius ex more Epistolam Synodicam de unitate fidei ad Jacobitarum Patriarcham Antiochenum, ad renovandam utriusque Ecclesiæ communionem: ea missa per Episcopos duos, Paulum & Joannem.

Quartade-
cimani in
Marcoci le.

Erant in vico Marcotidis quodam hæretici infames Quartadecimani, qui negabant veritatem Passionis Dominicæ, aut Christum eam in corpore suo suscepisse, verum eam sustinuisse tanquam somno sopitum affirmabant. Illi, cum ad eos fama Sanutii pervenisset, ad eum venerunt, petieruntque ut formulam fidei sibi præscriberet: quod cum fecisset, ejurarunt hæreses omnes suas & anathematizaverunt Gaianum, Origenem, Apollinarium, Julianumque Halicarnassum, omnesque perversas illorum sententias,

Tum dedit illis sigillum baptismatis sancti : Ecclesiam illis consecravit, & Sacerdotes ordinavit, qui illis Sacramenta administrarent. Veterum Quartadecimanorum reliquias fuisse illos hæreticos oportuit, quamvis de ea secta vix quidquam repeiatur illo, de quo scribimus, sæculo. Imò non tam ex illa secta fuisse, quæ tot errores non agnoscebat, sed ex Phantasiatarum, aut aliorum quorundam residuis, qui ex Eutychiana secta cum Julianistis, Gaianistis, Barfanufianis, & aliis prodierunt : atque post Muhamedanorum tempora Sacerdotibus & Episcopis destituti, multos insuper errores induxerunt. Quod autem hoc loco Autores hujus Historiæ scribunt, datum illis à Sanctio sigillum baptismatis, non de Baptismo, sed de Confirmationis Sacramento intelligendum esse multa suadent. Nam quamvis frequentius *Myrum* appellatur, voce Græca, quam, ut alias innumeras, usus Ecclesiasticus retinuit, ita quoque *Σεραγίε* appellatur ; quæ vox respondet Arabicæ à nostris Autoribus usurpatæ. Ut autem censeamus Quartadecimanos & Apollinaristas, quales erant hæretici illi, baptismo iterato receptos non fuisse demonstrat Canon 7^{us} Concilii Oecumenici Constantinopolitani primi, quem, ut nos & Græci, habent Orientales in Collectionibus suis. Ait autem : τὸς πα-
σαρισκαμδικηπῆς ἔχουι πτηχολῆς, κ' ἀπολλιναιεῖς διχομῶ-
διδοῦντας λιβίλλους, & ἀνιδιμαπίζοντες πᾶσαν αἵρεσιν, μὴ φρονεῖν ὡς
φροεῖ ἡ ἀγία τῆ Θεοῦ καθολικὴ, κ' ἀποστολικὴ ἐκκλησία, κ' σφεραγί-
ζομένης, ἥτοι χειρομένης τῷ ἀγίῳ μύρῳ... κ' σφεραγίζοντες αὐτοὺς λίζο-
μιν σφεραγίᾳ δωρεῆς πνεύματος ἀγίου. *Quartadecimanos, & Apol-
linaristas suscipimus, cum dederunt libellos, & anathematizant
omnem heresin non eadem sentientem ac sancta Dei Catholica
Ecclesia : signatos verò, seu unctos, sancto Chrismate... Eos
virò obsignantes dicimus : signaculum, seu sigillum, domi Spi-
ritus Sancti.* Itaque secundum hanc disciplinam neque ut Quarta-
decimani, neque ut Apollinaristæ, multò minùs ut Gaianistæ &
Julianistæ, baptisari debebant, quasi baptismum apud eos nullum
fuisset. Accedit alia ex eadem Jacobitarum Ecclesia autoritas Pœ-
nitentialis scilicet libri, cujus Autor est Dionysius Barsalibi, Epi-
scopus Amidæ, qui Julianistas, quo nomine omnes Phantasiastæ
comprehenduntur, per solam pœnitentiam recipi jubet, eisquæ
reconciliandis, non minùs quàm Calchedonenfibus, hoc est Or-
thodoxis, eamdem Orationem præscribit. Unde satis apparet
quòd, si aliquando alia fuit Orientalium disciplina, (fuerunt

Confirmatio hæreticis
conversis da-
ta.

Conc. Cp. 1.
c. 7.

Patr. LV.

enim qui Melchitas & Francos, seu Latinos, cum ad suam Jacobiticam Ecclesiam venirent, baptisari vellent) factum id est posterius, & per impiam quorundam hominum temeritatem & ignorantiam, qui contra leges Ecclesiasticas suis ipsorum libris stabilitas, tale baptismi iterati sacrilegium invexerunt. Origo illius novitatis non minus absurda est: nam cum in fragmentis, quæ extant Arabicè & Syriacè Conciliorum Africanorum, Carthagenensis sub Cypriano de rebaptisandis Hæreticis particulas reperissent, moti autoritate tanti nominis, ignarique prorsus historiæ Ecclesiasticæ, baptismum Hæreticorum nullum esse hujus Concilii testimonio probari existimaverunt. Eam tamen opinionem refellit Severus Antiochenus iis verbis quæ reperiuntur in Syrorum Nomocanone; ubi etiam asserit, baptismum Julianistarum suscipi, sicut & Calchedogensium.

Ejus ædificationes.

Alexandriam reversus visitare cœpit Ecclesias, & loca in quibus ædificatæ olim fuerant, sed quas restaurare non licuerat. Cella Patriarchalis, seu Patriarchium, eo in loco erat, quod aiunt Græcè vocatum fuisse *πατριάρχια* ubi pauperibus hospitium erat. Cum verò aqua nulla ibi esset nisi falsa & amara, neque dulcem haberent nisi magno labore advectam; Patriarcha ut publicæ necessitati obviam iret, fossam duxit ab ea quam Motewakelus duci jusserrat, ut Alexandriam usque navibus veniretur: atque ita magna aquæ salubris copia cum in locum deducta est. Aquam præterea deduxit per canales subterraneos in domos Alexandriæ, ut haberet unusquisque in puteis & cisternis suis refrigeratam & puram. De canalibus illis & fornicibus subterraneis multa leguntur apud Arabes, & recentiores Autores; quæ opera, quandoquidem ante Muhamedanorum tempora facta sunt, alii ad Alexandrum, urbis conditorem, alii ad aliquos ex ejus successoribus referunt: ad quos potius, aut alios veteres opibus potentissimos, hoc opus sumtus infiniti pertinere videtur, quàm ad Copticarum Patriarcham sub durissima Arabum servitute quotidianis multis, & depredationibus exhaustum. Sanè sunt Historici, qui hæc opera ad Motevakelum referunt. Ædificavit etiam suo sumtu puteum in vi-co quodam Mareotidis, rogatus ab incolis, eò quod milliari & amplius distabant ab aquis; unde magnum ipsis commodum ex dulcis aquæ abundantia.

Ep. Paschalis de fide Jacobitica,

Attentus quoque Sanutius spirituali gregi suo, Paschales seu Hortalicas litteras magnâ curâ scribebat, Inter alias laudant, quas

quas scripsit anno Patriarchatus sui 20. in quibus *οἰκονομία*, seu Incarnationem Verbi, ex eorum sententia accuratissime explicavit; ita autem ejus verba referunt. Credimus etiam quod in fine temporis; Deus, cum dignatus est salvare genus nostrum à servitute, misit Filium suum unigenitum in mundum, qui incarnatus est, similis nobis in omnibus factus, ex Spiritu sancto & ex Maria Virgine, assumpto corpore perfecto, absque peccato: corpore, inquam, animâ prædito, modo incomprehensibili; fecitque corpus illud unum secum, seu unum illud sibi, absque alteratione, commixtione aut divisi. ne: ita tamen ut una natura fuerit, suppositum unum, persona una. Passus est in corpore propter nos: mortuus est & surrexit à mortuis secundum Scripturas; & ascendit in cælum, seditque ad dexteram Patris. Cum verò dicimus, Deum passum esse pro nobis & mortuum, secundum fidem intelligimus, cum pro nobis passum esse in corpore, cum ipse sit impassibilis, Deusque ille unus; quemadmodum dixerunt nos Patres Ecclesie sanctæ. Quicumque verò per blasphemiam eum dividens, asseruerit Deum Verbum, neque passioni neque morti esse obnoxium; sed hominem ipsum esse qui passus & mortuus fuerit; atque ita divideret illum in duo, Deum Verbum ex una parte, & hominem ex altera: ita ut in duabus naturis aut duabus personis constare eum existimet, quarum utraque operetur, quæ naturæ suæ consentanea sunt: ejusmodi homines ita introducere moluntur fidem impuram Nestorii, Conciliique præfati & obsecuti Chalcedonensis, contra Fidem Orthodoxam. Illos anathematizat Ecclesia universalis Apostolica; illos fugimus & execramur, anathematizamusque eos qui consentiunt quod Deus Verbum post unionem incomprehensibilem duas naturas habeat. Nos verò rectè confitemur, quod Deus Verbum suscepit in se voluntariè passionem in corpore: neque enim dubium est, unionem omnino & in omnibus unam esse. Quippe naturæ, quæ primum unitæ sunt, nulla omnino ratione separantur, Verbo ita dispensante, cum sint inseparabiles, etiam in ipso passionis tempore, quam in corpore suo suscepit. Alioquin incideremus in errorem similem Photini & Sabellii, qui impiè asseruerunt divinitatem recessisse, humanitatem verò cruci affixam fuisse: quos, & sententias eorum impias, anathematizamus, eorum *αὐτοματῶν* fugientes. Hæ litteræ, cum ubique lectæ fuissent, magnâ reverentiâ auditæ sunt, cum agnoscerent omnes, ut Autor existimat, in ejus verbis

Querela
contra expo-
sitam ab eo fi-
dem.

puram S. Cyrilli aliorumque sanctorum Patrum doctrinam.

Fuerunt tamen in Thebaïde, præsertim in pago quodam, *Belina* dicto, non pauci, qui apertè contradicerent, eumque depositione dignum dicerent; quòd divinæ naturæ mortem adscriberet. Quæ cum ad Sanutium perlata essent, scriptis aliis literis eos, & quicumque eorum partes sequebantur, ad suam sententiam reduxit: unde veniam ab eo postulaverunt, per Episcopos ex Thebaïde ad eum missos. Illi in solennitate Paschatis coram tota Ecclesia in Monasterio S. Macarii, factâ publicè Metanceâ, seu prostratione, errorem suum confessi sunt, eumque abjuraverunt. Cum verò adessent Episcopi Semnuda, & Moniet Tama, qui in eadem, ac Sahiditæ, sententia erant, nec ab ea resipuisse, subitanea & infelici morte perierunt Panopoli, priusquam ad Dioceses suas redirent, secundum prædictionem Sanutii, qui de eorum perversa fide monitus fuerat, à quodam qui eos colloquentes, doctrinamque Patriarchæ quasi novam & peregrinam deridentes, audierat. Miracula enim huic homini non deesse vulerunt, sicut ejus prædecessoribus, Autores Historiæ, qui tamen hoc loco meminisse debuerant, illum, etsi signa talia edidisset ut montes transferret, graviter tamen peccasse contra fidem & Ecclesiasticam disciplinam, dum Episcopos accusatos ab idoneo teste, quòd adversus dogmata, quæ Jacobitis Orthodoxa judicantur, apertè declamarent, intactos ad sedes suas reverti pateretur, & ad preces converteretur, ut à Deo miracula postularet, quibus vindicaretur Episcoporum impietas, quam ipse depositione aut poenis aliis Canonicis coercere debuerat.

Miraculis annuerant, quòd eo tempore filii Præfecti, quem Eleazarum nominant, & cujus nomen variè omnino scribitur, à quo Yuçabus, sive Josephus, Patriarcha multa passus fuerat, in Ægyptum venerunt, cum magna pecunia. Eam patris mandato, quod antequam è vivis excederet illis dederat, Patriarchæ, aut ejus successori, restituere jubebantur. Is autem erat qui, cum vasa Ecclesiæ auferri jussisset, calicemque coram se confringi, sanguinem ex eo profluentem viderat. Quo miraculo & conscientia pressus filius imperaverat, ut restitutus, quæ per vim Ecclesiæ raperat, bonis damnum compensarent, veniamque à successore Yuçabi postularent. Erat ille in urbe Saca, cum illi ex Chorasana venerunt: eos benignè excepit, offensam remisit, sed pecunias accipere recusavit.

Circa ea tempora obiit Mutewakelus, scelere Mostansiri filii sublati, cujus obitus cum, ut superius notatum est, assignetur ab Historicis Muhamedanis an. Heg. 247^o, qui est J. C. 861^m; rectè circa 2^{um} Patriarchæ hujus annum mutatio Præfectorum ascribitur; demonstraturque simul error Elmacini & aliorum, qui annos Martyrum parum accuratè cum Arabicis composuerunt. Ait Autor Mostansirum, statim atque Califatum obtinuit, omnes Præfectos Provinciarum, qui à patre ejus missi fuerant, in ordinem redegisse, illisque successores designasse. Verùm hæc aliter accipienda sunt: nam cum sexto mense Mostansirus perierit, neque Præfectos novos in Ægyptum misisset; factum id fuit, quia Ægyptum & alias Provincias beneficiario jure à patre possidendas acceperat; atque ita, qui ejus nomine Provinciam administrarent, ab eo designabantur. Amotus quippe fuit Hanbassa, is de quo dictum est, anno Hegiræ 242^o, quinquennio ante Mutewakeli mortem: diciturque fuisse Arabum ultimus, qui Orationem in Meschita solenniter ex Ambone peragendæ, nomine Califæ, auctoritatem habuerit. Yezid filius Abdalla filii Dinar, ejus successor, in dignitate à Mostansiro confirmatus, cum toto illius Califatûs tempore conservavit. Ita Ebnwerdi, Makrizius, & alii rerum Ægyptiacarum Scriptores. Is verò, de quo loquitur Historia Patriarchalis, vocatur Ahmed filius Muhamed, vir improbus, & sævitia omnes alios longè superans. Statim quippe duplicavit tributa, aut etiam triplicavit: Monachos censeri novumque ab illis vestigal exigi præcepit, ex herba, fructibus arborum, palmæ. Tum Patriarcham conquiri jussit, qui anxius, & quid consilii caperet nescius (verebatur enim ne se absente Monasteria & Ecclesiæ detrimenti quidquam acciperent): tandem fugiendi capto consilio, errare per loca deserta, & remotiora Monasteria cœpit, modò pedibus cum uno suo discipulo iter faciens, modò navigans. Præfectus, Oeconomus Ecclesiarum comprehendendi, earumque suppellestem omnem, bona quoque Episcoporum abripi jussit, & ad Divanum deportari, Ecclesias Misræ claudi; adeo ut Christiani ubi Liturgiam celebrarent, locum non haberent, præterquam in unica Ecclesia. Patriarcha mensibus sex, hiemeque sæpè locum mutare coactus, maximas calamitates perpeffus est. Tandem cum apud se constitisset offerre seipsum Præfecto, si fortè suo periculo Ecclesias liberaret, profectus secretò per avia itinera Cahiram pervenit, ubi apud Christianum latuit. Inde

Nova Ægyptiorum Christianorum persecutio.

scripsit ad Præfectum securitatem petens, quam etsi non obtinisset, verum acerbas & minaces literas retulisset, noctu tamen fiducia in Deum plenus, ad ejus januam adstitit. In Divanum introductus est cum Menna discipulo & secretario suo. Eo die blandè illum allocutus Præfectus dimisit. Triduo elapso, jussit ut pro Ecclesia sua quotannis duo aureorum millia tributi nomine solveret: Monasteriis duo millia & trecenta imperavit, coegitque ut duorum annorum tributum repræsentaret: quòd magnæ Ecclesiarum calamitatis causa fuit. Factum id anno Patriarchatus 3º, Martyrum 598º, J. C. 882º. Consuetudo erat ut Misræ & vicinæ regionis Christiani duo circiter aureorum millia veltigalis titulo solverent: jam verò sex millia ab illis exigebantur, adeo ut per capita drachmas quinquaginta fisco penderent. Ea occasione multi ad summas angustias redacti, fidem abnegaverunt. Scripsit ad Episcopos, ut quo in statu suæ & Ecclesiæ res essent cognoscerent, simulque eos consolaretur, & mutuam ab illis consolationem ex peteret. Venerunt Misram, collectâque, quantam potuerunt, pecuniâ, eam tamen, quæ Patriarchæ imperata fuerat, conficere nequiverunt.

Historia de
Patrum scri-
ptis combu-
stis.

Subjungit Autor eodem tempore significatum esse Patriarchæ quòd in Sahide, sive Ægypto superiori, multi à fide Jacobitica declinarent, & in varios errores incidissent, seducti à sene quodam perverso. Illuc igitur, periculis & molestiis longi itineris contemti, profectus, ad eos congregatos verba fecit, multosque ad suam sententiam reduxit, prolatis testimoniis, ex Cyrilli aliorumque Patrum operibus. Cùm verò Cyrilli autoritate senex ille premeretur, temerè in publico conventu dixit: Quid nobis cum Cyrillo. Ea propter Sanutius illum excommunicavit, simulque cum sectatoribus Ecclesiâ ejecit. Aiunt senem illum combussisse scripta SS. Patrum multa quæ errori ejus adversabantur, præsertim duodecim Cyrilli Capitula, ut quosdam Epiphani & aliorum Patrum tractatus. Quid significant Jacobitæ hæc historiâ suâ, haud facile assequi possumus: neque enim veram esse oportet, qualis describitur, nisi nova quædam hæresis orta intelligatur, quòd tamen non exprimunt. Sed si ejusmodi fuisset hæresis, quæ Christianæ fidei fundamenta convelleret, ut illa Abrahami, de qua superius, aut Quartadecimanorum, vel eorum tandem, de quibus supra dictum est, Phantasiarum, non erat cur id à Scriptoribus tacetur. Existimandum igitur sermonem hunc satis obscurum spe-

stare ad aliquam cum Melchitis seu Orthodoxis controversiam, qui, quamvis in Thebaide paucissimi essent, Jacobitis comparati, qui à schismatum initiis hæresin suam per Monasteria & urbes disseminaverant; erant tamen inter eos qui Jacobitas aggredierentur, eorumque errores refellerent. Fieri igitur potuit, ut eâ causâ Sanutius in Sahidem profectus sit, nempe cum homine illo disputaturus. Eum verò, qualiscumque fuerit, Melchitam non dubitamus fuisse: nam Jacobitis solenne est, ut Cyrillum quasi Melchitis refellendis opportunum scriptorem laudent magnopere, suisque persuadeant, non minori invidia apud Calchedonenses, quàm apud Nestorianos contemni illum sanctissimum doctorem. Hinc occasionem habuit non minùs frequens calumnia, quasi Cyrilli scripta à Melchitis corrupta sint aut abolita, cujus specimen in hac ipsa narrationeprehenditur.

Diaconi insidias qui oblatâ pecuniâ postulaverat ut se Episcopum ordinaret, repulsusque insignem adversùs eum fraudem comparaverat, nempe ut syngrapham à quodam Monacho Syro, quem habitu Patriarchali ornaverat, fingi curaret, quâ se debitorem grandis pecuniæ confiteretur, adhibitis Muhamedanis testibus: alterius ex eadem religione hominis monitu evasit; & impostori veniam dedit.

Eo tempore mortuus est Mustansirus, Mutewakeli filius, anno scilicet Hegiræ 248°, cùm sex tantùm mensibus imperium patricidio adquisitum tenuisset. Successit ei Mostaien, ejus frater patruelis, qui anno 252° depositus est & occisus, Califatu in Mutazzum, Motewakeli filium, translato. Anno verò 255°, J. C. 868°, depositus est Mutazzus, & paulò post in carcere vitam finit veneno aut inediâ; fuitque 14^{us} Califa ex Abbassidarum Stemmata: mox inauguratus Mehtedi, filius Wathix, filii Mutasim. Sub istis principibus magna in Ægypto mutatio rerum facta est, de qua dicetur inferiùs. Narrat Autor durasse bella inter illos principes civilia usque ad annum, quo hanc historiam scribere aggressus est, Martyrum 582^{um}, Hegiræ 252^{um}, qui incidit in J. C. an. 866^{um}, ineuntem à 21^a Januarii; quem calculum, ut accuratum, observare oportuit, quia omnes ferme annorum Arabicorum cum Ægyptiis compositiones, quæ huc usque occurrunt, falsæ deprehenduntur. His bellis interrupta sunt commercia inter Ægyptum & Orientem; cùmque Præfectus eventum expectaret, ut victori se addiceret, negociatores commereare prohibuit:

Califarum
successio.

nec segniùs colligendis tributis intentus, ingenti calamitate populos, præsertim verò Christianos oppressit. Victor Motazzus in Ægypto proclamatus est, publicâ omnium lætitiâ, quòd ista victoriâ finem bello factura videbatur, tum etiam prædationibus quas in Thebaidem effusi Arabes, nemine obistente agere cøperant. Nomades eos fuisse, scribit Autor historiæ, qui in montibus & desertis habitabant, ex ea scilicet gente, quam nunc mutato nomine *Turcomanos* vocant, qui per desertum in Ægyptum penetrantes, tam Palæstinam quàm Ægyptum, huc usque latrocinii infestant. Magnas illi in Sahide strages fecerunt; monasteriaque multa vastaverunt, atque inter alia Monasterium Sanutii seu Chenudæ; Kalmon prope Fium: S. Pacomii circa Taka, prope locum dictum Birhowas: castella multa incenderunt, magnam cædem monachorum & sanctimonialium fecerunt, virginibus sacris vitium obtulerunt.

Diplomata
Christianis
tuendis con-
cessa.

Abraham & Severus, viri inter Christianos primarii, ut tot calamitatibus, si fieri posset, finem invenirent: statuerunt ad aulam Sultani proficisci; quod consilium Sanutio significaverunt. Ille eos plurimum hortatus, benedictionemque apprecatus per literas, eos dimisit. Ipsi per amicos Christianos qui erant in aulico ministerio admissi, sigillum obtinuerunt, seu Diploma Imperatorium, quo omnia quæ crudeliter, & contra privilegia Califarum adversus Christianos commissa erant, irrita declarabantur. Diploma illud concessisse aiunt Mustansirum, nihilque defuisse præter subscriptionem; sed cùm mortuus esset, ad Mustaienum ejus fratrem, vel potius agnatum, accesserunt Abraham & Severus, obtinuerantque, ut idem Divani sententiâ confirmatum, ab Imperatore subscriberetur. Illius mandati summa fuit, ut Christianis restituerentur Ecclesiæ, Monasteria, vasa, ornamenta, terræ, bona & quæcumque per vim ab ipsis ablata erant, utque suis legibus viverent. Videtur autem auctor hallucinatus circa Califæ nomen: neque enim sub Mostansiro qui sex tantum mensibus imperavit, fieri hæc potuerunt: ut Abrahamus Sernienrayam, & Bagdadum proficisceretur, & Diploma ab eo Principe obtineret, qui tam diu persecutionis Autor extiterat.

Rebus ita compositis acceptoque Diplomate, missa sunt ejus exempla per totam Ægyptum, cøperuntque Christiani restituere in pristinum statum Ecclesias & Monasteria: Monachi qui Arabum manus effugerant, ad ea undique confluxere. Misit quoque Sanutius

ad Episcopos literas consolatorias, cum exemplo Diplomatis, atque ita à Farma usque ad Assouan omnia Christiano cultui dicata loca, reparari cœperunt.

Sequuntur quædam satis obscura, quæque explicari parum interest, nec omitti tamen debent. *Erant*, inquit Autor, *nonnulli qui Pascha eo anno quo Christus crucifixus est incidisse dicebant in diem 26^{um} Farauti*, qui mensis partim Martio, partim Aprili respondet. *Docuit autem eos Sanutius Resurrectionem J. C. Domini fuisse anno Mundi 5534^o: crucifixum esse feriâ 6^a, 27^a Faminoth, quem Arabes vocant Barmahar, quo die Adam ex Paradiso ejectus est: resurrexisse 29^a ejusdem mensis, die dominica.* Ita Eutychius, quantum ad diem, aliter Abulfaragius & alii. Cum verò quæstio hæc de Paschate primo Resurrectionis Domini, ad doctos potius & Chronologiæ peritos, quam ad plebem aut ipsos etiam Episcopos pertineat, suspicari possumus, accidisse ut per fugam, continuasque persecutiones, quibus Patriarchæ obnoxii erant, omiserint aliquando Paschales Epistolas scribere, quæ ex veteri consuetudine Alexandriâ mittebantur, ut quo die Pascha celebrandum erat Episcopi docerentur, quod ex Athanasii, Theophili, Cyrilli, tum multorum Jacobitarum Epistolis patet, quæ idcirco Paschales seu Heortasticæ appellantur. Credibile igitur est Episcopos quosdam in computo Ecclesiastico aberrasse, & eo quidem prætextu, quod primum Pascha non rectè constituerent. Eaque ratione coactum Sanutium eos docere, quæ communi opinione in Alexandrina Ecclesia tenebantur, circa Epocham Passionis & Resurrectionis Dominicæ.

Miracula quædam subjiciuntur: nempe quod post triennem siccitatem precibus suis pluviam impetraverit, quod iniquum Sacerdotem qui viduæ injuriam in quodam negotio faciebat, frustra reprehensum ita puniverit, ut ager ejus, cæteris irrigatis aridus permanferit.

Novæ calamitatis illius, per siccitatem, non magis quam miraculi certa fides est: nam eo tempore in multis quos habemus libris, præsertim Historia Nili & Ebn-Werdi legimus, Nilum ad justam mensuram excrevisse, qua ratione siccitas nocebat minimum, nisi fortè de imbre illo æstivo locus intelligendus, quem *gutiam* nunc vocant, qui ros potius, quam imber ad puteos, & cavales implendos idoneus est. Neque magis confirmare ex aliis autoribus possumus, quæ sequuntur, de rebellionem cujusdam ex

De Paschatis celebrandi die legitimo.

Calamitas alia Ecclesiæ veitatz.
Ebn-werdi
Mf. Ar. p. 1.

civibus Alexandrinis, qui magnam Provinciæ partem Arabum copiis suffultus, vastavit, incensis Monasteriis, & Ecclesiis, atque inter multas, celebri illa S. Mennæ in Mareotide, S. Mariæ Athribæ, & aliis. Eam vastitatem Autor pluribus verbis prosequitur, sed ita ut tempus non assignet, quamvis Alexandriam ab illis rebellibus obsessam, civesque ad summam angustiam rei frumentariæ redactos scribat, qui tamen navibus Reschidâ missi, commeatum acceperunt. Ita servata civitas quam incolæ muro novo cinctam munitiorem reddiderunt. Intelligitur tamen historiam hanc secundum Autoris sententiam referri debere ante annum Hegiræ 252^{um}, J. C. 866^{um}. Nam paulò post quasi in vindictam tot malorum quæ à Præfecto Misræ Ebn-Elmodir perpetrata erant, rebellatum esse adversus Califas multis in provinciis scribit, præsertim in Arabia, occupata Mecca à quodam Principe, Muhamedanorumque sacrario profanato, adeo ut equi in templo stabularentur; interruptamque fuisse Muhamedanorum peregrinationem. Hæc autem de alio intelligi non possunt quàm de Haceno, Halis pronepote, qui anno Hegiræ 251^o, J. C. 865^o, in Deilema rebellavit; & conjunctis cum alio Haliada copiis, postquam Kazuinâ potitus esset, Raïam & Tabaristanam totam occupavit: mox in Arabiam duxit, Meccamque & Medinam obsedit, urbesque illas commeatu intercluso ad extremam famem adegit: tum peregrinos adortus, quorum magna pars siti & fame perierat, magnum eorum numerum occidit: ipse quoque cum suis, pestilentia quæ famem consecuta est, periit anno Heg. 252^o, J. C. 866^o: Hacenum vocat Elmacinus: Huceinum Ebn-Werdi: qui ad Ismaelem quemdam filium Yucepli, ex eadem Halis familia refert cladem Arabiæ illatam, Muhamedanamque peregrinationem tanto cruore violatam, quod Haceno Elmacinus adscribit: tanta est autorum inter se discrepantia.

Elmac. p. 158.

Præfeti
 Egypti.

Aliam quoque temporis notam habemus, quod eo ipso tempore scribit Autor noster, Deum populi miserum fuisse: ita ut novus in Ægyptum Præfectus mitteretur Muzahem, filius Hakan. Erat ille Turcicæ originis: natus Bagdadi, patre Hakano Turcâ, Viziro Motewakeli, cum quo interfecus fuerat: sed cum magna esset in Califarum aula Turcarum autoritas, dignitatem ille suam sub Mutazzo retinuit, & insignem præ cæteris, Ægypti præfecturam obtinuit, amoto Yezido filio Abdallæ, Turcâ pariter, qui eam per decennium obtinuerat. Unde intelligitur sæpè ut in hoc etiam

etiam loco Scriptores Christianos hallucinatos fuisse, dum Ægypti Præfectos vocant, non qui revera tales essent, quique Orationis publicæ jus haberent, sed eos qui Provinciæ tributis colligendis præerant, vel Misram gubernabant : nam Yezid ille toto decennio hanc dignitatem obtinuit. Muzahem cum copias ex Oriente adduxisset, constantes ut plurimum ex Turcicis militibus, quibus Ægyptii pares non erant; habitoque delectu, cum eas auxisset, rebelles compescuit; magnamque illorum stragem edidit : cum in tractu maritimo non solum præsidia militaria multis in locis disposuisset, sed naves etiam quæ fugientes comprehenderent : qui vivi capti sunt, eos comburi iussit. Incendium inde ortum Mahilæ, multas mercatorum domos absumsit : qua occasione miraculum factum narrant, divitis cujusdam, sed avari, qui nihil in pauperes erogaret : alterius mediocris, qui omne lucrum in eos refundebat : prioris domus, & apothecæ arserunt : alterius servatæ sunt. Laudatur ab Autore nostro Muzahem, à probitate & pietate, quantum in Muhamedanum cadere potest, æquitate & integritate. Sanè asperæ severitatis hominem fuisse testantur leges quas constituit circa mulierum modestiam, ne funerum prætextu, aut balnei petendi causâ, domo prodirent : ne quid in Meschitarum officio contra religionis præscriptum toleraretur : de quibus scribunt Maxrizius, Ebn-Werdi & alii. Ea porro fuit illius diligentia & strenuitas, ut prædones, rebellesque omnes paucis mensibus deleverit, eosque in deserta superioris Ægypti loca compulerit; prædam omnem recuperaverit. Discimus porro ex iisdem autoribus Muzahemum in Ægypti Præfectura Yezido successisse anno 253°, J. C. 867° : obiisse sequenti, cum anno uno & paucis mensibus provinciam rexisset. Successit ipsi filius ejus Hamed, qui post menses duos mortuus est : huic Argouz Turca, qui successorem habuit Ahmedem filium Toloun, ex eadem gente : is paulo post Ægypti Princeps factus cum summa autoritate, Principatum posteris suis transmisit, qui illum retinuerant per annos amplius quadraginta.

Sub eodem Muzahemo videtur contigisse, quod Autor subjungit de vestigalium tributorumque exactore illo durissimo Ebn-Mondir : cum scilicet tributum duplex exegisset, & præterea Patriarchæ pecuniam Monasteriorum & Ecclesiarum nomine grandem imperasset : illum à novo Præfecto amotum, substituto in ejus locum altero qui benignè Monachos & Ecclesias à tot vexat.

R r

tionibus exemit, unde redierunt ad Monasteria multi qui Barbarorum manus effugerant. Ebn-Mondir servili veste indutus, in carcerem conjectus est;eductusque quotidie per menses aliquot, ut ardenti soli exponeretur: agnoscentibus omnibus justam Dei in hominem nequissimum vindictam.

Monachi à
 tributis im-
 munes facti.

Venerunt præterea literæ publicæ Sultani sigillo munitæ, satagente quodam Monacho qui hujus rei gratiâ in Syriam profectus, obtinuit ut Monachi à tributo immunes essent; adjuncta erant diversa ex Alcorano testimonia, quibus probabatur eos qui mundo relicto in montibus habitarent, non debere cogi ad tributa persolvenda. Tam commodâ occasione usus est Sanutius, ut Monasterium S. Macarii desolaturn, non modò in pristinum statum restitueret, sed illud etiam muro forti cingeret, ut eo in loco tuti Monachi & Christiani esse possent à barbarorum incurfionibus. Cæmentis igitur & lapidibus magno labore collectis murum ædificavit, adjunctis turriculis; neque curam modò suam, sed laborem impendit propriis ipse manibus laborans, ut ædificium citò consummaretur.

Patriarcha
 in carcerem
 conjectus.

Neque tamen ita conquievit Ecclesia Jacobitica, quin magnum periculum paulò pòst adiverit ex calumnia Diaconi cujusdam, qui Præfeto persuasit ut Patriarcham in vincula conjiceret. Captus in loco quodam secreto, ubi per aliquos dies latuerat, Misramque ductus; carceri inclusus est; unico discipulo qui cibum inferret ad eum admisso, sed quem ex magna partè custodes rapiebant: ipse ex reliquiis, quæ supererant, captivis distribuebat. Comprehensi ejusdem mandati vigore Episcopi omnes, in Ægypto inferiore & superiore: Misramque ducti, sed spoliati Episcopali habitu suo, relicta tantum ipsis Monachali veste: eosque deducebant asinis absque ephippio impositos, per totam viam contumeliosè tractantes, publicoque ludibrio exponentes. Patriarcha quadraginta diebus præter carceris incommoda, dolores etiam arthritidis gravissimos sustinens; tandem dimissus est, cum pecunias quas nequam ille Diaconus eum habere testatus fuerat, nullas habere se probavisset. Episcopi quoque liberati sunt priusquam Cahiram pervenissent, restitutis quæ ipsis ablata fuerant, præter aurum & argentum. Causa odii adversus Patriarcham, quod Diaconus ille cum Monasticum habitum induisset, eum deposuerat; atque ea de causa repulsus à Sacerdotio fuerat. Veniam ab Sanutio petiit: qui ei concessit: absolutionis verò literas dari sibi postulavit: ali-

ter negans fieri posse, ut in quocumque loco à Christianis suæ sectæ aut ad Ecclesiam, aut domi susciperetur. Earum literarum hæc erat sententia, *solvi vincula hujus Diaconi ore meo, neque est quod prohibeat eum quisquam fidelium à communione Eucharistiæ.* Hanc absolutionis formulam ab ipso illo cujus intererat præscriptam, signo Crucis, quod erat sigillum Patriarchale, confirmatam, Diaconus ille nequam accepit. Nec ea humanitate contentus Patriarcha, viaticum ei, jumentum quo veheretur, tresque vestes dari jussit. Unde reprehensus à secretario suo Autore hujus historiæ, dixit: *Nescis fili, hominem peccatorem quando ausus est Eucharistiæ communionem accipere, antequam peccatum suum coram Deo confessus sit, remissionemque postulaverit, existimare se ex Eucharistiæ perceptione perfectum Christianum effici, quia eam credit remittere peccata, juxta illa Evangelii verba,* Hoc est corpus meum, edite ex eo semper in remissionem peccatorum: *cum è contrario peccatum ejus magis augeatur.* Intelligi itaque voluit se tam facile atrocissimam adversus Episcopos, ipsum Patriarcham Monasteria & Ecclesias injuriam, absque poenitentia condonare debuisse, ne impius ille percipiendo Eucharistiæ peccata sua expiasset credens, eadem sacrilegio cumlaret, quæ indulgentia absurda prorsus, & contra leges Ecclesiasticas censenda est, extortaque metu potius quàm secundum disciplinam concessa. Neque enim jam eò Coptiæ pervenerant, ut de Confessionis & Poenitentia necessitate apud eos dubitaretur, quod postea factum est, ut suo diceretur loco: neque statim ad communionem admitti debebat in omnibus Ecclesiis, qui illas omnes suo scelere turbaverat. Is autem postea calumniari Christianos non desinens, mercatoribusque qui Alexandria ad urbem Sa, ubi sedem habebat, commcabant, incommodus; à Præfecto in carcerem missus, post fustuarium, & taureas quibus ad necem ferme cæsus fuerat, odiosus omnibus, à quodam qui captivus cum eo erat plagis contusus, tandem paulo post liberatus est, gaudente Patriarcha quòd poenitentia agendæ locum haberet.

Absolutionis formula.

Post brevissimi temporis pacem rursus in gravem calamitatem incidit, accusante eum nefario monacho ex Monasterio Abu Joannis, in valle Habib, qui Diaconatum ambiens, à principibus inter Christianos viris literas obtinuit, quibus Patriarcham rogabant, ut eum ordinaret. Non admissus, quia tunc gravissimis arthritidis doloribus Patriarcha vexabatur; Misram profectus cum

Nova calamitas.

accusavit, quòd magnam auri & argenti vim reconditam haberet ; quòd Muslemianos ad fidem Christianam adduceret, eosque in Monasteria deserti missos secretò baptisaret. Hanc accusationem scripto comprehensam Præfecto porrexit, qui cum equitum mille ducentorum comitatu Alexandria Misram profectus erat, ut executioni mandaret literas à Califa acceptas, quibus jubebatur, ut omnes ad Muhamedanam religionem profitendam cogerentur. Accepta igitur potestate, in desertum cum duobus Turcis profectus est, venitque ad Monasterium Abu Joannis, ubi quemdam Monachum comprehendi jussit, quasi unum ex illis quos Patriarcha à Muhamedismo ad Christianam fidem converterat. Negavit ille, asserens se Christianum, ex Christianis parentibus natum : neque etiam si testes falsos adversus eum nefarius ille comparasset, adduci potuit, ut aliud quid diceret. Patriarcha comprehensus est, cùm prius per literas à suis monitus, fugere noluisse, tum fidei firmitate, tum quòd doloribus acutissimis vexatus loco se movere non posset. Aderant ipsi Simon Episcopus Panopoleos nuper ab eo ordinatus, & Macarius Diaconus apud eum à pueritia educatus, quos data benedictione dimittere à se voluit : at ipsi socii calamitatis esse maluerunt. Cùm ob infirmitatem moveri vix posset, cum ad navem tulerunt, paratam ut Misram deportaretur. Adjuncti sunt comites duo, ligatis manibus & pedibus, alique socii Patriarchæ, cujus Cellam nefarius Monachus spoliavit, ablatis vestibus, vasis & libris sacris, quorum cura maxima Patriarchæ fuerat. Habebat enim multos codices eleganter scriptos, ex antiquis exemplaribus, à peritis librariis ; & ipsos codices auro argentoque vestiebat. Arcæ delatæ quasi in illis magna auri argentique vis esset, cùm præter libros nihil continerent, nisi vestes quibus ornatus prodibat in publicum, aut ad Liturgiam celebrandam utebatur, plerasque lanceas & exigui pretii, nam sericeis nonnisi in festis utebatur. Ubi nihil inventum, à Macario & Episcopo Panopoleos quæsitum ubi esset pecunia : ipse delator in carcerem conjectus. Macarium plagis prope enectum, Patriarcha signo crucis sanasse dicitur. Tandem perspecta calumniâ, post triginta dies ex carcere liberatus est. Nec cessavit orare pro crudeli illo Ecclesiæ persecutore, aut permittere voluit ut quæ furatus vasa & vestimenta fuerat, ab eo repeterentur ; dicebat enim non illius hominis calumniâ sed peccatis suis propriis factum, ut in tantam calamitatem inciderent. Oravit etiam pro alio qui ex

Monasterio per vim eductus, tormentisque victus fessus erat, quamvis falsò, se Muhamedanum fuisse; is igitur cum habità diligenti quæstione agnitus fuisset ab initio Christianus, libertati restitutus est. Autor tot malorum cum primò aliquamdiu in Mareotide delituisset, metu Præfecti qui fraudem ejus calumniamque punire volebat; iterum ad Monasteria profectus, Monachos vexare coepit, eosque ut priùs fecerat, spoliare. Cum verò querelæ perlata de eo forent à Muhamedanis negotiatoribus, qui mercimonii sui causà ad ea loca veniebant, jussu Præfecti in carcerem conjectus, catenisque oneratus, fustibus & loris caesus, poenas tot criminum persolvit.

Hoc loco, quandoquidem totius operæ nostræ finis est, ut fidei disciplinæque Ecclesiasticæ servata apud Orientales vestigia per tot salebras proficquamur, & si quando à veteri regula aberratur observemus, de istis Diacono & Monachis quædam dicenda sunt. Fuit sanè contra leges Ecclesiasticas, Canonibus comprehensas, ut publicus calumniator Patriarchæ & Episcoporum, Monasteriorumque prædator, absque poenitentia reciperetur, quam adversus tales pestes, Collectiones Canonum antiquorum, & recentiorum gravissimas statuunt. Verùm ea fuit tristissimis illis temporibus, estque etiamnum apud Orientales consuetudo, ut Patriarchæ, etiam contra Canones, multa sibi licere existimaverint, quia scilicet supremam sibi videbantur habere auctoritatem. Ea verò ipsis peccandi occasio fuit, & color everfioni disciplinæ quæsitus, quod ejusmodi perditis hominibus nisi absolutio concederetur, aut majori odio adversus Ecclesiam insurgebant, magisque audaces ex desperatione veniæ fiebant, aut quod ultimum erat sceleratis perfugium, Muhamedanos se prosterentur. Sed neutra causa satis idonea visa est, ut tam facile absolverentur, præsertim qui aliis abnegandæ fidei causâ fuerant, aut qui ipsi eam abnegassent. Itaque quando hæc indulgentia præpostera locum habuit, egerunt Patriarchæ summo jure, cujus prævaricationis exempla multa sanè occurrunt, sed quæ tandem coercita sæpè sunt in hunc ferme modum. Quando ipsi vivebant, rarum omnino fuit, ut ad observandos Canones cogi possent: neque enim faciliè Muhamedani patiebantur, ut conventus Episcoporum fierent, ad Ecclesiæ in capite & membris necessariam reformationem. Si quando facti sunt, plena omnia tumultu & calumniis fuerunt, quandoquidem boni illi Antistites, quos à pietate, doctrina, imò & mi-

Observatio
de disciplina
erga Aposto-
las: & eorum
absolutio-
bus.

raculis sui commendant, non semel adversùs Coepiscopos auctoritatem Principum infidelium imploraverunt, eaque intemperanter abusi sunt. Alio etiam modo privatas injurias ulciscabantur, nempe excommunicatione in contradicentes sibi pronuntiata: His malis hoc fermè remedium semper adhibitum est, ut vacante sede proponerentur ab Episcopis certa quædam reformationis capita, quæ maximè necessaria judicabantur; & illa scripto comprehensa confirmabantur à Synodo, statuebaturque simul, ut qui eligeretur Patriarcha, non priùs ordinaretur, quàm interposito iurejurando se obstrinxisset ad Canones illos observandos. Factum id tam apud Nestorianos quàm apud Jacobitas, ut ex sequentibus fiet manifestum; atque ea occasione institutæ sunt Collectiones varix quarum adhuc nonnullæ extant, & quas *Synodos* Nestoriani vocant, quia in Synodis Episcoporum erant promulgatæ: Constitutiones Patriarchales à Coptis vulgò appellantur, de quibus suo loco dicemus. Illæ verò Collectiones cum nec integram continent disciplinæ Ecclesiasticæ dispositionem, sed in paucis quibusdam capitibus occupentur, earum ratio nulla reddi potest, imò fragmenta potius inconcinna & imperfecta videntur esse, nisi sciatur ipsas non alio fine fuisse factas, quàm ut instantibus malis remedium adhiberetur, non ut integra Juris Ecclesiastici forma præscriberetur.

Facilitas ab-
solutionis A-
postatarum
non semper
eadem.

Quod superest circa facilitatem poenitentix erga eos qui fidem abnegaverant, non aliam quoque originem habuit, quàm Patriarcharum aut socordiam aut ignorantiam: neque enim crimen ullum acerbùs punitum est, quàm talis Apostasia. Sed primis Muhamedanorum temporibus, præter metum à dominis sævissimis æquè ac supersticiosissimis, qui non facilè patiebantur saluberrimam severitatem adversùs eos qui suæ sectæ nomen dedissent; tum etiam acriter sæviebant in eos qui de Apostasia poenitentiam agebant: accedebat alia ratio cur non æqua & certa disciplina adversùs illos poenitentes observaretur. Ea fuit quod cum antiqui de Apostasia Canones Idololatriam respicerent, aut saltem hæresin; nulli propriè loquendo extabant circa abnegationem fidei, factam cum Muhamedismi professione. Neque enim Idololatriæ reus videbatur, qui ad eam sectam transfret, quæ Idolis & Ethnicæ superstitioni bellum semper indixerat: neque hæreticis injunctam reconciliationem sufficere arbitrabantur, ad eos recipiendos, qui Christum Deum abnegassent, & Muhamedi impo-

PATRIARCHARUM ALEXANDRINORUM. 319 SANCTIUS PAU. LV.

stori posthabuissent. Hinc introducta nova disciplina, ut qui Muhamedanus factus fuisset, iisdem poenis subiceretur, quas antiqui Canones præscribebant adversus eos qui se sacrificiis nefariis contaminassent. Postea etiam gravior, & multorum annorum fuit: tandem gravissima, adeo ut vix parem vetus Ecclesia agnoverit, dum nullam aliam reconciliationis viam Apostatis reliquerunt, quam publicam Muhamedis execrationem, eo ipso in loco, ubi Christum abnegaverant. De ea disciplina dicitur adhuc suis locis: unum adjiciemus; quod ex hac historia & præcedentibus probari videtur, nondum apud Ægyptios Jacobitas constitutum quidquam fuisse, quod ad *καταρισμὸν*, nam ita Græci vocant Muhamedismi professionem, poenitentiam pertineret.

Tandem Sanctius morbo oppressus obiit 24^a Farmuti, cum scdisset secundum autorem nostrum annis 21, mens. 3. Elmacinus, Makrizius, Chronicon Kircheri undecim tantum numerant, ut & Chronicon Orientale: Canon Abulbircat rectius annos 21. & menses 3. numerat, obitumque ejus assignat anno Martyrum 597^o, qui est J. C. 881^{us}, Hegiræ 268^{us}: atque ita emendandus Elmacinus; tum ubi de hoc Patriarcha loquitur, tum ubi de ejus successore. Quia verò magna mutatio Califarum fuit his temporibus, majorque omnino rerum Ægyptiacarum, quia tunc non amovendos ad nutum, sed perpetuis auctoritate planè regia Præfectos Ægyptus habuit, de illis omnibus dicitur in sequenti historia.

P. 161. &
176.

CHAIL II, PATRIARCHA LVI.

CHAIL II.
PAU. LVI.

ANTEQUAM hujus Patriarchæ historiam quæ brevissima est, aggrediamur, de Califarum frequentissimis mutationibus, novaque sub Viziris aut Præfectis perpetuis rerum Ægyptiacarum facie pauca dicenda sunt.

Mutazzus 13^{us} Califa ex Abbassidarum familia, cum Turcas qui in Aula nimium poterant, compescere conatus fuisset, Bogamque unum ex eorum ducibus occidisset, eorum rebellionem depositus est, substitutusque in ejus locum Muhamed Abuabdalla Muhtedi, filius Mutafemi, filii Haronis Reschidi: anno Hegiræ 255^o, J. C. 868^o, qui anno sequenti ab iisdem Turcis occisus est.

Califarum
illius tempo-
ris successio.
Elmac. p. 159.

Successit ei Mutamidus frater patruelis 15^{us} Abbassidarum, qui imperavit usque ad annum Hegiræ 279^{um}, J. C. 892^{um}; sed

Elm. p. 161.
166.

ita ut præter Califæ nomen, nihil haberet, fratre ejus Muafico res administrante; provinciarumque Præfectis autoritate firmè regia eas obtinentibus. Accesserunt incommoda alia ex rebellionè principum multorum, atque inter alios Jacobi filii Laith, qui Corasanam, Tabaristanam, Persidemque firmè totam occupavit, Saffiorumque Dynastiæ Autor extitit. Habib quoque, non ut legitur apud Elmacinum ex mala punctatione, *Rihorum* princeps, sed Zingitarum seu Nlgrorum, in Arabia rebellavit Basoram & multas alias urbes occupavit, contemtâ prorsus Califarum dignitate, cum se ex familia Halis filii Abutalebi ortum mentiretur, & continuis per annos circiter quindecim bellis, & populationibus Mutamidum exercuit. Orta est præterea Carmatianorum furiosa illa factio, quos malè Erpenius Caramitas appellat, qui sub duce suo primo Carmato adversus Abbassidas & eorum religionem Arabes multos excitaverunt, à quibus orta deinde fuit gens illa collectitia eorum quos *Hassîsin* Arabes, aut Batinæos vocant, nostri scriptores *Assassinos*, qui viribus aucti, non tamen tantum apertâ vi quàm proditione nocuerunt, de quibus adhuc erit dicendi locus. Magna verò & præcipua eorum hæresis fuit, quod alios docuerint Califs Abbassidis nullam à fidelibus Muslemianis deberi obedientiam, cum Imperium ad se per vim & fraudem transtulissent, quod Halis posteritati proprium esset. Ea enim origo primâ fuit rebellionis eorum qui Fatimitæ deinceps appellati, novum in Ægypto Califatum instituerunt, atque in ea provincia spirituales omnem sæcularemque potestatem Abbassidis eripuerunt.

Autoritas
Califarum
precaria.

Verùm cum hæc præcipua bella adversus Califas Bagdadenses gesta, quibus dignitas eorum maximè imminuta est, non propriè ad Ægyptum pertineant, ut in ea consistamus, revertendum nobis est ad eum in quo desimus Ægypti Præfectum Muzahemum: Is cum obiisset, successorem habuit Ahmedem filium, cujus initia assignantur anno Heg. 254^o: paulò post diem suum obeunti successit Argouz, sive Arjouz, filius Olug, filii Tarkan, ex Turcica etiam gente ut ab aliquot annis prædecessores eorum alii, verùm eodem ipso anno qui erat J. C. 868^m, antotus est, & in ejus locum venit cum summa autoritate Ahmed filius Toloun, ex eadem natione, vir magnus, qui sub Imperatoribus quales fuerunt Mehtediis & Mutamidus, stolidis, & nullius consilii, tantas opes, tantamque potentiam obtinuit, ut per annos sexdecim & ampliùs

Præfecturam

Præfecturam Ægypti conservaverit, & eam filio hæreditariam reliquerit; ita ut Califæ mandata nulla reciperet, spiritualementanummodò ejus dignitatem veneraretur. Ea scilicet conditio Abbassidarum fuit, ut quod sceleribus, cædibus, ambitiosaque superstitione Imperium quæssiverant, post annos centum iisdem aliorum artibus aut amiserint sæpius, aut laceratum, nonnisi exigua ex parte retinuerint. Nam sicut majores eorum sub specie vindicandæ cædis Halis, cujus se progeniem videri volebant, adversus Omniadas rebellaverant, ita eodem titulo ubique ferme rebellatum est adversus Abbassidas: atque convulso bellis civilibus Imperio duces multi aut præfecti provinciarum novas Dynastias fundaverunt, quales fuere Safariorum, Gourianorum, Samaniorum, quæ deinde ab aliis extinctæ fuerunt, ita tamen ut Califæ nihil adversus eas possent, satis contenti modò in eorum clientela novi illi principes se esse profiterentur, vexillumque & vestem quæ investituræ signa erant, ab illis acciperent, & munera ad eos mitterent, quibus luxus inertium Califarum & inter pellicum greges consenscentium sustentaretur.

Antequam verò Califarum res in afflictissima illa conditione forent, cum in frequenti principum mutatione, bellisque inter fratres civilibus, nullus non sibi à suis timeret, præsidium sibi quæssiverunt ab extraneis mancipiis, ex quibus custodes corporis, tum copiarum duces, præfectosque prætorio suo delegerunt. Nempe tutissima videbatur fides hominum, qui ex servili conditione assumti, neque cognatione, neque nobilitate quâ Arabes genuini plurimum gloriabantur, reliquos antecellebant: verum toti ex nutu Principis pendere videbantur. Attamen cum plurimi ad summas dignitates, militares præsertim evecti fuissent, non quidem sub Almamone qui multos ad se ex Turquestania missos, literisque & moribus imbutos prætorianis cohortibus adscripsit, sed sub Haronis Reschidi successoribus res novas moliri cœperunt, neque solum præfecturas inter se partiri, sed Califas deponere, imò & occidere non timuerunt. Ita dum à consanguineis principibus Califæ caverent, servis suis arma contra seiplos dederunt, & eorum tandem ambitione & audaciâ perierunt. Inter eos verò præcipuum dignitate, tum corporis & animi dotibus fuit Tolon Turca, qui Ahmedis pater fuit, sive naturalis ut quidam volunt, sive ut alii scribunt, per adoptionem. Hic Ahmed postquam amicus fuit, Argouz, sive Arjouz, anno illo qui apud Arabes quatuor Emiro-

A Turcicis
mancipiis pri-
mum eorum
majestas im-
minuta.

rum dicitur, Ægypti præfecturam obtinuit à Mutazzo Califa ptiu , quam deponeretur, eamque retinuit usque ad annum 270^{um} . J. C. 863^{um}, quo mortuus est. Annus autem primus ipsius Præfecturæ, quatuor Emirorum vocatus est, quia eodem anno Mutahem obiit : Ahmed filius, paucis mensibus supervixit : Argouz paulò post abdicatâ præfecturâ, illam Ahmedi filio Tolonis vacuam reliquit. Antea quidem præter Præfectum qui toti Ægypto præerat, à Califis mittebatur alter, qui colligendorum tributorum auctoritatem habebat : alii tandem cohortibus prætoriis præfecti : imò & quidam copiarum omnium duces designabantur, qua ratione difficilius rebellabant. Hæc omnia turbatis per Turcarum defectiones rebus, Ahmed Tolonis filius sustulit ; contemptaque Califarum auctoritate, ærarii, copiarum, negotiorum denique omnium potestatem ad se traxit : inimicorum factiones oppressit, tandemque Ægypti non jam Præfectus, sed Emir seu Princeps : Syriæ quoque & vicinarum regionum maximam partem obtinuit. Ab eo tempore repetenda est origo Sultanorum Ægypti, ut Autores Latini & vernaculi nostri eos appellant, quamvis alia quando Tolonidæ sublati sunt, forma imperii fuit, ut suo loco dicitur. Jam igitur ab annis multis Ahmed filius Tolonis Ægyptum obtinebat, cum obiit Sanutius : unde magna sanè esse debuit auctoris ejus vitæ negligentia, qui de ejus rebus gestis planè siluit. Jam ad Chaillem ejus successorem veniendum est.

Definit hoc loco prima pars historię, non quidem plenæ & secundum Collectorum divisionem, sed secundum Autores qui eam aut scripserunt, aut interpretati sunt. Cum enim initio Severus Episcopus Aschmonin dicatur ex Græcis Copticisque Monumentis, quæ servabantur in variis Ecclesiis, præsertim ad sanctum Macarium Vallis Habib eam historiam Arabicè digessisse & interpretatus esse, loquitur jam Michael Episcopus Tanis. Attamen cum ultra centum annos vitam produxerit Severus, scire non possumus, an in priori vita deserit : an verò ut alias, ita istam & sequentes aliquot ex Coptica lingua interpretatus fuerit. Quamvis enim de Severo scribant Orientales multi, eumque laudent magnopere, atque opera illius multa recenseant, pauci tamen istius laboris quem in colligenda Patriarcharum historia posuit, meminerunt. In aliquot etiam præcedentibus observatum est Autores loqui de rebus quas scribunt, tanquam à se visis & auditis, quod argumentum esse potest eas vitas Copticè primùm scriptas, & à

Severo Arabicè redditas, qui bona fide retulerit ea quæ in antiquis exemplaribus repererat. Fieri igitur potuit ut eam quoque partem, cujus primus Autor est Michael, ipse etiam ut priores interpretatus fuerit, quod monendum sumus arbitrati, ut qui in codicibus Orientales inciderint, quærant quæ in nostris non reperiuntur, & de Autore ipso plura nos doceant.

Cùm Sanutius Patriarcha diem suum obiisset, qui *edificaverat*, inquit Autor, *altare D. Marci Alexandria, quod annis centum quindecim substituit*, ordinatus est ejus loco Chaïl, de quo nihil aliud, antequam ordinaretur, occurrit : ut neque qua ratione electus fuerit, quo anno, & quo die. Elmacinus anno Califatus Mutamidi 8ⁱ, vel ut alii volunt 7^o, qui fuit Hegiræ 263^{um}, J. C. 876^{um}, ordinationem ejus assignat : eumque Michaelem vocat : sed idem nomen est cum Chaïle : nam superiorem ejusdem nominis, Chaïlem & Michaelem promiscuè appellatum legimus : Michael quoque vocatur à Makrizio : Chaïl in Indice Kircheriano, & Abulbircat, apud quem ordinatio ejus dicitur facta eodem anno quo ejus decessor obiit, Martyrum 597^o, qui est J. C. 881^{us}, Hegiræ 268^{us} ; atque ita falsus est Elmacinus, ut in multis aliis. Nam quod ait vixisse eum sub Principatu Ahmedis filii Tolonis verissimum est, cùm ille biennio supervixerit.

Prima inter multas calamitates quibus eum tanquam aurum in igne purgatum fuisse scribunt, hanc occasionem habuit. Erat Episcopus Saca vir improbus : cujus in Dicecesi erat pagus Denufchar dictus, insignis Ecclesiâ S. Ptolomæi Martyris, ad cujus consecrationem Patriarcha cum aliis Episcopis invitatus fuerat. Conveniant Episcopi & Laici magno numero ; & cùm hora celebrandæ Liturgiæ instaret, Episcopus Saca ad Ecclesiam nondum venerat, parando hospiribus convivio occupatus. Cùmque longiorem moram traheret, rogantibus Episcopis & aliis, Patriarcha ad altare accessit, & Liturgiam inchoavit, à lectione scripturarum & earum interpretatione. Jamque *Donum* sive oblatam intulerat, nempe à Prothesi ad altare secundum ordinem, cùm advenit Episcopus, qui furens quæsit ab eo cur in Ecclesia sua, se absente, & absque ejus licentia tale quid præsumeret : insiliensque in altare, hostiam jam oblatam, accepit, comminuit & projecit, tum Ecclesiâ egressus est. Patriarcha acceptâ oblatâ aliâ, Liturgiam perfecit populoque communionem distribuit. Postridie con-

Facinus Episcopi Saca qui oblatam conculcat.

gregatis Episcopis, autor tanti facinoris Episcopus, communis omnium sententia depositus est, aliusque in ejus locum ordinatus. Alter ira & vindictæ cupidine æstuans, Fostatam sive Cahiram ad Ahmedem filium Tolonis profectus, & de illata sibi injuria questus, magnas opes Patriarcham habere falso testatus est, adeo ut ad expeditionis quam iste parabat in Syriam, sumtum sufficere possent. Accersito, imperavit Ahmed ut quandoquidem Christianis præter alimenta & vestes nihil opus erat, pecunias quarum magnam vim habebat, suppellectilem auream, argenteam, sericas vestes, operisque phrygionici, sibi daret, Calix summo regionis domino deferendas, certus si ita faceret, gratiam omnem apud Principem & apud se consecuturum. Cum testatus esset Patriarcha nullas se habere pecunias, omniaque per calumniam confecta fuisse quæ Episcopus Saca ad eum detulerat, in carcerem conjectus est: ubi anno integro detentus, vitam in jejuniis & oratione duxit, socium habens virum quemdam ex Christianis nobilem Ebn-Elmondîr, qui illi panem, sal & olera macerata subministrabat. Joannes & Abraham filii Mosis qui erant scribæ Ahmedis, frustra ab eo petierant, ut è carcere educeretur, & in libera custodia domi suæ eum habituros esse polliciti, nihil obtinuerant. Idem meliori successu tentatum, & confectum est à Joanne Secretario Viziri, qui tandem ab eo obtinuit, ut Ahmedi filio Tolonis suaderet, ne amplius in Patriarcham sæviendo Christianos conturbaret, verum conaretur ab eo quantum fieri posset; pecuniam extorquere. Postquam libertati restitutus est, consensit ut viginti denariorum aureorum millia duabus pensionibus persolveret, mediam partem intra mensem, alteram intra menses quatuor. Joannes & Macarius ejus filius nomina fecerunt, tanquam sponsores, atque ita Patriarcha illis commissus est. Ille in domum eorum divertere noluit, sed recepit se in Ecclesiam S. Mariæ prope Castellum Elchemah, quæ, inquit Autor historię, jam à Melchitis possidetur, atque in ea mansit diebus viginti. Veniebant interea ad eum quotidie primores Jacobitarum, cibaria alternis vicibus inferentes; & quæ ad vitam sustentandam opus habebat subministrabant. Jamque mensis elapsus ferme erat, cum Patriarcha pecuniis carens, & consilii quo eas inveniret inops, ex eorum sententia, cum decem Episcopales sedes vacarent, totidem Episcopos pactâ certâ pecuniâ ordinavit. Joannes & Macarius aliam à Müllemanis & ipso Viziro, fenore acceptam ad ærarium Emirî

Simonis
 exemplum.

detulerunt, interposito iurejurando, quod ne quidem drachma ex facultatibus Patriarchæ numerata fuisset. Ita reddita est viginti millium aureorum syngrapha, confecta alia pro reliquo, cui præter Joannem & Macarium duo alii subscripserunt. Postea conveniunt ad Synodum Episcopi, statueruntque ut ad colligendam pecuniam mutuatam, & quæ Emiro debebatur, Episcopi in suam quisque Diocësin profecti à singulis auri Keration exigerent; atque ita, ut Autor ipse fatetur, insuper habuerunt Canones Apostolorum & Doctorum Ecclesiæ quibus prohibitum erat, ne pro Dei dono, aurum vel argentum acciperetur, & quibus simoniam sub gravissimis poenis prohibuerant. Ab Episcopis noviter ordinatis pecunia exacta est: ipse in Monasteria Vallis Habib veniens, vendidit loca quæ monachi orationis causâ in Ecclesiis obtinebant, quo nomine à singulis aureum unum exegit. Postea venit Alexandriam, & à Sacerdotibus petiit ut ornamenta Ecclesiarum accipere & vendere sibi liceret, pretiumque Sultano tradere: sed consentire renuerunt. Tandem post multas concertationes, permiserunt ut quasdam domos ad Ecclesiam pertinentes venderet, ea tamen conditione, ut quotannis mille aureos eidem Alexandrinæ Ecclesiæ, tam ipse quàm ejus successores pendere pollicerentur, de qua re instrumentum confectum est, cui ipse subscripsit: atque ea consuetudo tenuit ad multa sæcula. In hunc modum tum ex domorum aliarumque possessionum venditione, tum elemosynis, variisque exactionibus, constat pecuniâ, decem aureorum millia Ahmedi filio Tolonis persolvit. Antequam ad reliqua progrediamur, observandum est ipsos Jacobitas, etsi nimios in Patriarcharum suorum laudibus, ingenuè fateri non posse excusari factum istius, qui Simonix Canonumque contemptui januam aperuerit. Tale enim exemplum secuti omnes ferme ejus successores, labem illam in Ecclesiam suam invexerunt, cujus neque modus neque finis fuit. Aiunt etiam illum ab eo tempore non se Michaeleni, in publicè scriptis literis appellasse, sed *Chaia*; quæ, inquiunt, vox ultimum significat, quasi testatus præposterâ illa humilitate, ultimum se esse Ecclesiæ filiorum, quod sacras ejus leges transgressus esset, illiusque bona vendidisset. Talis ferme sensus esse potest, nisi mendum est in codice, legendumque *Kaïal*, ut sæpè id nomen scribitur, quod inter alia multa *Oeconomum* & *dispensatorem* significat, quasi per Ieroniam & frigidum acumen, in æquivoco ludens oeconomiam illam suam sibi exprobraret: sed

hæc tanti non sunt, ut curiosius ea investigare libear.

ἁγν, sive
oblata,

Majoris momenti est facinus illud Episcopi Saca, quod paucis explicandum est: neque enim intelligendus locus ille est, quasi dona jam consecrata conculcaverit. *ἁγν* enim, conservatâ voce Græcâ Christiani Ægyptii vocant oblatam vel hostiam, ut nos appellamus, antequam consecretur, & eam statim atque altari illata est, non minori honore prosequuntur quàm sacras imagines, imò præstantiori quadam ratione venerantur, tanquam mox mutandam in corpus Christi: hunc enim ritum Orientales omnes habent cum Græcis communem. Cùm Liturgia inchoatur, deservit Eucharisticus ille panis à mensa quæ *Πρωτον* Græcorum, *Credentis* nostræ responderet, ad altare, eo ferme modo quo apud Græcos fit ea quam vocant *μεγάλη εὐχὴ*, & prima benedictione sanctificatur. In eo igitur erant ut Anaphoram propriè dictam inchoarent, dum Episcopus ille irruit in altare, hostiamque rapuit & comminuit, scelus per se ipsum depositione vindicandum. Quantò verò majus futurum erat si factum id in consecrata hostia fuisset, & Canones poenitentiales, & Liturgici multi, tum alia exempla in hujus historiæ serie satis demonstrant, quemadmodum alibi probatum est.

Postea refertur varia fuisse inter Græcos & Arabes prælia vario successu, adeo ut ex utraque parte captivi multi facti fuerint: ea occasione Ahmedem filium Tolonis scripsisse ad Leonem Romanorum, seu Græcorum Imperatorem, minaces blasphemiasque literas: quibus Leo responderit, suo & Alexandri nomine & fragmentum literarum Autor recitat, cujus hæc fermè sententia est, quod mirum sit audere eum blasphemare adversus Christianam fidem quam nesciat: neque id factum à prædecessoribus suis qui in Musulmanos Imperium obtinuerunt. De captivorum commutatione missos legatos, quibus temerè Leo sacra Ecclesiarum vasa, ornamentum ostenderit, Cedrenus & alii scriptores post Theophanem testantur. Epistolæ ipsius quæ huc usque quod sciam, Græcè non extat, translationem ex Chaldaico, qualemcumque dedit Symphorianus Champierus, de qua Baronius ad annum 911^{um}, Bellarminus de Scriptoribus Ecclesiasticis, eaque edita reperitur in Bibliotheca Patrum 1^a editionis.

Cùm Patriarcha ad Tanis urbem venisset, ut qua ratione posset pecunias colligeret, nam decem aureorum millia adhuc fisco debebantur, venit quidam habitu Monachi in ejus confessum, acce-

praeque benedictione, sedens ad latus cujusdam ex ejus discipulis praedixit futurum ut post dies quadraginta, Patriarcha liberaretur ab inextricabili illo negotio; quaesitus ille per totam urbem, & Damietæ, non inventus est. Iis elapsis periit Ahmed filius Tolonis, cum exercitum duceret in Syriam, Damascus versus, expendissetque in eam expeditionem trecenta aureorum millia. Obiit autem an. Hegiræ 270°, J. C. 883°: statim post ejus obitum Patriarchæ reddita est aureorum decem millium syngrapha. Successit Ahmedi Hamarowia ejus filius, de quo narrant eum profectum ad Vallem Habib voluisse ostendi sibi corpus S. Macarii, quod integrum repertum est: aliud etiam miraculum contigisse, nam cum barbam sancti licentius attrectaret, istum aiunt oculos aperuisse; Hamarowiam timore ingenti perculsum corruisse: unctum oleo lampadis quæ ante corpus ardebat, sanatum esse. Adjicitur Pachomium Episcopum Saca fuisse Principi gratissimum; expeditos enim servos habebat plusquam trecentos jaculandi peritos, qui non modò Ecclesiæ possessiones, sed fines etiam provinciarum tutabantur ab Arabibus prædonibus: timebat autem Hamarowia Arabas, eò quòd se ex Muhamedis familia jactabant, & Fatimidæ appellabant. Sed hæc omnia plane contra historiæ veritatem, ut diceretur inferius.

Obiit tandem Chail, cum sedisset an. 27, 21^a mensis Mechir, sub eodem Hamarowia, Elmacinus 25. annos tribuit, supervixisseque ait Hamarowiæ: & ita Makrizias. Canon Abulbircat annos 21, & mortem ejus assignat anno Martyrum 625°, J. C. 909°, qui est Hegiræ 297^m: nempe errat ut passim alibi: nam ab anno Martyrum 597^m numerari necesse est annos 27 & menses aliquot, ut perveniatur ad an. 625^{um}. Jam autem eo anno & diu antea, obierat Hamarowias, occisus anno Hegiræ 282°. Itaque neque historici nostri neque Elmacini nec aliorum Chronologia conciliari cum præcedentium Patriarcharum annis potest. Nam si ordinatus est Chail anno Hegiræ 263°, & sedit annos 25. obiit an. 288°: atque adeo sex annis Hamarowiæ superstes fuit; quem tamen Michael Episcopus Tanis Auctor hujus historiæ supervixisse Chaili testatur. Sed hæc omnia accuratius exponuntur in vira sequenti.

Cum porro Elmacinus sit in omnium manibus, emendanda est ejus versio ad p. 176, ubi dicitur *vendidisse Judæis quartam templorum Alexandriae partem*: vox enim quam ita interpretatus est:

Erpenius, significat, *mansiones & possessiones Ecclesiis vicinas ad easque pertinentes*. Terra Habesch, seu Æthiopum, erat locus quidam ita dictus à Monasterio quod ibi erat Abyssinorum; aut alii scribunt, à castris Abyssinorum Prætorianorum quæ vicina erant; de quo Autores rerum Ægyptiacarum: neque enim hæc de Habassia propriè dicta intelligenda sunt, quod tamen exprimit Erpenii versio: in qua multa quoque alia peccata sunt quæ perfecti longum esset, tum in versione, tum in propriis personarum locorumque nominibus.

GABRIEL
Patr. LVII.

GABRIEL PATRIARCHA LVII.

Sedis Alexandrinæ vacatio.

VACASSE Sedem Jacobitarum Alexandrinam per annos aliquot, omnes historici consentiunt: Elmacinus quidem, & Makrizius annis 14, ut & Chronicon Orientale, Indiculusque Kircherianus, ex Elmacino defunctus. Idem Autor, dum hujus Gabrielis initia commemorat, ordinatum eum fuisse ait anno Hegiræ 301^o, qui est J. C. 913^{us}: auferantur anni quatuordecim, incidet obitus Chailis decessoris ejus in annum J. C. 899^{um}, qui est Martyrum 615^{us}: Quod si anno 288^o Hegiræ, ejus obitus assignatur, ut supra ex Elmacino notavimus, anni quatuordecim facillè reperiuntur saltem inchoati, usque ad annum 301^{um}. Quod ait idem Autor periisse Hamarowiam anno Martyrum 612^o, satis convenit: nam is est annus J. C. 896^{us}, Hegiræ 283^{us}: sed quamvis superiori anno mors ejus assignetur ab Historicis Arabibus; contigit enim 26^a Tybi mensis qui incidebat in Januarium anni sequentis: annus Hegiræ à Martio mense jam præterierat: & in alium annum Ægyptiacum excurrerat.

De sedis vacatione nullum aliud testimonium habemus ex nostris historicis, quorum summa est hoc loco negligentia. Nam in fine vitæ superioris postquam narraverunt familiaritatem Pachomii Episcopi Saca, cum Hamarowia, quod fines ab Arabum Fatimidarum incursionibus tutaretur, scribunt occasione vacantis Sedis Melchitas sibi Patriarcham ordinasse, superbèque admodum & insolenter adversus Orthodoxos, id est Jacobitas, se gessisse. Id cum audiisset Pachomius, munera deferens fructusque rariores ex provincia sua qui aliis in locis non facillè reperirentur, ad Hamarowiam retendit. Cùmque ille quædam de Arabibus nuntiare Episcopum existimasset, alter dixit se didicisse Melchitas Jacobitis

in

in fide contrarios, eò quòd Romanorum seu Græcorum doctrinam Jacobitis damnatam sequerentur, sibi Patriarcham constituisse: vereri se ne Græcorum Imperatori auxilium ferentes, ejus copias si navibus appellat, Alexandriam recipiant, seque illis conjungant. Hamarowia literas ad urbis præfectum scripsit, quas Pacomio tradidit, mandans ut quodcumque juberet Pacomius, exqueretur. Ille Alexandriam veniens, Patriarcham Melchitarum comprehendi jussit: apud quem sex suæ sectæ Episcopi reperiuntur, quorum ut & Patriarchæ vestes discidit: ipsius verò digitos manus dexteræ, quibus crucis signum benedictionis dandæ causâ formabat, abscondi jussit. Postea convocatis Episcopis, in Synodum profecti sunt omnes ad Vallem Habib.

Crudelitas
Jacobitarum
in Orthodoxos.

Jam verò observatum est secundum Elmacini, Makrizii & aliorum calculos Hamarowiam occisum fuisse antequam Chail obiisset: quâ ratione tota hæc narratio fabulæ loco habenda est, quod etiam ex Eutychio demonstratur; erat enim ille Patriarcha Melchitarum, quorum res ignorare vix poterat. Scribit porro anno 256^o mortuum esse Michaellem filium Bachami, Patriarcham Melchitarum, postquam 24. annis Cathedram tenuisset: nempe diu antequam Ahmed filius Toloni Egyptum obtineret. Ei successisse Michaellem Romanum, vel ut alia exemplaria habent, Gazensem, aut Azzensem, qui 34. annis sedit: atque adeo usque ad annum Hegiræ 290^{um}, quod ostendit quàm falsò Michael Episcopus Tanis factam ejus ordinationem scribat post Chailis obitum, vacante sede. Neque ullatenus verisimile est injuriam adeo insignem Patriarchæ suo illatam ab Episcopo sectæ contrariæ, taciturnum Eutygium si scivisset, aut nescivisse si fuisset. Imò non ferebat Arabum Principum consuetudo, ut in Ecclesiarum Antistites præsertim summos ita sævirent. Ignoravit hæc quoque Elmacinus, Makrizius etiam, & Autor Chronici: unde suspèctissima omnino videtur hæc narratio.

Suspècta videtur hæc historia.

Ut ad Gabrielem revertamur, ille à pueritia in Monasterio S. Marci Vallis Habib vitam Monasticam professus fuerat: & postea in quodam Monasterio quod Dorothei dicebatur, magna cum laude vixerat: ubi consuetudo erat ut nemo sineretur dicere *Alleluia*, in publica synaxi, quin totum Psalterium memoriter teneat: atque ita Monachi omnes psalmos absque codice recitabant. Ibi erat senex Maximus: tum alter Dorotheus, quem aiunt, Gabrieli prædixisse futuram dignitatem. Cùm enim Monachi benedictionis captandæ gratiâ ad eum venirent, simulque expectarent,

Gabrielis
primordia.

ut sermonem ad eos haberet, Gabrielem qui amore solitudinis & silentii abire properabat, retinuit, dicens fore ut sedere cogeretur inter maximam non modò virorum, sed etiam mulierum multitudinem.

Confessio
fidei à novo
Patriarcha
scripto dari
solita.

Cùm venisset Alexandriam ut ibi ordinaretur, petierunt Alexandrini, ut juxta consuetudinem exhiberet ipsis publicam fidei Confessionem manu sua subscriptam. Ille verò opus non esse dixit ut nova fidei formula conderetur, quam in hujus populi gratiam sua subscriptione firmaret: adhærere se symbolo fidei Orthodoxæ, quod trecenti decem & octo Patres Nicææ scripserant: nihil addi, nihil detrahi oportere. Hujus consuetudinis primum hoc in Jacobitica historia occurrit exemplum, scilicet ut novus Patriarcha scriptam, manusque suæ subscriptione firmatam fidei Confessionem daret: neque inter varios Canones, aut capita disciplinæ de Ordinatione Patriarcharum simile quidquam habetur. Solummodo præcipitur neminem eligi, de cujus recta fide non constet. Ridicula verò prorsus Gabrielis responsio, quasi non omnibus ferme hæreticis communis fuerit cum Orthodoxis professio Nicænæ fidei, quam non modò Jacobitæ, sed Nestoriani, sed tot diversi Monophysitæ qui ab aliis non recipiebantur, Orthodoxique præcæteris acceptabant. Quamvis autem de fidei professione scripto tradenda nullum à nobis præceptum reperiatur; non est tamen cur dubitemus, eam consuetudinem in plerisque Ecclesiis viguisse, cùm multæ ejusmodi reperiuntur in libris manuscriptis factæ à novis Patriarchis, & Episcopis, tum Jacobitis tum Nestorianis: & apud Jacobitas Antiochenos singularis lex observetur de pronuntianda fidei circa Eucharistiam confessione, de quo ritu dictum est alibi & in notis ad Liturgias.

Perpet. l. 4.

Postquam ordinatus est Gabriel, Alexandrini aureorum millensionem cui se decessor ejus suosque successores obstrinxerat, petierunt. Cùm pecunia deficeret, secutus pessimum Chailis exemplum, ordinationes illegitimas & simoniacas facere cœpit, adeo ut nemo Sacerdos nisi datis nummis ordinaretur. Confirmavit etiam *Denariatam*, ut veteri verbo barbaro exprimamus *Dinariat*, seu denarii aurei unius annuam ab omnibus Christianis, viris & foeminis exactionem. Colligebatur pecunia per Episcopos in sua cujusque Diocesi & ad Patriarcham deferrebat, qui soluto debito, reliquam in eleemosynas impendebat.

Vita ejus
Monasterio,

Cùm juvenis esset in Monasterio, carnem jejuniis omnique pos-

PATRIARCHARUM ALEXANDRINORUM. 331

GABRIEL
Patr. LVII,

nitentia genere affixerat, ut tentationes quibus vexabatur superaret. In dignitate constitutus, gravius tentatus, consilium à senioribus Monachis petiit, qui humiliatione & labore tali malo remedium quaerere consuluerunt. Igitur nocte post orationem colobio absque manicis tectus, cellas exteriores circuibat, latrinas mundabat, nemine sciente : atque ita post biennium tentatione liberatus est. Toto Patriarchatus sui tempore mansit in Valle Habib ; neque Misram aut Alexandriam venit, nisi urgentibus negotiis, statimque revertebatur. Sedit annis 11, obiitque 11^o Mechiri, sepultus ad S. Macarium. Annus obitus secundum Elmacinum est 311^{us} Hegiræ, J. C. 923^{us}, qui respondet anno Martyrum 639^o. In Canone Abulbircat annus obitus ejus assignatur 636^o, die 21^a Mechir : Ordinatio 625^o mensis Pachonis, die non apposito : tempus Patriarchatus, anni 10, menses 10. Malè in Chronico 21. anni ; nam annos 11. solum numerant Makrizius, Canon Kircherianus & alii. Sed valde aberravit Kircherus, dum initium regiminis assignat anno quo obiit : neque ut id semel moneamus, quemquam movere debet illius Canonis autoritas. Eum enim habens Kircherus, nihil aliud continentem præter nomina literis Ægyptiacis & Arabicis, ex isto Catalogo Canonem Chronicum ut conficeret, conquisivit ex Elmacino, & ab Abrahamo Echellensi accepit epochas qualescumque potuit, easque nullo delectu apposuit. Ipse enim non minus quam ejus interpretes ignoraverunt dare se non Orthodoxorum, sed hæreticorum Patriarcharum indicem, ideo omnia sus deque miscuerunt. Certum verò argumentum lector inveniet, in illo ipso indice, qui ubi ad Macarium 69^{um} Patriarcham perventum est, nullos jam annos adjunctos habet, quia illo loco desinit Elmacinus.

Docet Makrizius initio Pontificatus Gabrielis, aut anno antè, siquidem ordinatus est anno 301^o Hegiræ, J. C. 913^o, periisse incendio majorem Ecclesiam Alexandriæ, quæ *Anastasis* live *Resurrectio* dicebatur ; eo ipso loco quo fuerat olim Saturni templum, à Cleopatra Regina ædificatum. Apud Elmacinum eadem historia legitur : & quod ait templum illud *Kamschia* vocatum esse, videtur librarii peccatum fuisse, ex voce quæ resurrectionem significat, alteram istam efformantis. Eutychius utroque & tempore & autoritate superior, ita scribit : *Conflagravit Alexandria Ecclesia magna quæ Alkaisaria* (Cæsarea) *appellata est, templum-que fuerat, quod Cleopatra Regina Saturno sacrum exstruxerat.*

Ecclesia ma-
jor Alexan-
driæ incendio
consumpta.

Eutych. t. 2.
p. 503.
T. 1. p. 300.
t. 2. p. 327.

die lune 3^o mensis *Chewal*, anno 300^o : de quo etiam egerat alibi. Eam autem à Jacobitis occupatam per annos complures, Melchitis redditam cum aliis sub Cosina eorum Patriarcha idem Autor refert, ut superius observavimus. An verò ab illius tempore in eam restituti Jacobitæ fuerint, non planè liquet.

Res Melchitarum.

Nihil de rebus Ecclesiasticis Jacobitarum sub isto Patriarcha occurrit præterea. Quod Melchitas seu Orthodoxos attinet, Michaellem eorum Patriarcham mortuum esse anno Hegiræ 290^o, J. C. 902^o, scribit Euty chius, postquam annos 34. sedisset, vacasse sedem annis quatuor : postea ordinatum fuisse Christodulum Halepo, sive Berthoea oriundum, qui Hierosolymis ab Elia Mansuri filio ordinatus est : is autem erat Patriarcha Melchitarum Hierosolymitanus. Cumque Alexandriam Christodulus advenisset, Alexandrini negaverunt se eum recepturos, nisi super eum repeteretur oratio *Patriarchalis*, hoc est oratio ad Patriarcham benedicendum : quod factum est anno 294^o : seditque ille annis 26 : atque adeo ad annum usque Hegiræ 320^{um}, J. C. 932^{um}. In magna sanè calamitate fuisse tunc Ecclesiam Græcam, quæ erat Alexandriæ, dubitare non possumus : tantaque est historiæ ex qua successio Antistitum designari potest, obscuritas, ut vix ubi pedem figere liceat habeamus. Eam quoque interruptam fuisse nec semel, certissimum videtur.

Successio
Principum
ex familia
Toloni.

Ut verò secundum instituti nostri rationem paucis explicetur successio Principum Ægypti ex familia Tolonidarum, præclara illorum conditio fuit sub Hamarowia ejus filio, triginta filiorum quos moriens reliquit præcipuo, qui post ejus mortem, Ægypti, Syriæ, Antiochiæ, Adanæ, Melisæ, Tarfi, & ditionum quæ his urbibus adjuncæ erant, principatum obtinuit, ab anno 270^o Hegiræ usque an. 282^{um}. J. C. 895^{um}. Fuit admodum strenuus, multaque bella gessit adversus Muahicum Mutamidi Calisæ fratrem, salutatî anno 256^o : cujus imperium fuit annorum 23. Varia fuit bellorum illorum fortuna : sed ita tamen, ut Hamarowia, etsi clades aliquas insignes acceperit, semper summam in Ægypto dignitatem obtinuerit.

Califarum
potestas im-
minuta.

Successit Mutamido, Mutadidus ejus ex fratre nepos anno Hegiræ 279^o, cum quo pacem habuit Hamarowia, niuis maximis muneribus, promisso etiam tributo annuo ducentorum millium aureorum : datis quoque trecentis millibus, pro annis præteritis. Ea ratione accepit à Calisâ investituram omnium provinciarum

quas pater ejus, aut ipse possederant, eamque duraturam ad annos triginta : missa ad eundem Hamarowiam cidaris, vestis, ensis, & reliqua principatus insignia. Id quippe solum Califis supererat ex pristina sua amplitudine, ut occupatas à variis ducibus, etiam ignotis quibusdam rebellibus Provincias, beneficiario jure possidendas concederent, ita ut in Califarum clientela essent, aut esse se profiterentur : Oratio in Meschitis publica, quam *Corbet* appellant, Califæ nomine fieret, nummus eorum nomine signaretur : pro literis Investituræ & in supremæ dignitatis agnitionem munera mittere solebant, & quidem amplissima. Pecunias tributi nomine, etsi Hamarowia contulerit, tamen rarius id postea factum est, à beneficiariis illis principibus, quales omnes fuisse qui amplissimos postmodum principatus fundaverunt, ut *Deilemitæ* ex *Bouïadarum* stirpe, *Seljukidæ*, & alii, qui spoliatis omni sæculari autoritate Califis, solam ipsis spiritualem jurisdictionem reliquerunt, cujus præcipua dos esse videbatur, ut *Muhamedis* terræ domini nomine, provincias distribuere ducibus qui eas occupaverant. Aliter omnino se habuerunt *Fatimidæ*, de quibus mox dicendum erit, qui utramque autoritatem valere jusserunt, seque Califas appellaverunt. Verùm utrique à Califis nihil timebant : Hamarowia non item, qui non satis confirmatam autoritatem, hoc quasi religionis velo retinere satagebat, apud superstitiones, quales erant *Syri* & *Ægyptii* : tum etiam cavebat ne quis ex tot purpuratis in aula & exercitu potentissimis, qui fere omnes *Turcicæ* erant originis, *Ahmedis*que in prætorianorum militum numeris commilitones, ab eodem Califæ Præfecturam *Ægypti* obtinerent. Eam itaque dignitatem armis & prudentia ita stabilivit, ut cum summa potestate per annos duodecim, vastas illas provincias obtinuerit. Adjunxit etiam sibi Califam per connubium cum filia sua *Katermeda*, quam *Motadido* despondit. Erat is *Muafiki* filius, qui mortuo ex crapula *Motamido* successus est anno *Hegiræ* 279. J. C. 892°. Is *Motadidus* 16^m fuit ex familia *Abbasidarum*, regnavitque annis 10, mortuus anno 282°, J. C. 920°. Hamarowia qui filiam suam Califæ filio collocare voluerat, eam ipsi *Motadido* libentiùs collocavit : tantaque nuptiarum magnificentia fuit, ut ærarium suum intempestivo illo fastu exhauferit. Mira de toto illo apparatu narrant historici, atque inter alia quod à *Misra* usque *Bagdadum* in singulis mansionibus palatia filia ædificaverit, ornata pretiosissima suppellectile, cum ingenti servorum

Makrizi. l. I.
descript. Ægy-
pti.

B. b. Orient.

numero : dona infinita simul misit : adiungitque Calisam qui Hamarowia factum & profusionem uoverat, libenter ad has nuptias adiecisse animum, ut eum opibus spoliatum facilius in ordinem redigeret. Ingentem quoque pecunie vim effuderat Hamarowia in ædificia amplissima, quæ paternis adjunxerat, eo in loco quem *Katabia* vocabant prope Misram, usque ad montem Elmoktam, qui est urbi contiguus. Præter arcem & palatium, magnum ambitum muris cinxerat, ubi milites prætorianos collocaverat, secundum diversas nationes, diversa quoque loca ipsis attribuendo, ut tanquam in castris, sub ducum disciplina & oculis principis essent, neque facile possent tumultuari. Ibi erat Hippodromus, & alia ædificia multa ad aulae ministerium necessaria : equilia sex aut septem millium equorum capacia : tum stabula ad camelos & alia iumenta innumera. His ædificiis multa alia superaddidit Hamarowia : Hippodromum aliò transtulit, & in eo loco hortos fecit, luxu tanto ut nihil ad voluptatem aut ad dignitatem deesse videretur. Exercitum habebat numerosum, & quotannis nongenta aureorum millia ad eum alendum expendebat : præter cohortes prætorianas ex selectis militibus, inter quos ipse pugnabat, nec semel cladem acceptam cum illis copiis reparavit, hostesque deleta exercitus sui parte victores, in fugam vertit. Sufficiebant his sumptibus amplissima Ægypti, & aliarum provinciarum vestigalia. Ex Ægypto jam ab Ahmedis filii Tolonis tempore colligebantur quater milles mille & trecenti mille aurei denarii : ita enim meliores Aureores, non ut Elmacinus trecenties milles mille & trecenti mille aurei : qui error librarii, fraudi fuit viro clarissimo, dum in Bibliotheca sua Orientali annuum sub Tolonidis reditum Ægypti trecentorum millionum fuisse ait, quod omnem fidem excedit : neque enim talis ex tributis summa conficiebatur, cum Arabes Ægyptum quam rapinis & tyrannide exhaurerant, integram obtinerent. Trecenti verò miliones aureorum, sexcentos miliones circiter librarum nostratum efficerent. Perit eo ipso anno nuptiarum filia Hamarowia, cum esset Damasci, non conjuratione principum, aut immixtis sicariis, ut quidam Auctores scribunt ; sed in hunc modum. Erat perditæ in masculos libidinis ; cumque in balneo turpia patrare in puerum ministrantem conaretur, isque injuriam pati noluisset, cum ad necem usque verberari coram se iussit. Conservi, odio tantæ sævitæ, impotentisque libidinis dominum suum in strato dormientem obtruncaverunt, quod in Ægy-

PATRIARCHARUM ALEXANDRINORUM. 335

GABRIEL
PART. LVII.

pro vix potuissent. Habebat enim leenam mansuetam, custodem corporis sui, ita edoctam, ut dormienti, ad pedes cubans, neminem etiam ex notioribus & magis familiaribus Eunuchis accedere pateretur, donec evigilaret : sed fida illa custos in Ægypto remanserat. Hic finis Hamarowiz fuit, tam frequens, in historia illa barbarica, ut exempla inde maxima duci possint : parum valere absolutam illam, & tyrannicam principum auctoritatem, qui nulla lege nisi voluntate sua obstricti, duri, crudeles, quotidianis cædibus terribiles, non modò subditos, sed ne quidem servos fideles habere potuerunt. Neque enim in omnium sæculorum historia tot occurrunt rebellionis, perfidiæ, cædiumque domesticarum exempla, quot in duobus vel tribus admodum Saracenicæ historiæ sæculis : aut magis insanarum libidinum in propudiosa illa religione, quæ greges pellicum habere sinit.

Occiso Hamarowia successit filius ejus Gisch, qui anno 283º depositus est à Tagagio Damasci præfecto, moxque occisus, substitutusque in ejus locum Haron frater ejus : qui dignitatem retinuit usque ad annum 292^{um}, quo perit, occisus à patruis Schiban & Adi filiis Ahmedis filii Tolonis.

Anno 289º quo obiit Mutadidus, creatus est Califa Moctafi 17^{us} Abbassidarum, qui obiit anno 295º. Is cum labasceret in Ægypto dignitas Tolonidarum ob Haronis imperitiam & juventutem, tum avunculorum adversus eum conjurationem, Schibano Viziri Ægypti munus contulit : sed mox incautum oppressit, suffecto ei Muhamede Solimani filio, qui Emir Ægypti à Califa institutus est. Ita pristinam auctoritatem ea in provincia quodam modo Califæ recuperaverunt, sublati Tolonidis : Eodemque anno Muhamedi subrogatus est Isa Nouchiri : isti demum Muhamed filius Hali Halengi anno 292º Hegiræ.

Anno 295º Muftadirus Califa renuntiatus est anno ætatis 13º, regnavitque usque ad 320^{um}, J. C. 932^{um}. Tantæ paucis annis mutationes rerum fuerunt, ut nulla jam ferme Califatus antiqui forma superesset, lacerato per diversas rebelliones Imperio, occupata à Safariis, Tabaristana, Chorasana, & aliis vicinis provinciis : Carmatianis quoque Arabiam & alias regiones magna cum Muslemanorum strage vastantibus, exortis tandem circa eadem tempora Fatimidis, qui duce Obcidalla Ægyptum occupaverunt. Hæc fusiùs exponenda forent, si Orientalem historiam scriberemus. Verùm quando quidem res Ecclesiasticas, non politicas

prosequimur, hæc sufficiunt ut intelligatur quæ tunc esset Ægypti conditio.

COSMAS
Patr. LVIII.

COSMAS PATRIARCHA LVIII.

PAUCA etiam admodum de hoc Patriarcha habet noster historicus, qui absque ullis rerum circumstantiis, aut temporis nota, eum ordinatum fuisse scribit, post mortem Gabrielis, nempe anno Hegiræ 311^a, J. C. 923. secundum Canonem Abulbircat anno Martyrum 636^o, qui ut superius diximus, si Coptitarum calculi recti sunt, respondet anno J. C. 920^o, qui est Hegiræ 308^{us}, non 311^{us}, etsi eundem Makrizius assignat. Elmacinus non omnino constat sibi, nam annus Muṭadiri 7^{us}, quo Gabrielis initium definit, est Hegiræ 302^{us}; à quo si undecim numerantur, primus Cosmæ erit 313^{us}, non 311^{us}.

Res Æthio-
picæ.

Præcipuum argumentum hujus historiæ est, quòd Cosmas Patriarcha constitutus, in Æthiopiam misit Metropolitam à se ordinatum. Cùm verò rara hæc admodum & singularis narratio sit, auctoris ipsa verba apponere visum est. *Magna sanè, inquit Auctor, & mirabilis res accidit ejus tempore, nempe quòd ordinavit unum ex Monachis Metropolitam Æthiopie. Ea autem regio vastissima est, atque ipsa est regnum Saba, ex quo Regina Austri ad Salomonem Regem Davidis filium venit. Cùm Rex circumire regnum illud suum vult, integrum annum consumit in itinere, dominicis diebus exceptis, donec ad locum unde profectus est redierit. Ea regio est India vicinisque provinciis finitima; estque subjecta Sedi Evangelicæ D. Marci ad hanc usque diem. Ex illis porro verbis apparet, traditionem vulgarem illam quam hujus & superioris sæculi Auctores omnes qui de rebus Æthiopicis scribere, acceperunt, & nobis tradiderunt, jam ante aliquot sæcula apud Alexandrinos receptam fuisse, quòd scilicet Regina Austri ex Æthiopia propriè dicta advenisset, atque ex eo itinere prima cognitionis Dei Israelis indicia in patriam retulisset, unde etiam ritus Judaicos multos atque ipsam circumcissionem apud se originem habere scribunt Æthiopes. Videnda quæ de hac traditione primus scripsit Damianus de Goëz in libello non contemnendo de Moribus Æthiopum, Franciscus Alvarezzius in Itinerario, & deinde qui historiam & res Æthiopice præ cæteris illustravit Baltazar Tellezius Lusitanus Societ. Jesu in historia sua verpacula; tandemque Jobus Ludolfus,*

L. 2. c. 4. § 5.

Ludolfus. Nec illi solum, sed plerique Arabes testes sunt huius traditionis, ut inter alios Abuselah Armenus, qui *Nejafchi* ita vocant Æthiopiarum Regem, quem *Negusch Negulchar* sui vocant, hoc est *Regem Regum*, à Salomone per Menileck filium originem ducere existimant, atque adeo plerosque Æthiopas esse ex Israelitica stirpe, sed quosdam etiam se à Mose, per uxorem Æthiopiissam prognatos gloriari scribit Abuselah.

Æthiopum
traditio de Is-
raelitica sua
origine.

De ejusdem Regni amplitudine nihil refert Autor, quod non aliorum ferme omnium Autorum testimonio confirmetur: & quod aiunt Provincias illas omnes antiquitus subjectas fuisse Alexandrino Patriarchæ, verè istud ab Alexandrinis dicitur, eos enim esse ex illa *Axumitarum* gente, ad quos Frumentius quem *Fremonatos* vocant, cum Ædesio ab Athanasio missus sit, omnes ferme consentiunt. Quod verò ad Jacobitarum hæresin defece- rint, non alia causa fuit, quam vastitas finitimarum provinciarum per Muhamedanos facta; nam primis annis, & integro ferme post Ægyptum captam sæculo, cum Melchitæ seu Orthodoxi, tanquam Græcæ religionis, additissimi essent Constantinopolitani Imperatoribus, apud Arabes in magna semper novarum rerum suspitione fuerunt. Unde usque ad Cosmam de quo dictum est superius, per annos ferè centum Patriarchis caruerunt. Interea Jacobitæ, qui ante Muhamedanorum dominationem, metu Legum Imperialium in Monasteria, & præsertim remotiora Sahid sive Thebaidis fugerant, ibique Patriarchas & Episcopos habuerant, facile in Æthiopiam conterminam penetrare potuerunt. Cumque Episcopos non haberet Æthiopica Ecclesia, nisi quos Metropolita suus ordinabat: is autem à nemine præterquam ab Alexandrino Patriarcha ordinaretur, dubium esse nullum potest, quin Metropolita illi, si qui fuerunt à Jacobitis ordinati, eandem sectam professi fuerint; atque ut Sacerdos, ita & populus Æthiopum barbarus, illiteratus, inscius rerum omnium quæ adversus Hæreticos in Concilio Calchedonensi constitutæ fuerant, eandem hæresin imbiberit, & huc usque servaverit. Ex ea etiam calamitate Ecclesiarum sine Episcopis, quam diuturnam fuisse verisimile est, cum hujus Metropolita missio, quasi novum quiddam & inauditum prædicetur, aliud quoque malum natum est, quod scilicet etiam Sacerdotibus Æthiopes caruerint, & in disciplina Ecclesiastica multis modis peccaverint, ut dicitur in singulari Dissertatione de Ecclesia Æthiopica. Porro si conje-

De regni
amplitudine
& ad hæresin
defectione.

Reges Sa-
cerdotes.

Ætæ locus est, non alia ratio fuit cur Reges Æthiopiz & Nubiz Sacerdotes fuisse à multis autoribus scriptum sit: præsertim ab Abuselah & quibusdam alijs. Æthiopia Reges omnes sunt Sacerdotes, inquit Abuselah, Liturgiam celebrantes super altaria; & quamdiu regnum obtinent, nihil quidquam manu propria occidere solent: si quis contrà fecerit, amittit jus Liturgiz, & Reges omnes quas antea promulgavit irrita fiunt. Idem de Nubijs dixerat, quorum par omnino conditio in ea Ecclesiarum calamitate fuit. Non ignoramus, quàm multa à doctissimis viris scripta sint adversùs famosam illam Presbyteri Joannis appellationem, quæ ante ducentos & amplius annos passim ab omnibus Æthiopiz Regi tribuebatur: quàm plerique laboraverint ut ostenderetur, nomen illud Presbyteri, ex aliquo alio detortum: cujus etymon dum in Persica lingua Scaliger invenisse existimavit, nugæ effudit nugacissimas. Alii non adeo docti, cum originem hujus nominis quæsierunt, illudque Æthiopiz regi convenire pertenderunt, etsi doctis delirare videbantur, habebant tamen testimonium ex Arabico libro ante annos quadringentos scripto, in quo res ipsa traditur, etsi non nomen Presbyteri, sed functiones tantùm ei attribuantur. Plura nos docere possent aut sanè deberent, qui integros & ponderosos de rebus Æthiopicis commentarios ediderunt, qui illud solummodo nobis demonstrant frustrà ingratum laborem trahi, in explicandis rebus obscurissimis, quando defunt literaria præsidia, ut in hoc genere defunt. Nam etsi nihil simile legatur apud Autores nostros, præterea nihil ex literatura Æthiopica Jobus Ludolfus agnoscere potuerit, non est tamen cur dubitemus aut ita fuisse, aut Abuselah, vel qui similia scripserunt ita credidisse. Neque erat quod eos offenderet, quia nihil obstabat quominus crederent eum qui regiam autoritatem habebat, potuisse Sacerdotem esse, cum Sacerdotibus in tota Orientali Ecclesia uxores post Ordinationem retinere licuerit. Plura Autores non intellexerunt. Nos verò quantum conjecturâ assequi possumus, existimamus Reges illos cum ex illa quam Arabes intulerunt vastitate, non modò Metropoli, sed Episcopi & Sacerdotes deficerent, ex zelo, sed non secundum scientiam, Liturgiz quamdam speciem adumbrasse, ut ita regiz majestati, ex Sacerdotio cumulata autoritas accederet. Ubi verò Sacerdotum & Episcoporum copia fuit, evanuit illud Regum Æthiopiz Sacerdotium. Sciunt porro qui laboriosum opus viri clarissimi Jobi

Ludolfi legerunt, eum nihil omnino reperisse quod ad illorum temporum historiam illustrandam conferre posset. Jam reliqua prosequamur.

Metropolita ille qui in Æthiopiam missus est, Petrus vocabatur : eum Rex benevolè suscepit, & in honore habuit. Postea cum finem vitæ suæ appropinquare sentiret, accersito coronam tradidit, filiosque duos ejus curæ commisit, atque ita locutus est : *Tu es Vicarius Regis Christi Dei magni, in cujus potestate sunt omnia regna mundi : Regnum igitur meum & filios meos trado tibi, ut tu eos regas secundum voluntatem Dei : eum ergo quem digniorem melioremque judicaveris, ipsum coronâ imposîtâ regem constitue.* Postea rex obiit, cumque Metropolita juniorem filium, majore digniorem judicasset, eum coronavit. Interea venerunt in Æthiopiam Monachi duo, Mennas ex Monasterio S. Antonii, & socius ejus nomine Victor, vagabundi & regiones circumeuntes, qui Metropolitam adiverunt, pecuniamque ab eo postulaverunt. Cum nihil obtinuissent, unus eorum sumto Episcopali habitu, falsas simul tanquam à Patriarcha Alexandrino literas exhibuit, quarum hæc erat sententia. Accepisse se quod impostor quidam nomine Petrus in Æthiopiam profectus esset, se pro Metropolita venditans literasque falsas deferens : monere igitur, neque eum verè Metropolitam esse, neque à se ordinatum, aut scriptas à se literas ; verùm qui præsentem Epistolam deferret, eum esse Metropolitam : jubere igitur ut statim atque Epistolam perlegissent, Mennam in folio Metropolitanorum collocarent, Petrumque expellerent : præsertim cum ut famâ vulgatum erat, contempto majore Regis filio contra jus & fas, minori regnum detulisset. Major principum privatam vitam agebat, paucis admodum ei conjunctis : sed cum falsas illas literas accepisset, audacior factus copias congregavit, lectisque publicè literis, fratrem bello aggressus, cepit & in carcerem conjecit : tum Mennam quasi Metropolitam Petri loco constituit, quem in exilium misit. Postea relatum est Patriarchæ quidquid in Æthiopia à duobus nefariis illis Monachis perpetratum fuerat, fugiente in Ægyptum Victore, postquam Cellam falsi illius Metropolitanæ socii sui spoliasset. Patriarcha re intellecta Mennam excommunicavit : eumque Rex Æthiopiæ occidi jussit. Misit qui Petrum ab exilio reducerent, sed jam obierat. Discipulum ejus comitem accersivit ut ejus loco Ecclesiam administraret. Petiit ille ut facultas sibi daretur proficiscendi in Ægy-

Metropolita
Æthiopiæ à
Rege suscep-
tus.

ptum, ubi ordinaretur, pollicitus se rediturum. Negavit Rex; cumque, quamvis ordinationem non accepisset, coegit pro Metropoli se gerere, atque ita permanisse aiunt usque ad Philothei Patriarchæ tempora: quod tamen videtur impossibile: nam etiamsi ultimo hujus Patriarchæ anno hæc contigissent & Philotheus statim Metropolitam Æthiopix ordinasset, anni intercurrunt fere septuaginta, quot Discipulum Petri vixisse in ista dignitate credi vix potest. Unde cum ipse Autor Historiæ, testetur quinque sequentes Patriarchas nullum Æthiopibus Metropolitanam ordinasse, verisimile omnino est Ecclesiam illam absque Antistite, Episcopisque fuisse per annos multos, ut superius à nobis dictum est. Reliqua dicentur in vita Philothei: ubi magis lucere incipit historia Æthiopica. Nam in omnibus qui de ea scripserunt autoribus, nomina Regum nuda reperiuntur, sed quando vixerint, in obscuro est. Notandum etiam obiter quàm nulla Ludolfo fides adhibenda sit, qui in Historia sua Æthiopica, ut suæ Lutheranæ causæ serviat, illud *Georgio* fusè probare conatus est, Regem summam potestatem habere circa sacra; quod nullo alio argumento adstruit, quàm ex iis quæ his postremis temporibus acta didicit, ab Æthiopix Regibus, quo nihil magis absurdum. Nam si ex eorum literis & precibus, ad Alexandrinos Patriarchas, pro Metropolitanorum ordinatione summa illa Regum in sacris autoritas probari existimatur quod viro doctissimo placuit, at vel eo solo exemplo, imò lege constanti & perpetuâ, hanc ejus opinionem everti contendimus. Certum enim est nunquam Regis de Metropoli iudicium aut postulationem expectatam fuisse, verùm quancumque missus Metropoli in Æthiopiam legitur, is fuit quem elegerat Patriarcha, non quem Rex designaverat. Aliter, nemo non fatebitur daturus statim operam Reges fuisse, ut haberent plures Episcopos & Metropolitanos, quantum secundùm Canones satis esset ad Metropolitanam ordinandam; quod, ut alio loco dicetur, obtinere nunquam potuerunt. Et tamen maxima, si quæ unquam, Ecclesiæ Æthiopice necessitas id postulabat, ne per annos multos absque Episcopis essent, imò & absque Sacerdotibus. Magnum etiam Patriarchalis supra Regiam autoritatis in rebus Ecclesiasticis indicium est, quod omnes ad hæc usque tempora, quorum tanquam Æthiopix Metropolitanorum memoria occurrit, tam apud Arabes, quàm apud Æthiopes, alienigenæ fuerunt, juxta disciplinam quæ Nicænis Arabicis Canonibus con-

tinetur, contra mores omnium Ecclesiarum, commodaque regni publica: quam quidem consuetudinem sublaturus Reges fuisse, si suprema illa sacrorum jura habuissent, non est dubitandum. Sed enim id non audebant, gnari ordinationem nullam esse nisi per impositionem manuum Episcopaliū, & cum illius Patriarchæ quibus suberant autoritate. Quod si legisset Ludolfus ea quæ Rex cujus nomen ignoramus, fecit dum Petri discipulum coegit pro Metropoli tæ Ethiopiæ se gerere, eo exemplo fortassis usus fuisset, tanquam argumento validissimo. Verum quidquid contra leges factum est, & superiori judicio condemnatum, non potest transire in rem judicatam. Certissimum autem est Patriarchas Alexandrinos nunquam, attentata illa contra communem omnium Ecclesiarum disciplinam probavisse, neque ex paucis exemplis quæ necessitas & summa ignorantia produxerunt, quidquam secutum, nisi ut quando licuit, omnia in pristinum statum restituerentur, ut sub Philotheo Patriarcha factum videbimus. Quod verò hic adjicitur jussisse Regem, ut successor Regni à Metropoli designaretur, tum quod scribit Abusclah Reges Ethiopiæ non aliter inaugurari, quam acceptâ coronâ, & simul impositione manus à Metropoli tæ, in Ecclesiis S. Michaelis & sancti Georgii sub illorum imaginibus, satis ostendit, quàm isti barbari alieni sunt, ab ea quam ipsis affingit Ludolfus, de regia super Ecclesiasticam potestatem autoritate, opinione.

Etsi porro Autores nostri duodecim annis sedisse Cosmam asserant, tamen præter ordinationem Metropolitæ Ethiopiæ, ne literam quidem de eo scribunt, nisi quod obiit 3^a mensis Phamenot, anno Hegiræ 323^o secundum Elmacinum, cum Macarii successoris ejus ordinationem eidem anno assignet, qui fuit J. C. 934^{us}, atque adeo Martyrum 650^{us}: ad quem calculum proximè accedit Canon Chronicus Abulbircat, qui obitum ejus refert ad annum Martyrum 649^{um}. Quia verò mensis Phamenoth in Calendario, Martio ferè respondet, annusque incipit à Toth seu Septembri, idcirco hæc differentia non difficulter conciliari potest. At sedisse illum scribit Autor idem annis 13, nempe ab anno Martyrum 636^o, quo ejus ordinationem assignat; quique fuit J. C. 920^{us}. Hunc verò Cosmam planè omisit Catalogus Kircherianus.

Obiisse circa illa tempora Christodulum Melchitarum Alexandriæ Patriarcham scribit Eutychius, anno, ut ait, Hegiræ 320^o,
Vu iij

Christodulus
Orthodoxo-
rum Patriar-
cha.

qui est Diocletiani 649^{us}; sed ut superius ostensum est, triennio fallitur, cum Hegiræ 323^{us} sit, J. C. 934^{us}, Martyrum 650^{us}.

Damasci
Ecclesiæ spo-
liata.

Refert Makrizius, postquam Cosmam annis 12 sedisse scripsit, anno Hegiræ 312°, J. C. 924°, Muslemanos Damasci Ecclesiam S. Mariæ Virginis incendisse, vasaque & ornamenta omnia abstulisse, quæ maximi erant pretii. Vicinas quoque Ecclesias multas pari modo spoliavisse, tam Jacobitarum quam Nestorianorum. Eutychius hanc Ecclesiam fuisse ait, quæ *Catholica* appellabatur: & quæ aureorum ducentorum millium sumtu ædificata fuerat. Spoliata quoque Monasteria vicina, atque inter alia, Sandimonialium. Remanæ duas Melchitarum Ecclesias diruerunt, sancti Cosmæ & S. Cyriaci; Ecclesias quoque Ascalonensem & Cæsariensem: querelâ ad Mustadirim delatâ, iussisse illum ut iterum ædificare eas liceret, testantur historici.

E' MAC. p. 196.

Eutych. l. 2.
p. 512. & 513.

P. 115.

Ex eodem Eutychio discimus anno 311° Muslemanos Tennesæ, Ecclesiam Melchitarum quæ erat extra arcem, diruisse; quæ *appellatur*, inquit Pocockius interpretes, *Ecclesia Burhaur*; legendum, opinor, *Buêtor*, hoc est Victoris, cujus titulo plures Ecclesiæ in Ægypto extitisse leguntur: Eam cum reparare ex integro Christiani cœpissent, tumultuatos iterum Muslemanos, opus diruisse: Calisæ tamen autoritate ad finem perductum fuisse.

Præfecti
Ægypti.

Sub Mustadiri ejusdem Calisatu magna Præfectorum Ægypti alternatio fuit. Anno 293°, Isa El-Nuchri restitutus, Emiri dignitatem obtinuit rursus ad annum usque 298^{um}. Huic substitutus est à Calisâ per annos quinque; & anno 303°, Deka Rumeus, quo dejecto restitutus est Tekin anno 306°. Adversus eum missus Mahmud filius Gemil anno 309°, postea Halalf Beder, anno 310°; quo deposito, institutus est à Calisâ, Ahmed filius Kiklage, Anno 312° Tekin artibus, pecunia, vi grassatus, quartò tandem Ægypti Præfecturam obtinuit, & tenuit usque ad annum 320^{um}. In hunc modum Ægyptus multis modis vexata est; quamvis enim extinctis Tolonidis, videbantur Calisæ pristinam auctoritatem recuperasse; tamen cum numerosos exercitus Emiri in potestate haberent, magnasque pecunias, quando exhausti erant muneribus, & auro ad Regiam Bagdadensem misso, accedebant Duces copiarum aliqui ex Turcica illa militia qui provinciam licitarentur, novasque à Calisæ literas impetrabant, ut suo periculo veteres Præfectos expellerent, & in eorum locum succederent.

PATRIARCHARUM ALEXANDRINORUM. 343

COSMAS
PATR. LVIII.

Nihil enim Principes illi ad se pertinere arbitrabantur, an provincia rectè administraretur, modò suam in ea auctoritatem conservarent; quod faciliùs futurum existimabant cùm pecuniis militeque exhausta foret, ut fuit sanè paucis annis post exactos Tolonidas. Sed barbara illa & tyrannica politica illis fraudi fuit: nec enim potior amissæ dominationis Ægypti, quæ nunquam deinde ad Calisus rediit, causa existimanda est, quàm frequens hæc Vizirorum & Præfectorum mutatio. Nam dum illorum dignitatem & auctoritatem ne nimia esset sicut Tolonidarum fuerat, imminuere satagebant, eosque absque ulla ratione deponere & spoliare cœperunt, fecere ut illi in favore militum præsidium quærent; & paulò post Tekin moriens, apud illos egit ut filium suum juramento præstito Emirum Ægypti salutarerent. Sed eum deponendum curavit Muhamed filius Taagi El-Akchid Farganensis; qui anno 320º, pulsus ab Ahmede filio Kiklage, anno 323º dignitatem recuperavit, retinuitque usque ad an. 334.

Quantum ad res Christianas præter illa quæ huc usque retulimus, nihil ferme occurrit apud Muhamedanos scriptores, nisi quod Autor Historiæ Ægyptiacæ Ebn-Werdi refert, ad annum Hegiræ 296^m Muçtadini Calisæ edicto prohibitum ne quis Christianis aut Judæis uteretur, præter quàm ad medicinam, & negociaturam, utque vestibus furvis induerentur, haberentque assumenta diversi coloris, de qua lege jam olim promulgata sub antiquioribus Calisus jam dictum est. At vix credibile est, non aliam calamitatem sustinuisse Christianos, in tanta dominorum mutatione; sed deficiebant, ut videtur memoriæ rerum gestarum, quæ ad aliquorum hujus sæculi Patriarcharum Historiam spectabant.

Addit Makrizius Vizirum Isam anno 313º, cùm in Ægyptum venisset, tributum novum Episcopis, Monachis, & pauperibus indixisse: illos verò Bagdadum misisse & à Muçtadiro Calisæ præceptum obtinuisse, ne quidquam ab illis ultra consuetudinem exigeretur.

MACARIUS
Patr. LIX.

MACARIUS PATRIARCHA LIX.

Macarii
ordinatio.

DE hoc etiam Patriarcha nihil habetur, nisi quod ordinatus fuit post decessum sui mortem, eodemque anno Martyrum 649^o, qui est J. C. 933^{us}, mense Farmuthi, die tamen non assignato: at quia mensis ille sequitur proximè eum quo alter obiit; sedes non ampliùs mense uno, & biduo minùs vacasse deprehenditur. Ordinationem ejus refert Elmacinus, & ex eo Makrizius ad annum Hegiræ 323^{um}, qui est J. C. 934^{us}, exiguâ sane differentiâ, sedisseque annos 20, omnes consentiunt, hoc est usque ad annum Hegiræ 343^{um}, vel Martyrum 669^{um}, mortuumque esse 24^æ mensis Phamenoth. Oriundus erat ex pago quodam regionis El-Rif, *Chebra Kebala* appellato: professusque erat vitam Monasticam in Monasterio S. Macarii ad Vallem Habib. Statim atque ordinatus est, Alexandria discessit, neque enim manere solebant in ea urbe Patriarchæ, ex quo Chail possessiones ad Ecclesiam pertinentes venderat. De eò nihil aliud refertur, nisi quod ad pagum ubi natus erat profectus est, matris quæ superstes erat visendæ gratiâ; ad quam cum venisset, ornatu Patriarchali, comitantibus Episcopis, ea se loco non movit, nec ullum illi aut Episcopis honorem detulit; sed stens, dixit malle se ut ad eam mortuus in feretro delatus fuisset, quàm eum tali pompa & fastu ad se ingredientem conspiceret: ea de causa se esse tristem nec lacrymas continere, quia cogitabat, eum de peccatis tam numerosæ multitudinis rationem Deo redditurum: ita confusus recessit. Plura de eò non leguntur, nec in historia Patriarchali, nec apud Elmacinum.

Res Muham-
medanz.

Quæ verò ad ista tempora pertinent, ita se habent. Mustadirus anno Hegiræ 320^o, in prælio contra Munefum rebellem qui Mosulam occupaverat, occisus est, cum regnasset annos 25, quod nemini Califæ ante eum contigerat. Bis depositus fuerat, & dignitati restitutus. Eo mortuo, in ejus locum substitutus est Muhamed Abulmanfor Kahirbilla, vulgò Kahirus. Anno 322^o depositus est, adeoque contentus, ut vitâ ei concessâ, ad Melchitarum ostia mendicare coactus sit. Sub ejus Imperio Ægypti præfecturam obtinuit Muhamed filius Taagi cognomine Akhid, qui provinciam cum absoluta autoritate, non modò quandiu vixit, tenuit, sed filiis etiam transmisit, Successit Kairo Ahmed Abul Abbas, Elredi billa Elredi vulgò per syncopam

Elmac. p. 193.

PATRIARCHARUM ALEXANDRINORUM. 345

MACARIUS.
Patr. LIX.

Synopam dictus, aut *Arradis*, ut Erpenius, & alii, juxta leges grammaticas morosi, efferre solent. Erat autem Muscadiri filius, & decessoris sui ex fratre nepos. Obiit anno Hegiræ 529°. Porro cum magna rerum mutatio facta fuerit sub illo Principe, qui præter Bagdadum amiserat antiquam omnem Califarum ditionem, paucis explicandum est, qualis tunc foret status Muhamedanorum Imperii.

Califæ quidem etiam in proprio solo, nihil præter nomen & titulum *Imperatoris fidelium* supererat: nam Viziri autoritatem omnem ad se traxerant: eos etiam sustulerit El-Redi, tamen novam in aula sua dignitatem instituit, aliâ superiorem, quam Muhamedi filio Raiki contulit. Eum enim designavit Emirum supremum, seu *Emirum Emirorum*: nempe ut omnibus Emiris seu Purpuratis dignitate & autoritate superior, non modò negotia omnia administraret, sed etiam Califæ loco concionem haberet ex ambone in Meschitis, & vexillum præ se ferri juberet. Ille verò & ejus successores eam autoritatem nacti, Califs nonnisi titulos inanes reliquerunt. Alii quoque diversarum familiarum principes qui Bagdado potiti sunt, eam Emiri supremi dignitatem sibi conferri satagebant, atque ita quasi familiares Califæ & ejus Vicarii eos in potestate habebant. Quomodo autem multæ provinciæ occupatæ à diversis familiis tunc fuerint, paucis verbis explicat Elmacinus. Ineunte, inquit, anno 325°, J. C. 936°, mundus erat in manibus victorum, qui reges terræ erant; nam quicumque regionem aliquam obtinebat, regem se appellabat, & ab aliis cæteros depellebat. Basora, Wasset & Ahowaza erant in potestate Abu-Abdallæ Baridæi & fratrum ejus. Erat ille Veredariorum magister, qui eas regiones occupavit, sed ejus familia post paucos annos extincta & in ordinem redacta est. Persia erat in manu Hamadeddoulæ filii Bowiæ, & Mardawigeorum: primi totum fermè Orientem deinde occupaverunt, & Mardawigeos debellatos spoliaverunt. Mausila, Diarrabia, & Diarbekra erant in manu filiorum Hamadani: qui ex Arabica origine summam per annos aliquot dignitatem obtinuerunt, fueruntque ex illa familia multi literarum & literatorum fautores, præsertim sub Seifeddoula, quo principe vix ullus erga doctos præsertim Poetas magnificentior, aut doctior in Arabica literatura fuit, adeo ut celeberrimi Poetæ ex ejus aula prodierint. Poetarum autem nomine Arabes Persasque intelligimus, nihil sanè minus quam Poetas, sed

Califarum
illius tempo-
ris conditio.

Elmac. p. 103.
Ebn-Cluknah.
Makrizi.
Præf. hist.
Emir Cond.
Leb Tavich.

versuum artifices : neque enim Poeticæ artis propriè dictæ, gustus illius apud illos unquam fuit. Ægyptus & Syria in manu Muhamedis Akchidi filii Taagi. Mogreb, seu Africa Occidentalis, & Africa propriè dicta, in manu Kayemi filii Mehedi : Hispania in manu filiorum Ommiæ. Chorasana in manu Nafri filii Ahmedis Samanidæ, quæ familia magnum quoque in illis Provinciis principatum fundavit, ex qua primus Ismael, devicto, capto & ad Calisum Mutadidum adducto Amro filio Laith, Chorasana, Masanderana, Sistanæ & vicinarum provinciarum Emir us factus est ; quæ quidem familia à Bowiadis destructa est. Yemama, Bahrein, & Hajara Arabiæ, à Karmatianis obtinebantur. Hi autem qui non modò rebelles erant, sed etiam Hæretici, Meccam ceperant, & loca superstitionibus Muhamedanorum consecrata polluerant, peregrinos occiderant, & spoliaverant : neque Calisæ solum sed Muhamedanæ religioni bellum indixerant. Ita cessavit per annos duodecim Meccana peregrinatio & Carmatiani lapidem nigrum inde ablatum per multos annos apud se habuerunt. Hæc fuit Califarum conditio, qui ad ultima usque tempora nihil pristinae dignitatis, vix ipsam urbem Bagdadum retinuerunt.

Eutychius
Alexandriae
post Christodulum
Orthodoxus Patriarcha.

Elmas. p. 108.

P. 517.

Elm. p. 108.

Obiit Christodulus Melchitarum Alexandrinorum Patriarcha anno 320^o, quem Eutychius componit cum anno Martyrum 649^o, qui est J. C. 933^m. Sederat autem annis 16, & mensibus 6. Sepultus est Fostatæ in Ecclesia S. Michaelis. Successit eidem in Cathedra Alexandrina, 1^o Califatûs Kaheri anno, Sahid filius Batrik Medicus, Fostatæ Misræ, seu Cahiræ, natus, appellatusque est Anba Eutychius, nempe à suis Græcis, Græco nomine quod Arabicum exprimeret. Annum ordinationis suæ ipse Eutychius scribit fuisse 649^m Diocletiani, Hegiræ 321^m. Qui annus incipit à 31^a Decembris, anno J. C. 932^a, & annus 320^m, eodem quoque anno à 12^a Januarii. Obiit autem Eutychius secundum Elmacinum anno Hegiræ 328^o, cum sedisset annos 7, menses 6. Testatur idem, continua inter ipsum & populum ejus dissidia fuisse, donec Akchid misit ducem quemdam ex suis Abulhacenum, cum militum manu Tanin, ubi obsignavit Melchitarum Ecclesias, vasa aurea & argentea, pretiosamque suppellectilem : quæ omnia Misram ad Akchidum deportari jussit : tantumque auri & argenti pondus fuisse, ut majori libra ponderaretur. Episcopum Taneos obtinuisse per Ministeriales qui in Divano scribarum officia sustinebant, ut solutis quinque aureorum millibus Ecclesiæ

vasa & ornamenta restituerentur. Episcopum bona Ecclesiæ vili pretio vendidisse, ut hanc summam conficeret: Akchidum emtores coegisse, ut quod iusto pretio deerat persolverent: Christianos cum hæc sua dissidia tot malorum sibi causam fuisse, serò intellexissent, ad concordiam rediisse. Cum verò celeberrimum sit apud Orientales Eutychii nomen, adeo ut non modò Christiani, ut Elmacinus licet in diversa secta vixerit, Abusebah & alii eum cum laude appellare soleant, sed ipsi Muhamedani ut Makrizius qui diligenter eum legerat; nec, ut ex Wilhelmi Tyrii testimonio patet, autoribus nostris ignota ejus historia fuerit, de eo pauca dicenda sunt. Nam quamvis longam & doctam ejusdem Historiæ editioni Præfationem Edwardus Pocockius præmiserit, non deest tamen post amplam illam messem spicilegio locus.

Docet historia Medicorum Ebn-Osaibea satis celebris apud Arabes, eum Medicinæ operam dedisse: nec in Theorica tantum, sed etiam Practica illius artis parte multum valuisse, neque minus peritum fuisse scientiarum quæ apud Christianos commendantur. Electum fuisse Patriarcham anno ætatis suæ 60°, & obiisse eo quo diximus anno. Præter libros de Medicina, qui ad institutum nostrum non pertinent, scripsit *Disputationem inter Hæreticum & Christianum*: Historiam, cujus titulus est *Contextio gemmarum*, quam scripsit in gratiam fratris sui Isa filii Batrik Medici: *De scientia jejuniis Christianorum & Paschatis ipsorum*. Nos in variis codicibus manuscriptis plura de illo autore non reperimus. Quæ verò Joannes Seldenus in longa præfatione ad librum, quem ipsi *Origines Ecclesiæ Alexandrinæ* appellare placuit, commentatus est, non tam juvenis Lectoribus quàm ostentandæ eruditioni cumulata sunt, quæ ut plurimum ad rem non pertinet. Quid enim, amabo, Abumafari, & aliorum doctorum Astronomorum mentio, quid omnia tandem valent, nisi ad confusionem historiæ Orientalis in qua infantissimus erat Seldenus? Nam ut exemplo, ejus historica sphalmata designentur, dum Eutychium natum asserit, *Achmede Eben-Toloni Calisatum obtinente Aegypti*, satis intelligitur eum nescivisse penitus quid esset Califa. Neque enim, ut ex superius dictis omnibusque historicis manifestum est, Achmed filius Tolon, Calisam se appellavit, sed erat Emir, Calisæ supremam auctoritatem agnoscens, de ea parum sollicitus. Quod verò Seldenus Eutychium tantis laudibus exornavit, non aliâ causâ factum, quàm ut par-

De Euty-
chio Alexan-
drino.

ticulam ejus historiæ quæ Presbyterorum autoritatem ad ordinandum Patriarcham spectare videbatur, majori fide commendaret. At quot errorum portenta malè intellecto illi loco superstruxerit, norunt eruditi, apud quos contemptibilem omnino Eutychieum fecit inanissimus Seldeni commentarius. Eum verò totum evertit, non ingenio sanè, sed autoritatibus, Abraham Echelenſis in *Eutychio vindicato*, quam *Dissertationem lucifugam* dum vocat Pocockius, eam in manus ejus nondum perveniſſe cum ſcriberet, intelligere poſſumus. Nec ille tamen qui tot annis ſupervixit, nec Proteſtantium quiſquam adverſus illam reponere quidquam huc uſque auſus eſt. Habet ſanè Eutychieus unde commendetur inter Orientales, apud quos hiſtoria generalis nulla extat, quæ cum illius opere poſſit comparari. Unde non ſolum Chriſtiani, ſed Makrizius & alii Muhamedani eam ſequuntur, atque is ultimus eam ab utilitate ſua laudandam exiſtimavit, eamque deſcripiſſe perpetuò deprehenditur. Mirum quippe eſt quanta ſit Chriſtianorum Orientalium in antiquis rebus inſcitia. Cum enim dudum perierint Verſiones Syriacæ autorum Eccleſiaſtica hiſtoriæ, ſed ſoli tituli apud eos conſerventur, præter ſacras ſcripturas nihil habent ultra Joſephum Gorionidem, cujus exemplaria neque Græcis, neque Hebraicis, quorum nemo nescit quanta ſit diverſitas, neque inter ſe conſentiunt. Nam plerique Codices Arabici Joſepi Gorionidis nomine, interpolatam Maccabaicorum librorum verſionem repræſentant. Et tamen qualiſcunque illa Eutychii hiſtoria ſit, præſtat omnino aliis, ut ex hoc opere noſtro ſatis maniſteſtum eſt: unde Jacobitis celeberrimis cura fuit, ut illam circa Concilium Calchedonenſe, & res Eutychii & Dioſcori reſellerent, quod fecerunt inter alios Severus Epiſcopus Aſchmonin, & Iſa filius Zaraa, Autores inter eos nominatiſſimi. Sed nec hiſtoriâ ſuâ ſolâ Jacobitis diſplicuiſſe viſus eſt: multò magis diſputationibus de Incarnationis Myſterio adverſus illos ſuis, quarum ſpecimen ea eſt quæ in edito codice occurrit initio Tomi ſecundi; docta ſanè & quæ noſtros homines docere queat, in quo poſſimùm conſiſtat Jacobitica hæreſis, quave ratione à Melchitis impugnetur: neque enim ex vulgari Theologia ſatis hæc intelligi poſſunt, multò minùs ex Thomæ Biatienſis Commentariis, qui tam aliena à propoſito continent, ut fructum apud Orientales nullum facere omnino queant. Tandem ut id etiam obiter moneamus, tot nomina propriorum monſtra quæ editam

PATRIARCHARUM ALEXANDRINORUM. 349

THEOPHANIUS
L'ETR. LX.

historiam deformant, non tam auctori qui ea rectè descripserat, quàm editori tribuenda sunt, qui absurdam religionem adhibuit, nihil ut quidquam in suis exemplaribus immutatum vellet: etiam ubi error manifestissimùs erat: aliter, opinor, facturus, si in meliores codices incidisset, ut sunt proculdubio quos habemus in Regia, Colbertina, aliisque Bibliothecis.

THEOPHANIUS PATRIARCHA LX.

ÆQUE obscura est, ac præcedentes aliquot, istius Patriarchæ historia: in qua statim nihil aliud circa ordinationem ejus occurrit, nisi quòd fuerit substitutus in locum Macarii. Ordinatio facta fuit eodem anno quo alter obiit, nempe Martyrum 669°, qui est Hegiræ 342°: Makrizius 345° ex Elmacino; & mense Mesori, secundum Canonem Abulbircat, qui in eo loco satis accuratus est, ut in proximè præcedentibus Patriarchis. Jam autem Theophanius ad summam senectutem pervenerat, eratque præterea variis morbis vexatus. Solvit initio à Patriarchis aliis pendì solitam Alexandrinæ Ecclesiæ mille aureorum annuam pensionem; quæ cum ipsi gravis admodum videretur, eam aut imminui, aut remitti ab Alexandrinis postulavit. Illi pertinacissimè negaverunt; cumque eà occasione magna inter illos jurgia intercessissent; quidam cæteris approbantibus objecerunt, illum præter vestem dignitati suæ convenientem nihil habere quo se super alios tam impotenter extolleret; qui ornatus, non illius esset, sed ipsorum qui illum dederant. Theophanius irâ tumidus vestem Patriarchalem humeris detractam humi abjecit, & coram illis conculcavit: statim verò arripuit eum immundus spiritus, adeo ut vinctulis ferreis eum constringi oportuerit. Postea cum illius curandi causâ statutum fuisset, ut Misram deportaretur, ne palam fieret ejus furor, eum in navis partem imam detruserunt. Ibi magis ac magis furiosus, blasphemare cœpit, eaque proferre quæ non nisi ab impiis & hæreticis dici possunt, imò secundum autorem Chronici, Christum abnegare. Quidam verò ex Episcoporum qui simul erant Clericis, tantas blasphemias impatenter ferens ad eum noctu descendit, impositoque super os ejus cervicali incumbens, spiritu intercluso, eum necavit. Aiunt alii porrectum ipsi venenum: Chronici Autor scribit ipsum ab Episcopis occisum & in mare projectum. Atque ita pessima morte perit; & ut

Theophanii
ordinatio.

Elm. p. 339.

titulus historiæ illius habet, gratiam & misericordiam ab eo Deus abstulit. Sedit annos quatuor, obiitque 10^a mensis Cohiac. Makrizius adjicit menses 6, Elmacinum secutus; atque ita Abulbircat, in eo diversus ab autoribus historiæ Patriarchalis, quod obiisse asserat 4^a mensis Phamenoth, anno Martyrum 674^a, qui est J. C. 958^{us}; atque adeo Hegiræ 347^{us}, non 350^{us}, ut ex Elmacini calculis colligitur.

Succesio
Califarum.

Elm. p. 340.

Ut autem, sicut huc usque factum est, principum successio à nobis designetur, post Calisam Elredi mortuum anno Hegiræ 329^a, Califa salutaris est, frater ejus Ibrahim Abu Isaac Moctafi billa, vulgò Moctafi, depositus anno 333^a. Nulla autem omnino fuit ejus autoritas, sed in Emirorum potestate fuit, pulsus etiam Bagdado à Berideis de quibus dictum antea fuit: qua urbe Nassiredoula eos quidem pepulit, sed ipse eam occupavit, pulsus paulò post à Buzuno Turca. Mox ubi depositus est Califa, Akchid cum in Ægyptum quâ potiebatur, invitavit; sed omni dignitate exutus, ad annum 357^{um} supervixit.

Elm. p. 341.

Successor ei datus est frater ejus patruelis Mustacfi, integro nominum apparatu dictus Abdalla Abulcasim Mustacfi billa anno 333^a, & anno sequenti qui fuit Æræ Christianæ 945^{us}. Filii Bowiæ Bagdadum occupaverunt duce Muazzeddoula, à quo paulò post depositus & excæcatus Califa, obiit anno 338^a, J. C. 949^a. Erat autem inter Abbassidas 22^{us}.

Substitutus est in ejus locum Abul Abbas Mutia billa, quem Mutium vocavit Erpenius anno 334^a, quo etiam obiit Akchid filius Taagi Princeps Ægypti & Syriæ, cujus potestas non minor fuit quàm Tolonidarum: sed ita ut nulla in eum esset Califarum autoritas. Ei successit Muhamed Abuhur filius ejus, verùm Cafurus quidam servus emittius, qui decem & octo aureis olim vœniera, Akchidi libertus, cum negotiorum pondus sub domino suo prudenter & feliciter sustinisset, omnem autoritatem retinuit; etiam post Abuhuri mortem, cui anno 348^a, J. C. 960^a, successit Hali frater ejus. Maxima tunc potentia fuit filiorum Bowiæ, qui Persiam, Gailanam, Tabaristanam, Yracamque occupaverunt, & per annos 127. regnaverunt; tandemque à Seljukidis sublatis sunt, Bagdado captâ. Ita res Orientis se habebant sub istis ultimis Patriarchis: nam Mutia Califarum deposuit anno Hegiræ 363^a, J. C. 973^a, & sequente obiit.

MINA, sive MENNAS, PATRIARCHA LXI.

DE istius electione legitur in Historia nostra, quòd in sede Alexandrina constitutus fuerit, Casuro Akchidæo Ægyptum gubernante, anno Martyrum 673°, J. C. an. 957° : atque ita non convenit supputatio annorum Canonis Abulbircat, qui ejus ordinationem assignat eodem anno, quo obiit Theophanius, nempe Martyrum 674°, mense Farmuthi. Elmacinus eum constitutum asserit anno Hegiræ 350°, quem comparat cum anno Diodetiani 678°, 2° Halis filii Akchidi, 17° Calisatus Mutia. Annus ille est J. C. 962^{us}, Hegiræ 351^{us} : qui calculus cum præcedentibus Elmacini stare non potest, nisi vacaverit sedes annis aliquot, cujus vacationis nulla occurrit memoria. Alium characterem Chronologicum assignat Autor Historiæ, sed falsum, nempe quod constitutus fuerit annis tribus antequam Fatimidæ Ægyptum occuparent : neque enim eam ingressi sunt ante annum 358^{um}, ut ex Elmacino aliisque autoribus manifestum est. Ut verò ad Mennam revertamur, erat ille ex Sendala urbecula oriundus, Monachus ad sanctum Macarium, ubi per annos complures summa cum laude vixerat. Cum enim à parentibus uxorem ducere coactus fuisset, eam hortationibus suis ad servandam castitatem compulit. Paulò post eà relictà ad vallem Habib profectus, habitum religionis accepit, & in Cella dicta *Dernaba* per annos multos vixit. Cum mortuo Theophanio convenissent Episcopi, Primoresque Christianorum ad eligendum successorem, & fama senis apud omnes vigeret, missi sunt qui eum accerferent. Excusabat ille se ob ætatem jam ingravescentem, quasi laboribus imparem, quos Patriarcham sustinere necesse est : atque ea ratione secundum Canones mediæ ætatis homines eligere oportebat, ne in senibus imbecillitas, in juvenibus carnales cupiditates prævalerent : se tandem ineptum esse huic muneri testatus, designavit Mennam discipulum, cum alii protestarentur, se non priùs abituros, quàm aliquem nominasset. Statim omnes clamaverunt *ἀξιός, ἀξιός*, secundum vulgarem approbandæ electionis rationem, quæ non solum inter Ordinationis solennia, sed etiam suffragia ferendo, approbationis consensusque publici formula fuit. Illum igitur catenis vincum Alexandriam deduxerunt. Contigit autem ut iter faciens ad patriam terram perveniret : ibique à suis honorifice

P. 2308

exceptus est, prodeuntibus cum cruce thuribulisque in occursum ejus. Dum hic quiescit, vir quidam malus murmurare apud alios coepit, & cuidam Episcopo quæstionem proposuit, an non ipsi satis scirent hominem uxoratum, non posse fieri Patriarcham. Id cum Episcopus affirmasset, statim ille negavit Mennam ordinari posse, cujus uxor huc usque apud eos permaneret. Id Episcopus cum magno mœrore aliis significavit, qui præ pudore electionis, quam ab omnibus rejectum iri judicabant, magnopere turbati, silentium tenebant, cum Mennas causâ intellectâ secretum suum & uxoris suæ manifestare coactus est: unde ingens omnium admirationo, atque ita tumultus conquievit.

Origo Fatimidarum
Ægypti Califarum.

Statim Autor ad res Ægypti quæ novis dominis parere coacta est explicandas stylum convertit, sed eas parum accuratè describit, adeo ut alios Autores sequi necesse sit, cum etiam in nominibus hallucinetur. Quia verò inutile foret, saltem ad rationem iustituti operis quod est planè Ecclesiasticum, eam narrationem diligentius excussam ad veram historiam revocare, omisis illis autoribus sequemur meliores Muhamedanos, qui eam fuisse tractaverunt. Igitur Fatimidarum qui auno 358° Hegiræ, J. C. 968°, Ægyptum occupaverunt, origo ex Africa petenda est. In eam venit ante annum Hegiræ 298^{um}, J. C. 910^{um}, Arabs quidam, ex eorum numero qui Dervisionum seu Monachorum vitam profitebantur, nomine Abdalla. Is prius circa Cusam & Basoram prædicaverat, vindicandam esse Halis & ejus filiorum nepotumque cædes, in familiam Abbassidarum, qui per vim & absque titulo, Imperium simulque Pontificatum occupaverant. Collectâ hominum ingenti multitudinè, *Sunitas*, qui Abbassidarum dignitatem tuebantur, passim cedere, & in eos ferro flammæque sævire coepit. Ita cum animos suis fecisset, promissit Dei nomine *Mehedin* se, hoc est ultimum ex Halis familia principem quem Persæ adhuc expectant, mox exhibiturum: atque Obcidallam, veluti ex Ismaele filio Jasar procreatum, *Mehedin* appellavit. Mox ad invadendam Africam cum illis profectus est, atque ex ea provincia filios Agleb, qui à multis annis eam possidebant sub Califarum autoritate, prorsus ejecit, Kirowanamque occupavit. Erat urbs illa Africani Muhamedanorum regni caput, ædificata, ut vulgò scribunt Arabes, ab Agha filio Nofa sub Muavia ante annum Hegiræ 40^{um}, triginta tribus parasangis distans à Carthagine ortum brumalem versùs, à mari duodecim. Ibi Obcidalla

PATRIARCHARUM ALEXANDRINORUM. 353

MINA
Pair, LXXI.

Obeidalla sedem fixit, postquam omnes jurare in verba sua coegisset, circa *Imamat*, seu Pontificatum Halis, & ejus familiar, dissidentibus occidi jussisset. Postea Mehediam, à suo cognomine appellatam urbem ædificavit, in qua ad finem usque vitæ regnavit. Successorem habuit Manforem, mox Kayemum, & tandem Moazzum. Is cum intellexisset quo in statu Califarum Bagdadensium res essent, adeo ut nihil ab ipsis periculi imminere videretur, cum Casurus Nigrita ex Nubia Eunuchus, sub Akchidi filiis provinciam fortiter administraret, nihil tentare ausus est, sed eo mortuo Jauherum cum magno exercitu misit; qui anno 358°, ut diximus, Ægyptum nemine obistente occupavit. Autor hujus vitæ Jauheri adventum incidisse scribit in annum Martyrum 683^{um}, qui est J. C. 967^{us}; respondetque anno Hegiræ 357°: sed cum ejus initium ducatur à 6^a Decembris, totus ferme ille annus incurrit in annum sequentem Julianum: atque ita nulla aut exigua differentia est. Statim Jauherus cum Misram venisset, publicato edicto, omnes Muhamedanos coegit ad novam quodammodo fidei professionem, nempe circa Pontificatum, & Califatum. Facta enim est Oratio publica *Corbet* vulgò dicta in Mefchitis nomine Muazzi, qui se *Emir Elmoumenin*, live *Imperatorem fidelium*, & Calisam appellavit. Ita sublata est Califarum Bagdadensium in Ægypto autoritas, etiam spiritalis illa, quæ sola apud illos à multis annis supererat: & quæ non restituta est, nisi tempore Salaheddini, anno Hegiræ 567°, extinctis Fatimidis. Jauherus Kahiram ædificare coepit eo ipso anno, nempe novam: vetus scilicet propriè *Misra* dicebatur, ante Muhamedanos dudum condita; quæque antiqua Memphis judicatur Orientalibus Geographis: atque inter alios Abulfedæ, Makrizio, Kazwinio & aliis: & sanè pars quæ in Occidentali ripa Nili sita est, adhuc *Mens* appellatur. Ex adversa parte Amrus qui Ægyptum primus ex Muhamedanis subegit, eo in loco, ubi dum castra ante urbem haberet, tentorium fixerat, novam urbem condidit, *Fostatam* appellatam; quæ vox, inquit, *Tabernaculum* significat, ex Græco-latina barbara *Fossatum* ut videtur deducta. Hinc vulgò *Fostat* & *Fostat Mesr*, Misram seu Cahiram significat. His novis ædificiis alteram quasi arcem Jauherus adjunxit, quæ *Kahira* appellata: quasi *coactrix* & *jugum ferre cogens*. De ea extant multa apud Arabes volumina.

Anno tandem 362° Hegiræ Muazzus relictâ Kirowanâ, &

Yy

Mehediâ, ablatisque thesauris omnibus in Ægyptum venit : atque Kahira sedes Regni Fatimidarum facta est. Cum verò Abbassidæ nigrum colorem proprium sibi fecissent, adeo ut vexillum Imperatorium, vestes, tapes qui amboni in Meschita imponi solebat, attri coloris essent, Muazzus album substituit, & is plerisque Africanis & Arabibus communis erat, qui mos huc usque perseverat. Ita Ebn-Chalican, Makrizi, & Autores omnes quos recensere non est operæ pretium. Narrat Autor hujus historiæ unum ex Akchidæis qui post Casuri mortem provinciam regebat, Bschammyritas de quibus alibi dictum est, promissa immunitate à vestigalibus, adhortatum esse ad Fatimidas fortiter repellendos : illos communicatis inter se consiliis noluisse periculoso huic bello se exponere : *Birum* quemdam, ab illis desertum, copiisque dissipatis, Damietam fugisse : tum navi Joppen pervenisse, ubi captus, & in carcerem conjectus est : detractaque ejus pellis, & foeno facta ad ludibrium in crucem sublata est.

Narrat etiam fuisse in urbe Tani, quam Tinis vocant, juvenes Muslemanos feroces & nefarios, qui omnibus pecunias imperabant, domosque spoliabant, interim quotidianis comestationibus vacantes : nec Muazzo obedire volentes. Scripserunt ad eum Christianorum primarii, ut ducem cum exercitu ad se mitteret : illi verò obsidionem aliquamdiu fortiter toleraverunt ; sed cum aqua dulcis defecisset, quæ per novem menses navibus tantum advehi poterat ; conditiones deditionis acceperunt, mediatore Kachelamo viro in urbe præcipuo. Is cum ad Ducem Fatimidam profectus esset, eas conditiones confirmatas obtinuit : centum ex illis latronibus qui supererant, decem denariis aureis acceptis, & veste splendida per triduum convivio excepti sunt : postea omnes ex muris suspensi. Tandem Fatimida urbem ingressus, mœnia solo æquari jussit, quæ adhuc dum Autor scriberet, diruta permanerant.

Postquam Muazzus Ægyptum occupavit, per annos septem maxima annonæ caritas fuit ; nam primo anno Nilus defecit, altero imbres ; sequentibus grando, aut locustæ sementes perdidērunt. Itaque ingens hominum multitudo periit, adeo ut Episcopales sedes vacuæ remanserint, quod plebem non haberent ; & vicinis Episcopatibus adjungebantur, non ordinatis novis Episcopis. Patriarcha in regione Elrif quæ est inferioris Ægypti, manere coactus, in quodam pago qui *Mahulat Daniel* appellabatur, à divite quadam foemina Dina sustentatus est cum

fuis discipulis, quo tempore fames maximè sævit : coque anno, nec Alexandriam ingressus est, neque ex more profectus est ad Vallem Habib, ut in Monasterio S. Macarii, solenne officium consecrationis Chrismatis perficeret : sed eo ipso in loco ædificavit altare parvum, ubi Chrisma consecravit. Nempe hujus consuetudinis hæc origo est, quòd cùm sub postremis Christianorum Imperatoribus Alexandriæ præcipuisque urbibus exularent, receperunt se in Thebaidem, præsertimque in S. Macarii Monasterio latuerunt, ibique annuas solennitates celebrabant, inter quas non postremo loco censetur confectio sacri Chrismatis, quæ multis cum cæremoniis perficitur. Extat de eo ritu volumen integrum secundùm disciplinam Ecclesiæ Alexandrinæ Copticè & Arabicè. Non alia autem ratio fuit cur illa consecratio in Ecclesia S. Macarii fieret, quàm quòd ibi Quadragesimam transigere solebant Patriarchæ, ut ex variis hujus historiæ locis observari potuit : tum ut liberiùs sacris officiis vacarent illis in locis ubi Muhamedani nulli, qui Alexandriæ & Misræ, nimium frequenter ea conturbare religioni ducebant.

Mf. Bib. Reg.

De Menna nihil extat præterea, nisi quòd obiit cùm sedisset an. 18. Elmacinus & Makrizius annos 11. Abulbircat 12. & menses 8. numerant : hic mortuum mense Cohiac, alii 15. Haturi.

Elm. p. 1304

Quamvis autem nihil præter pauca illa quæ retulimus de Minna, historia Patriarchalis contineat, sub eo tamen contigerunt nonnulla, quæ licèt ad Antiochenam Ecclesiam pertineant, tamen ob summam quæ per annos multos vigit conjunctionem illius cum Jacobitica Alexandrina, ad eam quodammodo videntur pertinere. Refert quidem Michael Episcopus Taneos in vita Zachariæ 64ⁱ Patriarchæ rem planè similem : an eadem sit postea discutietur. Sed auctoritatem habet maximam Codex Seguierianus, multa Patrum testimonia continens de unius naturæ confessione, quibus Epistolæ Synodicæ ab Alexandrinis ad Antiochenos, & vicissim, subjunguntur, quæ publicè scriptæ in Episcoporum Synodis, pondus habent inter eos non mediocre. Servavit igitur nobis codex ille Synodicam Joannis Patriarchæ Antiocheni ad Minam Alexandrinum scriptam, ut in fine notatur anno Alexandri Macedonis 1280°, hoc est J. C. 968° : quo tempore sedem ille tenebat, ordinatus, ut dictum est, anno J. C. 958° aut 961° : variant enim Auctores in assignandis ejus initiis. Sed

Res Antiochenæ.

Yy ij

cum annos undecim, vel etiam, ut alibi habetur, duodecim, aut decem octo, quod aliis placet. sedisse dicatur, ad eum scripta fuisse debet hæc Joannis Antiocheni Epistola. Titulus talis est : *Epistola Synodica Patris sancti Anba Joannis Patriarchæ Antiochie, ad Anba Minam Patriarcham Alexandrinum quando Romæ, seu Græcorum Imperator misit, qui Joannem Patriarcham in vincula conjicerent; eumque Constantinopolin duci jussit: ubi in conspectu suo, præsentem Constantinopolitanum Patriarcham, & virum Imperii primarius, cum eodem Constantinopolitano de fide disputavit. Quomodo res gesta sit, ita Joannes ipse narrat in Epistola.*

Epistola Synodica Joannis Antiocheni.

Cum Imperator Emeffa Constantinopolin rediisset, meque prius in eam urbem misisset, Patriarchæ Constantinopolitano mandavit ut nos coram se adduci juberet. Accessit igitur ab eo fuimus feriâ v^a ante Dominicam Palmarum, aderatque circa eum magna Ecclesiasticorum ejus multitudo: illi verò priusquam ad Patriarcham perveniremus, venerunt tumultuatim nobis obviam, clamantes & vociferantes, scilicet ut terrent & perturbarent nos, antequam in illius conspectum veniremus: sed Deus acceptissimarum orationum vestrarum merito, patientiam nobis & fortitudinem dedit. Interjecto longo temporis spatio pervenimus ad Patriarcham, in locum confectus fui, ubi multitudo magna, & armati circa eum erant. Postquam eum salutavissimus, illeque nos salutasset, & sedere jussisset, interrogare nos in hunc modum coepit. *Cujusnam loci Patriarcha es?* Respondi: *Patriarcha sum sedis Antiochene.* Duo igitur, inquit, Patriarchæ estis super unam sedem constituti, & tamen inter vos scissura est: tu enim sedem unam tenes; ille alteram. Respondi: *Scissuram sanè inter nos esse.* Tum ille: *Num constitutus es Patriarcha?* & quis tandem Patriarcharum ordinationem tuam consensu suo approbavit? Tum ego: *Alexandrinæ sedis,* inquam. *Quod est ejus nomen,* inquit? Respondi, *Dominus Minas.* Ad hæc Constantinopolitanus: *At ille hereticus est, scripsit enim ad nos lueras infusas, & confessio fides ejus de Christo prava est: tum habemus Alexandria Patriarcham Orthodoxum nomine Eliam.* Respondi: *Nos Patriarcham Alexandria novimus neminem, præter Anba Minam patrem & collegam nostrum in Christiano ministerio.* Tum dixit mihi: *Qualis est Confessio tua de Christo? an asseris eum descendisse de cælo, habitasseque in sancta*

Maria Virgine, ex qua acceperit corpus secundum naturam nostram : affirma aut nega. Ad hæc respondi : Confiteor quòd Deus Verbum qui est ante omnia secula, filius Patris, descendit de cælis, & habitavit in sancta genitrice Dei Maria, & assumpsit ex ea personaliter corpus secundum naturam nostram, animatum & anima rationali atque intelligente præditum : atque ita ex ea natus est Deus homo factus, absque immutatione aut alteratione. Tum ille : Numquid hæc eo spectant ut in Christo due nature sint ? Respondi : Confitemur Christum compositum esse ex duabus naturis, sed post unionem, unam solummodo naturam agnoscimus, & personam unam Verbi incarnati. Tandem post longam disputationem eo die recessimus.

Advenit postea Dominica Paschatis, qua die fuimus absque Liturgia, & communione & sine festo, sicut dictum est in Prophetia, *Festivitates vestre convertentur in luctum &c.* Vocavitque nos Imperator ad se in majorem Ecclesiam illorum, cujus ornatum nobis ostendit, insignemque apparatus pretiosæ suppellectilis, velorum & luminarium, tum maximam populi magnitudinemque multitudinem ; existimans scilicet nos eo spectaculo rerum periturarum quibus pueri commoveri solent, delinitum iri. Cùm deinde Imperator Eucharistiæ communionem percepisset, & egressus fuisset, accessit nos ; & postquam nos verbis duris & gravibus increpasset, *An, inquit, divinus est Christus, ut secundum Paulum unus dicat, Ego sum Cephæ ; alius, Ego sum Apollo, alius aliter.* Deus autem eo momento dedit nobis per orationum vestrarum auxilium, ut convenienter ei responderemus ex tempore. Post multa quæ nonnisi multis verbis referre possem, dimisit nos cum viro quodam, cui ut nostri curam gereret mandavit, à quo in locum ubi prius hospitati eramus, deduceremur.

Dominicâ novâ seu in Albis, accessit nos Imperator, verbisque blandis & benignis nos allocutus est in hunc modum. *Muslemani, inquit, & Judei nobis insultant, dicendo : Sunt variae apud vos hereses, cùm quidam Melchitæ sint, alii Jacobitæ, alii Nestoriani, præter ceteros. Cur igitur inter nos & inter vos dissidia sunt ? congregamini ut simul vobiscum inquira-*

mus in scripturis sacris, per mensem unum, duos vel tres, ubi tandem sit veritas, & eam sequamur omnes. Existimabat scilicet se verborum blanditiis nos illecturum, opinatus veritatem teneret

se, & eam apud se esse. Respondimus statim, annuere nos eis quæ ipse dixisset; & cum eo salutato discederemus, dixit nobis: *Apud quem mavultis fieri congressum vestrum: apud istum, an apud me; aut apud Patriarcham, aut apud Metropolitam, aut apud Monachos?* Respondimus, *Apud quemcumque Imperatori clementissimo placuerit: sumus enim apud vos & in vestra potestate: rogamus tantum ne qua injuria nobis fiat, aut incassum laboremus.* Tunc recessimus ad eum locum ubi prius diverteramus. Elapso biduo accersivit nos Patriarcha, apud quem aderant Metropolitæ, & magnates Imperii magno numero, & disputatio haberi cœpit. Illi porro ne verbum quidem ullum ex Scriptura sacra pro testimonio protulerunt, sed proprio sensu multa non sine ostentatione ad suæ sententiæ confirmationem diserebant, ut probarent duas in Christo esse naturas. Respondimus illis, agnoscere nos illum ex duabus esse naturis, ut asseruerunt omnes sanctæ Ecclesiæ doctores, sicut anima & corpus. Verum, inquebant, homo est in duabus naturis. Respondimus nos non agnoscere nisi naturam unam compositam: unam à nobis teneri, sicut voluntatem unam & operationem unam: adeo ut operationes duplices in eo non sint. Cum verò ex scripturis sententias illis proponeremus, non auscultabant, etiamsi multoties illis dixerimus, nos nihil à nobis dicere, sed ea referre quæ sancti Patres, & Ecclesiæ Doctores veraces asseruerunt, unionem scilicet Christi Dei nostri, in quo post unionem non agnoverunt, nisi naturam unam Dei Verbi incarnati, ita ut post unionem duorum mentio penitus sublata & extincta sit.

Hæc cum audiisset Patriarcha, dixit: *Quemnam Ecclesiæ Doctorum producetis nobis ad confirmationem opinionis quam tenetis & propugnatis, & quam nobis exponitis.* Respondimus ei: Sententias producimus omnium Doctorum qui fidem confirmaverunt, & Ecclesiam edificaverunt, unusquisque tempore suo. Tum ille: *Potestis ex sententiis S. Cyrilli adducere testimonia ad confirmandam unionem illam quam commemorastis.* Id nos præstyturos esse polliciti sumus, quod ille tamen existimabat præstare nos præ ignorantia non posse. Descripsimus igitur testimonia quæ in fine hujus libri referuntur, & quidem Græcâ linguâ, atque illi obulimus. Ea cum vidisset, accepit, & non legit. Dixi igitur illi: *Subeat Patriarcha legi sibi hæc testimonia Doctorum Orthodoxorum, quorum auctoritati nos & vos pariter acquiescimus, ipsi*

enim sunt Patres nostri : ita quippe intelligetis quid Patres dixerint, quidque nobis designaverint quando duas (in Christo) naturas statuerunt, ante unionem, & post illam : amplectimur autem & approbamus ea quæ Patres pronuntiaverunt : & ista testimonia excerpta quedam sunt ex eorum sententiis. Cum enim linguae vestrae imperitis simus, brevitati studuimus, paucaque de multis selegimus, ut cognoscereis veritatem eorum quæ ad vos loquimur, & fidei quam tenemus : neque existimareis nos imperitos illarum rerum esse, aut, quod iudicatis, nos errore teneri.

Illi nihil nobis responderunt, nisi quod hanc quæstionem nobis proposuerunt. Gregorius Theologus in Epistola prima ad Cleodonium, arguit Apollinarium eumque reprehendit, quod negaret Christum assumpsisse corpus perfectum, cum anima rationali & intelligente, asseritque duas in eo naturas, sicut corpus & animam. Ad ea nos diximus : Legite Epistolam ab initio ad finem, & agnoscetis quàm secundum veritatem sanctus ille locutus fuerit, & quomodo ex ea Epistola, cujus testimonio utimini, regulam doctrinae nobis definierit, dum ait : *Non est alius, & alius absit : sed duo illa per unionem unum sunt* : neque tamen existimandum est S. Gregorium induxisse in Christo missionem, & confusionem. Verùm hæc dixit ad confirmandam & explicandam unionem, ita ut unus sit cognitus in corpore, non duæ naturæ, ut vos asseritis. Illi more suo iactabundi dixerunt : Ecce sanè inducitis missionem, & confusionem, divinitatemque passam asseritis, si unam naturam dicitis. Deus solus novit quæ in eo confessa transacta & dicta fuerunt, duodecies enim nobiscum congressi sunt, disputando de duobus illis testimoniis, quæ ipsis Græcè descripta dederamus, ad confirmationem doctrinae S. Cyrilli. In primo occurrebant quæ Cyrillus refert ex Oratione Athanasii de Incarnatione Dei Verbi, in qua oratione refellit Diodorum & Paulum Samosatenum, & ait : *Sicut ipse est Filius Dei & Deus in spiritu, ita & ipse est filius hominis secundum carnem*. Neque dicit duas esse naturas illius unius filii, quarum una adoretur, altera non adoretur, sed unam naturam Dei Verbi incarnatam, quam adoramus simul cum corpore suo, adoratione unâ & eâdem : tum alia quæ sequuntur vobis nota, quæque referre necesse non est. Iterum etiam ex Epistola ad Jovianum Imperatorem, in qua dicit Athanasius : *Unum dicere oportet, & confiteri naturam unam, & personam unam Verbi incarnati, ejus*

Testimonium
Gregorii Theo-
logi.

qui homo factus, humanitatem perfectam pro nobis adsumpsit. Qui contra sentiet, is inimicus est Dei, & sanctis Patribus repugnat.

Ita quoque legitur in Tractatu de fide Gregorii Thaumaturgi, ubi præcipua illius capita recenset. Ipse Deus verus, incorporeus, postea incarnatus est, manifestatusque est, perfectus omni quacumque perfectione vera & divina: non duo supposita, aut naturæ duæ; neque enim quatuor adoramus, scilicet Deum, filium Dei, filium hominis, & Spiritum sanctum: ea propter anathematizamus quicumque ita de eo credit, ut hominem illum esse dicat gloriâ divinâ cumulatam,

Hippolyti
Potentilis.

S. Hippolytus Romanus Episcopus in Tractatu adversus eos qui impugnant incarnationem Verbi Dei ob consubstantialitatem ejus (cum Patre) : Virgo, ait, cum peperit corpus, Verbum quoque peperit, & idcirco est Deipara: Judæi quoque cum crucifixerunt corpus, crucifixerunt Deum Verbum; neque distinctio ulla inter Verbum, & corpus hominis occurrit in divinis scripturis; sed ipse est natura una, persona una, suppositum unum, operatio una: Verbum Deus, Verbum homo, quemadmodum erat. Item in Tractatu de Unione Corporis Christi & ejus divinitatis proficitur, illum qui creatus est, increatum esse per unionem: & illum increatum per eandem unionem creatum fieri, quandoquidem natura una ex duabus illis integris partibus constat. Idem quoque in Epistola ad Dionysium Episcopum Cypri sic ait: Dum consentitur naturas duas, coguntur unum adorare, & alterum non adorant: in eo qui divinus est baptisantur, in eo qui homo est non baptisantur. Porro cum in nomine Christi baptisemur, naturam unam confitemur, divinitatem impassibilem, & corpus passibile, ut baptismus noster sit in Deo & in morte Domini.

Item Gregorius Theologus in Oratione de Nativitate Christi Domini, Prodiit Deus, cum eo quod assumpsit; unum quid ex duobus contrariis carne & spiritu. Idem in Oratione de Verbo Dei ex Evangelio: Non factus est duo, sed unus ex duobus. Voluit ut Deus fieret homo perfectus; assumensque & assumptus, qui erant naturæ duæ, conjuncti sunt in unum.

Adduximus etiam Cyrilli verba ex ejus Epistola ad Acacium Melitæ seu Melitenes Episcopum. Ea ex quibus unus ille constituitur, illeque filius & Dominus Jesus Christus, uno verbo comprehensa explicat, dicitque naturas duas unitas fuisse; & seq-

Προϋπάρχοντος τοῦ
Θεοῦ μετὰ τῆς
πρωτοφάνειας,
ἐν ᾧ ὁ υἱὸς τοῦ
θεοῦ τὸν ἑαυτοῦ
καὶ τὸν πατρὸς
οὐκ ὄντα.
Οὐδὲν γὰρ ἡμέ-
τερος, ἀλλὰ ἐν
τῷ ᾧ τὸν υἱὸν
θεοῦ ἀπεχρίμα-
μεν. Or. 31.

PATRIARCHARUM ALEXANDRINORUM. 361

MINA
Patr. LXX.

tiam post unionem operatio duorum tollitur, quia natura una est: credimusque in filium unum, qui incarnatus & homo factus est. Ista & nonnulla alia ex Cyrillo testimonia, quæ non modò præ intellectione, sed parum fideliter conversa sunt, ut etiam quæ ex Gregorio Theologo proferuntur, alio loco expendemus.

Tandem verò post pauca ita fidem suam Minas exponit: *Confitemur naturam unam & personam unam, perfectam ex duobus per unionem, absque alterutrius destructione, commissione, & corruptione, unius Verbi incarnatam. Testatur etiam Cyrillus in eadem sententia fuisse Patres antiquos & recentiores, eademque comparatione uti soluos; animæ scilicet & corporis. Credimus igitur, & affirmamus quòd unus est Christus filius Dei, ex duobus naturis, & personis divinitatis & humanitatis perfectis: quòdque factus est natura una, persona una Verbi incarnati & inhumanati. Neque omnino dicimus post unionem naturas duas, personas duas, voluntates duas; & operationes diversas: qui enim eam sententiam tenet, excommunicatus est, & damnatus à sanctis Patribus, præclarisque Ecclesiæ doctores, ut superius ostensimus: atque hæc est Nestorii sectatorumque ejus sententia. Porro quoties de Nestoriana hæresi mentionem apud eos faceremus, indignatio eorum augebatur, valdeque se molestè ferre non obscurè significabant, averfarique Nestorium & ejus fidem, quam suo modo explicabant. Ea autem quæ suprà retulimus, & alia ejusmodi, pluries repetita, ipsis inculcavimus, quod narrare prolixioris operæ foret: at illi, solitâ suâ jactantiâ & contumeliis nos exceperunt, quasi superiores disputando fuissent: multa simul de Imperatore suo, ejusque miti dominatione ad fastidium ingerentes. Tandem cùm animadvertissemus eos non audire scripturarum sententias, nec veritati adquiescere, diximus illis: *Nos ex animi nostri consilio, ad vos non venimus, neque ut de fide vobiscum disputaremus experivimus, sed Imperatoris autoritate, nos ut adessemus coegistis. Quod verò à nobis quasi-vistis, ut quæ secta nostra foret, à nobis doceremini, id præstitimus, explicando vobis principium fidei nostræ, & id quod traderunt nobis SS. Patres doctores Orthodoxi, qui pastores fuerunt Ecclesiæ Dei, quique pro ea certaverunt, & fidem Apostolicam confirmaverunt. Vos porro illos nosque audire renuistis: complete igitur opera Patrum vestrorum, & eorum vestigiis insistite: nos majorum nostrorum vestigia sequemur. Illi cùm animadverterent**

Jacobitarum
fidei
confessio,

frustrà esse ea omnia quæ ad nos commovendos, terrendos, aut sententia dimovendos, adhibuerant, neque pollicitationes eorum aut præmia, debilibus nostris viribus ita prævaluisse, ut ad id quod volebant nos inducerent; sed quod in proposito nostro firmiter perseverantes, libenter nos inevitabili morti exponeremus; considerantes etiam quòd ad eam constanter sustinendam parati essemus, paululum nobis molesti esse desierunt, sed postea nos in carcerem compegerunt, ubi etiamnum sumus, sperantes misericordiam Dei interventu orationum vestrarum. Interea cum fiducia in Deum, patientiam habemus, certi fore ut animi nostri nullo metu aut terrore quocumque modo perturbentur: innitimur enim ei qui non fallit sperantes in eum, qui nos non negliget, sed gaudium nobis & foelicem tandem successum præstabit, iudiciumque suum exequetur erga nos, & erga eos qui nos vocaverunt ad exponenda quæ hoc scripto continentur. Accepimus autem, nihil de nostra Constantinopolin profectioe ad vos pervenisse, neque scire quomodo res gesta fuerit, quia quæ rumore perlata sunt, à veritate distant longissimè. Scimus etiam vos esse magnopere de nobis sollicitos, quia membra invicem sumus; & quando dolet unum membrum, totum corpus dolet: & uno spiritu agimur. Veriti autem sumus ne, quod Deus avertat, in dubium incideretis circa res nostras, ex illis quæ Satan maledictus disseminat, quæque tandem ad vos famâ perferri possent, per rumores incertos quos Diabolus faciliè excipi facit, unde sinceris mentibus turbatio aliqua aut perplexitas, aut deceptio ingeri possent. Tum etiam curæ nobis fuit, ut quo in statu res vestræ forent, certò & verè cognosceremus. Reliqua ad officia mutua & benevolentia significationem pertinent. Commendant se quoque Alexandrinorum precibus, Episcoporum, Monachorum & aliorum; atque ab illis consolationem per literas petunt. Nominatim præterea salutant Alexandrinos, Mar Macara seu Macarius Scriba, seu Secretarius, quo titulo passim significatur apud Arabes Patriarchæ Protosyncellus, ut eum Græci vocant: Sergius Metropolita Euphemia: Jacobus Metropolita Semendæ: Joannes Episcopus Abtoui: & Constantinus Episcopus Jeima: cum eorum discipulis Davide & Zacharia. Hucusque Joannis Antiocheni Patriarchæ Epistola.

De ea Epistola quid iudicandum.

Quin genuina sit, dubitare non licet, cum omnes veri notas habeat, neque magis suspecta esse debeat, quàm tot aliæ Syo-

PATRIARCHARUM ALEXANDRINORUM. 363

MENA
Patr. LXI

dicæ, quas liber unde eam descripsimus repræsentat. Annus etiam 1280^{us} Alexandri, qui est J. C. 968^{us}, congruit Mennæ temporibus. Quamvis enim de initio Pontificatus Autor Historiæ Patriarchalis & alii non consentiant, tamen qui illud anno Martyrum 673^o, J. C. 957^o, alligant, quinque scilicet annis antevertendo Epocham ab Elmacino constitutam, cum annos illi decem & octo transactos fuisse in dignitate testentur, ad alium hæc Synodica missa esse non potuit. Eo enim tempore Antiochia à Græcis capta fuerat anno 357^o Hegiræ, J. C. 967^o, secundum Abulfaragium; nam fallitur Elmacinus qui id refert ad annum 364^{um}, J. C. 974^{um}. Ea enim urbs recepta est à Burtza sub Nicephoro Phoca, ut Cedrenus & alii testantur: obiit autem Nicephorus anno J. C. 968^o.

Hist Dynest.
p. 207. E m.
p. 233. Cedr.
l. 2. p. 657.

Joannes Antiochenus Patriarcha Jacobitarum qui fuerit, nam eo nomine plures occurrunt, non aliunde scimus quam ex hac Epistola, quæ cum ad Mennam directæ sit, non potest ad alterum Mennam, qui quadragesimus septimus Alexandria Patriarcha numeratur, pertinere, qui obiit secundum Elmacinum anno Hegiræ 159^o, J. C. 775: neque enim tunc Antiochia in Græcorum Imperatorum potestate erat, & Jacobitarum Patriarcha Georgius appellabatur, qui Athanasio successerat. Tunc etiam ob invasionem sedis Antiochenæ Jacobiticæ, contra Canones factam, de qua in vita Mennæ illius dictum est, deserant mitti Synodicæ inter eam & Alexandrinam Ecclesiam Epistolæ, neque commemoratio Patriarchæ Antiocheni in Diptychis Alexandria celebrabatur, abrupta prorsus inter utramque Ecclesiam communione. Itaque ad primum illum Mennam Synodica mitti non potuit, sed ad posteriorem, cum jam redintegrata esset, utriusque Ecclesiæ concordia. Mirum tamen nullam ab Autore vitæ Mennæ 61ⁱ illius fieri mentionem, quod tamen mirari desinet, quicumque ejusmodi historicorum indigentiam perspectam habebit.

De Joanne
Antiocheno
Jacobitarum
Patriarcha.

Metropolitæ illi qui in fine Epistolæ nominantur, non magis noti sunt, quam illorum sedes, si Euphemiam excipimus; nam alibi hujus Metropoleos, quamvis Græcis incognitæ, nomen occurrit: alia ne divinando quidem assequi possumus. Verùm id levioris momenti est, cum in tanta bellorum quibus Oriens vastatus est diruitate, multæ Episcopales urbes everse sint: plures eum proprios in Orthodoxa communione Episcopos non habere.

Zz ij

rent, alios à Jacobitis acceperint : nam ipsi ut etiam Nestoriani novos Episcopatus, novasque Metropoles instituerunt, adeo ut Notitiæ Ecclesiasticæ, Græcæ & Latinæ, cum Jacobiticis & Nestorianis nullatenus conveniant.

Similis prope historia occurrit in vita Zachariæ.

Præcipua porro difficultas est quòd in vita Zachariæ Patriarchæ Alexandrini Jacobitæ 64ⁱ legitur eadem ferme historia de Joanne Antiocheno Patriarcha Constantinopoli accersito per Græcorum Imperatorem, & in carcerem detruso, adeo ut similia multa & prope eadem occurrant, nisi quòd Synodica hujus Epistolæ quâ calamitatem suam Joannes exponit, nulla memoria est. At quo tempore Zacharias Sedem Alexandrinam tenebat, Antiochenam Jacobiticam Joannes alius obtinebat. Certum id ex Synodica illius ad Zachariam & altera istius ad eum Epistola, quæ insertæ sunt Tractatui de *Fide Patrum*, unde alterius Joannis Synodicam transtulimus. An verò posterior ipse Joannes eadem à Græcorum Imperatore sustinuerit, quæ alter ejusdem nominis, expedire non possumus. Nihil sanè vetat quin satis longo temporis intervallo quod annorum plusquam quinquaginta fuit, Græcorum Imperatores, quibus non immeritò suspecta erat Jacobitarum in officio constantia, cum tam ipsi quàm Nestoriani statim ad Muhamedanos in Syria & Ægypto defecissent, potuerint Antiochenos Patriarchas illius sectæ ad se accersere, quos dudum Antiochiæ manere non sinebant. At cum nulla rerum illarum apud Græcos historicos memoria occurrat, divinare quisque, statuere certi quidquam nemo potest. Quòd in vitâ Mennæ de ea Epistola nihil reperiatur, alicujus momenti foret, si non parvis indigentis in eadem historia exempla multa suppeterent, quæ lector faciliè per se deprehenderet. Quidquid sit tandem, totam illam Epistolam suo loco retulimus, quam comparare facile erit cum ea historiæ parte, quæ in Zachariæ vita referetur inferius.

Alia Joannis Antiocheni Epistola.

Præterea extat in eadem Collectione Epistola Synodica ejusdem Joannis ad Mennam de communi Jacobitarum fide, scripta proculdubio statim post electionem Joannis juxta vetustam à Severi temporibus consuetudinem ; sed caret notâ Chronologicâ, ut omnes aliæ, si eam quæ Constantinopoli scripta est excipimus. Incipit à confessione fidei circa Trinitatem : de Incarnati Verbi mysterio hæc habet, quæ quoniam Jacobitarum sententiam accuratè explicant, referre visum est operæ pretium.

Descendit de cœlis (filius unigenitus) in fine temporum pro-

PATRIARCHARUM ALEXANDRINORUM. 365

per nos & propter nostram salutem, & incarnatus est de Spiritu sancto, & Mariâ, quæ est verè *Θεοτόκος* & semper virgo, acceperique ex ea corpus simile nobis secundum naturam, & passionem, præditum anima rationali & intelligente: assumpsitque illud corpus per unionem omnis commissionis expertem: nullâ intercedente divisione post ejus assumptionem, aut transmutationem à divinitate sua immutabili. Id factum est absque commissione, divisione aut alteratione: & quod intelligentiam omnem, similitudinemque superat, hæc ipsa unio est per quam ex duabus naturis, divina & humana, fit filius unus, Christus unus, Verbum incarnatum & inhumanatum perfectè: ita ut perfectus sit in divinitate sua, sicut perfectus est in humanitate sua; secundum doctrinam Patrum Orthodoxorum, qui eam sententiam confirmaverunt per inspirationem & adjutorium Spiritus sancti. Amplectimur etiam utiliter doctrinas, Basilii Magni, oris benedictionis: Athanasii viri Apostolici, turris fidei, fodinæque intelligentiæ: Gregorii Theologi: Gregorii Nysseni; Joannis Chrysostomi; Cyrillique sapientis. Illi enim fidem de Christo Domino veram explanaverunt, confirmaverunt & probaverunt: neque triumphare siverunt Arii deliria temerè impugnantis divinitatem Verbi, neque neglexerunt sanare Apollinarium: sed asseruerunt & exposuerunt Christum esse ex duobus perfectis, hoc est divino & humano, ex quibus summo miraculo conjunctis factus est. Idcirco rejecerunt, damnaverunt & confutaverunt opinionem Nestorii, qui nova hæresi introducta statuit duos esse, Christos nempe duos, dominos duos, naturas duas, personas duas, & supposita duo. Circa hæc omnia attendimus ad Cyrilli doctrinam libro Apologiæ & aliis expositam, qui magno nobis præsidio sunt, non minus quàm reliqui scripti de doctrina Orthodoxa. Suscipimus quoque librum Zenonis Imperatoris Henoticon dictum, in quo veritatem religionis optimè explicat, rejicitque Synodum Calchedonensem, quæ cum Eutychis causâ congregata fuisset, Nestorii sententiam amplexa est, quâ *αἰρεσησολατρεῖαι* induxit, fidemque corripuit, asserendo Christum esse naturas duas, secundamque naturam inducendo in numerum, juxta professionem Nestorii. Tum etiam ad fucum faciendum, per fraudem, simulationem & hypocrisim prædicavit Christum esse filium unum, dominum unum, absque divisione, alteratione aut separatione: suscepitque præterea scriptum Leonis Romani adversarii fidei & pertinacis, illudque basin fidei appellavit, eo

MINA
Patr. LXL.
Epistola
Joannis ad
Mennam as-
serta.

quòd duas in Christo distinctas naturas constituit. Verumtamen Christus est potentia & sapientia Dei, in quo sunt omnes thesauri sapientiæ & scientiæ, & quamvis de eo secundum dispensationem dictum sit quod ignoraverit diem supremum iudicii, nihil aliud voluit, nisi ut nobis assimilaretur, & cogitationes nostras coerceret, neque imaginaremur ea quæ humanam nostram naturam excedunt; aut susciperemus opinionem Juliani Halicarnassæi, perverse & phantasticæ sententiæ Autoris, qui ita statuit: corpus creatum à Deo ex terra & pulvere cui animam indidit rationalem & intelligentem, esse ex natura sua impassibile & immortale, gratiamque Christi in eo esse nullam. Scilicet existimabat, creaturam non ex natura sua, sed ex rebellionem morti obnoxias factas fuisse, cum scilicet primus homo serpentis consilio acquievit, qui est Manis error. Cætera quæ prolixiora sunt omittimus, cum ad historiam non pertineant.

EPHRÆM SYRUS, FILIUS ZARAA,
PATRIARCHA LXII.

MORTUO Menna convenerunt Episcopi Ægypti superioris & inferioris, scribæ Divani Misræ, qui ut plurimum Christiani erant, & Sacerdotes Alexandrini; & per dies multos de ejus successore deligendo inter se convenire non potuerunt. Erat tunc in Ægypto vir Syrus negotiator, nomine Ephræm, qui alio nomine Abrahamus appellatur: pius, in pauperes beneficus, moribus inter omnes commendatus, Muazzoque Califæ gratus, cum quo familiaritatem habebat, mercimonii sui causâ. Conveniebant in Ecclesiam SS. Sergii & Bacchi Misræ, quæ alio nomine vocabatur *Catholica*, in Kasser El-Chemah, quasi dicas *Castrum luminum* seu *cerei*: nempe ut doctis videretur atque inter alios Jacobo Golio quia olim illo in loco *μυσίων* fuit, delubrique antiqui, quod adhuc *Babelion* vocabatur, ruinæ: unde *Babylonis Ægypti* nomen mansisse, haud inanis conjectura est. Cum in eam Ecclesiam ingressus fuisset Ephræm orationis causâ, quidam ex primoribus alteri significavit hunc hominem esse qui Patriarchatu dignus esset. Vocatus in medium quasi aliud ageretur, statim omnium suffragiis electus est: tum catenis constrictus, Alexandriam ductus, ibique ordinatus: secundum Elmacinum anno Martyrum

PATRIARCHARUM ALEXANDRINORUM. 367

ΕΡΗΡΑΜ
Pact. LXII

693°, Hegiræ 367°, Azizi qui Muazzo successit anno 3°. Annus Martyrum 693^m, est J. C. 977^m : atque adeo stat hoc in loco Chronologia auctoris, quem sæpè in annis inter se secundum æras diversas componendis hallucinatum deprehendimus, nam idem est annus Hegiræ 367^m. Abulbircat ordinationem ascribit anno Martyrum 687°, J. C. 971°; atque adeo biennio post mortem Muazzi quæ contigit anno Hegiræ 365°, J. C. 975°. Attamen Autor quem sequimur de eo loquitur, quasi vivo adhuc Muazzo constitutus fuerit: asserens ordinationem ejus ipsi fuisse gratissimam, frequenter ab eo accersitum fuisse, deque suis rebus consultum.

Ephræm statim atque dignitatem suscepit, facultates amplissimas suas Ecclesiæ donavit: simoniacas pro ordinationibus exactiones, quæ debitorum solvendorum titulo continuabantur, sustulit: magnam pecuniam in elemosynas impendit, atque ita decessorum suorum memoriam rerum piè gestarum gloriâ superavit.

Inoleverat apud Jacobitas perversa consuetudo, ut concubinas haberent, quod distictè prohibuit. Uno qui officium scripturæ in Divano exercebat refragante, neque suas dimittere volente, etiam post frequentes Ephræmi ammonitiones, ipse ad ejus domum profectus est. Cum alter fores occludi jussisset, eumque per horas duas pulsantem contemisset, anathema in eum pronuntiavit. Limen etsi ex lapide Soanite durissimo, fractum esse dicunt: concubinarius paulò post miserè cum familia tota periit.

Zelus ad-
versus concu-
binarium.

Apud Muazzum consilarii locum habebat Judæus quidam Abu Yacoub Ebn-Kalas quem ex Africa adduxerat, diligebatque, eò quòd Muhamedanam religionem ejus hortatu professus fuerat. Judæus alius Moses qui illi familiarissimus erat, petiit ut sibi coram principe facultas daretur disputandi de fide adversus Patriarcham. Noluit tamen Muazzus, permisitque tantum ut si vellet, aliquem ex suis Episcopum designaret, qui cum Judæo congrederetur. Elegit ille Severum Episcopum Aschmonin, virum summâ Arabiæ linguæ peritiâ celebrem, *cujus*, ut Auctor ait, *extant opera varia, disputationes, & sermones: ex quorum lectione, doctrina ejus & eloquentia faciliè agnoscuntur.* Cum in conspectum venissent, negavit Severus dignitati principis convenire, ut coram eo sermo cum Judæis haberetur, quos suos ipsorum Propheta Isaias, brutis inferiores esse dixisset, quod pro-

De Severo
Episcopo As-
chmonin.

De ejusope-
ribus scribi-
tur etiam in
vita Philo-
theci, p. 92.

lato ex scriptura loco confirmavit. Neque ulterius processit dis-
putatio. Narrant eundem Severum facili fuisse ingenii, & fa-
ceti : quodque cum esset aliquando apud supremum Judicem,
prætereunte cane interrogatus est, num iste canis Christianus es-
set an Muslemanus. *Quare ab eo, inquit Severus, respondebit ip-
se pro se.* Mox subjecit: *Hodie, inquit, feria 6^a est quam Chri-
stiani jejunando observant, nec carnem manducant: vesperè cum
jejunium solvent, parum vini bibent: Muslemani non jejunant
hodie nec vinum bibunt. Objecite igitur huic cani carnem &
vinum: si carnem vorat, Muslemanus est: si eam refugit, &
vinum bibit, Christianus.* Quantum verò laudis consecutus in
Ecclesia sua Severus fuerit, non modò ex hujus auctoris testimo-
nio intelligitur, sed ex Elmacino qui ejus meminit, magisque ex
ipsius Severi operibus quorum multa extant in Bibliothecis. Præ-
cipua sunt Historiæ istius Patriarchalis pars 1^a quam ex Copticis
& Græcis exemplaribus transtulit potius quàm composuit. *Ex-
positio Christianæ fidei secundum sectam Jacobiticam: De Pas-
chate & simul de Eucharistia: De exercitiis Christianorum: Ex-
positio Legis Mystica: adversus Judeos & Motazalios: De
Dei unitate. Adversus Said filium Patrik Alexandrinum Meli-
chitarum Patriarcham. Adversus Nestorianos. Tractatus de
Judiciis, ad Abulyemen Cosmam Mennæ filium. Contra Fa-
tum. De pellenda tristitia, & moribus rectè instituendis. De
statu animarum. Sessiones sive Colloquia. De statu infantium,
tam Christianorum quàm Infidelium. De differentiis Schisma-
tum, seu de Hæresibus. Judicia. Explicatio mysteriorum Incarna-
tionis. Commentarius in Evangelia. Instructio de Confessione
peccatorum. Ordo rituum Ecclesiasticorum, præsertim in Litur-
gia. Quæstiones & responsiones, ad filium Giaroud. Explica-
tio fundamentorum Christianæ fidei. Expositio fidei brevior.
Parabolæ & enigmata. De Ordinibus Ecclesiasticis. De Qua-
tuor primis Conciliis Synopsis Historica. Hæc sunt opera quæ
vel reperiuntur in Codicibus Mss. vel laudantur ab Abulbircat,
aut ab Ebnassalo in Collectione Principiorum fidei. Opusculum
verò de Paschate & Eucharistia tanti æstimatur, ut occurrat in
plerisque Codicibus: qui tractatus continent de præparatione ad
communione.*

Miraculum.

Narrant præterea, quòd Judæorum istorum secretis machina-
tionibus Muazzus ad vexandos Christianos impulsus, accersitum
Ephrazimum

Ephræmum interrogaverit, num verè in Evangelio scriptum esset eos qui fidem haberent, quasi granum sinapis, solo verbo effecturos ut mons in mare jactaretur. Patenti, imperavit ut tale coram ipso miraculum ederet; comminatus, se Christianum nomen doleturum, si res non succederet. Patriarcha in suminis angustiis constitutus, trium dierum inducias dari sibi postulavit. Interea convocatis Ecclesiasticis, Monachisque aliquot ex Valle Habib, qui tunc Misram venerant, jussit ut omnes per illud triduum orationibus continuis in Ecclesia congregati vacarent. Illi jejunaverunt, noctu solum parum panis cum sale gustantes: Patriarcha toto triduo jejunus permanfit, stans, flens & preces ad Deum fundens, adeo ut præ nimia defatigatione loco se movere vix posset. Convenerant autem omnes in Ecclesiam vulgò *Mual-laca* dictam in *Kasser el-chemah*: cùmque dies tertius illucesceret, Patriarcha jejunio, vigiliis & continua oratione fractus, in terram cecidit, paululumque obdormivit. Somnianti oblata est species Virginis Deiparæ, quæ de causâ mceroris eum interrogaret. Respondentem, & minas Sultani de excidio Christianorum referentem bono animo esse jussit, surgere & egredi per portam quâ ibatur ad majorem plateam: fore ut illi occurreret homo luscus, vas aquæ portans, ab eo miraculum quod Princeps petebat perfectum iri. Statim profectus, hominem sibi in visu designatum reperit, & retinuit: qui cùm se peccatorem diceret, alter revelationem sibi factam narravit; tum oblata ipsi cruce, sub anathematis poena præcepit, ut quis esset significaret. Fassus tandem est, se oculum quo carebat sibi eruisse juxta Evangelium, quia oculos contra Dei præceptum ad res illicitas converterat, potiusque habuisse, cum uno oculo intrare in paradysum, quàm duos habentem mitti in gehennam: se tinctori operam locasse, tota die laborare, neque sibi quidquam præter panem reservare, reliqua pauperibus distribuere: noctu aquam haurire quam illis præberet; reliquum tempus orationi impendere: rogavit etiam ne hæc cuiquam aperiret, verùm ad Muazzum securo locasse, & ad montem designatum, cum crucibus, Evangeliiis & thuribus procederet, adeo ut Christiani hinc, Muslemarii inde confisterent, se ponè eum in turba futurum, ne quis eum agnosceret. Tum longo spatio omnes debere inclamare *Kyrie eleison*, & in terram procumbere; quod cùm ter fecissent, ipse Patriarcha faceret crucis signum contra montem, tuncque visu.

rum gloriam Dei. Observatis his omnibus, postquam Muazzus cum Viziro suo, primariisque purpuratis magnaue copiarum parte ad locum venisset, orationesque cum signo crucis factæ fuissent, mons loco moveri cœpit : unde exterriti Muhamedani clamare cœperunt : *Alla Ekber, Deus magnus : non est alius Deus præter te.* Ita dimissus Patriarcha, metuque solutus est : vir pius quem pone se reliquerat, postea non comparuit. Tunc cum Muazzus copiam Ephæmo fecisset petendi quidquid vellet ; & ille nihil aliud petere se nisi salutem principis, utque victor inimicorum suorum esset respondisset ; tandem iussus petere aliquid, petiit ut Ecclesiam D. Mercurii Misræ restituere sibi liceret : nam ex quo everfa fuerat, non habuisse Christianos unde illam rescicerent : eandem quoque facultatem concedi sibi postulavit pro Ecclesia Muhallaca cujus ædificia partim destructa, partim caduca erant. Muazzus utrumque concessit, diplomaque confici jussit, tum necessariam ad expensas pecuniam, ex ærario subministrari. Ille diploma recepit, sed pecuniam accipere renuit. Maxima verò contentio Muhamedanorum fuit ne Ecclesia restitueretur : nam exterior ejus pars in forum mutata erat ; negabantque se passuros ut vel lapis moveretur. Muazzus milites convocatos manum operi admovere jussit, & novi ædificii fundamenta jacere. Dum terra foditur, unus ex Muhamedanis religiosus in fossam se conjecit, testatus vivum se potius terrâ & lapidibus obrui passurum, quàm ut opus confurgeret. Eum Princeps obrui lapidibus eodem in loco jussit : unde Patriarcha satagente, semivivus extractus est ; neque quifquam postea aut loqui aut agere contra illius præceptum ausus fuit. Alexandriæ quoque dirutas Ecclesias reparavit ; cumque ingentes sumtus in illis ædificationibus fecisset, defuit ipsi unde mille aureos qui quotannis solvebantur Alexandrinis ad eorum Ecclesiæ expensas sustinendas, repræsentaret : precibusque tandem & beneficiorum ab eo acceptorum memoriâ tantum obtinuit, ut annum illud debitum ad quingentos aureos reduceretur.

Quid de mi-
raculo judi-
candum.

Meminit hujus historiæ tanquam notissimæ Autor Chronici Orientalis ab Echellensi Latine editi : cujus testimonium movere neminem debet, cum omnia sua ex vitis Patriarcharum summis-
se illum, ubique appareat. Elmacinus eam præterit, ut etiam Makrizius, quod in homine Muhamedano mirum esse non debet. Attamen præter commune illud de miraculis extra Ecclesiam factis præjudicium, vacillat prorsus autorum Orientalium hoc in genere

PATRIARCHARUM ALEXANDRINORUM. 371

fides. Idem enim prorsus miraculum Relationi suæ de statu hodiernorum Græcorum inseruit Christophorus Angelus, tanquam in Ægypto, & quidem Cahiræ factum, sed à Græco Patriarcha, non sub Fatimidis, sed sub Turcis Imperatoribus, sexaginta circiter annis antequam scriberet : scribebat autem anno 1617°. Multò priùs, nempe vertente sæculo decimo tertio, Marcus Paulus Venetus qui anno 1295° in patriam rediit, eandem omnino historiam contigisse refert prope Taurisiam urbem in Perside celebrem, & simile quiddam legitur in historia Catholicorum Nestorianorum, ut in recentiorum Græcorum libris nonnullis. At tot diversa testimonia Orthodoxorum, Jacobitarum, & Nestorianorum, unum idemque miraculum cum diversis tamen temporum locorumque circumstantiis sibi tribuentium, suspicionem augere potius quàm fidem facere debent.

Obiit Ephræm, cum sedisset annis 3, mensibus 6; porrecto, ut fama fuit, veneno à quodam Abulserour, inter Christianos primario, quique in Divano officium exercebat. Causa odii & sceleris, quòd cum ille plures pellices aleret, sæpeque illum monuisset Patriarcha eas ut dimitteret, unamque uxorem retineret, obstinatusque in scelere persisteret, ab eo excommunicatus est.

Narrat Autor præterea apud Muazzum in summa gratia fuisse Cosmam Minæ filium, quem, cum Karmatianorum dux Syriam invasisset, misit in Palæstinam ut pecunias ad fiscum spectantes colligeret. Cum ducenta aureorum millia ex tributis confecisset, Karmatiani verò non solum magnam Syriæ partem, sed Palæstinam etiam devastarent, eam pecuniam deposuit in Monasterio Montis Tabor. Vizirus Judæus ea occasione quòd Cosmas ad provinciam rediisset & cum Karmatianorum duce aliquamdiu fuisset, proditoris eum insinulavit. Unde Muazzus omnes ejus propinquos in carcerem conjecit, fortunisque spoliavit. Sed cum postea in Ægyptum rediisset pecuniamque retulisset, Vizirum Ebn-Cales carceri mancipatum occidi jussit. Deposuerat Cosmas apud Ephræmum nonaginta aureorum millia, præcipiens ut, si quid ipsi humanitùs contingeret, ea in pauperes, captivos & Ecclesiæ utilitatem expendere. Cum in Palæstino itinere fama mortis ejus percubisset, expendit illam pecuniam Ephræmus; cumque ista excusatione apud Cosmam usus esset, verbum ille non fecit: nec vel una drachma apud Patriarcham inventa est post ejus mortem, cum & pecuniam illam & suam omnem in pios usus effudisset.

Aaa ij

Ephræm
Patr. LXII.

Christ. Angel.
c. 26. p. 550.

Mart. Paul.
l. 1. c. 18. Ed.
Lat.

Ephræmi
mors.
E. mac. p. 246.
Matriz.

Huc usque, quantum ex nostro Autore discere licet, intelligimus credidisse illum quod Ephrām sub Muazzo vixerit, etsi hal-
lucinatū eum in multis esse dubitare vix liceat. Nam quæ de
bello adversus Karmatianos gesto scribit, ad Azizi potius quàm
Muazzi ejus patris tempora videntur pertinere. Fallitur præterea
certissimè circa Vizirum Jacobum Ebn-Kales, qui ab Azizo qui-
dem conjectus est in carcerem, sed postea pristinae dignitati resti-
tutus est, adeo ut thesauros suos quos Azizus fisco addixerat re-
cuperaverit: & postea obiit anno 386°, publico elogio & lacrymis
prosequente eum Azizo, ut non modò historici omnes manu-
scripti, sed Elmacinus quoque testantur. Eum autem esse de quo
historia Patriarchalis loquitur, manifestum est; ait enim eum ex
Judæo Musselmanum factum esse, tributus præfectum & postmo-
dum ad supremam Viziri dignitatem evectum: quem tanti æsti-
mavit Azizus, ut morienti adstans dixerit, se salutem ejus si ita
fieri posset; toto suo regno, vel sui ipsius filii vicā redempturum.
Hæc cum auctoris Christiani narratione conciliari non possunt, qui
si in Christianorum Jacobitarum rebus aliquam meretur fidem, at
in Politicis nullam aut exiguam habere debet.

Res Muha-
medanz.

Ut verò eas pro more nostro paucis explicemus, Muazzus 1^{us}
Califarum Fatimidarum qui Ægypti regnum obtinuit, obiit anno
Hegiræ 365°, J. C. 975°.

Aziz billa ejus filius, Mehedia in Africa natus, ei successit hoc
ipso anno, ejusque nomine oratio facta est in Ægypto, Syria,
Hojaza, & magna Arabiæ parte, ut etiam in Africa: regnavit-
que feliciter usque ad an. 386^{um}, J. C. 996^{um}: nullis feræne
bellis vexatus, nisi quæ per legatos suos gessit in Syria, ubi
Damascum atque Halepum obsederunt. Ea autem quæ tunc con-
tinua ferre fuerunt, Arabum tam inter se quàm cum Christia-
nis bella explicare & prolixum & difficile foret. Ea tamen ut
intelligantur, & quibuscum res foret sciri possit, talis erat Orien-
tis conditio, ut Samanidæ Chorasanam & alias provincias; Filii
Bowix in tres familias divisi, Persidem vicinasque alias, totam-
que Iracani obtinerent, in qua multas urbes tenebant Hamada-
nidarum reliquiæ: Califa nec in ipsa Bagdado quidquam posset.
Fatimidæ cum duabus illis familiis multa bella in Syria gesserunt,
& cum Karmatianis, quorum dux tunc erat Hacen filius Ahmed,
Abusahidi nepos. Is est, qui, ut habet Autor noster, ma-
gnam Syriæ partem occupavit, & in Ægyptum quoque arma in-

PATRIARCHARUM ALEXANDRINORUM. 373

ferens repulſus eſt, ſed non interfectus : nam Remlæ diem ſuum obiit anno 366° : atque adeo ſub Azizo, mortuo jam Muazzo. De Chriſtianis quos habuit Azizus in miniſterio, idem teſtantur hiſtorici Muhamedani, ſed ita ut Judæos quoque Divano & veſtigalibus illum præfeciffe tradant, quo nomine malè audierunt Fatimidæ apud rigidiores Myhamedanos.

PHILOTHEUS PATRIARCHA LXIII. PHILOTHEUS PAIR. LXIII.

IN iſtius, ſicut aliorum qui præceſſerunt, ætate assignanda magna eſt Autorum Hiſtoriæ Patriarchalis negligentia. Nam iſtum ordinatum fuiſſe ſcribunt ante Muazzi obitum, poſtquam Sedes Alexandrina ſex menſibus vacaſſet. Contradicit Elmacinus, qui initia ejus aſſignat anno Hegiræ 371°, qui eſt J. C. 981^m, Martyrum 697^{us} : Canon apud Abulbircat anno 692° : At cùm obiiſſe dicat Ephræmum anno 690°, vacaviſſet Sedes annos duos : Makrizius anno 369° Hegiræ ordinationem ejus alligat, nullâ, niſi ſex menſum, Sedis vacatione : tanta eſt illorum temporum obſcuritas. Nam quemcumque calculum ſequi placeat, ante Muazzi mortem Philotheus electus fuit. Is ipſe eſt quem ex prava codicis ſui punctatione Erpenius Philoponum appellavit, cùm Makrizius, Canon Chronologicus, tam apud Abulbircat, quàm Græco-Arabicus apud Kircherum, & noſtra Hiſtoria eum Philotheum appellent. Erat is Monachus apud S. Macarium : cùmque de more, Episcopi reliquique ordinis Eccleſiaſtici, cum Laicorum primoribus Miſram, ſeu Kahiram, conveniſſent ad eligendum Ephræmo ſucceſſorem ; ſtatim venit illis in mentem, ut ſenior quidam Monachus ex eodem Monasterio, nomine Joannes, acceſſeretur, habitans in cella dictâ *Zekar el-Fakara*. Eum cùm ſenio conſectum vidiſſent, atque adeo tanto muneri imparein, diſcipulum ejus, qui eum comitabatur, elegerunt. Is erat Philotheus, in quo ſtatim agnoverunt, quantum ſuum eos de illo judicium ſeſelliſſet. Neque enim moram ſecit, quin contra deſceſſoris ſui exemplum, pro ordinationibus Episcoporum pecunias exigeret. Nempe id eſt quod apud Elmacini Interpretem legitur, *eum accepiſſe ſantoniam* : nam *Chartonia* Arabibus Chriſtianis, adventitia vox, primo & vulgatori ſenſu *χαραντία* ſignificat, unde detorta eſt : ſed deinde uſurpari coepit pro exactione indebita pecuniarum in ordinatione, quam vulgò ſimoniam appellamus.

Elmac. p. 246.

PHILOTHEUS
Patr. LXIII.
Status Ec-
clesiæ Ale-
xandrinæ.

374

HISTORIA

Ecclesiam Alexandrinam summa in pace fuisse, omnesque alias Ægypti sub Muazzo, testatur Autor, & postea sub Azizo ejus filio & successore. Erant inter Christianos multi in Aula Divanique ministeriis, atque inter alios, insignes quidam viri, quos filios Moriah appellabant. Illi cum animadverterent Philotheum pecuniis corradendis unice intentum, promovere ad Episcopatus homines indignissimos, constituerunt cum ipso, ut nullus, nisi ex eorum arbitrio, ordinaretur. Erat tunc Episcopus Menus superioris Macarius, scriba Synodi, cujus frater Mennas erat Episcopus Tana, qui tunc, vacante Episcopatu Demroia, cum Patriarcha transiebat, ut frater ejus eò transferretur, ubi domum habebat: Monachum quemdam Tanæ Episcopum ordinaret: quod fecit. Filii Moriah querelam de violata pactione ad Principem detulerunt, qui eum in carcerem conjecit, & ab eo tria millia aureorum exegit.

De Vazah
filio Rejah.

Hic inseritur historia apud Orientales celebris de Vaza filio Reja Ægyptio. Erat ille juvenis inter nobiliores urbis Misræ, patre natus qui apud Judicem Testis, seu Consiliarii munere fungebatur. Institutus fuerat diligenter in Muhamedana Religione, Alcoranumque memoriâ tenebat. Accidit ut quodam die transiret per forum, ubi occurrit ei Muhamedanus, qui ejurata superstitione sua Christianam fidem professus fuerat, & ea de causa ad supplicium trahebatur; lignaque colligebantur ad eum comburendum. Concorrebat simul ingens multitudo hominum ad tale spectaculum; inter quos Vazah se conjecit, atque, velut alter Saulus, Martyri insultare coepit & amentiam exprobrare quod se in certam perniciem conjecisset, fidem profitendo, quæ Deo socium attribueret, & tres Deos induceret: qua impietate & parati ignis supplicium in hoc mundo, & in futuro ignem gehennæ sibi parasset. Christianus modestè respondit se non tres Deos, sed unum credere, & prædixit fore ut Vazah, qui ei contumeliosè tunc insultabat, cœlesti luce illustratus, fidei veritatem agnosceret, simileque ejus causâ supplicium pateretur. Alter irâ percitus, sandalio detracto Martyrem post multa maledicta, graviter verberavit. Postea cum ipsi caput amputassent, corpus in ignem conjecerunt, extructa ingenti pyra, quæ quamvis triduo arsisset, tamen Martyris corpus integrum & auro simile repertum est; quod cum Muazzus accepisset, statim sepeliri iussit. Juvenis domum rediens noctem insomnem duxit, moerore

confectus propter ea quæ à Martyre audierat, frustra patre & propinquis eum consolantibus, Paulò post cum alijs in Hijazam, seu Arabiam, profectus est, Meccanæ peregrinationis causâ; & illum pater amico, itineris comiti, commendavit. In ipso itinere ter ei per somnium oblata est species senioris Monachi jubentis ut sequeretur se, si salvam suam animam esse vellet. Amicus jubet ne hæc phantasmata diaboli curet ullatenus: ita perfecta peregrinatione redierunt. Cùm verò socius & ipse ex camelis ad aquandum descendissent, alterque processisset, juvenis ponè relictus in solitudine à via aberrans, solus remansit, in magno metu, ne à feris laceraretur. Tunc apparuit ipsi eques veste splendida amictus, zonæque auræ cinctus, qui humanè interrogavit, quid rerum ageret in vasta illa solitudine. Alter à comitibus suis, dum aquatum iret, aberrasse respondit. Eques jussit, ut in lumbos equi subiret; quod ut fecit, statim per aerem raptus, temporis momento translatus est prope Ecclesiam S. Mercurii Misræ, cujus fores continuò apertæ sunt. In eam eques simul ingressus, coram sanctuario, sive altari, eum constituit, nec comparuit. In summo igitur stupore relictus, agnovit Christianorum Ecclesiam ex accensis lampadibus & imaginibus, & in sanctuario usque ad diluculum permansit. Eo tempore Ecclesiæ Sacellarius cùm introisset furemque illum esse judicasset, accersitus & interrogatus docuit illum esse Misræ in Ecclesia S. Mercurii: cùmque juvenis narrasset se ipsa nocte fuisse in loco quem designavit; alter eum primò delirare existimavit, tandemque otiosa illa narratione furandi consilium, quod virtus Martyris impediaverat, excusare vellet. Rursus quæsit Vazah, cujus esset hæc Ecclesia. Respondit Sacellarius, eam esse S. Mercurii, qui pro fide Christi, quam coram Principibus Infidelibus confessus fuerat, tormenta multa ipsamque mortem subiisset; deinde à Deo in cœlum receptus, apud eum pro alijs intercederet, miraculaque patraret; cujus nomine & ista & multe aliæ Ecclesiæ ædificatæ fuerant. Quæsit, quæ ejus forma fuisset. Retulit Sacellarius, eum & formâ & ætate parem ipsi Vazaho fuisse; ostenditque illius imaginem, quâ visâ obstupuit; agnovit enim eam ipsam illius esse qui ipsi in deserto occurrerat, & ex cingulo aureo illum agnovit. Tum omnia narravit Sacellario, falsusque se esse Muhamedanum, filium Reja, affirmavit se velle Christianum fieri. Sed ne Ecclesia ejus causâ incenderetur, tum ne se ipsum periculo expone-

ret, rogavit Sacellarius ut se in quodam loco absconderet, donec Sacerdotem accerferet à quo in fide Christiana institueretur. Sacerdos eum docuit quaecumque ad fidem pertinebant : & cum Vazah postulasset afferri sibi Evangelia reliquosque libros utriusque Testamenti; Sacerdos ipsi Copticum exemplar Arabicè interpretabatur. Tandem cum plenè in fide confirmatus esset, baptismum petiit, & obtinuit. Ex ejusdem Sacerdotis consilio mutatis vestibus professionem paravit in Vallem Habib, cum pauci eum agnoscere possent, tum ob cultus mutationem, tum quòd jejuniis, vigiliis, oratione & lectione continua emaciatus esset. Verùm agnitus est à quodam ex necessariis; qui cum patri & fratribus suspicionem suam indicavisset, observatus, abductusque, quis esset ulteriùs dissimulare non potuit. Illis igitur significavit, se Paulum esse; (nam ita in baptismo vocatus fuerat) fidemque constanter professus est. In custodiam datus, & triduo absque cibo & potu relictus, inde exiit, quasi ex convivio. Cùmque parentes ejus de eo occidendo deliberassent, ne ejus conversio probro ipsis apud suos esset, amore patrio victi, consultius judicaverunt ut secretò eum dimitterent. Ille ad Vallem Habib veniens, apud senem Monachum, vitam Cœnobiticam professus est: cùmque aliquamdiu in ea perseverasset, quidam Monachorum temerè dixit Christianæ fidei professionem acceptam Deo non esse, nisi eam iis in locis ubi notus erat renovaret. His auditis Misram rediit & ad paternam domum se contulit: ubi à patre durissimè habitus, in foveam demissus est, cinere, sordibusque plenam, relictusque absque potu & cibo, per dies sex: quibus elapsis, eadem species Monachi quam viderat per somnium in Meccano itinere, vigilanti oblata est. Cùmque Monachus quævisset an se agnosceret, alter annuisset; dixit se esse Macarium Monachorum patrem, qui ad eum consolandum venerat: tum panem candidissimum dedit: quem cum Vazah, factò prius crucis signò gustasset, redintegratis viribus prorsus recreatus est. Pater frustra hortatus eum ad fidem abnegandam, adduci jussit puellam quam priùs apud se habuerat & ex qua filium sustulerat: quorum conspectu cum non moveretur, infantem pater submersit. Tandem eum accusavit apud Sultanum, qui tunc erat Hakem, Azizi filius; sed cum accusante patre causam dixisset, absolutus est, liberque, quò vellet abire permixsus. Ille ad eum locum ubi caput Canalis Nili est, se recipiens, prope piscinam Abyssinorum

PATRIARCHARUM ALEXANDRINORUM. 377

PHILOTHEUS
Patr. LXIII.

finorum dictam, Ecclesiam S. Michaelis nomine ædificavit : & cùm ligna ad ædificium parata quidam abstulissent, ea, cùm locum ubi furtum deposuerant designassent, refetre coegit.

Vazah filius Reja lectioni & sacrorum librorum meditationi intentus, magnam cum Severo filio Mocfah, Episcopo Aschmonin, amicitiam coluit : qua occasione de eodem Severo scribit Autor Historiæ, eumque à doctrina multiplici commendat, quam multis voluminibus editis testatus est. Recensentur etiam plerique illius libri, atque illi ferme omnes, de quibus suprà diximus. Scripsit quoque Vazah filius Reja, libros aliquot linguâ Arabicâ : quorum duo celebres commemorantur. Primum suo ipsius nomine Vazah appellavit, hoc est *Explicationem fidei adversus Hæreticos*, quorum errores, ex propriis eorum libris refellere aggressus est : secundum ; *Monita ad Interpretes*, vel si aliter legamus, *Selecta ex Interpretibus doctrina*. Vertit Erpenius *Eloquentiam Interpretum*. Illorum enim librorum meminit Elmacinus : quibus libris vehemens Hæreticorum indignatio excitata est. An verò per Hæreticos, ut sæpè, hoc loco Muhamedani intelligendi sint, an verò Christiani à Jacobitica secta alieni, divinare non possumus. Nam etsi rariùs adversùs Muhamedanos Christiani Orientales scripto disputasse deprehendantur, fecerunt id tamen olim multò liberius, quàm sub Othomano Imperio fieri solet ; nam talis libertas capite constaret. Olim verò licebat Christianis de fide sua & voce & scripto publicè disputare, & ejus generis Disputationes aliquot supersunt in Codicibus manuscriptis. Tales sunt inter alias Abrahami Tirhanensis cum Abdelrahmano, & duorum Monachorum cum Amran Judæo. Eliz Nisibensis Metropolitæ, coram Viziro Abulkacem filio Hucein Mogrebite. Tractatus Isâ filii Zaraa adversùs Abulhacen Balchitam : Abucoræ, qui vulgò à Græcis Abucatas dicitur, Disputatio Apologetica pro Religione Christiana coram Almamone Califa. Alia de Trinitate & Incarnatione habita Cahiræ anno Hegiræ 639, J. C. 1270°, autore Ebnassalo. Alia inter Monachum & Vizirum Principis Africæ, scripta ab Ebn el-Taïb Nestoriano. Disputatio inter Chouch el-Iechua Monachum, & Æchmalotarcham Judæorum, habita in urbe Meru Corasanæ primaria. Dialogus inter Neophytum & Magistrum de vanitate prophetiæ Muhamedis, cum Alcorani refutatione. His tractatibus alii non pauci adjungi possent : verùm rariores quosdam indicasse sufficiet, ut intelligatur duram illam

Elm. p. 246.

Cod. Bib. Reg.
365. 417. 419.
425. 427. 432a
433.

Historia Vi-
tæ Vazah fi-
lii Reja ab
ipso scripta.

legem, secundum quam de Religione Christiana nec loqui, nec scribere inter Turcas conceditur, alienam fuisse ab illius de quo jam scribimus sæculi moribus. Jam ad Vazahum revertamur.

Præter libros ad fidei confirmationem, scripsit quoque vitæ suæ historiam quam à diversis scriptoribus laudatam observavimus, ipsam tamen huc usque videre non licuit. In ea refertur miraculum insigne de Eucharistia, quod acceptum à Severo Episcopo Aschmonin amico suo, Vazah literis consignavit. Historia talis est. Fuit Bagdadi vir quidam primæ inter Muhamedanos nobilitatis, Hascemi dictus, qui quotidie cum numerosa militum manu in Ecclesias irrumpens, dum Liturgia celebraretur, Eucharistiam comminuebat & conculcabat. Cum ea occasione, intermissa aliquamdiu officia fuissent, renuentibus sacerdotibus præ metu ea celebrare, quodam die r. ore suo unam ex Ecclesiis ingressus est, ubi Liturgiam celebrari sciebat. Cernit sacerdotem in manibus tenentem puerum eximiâ formâ; & communionis tempore dum hostia frangitur in partes, carnem ejus in frustra dividi, quæ communicantes acciperent, sanguinem à Diacono in calice præberi. Interrogatis comitibus num tale quid viderent, cum respondissent, nihil videre se præter panem & vinum; magis obstupuit, & à sacrilegio abstinuit. Finita synaxi Sacerdotem accersivit, qui simpliciter explicavit institutionem Eucharistiæ factam à Christo Domino, qui tunc discipulis suis dixit, *Accipite & comedite, hoc est corpus meum*, panem præbens; & de calice, *Bibite vos omnes de meo sanguine in remissionem peccatorum vestrorum*. Postea, inquit, *Discipuli docuerunt nos orationem, quam dicimus super panem & vinum quando ea super altare intulimus: transmutaturque panis, & fit caro; vinum quoque fit sanguis, secretò, ea ratione quam tibi hodie Deus manifestavit. Exterius tamen panis & vinum videntur, nemo enim posset carnem crudam, aut sanguinem recens effusum gustare. Igitur Deus manifestavit tibi hoc mysterium absconditum, verum & sanctum, ad salutem animæ tuæ*. Is postea Christianus factus fidemque constantissimè professus, post varia tormenta capite truncatus est, Bagdadique cum honore sepultus in Ecclesia ab ejus nomine Hachemia dicta, quam ad ejus tumultum Christiani ædificaverunt. Huc usque historia quam propriis autoris verbis explicatam retulimus in Dissertatione de Eucharistia. Quod ad ejus *authenticitatem* spectat, præter antiqui autoris fidem quæ non levis est, tres illius testes

adducuntur, Severus qui Vazaho narravit, ut rem sibi compertam : Vazahus qui in vita sua eam descripsit : Autor historiæ Patriarchalis, qui eam suæ inferuit. Erunt procul dubio Protestantæ, etsi ad eam jamdudum Theologis qui de Perpetuitate scripserunt ante annos multos publicatam nihil huc usque responderint, qui illam non magis æstimandam arbitrabuntur, quàm alias multas mirabiles narrationes, quas huc usque ex Coptitarum libris descripsimus, & quarum auctoritatem mediocrem omnino vel planè nullam ultrò fassî sumus : eo maxime argumento quod inter Hæreticos miracula fieri, credere Catholicus vix queat. Uno verbo res transigetur : sit ficta futilisque narratio, nihil nostrâ refert, modò certum sit, eam ab Autore Jacobita scriptam, & creditam, quod disiteri nemo potest. At qui ita scribit, qui que sibi fidem ut faciat, Autores suos appellat, is procul dubio credit Eucharistiam esse verè & realiter corpus & sanguinem Christi, nec ullam Protestantium doctrinæ similem de hoc Sacramento opinionem habere potest. In aliis quos viderimus libris nulla hujus historiæ mentio est ; nec mirum, cum Jacobitarum Bagdadensium aut Antiochenorum libros historicos nullos habeamus, sed tantum Nestorianorum à quibus non libenter scriberetur miraculum quod ad Jacobitas pertineret.

Cum Vazah filius Reja, qui Pauli nomen in Baptismo accepit, Ecclesiam sancti Michaelis ædificasset, reversus est ad Vallem Habib, atque duos annos illic transiit : tantæque pietatis & doctrinæ argumenta dedit, ut Monachi eum Sacerdotem ordinari curaverint ad Cellam Benjamini, eam opinor Ecclesiam quam ille olim habuerat, dum ad S. Macarium antequam Arabes Ægyptum expugnassent, delitesceret. Discipuli Patriarchæ qui ejus nomine pecunias exigebant, statim ab eo aureos aliquot petierunt ; quos cum solvendo non esset, primarius inter Christianos, eos protulit, indignatus adversus improbissimos avari Patriarchæ ministros qui tanti scandali causam præberent. Pater Pauli cum eum audisset vitam Monasticam professum fuisse, tanto furore incensus est, ut missâ pecuniâ Arabes latrones hujus deserti subornaverit ad eum occidendum. Hinc ex Monachorum consilio profectus est in regionem El-Rif inferioris Ægypti, atque Sendafæ substitit, Oeconomi seu Sacellarii Ecclesiæ S. Theodori munere fungens, per biennium : & paulò post mortuus est. Advenit biduo antequam obiret, Theodorus Diaconus qui erat Patriarchæ ab Epistolis : cui cum mortem instare

sibi prædixisset, rogavit ut corpus suum statim in loco occulto poneret: nam adversus eum Muhamedani Sendasæ & Mahalæ vicinæ urbeculæ tumultuari jam coeperant, corpusque igni tradere volebant. At cum illud in quadam crypta secreta sepelisset, illi frustra perlustratâ totâ Ecclesiâ recesserunt. Aiebat Paulus, se in tot periculis & calamitatibus nullam animi perturbationem expertum esse, nisi ter: semel cum frater ejus, in contemptum & injuriam se spectante, concubinam suam vitiavit: tum cum filium quem ex ea sustulerat, coram se in aquis suffocatum vidit: tandem cum præsentem & videntem Patriarcha, ejus discipuli ab eo pecunias extorserunt pro ordinatione sua. Autor historiæ Michael Episcopus Taneos, testatur hoc loco omnia se quæ de filio Reja literis tradiderit, accepisse ab eodem Theodoro Diacono, scriba Patriarchali, post cujus mortem idem munus obtinuit.

Philothei
sceler.

Philotheus totus corradendis pecuniis intentus, cibo, potui, & balneis indulgebat, ubi cum diu noctuque deliciaretur, domique cum propinquis & aliis convivia celebraret, paucissimas horas negotiis Ecclesiasticis impenderet, quibus elapsis conveniri non poterat, à Deo percussus est. Quodam enim die cum lavaretur, discipulumque dimisisset qui smegma afferret, ab eo cum rediret, semianimus repertus est: frustra que adhibitis medicamentis, paulò post mortuus est. Serour Georgii filius Archidiaconus Alexandrinus narrabat eum, cum ad altare die quodam accessisset, & oblationem perfecisset, quæ est prima pars Officii Eucharistici, statim obmutuisse: aderant Episcopi plures, inter alios Episcopus Behnseh Marcus, & Severus Bursikidos: qui statim ipsi orationes suggererunt; sed loqui non potuit: Marcus igitur Liturgiam perfecit. Ita usque ad horam nonam permansit; cumque instarent qui aderant, ut diceret quid ipsi accidisset, tandem fassus est, quod antequam oblatam crucis signo benediceret, fissò arcu seu ciborio quod altari imminebat, prodierat manus quæ oblatam signavit in modum crucis, statimque fissæ est inter manus ejus. Obiit 2^a Atyr, cum sedisset annos 24, menses 8: qui si numerentur secundum Elmacinum ab anno Hegiræ 371^o, obitus ejus incidet in an. 396^{em}, qui est J. C. 1005^m, Martyrum 721^m. At Canon Abulbircat eam assignat anno 716^o, eique annos 23. attribuit, menses 10, qui intercurrunt inter annum ordinationis ejus qui in eodem Canone est Martyrum 692^m. Quemcumque verò calculum sequamur, obiit ante illum Azizus de quo mox dicetur.

PATRIARCHARUM ALEXANDRINORUM. 381

PHILOTHEOS
PATR. LXIII.

Regnaverat ille usque ad an. 386. Hegiræ : & successorem habuit Hakemum filium penè puerum , qui regnavit usque ad annum 412^{um} ; 3^{us} Fatimidarum. Abbassidæ Mutiah deposito , substitutus est Taia Lilla ejus filius , vivo patre qui Taia 24^{us} fuit ex Abbassidarum numero ; depositus est anno 381°. Huic successit 25^{us} ex eadem stirpe Kader billa , absque ulla auctoritate , Bowiadarum mancipium , qui regnavit nomine tenuis , usque ad annum Hegiræ 422^{um} , J. C. 1030^{um} & 1031^{um}.

Michael Episcopus Taneos, Elmacinus, & Makrizius scribunt Azizum ex concubina Græca, Christianis orta parentibus, Hakemum filium habuisse. Ea fratrem habuit Arsenium, quem Azizus in illius gratiam creavit Melchitarum Patriarcham. Is auctoritate mulieris fultus, Ecclesias Jacobitarum occupare aggressus est. Volebat quidem Muallacam in *Kasserelehema* ; nec post multas cum Jacobitis contentiones eam obtinere potuit, sed aliam Beatæ Mariæ in Vico Abuhusseini. Elmacinus addit eam mulierem fuisse Christianam, & obtinuisse ut alter ejus frater Hieremias vel potius Hermes Patriarcha Hierosolymitanus designaretur. Ecclesiam porro quæ Melchitis cesserat, eam dicunt quæ postea vocata fuit *Ecclesia Patriarchæ*, nempe Melchitarum, cum Muhallaca, quæ etiam *Catholica* dicebatur, Jacobitis superesset.

Res Melchitarum.

Elm. p. 247.

Diximus in vita Cosmæ ab ejus tempore interruptam fuisse consuetudinem mittendi in Æthiopiam Patriarchas, seu potius Metropolitans Alexandriæ ordinatos. De rebus Æthiopum Politicis aut Ecclesiasticis, nulla deinde occurrit memoria ; nisi sub hoc Patriarcha, quo sedente, ut Autor vitæ scribit, misit Rex Æthiopiæ literas ad Georgium Nubiæ Regem, quibus significabat, quæ ratione pœnas à se & à subditis suis Deus exegisset. Mulier enim Regnum obtinens super filios *Hamouta*, vel *Amouta*, Æthiopiam invasit, captivos multos abduxit ; urbes plurimas incendit, Ecclesias diruit, Regemque ipsum in fugam versum errare & variis in locis latitare coegit. Hæc autem omnia accidisse dicebat propter ea quæ decessor ejus commiserat adversus Patriarcham missum tempore Cosmæ, ut in ejus vita dictum est. Rogabat etiam per easdem literas Regem Nubiæ ut ipsi adjutor esset & socius laboris, Dei causâ, & propter consensum eorum in fide, utque scriberet ad Patriarcham Ægypti, peteretque ut se & Æthiopiæ regionem absolveret, oraretque pro illis, ut

Res Æthiopice.

Bbb iij

Deus tantis calamitatibus finem imponeret : obtineret tandem ut Patriarcha juxta veterem consuetudinem ordinaret ipsis Metropolitam, qui pro illis preces fundens, divinam vindictam ab illis averteret. Tum hæc subiciebat : *Hæc autem frater, ad te perscripsi, veritus ne apud nos aboleatur & prorsus intereat Christiana Religio. Jam enim sex Patriarchæ Alexandria fuerunt, qui regionis nostræ nullam rationem habuerunt ; quæ ita permansit desolata absque pastore : mortui quippe sunt Episcopi & Sacerdotes nostri : Ecclesiæque vastatæ sunt. Nec ignoramus justè hæc mala nos perpetrare, eorum ratione quæ contra Metropolitanum à nobis commissa sunt. Lectis literis Rex Nubiæ Georgius scripsit ad Philotheum Patriarcham, qui ejus precibus commotus Monachum ex S. Macarii Monasterio Daniele nomine, ordinavit Æthiopiarum Metropolitam. Is ab Æthiopum Rege omnibusque ordinibus benignè exceptus est, ingenti totius Regni gaudio, & paulò post levata calamitas publica ; & scæminæ tyrannis extincta est.*

Observanda circa hanc historiam.

Ex hac historia multa discimus ; quamvis plura longè ignorentur quæ ad eam illustrandam necessaria forent. At illud quidem certum & variis testimoniis confirmatum, quod antiquitus, hoc est ab ipsa Ecclesiarum divisione, per Hæreticorum Monophysitarum, Æthiopes & Nubiæ qui sub eodem nomine, ut superius observatum est, sæpè comprehendi solent, eandem sectam tenebant, Jacobitæque solos Patriarchas agnoscebant, præsertim quando Muhamedanis rerum in Ægypto potentibus, caruit per annos multos Ecclesia Alexandrina Episcopis Orthodoxis, Jacobitæque omnem ad se auctoritatem traxerunt. Observandum est secundo loco, sub sex Patriarchis, nullum ordinatum fuisse Metropolitam Æthiopiarum, imò eo quo Daniel constitutus fuit tempore, nullos in ea regione Episcopos, aut Sacerdotes superfuisset, quâ procul dubio occasione, tot in eam Ecclesiam mala injecta sunt, contra disciplinam Ecclesiasticam, contra communes toti Christiano orbi Sacramentorum celebrandorum regulas, contra præcepta dominica, quorum frustrâ ratio quaeritur, cum vix aliter fieri posset apud barbaros, qui doctrina, pastoribusque & Sacramentis caruerant per annos multos. Georgium Regem Nubiæ nominatum alibi legimus, & ita appellabatur qui à Zacharia Rege ejus patre missus est ad Ibrahimum Almamonis fratrem ; & is est cui Josephus Patriarcha 52^{us}, concessit altare portatile ad celebrandam in

rentorio suo Liturgiam, missique sunt cum eo Episcopi, Sacerdotes & Diaconi. Ab eo in Nubiam reverso, magnam Ecclesiam ædificatam fuisse, quam Georgius Episcopus Batu consecravat sub Christodulo 66^o Patriarcha, scribit Abuselah Armenus: sed eum hallucinatum esse circa nomen evincit temporum ratio: nam ducentis & amplius annis vixisse Georgium illum oportuisset, ut idem esset qui sub Alnamone in Yracam venerit, & sub Hakemo ad Patriarcham Alexandrinum scripserit. Alium igitur esse oportuit, ex decessoris, cujus fama inter Nubas celebris erat, nomine appellatum: neque enim de illis Regibus, præter paucissima illa quæ superius relata sunt, aut inferius referuntur, quidquam certum occurrit etiam apud autores Ægyptios, multò minùs apud nostros.

Frustrà quoque apud autores quaeritur successio Regum Æthiopiae seu Habessiniae propriè dictæ, neque vir clarissimus Jobus Ludolfus quidpiam novi attulit, ex libris Æthiopicis, qui hac in parte Arabicis se juniores sunt. Illud solum constat ex Mariano Victorio, Damiano de Goetz, aliisque quos contentim appellat autoribus, interruptam fuisse circa finem decimi sæculi veterum Regum lineam, quam Salomonæam vocant, scelere femine quæ invasit imperium. Eam *Saada* vocant veteres apud Victorium, Genebrardum & alios catalogi, hoc est *ignem*: eodem sensu, sed voce diversa, *Essat* dictam scribit Ludolfus. Huic varia flagitia, veluti impudicitia, sacrilegia, & avaritia immanis impinguntur: præsertim verò Ecclesias ab ea spoliatas autores scribunt. Hanc post annos non paucos secuta est Regina alia *Treda Gabez*, quæ familiæ Salomonææ reliquias funditus tollere conata est, uno tamen qui in Provincia Scheva servatus est, superstite. Verùm cum fatentibus ipsis autoribus qui hæc referunt, & Ludolfo qui ultimus huic historiæ laborem impendit maximum, anni earum mutationum assignari vix possint; verisimilius est feminam illam de qua Historia Patriarchalis loquitur, priorem fuisse, cum ejus initia assignentur post regnum Delnoadi, qui, inquit Ludolfus, circa an. J. C. 960^{um} regnavit. Nam ita hæc calamitas sub Philotheo contigisse deprehendetur, quod de *Treda Gabez* dici non potest. Quaerendum igitur amplius est de illis Æthiopicis rebus, quod singulari dissertatione præstabitur.

Successio
Regum Æ-
thiopiz ob-
scurissima.

L. 2. c. 5.

De Philotheo nihil præterea nobis dicendum occurrit, nisi quod in Codice Regio quo utimur, aliquibus in locis vocatur Theophilus, quod an casu, an respectu ad nominis significationem fa-

cum fuerit, disquirere non interest, sanè nusquam in catalogis; aut apud autores quibus utimur, & Autorem Chronici qui alios non vidit, aliter appellatur quàm Philotheus.

De Ludolfi
conjecturis
circa Philo-
theum,

Quia porro mira de hoc scelestissimo Patriarcha nugantur Æthiopes, ea solum ratione quòd Metropolitani ipsis ordinaverat, paucis discutienda sunt ea quæ Ludolfus temerè prorsus & imperitè de illo commentus est, non quidem in historia sua Æthiopicâ vel suo ad eam Commentario, sed in schedis ad viros doctissimos transmissis, qui historiam Patriarcharum Alexandrinorum Collectionis Bollandianæ tomo ultimo inseruerunt. Lege-
rant in Elmacini versione Erpeniana pauca quædam de isto Patriarcha, quem Philoponum appellavit Erpenius contra Codicis Arabici aliorumque autorum fidem, simulque animadverterant dam-
nari à Jacobitis illius memoriam, velut limoniaci, avari, gulosi & impii. Ex alia parte præclarum illud Hagiologium Æthiopicum
cujus excerpta Ludolfus ad eos miserat, perditum nebulonem
Apostolis comparabat, quòd amoto impostore, alium Æthiopicibus præfecisset, sub quo Ecclesia respirasset. Sed Philotheus appella-
batur is cui salutem Ecclesiæ suæ tot laudibus rependebant, non
Philoponus: uterque tamen in ordine Patriarcharum sexagesi-
mus tertius esse debebat. Quid ad hæc Ludolfus? Jubet dubi-
tare an non sint distinguendi Philotheus & Philoponus, quorum
hic execrationem omnium meruerit à Califa fortè intrusus, id-
eoque indignus creditus sit, qui inter Patriarchas numeraretur à
Coptis Catalogi Kircheriani autoribus, Abulbaracato & Habes-
finis: iste ut sanctus fuerit posteritati commendatus. Mox refert
verba Hagiologii sui: *Salutem tibi Philothee Apostole Patriarcha
Alexandrine. Cum Æthiopicibus præfecissent* (ii scilicet, ut existi-
mat, qui Philoponum volebant Patriarcham haberi) *impostorem,*
*ita ut essent ludibrio vicinis, & præda hostibus: sub tuo regimi-
ne* (ô Philothee) *remoto illo, respiravit Æthiopia. Certè non
facile sibi quis persuaserit, in unam cadere hæc eademque perso-
nam.*

Nullus Phi-
loponus fuit,
reliqua com-
mentitia.

Nihil tamen certius quàm Philoponum & Philotheum unum
fuisse & eundem 63^{um} Coptitarum Patriarcham: cum Philo-
poni, si Latinam interpretationem Elmacini excipimus, ne no-
men quidem extet: fabulæ de duobus æqualibus inter se de di-
gnitate contendentibus ne vestigium quidem, non in ipso Hagio-
logio. Illius autem autoritas tam exigua est, ut quod illic tan-
tum

tum reperitur, vocari non temerè possit in dubium. Fuisse impostorem qui apud Æthiopes tanquam Alexandriâ missus Metropolitæ officia usurpaverit antequam Daniel ordinaretur, non habemus ex Historia Patriarchali sub Philotheo. Sed talem minimum egisse quempiam alium legimus sub Christodulo, qui post quadraginta & plures annos Patriarchatum obtinuit. Eo enim tempore impostor quidam pro Metropoli se gessit: eum Christodulus coercuit, & Mercurium Episcopum Wissim in Æthiopiam misit. Inde satis intelligitur quàm inaniter Ludolfus historiam Ecclesiæ Alexandrinæ alios docere aggressus sit ex simili farragine, cujus Autor in patria historia hospes ubique fermè fuisse deprehenditur. Philoponum quoque appellavit istum de quo agimus Patriarcham, vir clarissimus & ad miraculum peritus harum linguarum, nobisque amicissimus Bartholomæus Herbelotius, eo in loco ut in multis aliis interpretum quos emendare nullo negotio potuisset errores secutus. Gallicæ Elmacini versionis autorem minus moramur qui in eisdem scopulos impegit. Atque hæc paulò fusiùs fortassis, necessariò tamen dicenda erant, ut constet qualis esse debeat in rebus Ægyptiacæ Ecclesiæ, Ludolfi autoritas, cujus conjectura de Philopono suo non magis vera est cum propter scelera ejus excidisse memoriam suspicatur, & fortassis dignitate fuisse privatum. Occurrunt alii Philotheo non meliores, quorum tamen nemo ex Catalogis Patriarchalibus expunctus legitur, imò Theophanius impius ad horrorem usque & dæmoniacus, locum inter Patriarchas suum retinuit, laudesque ejus cecinit Æthiops Aretalogus. Nullus in tota historia depositus fuisse legitur, neque sine strepitu judicii, maximisque difficultatibus, id fieri potuisset, ut ex historia Cyrilli filii Laklaci discimus: quem Synodus deponere non potuit, vix tandem post longa certamina ad disciplinæ observationem compulit, ut explicabitur inferiùs. Itaque non est recurrendum ad novam divinationem quæ maximis gravissimisque controversiis obnoxia sit, nullumque habeat in historia præsidium, eo solùm sine ut conservetur lectio quam vitiiosissimam esse constat.

De Fatimidis qui hoc tempore regnaverunt, nempe Muazzo & Azizo, dictum satis est, quantum hujus compendii ratio patitur. Abbassidarum nulla erat in Ægypto & toto Fatimidarum Imperio autoritas, cum nec Bagdadi ullam nisi precariam haberent. Taijah billa depositus est anno 381^o Hegiræ ab Sultano

Fatimide.

Biaheddoula; eò quòd familiarem sibi quemdam Abulhuceintum in carcerem coniecisset. Depositionis modus planè ridiculus: nam Biaheddoula accedens, Calisam salutavit terram osculatus: mox signo facto ex accubitu per balteum detrahi jussit, & tapeti cui insidebat involutum ex aula efferri, & navicula in Palatium transferri. Deinde adhibitis testibus, probavit Calisam sponte dignitatem abdicasse. Mox proclamatus est Kadir billa 25^{us} Abbassidarum, cujus non major fuit quàm alterius autoritas. Is Kadirus supervixit usque ad annum 393^{um}, quod nulli contigerat. Calisam titulo tenus conservavit per annos 41, usque ad annum Hegiræ 422^{um}.

Res Antio-
chenæ.

Athanasium Jacobiticæ Ecclesiæ Antiochenæ eo tempore præfuisse argumento est Epistola responsoria ad eum Synodica Philothei, ex qua constat alteram scriptam fuisse ab Athanasio. Extat inter alias in Tractatu de Fide Patrum.

ZACHARIAS
Patr. LXIV.

ZACHARIAS PATRIARCHA LXIV.

Ejus electio
ab Alexan-
drinæ civibus.

MORTUO Philotheo quem ut aliquibus vitæ præcedentis locis, ita hoc loco Autor Theophilum vocat, vacavit Alexandria sedes aliquandiu. Convenerunt igitur Synodum habituri, quibus jus erat ad eligendum ei successorem: & cum inter se deliberarent, delata sunt ad eos mandata Principis qui tunc erat Hakemus Azizi filius, 3^{us} Fatimidarum, qui anno 386^o regnare cœpit, ut eligeretur Abrahamus filius Bacheri, mercator ditissimus, qui apud Aulicos plurimum poterat: & Patriarchatum ambiebat. Instabant amici ejus, præsertim apud cives Alexandrinos, ad quos, inquit Autor, hac vice electio pertinebat. Hujus autem consuetudinis aliqua in sequentibus historiis exempla occurrent: sed nullius ante istud memoria extat. Unde ita illud intelligendum videtur, ut cum ex antiqua disciplina non Episcoporum modò, sed Sacerdotalis ordinis suffragia requirerentur, verùm & consensus plebis seu Laicorum accederet, duo disciplinæ capita observata fuerint: primum, ut nullus eligeretur, qui non priùs plebi proponeretur, & ut ejus electio probaretur, per solitam illam acclamationem *ἐξ ἡμῶν*: secundum, ut quoniam sæpè turbæ inter Alexandrinos & Cahiranos Jacobitas orirentur, cum primi ut urbis antiquitate & sede Patriarchali, aliam superantis, ad se electionem pertinere contenderent, atque adeo con-

ventum Synodalem apud se haberi : alteri verò quia Califarum & Sultanorum sedes Cahiræ erat, ibi quoque eligi Patriarcham vellent, ubi confirmari electionem necesse erat, institutum fuerit, ut alternis vicibus Synodus Episcoporum modò Cahiræ, modò Alexandriæ celebraretur. Plura de hac consuetudine dicendi erit postea locus : eam verò & quæcumque ad electionem consecrationemque Patriarchæ spectant, fusè explicat Ebnassalus Collectione Principiorum fidei. Alexandrinis placebat eligi Abrahamum : atque in eam sententiam literas publicè scriptas Cahiram miserunt. Episcopi verò negantes sibi secundùm Canones talem electionem probari posse, ad Dioeceses suas reverti coeperunt. Accidit interea ut plerique diverterent apud Sacerdotem Ecclesiæ S. Michaelis Oeconomum nomine Zachariam, virum bonum sed obscurum, qui cùm cibos pararet ad illos suscipiendos, ampulla aceto plena quam ex superiori loco depromptam manu tenebat, cecidit nec confracta est. Istud veluti miraculum arbitrati, in ejus electionem consenserunt, & Alexandrinis in suam sententiam perductis, eam ordinaverunt. Eo ipso die advenit Abraham, cui cùm renuntiata esset Patriarchæ ordinatio, tantopere percussus est, ut tremore membrorum ad finem usque vitæ laboraverit. Quia tamen cum diplomate Califæ & ministerialibus ejus nomine missis venerat, ne repulsæ illius causâ, Ecclesiæ detrimentum caperet, consuluerunt Episcopi ut Abrahamum Patriarcha consolaretur, promisso Episcopatu quem primum vacare contingeret. Ille igitur ordinatus est Hegumenus, sive Abbas; quæ dignitas Sacerdotali superior in Ecclesia Coptica, Episcopaliq; proxima est : cùmque paulò post vacasset Ecclesia Menus superioris, illius Episcopus constitutus est Abraham.

Ordinatio Zachariæ secundùm Elmacinum facta est anno Hegiræ 393°, J. C. 1002°, qui ex vero calculo est Martyrum 718^{us} : Abulbircat tamen eam factam scribit anno 716°, mense Tybi, eodem anno & eodem mense, quo Philothei mortem assignat. Elmacinum, ut fermè semper Makrizius sequitur : quæ si vera sunt, vacatio sedis brevissima fuit, contra quam scribit Michael Episcopus Taneos Autor hujus historiæ.

Primis post ordinationem annis septem, Ecclesia in summa pace fuit : verùm magnæ postea calamitates consecutæ sunt, non in aliam ut Autor fateretur causam referendæ, quàm perditam Episcoporum avaritiam, qui nulla timoris Dei sacrorumque Cano-

Calamitates
in poenam
avaritiæ Epi-
scoporum.

num ratione habita omnes Sacerdotes pecuniâ ordinabant; dignos sacerdotio, si deesset, repellebant. Ita paucis annis evenit, ut plebs quæ pastores ignaros & vitiosos haberet, careret omni doctrina, adeo ut neque verbum Dei prædicaretur, neque morum cura haberetur. Narratur historia Episcopi, qui decem denariorum aurorum millia, pravis artibus aut exactionibus quassiverat, quique instante morte, nullam curam animæ suæ habens sollicitus tantum fuit, ut schedulam depositi thesauri indicem fratri suo Episcopo traderet, qui erat Macarius Episcopus Menus superioris; at is omnia in Ecclesiarum ædificia impendit. Minas Episcopus Tana, avarus ille de quo superius, cum in finibus Diocæseos Semnudæ Ecclesiam parvam ædificasset, & in ea Episcopus Semnudæ, tanquam ad sedem suam pertinente, altare consecrasset, venit Minas, & illud diruit, aliudque ædificavit & consecravit; hinc mutux inter populum utriusque Diocæsis contentiones, in quibus aliquot homines occisi sunt. Tanta erat in privatis Ecclesiis Sacerdotum pravitas, ut etiam ea quæ ad Liturgiæ ministerium spectabant, negligerent. Adversus quemdam testimoniis probatum fuit quod ipse vinum purum mensæ suæ reservaret, turbatum cum aqua mistum ad altare Sacerdotibus consecrandum præberet. Sacerdotes contra disciplinam oblatas, quæ per totam hebdomadam communicantibus sufficerent, conservabant, ne quotidiana Missarum celebratione fatigarentur; servabaturque Eucharistia in Ecclesiis diutius, ita ut computresceret. Hæc omnia tam Episcoporum quàm Sacerdotum peccata iram Dei adversus Christianos gravissimam excitaverunt.

Calamitatis
causa ex re-
rum sacra-
rum nundi-
natione.

Occasio turbatum fuit ambitio Sacerdotis nomine Joannis habitantis in Cella ad sanctum Macarium, contigua illius Ecclesiæ; regebatque ipse Ecclesiam Abunefer. Is cum multos videret ad Episcopalem dignitatem promotos per pecuniarum largitionem, & nihil haberet, Zachariam adiit, rogavitque ut Episcopi habitum tantummodo ei daret, eumque Diocæsi alicui vastatæ & desertæ ubi tria vel quatuor mapalia essent præficeret, se enim fatebatur ferre non posse tot indignorum hominum promotionem, quam datis nummis fieri videbat. Zacharias vir erat mitis, patiens, quietus, imbellis, quem discipuli impudentes & nefarii, nihil agere suo arbitratu sinebant, sed fœdam illam nundinationem eo inconsulto exercebant. Ab illis igitur Joannes repulsus, præsertim à Chaile Episcopo Saca, qui erat Zachariæ ex fratre

nepos : Cahiram venit libellum querelarum ad Sultanum delaturus. At Christiani qui in scriptorum publicorum Divani numero erant, veriti ne illæ ad Christianorum publicam calamitatem redundarent, scripserunt ad Patriarcham, ut Joanni satisfaceret, eumque cum literis ad eum remiserunt. Erat Zacharias in Monasteriis Vallis Habib, qui literas Chaili nepoti tradidit, Joannemque ipsi commendavit. Chail Arabibus qui conducti ad Monasteriorum tutelam sub ipsius manu erant imperavit, ut eum in siccam puteum conjicerent, & lapidibus obruerent. Joannes in quadam crypta quam in imo reperit, ita latuit, ut nihil damni passus sit. Zacharias magno dolore commotus, ut eum vivum reperit, consolatus eum est, vacanteque Episcopatum ipsi promisit. Duobus tamen paulò post vacantibus, neutrum dedit, prævalentibus discipulis, ne promissum impleveret. Joannes igitur ad Calisam irâ plenus profectus est, qui tunc erat Hakemus. Is puer admodum regnare sub tutoribus cœperat; statim verò atque legitimum ætatem attigit, maximæ eruperunt crudelitatis indicia, quam toto vitæ suæ tempore exercuit. Nam statim Emirum qui ejus institutioni præfuerat, occidi jussit, quòd eum in pueritia lacertam vocaverat, insultans ei, dicenque lacertam in draconem magnum evasisse. Numerati sunt homines decem & octo mille, qui ejus jussu interfecti sunt, multis manus truncatæ. Præcipuos militiæ duces, consiliarios, & purpuratos opibus spoliatos è medio sustulit.

Erat inter Officia Divani Christianus nobilis Abunegiah, quem accersitum jussit renuntiare religioni Christianæ, & Muhamedanam profiteri, pollicitus, se primi Viziri dignitatem, omniumque negotiorum administrationem ei collaturum. Ille deliberandi spatium usque ad diem crastinum postulavit: quo intervallo convocatis amicis, significavit, se dilationem postulasse, non quòd dubitaret quid sibi agendum esset, sed ut ipsis valediceret, testareturque se mori libenter pro Christi nomine, eosque ad constantiam, contemptumque hujus mundi adhortatus, convivio excepit. Postridie profectus ad Hakemum fidem liberè professus est, neque ejus minis aut pollicitationibus à constantia sua dimoveri potuit. Illum igitur tauris ad necem usque cædi jussit; cùmque octingentas plagas accepisset, mortuus est: reliquas mortuo usque ad mille Hakemus infligi jussit. Ita vitam finit Abunegiah, alio nomine Gabriel dictus, quem Jacobitæ inter suos Martyres numerant.

Christiani
Martyrium.

Hakemi cru-
delitas, super-
sticio.

Elm. p. 359.

Alium, Kahad filium Abrahami inter Divani scribas primarium, cum ad ejurandam fidem adducere non potuisset, capite truncari jussit, corpus igne absumi: manus ejus dextera illæsa per tri-
dium inter flammæ permansit, quod miraculum factum existi-
maverunt, quia erga pauperes maximè misericors, semper eam
ad stipem occurrentibus erogandam apertant habuerat. Octo alios
qui scribarum ministerio fungebantur, variis tormentis ad abne-
gandam fidem cogere aggressus est: quatuor in tormentis con-
stanter obierunt: alii dolore victi abnegaverunt: quorum unus
nocte sequenti subita morte extinctus est: tres reliqui finitâ per-
secutione ad fidem redierunt. Præter feritatem Hakemo innatam,
quæ in oculis, voce, incessu, gestuque apparebat, augebatur furor
ejus in Christianos, quia superstitione magicarum artium imbu-
tus, non modò astrologiæ intentus erat, sed peculiari cultu Satur-
ni stellam prosequabatur, illique nocturna sacrificia faciebat, in
quibus dæmonem ipsi apparuisse & cum eo collocutum fuisse fama
erat. Per montem qui est ad Orientem Cahiræ, noctu vagabatur,
abjecta veste regia, laneaque nigri coloris tectus, nigro asino ve-
ctus comitantibus foedarum illarum religionum ministris. Urbem
quoque ignotus circuibat; missisque undequaque exploratoribus
captare conabatur, quæcumque adversus eum maledicta jactaban-
tur. Erat inter ejus assecclas præcipuus impostor quidam, Hadi
appellatus, qui cum ex stulto insanum fecerat: congregatis enim
erronibus duodecim, passim prædicabat Hakemum esse Christum.
Eo comitatu Hakemus, lecticâ delatus, urbem noctu circuibat;
& si quam foeminam foris reperiret, aut etiam de die, præfecto
custodiæ suæ ad necem usque excruciamdam tradebat. Vinum
severissimè prohibuit, omniaque dolia confringi jussit: canes quo-
que tota Ægypto occidi, quod asinus quo vehabatur, à transcu-
nte cane consternatus fuerat. Omnes verò qui Cahiræ erant, ma-
gnis unius latratibus ad vicinum montem convocatos accurrisse fa-
ma fuit. Porcos quoque mactari ubique præcepit: cruces è fa-
stigiis Ecclesiarum dejici, eas quas impressas manibus aut brachiis
Christiani haberent deleri: ut omnes zonâ cingerentur, & fascias
capitum nigras haberent, jussit: campanas pulsari prohibuit, &
aliis quàm ligneis ephippiis equitare: cruces postea deferri voluit,
primò quidem spithamæ, postea brachii longitudine. Nec Judæis
pepercit, quos deferre jubebat globulos ligneos formam vitulini
capitis referentes, eò quod majores eorum vitulum in deserto

coluerant. Venuit tam Christianis quàm Judæis, ne communia cum Muhamedanis balnea frequentarent, propria illis destinavit : uvas passas & mel comburi, aut in mare jaci jussit. Plura alia ejus stultitiæ exempla refert Autor noster, quæ tamen Christianis tantopere gravis fuit, ut multi opprobria ferre nolentes, fidem abnegaverint : plures quoque Judæi Muhamedi nomen dederunt. Huic homini tunc cum maximè adversus Christianos fureret, Joannes ille Monachus, ab Episcopatu repulsus, libellum obtulit, in quo postquam illum tanquam Dei in terris vicarium, mundique dominum prædicasset, negabat tamen eum Regem esse qui amulum haberet Regem Christianorum, pecunias infinitas ex Episcopatum venditione colligentem, omnia tandem in Patriarcham crimina conjiciebat. Statim Hakemus Patriarcham acciri & in vincula dari jussit ; & tribus mensibus elapsis, eum leonibus objecit. At illi iterum atque semel nihil ipsi nocuerunt. Cum igitur Hakemus ovem mactari jussisset, & ad eos fame maceratos projici, Patriarcham sanguine ejus deturpatum iterum ipsis objici jussit : sed incolumis evasit. Hanc historiam apud Jacobitas Ægyptios celebrem adnotavit ad oram Canonis Chronologici Abulbircat ; eamque contigisse dicunt anno Martyrum 727, J. C. 1011.

Eodem tempore Hakemus præceptum expediri jussit ut Hierosolymis Ecclesia Calvariæ destrueretur. Scriptum fuit illud à quodam Ebn-Chaterin Christiano Nestoriano scriba Divani : qui tanta desperatione afflictus est, ut decumbens, dexteramque manum solo illidens, articulos digitorum confiegerit, & paucis diebus mortuus fuerit. Templi Calvariæ & aliarum Ecclesiarum everfionem factam anno Hegiræ 398, Hakemi 12, J. C. 1007, scribitur in Historia Ægypti. Mandatum præterea ut omnes Ecclesiæ destruerentur, bonaque earum fisco addicerentur ; aurum, argentum, suppellex, Misram deportarentur. Vetitum ne Christiani ex loco in alium migrare possent : non vendere, non emere quæ ad vitam necessaria ipsis licebat : Episcopi ubique comprehensi. Tunc magnum constantiæ specimen dedit Bekira Diaconus, scriba Divani qui ad Palatium veniens alta voce clamavit Jesum esse filium Dei. Eâ causâ, catenâ ferreâ magni ponderis ligatus, & ad palum constrictus, divinas laudes ex libro recitabat, unique amico quærenti, num quid ad suos mandaret, prædixit post triduum se apud illos venturum, finemque calamitatis futurum : quæ quidem Autor ait audivisse ab eodem viro cui

Nova persecutio, Ecclesiarum everfio.

Abulfarq. 222

dixerat Bekira, avunculo suo fratre matris suæ. Eo termino elapso liber dimissus est, munitusque sigillo Regio, ne quid ab Muhamedis negotii ipsi faceretur. Permissum quoque Christianis ut libera itinera habeant sive in Græcorum ditionem, sive in Æthiopiam, Nubiam, aliasque provincias.

Zachariæ
Patr. con-
stantia.

Ut ad Zachariam revertamur, quamdiu in carcere fuit, quotidie minas ei intentabant Muhamedani, vivum cum comburendum aut feris obijciendum nisi fidem abnegaret; pollicebanturque multa, atque inter alia supremi Judicis dignitatem, si Muslemanus fieret: sed firmus perseverans, tandem libertati restitutus est, cum Arabs quidam Madi filius Mokrab, ab Hakemo petiisset ut omnes qui in vinculis erant liberarentur. Ne verò si id temerè ab Hakemo concessum fuisset, ut quidam existimabant, & iterum in carcerem reduceretur, ex suorum consilio statim in desertum S. Macarii profectus, ibi per annos novem se continuit. Ea enim regio integra à persecutione permanerat, quamvis edictum Hakemi de Ecclesiis everendis illuc pervenisset, missis etiam qui illud executioni mandarent. Verùm cum illi timerent ab Arabum incursionibus, qui in illis locis magno numero longèque superiores convenerant, ab opere destiterunt. Ita servatæ sunt illæ Ecclesiæ, nec in illius regionis Christianos persecutio saviit. Adjiciunt Coptitæ ne miraculi alicujus occasionem elabi sinant, D. Georgium apparuisse militibus, ad destruendas Ecclesias missis, eosque ita terruisse, ut nihil adversus Ecclesias intentare ausi fuerint.

Caput D.
Marci inven-
tum.

Circa illa tempora Emirus quidam Turca, qua ratione non dicitur, invenit caput D. Marci Evangelistæ: cumque illi dictum fuisset Christianos quæcumque postularet, ad illud redimendum daturus esse, illud Misram detulit. Bekira Rechidæus scriba, de quo superius dictum est, trecentis aureis persolutis, illud accepit & ad Patriarcham detulit, qui tunc erat in Monasterio S. Macarii, cum multis Episcopis, & aliis Christianis. Nam ad desertum illud conveniebant Christiani magno numero, festo Epiphaniæ, & festo Paschatis, ad suscipiendam Eucharistiam.

Quæ de capite D. Marci invento & Misram delato Autor refert, communem continent Ægyptiorum Christianorum traditionem. Apud Autores Græcos & Latinos nihil certi de Translatione reliquiarum S. Marci occurrit, & vulgaris Venetorum traditio à multis vocatur in controversiam, ut à viro clarissimo
nupcr

inuper in Historiæ Ecclesiasticæ accuratissimis Commentariis explicatum est : ea tamen aliquos Orientales historicos , ut suprâ scriptum est , Autores habet.

Per annos novem Christiani summa in calamitate fuerunt , quæ etiam triennio ultimo major omnino fuit , cùm in tota Ægypto præterquam in remotis illis Monasteriis Liturgiam celebrare non liceret , atque ita fructu qui ex sacrorum mysteriorum communione percipitur , magno suo dolore carebant. Neque alia ratione potuerunt hanc persecutionem effugere , quàm corruptis pecuniâ Præfectis , qui ita agrè secretam licentiam dabant conveniendi noctu in Ecclesiarum dirutarum parietinis. Ibi Liturgiam celebrabant , & Vigilias sacras noctibus festis agebant , communionemque percipiebant. Vasa sacra & vestimenta sacerdotalia , quæ cum sacris libris Christiani in domibus privatis magno periculo suo occultabant , illuc deferrebantur. Eo triennio transacto , cœperunt Oratoria privata in domibus parare , quæ ipsis Ecclesiarum loco essent , atque eadem ritu Ecclesiastico ad tale ministerium dedicabantur. Cùm id Muhamedani rescivissent , querelasque ad Hakemum detulissent , ille ut erat levissimus , jamque institutæ illum persecutionis tædere cœperat , delationem in super habuit. Qua occasione cùm Christiani multi qui fidem abnegaverant , ad eum venissent , supplicantes ut ad religionem pristinam suam sibi reverti liceret ; à singulis quæsitum , ubi essent zona , crux & panniculus quem deferre cogebantur Christiani : quæ cùm sub vestibus occultata protulissent , jussit omnes ea resumere , singulisque literas dari ut ab omni Musulmanorum molestia tuti essent : atque ita multi ad Christianam fidem reversi sunt. Erat inter eos Monachus quidam Yemin , qui ab Hakemo petiit , ut habitare sibi liceret in Monasterio S. Mercurii extra Cahiram ; atque illic secessit cum fratribus suis Monachis. Ad eos in hunc locum frequenter Hakemus veniebat , eorumque vili cibo vescabatur. Tanta demum fuit illius apud Principem gratia , ut multi negotia ad eum deferrent , quæ expediri statim obtinebat. Tandem mentionem apud eum fecit Zachariæ Patriarchæ , obtinuitque ut tutè redire ipsi liceret. Mox eum accersitum ex Monasterio S. Macarii in cella sua occultavit , & ad Hakemum pro more venientem , eum deduxit. Quærenti quis esset , respondit Yemin , illum esse Patriarcham : qui accedens principem salutavit , cique benedixit , & fausta omnia precatus est : tum de

Christianorum
calamitas.

Oratoria
privata consecrata.

Episcopis qui erant in ejus comitatu quæsitiv Hakemus quinam essent. Respondit Yemin, esse illius vicarios: miratus autem est quòd ipsi tantum honorem deferrent, qui vili habitu, brevis staturæ, nulla specie aut dignitate oris commendabatur, cùm Episcopos videret qui ætate, statura, canitie longè venerabiliores apparebant.

Autoritas
Patr. Alexandrini.

Interrogavit etiam quo usque pateret ejus autoritas. Respondit Monachus, per totam Ægyptum, Æthiopiam, Nubiam, Africam, Pentapolin & alias provincias, omnes illius mandatis Christianos obtemperare; solo signo Crucis inter literas impresso, neque opus habere aut copiis, aut pecuniis expensis, ut eos in officio contineret. Obstupescens majorem in modum; dixit nullam Christianæ comparatione religionem sibi firmam videri: nos enim, inquit, sanguinem continuò effundimus, magnas pecunias expendimus, exercitus educimus, nec ad obsequium homines adducere possumus. Christiani verò huic seniculo contentibili tantum tribuunt, ut nemo illius mandatis contradicat. Postea jussit Episcopos in eodem S. Mercurii Monasterio expectare donec reverteretur, causamque illorum ipse per se cognosceret. Interea Joannes, sive Junes, perditus ille Monachus, qui prima mali causa fuerat, eò venit, quasi de restituta libertate gratulaturus, simulque instantissimè petens, ut se Episcopum ordinaret; quod promissit Patriarcha. Verùm ea occasione Chail Episcopus Saca, nepos ejus, tanto adversus Joannem furore exarsit, ut post verborum contumelias, alter ex muro auxilium imploraret, tanquam sibi violentia fieret; qui tumultus ab Episcopis difficulter sedatus est. Chaili etiam exprobraverunt, quòd cùm ipse totius calamitatis causa extitisset, novam accerferet, quæ priori peior futura esset. Ita pacatus est Joannes, nec destiterunt donec coegerunt Patriarcham, ut eum Hegumenum ordinaret, vesteque hujus ordinis propria indueret.

Ecclesiarum
instauratio.

Cùm paulò post Hakemus ad cellam Yemini venisset, attulit sigillum seu literas Imperiales, quibus non modò dirutas Ecclesias instaurare permittebatur, sed etiam restitui jubebantur ligna, lapides, columnæ, & omnia tandem quæ ablata inde fuerant: agri quoque & horti Ecclesiis adjuncti restituebantur, per totam Ægyptum, & reliquas Provincias sub Hakemi imperio constitutas. Dirutæ fuerant Ecclesiæ anno Martyrum 727^o; restitutæ sunt anno 737^o. Eodem quoque edicto immunes Christianos.

Hakemus fecit à gestatione crucis, & vestitu furvi coloris, notisque aliis quibus non ipse solum, sed Principes alii, Christianos insignes esse voluerant, ut à Muhamedanis distinguerentur. Huc usque Autor noster, nullâ differentiâ ab aliis qui de Hakemi regno scripserunt: sævissima enim illa & supra omnes quas sub Muhamedanis huc usque Christiani experti fuerant, persecutio fuit: quamvis pauci admodum ultimo supplicio affecti fuerint.

Primam verò causam illius Makrizius affirmat fuisse Christianorum, qui in ministerio aulico erant plurimi, officiaque actuatorum & scribarum Divani obtinebant, avaritiam & insolentiam. Quidam enim non solum opes maximas fraudibus & rapinis comparaverant, ideoque nihil sibi non licere rati, in Muhamedanos multa commiserant, verum & apud Hakemum non minore fastu & arrogantia quàm Viziri, solebant negotia administrare, omnemque autoritatem ad se trahere. Hac ambitio primum paucis qui primas dignitates obtinebant, exitiosa fuit: nam Hakemus stolidè ferox, Isam filium Nestorii, securi percuti & bona ejus publicari jussit: eum autem Nestorianum fuisse ex nomine patris intelligi potest; neque enim alii quàm ex ea secta nomen reliquis Christianis odiosissimum usurpasse reperiuntur. Ea quoque fortassis ratio est cur Jacobita noster historicus, hujus hominis non meminerit, quamvis tanta ejus foret autoritas, ut ad Viziri munus nihil ipsi præter titulum deesset. Kahadum quoque Abrahami filium, Divani scribam, pari supplicio affecit. Tum erga omnes sævire cœpit, & leges illas de quibus suprâ dictum est, promulgavit, de furvis vestibus, de crucibus ferendis pondo librarum quinque: ne equitarent, sed asinis tantum veherentur: & reliqua de quibus superius dictum est. Sed illud præ cæteris gravissimum Christianis accidit, quod cœtus publicos ad Liturgiam & Supplicationes quæ fiebant in Dominica Palmarum, in Epiphania & aliis solennitatibus, edicto suo Hakemus prohibuerit; tum quod omnes Ecclesias non solum in Ægypto, sed etiam in Syria everti jussit. Testatur Makrizius numerum earum quæ ab anno Hegiræ 403^o ad an. 405^{um}, hoc est ab anno J. C. 1012^o, ad 1014^{um}, destructæ sunt, fuisse triginta millium & ampliùs. Omnia autem vasa sacra, cruces, thuribula, stragulas & alias vestes ad suppellectilem Ecclesiarum pertinentes, ligna, æs, ferrum, reditus, possessiones aut fisco addixit, aut Muslemans diripienda reliquit. Annus J. C. 1012^{us} est Martyrum 728^{us}; exiguaque hunc in modum dis-

Causæ per-
secutionis.

Cedr. l. 2.
p. 636.

De pœni-
tentia Apo-
statarum.

crepantia est inter Autorem nostrum & Makrizium. Ejus quoque calamitatis meminerunt Historici nostri. Testatur enim Glaber ad annum J. C. 1009^{um} Judæos per totum Romanum orbem pulsos & caesos, eò quod templum Hierosolymitanum eorum consilio à Muhamedanis eversum fuisset. Cedrenus sub Azizo id accidisse narrat, sed perperam. Nec mirum est de aliis Ecclesiis nihil reperiri apud Autores Græcos & Latinos, cum de rebus Ægyptiacis & quæ ad Orientalium sub Musulmanis Christianorum historiam pertinebant, nihil ferme scriptum reliquerint. Hoc verò loco observandum est, non temerè à Muhamedanis relatum esse tot malorum causam in Christianorum avaritiam & ambitionem, cum plura Christianus & Episcopus Michael de illis scribat, magisque Episcoporum scelera exagitet, quàm Muhamedanus Makrizius. An verò Patriarcham simoniacum qui omnia nefario nepoti permittebat, Ecclesiasque pecuniâ licitari sinebat; qui calumniosum Monachum, & quavis pœna dignum Hegumenum constituebat, & futurum Episcopum designabat, cum esse in quo Deus miracula ostenderet, lectorum esto judicium.

Aliud quoque in hujus persecutionis serie, maxime observandum est circa facilitatem recipiendi ad pœnitentiam eos qui fidem abnegaverant, de quibus Autor non aliter loquitur, quàm si nulla fuisset, præter iteratam Christianæ fidei professionem & Muhamedisimi abnegationem. An verò ita intelligenda illa sit, adeo ut per præscriptos pœnitentiæ gradus ad Ecclesiam rediverint, an verò venia absque multo labore concessa, conicere non possumus. Sanè vigeant adhuc Canones antiqui adversùs eos qui fidem abnegaverant, & easdem Canonicas pœnas illi subire cogebantur, ac qui olim sacrificiis Ethnicorum se contaminassent. An verò hæc disciplina, quæ omnium Ecclesiarum Orientalium fuit, in Ægyptiaca obsolevisset, neque affirmari neque negari posse videtur. Nam in tanta Apostatarum multitudine, sub Episcopis ad omne seculus projectis, quique prophanas Sacramentorum nundinationes liberè exercerent, difficile videtur ut pœnitentiæ disciplina vigeret. Nec alia fortassis causa fuit quare postmodum apud Ægyptios funditus aliquando subversa fuerit, quàm nimia illa Sacerdotum indulgentia. Quod si Canonibus qui in Collectionibus eorum occurrunt credendum est, non videntur recepti tot Apostatæ, absque aliquot annorum jejuniis, orationibus & eleemosynis, ut recipi debeant: quod inter alios tradidit Dionysius Barsalibi Episcopus Ami-

denus Jacobita in Tractatu de recipiendis pœnitentibus, eis temporibus proximus, & alii complures.

Ut ad historiæ nostræ solum redeamus, statim post Edictum de restituendis Ecclesiis, redditamque Christianis libertatem, eo ipso anno scribit Autor Hakemum Calisam è medio sublatum. Is est Hegiræ 411^m, J. C. 1020^m, Martyrum 736^{us}. De ejus morte Elmacinus & Abulfaragius, qui soli editi sunt, scribunt breviter, quæ ab aliis fusiùs tractata sunt. Communis opinio fuit occisum eum fuisse, dum in monte Moktamo, more suo noctu vagaretur, immissis sicariis à sorore Setelmelouka, cui post multa convicia malum comminatus fuerat, duce quodam Emiro Ebn el-Douas Scifeddoula, quem mulier ad cædem committendam instigavit. Inventus est alinus, quo Hakemus vehebatur, succisis suffraginibus, vestes ejus septem ictibus perforatæ, comites duo occisi, corpus nusquam inventum est. Mulier vaferrima, Ebn el-Douas, statim accusatum de cæde perpetrata & confcios occidi jussit. Ita fermè Historia Ægypti ex Ebn el-Sabi & aliis autoribus. Kodai iisdem verbis quæ apud Elmacinum & Abulfaragium, qui omnia ex eo sumsisse videtur, rem explicat, eumque occisum fuisse testatur. Ita periit Hakemus, in quo stultitia cum crudelitate & impietate certavit : nam apud suos irreligiosus habebatur, & Muhamedanæ religionis contemtor ; Christianosque persecutus innatâ sævitia potius videbatur, quàm zelo fidei suæ : nam usque ad annum Hegiræ 400^{um}, J. C. 1009^{um}, satis favit suæ religionis hominibus, modò tamen adversus dignitatem suam, quam ex cognatione cum Halis familia Fatimidæ ambiebant, nihil molirentur, aut pro Abbassidis non declamarent, quod multi fecere, etiam certo vitæ periculo. Eo autem anno Medinâ jussit asportari in Ægyptum omnem domus Jafari justî supellectilem ; erat autem is Abubekri ex filia nepos, unusque Imamorum seu Pontificum duodecim quos agnoscit secta Persica : vocabatur etiam Abu Ismael, & ab Ismaele isto multi qui adversus Onmiadas, aut Abbassidas, defectionem nudaverunt, genus ducere dicebantur : inter quos præcipui erant Fatimidæ Ægypti. Ea ratio fuit cur Hakemus omnem viri inter Muhamedanos præstantissimi, præsertim quòd omnes fermè traditiones ad eum referrentur, supellectilem quasi sacras reliquias in Ægyptum transferri voluit, atque in ea repertus est Alcorani codex antiquus, yela, tapetes, & alia quæ ut in publica veneratione essent,

Hakemi
mors.

Elm. p. 458.
Abulf. p. 220.

Hakemi mor-
tes, gesta.

Scholam ædificavit, in qua libros veteres cum multis aliis deposuit; Cheicos quosdam sive Doctores constituit traditionum peritos, quibus amplissima stipendia assignavit. Lampades aureas & argenteas & unam ex argento latissimam, in qua clychnia erant mille ducenta, tapetes & alia ornamenta Meschitæ majori quam Amrou filius El-As ædificaverat, donavit, atque in ea oravit: necnon ad sectam Malekiorum propendere se simulavit. Post annos aliquot, hæc omnia quæ in gratiam religionis Muhamedanæ fecerat, irrita esse voluit: scholam clausit: Doctores duos quos illi præposuerat, occidit cum multis aliis, qui aliqua doctrinæ vel purioris vitæ laude commendabantur. Hæc pauca ex variis historicis contraximus, inter quos præcipuus Ebn-Kalican, Haliwerdi Autor Historiæ Ægyptiacæ, Makrizius & alii. Unde intelligi potest quàm dura fuerit Christianorum conditio sub principe furioso, fatuo, impio, superstitioso, qualis ille fuit. Neque tamen per annos viginti quatuor quibus Ægyptum vicinasque multas provincias obtinuit, ullos ferè hostes expertus est præter Abu Recia Ommiadam, Hakemi Hispaniæ Regis ex fratre nepotem, qui paulò ante annum Hegiræ 397^{um}, J. C. 1006^{um}, quo à Fadelo Duce Hakemi victus & captus est, Africam Occidentalem, & vicinas provincias vastaverat. Neque Muhamedani traditionis suæ adeo tenaces, si illis credimus, unquam in majori neglectu rerum quæ ad suam religionem spectabant, fuerunt: nam cum fidem faciant in publicis orationibus, sequi se doctrinam Muhamedis, obedientiamque præstare legitimis ejus successoribus: qui eos non agnoscerent, tanquam hæreticos & impios maledictis & anathematismis onerare; ea tunc erat rerum apud illos sacrarum facies.

Status religionis Muhamedanæ illo sæculo.

Kalifa Kaderus qui hanc dignitatem tenuit usque ad annum 422^{um}, Bagdado conclusus, literas investituræ concedebat invasoribus Provinciarum: & anathemata vibrabat in Karmatianos, Fatimidas, alios tandem omnes qui ejus autoritatem rejiciebant. Ex Iraca tamen & Perside aliisque regionibus quæ erant sub Bowiadarum, Hamadanidarum, aut aliorum potestate, proficisciebantur catervatim agmina peregrinorum ad Meccanum sanum, quamvis ibi ex suggestu preces publicæ fierent nomine Califæ Ægyptii Fatimidæ, quem hæreticum judicabant. Andaluseni seu Hispani Arabes, qui utrumque tam Fatinidam quàm Abbassidam execrabantur, cum in familia Ommiæ Califatum esse affir-

• PATRIARCHARUM ALEXANDRINORUM. 399

ZACHARIAS
Patr. LXIV.

marent, utrumque diris devovebant. Commeabant tamen ex omnibus illis regionibus Muslemani, docti præsertim, quorum cura præcipua erat, ut longas peregrinationes instituerent, ad Doctores celeberrimos visendos, ut ab illis aliquam traditionem, vel futilem de Impostore suo Muhamede narratiunculam audirent, quam postea auditoribus suis referrent, aut in fastidiosa volumina mitterent. Nec tamen obstabat schisma illud Califarum trium, quorum uni non legitimo adhæsisse scelus erat, quin cum omnibus etiam illis quos hæreticos judicabant, communicarent. Sanctuarium illud Meccanum cædibus incendiisque deformatum & foedatum ab Ismaelitis Karmatianis, omni latrociniorum genere infestabatur, adeo ut per annos multos aut intermissa prorsus peregrinatio fuerit, aut peregrini grandi pecunia se redimere coacti fuerint, aut captivi abducebantur; multi spoliari & occisi, & cum comitatus ob Arabum latrocinia deficeret, quo tempore Hakemus regnabat, tot & tanti fame & siti enecti perierant; ut omiſſa peregrinatio per aliquot annos fuerit. Adde principes sceletibus omnibus coopertos, bellis civilibus omnia turbantes, avaritiâ incredibili; quos tamen, modo eleemosynas distribuerent, aut Mefchitas ædificarent, laudibus sui in cælum ferunt; & habebitur sincera delineatio nefariæ illius & propudiosæ religionis, quæ tamen vastissimo incendio totum Orientem & Occidentis magnam partem depopulata est. Jam ad res Ecclesiasticas revertendum est.

Exincto Hakemo, Christiani in pace fuerunt, sub Tahero ejus filio & successore; cujus imperii initio, summa rerum penes Setmeloukam sororem Hakemi fuit, foeminam magni animi, nec minoris prudentiæ, quæ largitione pecuniarum, vestiumque, & dignitatum, milites, duces, purpuratosque omnes ita devinxit, ut omnia negotia tranquille administraverit. Edicto Hakemi de restituendis Ecclesiis, nullatenus derogatum, ita ut per totam Ægyptum usque ad Haidab, qui est portus in Mari Rubro; imò & Giuddæ qui proximus in Arabia Meccæ portus est, atque adeo terra Muhamedanis sancta, quam huc usque Christianis calcare capitale foret, passim ædificatæ fuerint. Atque ea libertas Christianis integra fuit ab eo tempore, usque ad annum Martyrum 767^{um}, quo Autor hanc historiam se scripsisse dicit, qui fuit J. C. 1051^{us}, Hegiræ 443^{us}.

Res Christianæ post
Hakemi mortem.

Narrat Autor paulò post mortem Hakemi, multos existimasse

ZACHARIAS
Betr. LXIV.
Opinio de
Hakemo su-
perstitione.

400

HISTORIA

quodd adhuc in vivis esset, & superstitione sua obligatus ad tempus lateret. Erant qui illum in monte disparuisse dicebant, postea se illum vidisse : atque ea occasione impostores multi qui eum ore aliquatenus referebant, ornatu quo prodire solebat paucis se ostendebant, eumque se esse mentiebantur. Inter illos præcipuus fuit Cherour quidam, Christianus, Apostata, Hakemo simillimus, nisi quodd paulò procerior foret, sed ore & sono vocis eum planè referens. Is cùm ipsi gratissimus fuisset, & cum eo magicis artibus operam dedisset, plures decepit, & ab illis pecunias accepit. Vocabat se Abul Arab, quasi *Arabum patrem* : exiguo comitatu prodibat ; & si qui eum pro Hakemo agnitum salutarent dominumque appellarent, leniter correptos verberabat, dicens nondum esse tempus manifestandi sui, monebatque, ut capiti suo confulerent. Tandem divertit apud Nomadem quemdam, sive Beduinum, Arabem ex familia Kora, nomine Musfreg filium Temam, cui vestes pretiosas & arma splendida dedit, cùm ipse interim vili habitu à communi Religiosorum nihil differente regeretur. Rogatus cur ipse cultu, qui dignitati suæ conveniebat, non uteretur, respondit momentum illud periculosum quod cavebat, nondum præterisse : atque tanto artificio mimum illum egit, ut cùm Arabs Beduinus tentorium ei parasset, inter Arabes per biennium vixerit, multis ad eum concurrentibus, & obsequium quale Califis solet deferri, præstantibus. Omnibus tamen silentium & secretum imperabat : cùmque fama illius Cahiram pervenisset, non mediocrem turbationem attulit. Coactus tamen est impostor latere, & ex tentoriis Beduini se subduxit, neque de eo quidquam auditum est usque ad tempora Sanutii Patriarchæ, qui Zachariæ successit. Tunc enim è latebris emerfit & ad eum scripsit literas, quibus deceptus Sanutius, pecunias imperatas ad eum misit. Neque mirum esse debet homines credulos & supersticiosos, qui *Mehedem*, hoc est Messiam quemdam, expectabant, ut illum adhuc Persæ expectant, talibus fabulis deceptos fuisse ; circa Principem qui ex ea familia esse dicebatur, & à plerisque credebatur, ex qua prodire debebat Messias ille, seu Mchedi, cujus titulum Autor familiæ Obeid-alla sumferat. Fuerat etiam insignis Hakemi dementia, quodd se Christum dici & credi veller, atque adeo Hadis qui ipsius quodammodo interpres & Apostolus videbatur, interroganti quot haberet iu indiculo suo qui cum pro Christo agnoscerent, respondit sedecim millia. Ita fieri facile potuit, ut quem ipsius crudelitas,

PATRIARCHARUM ALEXANDRINORUM. 401

crudelitas, nam plusquam decem & octo hominum millia occidisse dicitur, terribilem fecerat: is etiam si mortuus diceretur; vivus tamen à nonnullis, & ut olim de Nerone ferebatur, magno inimicorum suorum malo reversurus putaretur.

Obiit Zacharias postquam 28. annos Jacobitis Alexandrinis præfuisset, anno 748° Martyrum, qui cùm sit J. C. 1032^{us}, respondet anno Hegiræ 424°: eundem Martyrum annum assignat Elmacinus. Ex illo autem annorum spatio, septem feliciter transacti sunt ante persecutionem, quæ novennio sævit: cæque sedatâ duodecim annis supervixit. Sepultus est Kahiræ in Ecclesia *Bani Elwaïl*, aliàs *Kemisset el Derage* live *ad Gradus* dictâ. Postmodum verò corpus ejus translatum fuit ad Monasterium S. Georgii, vulgò *Dir el Habesch*, seu *Monasterium Abyssinorum*. Ita autem vocabatur à quodam territorio prope Misram, quod *Habesch* seu Abyssinorum terra dicebatur, ubi olim Monasterium cum Ecclesia Nestorianorum fuisse docet Abuselâh Armenus, quod suo tempore Jacobitæ occupabant. Ibi erat eorum cœmeterium, atque eò translatum est corpus Zachariæ, cùm jussisset ut inter Cahiræ seu Misræ cives Christianos sepeliretur, quorum fidem & constantiam in persecutione summopere admiratus fuerat. Ibi quoque erant sepulcra Episcoporum Misræ. Ita Abuselâh & alii rerum Ægyptiacarum scriptores Christiani & Muhamedani, hunc locum describunt; qui quidem ita appellatus est, quia erat in amplissimo illo solo, quod Ahmed Toloni filius muris cinxerat & *Ketayat* appellaverat, quasi *separatum spatium*. Ibi inter ædificia multa Prætorianis suis cohortibus destinata, secundum nationum diversitatem, unum erat stationi Abyssinorum destinatum, atque ingens ad eorum usum piscina inde vocata, *Berkat Elhabesch*, seu *Abyssinorum piscina*. Dirutis verò ædificiis nomina locis manserunt, atque illud soli quod Æthiopes occupabant spatium, vicinæque terra, *Habesch* seu Æthiopum dicta est. Illud quoque observatu necessarium fuit; eò quòd multis apud Elmacinum locis, Erpenius interpres, vir sanè in his linguis pro tempore quo scribebat doctissimus, *Æthiopiam* venit: quæ versio lectoribus fraudi esset, adeo ut existimarent quosdam Alexandrinos Patriarchas in Æthiopia fuisse sepultos, frecti falsis aliquorum qui de Æthiopia scripserant narrationibus.

Reliqua de hoc Patriarcha quæ apud Elmacinum occurrunt, aut ex aliis autoribus explicata sunt, aut satis ex illis quæ diximus

ZACHARIAS
Patri. LXIV.
Elmac. p. 259.
260.

Zachariæ
obitus.

Ecc

intelligentur. In Hakemi autem stulticia describenda cum satis ver-
bosus fuerit, nonnulla habet quæ ab aliis autoribus prætermittun-
tur, etsi fusissimè de eo scripserint. Quòd Misræ ignem iniecit
alibi non legimus. De Darazio Pseudopropheta qui Dararius ma-
lè vocatur in Elmacini textu Arabico & ejus versione, Autore se-
ctæ quæ Hakemo divinitatem attribuit, & quæ Druziorum dicta
est, omniaque Muhamedanorum officia contempsit, plura dicere
superfedemus, cum hujus loci non sint. Sufficit ex prædictis intel-
lexisse, maximam furiosis illis enthusiastis, sub Principe stultissimo,
cuique nulla religio esset, fuisse omnia audendi licentiam.

Tandem Autor adjungit quædam de statu Jacobitarum Eccle-
siæ Antiochenæ, quæ tunc magnopere turbata fuit, Patriarcha
Joanne filio Abdoun in exilium pulso. Vetus consuetudo erat jam
ab antiquis ducta temporibus, sub Severo Patriarcha, ut nulli
eorum facultas esset Antiochiæ manendi, Joannes in Monasterio
prope Malariam sedem constituerat. Erat in monte vicino *Afoud*,
hoc est nigro, Monachus sanctitatis opinione celebris : quem
Athanasius Patriarcha paulò ante mortem successorem sibi fore
prædixerat. Cum ab Antiochenis quæreretur, alterum eodem
nomine Monachum, qui in vicino loco cellam habebat, monuit
Joannes Abdoun filius, futurum esse ut crastino die alteruter il-
lorum raperetur, in Patriarcham consecrandus : optimum factu
videri sibi, ut ex eo loco migrarent, neque enim se tanto oneri
parem esse. Cum alter ambitione inflatus manere statuisset, alter
fugâ se proripuit. Interea venerunt qui Joannem filium Abdoun
perquirebant ; eoque non invento, alterum in cella sua repertum,
nec curantem abduxerunt : sed cum in via ad arborem quam-
dam refrigerationis causâ divettissent, nequam ille Monachus impa-
cto in ejus oculum ramo, luscus factus est, statimque vindictam divi-
nam sentiens, omnem rei seriem missis à Clero Antiocheno narravit.
Ita magis accensi, tandem post multos labores & circuitus Joan-
nem filium Abdoun reppererunt, reluctantemque abduxerunt, &
Patriarcham ordinaverunt. Ille in dignitate constitutus, nihil de
priori vitæ instituto mutavit ; quidquid ad eum ex oblationibus
aut fructibus perveniebat, pauperibus largiebatur, sibi tantum re-
servans quæ ad vitam sustentandam erant necessaria. Attulit se-
mel ad eum mulier quædam sacculum aureis plenum, precata
ut eos acceptaret & in suos vel pauperum usus expenderet. Ille
paucis respondit : *Deus hoc à te suscipiat, filia* : neque plura lo-

cutus est, contra aliorum morem, qui colligendis pecuniis intenti, si vel teruncius afferretur, multis & magnificis verbis offerentes laudabant. Mulier à Joanne cum similes laudes frustra expectasset, discessit indignabunda : quod cum discipulus observasset, revocavit eam Joannes, jussitque afferri trutinam ; & in una lance aurum, in altera chartulam paucis verbis quæ dixerat inscriptam poni : quæ chartula præponderans, aurum in sublime sustulit. Aiunt quoque ejusdem mulieris filium, cum è ponte quem Joannes collatitiâ Christianorum pecuniâ & operâ reficiendum curaverat, in flumen cecidisset, mergusque fuisset, ejusdem precibus ad vitam revocatum.

Habitabat Malatiæ Joannes, & illic atque in vicinis locis erant Ecclesiæ quinquaginta sex : Christianorum qui arma ferre possent sexaginta millia, præter parvulos & foeminas. Ad eum Michael Episcopus Tanis, missum se cum aliis fuisse dicit à Patriarcha Christodulo, cujus synodicam Epistolam ei obrulerunt, & ille eos à nepote suo in urbem Malatiam deduci jussit, ubi viderunt maximam illam Syriarum Jacobitarum multitudinem, qui festis solennibus, quando in urbem veniebat, occurrebant ei cum Evangeliiis & thuribus : gaudebantque si ex ejus manu communionem acciperent.

Jacobitarum
Antiochenorum
Ecclesiæ.

Sequitur mox narratio satis prolixa, quam Auctores historiæ Alexandrinæ ad Zachariæ Patriarchæ tempora referunt, & quæ tantam habet cum ea quæ in Mennæ vita relata est similitudinem, ut num eadem sit affirmare certò non possimus. Nam quàm facile sit ut quæ sub Menna gesta fuerant, historicus ad Zachariam transtulerit, norunt quibus perspecta est Orientalium indiligentia. Rerum Antiochenarum quæ ad Jacobiticam Ecclesiam pertinent, memoria nulla superest, si pauca admodum excipimus, quæ nobis ab historicis Alexandrinis conservata sunt, in Græcis nihil occurrit unde Orientales emendare vel illustrare possimus. Joannis nomen diversis Patriarchis commune, obscuritatem augeat : præsertim cum in vita Mennæ, de factò illo egregio quod in ista tantopere laudatur, nihil reperiatur. Verumtamen Epistola ad eum scripta quam integram retulimus, tam certas veritatis notas habet, ut de ea dubitare non liceat : cum annorum charactere signata sit qui alteri convenire non potest. Itaque rem in medio relinquentes, ea referemus quæ sub Zacharia contigisse testatur historicus quem sequimur ; quique pluribus narrat, quæ paucioribus verbis exponemus.

Ecc ij

Patriarcha
Antiochenus
Jacobita Con-
stantinopolin
ductus.

Habebant in eadem urbe Malatiâ , Melchitæ Metropolitanum suum , quem invidia virtutum Joannis , fama publica fuscitati mortui , & alia multa adversus eum incendeabant. Itaque per unum ex suæ sententiæ Episcopis , ad Imperatorem Græcorum misit , monens esse in Imperio suo hominem qui se Patriarcham appellaret , cui omnes in ea regione magis obedirent quàm sibi , qui falsis miraculis nomen sibi quæreret , rogans tandem ut illum ex ditione sua pellendum curaret. Itaque Joannes Malatiâ Constantinopolin accersitus est , qua occasione tumultus non mediocris in urbe fuit , obstitentibus Jacobitis ne Patriarcha suus extra Dioeceseos fines abduceretur , veritis ne à Græcorum Imperatore , qui diversam fidem , utpote Melchita , profitebatur , periculum immineret. Joannes eos pacare conatus est , dicens secundum doctrinam Apostoli , eum qui principibus resistit , Dei ordinationi resistere ; paratum se pro communi fide mortem subire : atque alia ejusmodi ad eos locutus , cum missis Imperatoriis profectus est , ducens secum Episcopos quatuor , & tres Monachos discipulos suos. Ita Constantinopolin pervenerunt , ubi statim dati sunt in custodiam. Paulo post Joanni dies data est , quâ citatus , adductus est in confessum Episcoporum , inter quos primas tenebant Patriarcha Melchitarum & Episcopus Malatiæ qui Joannem apud Imperatorem accusaverat : cumque Episcopi splendidis vestibus induti confediscent , Joanni locus datus non est , sed stare jussus in medio. Statim linguâ Syriacâ eos allocutus , uno ex discipulis sermonem interpretante , interrogavit eos , quo canone aut qua disciplina freti , in sedibus suis , magnatum instar sederent , se verò coram ipsis stare juberent. Responderunt ipsum & qui eum comitabantur , esse hæreticos , atque adeo nefas esse ut cum Episcopis Orthodoxis locum haberent. Tum Joannes dixit se cum auxilio Dei offensurum quòd neque ipse neque sui hæretici essent , modò disputandi de fide daretur facultas : sed facile fore unicuique , agnoscere quis orthodoxus esset , modò adessent qui de veritate eorum quæ dicturus esset judicarent , nec autoritate Imperatoris abuterentur. Monuerat eos Episcopus Malatiæ , & simul Patriarcha Melchitarum , ne cum illo disputationem instituerent : cum enim doctissimum esse , metuendumque ne ab illo refellerentur. Itaque ex illius consilio responderunt se cum hæreticis sermonem miscere non posse , & Imperatoris ministris jusserunt ut abducerentur usque ad crastinum diem. Tunc cum in confessum Episcoporum

ipse Imperator venisset, adductus est Joannes; constitutoque inter utrumque interprete, dixit Imperator, pervenisse ad eum quod ipse vir sanctus esset: nihil igitur ab eo postulare, nisi ut amplecteretur Synodum Calchedonensem, quod sibi gratissimum foret: pollicerique, si id faceret, non honorem modò & dignitatem, sed etiam amplissimam super vicinas sedi suæ provincias auctoritatem. Joannes ita respondit: *Domine Imperator, Deus Imperium tuum Majestatemque tuam conservet; testis ipse est, me nunquam intermittere orationes & supplicationes ad eum pro Imperio potentissimo tuo, veluti sacra littera nobis facere precipiunt, ut securam & tranquillam vitam agamus. Verum Majestatem tuam non oportet cogere quemquam, ut religionem suam deserat, sed sequi exemplum Regum duorum quos in nostra communione habemus, Æthiopia scilicet atque Nubia: qui neminem communionis vestrae in suis regionibus, cogunt ad suam fidem proficiendam.* Hæc verba interpret, corruptus ab Episcopo Malatiæ, non fideliter retulit: addiditque cùm de regibus Æthiopiæ & Nubiæ verba interpretaretur, eos esse Imperatore superiores. Unde Imperator majorem in modum excanduit: & in contumeliosa adversus eum & sectam Jacobiticam verba prorumpens, postridie ex suorum Episcoporum consilio, eum in insulam à Constantinopoli, uno milliari distantem deportari jussit. Duo seniores Metropolitani cùm metu & pollicitationibus Melchitarum commoti fidem eorum professi fuissent, sperantes fore ut ad majores dignitates extollerentur, à Patriarcha Melchitarum per summum contemptum Subdiaconi constituti sunt: duo alii firmi in opinione sua permanserunt. Joannes iterum adductus coram Imperatore, professusque se in fide quam tenebat mori paratum, in Insulæ vicinæ Monasterium relegatus est, relicto tantùm uno discipulo qui ipsi famularetur; atque illic per annos duos detentus est. Erat in eadem Insula Anachoreta quidam Melchita, tanto adversus Jacobitas odio plenus, ut Monachis duobus discipulis suis sub anathematis poena imperaverit, ut quotidie Joannem adirent, & in eum maledicta congererent, atque conspuerent, quod faciebant. Juvenis etiam Monachus in eodem loco nihil injuriarum omittebat, atque quoties Joanni ex ægitudine pedum laboranti discipulus, aquam calidam ad fomentum parabat, alter cinere injecto eam perturbabat. Hunc porro, ne miracula deessent, à dæmone correptum post triduum malè periisse scribunt. Erat Constantinopoli vir pius, qui cùm

Ecc iiij

Joannem visere optasset, ad Insulam trajecit; sed non admissus, in vicinum pagum se recepit, unde ad eum scripsit, benedictionis captandæ gratiâ: sed epistolâ à latore proditâ, conjectus est in vincula. Joannes eum consolatus est per discipulum suum, & imminuentem exitum suum simul prædixit. Monachi prohibuerunt ne apud eos sepeliretur: negantes licere ut cum Orthodoxis Hæreticus sepulturam acciperet. Unde in deserto loco, à discipulo suo terræ mandatus. Eum autem obiisse scribunt anno 747° Martyrum, qui est J. C. 1031^{va}. Hanc igitur historiam sub Romano Argyro contigisse oportuit, quamvis illius ne vestigium quidem occurrat, in Græcis Historicis. Fieri sanè potuit ut cùm Imperatores Constantinopolitani Antiochiâ, multisque aliis in Syria urbibus potirentur, passi non fuerint Jacobitarum Patriarcham, in suis provinciis auctoritatem usurpare aut res novas molientem Constantinopolin adduci jusserint: reliqua eodem loco habenda sunt ac illorum miracula. Addunt Patriarcham suum paulò antequam è vita discederet, præcepisse discipulo, ut suo nomine significaret successori in Cathedra Jacobitarum Antiochena suo, ne in posterum sedem in Græcorum provinciis figeret; verùm Amidæ aut Edessæ resideret. Ea sanè fuit atque etiamnum est sedes Patriarcharum Antiochenorum ab aliquot sæculis, ita tamen ut sedes non semel mutavisse reperiantur. Nam fuit usque ad Francorum Imperium Hierosolymitanum, Amida sub proprio Metropolitâ Jacobita, eamque in sua Ecclesia dignitatem obtinuit Dionysius, qui etiam Jacobus Barsalibi dictus est, vir sua ætate doctissimus, & cujus testimoniis multoties in hoc opere nostro usi sumus. Habuit quoque Edessâ suos Episcopos: verùm Jacobitarum Patriarchis sub Saracenorum imperio constitutis, communis cum Nestorianis, & aliquando Melchitis consuetudo fuit, ut Patriarchæ, aut qui similem propemodum dignitatem haberent, in quocumque loco sedem suam constituere possent. Id primum necessitate coacti fecerunt, cùm Imperatorum Christianorum legibus ex urbibus præcipuis migrare juberentur: atque ea ratione ipsi Catholici sedes Patriarchales sæpè, Arabum metu postmodum relinquere coacti sunt. Primi qui illam migrationem sponte fecerint, fuisse videntur Nestorianorum Patriarchæ Catholici appellati. Illi enim cùm Seleuciæ seu Ctesiphonte sederent ultimis Persarum Cosroïdarum temporibus, statim atque Bagdadum à Calis Abbassidis condita est, in eam transiverunt, ut Alexan-

drini Jacobitæ Misram potius quam Alexandriam incoluerunt.

Aiunt eundem Patriarcham Joannem, cum tempore Ægyptiæ persecutionis Ephræm Damiatensis Episcopus Diocesi sua fugere cogeretur, eum divinitus agnovisse, quamvis habitu Monastico tectum, & inter Monachos alios permixtum: & ad se adductum consolatum esse, atque in patriam remississe. Post Joannis obitum, à Jacobitis electus est ejus ex fratre nepos eodem nomine, ad quem Synodicam se detulisse testatur Michael scriptor hujus historiæ postquam constitutus fuisset Episcopus Tarcos simulque secum fuisse Gabrielem Episcopum Sa. Erat autem Synodica illa Epistola de unitate fidei scripta à Christodulo Patriarcha de quo inferius dicitur, missaque fuit anno 765° Martyrum, qui fuit J. C. 1049¹⁵. Scribit autem Michael se miraculum de puero suscitato, & alia didicisse à Joannis primi Discipulo, & ab ipso Ephræmo Damiatensi.

Non desunt etiam miracula Zachariæ attributa quæ omittimus: nec enim illa aliter accipienda sunt quam vanæ otiosorum hominum fabulæ, quas non tam fallendi aut sectam suam commendandi studio excogitant, quam ut Christianos durissima Sarcenorum servitute confictatos talibus miraculis in officio contineant, & à fide abneganda deterreant. Adde quòd multa similia leguntur in vitis Patrum, quæ cum nullo judicio collectæ sint, variisque narrationibus, ut sæpè solet, auctæ in codicibus reperiuntur, ex quibus Arabes & Syri translationes in vulgarem sermonem fecerunt suas; nulla enim apud Orientales Criticæ Ecclesiasticæ umbra est, idcirco fabularum omne genus tales in libros irrepsit. Illos si quando Orthodoxi in Arabicum sermonem interpretati sunt, Jacobitæ eosdem in suos transtulerunt, & quæ antiquis temporibus facta erant, suis attribuerunt.

Unum notasse oportet quod alibi observavimus; cum de Eucharistiæ miraculis ageretur, & quod in aliis locum habet. Nempe etiam ex fictis absurdisque narrationibus, verum aliquando exculpi ita posse, ut ex illis certa disciplinæ eorum temporum in quibus scribebantur argumenta, haberi possint. Nemo miraculum sive verum, sive fictum de sacra Eucharistia narrat, aut narranti fidem præbet, quin simul realem corporis & sanguinis Christi præsentiam in Sacramento credat. Nemo pari exemplo narrat miracula, per unctionem sacram, aut olei benedicti, secundum Ecclesiæ traditionem, aut ex lampade Ecclesiæ accepti: per si-

" Miracula
Zachariæ.

Ex fabulis
etiam veritas
aliquando ag-
noscitur.

gnum crucis, per imagines, per vasa sacra, per reliquias sanctorum, per jejunia, vigiliis, coram altari aut imaginibus, scribere potest, quin hæc omnia per quæ miraculum factum scribitur in rerum sacrarum numero habeat, & à superstitione quam longissimè abesse existimet. Neque enim Autores, nobis supersticiosos homines, aut magos, sed sanctos representant. Omnia autem illa miracula, vel signo crucis, vel benedictione, vel reliquiis facta esse scribunt: atque ita omnes illas Ecclesiasticas traditiones apud se vigere, non modò certis aliis argumentis, quæ aliunde suppetunt, sed istis etiam fabulis confirmant.

Pœnitentiæ
exemplum.

Unum præ cæteris in hac Zachariæ vita notatu dignum est de homine, qui cum uxore jurgatus, eâ relicta libidinem cum puero meritorio explevit, statimque leprâ percussus est. Is cum Zachariam adisset, durissimam per dies quadraginta pœnitentiam peregit, inclusus obscuro in loco, & triduo tantùm elapso panem modicum & aquam gustans: quo temporis spatio, eandem sibi Zacharias pœnitentiam imposuit. Ex eo enim exemplo intelligitur quàm severa in nefandi illius sceleris reos disciplina fuerit; verùm de ea fusiùs in Dissertatione de Pœnitentiâ.

SANUTIUS II.
PART. LXV.

SANUTIUS II. PATRIARCHA LXV.

Status re-
rum Egypti.

EXTINCTO Zachariâ, multi, quod huc usque vix contigerat, Patriarchalem dignitatem ambientes, ad eam contra Canones auctoritate Sultani pervenire conati sunt. Ægypti Califatum obtinebat ab anno Hegiræ 411°, quo Hakemus perit, filius ejus Abulhacen Hali, qui cognomine mutato appellatus est Taherle-Azazeddin illa, & simpliciori Taher sexdecim annos natus, cum ab Emiris & populo salutatus est. Imperium cum summa potestate administravit ejus nomine, Hakemi soror, Settelmeluca, cujus jussu occisus ille fuerat, & prudentissimè rem gessit; sed eâ post annos quatuor mortuâ, summa rerum ad Taherum rediit, qui à prudentia, religione qualis in Muhamedano esse potest, justitiæque ab historicis commendatur. Amitam autem ejus audacem, magnique animi foeminam imperium administrasse, eò fuit facilius, quod illa tantis opibus abundabat, ut purpuratos, milites, & omnes alios largitionibus statim sibi adjunxerit. Tanta enim ex præda tot provinciarum erat Fatimidarum opulentia, ut etiam foeminæ principes, regum opes domesticis facultatibus æquarent.

æquarent aut superarent. Tres eâdem prope modum dignitate ex Califarum familia opibus floruerunt: Sidet Rechidet amita Hakemi, quæ cùm ipse Legatum Imperatoris Græcorum in conspectum admitteret, ad majorem pompam aulae ipsi opere polymito ex auro & serico multa præbuit, adeo ut aula auro gemmisque radiaret. Set-el-Mesr, ejusdem Califæ filia, octo millia puellarum in servitio habuit, gemmarum, moschi Sinenfis & aliarum rerum magni pretii infinitam copiam: & ex annuis redditibus percipiebat quingenta aureorum millia. Rechidet mortua, Hakemo vivente, reliquit pecuniæ signatæ millies mille & septingentos mille aureos: vestium sericarum triginta millia: aliarum unicolorum duodecim millia, tum alia multa. Abada ejus soror filia Muazzi tantas opes reliquit, ut post ejus obitum ad signandas cistas, arcas & apothecas, cera pondo quadraginta rotulorum Ægyptiacorum; sive librarum consumpta fuerit, Quantæ fuerint novorum illorum Dominorum rapinæ, satis intelligitur, apud quos tres mulierculæ, nullius rapacitatis accusatæ, tot thesauros collegerint. Obeunte igitur Setelmelouka, quasi diceret *Regum Domina*, Taher Vezirum assumpsit Mogibeddoulet Hali filium Ahmed Georgianum, quem virum prudentem & Christianis amicum fuisse scribit noster historicus. Ad eum accessit Bekira Rechidæus, præcipuè inter Christianos nobilitatis & dignitatis, exposuitque periculum in quo res Christianorum Jacobitarum erant, siquidem hæc contentio hominum de Patriarchatu certantium finem non acciperet, Vizi-
rus ea caritate quæ à Muhamedano expectari vix poterat, respon-
dit, tria denariorum aureorum millia quæ fisco deberentur, ab
eo persolvenda qui ad hanc dignitatem assumeretur, se illis re-
mittere: verùm ad finiendas omnes contententium de Patriar-
chatu machinationes, negotiumque tranquillè perficiendum con-
sulere, ut sicut Bagdadi fieri solebat, ita & ipsi rem fortè permit-
terent.

Hist. Æg.
t. 2. f. 354.

Quia porro locus hic insignis est, formamque electionis quæ postmodum sæpe usurpata est, repræsentat, verba ipsa appone-
mus. *Facite quemadmodum apud nos Bagdadi fieri solet: nempe cùm aliquem ad Patriarchatum promoveri designant, congregati in Ecclesiam, nominant ex omnibus Monasteriis viros centum: ex quibus quinquaginta sелиgunt, postea ex illis viginti quinque: ex istis decem, tandemque ex decem qui ex illis omnibus residui sunt, tres eliguntur, Eorum nomina tribus schedis inscribunt,*

De forte ad
eligendum
Patriarcham,

Fff

in quarta nomen Jesu Christi, eas in globum plicant, collocantque subtus altare ubi orant, & Liturgiam celebrant. Post orationem & Liturgiam, infantem ex filiis suis adducunt peccati nescium, qui extensa manu unam ex schedis accipit. Cujus nomen in ea scriptum reperitur, is ordinatur Patriarcha: si occurrat illa quæ Christi nomine inscripta est, intelligunt, neminem trium dignum esse. Alia igitur tria nomina scribunt; nec ita agere desinunt, donec Deus quem elegerit significet, educto unius nomine qui mox ordinatur Patriarcha. Hujus consuetudinis quæ deinde sæpè observata est, testimonium circa Ecclesiam Bagdadensem, certissimum occurrit in Historia Nestorianorum Maris Salomonis filii: nam cum de Ecclesia Bagdadensi Emir us loqueretur, aliam procul dubio non habebat in mente quam Nestorianam. Quippe Antiochenus Jacobitarum aut Melchitarum Patriarchæ Bagdadi Sedem non habebant, obtinuerantque ab Hali filio Abutaleb, & aliis Califis Nestoriani, ut illis in regionibus, nemo præter Catholicos Modainenses supremam inter Christianos haberet auctoritatem. Sed cum contentiones gravissimæ orirentur inter Nestorianos qui in Aula Bagdadensi plurimum poterant, jam ab Almanforis qui Bagdadum condidit tempore, quia plerique Archiatri ex ea secta erant, & aliquando concordie ratio iniri nulla poterat, fors illa instituta est. Ejus usurpatæ exemplum, primum occurrit in electione Joannis filii Narsis qui inter Catholicos numeratur 52^{us}, factâ anno J. C. 884^o, tum in eligendo altero Joanne cognomento Abu Isa, qui fuit 61^{us}, anno J. C. 1007^o: & ejusdem moris mentio occurrit multis in locis. Hanc porro sortem Ægyptii Christiani *Heikeliet*, quasi in altari aut sanctuario factam appellabant, & ejus diversâ postmodum exempla occurrent.

Sanutii electio.

Sive Nestorianorum quos imitari Jacobitæ volebant odio, sive aliâ causâ factum est, ut Viziri consilium sequi noluerint; sed iterum congregati Episcopi, postquam multos proposuerunt, tandem accedentibus omnium votis elegerunt Monachum Sacerdotem, ex Cella D. Macarii, literis divinis apprime instructum, quique à quattodecimo ætatis anno monasticam vitam professus fuerat, nomine Chenuda sive Sanutium: ortum ex loco *Lebana Adidito*, vel ut habetur apud Abulbircat *Tenana*, non *Tavana*, ut scripsit Wanslebius. Attamen erant qui dicerent eum sub Zacharia Episcopatum Misræ ambivisse; sed cum pecunia illi dees-

fer, repulsum & ejus loco Philotheum ordinatum. Nec tamen puduit eum qui talia & quæ sequentur scribebat, etiam ad hanc electionem miracula interponere : unum quod Episcopus quidam divinitus accepit, ut eum qui primus postridie in Ecclesiam sancta corpora veneraturus intraret, is assumeretur ad Patriarchatum : Sanutius autem is fuit. Alterum quod eadem nocte vidit in somnis Petrum & Joannem Apostolum, qui claves quas in manibus habebant ipsi porrigebant ; quod somnium Onirocriticus alter Monachus de futura ipsius dignitate interpretatus est.

Cum ejus electio communibus suffragiis confirmata fuisset antequam Patriarchali veste indueretur, Episcopi ab eo promissum exegerunt ut Joannem, sive Junes, nefarium illum Zachariæ calumniatorem, ordinaret Episcopum Farmæ, quæ est in finibus Ægypti circa desertum, quod illam & Syriam interjacet. Eum igitur ad Sanutii Cellam deduxerunt, à quo benignè exceptus est : verum petiit ut quandoquidem Episcopatus Farmæ nullus reditus habebat, annua triginta aureorum pensio sub Patriarchæ tyrgrapha ipsi promitteretur, fraterque ejus alium Episcopatum acciperet, quod ipsi concessum est. En mores illorum Thaumaturgorum : sed pejora adhuc secuta sunt : nam cum post aliquam contentionem quæ iterum orta est, & quam Junes Monachus, qui ab omnibus timebatur, composuit, accersitus fuisset, atque Alexandriam ductus, noluerunt Alexandrini eum suscipere, quin prius scripto instrumento se obligasset ad solvendo quotannis aureos quingentos, qui ad eorum Ecclesiæ reparationem impenderentur. Præterea coactus est subscribere alteri instrumento, quo pollicebatur se nullam pro ordinationibus pecuniam accepturum, neque pro dono Christi denarium vel drachmam exacturum aut recepturum : tandem se centum aureos qui ex consuetudine Præfecto urbis dabantur, persoliturum. Verum ne obolum quidem habebat, unde illis satisfaceret : eaque occasione cum nefarii illi Episcopi quærerent an meliorem se existimaret patribus suis qui simoniam exercuerant, de Episcopatu *Bana* live Panopoleos, cum Raphaelē quodam pro sexcentis aureis transegit : qui pecuniā carens, eam fœnore à Muhamedanis accepit.

Alexandriam cum ita intrasset atque ordinatus fuisset, statim qualis futurus erat ostendit, pecuniis undequaque colligendis intentus, magno Alexandrinorum scandalo, quod datam ipsis de abolenda simonia fidem fregisset, tum etiam quod adversus omnes

Varix ejus
cum suis con-
tentiones.

Simoniam
exercet.

non superbè solùm, sed contumeliôsè se haberet. Misræ major adhuc ipsius superbia fuit : nam Bekiræ Rechidæo scribæ qui ad eum officii benedictionisque captandæ causâ venerat, nihil aliud dixit quàm *Dominus regnavit, irascantur populi* : verba de Christo per Davidem dicta, per impiam arrogantiam ad se transferens : nam Bekira ejus electioni vehementer obstiterat ; quod alter exprobrabat, ut etiam quod petenti sibi Episcopatum Misræ pariter restitisset. Alter cum omni modestia eum monuit ne Judæorum exemplo scripturas in alienum sensum detorqueret ; tandemque irati abscesserunt, cùm adstantes in ea verba proruperint ; in hoc novo regno, quod ipse in Christianos usurpare conabatur, salutem esse nullam, eò quod primus quem ordinaverat Episcopus Panopoleos, sexcentorum aureorum pretio numerato ordinatus fuerat. Tantum ab fuit autem ut ex illa præstantissimorum inter Jacobitas virorum exprobratione mores emendaret, ut potius exeuſso pudore omni ad graviora facinora progressus sit. Nam Archipapam seu Archiepiscbyterum urbis Osiut, Episcopum ordinavit, pactâ ingenti pecuniâ : quod sacrilegium cives Osiutæ tantopere averſati sunt, ut illum triennio urbis ingressu prohibuerint, canonicæ disciplinæ adhærentes. Unde ille reversus ad Sanutium, petiit ut, vel pecuniam suam restitueret, vel à civibus se recipi juberet : at neutrum præstitit. Inde tanta fuit miseri illius Episcopi indignatio, ut mortuo similis in terram collapsus fuerit, & difficulter ad se redierit, vexatus quasi à dæmone agigaretur. Tandem Michael qui aderat, & alii obtinuerunt à Patriarcha literas ad Episcopos vicinos, quibus jubebat ut eum in pago quodam Dioceſeos ordinarent Episcopum. Hoc loco deplorat idem Michael temporum calamitatem, infinitasque pecuniarum exactiones à Muhamedanis factas, præsertim ex quo Ahmed filius Toloni Ægyptum obtinuit : quæ causa fuit cur Patriarchæ ab antiquis moribus deflecterent, & Domini præceptum de gratis dando, quod gratis acceperant discipuli, abiret in defuetudinem, cùm non alia ipsis ratio suppeteret, satisfaciendi avarissimis principibus. Neque tamen hanc excusationem approbare videtur.

Spolia mortuorum Episcoporum capit.

Sanutius omnis disciplinæ contemtor injicere etiam manus conatus est in mortuorum Episcoporum spolia : cùmque Elias Episcopus Chenanæ diem suum obiisset, misit qui suo nomine domum ejus occuparent, & omnia quæ in ea reperirentur. Obsecrabat eum defuncti frater, ut ablatis bonis omnibus, sibi domus

vacua relinqueretur ; quod Sanutius negavit. Unde vir ille in desperationem adductus Muslemanus factus est, domumque, & omnem fratris hereditarem retinuit. Hæc & multa alia quæ silentio se præterire Michael Episcopus testatur, cum Sanutius rei augendæ immodicè attentus, magno omnium scandalo perpetrasset, tamen aut ex avaritia aut ex inopia cum secundi anni pensio quæ Alexandrinis debebatur repræsentanda esset, negavit. Illi ad Præfectum querelas detulerunt, atque ipse coactus est sygrapham pro debita quingentorum aureorum summa, sed & pro trecentis aliis dare.

Ea occasione Bekira idem Diaconus, qui perpetuò laudatur in hac historia à pietate, & amore Ecclesiæ suæ, liberè cum monuit, ut simoniam omitteret. Respondit ille non esse sibi, sublati illis pecuniarum exactionibus, unde Alexandrinis annuos aureos quingentos, & ordinaria tributa solveret, neque unde se & discipulos suos sustentare posset. Ad hæc Bekira spondit se & alios subministraturos ipsi quæcumque necessaria essent, tum ad sumtus, tum ad onera, ex collatione tributi denarialis & aliorum quæ Patriarchis conferri solebant ; si quid deesset suppeditaturos : effectique ut hæc concordia ab eo subscriptione firmaretur, quamvis id admodum reluctans faceret. Convocatis Episcopis cum factam inter se & Bekiram conventionem ipsis significasset, graviter tulerunt, adeo ut dicerent, auferri ipsi jus omne dignitatemque Patriarchæ, si ab exigenda pro ordinatione Episcoporum pecunia desisteret. Bekira de perverso Episcoporum consilio certior factus, accurrit ; suadereque conatus ne illis obtemperaret, verum testaretur, se id ex animi sui sententia, non alterius suasu promississe, promissisque stare velle. Id facturum se Sanutius simulans, rogavit ut sygrapham afferret sibi, quam Episcopis ostensam vellet : eam Bekira nihil doli suspicatus ipsi in manus tradidit, quam statim concepsit. Indignati verò Episcopi quòd ipsis convocatis, ut consilium acciperet, omnia ex arbitrio ageret : convenerunt in Ecclesiam S. Mercurii Misræ ; ipse verò manebat cum suæ factionis hominibus, in Ecclesia S. Michaelis. Instantibus tamen Christianorum Laicorum primariis ut simonia funditus tolleretur, ad Episcopos venit ; & illi toto die à mane usque ad noctem, frustra cum eo laboraverunt ut consensum ejus extorquerent. Instanti Bekiræ, cum superbè eum interrogasset quo jure in Episcoporum confesso loqueretur, manus à discipulis suis injici jussit, cumque contume-

Sanutii per-
versitas.

liose verberari, atque ita re infecta discessum est. Junes Monachus qui Episcopatum Farmæ pacta annua triginta aureorum mercede reliquerat, eam à Sanutio exigere voluit : at ille non aliter respondit, quam per sententiam horrendi anathematis, cujus formulam ex utroque Testamento collectam manu propria scripserat, quamque ad omnes Dioeceses misit.

Ejus obitus.

Maxima his temporibus fames Ægyptum vicinasque provincias afflixit, nam mures sementes vastaverunt, tum etiam tempestatibus, inundationibus & terræ moribus, multæ regiones vastatæ sunt. Sanutius in obduratione perseverans, triennio antequam obiret, gravissimis capitis doloribus, tum aliis morbis oppressus, tandem obiit 2^a Athyr, anno 733^o Martyrum, qui est J. C. 1017^m, ut habet exemplar nostrum errore manifesto. Nam cum ejus decessor obierit anno Martyrum 748^o, & ipse, ut testatur Michael historicus annos quindecim federit, obitus ejus referendus est ad annum ejusdem Æræ 763^{um}. Unde Elmacinus scribit eum obiisse anno 774^o Martyrum, sedisseque annis 25 : cum numerus corruptus sit, quando initium ejus numerat ab anno ipsius Æræ Ægyptiacæ 748^o, Hegiræ 421^o : at multipliciter hic erratum est, neque enim is annus Martyrum respondet anno Hegiræ 421^o, qui est J. C. 1030^m, sed anno 746^o. Canon Chronologicus apud Abulbircat ordinationem ejus assignat eodem anno, quo decessoris ejus Zachariæ obitum, nempe Martyrum 745^o : finem Pontificatus 760^o, quem definit annis 15, mensibus 11 ; & hunc numerum sequitur Makrizius, nisi quod quinque mensibus minor est. Ordinationem factam scribit anno Hegiræ 421^o, ut Elmacinus, 23^a mensis Phamenoth : mortuum mense Tybi. Abulbircat ordinatum dicit mense Cohiac, mortuum 2^a Atyr : tanta est inter Autores diversitas. Sepultus est in Ecclesia magna urbis Demroïa, quam Zacharias inchoaverat, Sanutius ex voto antequam Patriarcha fieret emissio perfecerat, Astitit morienti, ejusque oculos clausit Michael tunc scriba Patriarchii, postea Episcopus Taneos, qui à Zacharia Diaconus, à Sanutio Sacerdos, à Christodulo ejus successore Episcopus ordinatus est. Hic historiam perfecisse ait anno Martyrum 767^o, J. C. 1051^m.

Res Antiochena.

Eo tempore constagravit Ecclesia Jacobitarum Syriarum Antiochena, anno Martyrum 788^o, secundum autorem sequentis Historiæ, J. C. 1072^m, Hegiræ 465^o. Orta erat contentio inter

Clerum illius Ecclesiæ & Laicorum primarios ob bonorum administrationem. Unus ex illis adiit Melchitarum Patriarcham, datâque pecuniâ obtinuit, ut ob signatis Ecclesiæ foribus Sacerdotes comprehendi & in carcerem conjici juberet, ubi per sex dies, variis cruciatibus afflicti sunt. Cumque ulterius similia pati non possent, significaverunt Patriarchæ Orthodoxo se paratos esse ad fidem suam abnegandam, ejusque communionem amplectendam, modò unusquisque gradum suum in Ecclesia retineret, simulque ab injuria, quam inimicus eorum ipsis intulerat eos vindicaret. Ille cum de illorum consilio certior factus esset, prævenit eos, & apud Melchitarum Patriarcham edidit fidei Orthodoxæ confessionem. Sacerdotes ex carcere educti Ecclesiam spoliaverunt, altare diruerunt, & Eucharistiam quæ in eo conservabatur in mare projecerunt, atque ita Ecclesia eversa est. Postea suæ religionis homines, tum autoritate, tum minis & poenis coegerunt ad Jacobiticam fidem deferendam, adeo ut quatuordecim illorum millia ad Ecclesiam Orthodoxam redierint. Erat sanè tunc Antiochia sub Græcorum Imperatorum potestate, atque adeo Orthodoxi primas in ea urbe obtinebant, & ita facile fuit ut autoritate principum Jacobitæ coercerentur, multique ad fidem Orthodoxam reducerentur. Cum verò nullus huc usque scriptor ad manus nostras pervenerit, qui Melchitarum seu Orthodoxorum Syrorum res Ecclesiasticas describeret, nullum ad hanc historiam illustrandam subsidium nancisci potuimus.

Multis Jacobitæ ad fidem Orthodoxam conversi.

Ut verò paucis quæ ad politicam historiam hujus temporis pertinent prosequamur: vixit Sanutius partim sub Hakemi, partim sub Taheri Califatu, siquidem annos 25 sedit, ut Elmacino placuit. Verum cum error ipsius manifestus sit, scribatque alio loco eum ordinatum fuisse anno Taheri 11°, qui fuit Hegiræ 422^{us}, J. C. 1030^{us}, illius vitam multis annis supergressus est. Cepit Taherus Imperium anno Hegiræ 412°: obiit 427°, annos natus 31, cum sedisset annis 16, mensibus aliquot. Princeps fuit nullo insigni vitio, aut virtute commendatus, qui ob pueritiam primos imperii annos sub amicitia tutela; reliquos Viziris omni autoritate relicta, satis inglorius transegit, non quod ipsi aliquid ad præstantiorum ex sua gente Imperatorum gloriam æquandam deesse videretur; erat enim clemens, munificus, populi amans, & facilis, neque adversus religionem Muhamedanam patris exemplo quidquam molitus est, sed obstabat valetudo, cor-

Res Muhamedanz.

P. 2651

Pars. LXV.

porisque imbecillitas, quæ in eo continua fuit, adeo ut nec militiæ laboribus, nec rebus gerendis esset idoneus. Ejus tempore multos in carcerem conjectos fuisse, tam viros quàm mulieres restatur historia Patriarchalis, de quo tamen nihil occurrit in variis historicis. Tunc etiam Mardasidæ Halepum quæ in ditione ejus fuit, occupaverunt. Eorum princeps Salehus Mardasi filius, Baalbecum, seu Heliopolin & aliquot alias Syriæ urbes occupavit, & novi principatus Autor fuit, cujus Halepum sive Bethheea Menopolis erat; steteritque hæc familia sub diversis principibus per annos circiter quinquaginta.

De Gagne-
widarum Dy-
nastia.

Verùm major dignitas alterius familiæ fuit, Sebektekini scilicet, qui primus numeratur inter Gaznewidas, à Gazna cognominatos, quæ Zablistanæ secundum Abulfedam caput erat, at secundum alios Geographos Indiæ attribuitur. Jam ante annos aliquot Sebektekinus Chorasana, Cowarezmiam & multas alias superioris Asiæ provincias occupaverat, cæsis Præfectis qui eas obtinebant nomine Samanidarum; nulla enim jam illic erat Califarum Abbassidarum autoritas, Initia illius familiæ assignant Historici Persici, qui eas res accuratius tractaverunt quàm Arabes, anno Hegiræ 384°, J. C. 994°. Tunc enim Sebektekinus Chorasana potitus est: fuerat autem servus Tekini, qui etiam in aula Samanidarum servitutem servierat. Postea Mahmoud Sebektekini filius, Mawarlnaharam seu Transoxianam, Imperio suo adjunxit, Indiæ etiam provincias multas penetravit, & inter barbaros Muhamedanam religionem propagavit. Regnaverunt ejusdem familiæ principes quatuordecim, annis centum quinquaginta quinque secundum Emir-Condum, Cond-Emirum, Leb Tarich, & multos alios. Tenacissimi autem fuerunt Gaznewidæ Religionis Muhamedanæ Sunniticæ, quæ secundum Abbassidas Orthodoxa existimabatur, semperque Califam Bagdadensem venerati, post insignes de Indis victorias, nuntios cum literis & muneribus ad Caderum Bagdadum miserunt. Cùmque Hakemus ad Sebektekinum & Mahmoudum ejus filium, literas scripsisset, hortatus ut suo nomine publicam in novo suo illo Imperio orationem fieri juberent, eumque pro legitimo Califa agnoscerent, uterque literas discepsit, & conspuat.

Bowiadarum
divisio.

Principes ex Bowiadarum familia in duas familias, Persicam & Yracensem divisi, continuè se se bellis atterebant; Yracenses Califam in potestate habebant, & quamvis spiritualem ejus dignitatem

gnitatem tueri viderentur, secretò tamen *Rafideos* seu *Haliadas* fovebant. Inde continui in ipsa Bagdado tumultus, præsertim circa festos illos dies in quibus *Perisæ* planctum decem dierum, *Afchour* vocant, in detestationem cædis Imamorum seu Pontificum suorum celebrant, quem ritum Muhamedani *Sumta*, seu qui aliam traditionem sequebantur & Abbassidis obediebant, detestabantur. Hinc cruenta duas inter factiones prælia, Bagdadi quotannis committebantur, Califa dissimulante, & palatio se continere coacto. Negligebatur quoque Meccana peregrinatio, ob continuos Arabum incursus, qui Caravanas, sive peregrinorum catervas adoriebantur, spoliabantque, nisi ingenti pecunia se redimerent. Cædes in ipso Meccano templo magna, sub Tahero facta, eò quòd *Ægyptius* quidam fanaticus, ex Hakemi ut creditum est discipulis, lapidem nigrum quem miseri illi magna superstitione venerantur, post contumeliosa in Muhamedem & Calisam verba, ter repetitis ictibus clavâ ferreâ percusserat, partemque ejus fregerat. Unde factum ut Meccani quoscumque potuerunt, *Ægyptios* obtruncarent. Interea Califa Kader billa anno 422^o obiit, cum hanc dignitatem titulo tenus habuisset annis fermè quadraginta duobus, quod nemini Calisæ antea contigerat. Successorem habuit filium suum, is fuit

Elma: p. 163.
266. 279.

Kayem bimrilla, vulgò Kayemus, Abbassidarum 26^{us}, qui diutius sed eadem; fortunâ non tam Imperium quàm Pontificatum tenuit, nempe usque ad annum Hegiræ 467^{um}, J. C. 1064^{um}, partim sub Bowiadarum, partim sub aliorum, præsertim Seljukidarum de quibus infra dicetur, potestate. Atque hæc Muhamedani Imperii tunc conditio fuit, cùm Tahero Fatimidæ successit in *Ægypti*, *Africæ*, *Syriæ* aliarumque provinciarum Imperio filius ejus Abutemim Mohad, qui cognominatus est Mustansir billa, & annum ætatis octavum ingrediebatur, sub Viziri tutela.

Præter ea quæ de Sanutio retulimus, refert Abuselah Armenus, sub hoc Patriarcha ædificatam esse in loco dicto *Habejjinorum*, prope Misram, ut antea dictum est, Ecclesiam sub sancti Victoris titulo, in qua dum ipse scriberet, exibat adhuc Coptica inscriptio quæ docebat pictas fuisse imagines anno Martyrum 759^o sub illius Patriarchatu: ibique duo altaria ædificasse Sanutium, unum Cosmæ, alterum Joannis martyris qui Asuanæ pro Christo passus est.

CHRISTO-
DULUS
Patr. LXVI.

Autor hu-
jus historię
Mauhoub fi-
lius Manfur.

CHRISTODULUS PATRIARCHA. LXVI.

CUM in Sanutio finem accipiat historia Patriarcharum decem à 56^o Chaille, usque ad Sanutium hujus de quo mox dicemus successorem, scripta ab eo quem sæpè laudavimus Michaelē Episcopo Taneos, quæ sequuntur alium Autorem habent, scilicet Mauhoub, filium Manfur filii Mofrah, Alexandrinum Diaconum. Is anno Martyrum 804^o, qui est J. C. 1088^{us}, Hegiræ 481^{us}, quamvis ipse aliter supputet, anno uno minus, ait se profectum in Monasteria ut vitas Patriarcharum perquireret; multasque reperisse in Monasterio S. Macarii Vallis Habib, & in aliis: porro illæ ipsæ sunt quas huc usque excerptimus: & postea ad illas continuandas adjecisse animum. Ex illius præfatione intelligere possumus, conservatas fuisse in Monasteriis illas historias; at plerasque absque autorum nomine, jam Arabicè explicatas, quas Mauhoub descripserit & in unum corpus collegerit, quales nunc extant in Regio aliisque codicibus. In ea Collectione primum locum tenent veteres vitæ à Severo Episcopo Aschmoninensi collectæ, tum autorum diversorum qui ut suis locis designatum est, multa tanquam testes oculati referunt. Primæ illæ vitæ scriptæ erant, ut videtur, antequam Severus eas colligeret, Ægyptiacâ linguâ; nam etiamsi Græca aliquot vetustiorum exemplaria existabant ad S. Macarium, ut idem testatur, à paucis tamen intellecta vix in usu erant: sed Copticè scribebant plerumque Christiani, imò & inter se adhuc loquebantur, ut ex aliquibus hujus historię locis manifestum est. Labor Severi in colligendis antiquorum vitis & ex Coptica lingua vertendis fuit. Michael Episcopus Taneos & Autores qui eum præcesserunt, scripserunt Arabicè: inde collectio ista prodijt, quam alii compleverunt.

Omnis autem rerum sub isto Patriarcha gestarum series, & aliorum aliquot sequentium, pertinet ad Mostansiri Calisæ Ægypti Fatimidarum 5ⁱ tempora, qui anno Hegiræ 427^o salutat, regnavit annis sexaginta, usque ad annum 495^{um}, J. C. 1101^{um}.

Christoduli
electio.

Cum obiisset Sanutius Patriarcha, convenerunt Alexandriam illi ad quos electio spectabat, Sacerdotesque illius urbis & Laicorum primarii consultaverunt de eligendo qui in ejus locum succederet. Ea enim electio ad Alexandrinos pertinebat, nempe ut superius expositum est, habebatur in eorum urbe Synodus ad ele-

tionem, Clerusque & populus suffragii jus habebant. Cùm aliquot Monachorum aut Hegumenorum nomina proposita fuissent, nec placerent, nominatus est Christodulus Hieromonachus in Monasterio Primi ad Vallem Habib, cujus frater ejusdem Abbas erat, moribus suis commendatissimus, quique de futura ejus dignitate divinitus monitus fuerat, quod fratri significaverat: uterque tristitiani potius quàm gaudium præ se tulit. Tandem cùm in ejus electionem omnes consensissent, missi sunt ad eum decem viri ex consensu, qui cum Alexandriam adducerent, inter quos fuerunt, Abulsetah Mansour Alexandriæ magistratum præcipuum gerens; & Simon Sacerdos Ecclesiæ S. Marci, postea Episcopus Taneos. Obstabat tamen Bekira vir illustris, qui ad communem omnium sententiam demum accessit. Christodulus ex cella sua pedem efferre noluit, nisi veste Patriarchali exteriori indueretur, nè si contentiones reviviscerent, ludibrio esset omnibus. Alexandriam deductus, ordinatus est mense Kohiac, anno Martyrum 763°, secundùm Autorem nostrum: Abulbircat 761°, Elmacinus anno 764°. Annus Martyrum 763^{us}, est annus J. C. 1047^{us}, respondens anno Æræ Muhamedanæ 439°, quem ipsum esse scribit Makrizius, quo Christodulus ordinatus est; atque ita emendanda est aliorum Autorum Chronologia & præsertim Elmacini qui Sanutium obiisse scribit anno 774° Martyrum, decennio seriùs quàm re vera obiit: atque ita contradiceret ipse sibi, siue illud fuerit librariorum vitium, siue Autoris proprium; nam ut in fine superioris vitæ observatum est, multis modis erraverunt Autores quos sequimur, tum in annis numerandis, secundùm Æram Martyrum Christianis propriam, tum in componendis cum Æra Muhamedana. Ratio in promptu est, quia ut ex initio hujus historiæ colligimus, duplicem annorum numerandorum rationem Christiani Ægyptii saltem hoc sæculo habuerunt, unam quam Helaliorum seu Lunarium vocant, quæ satis convenit cum supputatione Muhamedanorum communi: alteram Charagiorum; de qua non ita certam methodum habemus, quamque explicare paucis verbis non licet, cùm ejus mentio nulla, quantum hoc usque adipisci potuimus, fiat apud Autores qui Tabularum Astro-nomicarum ararumque artificium commentariis explicaverunt. Conjectura est singularem fuisse illius usum apud Charagios seu Hæreticos Persicæ Religionis, quales erant Fatimidæ, quamvis Autores omnes annos illorum revocent ad communem Muhame-

Elm, p. 169.

danorum Chronologiam, à qua secundum characterifimos quos Mauboub Initio hujus vitæ notat, differt annus Helalæus & ipfius Chronologia secundum eam fupputandi rationem, anno uno. Nam qui annus 480^{us} Helalæus numeratur, est secundum accuratiffimas tabulas annus verus Arabicus 481^{us}, incipiens à Dominica 26^a Martii in annis Julianis, æræ Christianæ 1088°; qui annus est Charagius 476^{us}. Verùm hæc alibi fufius explicare fortasse licebit. Sufficit fixiffe hoc loco veram, ut existimamus, Epocham esse secundum autoris nostri testimonium anno Martyrum 763°, J. C. 1047°, Hegiræ 439°; quod etiam ex præcedenti vita confirmatur: nam cum ordinatus fuerit Sanutius anno 748° Martyrum, federitque annos solidos 15 & menses aliquot, superest ut obierit anno 764°; aut si menses non numerentur, 763°, Hegiræ 439°, qui fuit 12^{us} Califatus Mustansiri.

P. 165.

Hinc etiam colligitur non vacasse sedem, ut Elmacino vifum fuit, annum unum & menses quinque; quamvis eum, ut solet, Makrizius fequatur: imò cum alter obierit mense Athyr, hic ordinatus fuerit mense Cohiac qui eum proximè fequitur, vacasse sedem oportuit paucis diebus. Abulbircat eodem anno mortem Sanutii & ordinationem Christoduli assignat.

Initia miraculis illustria.

Initia ejus miraculis coruscasse affirmant, eorumque testem Autor se fuisse afferit, quia cum paulò post Ordinationem profectus fuisset ad S. Macarium, ut ibi proclamaretur, dixit se ea nocte quæ ejus electionem præcessit, vidisse in fomnis Petrum & Paulum Apostolos qui clavium fasciculum ei darent in manus: ipfoque die Alexandrinos advenisse, qui Patriarchatum ipsi deferrent. Postquam Alexandriam reversus est, consecravit in ea urbe sex Ecclesias: 1^{am} S. Joannis Evangelistæ, 2^{am} sancti Mercurii, 3^{am} sancti Raphaelis Angeli, 4^{am} S. Mennæ Martyris, 5^{am} S. Georgii, 6^{am} S. Marci, quæ renovata fuerat. Quo verò die Ecclesiam S. Raphaelis dedicavit, ordinavit Sacerdotem unum, Diaconos sexaginta & amplius, ea tamen lege ipsis impofita, ut nihil ipsis quidquam juris in Ecclesiæ bonis esset, quam legem parentibus eorum significavit. Ea enim consuetudo invaluerat, ut quodcumque Diaconatus ordinem obtinuissent, Sacerdotium ambirent, ob constitutam Sacerdotibus annonam & diurna demensa, quæ largitio opes ejus exhauriret, obfaretque ne ædificia restituerentur.

Constitutiones ab eo publicæ.

Eodem tempore post ordinationem & consecratas Ecclesias, promulgavit Constitutiones de disciplina Ecclesiastica varias, quæ

rum magna est in Ecclesia Ægyptiaca autoritas, adeo ut Canonum Collectionibus insertæ reperiuntur in Codicibus manuscriptis Seguierianis & alio qui olim Wanlebii fuit, postea V.C. Claudii Capellani, Doctoris & Socii Sorbonici : tum etiam laudantur à Syntagmatum per locos communes autoribus ut Ebnassalo, & Abulbircat, aliisque anonymis. Publicatæ sunt autem anno Martyrum 764°, J. C. 1048°, ut Autor noster atque Abulbircat, & varii Codices testantur, post consecratam S. Raphaelis Ecclesiam.

Non baptisabitur parvulus masculus cum femella eodem baptismo.

Nemo in Ecclesiam ingrediatur nisi detecto capite & discalceatus.

Nullus fidelium panem Eucharistiæ acceptæ superponat, nisi post *dimissionem* seu *ἀπολύτιν*, hoc est Orationem dimissionis, quæ est ultima benedictio.

Ut fideles curam gerant diligentem aquæ, cujus tres guttæ infunduntur super Eucharistiam dum eis præbetur, sunt enim unionis instar pretiosæ.

Duo hæc disciplinæ capita satis obscura sunt, quia res quo tempore scribuntur, notissimæ, tractu temporis obscurissimæ sunt. Sensus is commodissimus prioris videtur, ut prohibuerit Christodulus ne susceptâ Eucharistiâ frustum aliquod panis ederent statim; sed tantummodò post orationem dimissionis. Altero vetuerit ne pauxilla aqua quam suscepta communionem accipiebant, rejiceretur in terram, quia sanctificata quodammodo erat ex contactu Eucharistiæ. Sed de his & aliis dicetur in notis ad Liturgias.

Ut fideles stent in Ecclesiis diebus dominicis & festis cum timore & tremore coram Deo, cum humilitate & attentione deprecantes veniam peccatorum suorum. Nemo loquatur aut verbum faciat cum alio, tempore orationum & Liturgiæ.

Mulieres quoque in Ecclesia taceant, simulque modestè se contineant in loco sibi destinato, tempore orationum & Liturgiæ : neque cum viris sedeant : aut in eo loco quo eunt & exeunt, homines.

Fidelis quisque observet jejunium sacre Quadragesimæ, ad cujus formam jejunavit Jesus Christus Dominus & Deus noster. Observari autem debet cum continentia & humilitate.

Matrimonium, durante Quadragesima, omnino non celebrabitur.

Feriâ 6^a majoris hebdomadæ, non celebrabitur baptismus, neque Officium exequiarum defuncti.

Dominicâ Palmarum postquam Liturgia finita fuerit, legetur Evangelium pro mortuis, cum orationibus quæ eorum causâ dicuntur, idque post lectionem Epistolæ Pauli eidem officio destinatam. His expletis legetur super plebem *Absolutio*: quippe Feriâ 6^a majoris hebdomadæ non licet dicere preces illas quæ vulgo *Tarhim* appellantur, aut absolutionem, aut officium pro mortuis celebrare, donec transacta fuerit Paschalis solennitas.

Feriâ 5^a in Coena Domini celebrabitur Liturgia cum timore, reverentia & silentio: absque osculo pacis, aut oratione ad veniam postulandam; neque dicetur Oratio *Prophora* seu Oblationis, sed statim ejus loco dicetur *Mistâ pōēn τὰ ὅσια τοῦ ἁγίου πνεύματος*, quæ verba dicuntur à Diacono. Non dicetur Absolutio, neque initio, neque in fine.

Sabbato sancto dicentur Orationes *Tarhim*, quæ à Kyrie eleison incipiunt, & Oratio absolutionis, sed osculum pacis omitteatur.

Per dies Pentecostes non celebrabitur baptismus, neque ordinatio.

Diebus dominicis flere aut planctum facere nulla ratione liceat; neque omnino Christianis conveniunt aut licent similia, mortuorum causâ. Verùm pro illis Litaniam, Liturgiam, & orationem facere oportet, necnon elemosynas juxta facultatem, ut Deus misereatur animabus mortuorum vestrorum, benedicat domibus vestris familiisque vestris, & reducat peregrè profectos à vobis, detque pacem in diebus vestris.

Nulli Episcopo, vel Sacerdoti, aut Diacono peregrino liceat, cùm Alexandriam veniunt, sacra facere in Ecclesiis urbis, aut ad altaria minora seu Capellas Liturgiam celebrare, aut ullatenus in illis ministerium suum exercere.

Observare oportet fideles jejunium SS. Apostolorum, à Pentecoste usque ad 5^{am} mensis Epiphi, ad gratias agendas Deo pro dono Spiritus sancti. Eo autem die quo celebratur memoria SS. Apostolorum, si quarta Feria fuerit, solvetur jejunium, ante horam consuetam.

Observare oportet similiter jejunium Nativitatis Domini à die

PATRIARCHARUM ALEXANDRINORUM. 42; CHRISTO- DULUS Patr. LXVI.

15^a mensis Athyr, quo die celebratur festum S. Mennæ, usque ad 29^m Cohiac, quo agitur festum Natalis Domini. Quòd si Natalis incidat in Feriam 4^m aut 6^m, non jejunabitur eo die, sed jejunium transferetur in hebdomadæ sequentis Feriam 6^{am} ante Epiphaniam.

Jejunare etiam oportet omnibus quartis & sextis Feriis per totum annum; præterquam in diebus Pentecostes.

Non licet Diacono abesse à ministerio Ecclesiæ suæ, præsertim diebus in quibus offertur Liturgia, nisi ex necessitate, aut morbi causâ, aut propter mandatum Principis.

Sacerdoti qui non interfuit Liturgiæ cùm inciperetur, non licet ad altare accedere, & frangere, vel etiam tangere manu sua corpus sanctum, quocumque modo.

Post lectionem Evangelii, Sacerdos non efferet thuribulum cum incenso extra sanctuarium, ad incensandum populum, verum solummodo thus adolebit circum altare, usque ad tempus præscriptum.

Quando infanti baptismus administratur, jejunus erit, si fieri potest, donec communionem acceperit: quòd si maternum, aut alterius nutricis Christianæ lac suxerit, non licet ei communionem dare: neque absque communionem licet baptismum administrare. Hæc autem intelligenda sunt juxta alios Canones multos; nempe, si periculum mortis non urgeat: tunc enim non modò licet, sed præcipitur administrari baptismum absque Eucharistia.

Mulieres ne permaneant diutius in Ecclesia diebus festis, noctibusque Dominicam antecedentibus; nisi sint ætatis provectæ, aut Sanctimoniales.

Qui duxerit uxorem Melchiticam, tales nuptiæ apud nos non recipiuntur, nisi ambo apud nos coronentur, benedictionem scilicet nuptialem accipiant, & infantes suos apud nos baptisari curent.

Diaconi seniores qui absunt ab Ecclesiis suis, nec ministerium suum exercent, si diebus festis accedant ministraturi, prohibeantur, sed eos præcedant alii qui assidui sunt in ministerio, quamvis ætate inferiores.

Diaconus aut Laicus qui cum proprio Sacerdote iurgatus est, aut eum convitio læsit, atque ita inter utrumque dissidium intercessit, ne adeat Sacerdotem alium à quo communionem accipiat; quòd si ad aliam Ecclesiam iverit, non communicet,

alioqui & ipse, & qui ei communionem dabit, excommunicentur.

Significamus etiam fidelibus & eos hortamur, ut præparent oblatas in domibus suis, deferantque eas ad Ecclesiam, secundum suam quisque facultatem: unusquisque autem mercedem habebit, secundum magnitudinem fidei suæ. Fient porro Oblatæ juxta antiquam consuetudinem.

Quicumque Diaconus aut alius calumniatus erit Sacerdotem, subtrahensque se à jurisdictione Ecclesiæ, favorem & auxilium quaerit à Principe vel à Judice, declinansque Sacerdotes & Ecclesiam confugit ad alios, petitque quod sibi non debetur: si est Sacerdos seu Ordinis Ecclesiastici, ab ejus ministerio absteineatur; si laicus, à communione prohibeatur.

Diaconi & qui sunt inferioris ordinis, non contradicant Sacerdotibus suis, aut illis inobedientes sint, atque mandata eorum non prætergrediantur: sunt enim constituti dispensatores in Ecclesia Dei. Hæc ferè sunt quæ in suis Constitutionibus stabilivit Christodulus, quorum in Jure Canonico Coptitarum magna est autoritas.

Contentio
cum Archi-
diacono Mis-
is.

Postquam proclamatio Christoduli solenniter facta fuisset in Monasterio D. Macarii, secundum consuetudinem profectus est Misram, ut ibi quoque proclamaretur. Solebat id fieri in Ecclesia S. Sergii in Castro *Elchemah*, parte illius urbis, ut alibi dictum est, ubi arcis antiquæ vestigia supererant, & Pyrae reliquiae. Ratio hujus consuetudinis in antecessorum Patriarcharum proclamatione fuit, quòd ea Ecclesia esset *Catholica*, seu Cathedralis. Christodulus persuasus à Sacerdotibus Ecclesiæ B. Mariæ *Mual-laca* dictæ, in ea proclamari se jussit, post longam inter utriusque Clerum contentionem. Consentiebant Episcopi qui eum comitabantur viginti quatuor, atque etiam ipse Philotheus Episcopus Misræ, qui cum aliis Liturgiæ quæ à Patriarcha celebrata est, interfuerat. Attamen Archidiaconus Ecclesiæ S. Sergii tam graviter tulit, ut per aliquot hebdomadas prohibuerit ne nomen ejus inter diptycha recitaretur. Christodulus ut concordia coalesceret, paulò post in ea Liturgiam celebravit, excusavitque se quòd ad Muhallacam proclamatus fuisset, nomenque ejus inter Missarum solennia in diptychis recitatum est.

Adjunt inter alia ejus miracula celebre illud fuisse, quòd quemdam Kowagi nomine excommunicavit, qui statim paralyti percussus

coltus obiit. Multis pro nepote Cheic Abuzecaria Yahia filii Mercurii intercedentibus, ut eum ab anathemate absolveret, nam ad Melchitas transferat, nec inter eos solum, sed in Divanis rei pecuniariae prima officia administrabat, constantissime negavit. Sæpe autem eo exemplo factum legimus, ut excommunicati in una secta transirent ad aliam; atque ea fuit præcipua ratio prostrata aliquando apud Jacobitas disciplinæ poenitentialis, quod vererentur ne sui ad Orthodoxos transirent.

Fuit quoque gravis contentio inter eum & Syrianos Misræ, cum esset in Ecclesia S. Mercurii, occasione consuetudinis quæ adhuc apud eos usurpatur, quod scilicet Oblatas suas ita conficiant, ut præter aquam, farinam & fermentum, salis parum quid, & olei stillam admisceant. Talem cum obtulisset vir inter eos primarius Cheic Abulbecher Archiater Principis, Patriarcha non modò eam non recepit, verùm graviter eum reprehendit; sed cum insistere, discipulorum suorum operâ eum ex Ecclesia vulneratum eiec- cit. Unde Abulbecher apud Vizirum querelam detulit; præterea scripsit ad Joannem Patriarcham Antiochenum, qui querimoniam ejus planè neglexit. Ea sanè consuetudo est Syrorum, non modò Jacobitarum, sed etiam Nestorianorum, ut patet ex eorum officiis. Apud Jacobitas qui istud institutum servant, illius Autor à quibusdam dicitur fuisse Jacobus, à quo nomen acceperunt, quem *Baradeum*, seu *Baradatum* appellant: Nicephorus & alii Græci, *Zanzalum*. Ita Abraham Echellensis in notis ad Hebedjesu, & contra Seldenum: tum Naironus & alii, quamvis non planè certa hæc traditio censenda sit. Causas invenire non ita facile est: rei ipsius antiqua supersunt vestigia: nam Autor de Haresibus qui Damascenus à multis dicitur, quique à viro doctissimo Joanne Baptista Cotelerio editus est, notat in quibusdam Monophysitis, quos Semidalitas vocat, singularem Oblationis Eucharisticæ parandæ rationem, quæ ad istam Syrorum potest pertinere. Fortè tamen seriùs apud Syros introducta est, quod verissimilius videtur, quamvis Nestorjani eandem observent: neque facile est ut alteri ab alteris quidquam acceperint. Hinc tamen concludi non potest, hujus missionis antiquitatem divisione Ecclesiarum superiorem esse, neque enim illius vel leve vestigium occurrit in Orthodoxis Scriptoribus, aut in Ecclesiastica disciplina. Extat Opusculum Syriacè scriptum, quo ritus illius mysteria explicantur, & inanisimis ratiunculis confirmantur: cui subjungitur Apo-

Cum Syri-
anis contro-
versia de pane
Eucharistico.

Monum. Eccl.
Gr. I, 1. p. 322

Mf. Bib. CoB.

H h h

logia ejusdem. Autor utriusque operis Joannes Patriarcha Antiochenus dicitur; atque ita non inanis conjectura est, scriptum fuisse illud opus occasione querelarum quas Abulbecher detulit ad suæ linguæ Patriarcham; quamvis nihil in eo occurrat unde conjici possit adversus quem Joannes scripserit, fortasse quia Alexandrinum Patriarcham, cum quo Antiocheni Jacobitas communionem colebant, offendere timebat. Hunc enim in modum post annos multos Michael Syrorum ex eadem secta Antiochenus Patriarcha, cum toto libro qui est de Præparatione ad fuscipiendam Eucharistiam, acriter admodum disputaret adversus Patriarchas Alexandrinos, qui peccatorum Confessione sustulerant, nunquam tamen eos appellat. Abulbircat agens de diversarum sectarum ritibus qui Coptitis non probantur, inter alios illum recenset, quod apud Jacobitas Antiochenos, Oblatæ sal & oleum Syri admisceant. Mirum sanè cum à Severi Antiocheni tempore, communionem cum Alexandrinis habuerint, eamque per Synodicas Epistolas, legationesque Episcoporum sæpè renovaverint, in Ritu qui inter *adhaerentes* collocari nequit, fuisse usque ad Christoduli tempora. Sed de ea disciplina dicitur alibi.

Martyrium
post fidei ab-
negationem.

Eo tempore juvenis annorum viginti duorum Nekam filius Bekara, qui in Aulico Ministerio constitutus magnam apud Muhamedanos autoritatem habebat, cum fidem Christianam abjussset, à parentibus domo pulsus est. Unde poenitentia motus venit ad Ecclesiam S. Michaelis *Moctara* dictam; cumque aliquamdiu ibi latuisset, suadentibus Monachis quos in ea Ecclesia reperit, consilium cepit proficiscendi cum illis ad Monasterium S. Macarii. Cumque mox profecturi essent, dixit illis: *Quæ utilitas mihi erit, si abeam vobiscum in desertum, nec confessus fuerim Christum eo in loco ubi eum abnegaveram?* Cum igitur illum in proposito perseverantem reliquissent, ipse zonâ, quæ erat Christianorum nota, cinxit se, & per plateas Misræ ambulare hoc ornatu coepit, statimque à Muhamedanis qui eum sciebant Religioni suæ nomen dedisse, captus, & Præfecti jussu in carcerem conjectus est. Pater ejus Adateddoulam patronum suum qui urbem cum præcipua autoritate, Turcicamque militiam regebat, adiit, magnamque pecuniæ vim pollicitus ipsi est, ut filium liberaret. Unicam ille viam supplicii evitandi suggessit, ut filius ejus fatuum se simularet: postea missurum se testes, qui coram judicibus affirmarent, quæ vidissent, & sub hac excusatione liberatum iui si vellet, Christia-

ntique permanfurum. Erat in eodem carcere Syrus Monachus, qui adeo vehementer Nekamum hortatus est ad martyrium subeundum pro Chrifti nomine, ut ille omni diffimulatione infuper habita, cum Mufulmani qui de ejus amentia testimonium dicere debebant adveniffent, coram illis præclaram ediderit fidei Confessionem. Itaque ad Præfectum ductus, postquam minas, promiffaque illius contemiffet, ductus ad locum supplicii, ejusque expectatione longa non territus, capite amputato, martyrium consummavit. Caput in terram decidit, facie ad Orientem conversâ: corpus eâ nocte ibi relictum lumine cœlitus apparente illustratum est: quatuor custodes fuerant eodem loco constituti, ex quibus duo adeo terrii sunt, ut in amentiam inciderint, duo alii Misrâ profugerunt, neque de illis quidquam ampliùs auditum est. Cum hæc ad Mostanfurum perlata fuiffent, jussit corpus propinquis reddi, permiffique fepelire quo in loco vellent. Patre ipsius deferri curavit ad Ecclesiam S. Michaelis *Mostara* dictam, & prope eam fepeliri. Sed cum paulò post ex deserto S. Macarii Chriftodulus adveniffet, displicuit ipsi quòd martyrem extra Ecclesiam depofuiffent. Everfo igitur quod ipsi confutuerant monumento, corpus inferri in eam jussit, aperto priùs loculo, ut corpus intueretur, quod repertum est integrum, madens adhuc sanguine, ex quo signum crucis super veftem suam Patriarcha formavit. Eo in loco altare ædificavit nomine illius Martyris, & corpus ejus coram eodem altari tumulavit.

In hac historia præcipuè animadvertere oportet exemplum graviffimæ & quæ primorum Ecclesiæ sæculorum feveritatem fuperat, circa hanc poenitentiam poenitentialis circa Lapfos disciplinæ. Nempe ea fuit, ut qui Chriftianam fidem abnegaffent, eandem publicè proficrentur, abnegatâ fuperfitione Muhamedanorum, eo ipfo in loco. Fuit autem in illa disciplina varietas, cum in quibusdam Ecclesiis non alia conditione abfolutio Apoftatis poenitentibus concederetur, quàm ut talem ubi Chriftum abnegaverant Muhamedis detestationem publicè facerent, hoc est ad certam pro Chrifto mortem properarent. Hæc feveritas præcipuè apud Syros Nestorianos & Jacobitas viguit, cujus exemplum ex Historia Ecclesiastica petitu in Gultazadis Perfæ martyrio, Nestoriani tanquam Ecclesiæ suæ proprium, fuis libris inferuerunt. Eam confirmant Canones aliquot anonymi, quorum summa apud Orientales est autoritas ex Basilii nomine, cui per infcitiam tribuuntur in antiquis multis Codicibus, Observatio circa hanc poenitentiam

Serap. l. 2.
c. 12.
Nestor. Ar. M.
Hij.

In Syrorum Jacobitarum Ecclesia, si ea consuetudo legis vim obtinuit, quod verisimile est, mitigata jam erat cum Dionysius Barsalibi Episcopus Amida: librum de recipiendis poenitentibus suum scriberet. In Ægyptiaca Jacobitarum Ecclesia, non planè interierat illa disciplina, sed tamen ut consilii potius quàm præcepti rationem haberet, quod ex hujus Martyris exemplo manifestum est. Cum enim Apostasiæ crimine teneretur, Monachi consulebant, ut in Monasterium se reciperet, sufficere judicantes poenitentiam, quæ in Monasticiæ vitæ professione continebatur, neque Patriarcha aut illi ipsi quos consuluerat, necessarium existimabant, ut quæsito martyrio impietatem suam præteritam elueret. Nempe semper in Ægypto ob frequentem ut existimari potest Apostasiam, mitis nimium erat, vel potius nulla Lapforum poenitentia, quod ex multis exemplis manifestum est. Neque enim quidquam statutum in Apostatas legimus, qui tanto numero ad Ecclesiam redierunt Hakemo regnante, cum post duram persecutionem potestatem fecisset omnibus Christianam fidem quam abjurerant iterum profitendi. Omnes illi abque longa poenitentia recepti sunt, quæ fortè occasio prima fuit eversæ aliquando apud Ægyptios Confessionis & Poenitentia.

Synodica ad
Antiochenos
missa.

Circa illa tempora Christodulus ordinavit Episcopum Taneos, Michaellem Sacerdotem, qui eidem ab Epistolis fuerat, scientiâ celebrem, à quo scriptas superiùs diximus decem Patriarcharum vitas. Misit per eundem Epistolam Synodicam ad Joannem Antiochenum Patriarcham de communione Fidei Jacobiticæ, quam detulerunt Michael idem Episcopus, & Gabriel Episcopus Sa: id testatur in superiori vita ipse Michael.

Dubium de
Ordinatione.

Elapso post ordinationem Christoduli satis longo temporis intervallo, nata est in multorum animis suspicio, quasi ea non planè secundum leges celebrata fuisset, omisssæque fuissent orationes quædam super ordinandos Patriarchas dici solitæ. Adhærebant huic opinioni Episcopi complures, quorum præcipuus incentor erat Jacobus Episcopus Saca; reliqui erant Chail Episcopus Katur, Elias Episcopus Temowia sive Tmucos, Georgius Kandacæ, Marcus Belinæ, Michael Taneos, multique alii Sacerdotes Alexandrini. Causa tamen secreta hujus contentions non alia erat quàm privata inimicitia Jacobi adversus Christodulum. Ubi ea composita fuit, Liturgiam cum eo in concordia testimonium celebravit Patriarcha, neque amplius quidquam adversus eum Episcopi moliti sunt.

Profectus deinde ad Vallem Habib observavit in Monasterio S. Macarii Sacerdotes, quod etiam Alexandrini facere solebant, Dominicâ Palmarum Eucharistiæ partem reservare, usque ad Feriam 4^{am} majoris hebdomadæ. Id Christodulo non placuit, unde illos admonuit observanda esse quæ circa Eucharistiæ reverentiam constituta erant; cavendumque ne mucesceret aut corrumpere-
tur; jussit tandem ne quid tale postmodum fieret, propositâ excommunicationis poenâ adversus inobedientes, quam sanctionem publicavit adstantibus Episcopis, & Bekira Rechidæo. Verùm ob-
sistentibus Monachis, insolenterque clamantibus, an decessori-
bus suis præstantiorem se existimaret, recepit se in Monasterii Bi-
bliothecam, ubi sermonem composuit ad vindicandam discipli-
nam quam observari jusserat. Legit eum in publico confessu Mi-
chael Episcopus Taneos, atque ita probatus est, ut omisâ ul-
teriori controversiâ omnes in ejus sententiam concesserint, & con-
suetudo illa servandæ Eucharistiæ sublata sit. Ad hujus loci in-
telligentiam observare necesse est, non agi de conservatione Eu-
charistiæ ad infirmorum communionem, cujus consuetudinis apud
Orientales dudum observatæ exempla & præcepta passim occur-
runt in libris Ecclesiasticis. Tunc enim vel solum Eucharisticum
panem servare mos erat, signatum cum particula in calicem im-
missa, sanguineque Christi madida, secundum ritus illos qui ac-
curatissime describuntur, in Rubricis Liturgiæ, in Rituali Ga-
brielis Patriarchæ & in libro de Scientia Ecclesiastica. Quod si
particulæ intinctæ servabantur: apud Græcos quidem exsiccabant
eas Sacerdotes igne subjecto, ut humor omnis evanesceret, atque
ita facilius à corruptione servarentur, de quo ritu videnda quæ
Nectarius Hierosolymitanus Patriarcha ante paucos annos scripsit.
An idem apud Coptitas, Syroſve Jacobitas, Nestorianos, aut etiam
Orthodoxos factum fuerit, dicere certò non possumus, cùm il-
lius disciplinæ nullam legem in libris eorum observaverimus. Mo-
nachi sancti Macarii, fortassis ut paratam quotidie communionem
haberent, servabant Eucharistiam, qualis supererat in calice Eu-
charistico, nempe particulas intinctas, quas in Ægypto, præſer-
tim locis humidis servare à corruptione difficile omnino erat. Pecca-
bant etiam contra leges Ecclesiæ, quibus tunc Eucharistiam præter-
quam pro infirmis conservari prohibitum erat. Nihil igitur ex hac
historia contra fidem realis præſentia, aut ejus appendices conclu-
di potest: cùm & Monachi reservarent Eucharistiam, ut quotidie

Propet. l. 4.
p. 247.
Calamitas
noya.

communicare possent : & Christodulus prohiberet ne illa servaretur, ad evitandum periculum corruptionis elementorum, quam, si negligentia Sacerdotum acciderit, Orientales omnes dura poenitentia vindicant, ut alibi explicatum est.

Erant tunc Christiani Jacobitæ non modò in summa tranquillitate, sed etiam in dignitate, cum omnia ferme officia Scribarum, Notariorumque Divani ab illis exercerentur. Cum verò frequentissimum sit, ut secunda fortuna insolentes homines reddat, & efferat in superbiam, meritò Deus illorum peccata variis calamitatibus castigavit, justâ poenâ quam ipsi sibi accersiverant. Prima occasio fuit, calumnia adversus Christodulum, qui apud Vizirum Nazari dictum accusatus est, quasi ejus consilio Rex Nubiæ munera quæ tributi loco mittere ad Ægypti Principes solebant Nubiæ Reges, non misisset. Statim Vizirus misso Turca ministeriali ad Alabeddoulam rei bellicæ in parte inferioris Ægypti Præfectum, jussit ut Patriarcha comprehenderetur, impositâ simul centum aureorum multa, & ad se adduceretur. Profectus est ad Vizirum cum Abulbacher Scriba illo Christiano, cujus filius martyrium subierat. Cumque falsitatem accusationis demonstrasset, cum honore remissus Demroïam rediit, ubi tunc Patriarchæ plerumque sedem habebant.

Michael Episcopus Taneos & Gabriel Episcopus Sa ad Joannem Antiochenum Patriarcham Jacobitarum cum pervenissent, cum honore suscepti sunt; lectæque in Ecclesiis literæ Synodicæ; nomen Christoduli ad Ecclesiasticæ communionis testimonium ad altaria commemoratum est.

De capite
D. Marci.

In præcedentium Patriarcharum historia relatum est caput D. Marci fuisse servatum in domo Abu Yahia filii Zachariæ: qui cum periculosè decumberet, veriti Christiani ne eo mortuo domus obsignaretur, quia ille officium sub Præfecti Azeddoulæ autoritate exercebat, atque ita tam insignes reliquiæ perirent, thecam noctu abstulerunt, & in vicinam domum transulerunt. Erant illi Gabriel filius Cosinæ, Simon Sacerdos, postea Episcopus Taneos, Hassoun Diaconus, frater ejus, Abulkhair Muttouk & Serour filius Muttouk. Mox transferre voluerant in domum patris Mauhoubi auctoris hujus historiæ, qui cum paulò antea in grave apud Sultanium periculum vocatus esset, noluit ut apud se deponeretur, sed apud Simonem translata est. Hali quidam filius Bechir Africanus Barcæus, re comperta, eam Præfecto per literas signi-

ficavit, statimque omnes in vincula coniecti sunt, ductique ad
 Kaukabeddoulam Alexandriæ Præfectum. Is dixit velle se ut
 redderent caput D. Marci, simulque aureos decem mille, quos
 pariter abstulisse eos dicebat: nam à delatore illo acceperat, fore
 ut Græci pari pecunia illud redimerent. Abulfetah autoris pater,
 cum aliis vinctus, cum dies triginta septem in carcere transegi-
 set, post triduum liberatus est solutis aureis sexcentis: caput in-
 tegrum servatum est. Neque vacasse miraculo ejus liberationem
 Autor asserit, cum referat visionem oblatam Muhamedano cui-
 dam custodi carceris, in qua Marcum vidit qui Abulfetaho liber-
 tatem intra tres dies polliceretur; & ad veritatem promissi com-
 probandam virgulam tricipitem reliquerit, quam repertam Abul-
 fetah brachio alligatam ad finem vitæ servavit: sed quæ eo mo-
 riente inventa amplius non est, ut Autor ejus filius asserit, qui eam
 quoque sæpè vidisse testatur. Ita finit prima illa Christianorum
 aliquot calamitas.

Secuta est alia longè gravior. Kadius, sive Judex quidam Mis-
 ræ Abul-Hucein Abdelwahab Hali Sirafita, qui multa in Ægypto
 officia sustinuerat, ex odio adversus Christianos, cum casu Dem-
 roïam venisset, ubi Patriarcha ut plurimum habitabat, & multas
 ibi Ecclesias, tam reparatas, quàm recentè constructas vidisset, ad
 Vizirum scripsit, tolerari non debere tantum apud Muslemas
 Christianis licere, ut in una urbe decem & septem Ecclesias ha-
 berent, adeo ut Demroïa altera quædam Constantinopolis vide-
 retur. Obtinuit tandem mandatum, quo Ecclesias omnes claudi,
 novas destrui jubebatur, imperatâ pecuniâ singularum nomine.
 Jussit statim deleri inscriptionem quæ erat super ostium domus
 Patriarchalis, *In nomine Patris, Filii & Spiritus sancti unius
 Dei*: omnesque Ecclesiæ clausæ sunt per totam Inferiorem Ægy-
 ptum: Episcopi cum Patriarcha in carcerem coniecti sunt, do-
 nec multam ipsis indictam persolverent. Factum id anno Marty-
 rum 773°, qui respondet anno J. C. 1057°; atque adeo fuit
 Hegiræ 449°, Califatûs Mustansiri 22°. Exigebat autem ab illis
 Præfectus, & à Christianis ejusdem sectæ omnibus aureorum se-
 pteaginta millia. Verum divinitus accidit ut tres Muhamedani qui
 primas in hac injuria partes habebant, intra paucos dies subita &
 infœlici morte perierint. Alexandriæ præfectus Christianis favens,
 a cepto Viziri mandato de claudendis Ecclesiis, Christianos mon-
 nuit, ut omnia vasa & ornamenta pretiosa noctu auferrent. Po-

Alia perse-
cutio.

stridie misit ministeriales qui omnia scrutarentur & nomine Principis auferrent. Cum verò nihil præter pannos aliquot laceros inventum esset, facta coram Cadio & Assessoribus ejus relatione, quòd Christianorum bona in Ecclesiis nulla reperta forent, neque illas ingentes divitias, quas delatores indicaverant, apud eos inveniri, quin potius plerosque in summa paupertate esse, in eam sententiam ad Vizirum scripsit; atque tandem obtinuit ut septuaginta millia aureorum quæ ipsis imperata fuerant, ad duo millia reducerentur. Cum verò ea summa pecuniæ ad eum delata fuisset, ducentos aureos quos Mauhoub, frater & patruus ejus alique eorum amici pendere coacti fuerant, distributâ capitatim in ditiores summâ reliquâ, ipsis restituit, quos emtis vestibus & cibariis in pauperum curam impenderunt. Interea dedit illis claves veteris Ecclesiæ jam nomine sancti Georgii nuncupatæ, quam antiquissimam omnium habebant, cum olim juxta veterem traditionem fuisset domus Aniani qui primus post Marcum Evangelistam Patriarcha fuit, & ad quam ipse diverterat, cum manum Aniani subulâ perforatam, dum calceum refarciret, oratione sanavisset. Per horas sex & amplius laboratum, antequam janua aperiri posset: tandemque eâ apertâ ingressi, Officia divina Liturgiamque celebraverunt, & communionem acceperunt. Melchiræ dimidiâ multæ partem, mille scilicet denarios repræsentare jussi sunt. Hæc autem mala Ecclesiarumque occlusionem atque alia ejusmodi fatetur Historicus attribuenda esse divinæ erga Christianos vindictæ, non solum quia plerique in Aulæ aut Divani ministeriis occupari, nihil aliud cogitabant, quàm ut opes malis artibus collectas, per luxum effunderent, nullam salutis curam habentes. Sed deterior adhuc erat eximii illius & quem ut miraculorum patratores commendant, Christoduli avaritiâ, & sumonia, quam ridiculæ & impio prætextu excusabat. Dicebat enim illis quos Episcopos ordinabat, omnes sedes Episcopales, & Ecclesiarum bona ad D. Marcum pertinere: se igitur mediâ fructuum partem illis dare, alteram Marco reservare, quam præsentî pecunia redimere tenebantur. Omnes Episcopos his conditionibus ordinans, magnam pecuniæ vim coegit.

Processio
Dominicæ in
Palmas.

Vetus erat consuetudo, ut in pervigilio Dominicæ Palmarum processio fieret (*Hosanim* vocant) ab Ecclesia S. Sergii ad Ecclesiam Salvatoris *El'star* dictam, Græco nomine cujus meminit Makrizius. Ea cum antiquitûs apud Alexandrinos observata fuisset, ut aliibi apud

apud omnes Orientis Christianos, jam à quindecim annis intermissa fuerat, cum Muhamedani Christianis insultarent, eosque convitiis & lapidibus incesserent. At Emir Haçaneddoula, is quem Christianis favisse diximus, concessit ut Processio majorum more fieret, addito præsidio militum, ut si ex aliqua domo lapides jacerentur, eam obsignarent, autoreque injuriæ vocarentur in jus: si qui turbæ se immiscerent, ut tumultum vel vim facerent, darentur in vincula. Restitutæ hujus consuetudinis annum assignat 404^{um} Kharagium, eo ipso quo magna annonæ raritas in Ægypto fuit: adeo ut modius farinæ denario & semis venderetur: statimque nova hordei messis tam copiosa fuit, ut publica calamitas levaretur: unde ipsi Muhamedani beneficium divinum precibus Christianorum tribuentes, Processionem fieri quotannis usque ad Autoris ætatem permiserunt. Ea porro fames, non illa fuit de qua horrore plenæ narrationes occurrunt apud Historicos, & de qua dicitur inferius.

Paulò post per calumpniam quidem, sed justo Dei judicio, Christodulus opes magnas quas congesserat amisit, accusatus apud Sultanium à Monacho quodam, qui Episcopatum ambiens repulsus fuerat. Cellâ obsessâ, & à militibus accuratè excussâ, inventum est aurum ad sex denariorum millia, ipse in carcerem ductus, pecunia fisco addicta. Alexandrinis pro expensis ad Ecclesiarum instaurationem quotannis ex constituto aureos trecentos quinquaginta persolvit.

Christodus
lus pecuniis
spoliatus.

Securæ sunt ingentes calamitates à Cometis, ut existimant, qui eo tempore apparuerunt, significatæ: tum etiam lachrymis quas fuderunt, spectantibus non Christianis modò, sed Muhamedanis, B. Mariæ, S. Georgii & S. Michaelis in diversis Ecclesiis imagines. Contigit id anno Kharegitarum 453°. Illius autem anni characterem habemus, quia is est quo ingens terræ motus Remlæ & vicinas urbes vastavit, adeo ut Remlæ perierint hominum viginti quinque millia. Is verò annus secundum Historiam Ægypti fuit annus Hegiræ 459^{um}: atque adeo æra illa quam Autor noster usurpat, sexennio posterior est communi Æra Muhamedanorum. Tanis & multæ urbes aliæ damnum ingens acceperunt: Alexandria immunis fuit. Secuta est gravissima pestilentia, adeo ut ex multis civium Taneos millibus, vix centum superfuissent. Adeo enim omne hominum genus depopulata est, ut familiæ integræ perirent, nemine auxilium ferente: mortui super lectos projecti reperiebantur, domusque patebant, ita ut omnia quicumque vel-

Calamitates
variz.

let, asportaret. Secuta est alia Ægypti Inferioris vastitas, per Cardorum, Turcarumque, qui Milræ & Cahiræ erant ad quinque millia, rebellionem adversus Mustansirum Calisam, duce Abuhali Nassireddoula filio Hamdani, qui, ut refert Elmacinus & alii historici ad an. 460^{um}, cum in Palatio obsedit, pecunias imperans, omniaque cum suis prædatus est. Totam verò regionem El-Rif tam Orientalem quàm Occidentalem, cædibus incendiisque vastaverunt. Christodulus cum ab illis captus fuisset, dirisimè cruciatus est, tandemque liberatus est sub sponsione aureorum trium millium, quorum tertiam partem Abultaib Secretarius Nassireddoulæ ex sua suorumque collata pecunia conflagavit; pro reliqua nomen fecit. Rebelles illi Lowanii vocantur ab Autore nostro, cum Turcæ vocentur ab aliis; qua in gente tot erant diversa nomina, ut facile ad aliquos ex illis istud aliis incognitum referri possit.

Christoduli simonia.

Christodulus Alexandriam veniens, convocatis suis in Ecclesiam S. Sergii, petiit ut necessitatis suæ rationem haberent, pecuniamque conferrent, quâ duo aureorum millia quorum sponsor Abultaib fuerat, solvere posset. Cum multi publicæ calamitatis, rei-que familiaris angustæ prætextu se excusarent, iratus dixit, se ad alios, imò & Muhamedanos ipsos recursurum, à quibus pecuniam fœneraretur. Illi igitur pudore & majoris mali metu, mutuam quanta illi opus erat dederunt, nempe aureorum duo millia, quæ paulò post ipsis restituit, ex infami sua Episcopatuuni nundinatione. Nam quo tempore Alexandriæ substitit, multos Episcopos ordinavit imposito pretio, quantum opus erat, ut nomen suum dissolveret, apud ærarii præfectos: tum etiam annuæ pensioni quæ Alexandrinis debebatur, satisfecit.

Fames dira in Ægypto.

Circa ea tempora fames tanta Ægyptum oppressit, ut incredibilia videantur quæ de ea narrant historici ad annum Hegiræ 359^{um}, eodem scilicet quo terræ motus de quo superius dictum est, Remlam, Tanin, & multas alias urbes funditus delevit, cum eo anno ipso Turcæ qui Nassireddoulæ adhærebant, omnia cædibus incendiisque vastassent. Artaba farinæ octoginta aureis vanebat, ea autem erat mensura modiorum Romanorum trium & senis. Canis quinque aureis vendebatur; feles tribus. Cum Vizirus Abulmukarim ad Mostansirum semel ivisset uno servo à pedibus comitante, neque enim plures supererat qui se movere præ imbecillitate possent, staretque equus illius ad fores palatii, raptus

est à tribus hominibus qui eum mactaverunt ut carne ejus vescerentur. Cumque ob injuriam Viziro factam patibulo affixi fuissent, postmodum reperta sunt carnibus nudata, ossibus tantum relictis : nam consumtis animalibus , non modò cadavera comedebant Ægyptii , sed etiam multi inventi sunt qui pueros & foeminas raptas occiderent , carnemque eorum coctam divenderent. Erant ante diram illam famem in equilibus & præsепiis aulae Calisæ , equorum , mulorum aut camelorum decem millia & ducenta ; ex quibus tres tantum equi supererant. Imò & Mostansirus omnia vasa , aulae , vestes , gazam , gemmas , chrysellina & murrhina vendidit , ut inopiam toleraret ; neque enim in tanta calamitate quidquam ex annuis vectigalibus , redditibusque percipi poterat. Neque solum thesauri immensi quos majores ejus Fatimidæ collegerant , sed etiam supellex omnis regia Califarum Abbassidarum quam Basaliri capta Bagdado ceperat , & quæ exinfecto Tayo , ad Muazzeddoulam pervenerat , distracta est. Aliunt venditas tunc fuisse vili pretio vestes pretiosas octoginta mille. Similiter vendidit Mostansirus viginti mille loricas , gladios ornatos totidem : tandem ipsam gynæcei supellectilem , quæ omnia militibus distribuebantur pecuniæ & cibariorum loco , ne rebellarent : domus ante famem empta aureis nongentis , viginti rotulis , seu libris Ægyptiacis , farina vendita est. Nigris milites Prætoriani mulieres venabantur , secretòque occidebant & earum carnibus vescerentur : atque quodam die unâ captâ quæ pinguis erat , statim clunem unam amputatam vorare coeperunt. Ea mulier indiligentiùs custodita foras erupit ; & re palam facta , Vizirus illos supplicio affecit. Pestis quoque grassata tantam hominum multitudinem absumpsit , ut pauci admodum in Ægypto superessent.

Cum esset Christodulus Alexandriæ , venit ad eum Pamoun quidam cum literis Emiri , quibus jubebat ut eum Episcopum ordinaret : isque simul falsum nuntium attulit de obitu Basilii Episcopi Armeni : ad quam Ecclesiam eum ordinavit , pariterque alium nomine Neckamum Episcopum Louiah constituit. Dimisit eos ad sedes illas , comite ad itineris partem adjuncto Georgio Episcopo Batu , ut eos in Ecclesiarum illarum possessionem mitteret , deinde Epistolam Christoduli deferret ad Regem Nubiæ , per quam rogabat ut aliquâ se pecuniâ juvaret , quâ Viziro satisfaceret. Cumq; ad urbem Armeni pervenissent , Basilium Episco-

Christoduli
literæ ad
Regem Nubiæ.

pum vivum repererunt : virum caritate erga pauperes commendatissimum , adeo ut fame sæviente , ne quidem necessaria sibi reservaret. Pamon in Nubiam profectus est cum Georgio Episcopo Batu ad Regem Nubiæ , à quo cum honore suscepti sunt. Georgius, Ecclesiam quam noviter Rex ædificaverat consecravit ; ibique quatuor altaria dedicavit. Meminit istius consecrationis Abuselah Armenus in Chronico, dicitque eam Ecclesiam ædificatam fuisse à Rege Georgio, qui olim obles à Zacharia patre suo Rege Nubiæ ad Ibrahimum Almamonis Califæ fratrem missus fuerat. Illam itaque ab Salmone, sive Salomone, qui ut ex eodem Autore discimus, tunc regnabat in Nubia, & abdicato regno Monasticam deinde vitam amplexus est, ædificatam, aut saltem renovatam fuisse oportet ; nam idem Georgius si sub Almamone & Mostansiro vixisset, annos plusquam ducentos superasset. In consecratione aquæ ad Ecclesiam benedicendam cum miraculum aliquod apparuisset, hoc enim est quod aiunt descendisse super aquam Spiritum sanctum ; Rex vas ipsum in domum suam asportavit. Postea Christodulo nummorum aliquid in calamitatis suæ subsidium per eos misit. Pamon cum eo in Ægyptum reversus, in quodam pago prope Arment habitavit, Dimocrat appellato. Cum verò Basilii Episcopus obuisset, in ea Ecclesia receptus est anno Martyrum 797°, J. C. 1081°. Ea occasione contentionem habuit cum Episcopo Kus Theodoro de antiquitate & præcellentia. Theodorus enim ab Antonio Episcopo Osiutæ, & Mathæo Faru, accepit testimonium manus eorum subscriptione firmatum, quòd esset antiquior ; quandoquidem Osiutæ Episcopus ante mortem Basilii ordinatus fuerat : Episcopus Arment, nonnisi eo defuncto ab ipso Theodoro in suam sedem introductus fuisset, & ab eo ordinatus. Duravit hæc contentio usque ad Cyrilli qui Christodulo successit Patriarchatum, qui honoris & antiquitatis prærogativam, Episcopo Arment adjudicavit, eò quòd Christodulus manus ipsi imposuerat, antequam Episcopus Osiutæ ordinaretur, & nomen ejus in Episcoporum catalogum relatum fuerat. Quòd autem dilata fuerat ejus in sua sede collocatio & proclamatio, nihil ipsi præjudicabat quominus ordinem temporis quo ordinatus fuerat, retineret, & eum qui post eum ordinatus erat antecederet, seniorque Episcopus haberetur.

Contentio
inter Episco-
pos de præ-
cellentia.

Jam de ordinationibus multa dicta sunt, quibus nonnulla addere quæ ad hujus loci intelligentiam sunt necessaria, videtur ne-

cessarium. Ordinabantur Episcopi à Patriarchis, non quòd ab aliis ordinari non possent, modò tres secundùm Canonicam disciplinam, manus ipsis imponerent: sed retinebant id juris & muneris sibi Patriarchæ, maximè ex quo simoniam audacter exercere, Ecclesiæque non expectato plebis & Cleri consensu, pleno jure conferre cœperunt. Itaque tunc manus imponebant, secundùm Ritus in Pontificali suo præscriptos; atque ita ordinati, veri erant Episcopi. Deerat tamen proclamatio in Ecclesia cui Episcopus dabatur fieri solita, quam cum aliis precibus & cæremoniis peragebat aliquis vicinus Episcopus; atque hæc erat, propriè loquendo, *Evangelismus*, ut Græci vocant, ut vulgari- ter apud Autores nostros sequioris ævi *Inthronisatio*. Etsi verò diversi omnino ritus, longeque differentes functiones essent, uno tamen & eodem nomine *Takriz* appellabantur, & illius æquivocationis causâ, inter istos Episcopos certatum est. Nam scire debebant ex suis libris propriis Inthronisationem ab alio Episcopo factam, ordinationem non esse, quæ à tribus Episcopis fieri debet. Potior sanè ratio dubitandi fuisset, de ordinatione facta ad sedem quæ vacare censebatur, & cujus Episcopus vivebat. Verùm ea tunc erat rerum hujus Jacobiticæ Ecclesiæ conditio, ut à cano- nicæ disciplinæ observatione longè abessent. Sua verò crimina ut sanctitatis velo tegerent, etiam de istis hominibus Christodulo si- moniaco & Canonum contemptore, tum illo Pamnone qui ad Episcopatum promotus est, vivente legitimo Episcopo, idque com- mendatione Muhamedanorum, miracula referre non erubescunt. Multa etiam de Monachis hujus temporis referunt, qui tunc sep- tingenti numerabantur in variis deserti Monasteriis, atque inter alios præcipuè celebrant Jesum de quo mira narrantur: quòd fu- tura prædixerit, quòd absens multa cognoverit: quòd in fame cibaria multiplicaverit ut pauperibus distribueret, atque alia hujus generis, quæ quidem Autor aut ipse vidisse, aut à fide dignis testibus accepisse se dicit: ex quibus nihil aliud consequi possumus, nisi ex illis etiam narrationibus, quas falsissimas arbitramur, constare traditio- nem apud illos Hæreticos conservatam de sanctitate vitæ Monasticæ, & ejus institutis, de benedictionibus aquæ quales in Ecclesia fieri so- lent, de cultu sanctarum Imaginum, quandoquidem in istis omnibus miraculis semper aliquid intervenisse dicitur illarum religiosarum tradi- tionum quas Ecclesia Catholica conservat, etsi in sanctorum & imaginum cultu, modum sæpè Orientales excessisse videantur.

Alterius omnino generis est historia quæ mox subicitur de Petro Recluso in quadam cella prope Sinjaræ, de quo Autori narravit Iustus Sinjaræus Sacerdos, qui postea in eadem cella vitam Anachoreticam duxit, quod per annos quindecim digitum panniculo involutum habuerit, quem nemini unquam detegeret. Tribusque in extremis constituto Iustus adesset ministerii causâ, tribus ante obitum diebus, post multas preces obtinuit, ut ei digitum ostenderet, visumque ipsi rubentem, quasi recens effuso sanguine tinctus fuisset. Accerserat Sacerdotem quemdam Cabilum Sinjaræum, qui ipsi in Cella diebus festis & aliis Liturgiam celebraret: is semel interrogavit Petrum cur ipse Liturgiam non celebraret; cumque vehementius instaret, affirmans se non amplius reversurum, nisi petitioni suæ satisfaceret, senem illius importunitate victum dixisse: Quod olim in Ecclesia *Hamara* sive rubra Demrowæ sacra faciens, cum ad consecrationem calicis venisset, digitumque ad oram calicis apposuisset, intra se cogitabundus dixisset, *Num id fiet sanguis Christi?* statimque calicem ad labrum usque exundasse, atque digitum ejus quasi recenter effuso sanguine tinctum fuisse, nec tincturam evanuisse. Illum verò ingenti terrore percussum: atque ab illo die digitum involvisse ne quis eam sanguinis notam videret, & à celebranda Liturgia abstinuisse; quod ab illo observatum est ad supremum vitæ diem. Historiam admodum similem legimus in Chronico Abuselâh Armeni, nisi quòd Sacerdotem vocat Abulmeged cognomine Abulmahani, & quòd rem Misræ gestam ait in festo sanctæ Crucis, in Ecclesia Muhallaca. Fortassis eadem narratio est, ad alterum accommodata: sed quidquid de illius veritate statuatur, illud saltem certum, atque indubitatum haberi debet Autores qui talia scribunt, & testimoniis tum suis, tum aliorum à quibus acceperunt confirmant, fidemque sibi haberi volunt, non aliam de Eucharistiæ Sacramento opinionem habere posse, quàm quæ nobis Catholicis communis est cum omnibus Christianis Orientalibus. Miracula multa alia quæ nihil ad rem faciunt prætermittimus; adeo multa-collegit Autor noster *επιλογίας*, si quis unquam plenissimus.

Addit post longam illam à proposito suo digressionem, notas quasdam Chronologicas circa persecutionem quæ tunc in Ægypto Christianos exercuit, & de qua superius dictum est. Nempe clausas Ecclesias asserit jussu Viziri Nazouri Feriâ 6^a, 5^a die mensis Bounæ, sive Bayni, an. 446^o Kharegiorum: apertas fuisse anno

ſequenti 447°, Dominica quæ erat 22 menſis Babæ ſive Paophi: Patriarcham cum in carcerem conjeſtus durifque tormentis vexatus eſt, ſocios habuiſſe Episcopos aliquot qui eodem modo torti ſunt, adeo ut tres mortui fuerint, Iſaac Episcopus Meſilæ; Theodorus Semnudæ, qui Sanutii Patriarchæ nepos ex ſore ſuit: & Georgius Episcopus Khandek.

De Syrorum Jacobitarum in Patriarchatu Antiocheno calamitatibus, paucis verbis ea confirmat quæ in præcedenti vita retulimus, ex Michaele Episcopo Tancos, nempe illos à Melchitis ſeu Orthodoxis oppreſſos, quia principem ex ſua communione habebant; nam Antiochia tunc in Græcorum Imperatorum poteſtate erat; atque ea ratione factum ut plurimi relictâ Jacobitarum ſectâ, ad Melchitas tranſierint. Id autem contigiffe aſſerit anno Martyrum 788°, qui reſpondet anno J. C. 1072°: atque adeo erat annus Hegiræ 465^m. Eundem annum Martyrum componit cum anno mundi 6564°. Is ex vulgato Græcorum calculo eſt annus J. C. 1056^m, magnâ inter utrumque calculum differentiâ: ſed nihil frequentius apud Orientales Autores occurrit, quàm ejuſmodi falſæ ſupputationes, præſertim in æris, quarum apud eos communis uſus eſſe non ſolet. Nulli enim annos ſupputare ſolent ab Orbe condito, tam in hiſtoria quàm in Actis publicis præter Græcos, & qui eos ſequentur Ruſſos & alios Græci ritus, apud quos omnes, 1^m annus J. C. numeratur 5509^m ab Orbe condito, ut videre eſt apud Leonem Allatium Diſſertatione de Græcorum Hebdomadibus. Syri omnes Melchitæ, Jacobitæ & Neſtoriani annos numerant ſecundum Æram Alexandri: Ægyptii, & Æthiopes uſurpant Æram Martyrum ſeu Diocletiani. Quantopere verò Autor noſter erraverit, hoc argumento demonſtratur, quod eodem anno Martyrum 788° assignat primam Albarſani in Syriam expeditionem: at ille Togrulbego patruo ſucceſſerat anno Hegiræ 455°, qui erat J. C. 1063^m, Martyrum 779^m. Expeditio autem adverſus Græcos ejuſdem Albarſani reſertur ad annum Hegiræ 463^m, J. C. 1070^m, Martyrum 786^m: ſequenti verò mortuus eſt.

Verùm quia longior hujus hiſtoriæ ſeries, diuturnumque Moſtanſri regnum ingentem rerum Orientalium mutationem complectuntur, antequam ad reliqua pergamus, initia Imperii Seljukidarum explicanda ſunt. Familiz illius ut & aliarum diverſarum quæ regna ampliſſima fundaverunt origo, ex Turqueſtania ſu-

Res Antio-
chenæ.

Initia Seljukidarum familiae.

Elm. p. 271.

Abuſarung.

p. 222. 226.

Un Cong. Fam.

877. f. 353.

periore fuit, atque ex ea regione quæ *Defchi* appellatur. *Dekak* apud Bigou Turcarum principem prima militiæ tyrocinia posuit : magnamque apud eum auctoritatem consecutus est. Seljuk filius à quo familia nomen accepit, in eadem dignitate inter Turcas vixit, patrisque exemplo, qui primus ex ea gente Muhamedismum professus esse dicitur, sectam illam amplexus, Michaellem filium reliquit, patrem Togrulbegi, sub Mahmudo Sebeektekini filio Gaznewida, Chorasana præsidio relictus, obedire noluit, unde in vincula conjectus, copiis ejus Turcicis in Chorasana manentibus. Mortuo Mahmudo, Masshudus ejus filius illas aggressus est, cum jam obiisset Michael : sed Togrulbegus istius filius post aliquot prælia, demum victor eam provinciam obtinuit. Tandem postquam prosperè ubique illi omnia successerunt, in Yracam tetendit, quam tunc ultimi è Bowiadarum familia principes ægrè retinebant. Bagdadum occupaverat Abulharet Arslan cognomento Basasiri Turca, qui non modò Bowiadas exturbaverat, sed ipsum Calisfam ea urbe expulerat, ejusque opes, domum, suppellectilemque diripuerat. Nec his contentus, Kayemo Calisfæ dignitatem abrogaverat, adeo ut in ejus contemptum Bagdadi oratio in Mescchitis facta fuerit, nomine Mostansiri Calisfæ Fatimidæ, quod etiam alibi fieri jussit Basasirius, ubicumque auctoritatem habebat. Calisfa Kayemus, in illis angustiis constitutus cum Haditam se recepisset, audivissetque Togrulbegum profiteri sectam Sunnitarum quæ Abassidis favebat, eum hortatus est ad Bagdadum liberandam. Per annos aliquot pugnatum est, tandemque Basasirius occisus. Calisfa reductus Bagdadum, omnia Principatus insignia Togrulbego contulit, apud quem suprema potestas residebat, Calisfa nihil, præter honores & titulos supererat. Ita extinctis Bowiadis, non melior Califarum conditio fuit, nisi quod in vastis illis Provinciis quas Togrulbegus obtinebat, spiritualis eorum auctoritas agnosceretur, sublata Fatimidarum memoriâ, qui in plerisque Yracæ urbibus proclamati tanquam legitimi Pontifices fuerant. Obiit Togrulbegus, qui primus Seljukidarum Principum numeratur anno Hegiræ 455°, J. C. 1063°, de quo multa leguntur tum apud Historicos qui de rebus illius familiæ singulares libros scripserunt, & multi sunt, tum apud Ebn Chalicam, Elmacinum, Abulfaragium, Ebn Chacna & alios multos, necnon apud Autores Persicos, ex quibus plura excerpere non patiuntur limites istius compendii.

Successit

Successit Togrulbeg, nepos ex Davide fratre Albarflan, ut Auctor Historiæ Ægyptiacæ pronuntiandum monet, qui à Califa iisdem honoribus cumulatæ principatum obtinuit. Nullam prolem Togrulbegus reliquerat, quod ipsi commune fuit cum plerisque aliis novorum principatum auctoribus, sicut initio historiæ suæ observavit Makrizius, *Deo*, inquit, *non sinente ut imperium cædibus & rapinis partum, filiis transmitterent*: quod exemplis Sultanorum Bowiadarum, & multis aliis confirmat. Albarflan summam autotitatem cum armis stabilivisset, debellatis aut ad obsequium compulsis omnibus Sultanis tam ex Bowiadis, quàm reliquiis Hamadanidarum & Mardasidarum qui urbes aliquas occupabant, Togtulbegi exemplo sustulit omnem Fatimidarum Ægypti memoriam, eosque velut hæreticos haberi voluit. Albarflansis è contrario reverentiam omnem exhibuit, ita tamen ut titulo tenus regnarent, publica pecunia, copiæ, duces, arces in sua potestate essent. Ita reviviscere quodammodo coepit saltem quantum ad religionem, Califarum dignitas, nam Seljukidæ semper eximii illorum cultores fuerunt. Albarflano inter alias summo honori fuit victoria de Romano Diogene, qui ab eo captus & libertati restitutus est, de quo Curopalates, Zonaras, & alii; sed ita ut jejune admodum tam de Atabibus quàm de Christianis loquantur. Magna etiam hoc loco est inter ipsos Muhamedanos diversitas: cum plerique scribant, paucos admodum milites Albarflano superuisse: alii copias à Romano defecisse, atque adeo illum facile ab hostibus circumventum fuisse scribant, quæ Autoris nostri sententia est. Narrat præterea Albarflanum, sexcenta equitum millia habuisse præter alias copias, Edeßamque longa obsidione fatigasse: civibus tamen strenuè ferociterque resistētibz obsidionem solvere coactum; postquam Romanum Diogenem in Armeniam penetrasse audivisset. Ait fuisse tunc numerosos Edeßæ Armenos 8000, Syros 20000, Græcos 6000, Francos 1000: sed de ea obsidione vix quidquam alibi legitur. Perit Albarflan occisus à Josepho quodam Chowarezmo, ut refert Elmācinus; cui omnes firmè consentiunt. Cum enim eum occidi & torqueri jussisset, quatuor palis alligatum; Josephusque in atrociam adversus Sultanum verba prorupisset, quod sui similem tali morte afficeret, solvi jussit, & sagittā petiit; cumque aberrasset, quod nunquam ipsi antea contigerat, cultro petitus est à Josepho irruente; & ex vulnere obiit. Hæc sunt quæ ad Albarflanum pertinent,

K k

Elmag. p. 217.

quæ aliena sunt ab Ægypti historia, sed quæ tamen ad eam quodammodo referuntur, cum à Seljukidis eversum sit in Yraca & Syria Fatimidarum imperium. Nam omnes ferme Duces qui in eorum clientela erant, ad Califæ Abbassidæ obedientiam spiritua-lem reducti sunt, Togrulbego, ut etiam Albarisano sacramen-tum dixerunt. His quoque temporibus recessere ab Mostansiri obedientia, & fidelitate Arabes Africani, Autore Muazzo filio Badis-Senhagita, qui tempore Hakemi Africæ Præfectus fuerat sub Fatimidarum clientela; constitutus anno Hegiræ 407°; sed ad Ca-lisarum Abbassidarum fidem reversus, adversus Fatimidas rebella-vit: mortuus est anno 454°, cum toto illo tempore provinciam gubernasset. Ita quassata undique fuit Ægyptiaci regni potentia, & ipse Mostansirus titulum principis, potestatem nullam habebat, Viziris omnia pro arbitrio administrantibus.

Obiit Albarisano anno Hegiræ 465°: Kayem Califa biennio post, nempe anno 467°, cum titulum illum sustinuisset annis ferè 45. Successit ipsi Abdalla Abulcacem Mustadis, ipsius ex filio ne-pos, 27^{us} Abbassidarum, qui principatum tenuit usque ad annum 487^{um}. Fames illa ingens de qua dictum est, incidit in annum 459^{um}, cum arderent Syria & Yraca bellis & incendiis, totamque Seljukidæ obtinerent. Rebello Nassireddoulæ Hamadanidæ adver-sus Mostansirum anno 460° secuta est; atque his ita constitutis intelligitur quantis simul malis Ægyptus conflictata fuerit.

Verum non leve periculum evasit Ecclesia Jacobitica eo tem-pore quo Nassireddoula totam Inferiorem Ægyptum obtinebat; nam Sacerdos quidam Monachus Patriarchatum ambiens ab eo obtinuerat, ut cum Alexandriam venisset, se Christoduli loco constitui juberet. Verum is Monachus nomine Abu Yacoub obiit; antequam Nassireddoulas venisset. Neque Ægyptus con-quievit, donec Nassireddoula profligatus est, ab Emir Elgiouche, sive summo exercituum Præfecto, qui tunc erat Bederegemal, is ipse qui Vizirus Mostansiri fuit, vir nequam, crudelis, docto-rum hominum hostis, unde multos occidit, atque inter alios, Cherisum Heidaram ob inimicitias privatas anno 462°: sed diro supplicii genere, vivum quippe excoiri iussit. Cum ille Mostan-siri nomine multa adversus Duces qui in Syria rebellaverant bel-la gessisset, venit Misram, multamque ibi eorum qui Nassired-doulæ pa-tes sequebantur, cædem fecit: anno 463° haragiorum, ut ait Autor noster, 463°. At in Historia Ægyptiaca vestem Viziri sus-

cepisse dicitur anno 468°. Annum 463^{um} secundum supputationem suam Autor noster comparat cum anno Martyrum 790° : is autem est annus Hegiræ 467^{us}, incipiens à mensis Augusti die 26^a ; atque adeo differentia temporis exigua est. Statim Bederelgemal Turcas seu Lowanios in Inferiore Ægypto aggressus, regionem ab eorum tyrannide liberavit, quæ tanta fuit ut incolis agros ferere non liceret : ipsi aggeribus, Nili aquam in propria sata diverterent, canales ad eam derivandam fieri prohiberent : atque ita annonam incendebant, ut frumenta quæ collegerant, quo libebat pretio venderent. Lowanii in Thebaidem se receperunt, ubi in Monasteria crudelissimè grassati, pleraque spoliaverunt, magnamque Monachorum multitudinem occiderunt, reliquis in Inferiorem Ægyptum fugientibus. Occisus est autem Nasreddoula, anno Hegiræ 465° ; Hegiræ, quem Helialium Autor noster vocat, 463°. Kharagio, manu Begdekouri Turcæ inter suos primarii, cujus filiam duxerat, in urbe Misra, corpus ejus in frustra concisum, & per regiones ad ludibrium missa ejus membra. Fratres ejus pariter occisi, atque ita periit Hamadanidarum familia. Ita plerique Historici, qui Bederelgemali adventum in Ægyptum ad annum sequentem referunt. Extincto illo rebellium duce, qui totam Mostansiri autoritatem usurpabat, omnis rerum Ægyptiacarum facies mutata est, fames levata, cuncta in antiquum ordinem restituta sunt, nisi quod Viziri inde cœperunt omnia per se administrare, ita ut potestas nunquam ad Califas rediverit. Nam Viziri dignitas occupata per vim ab illis est, qui plurimum pecuniâ aut gratiâ apud milites valebant : de ea certabatur, absque Califæ consensu, qui victorem confirmare cogeatur. Atque res eo in statu fuerunt, donec Salaheddinus post patrui Chiragouæ mortem Vizirus salutatus, Fatimidas ejecit, regnumque obtinuit.

Compositis hunc in modum rebus Ægypti Bederelgemal summus militiæ Dux, simulque Vizirus, ex Sahid sive superiori provincia rediens, reperit hominem quemdam nomine Hali Elkossi, qui hanc de Christodulo Patriarcha calumniam, detulit, Eum misisse Metropolitam nomine Victorem in Nubiam, qui Meschitam ejus jussu evertisset : tum Metropolitam Æthiopiarum Kouril, sive Abdoun, tam familiariter cum Muhamedanis vivere, ut quotidie apud eum comessarentur, vinumque biberent. Vizirus scriptis statim ad filium qui in Sahide erat literis, Christodu-

Res Æthio:
pica.

lum comprehendi jussit, & in custodia haberi, donec è Nubia rediisset Hasameddoula ab eo missus, ut rei veritatem cognosceret. Compertâ Kofii calumniâ, adductus ille est coram Viziro, & morti addictus: Patriarcha liberatus est. Atque inde intelligi potest in Nubia Muhamedanos fuisse, quamvis plerique Nubæ nativi Christiani forent. Nam ipso nascentis Imperii Saracenici principio, anno scilicet Hegiræ 31°, J. C. 651°, Abdalla filius Sahid regionem ingressus, tributariam illam fecit, ut narrat Historia Saracenica.

E/m. p. 31.

Res Æthio-
picæ.

Quantum ad res Æthiopæ, Christodulus ad Viziri Tribunal adductus negavit Abdounem istum qui pro Metropoli se gereret, ordinatum à se fuisse, & manus impositionem vel auctoritatem per literas à se scriptas unquam accepisse. Verum cum de eo audivisset, destinasse Mercurium Episcopum Wifsim qui in Æthiopiam proficisceretur, cum una ex vestibus Patriarchalibus, & Schemate seu habitu Monastico, quibus Abdounem indueret, simulque Metropolitam constitueret. Nempe quantum conjicere possumus, cum audiisset esse in Æthiopia, qui Metropolitæ auctoritatem usurparet, opportunius judicavit, ad majora mala fugienda, ut dignitatem illi, quasi apud populares accepto confirmaret, quam ut Æthiopes qui per multos annos, ut supra dictum est, sine Episcopis & Sacerdotibus fuerant, absque pastoribus relinqueret, cum periculo extinguendæ in illis provinciis Christianæ religionis. An verò Abdoun Laicus, aut simplex Sacerdos fuerit, qui se Metropolitam simulaverit, atque adeo Episcopales omnes functiones, quamvis ordinatus non fuisset: an verò Episcopus, qui in totam illam Ecclesiam jus quale Metropolitæ habebant, usurpaverit, cum Autor noster in obscuro relinquat, affirmare non possumus. Prius videtur verosimilius: hujus enim temeritatis occurrunt exempla superius allata, præcipue in vita Cosmæ Patriarchæ 58°, sub quo discipulus Petri, qui ab eo ordinatus fuerat, & ab Æthiopum rege decepto per falsas literas pulsus, coactus est Metropolitæ munus gerere, quamvis ordinationem non accepisset. Nam si aliter historia intelligatur, adeo ut Episcopus Wifsim missus cum ornamentis Metropolitæ propriis ad illum ordinandum fuerit, peccavisset gravissimè contra Canones Christodulus, cum Episcopus à tribus necessario ordinari debeat.

Jussit Vizirus proficisci in Æthiopiam Mercurium Episcopum Wifsim, simulque legatum qui Kenazeddoulam quemdam ducem

repeteret ex Ægypto profugum. Is enim cū ante Viziri ex Syria adventum in Sahide superiori omnia incendiis, rapinis, cædibusque vastasset, jamque resistere non valeret, in Nubia asylum quaesiverat. Eum Nubiæ Rex Hassameddoulæ tradidit, à quo in Ægyptum ductus, Misræ occisus & patibulo affixus est. Vizirus deinde Christodulum in honore habuit, Christianisque tranquillitas, & libertas plena restituta est.

Compositis intestinis Ægypti motibus, pacatæque Syriæ, Caravanæ liberis jam itineribus, ex Oriente, Africa, aliisque vicinis provinciis commeari cœperunt. Sub finem vitæ Christoduli, Jacobitarum Antiochenus Patriarcha constitutus est Joannes, nepos ex sorore Joannis alterius cognomine filii Abdoun, de quo mira multa narravit in præcedenti vita Michael Episcopus Tancos, missus ad eum cum literis Sanutii Patriarchæ Synodicis. Ad Joannem illum juniorem literas scripsit Christodulus, per quas significabat, quanta mala passus fuisset, quàm graviter multatus, cū aureorum plusquam centum millia ab eo fiscus extorsisset. Rescripsit Joannes Antiochenus, & prudentissimè commonuit, sibi qui Apostolorum successores essent, imitandam esse eorum paupertatem; atque ipsius etiam Christi Domini, cujus, cū in tertis esset, Discipuli panem ex eleemosynis comederunt: nullas pecunias habuit: una veste omnes contenti, adeo pauperes fuerunt, ut Joannes ipse dilectus discipulus, Ephesi balneatori locaret operam. Paulò post obiit idem Joannes Patriarcha, in cujus locum successus est Basilus, qui anno uno tantum superstes fuit, & mensibus sex. Hac de causa cū Synodicam Epistolam ad Alexandrinos non misisset, nomen ejus in Diptychis ad altare commemoratum non fuit; sed ex consuetudine facta memoria decessoris ipsius. Postea cū bellis continuis Oriens vexaretur, accedente etiam Jacobitarum Antiochenorum dissensione, vacavit diu sedes Antiochena illius sectæ; donec tandem congregati Episcopi aut Metropolitæ triginta quatuor in Monasterio Barloma, elegerunt Patriarcham nomine Lazarum, qui Dionysii nomen in ordinatione accepit. Scripsit ille Synodicam, quæ allata fuit ad Cyrillum Christoduli successorem, à Sacerdote Syro Thoma, qui cū Autor hujus vitæ scriberet, erat Episcopus Bagdadensis.

Litteræ ad
Antiochenos.

Joannes plurimos fuisse qui apud Antiochenos Jacobitas Patriarchatum obtinuerint, ex eo loco aliisque Orientalium monumentis docemur: adeo ut in Codice Liturgico Syrorum sectæ illius plu-

Res Antio-
chena.

res occurrant nomine Joannis, quas perperam nonnulli scriptores, aut Romanæ editionis Missalis Chaldaici inspectores Chrysostomo attribuerunt. In codicibus manuscriptis nominantur inter alios Joannes Magnus, à quo Anaphoram sive Liturgiam habent, ex variis antiquioribus concinnatam, additis ad marginem Autorum nominibus; unde etiam Liturgia Doctorum sanctorum appellatur. Joannes autem qui magnus vocatus fuerit, nullus videtur esse, nisi is de quo tam multa prodigiosa narrant. Neque enim veteris illius Joannis qui cum Orientalibus tam multas adversus Cyrillum turbas excitavit, Jacobitæ qui Cyrilli se discipulos ad nauseam usque prædicant, in honore habent. Sunt alii Joannes de quibus præter nomen & dignitatem nihil scimus; alius qui scriba & Accemetus dictus est, qui fuit Patriarcha; alius cognomento filius Maadni, de quibus nihil huc usque nobis occurrit.

Consuetudo quoque observata de non commemorandis ad altaria illis Patriarchis, qui Synodicas literas ad Alexandrinum Patriarcham non misissent, antiquissima est in illis Ecclesiis, & ejus extant exempla longè plurima. Sed an memoria Antiochenorum Antistitum in omnibus per totam Ægyptum Ecclesiis fieret, an verò in sola Patriarchali Alexandrina dubitari potest, quandoquidem in nullis quos unquam viderimus Codicibus scriptis, occurrat ista Antiocheni commemoratio, in Ægyptiacis; aut Alexandrinis, in Syriacis Jacobitarum.

Monasterium Barfomæ.

Monasterium Barfomæ non longè à Malatia situm erat in monte, ut testatur Yacutus Hamatæus in Opere suo Geographico: & ad illud magnus erat concursus Christianorum, ex Romania, Diarbekera, & Syria, ut idem testatur, verum intellige Jacobitarum, qui vota facerent: præsertim Mercatorum quos Autor Mirabilium sæpè audivisse testatur, sancto Barfomæ partem lucri sui videntes, si merces suas tanti vendidissent. Inde Monachis qui in eo loco plurimi erant, proventus non mediocris: nam Hafif Mergita apud eundem Autorem de quodam Mercatore narrat, vovisse illum daturum se sancto Barfomæ drachmas argentæas quinquaginta, si merces quinque millibus drachmis emtas septem millibus venderet; quod cum esset consecutus, bona fide votum exsolvisse. Adjungit Autor idem, Monachos quotannis aureos decem mille Imperatori Græcorum persolvisse: nempe quia Jacobitæ erant, tributum illud grave ipsis imponebatur.

PATRIARCHARUM ALEXANDRINORUM. 447

CHRISTODULUS
Patr. LXVL

Vulgaris quoque apud Muhamedanos error est Barfomam Apostolorum fuisse temporibus, quod Yacutus prodidit. Convenerunt in eum locum Jacobitæ ad eligendum Patriarcham, quia, ut suprâ dictum est, locus erat Malatiæ vicinus, ubi major eorum multitudo fuit, cum Antiochiæ ab aliquot sæculis Patriarcha illius sectæ habitare non sueretur: & Malatiæ ob Romanorum sive Græcorum viciniam liberi non essent.

Thomæ quoque illius, qui postea factus fuisse dicitur Episcopus Bagdadensis, meminit Hystoria Catholicorum seu Patriarcharum sectæ Nestorianæ in vita Mar Chebarjehua Catholici 65ⁱ cui cum illo Thoma dissidium fuit, ob cuiusdam Jacobitæ nuptias cum muliere Nestoriana.

Plura de Christodulo non referuntur, nisi quòd diem suum obierit die Sabbati 14^a Cohiac, anno Martyrum 794^o; sepultusque fuerit in Ecclesia S. Mariæ Muhallaca Misræ in regione Castri Elchemah; unde postmodum translatus est in Ecclesiam S. Macarii Monasterii Vallis Habib. Annus Martyrum 794^{us} respondet anno J. C. 1078^o, qui erat annus Hegiræ 471^{us}. Consecutus in eodem anno Martyrum assignando Elmacinus: qui pariter triginta annos Pontificatus illi tribuit, & ejus initium anno Martyrum 764^o. Aliter Canon apud Abulbircat: nempe anno 761^o ordinatum scribit, sedisse annos 30, menses 11: obiisse 4^a Cohiac anno 792^o. Makizius ordinatum anno Hegiræ 439^o. Is est J. C. 1047^{us}, Martyrum 763^{us}: cumque sedisse quoque asserat eum annis 30, non longè abit à vero calculo.

Elm. p. 279.

De eodem Patriarcha apud Makrizium legitur eum duas Ecclesias Misræ seu Cahiræ ædificavisse, alteram S. Mercurii: alteram B. Mariæ in *Haret-el-Roum*, seu *Vico Græcorum*, ubi Patriarchium, sive ædes ad Patriarchæ habitationem commodas adjunxit, ut ait Autor Chronici. Hujus Ecclesiæ ut etiam alterius meminit Makrizius in descriptione Cahiræ, easque suo tempore, hoc est ante annum 840^{um} Hegiræ, J. C. 1436^{um} quo mortuus est, solas illas Jacobitæ obtinebant.

Annus quo obiit Christodulus, Hegiræ scilicet 471^{us}, erat Mustansiri Califæ Egyptii 43^{us}: sextus verò ex quo regnare coepit Gelaeddinus Melikfcha tertius ex familia Seljukidarum, Albarlsani filius: vir inter maximos Muhamedanorum principes numerandus. Is vivente patre, Remlam, Hierosolyma & alias Palestinæ urbes expugnaverat, pulsus diversarum familiarum Re-

Res Muhamedanæ.

gulis, qui inclinatis Fatimidarum Ægyptiorum rebus illas occu-
paverant : quod etiam fecerant homines novi non pauci ex Tur-
cicis, Kurdis aliarumque gentium mancipiis, qui militiâ clari,
audacesque ex imbecillitate Sultanorum facti, varios principa-
tus fundaverant. Illi Bowiadis, quamdiu Iraca potiti sunt, ob-
sequium præstabant, modò his, modò illis, prout belli fortuna
ferebat : modò Califas Abbassidas agnoscebant; modò Ægyptios,
tandemque omnes coacti à Togrulbego, aut Albaraslano Fatimidis
renuntiaverunt : Sacramentumque Abbassidis dixerunt, ita ut in
Seljukidarum clientela forent. Ea autem tunc communis quo-
dammodo lex observabatur, ut singulæ Præfecturæ Ducem habe-
rent, *Emirum* appellatum, qui ut olim apud nos, & nunc in Ger-
mania, supremam potestatem unam agnoscerent, ad fidelitatem,
obsequia, bellicasque expeditiones tenerentur, sed in suis quisque
urbibus & provinciis omnem rerum civilium & militarium habe-
rent auctoritatem. Sæpè etiam ex principum beneficio dignitates
illæ ad eorum posteros trans mittebantur. Califæ quidem desere-
batur jus solennium precum, ita ut ejus nomine publica oratio
in Meschitis fieret : postea nomine Sultani Seljukidæ, utriusque
nomen monetæ imprimebatur. A Califis Sultani instituebantur,
hoc est accipiebant ab illis, vestem, birrum, vexillum nigri colo-
ris, qui apud Abbassidas sacer : ensen, torquem, armillas, & di-
ploma Investituræ : à Sultano inferioris ordinis principes auctori-
tatem accipiebant ; tantaque tunc fuit Seljukidarum potentia, ut
longè ultra Oxum prolati Imperii finibus, quidquid regionum
usque ad Ægyptum interjacet, possiderent.

Melikseha
Calendarium
reformat.

Inter alia quæ Melikseha magna cum laude sua instituit, commen-
datur præcipuè reformatio Calendarii, secundum quam congregatis
Astronomis, Neuz seu principium anni Persici constituit incunte
sole signum Arietis. Ea est celebris apud Orientales Astronomos Epo-
cha *Gelalea*, seu *Melikea*, ita dicta à Rege qui Gelaleddin, & Me-
likseha appellabatur. Hujus initium Ulugbegus, cujus opusculum
Persicè & Latine editum est à Joanne Gravio viro doctissimo, du-
pliciter numerari affirmat, nempe ab anno Hegiræ 468°, vel ab
eiusdem Æræ 471° : cujus diversitatis causam ignorare se fatetur.
Nobis illa videtur fuisse quòd anno 468° observationes Astrono-
micæ factæ fuerint ejus jussu, & favente Nezamelmolx Viziro,
summæ auctoritatis & doctrinæ viro, ut testantur Historici : Epo-
chæ verò initium datum fuerit eo anno quo factis, & comparatis

tis

PATRIARCHARUM ALEXANDRINORUM. 449

tis observationibus, primo die mensis, sol meridie Arietis signum ingrediebatur : at is fuit annus Hegiræ 471^{us}, J. C. 1178^{us}. Tabulas annorum expensorum cum aliis addidit idem Giavius.

CYRILLUS PATRIARCHA LXVII.

CYRILLUS
Patr. LXVII.

STATIM istius vitæ initio luctari oportet cum Historico, qui Seorum oblitus quæ superius dixerat, dum quamdam Chronologiæ suæ *αιασιφαλαίων* facit, turbat omnia. Rursus enim de fame Ægyptiaca verba faciens, eam refert ad ultima Christoduli tempora, iterumque de Viziro simulque exercituum Imperatore Bederelgemalio scribit ea quæ ad annos à nobis designatos pertinent, nullo modo ad finem vitæ superioris Patriarchæ. Septem porro annis integris durasse calamitatem testatur, cum etiam posteaquam Nilus ad justam mensuram exundare coepit, & Respublica conqueivit pacata à Turcis, Lowaniisque Nassiredoulæ addictis; tanta fuit tamen hominum paucitas, consumtis per famem securamque pestilentiam multis millibus, ut vix qui terras colerent reperirentur. Augebat malum, segetum raritas, adeo ut non esset unde seminaretur terra : inde passim in areis & apothecis granariis pulverem eraserunt, seminaveruntque in novalibus, unde orta sunt omnium granorum genera, creveruntque simul triticum, hordeum, faba : quæ postea semina discreta & reservata sunt. Hæc autem & alia ejusmodi quæ suis annis assignavimus, malè ab Autore nostro referuntur ad ultima Mostansiri tempora, cujus anno 41^o mortuum affirmat Christodulum, errore ut supra observavimus, biennii. Neque ille annus ad ultimos ejus referri poterat, cum ab anno 41^o adhuc decem & novem annis superstes fuerit : at solis supervixisset septemdecim, si ex vera Chronologia mors Christoduli assignetur anno ejus 43^o : regnavit autem Mostansirus annos sexaginta, & is de quo mox dicendum erit Patriarcha, eo supervixit diem suum obiit.

Historici hujus vitæ fuit Chronologia.

Post mortem igitur Christoduli electio ad Clerum & Primores Kahiræ pertinebat, simulque ad Monachos S. Macarii : de quibus huc usque nihil occurrebat, quo doceremur eos in Comitibus Patriarchalibus suffragii jus habuisse, nisi quòd ante primores Laicorum consensus eorum scriberetur : multò minùs quòd in eo Monasterio ad electionem conveniretur. Est quod existimemus congregatos illic fuisse Episcopos, & alios potius quàm Misræ, seu

Electio Cy-
rilli.

Kahiræ, ut liberius consultarent, neque quod Nassiredoula semel, & Vizirus Bederelgemal aliquando cogitaverant, cogerentur ad aliquem ordinandum qui pecuniâ, aut pravis artibus hanc dignitatem ambiisset? Profecti sunt igitur ad S. Macarium Episcopi multi, atque inter eos Cosmas Episcopus Nyssæ: Joannes Saca, cognomine Ebn Talem: Marcus Busrinos: Mercurius Messila: Gabriel Besta, quæ est Khandek: Chail Katour, Theodorus Khartaba: Georgius Antowa: Joannes Athribæ: Marcus Balinæ: Petrus Behnese: Macarius Kis: Mennas, alique Episcopi: tum ex Misra Sacerdotes multi & Alexandrini non pauci, cum Misræ civibus. Ibi menses duo integri consumti sunt, antequam de Patriarchæ electione consentirent. Prolixa hoc loco narratio occurrat, qualiter Monachum quemdam sanctitatis opinione celebrem multi postulaverint, adeo ut Episcopi, cum Monachorum turba, & Cherouto Archidiacono S. Macarii venerint ad Monasterium Abu Kema, ut illum si renueret electioni consentire, secum vel invitum abducerent. Isus seu Jesus vocabatur, nisi fortè *Iustus* legendum est, quod nomen altero magis commune; præsertim apud Ægyptios, qui alterum rarò suis hominibus imponunt. Ille cum multis lacrymis, pectus lapide percutiens, eos rogavit ne se ultra fatigarent, maximè cum ipse libertinus esset, quem ordinare Patriarcham non licebat. Monuit quoque ne frustra laborarent querendo Macarium Monasterii Oeconomum, qui fugam arripuerat. Sed esse inter ipsos Georgium Monachum tali munere dignissimum, de quo Christodulus olim cum Reja Sacerdote loquens prædixerat, fore ut sibi succederet: semelque digito frontem ejus signavisse, dixisseque ei Copticè, Ungo te: nempe ut recto stet fabula talo, simoniacos illos Antistites semper quasi prophetas, miraculorum gloriâ sublimes repræsentare oportuit. Itaque Georgius omnium consensu electus est & Misram deductus, electioque communi omnium consensu confirmata est. Mox Alexandriam ivit; mutatoque nomine Cyrillus appellatus, ordinatus est 22^a mensis Phameno, anno Martyrum 794^o, tribus mensibus post Christoduli obitum: quamvis Abulbircat utrumque assignet anno 792^o. Elmacinus Autori nostro concordat, adjicitque ordinationem factam Dominicâ Palmarum. Postea Misram deductus est, Jacobumque ejusdem urbis Episcopum misit ad Abulfadelum Jahiam Abrahami filium, qui Divani præses erat. Ab eo missi ex aulico ministerio, qui eum cum pompa deduxerunt:

& cum Kahiram seu urbem novam advenissent, præcedentibus qui psalmos & hymnos canerent, ad Palatium deductus, Mostanfirum salutavit, qui matrem sororemque adesse jusserat. Erat coram eo unguentorum copia, quibus honoris gratiâ Patriarcha perfusus est: tum jussus Principi & ejus domui benedicere, formulam precationis legi jussit à Petro Episcopo Demkiræ ante aula januam, deditque benedictionem. Eodem modo Emirum exercitus, qui etiam Vizirus erat, Beder-el-Gemalum salutavit; atque illi data benedictione, fausta omnia precatus est. Aderat urbis Præfectus, qui à Viziri aula cum honorificè deduxit usque ad Ecclesiam B. Mariæ Muallacam, ubi proclamatus est, more majorum; & paulò post in Ecclesiam *Haret-el-Roum*, seu Vici Græcorum, Mariæ Virginis nomine dedicatam. Statim juxta consuetudinem reliquos majoris hebdomadæ dies transegit in Monasterio D. Macarii, ibique Chrisma consecravit Feriâ v^a in Coena Domini: ubi etiam miraculum ejus sanctimonix indicium dedisse asserunt, nempe quòd Chrisma in manibus ejus exundaverit, adeo ut in altare effusum fuerit.

Anno sequenti Martyrum 795°, J. C. 1079°, Thomas Sacerdos Syrus, de quo antea dictum est, attulit Synodicas literas Dionysii Jacobitarum Patriarchæ Antiocheni, ejus, Metropolitatum, Episcoporum, Sacerdotumque nomine ad Christodulum scriptas, quem cum mortuum reperissent, eas Cyrillo reddiderunt, substituto ejus nomine. Lætæ illæ in Ecclesiis fuerunt, nomenque Dionysii Diptychis insertum, & ad altaria in publicis precibus commemoratio ejus facta est: rescriptique ad eum Cyrillus. Manebat ipse plerumque prope Ecclesiam S. Michaelis Mistræ, *Muclara* dictam, in vicina cellula: designabaturque sedem transferre in El-Rif sive inferiori parte provinciae. Verùm id facere non potuit ob frequentes ex Nubia & Æthiopia legationes, tum quòd Sultanus sæpissimè eum advocabat.

Res Antiochenæ.

Anno 2° postquam Patriarcha renuntiatus est, Salmon Rex Nubiæ abdicato regno, & in Georgium nepotem suum ex sorore translato, vitam Monasticam amplexus est; utque facilius Deo vacaret, recepit se in Vallem Abunefer, sive S. Onusii appellatam, ubi erat Ecclesia sub ejusdem sancti invocatione. Distabat locus tridui itinere à Nubiæ finibus; ab Asowana decem dieris. Est autem Asowan extrema Ægypti superioris urbs, Nubiis contermina, ut scribunt, Abulfeda, Makrizius, Yacutus & multi

Res Nubiæ.

aliū, quamque Siensem veterum esse conicit vir doctissimus Jacobus Golius, quia utraque Cataractis Nili vicina erat. Præfecto nuntiatum est esse in vicino deserto Regem Nubiæ: unde missis militibus viginti, eum adduci & Kahiram mitti voluit. Denuntiaverat enim eum frater quidam Kenazeddoula, qui cum adversus Emirum Bederelgemalum malè pugnasset, & in Nubiam fugisset, repetitus ab illo, remissus fuerat à Salmone Rege. Verum cum Misram advenisset, susceptus est cum honore, buccinis sonantibus & tympanis ad ejus honorem pulsatis. Emir us seu Imperator exercituum Bederelgemal eum hospitio commodo, missa supellestili, stragulisque pretiosis excepit; nec ita erga eum omnia humanitatis officia exhibere desit, donec post annum mortuus est Salmon, sepultusque in Monasterio S. Georgii in Khandek. Eadem prorsus de Salmone leguntur in Chronico Abuselah Armeni, qui ea procul dubio ex Autore hujus historiæ transtulerat: nisi quòd quem Asowanæ præfectum alter appellat, alter Thebaidi præfuisse scribit. Docet etiam nos Abuselah, Regem illum vitam solitariam amplexum esse, quia inquebat difficile esse ut Rex, etiam si coram hominibus justus videatur, coram Deo talis esse possit, ita ut neque concupiscentiæ indulgeat, neque sanguinem per injustitiam effundat, aut tandem subditos præter jus & fas non vexet. Docet etiam nos id quod à Salmone factum est, dum sororis filium Regem suo loco constituit, fuisse ex vulgata apud Nubas consuetudine, inter quos non filii, sed nepotes ex sororibus regni hæredes essent, quod etiam apud Barbaros multos in India observatum adhuc fuisse superiori sæculo, testantur Historici navigationum Lusitanarum fere omnes.

Res Æthio-
pica.

Circa eadem tempora Cyrillus ordinavit Æthiopicis Metropolitam nomine Severum, nepotem Victoris, de quo supra dictum fuit in Christoduli vita, sed qui ordinatus fuerat Nubiæ non Æthiopiæ Metropolita; nam Mercurius Episcopus Wissim in Æthiopiam missus est, qui Abdoni, aliter *Koursio* seu Cyrillo, vestem pontificalem deferret. Cum verò tanta sit rerum Ecclesiasticarum, & politicarum etiam illius Regionis obscuritas, ut nihil planè occurrat unde lucem accipere queant; standum est Autorum testimoniis, donec certiora ad nos pervenerint. Severus igitur juvenis, sed doctus, & à Victore educatus, commendatione Bederelgemali Viziri, summique exercituum ducis, obtinuit ut Metropolita Æthiopiæ ordinaretur. Nam præter numera amplissima, & pol-

licitationes aliorum multas, Viziros suasit, fore ut Principes illos barbaros ad obedientiam illius compelleret. Verum cum in Æthiopiam pervenisset, adversarium reperit Kourilum, ipsum, de quo Christodulus testatus fuerat, se neque illi manus imposuisse, neque ullam ipsi auctoritatem dedisse. Attamen cum vir ille nefarius sibi diffideret, convalatis omnibus opibus suis fugam arripuit, & Dahlakam se recepit, ubi à Præfecto comprehensus, Fahiramque missus, capitali supplicio affectus est anno Martyrum 802°, J. C. 1086°. Ex qua narratione patet autorem vitæ præcedentis, aut qui istam scripsit, hallucinari: neque enim Kouril, Sacerdotium absque titulo occupaverat, quando illius ornamenta, & auctoritatem confirmaverat Christodulus, missus, ut in ejus historia dictum est, Mercurio Episcopo Wissim. An verò aliquid ordinationem ejus impedierit, Victorque in eam provinciam ex Nubia vicina transiverit, scire non possumus. Neque enim Ludolphus Autor Historiæ Æthiopice, alios nobis Æthiopie Metropolitas designavit, quam paucos aliquot qui in Missalis Æthiopici Diptycho nominantur, quorumque antiquitas ætate Cyrilli istius, de quo scribimus, superior aliquibus sæculis videtur esse.

Severus postquam ab Æthiopibus cum honore susceptus est, ad mores illorum emendandos adjecit animum, ut ex literis ad Cyrillum scriptis intellectum est. Cum enim multa vitia inolevisse agnovisset, exhortationibus suis tantum profecit, ut multi secundum Christianæ vitæ regulas, ea omnia in melius reformaverint. Inter alia maximum illud communeque crimen fuit, ut plures in contubernio mulieres haberent, legitimarum uxorum loco. Hortando, & comminando se effecisse scribebat, ut Rex concubinis ejectis, uxorem sibi matrimonio conjunctam retineret; consequi tamen non potuisse, ut pellicem ex qua filios sustulerat, dimitteret: verum id satagere ut dissoluto cum legitima uxore matrimonio alteram retineret; quod tamen obtinere non potuisset. Rogabat igitur Severus, ut ad eum, ejus consiliarios, totamque gentem Patriarcha scriberet, quod eos à Polygamia deterreret. Scripsit autem ad eos insignem doctamque Epistolam, quæ si ad nos usque pervenisset, multa fortassis de rebus Æthiopum Ecclesiasticis docere nos potuisset. Verum frustrâ illam fuisse vel ex eo satis intelligitur, quod qui ex Europa primi eam in regionem penetraverunt, Æthiopes in eadem consuetudine perseverantes reperiunt. Testis

Æthiopum
polygamia.

Alvarezius, qui ipse vidit Ababitai quemdam qui tres uxores habebat: Tellezius etiam qui morem illum inveteratum apud Reges fuisse scribit, ut præter uxores plures quasi legitimo matrimonio conjunctas, pellices quoque alerent. Idem scribebat quasi suo tempore adhuc observatum Abuselâh Armenus, qui tamen adjungit, Æthiopes ante Sanutium, quasi ex veteri instituto polygamos fuisse, sed ejus literis emendatos; quod tamen falsò ab eodem Autore creditum literisque commendatum, recentiora testimonia demonstrant. Verùm non omnino effectû caruisse Cyrilli literas, certò agnoscere possumus ex alia non minus perversa consuetudine quàm in Æthiopia Autores modò laudati observaverunt, scilicet quod pluribus uxoribus aut pellicibus conjuncti à communione prohiberentur, nec ad eam admitterentur, donec unâ contenti reliquas abjecissent. Nempe id procul dubio factum, quia plures mulieres nuptiarum prætextu habentes, jussu Sanutius, aut Cyrillus communione privari, qua poena Canonones majorem erga Laicos non agnoscunt: barbara autem illa gens, & in summâ ignorantie tenebris posita, bellè secum agi existimavit, si poenam subiret, nec à peccato recederet.

Epistolæ an-
nua Patr. A-
lexandri-
norum ad Æ-
thiops.

Quamvis autem præter ea quæ à nobis relata sunt, nihil de rebus Æthiopicis apud Autores nostros occurrat, illud quod de Senuda seu Sanutio testatur Abuselâh, fidem facit, non adeo interruptum fuisse inter Alexandrinos Patriarchas, Æthiopesque commercium, quin literæ utrimque commearent, ubi Ecclesiæ necessitas ita postulabat. Idem enim docet olim Alexandrinum Patriarcham bis in anno literas misisse in Æthiopiam ad Abyssinorum Regem, quod fieri desit sub Zacharia Patriarcha 64^o: nempe quantum suspicari licet, ob periculum calumniarum, quasi adversus Rempublicam aliquid moliretur, sub Hakemo, crudeli & fatuo. Hinc factum est, ut jam non ipsi Patriarchæ scriberent; sed quando ex Æthiopia literæ ad eos afferebantur, illæ ad Calisam aut ejus Vizirum mittebantur, qui, si ipsis visum fuisset, eas Patriarchis remittebant, licentiamque rescribendi concedebant, nempe de Jure Ecclesiastico, & rebus Christianorum, super quibus consilium petebatur. Illud autem Calisæ permittebant, ut Muhamedani qui illis in regionibus erant, foverentur, Etsi enim pauci admodum eas adivissent, neque unquam Rex Abyssinorum ab illis bello petitus esset, non aliam fortassis ob causam quàm quòd esset in Africâ quodammodo mediterraneo,

exiguaque quidquid contra scribatur potentia ejus foret, servabat tamen quamdam inter Orientales Principes majestatem. Muhammedani verò negotiandi animo sedes fixerunt in variis locis oræ Barbaricæ, ubi cum illis quos Kafros appellant, aut Zirgeos, Africanis scilicet maritimis, dentes elephantorum, pavonum plumas, aurum, pelles & alia quædam commutabant, tandemque munitis ibidem aliquot mapalibus quæ in magnas urbes, Quiloam, Monbæam, Melindam, & alias evaserunt, totum Æthiopiæ regnum à mari Orientali clauserunt. Ab Aſowana merces maris Indici & Arabici in Ægyptum inferiorem Nilo vehébantur, simulque Æthiopiæ: atque ita institores multi ad Æthiopes proficiscebantur, neque enim segnis illa gens, & ferinæ vitæ assueta, ipsa per se negotiationem exercebat. De paucis igitur illis Muhammedanis Calix Ægyptii solliciti erant; & quos armis non poterant, favore Alexandrinorum Patriarcharum sublevabant. Atque ex illis quæ huc usque observata sunt, manifesta est integra Metropolitæ Æthiopum subjeçtio erga sedem Jacobitarum Alexandrinam, qualis in Canonibus Pseudo-Nicænis Arabicis describitur, & in Collectionibus Ebnassâli, Echmimensis, aliorumque ejusdem sectæ, ita ut neque ipsi Episcopus ordinare liceret, neque Patriarchalia munera ullo modo exercere; adeo ut extra Ægyptum, & ab alio quàm Alexandrino ordinari non posset. Ea verò disciplina non aliis Ecclesiis communis videtur fuisse, nec antiqua, cum adversus instituta majorum fuerit, ut ad servandam Alexandrinæ sedis jurisdictionem, vastissimæ provinciæ quibus multa Christianorum millia continerentur, absque Episcopis, imò Sacerdotibus, & Sacramentis per annos multos relinquerentur, quod in Æthiopia accidisse jam ante ista tempora, monuimus. Propria igitur illa tyrannis fuit Ecclesiæ Jacobiticæ, quæ saltem ab Arabum initiis, & ex quo Ægyptum subegerunt, sola Episcopos, & Metropolitas in Æthiopiam misit: quia annis centum aut circiter Melchitæ seu Orthodoxi, Alexandria Episcopos non habuerunt. Unde etiam Canon ille Pseudo-Nicænus, qui est de Metropoli Abyssinorum, vix alibi reperitur quàm in Jacobitarum Collectionibus: aut si est in Melchiticis, libroriorum potius culpa fuit, quàm certum consilium. Ita pariter in Græcis Notitiis, & apud Nilum Doxapatrium laudatum à Leone Allatio, inter Metropoles Alexandrinæ sedi subjeçtas Abyssinia non recensetur; verùm sub illarum classe comprehendi debet, quæ ex

Barros De-
cad. I.

Almid f.
Ayaç, Matr. 21.

De Pop. conf.
l. 2. c. 9. p. 167.

CYRILLUS
Patr. LXVII.
De Notitia
à Beveregio
publicata.

456

HISTORIA

quo Severianorum hæresis erupit, ab ea sede avulsæ sunt. Dedit quidem Notitiam illarum Arabicam nomine Eutychie filii Batrik, Guillelmus Beveregius in Commentario ad Canones Trullanos, in qua Metropoli *Æthiopiz* quinto loco numeratur. Verùm ea Notitia nullo negotio falsa esse convincitur: neque enim in India aut Sindhia, quæ Metropolin unam constituunt ordine quartam, jus unquam habuit Patriarcha Alexandrinus, sed Antiochenus: neque si illam cum Græcis Notitiis comparemus, ulla ratione cum illis conciliari potest, quamvis similes esse deberent, si hæc vera fuisset. Sed nec in toto Eutychio reperitur vola vel vestigium ejusmodi Metropoleon. In Ecclesia verò Jacobitica Alexandrina, jam ad hæc usque Cyrilli tempora ex veteri consuetudine non recensentur Metropoles ullæ, sed Episcopatus tantum: soli Metropolitanæ duo, *Æthiopiz* & *Nubiz* nominantur. Episcopi *Misræ* & *Marotidos*, nusquam Archiepiscopi & Metropolitanæ nominantur. Quod verò observat Autor ex duplici Patriarcha Melchita seu Orthodoxo & Jacobita, fieri potuisse, ut aliter atque aliter se haberet Episcopatum dispositio, verè ab illo dictum, sed ad rem non pertinet. Nam apud Orthodoxos, à Muhamedanorum Imperio, nulla Metropolitæ Abyssinorum memoria est, nisi fortasse in Græcis ut apud Nilum memoriæ causa servetur ejus ordo, non secus ac in Ecclesia Romana fieri solet circa Ecclesias illas quæ dicuntur in partibus Infidelium. Sed de rebus illis *Æthiopicis* erit adhuc dicendi locus.

Fructuum
Episcopatum
pars reservata
Patriarchis.

Vacabant Episcopatus multi, quibus omnibus Episcopus Cyrillus ordinavit absque ulla simonia, quam funditus sustulit. Verùm constituit ut ex antiqua consuetudine, cujus tamen huc usque nullum in præcedentibus historiis occurrit vestigium, dimidia fructuum pars Episcopo cederet, altera reservaretur *Celle S. Marci Evangelistæ*, hoc est Patriarchio. Quosdam tamen fructus qui ex diversis Episcopatibus percipiebantur attribuit Monasterio *S. Macarii*, nempe Ecclesiarum, *Demiræ*, *Busiridos*, *Panopolcos*, *Demnluuræ* & *Elhanasiz*, quam attributionem literis, instrumentisque necessariis confirmavit, quæ Monachis tradita sunt. Mediam quoque fructuum *Rechidæ* & *Messiz* partem destinavit Ecclesiæ *S. Marci Alexandriæ*, cui ædificandæ, ut etiam aliis reparandis impendit, quidquid pecuniarum ex reservatione medietatis fructuum ad eum pervenerat, usum operâ *Yemin* Archipresbyteri, experientia & fide commendati, tum qui cum consanguinitate attingebat.

Anno

PATRIARCHARUM ALEXANDRINORUM. 457

Anno 802° Martyrum grave ipsi negotium fuit, cum Episcopis Regionis maritimæ, primariisque Mistræ civibus Christianis. Illi enim cum adeuntes, rogaverunt ut Georgium Episcopum Abtrou, Abrahamum Episcopum Dikoïa, à consortio suo expelleret, maxime autem Justum Monachum, qui abjecto schemate seu habitu religioso uxorem duxerat, Jobum scribam & Abulkerimum Monachum. Illos enim tales esse dicebant, ut turpe ipsi esset tales comites habere, qui corruptela omnium quæ ipse ut vir bonus faceret, esse videbantur: tantaque illorum importunitas fuit, ut non prius illum dimitterent, quin scripto dato fidem suam interposuisset se illos dimissurum. Mox tamen mutatâ sententiâ, præter Abdulkerimum omnes in ministerio suo retinuit: unde magna Episcoporum illorum exasperatio adversus illum fuit. Augebat dolorem, quodd cum Patriarcha renuntiatus fuerat, faverant illi præ cæteris Episcopi Regionis maritimæ, existimantes virum simplicem & mediocriter literatum, qualis re vera fuit, omnia illis negotia commissurum, futuramque penes ipsos totam Patriarchalem jurisdictionem. Verum ipse Demetrii illius antiqui exemplo, statim tanto studio literas sacras, earumque interpretationes legere cœpit, ut Autor ipse testetur se cum multis illi aliquando difficilesque ex Scriptura quæstiones proposuisset, ea responsa accepisse, quæ talem doctrinam continebant, ad quam multi Episcopi, & Sacerdotes non pervenissent. Ad scientiam quam labore acquisiverat, adjungendam ait Autor, morum sanctimoniam, cui tribuendam existimat, divinam sub ejus Pontificatu benedictionem, cum toto illo tempore Nilus ad justam mensuram creverit, magnaque frugum ubertas consecuta sit. Attamen cum Episcopis displiceret, quodd promissis non stetisset, querelam libello expositam Viziro Bederelegemalo, per Hortorum ejus curatorem deferri procuraverunt, ut ipse causam cognosceret. Erat tunc Cyrillus in Ristræ regione, quæ pars est Provinciæ maritimæ, occupatus per menses aliquot in consecrandis Ecclesiis: sed Mistram venire jussus est, cum Episcopis quicumque adesse poterant. Eorum nomina & sedes, quando partem Notitiæ Ecclesiasticæ illius temporis continent, referre erit operæ pretium.

Convenerunt numero quadrāginta septem; inter quos è Provincia maritima viginti duo: Episcopus Mistræ, Episcopus Gizzæ, Episcopus Khandek, & ex Sahid sive Thebaïde viginti duo, quorum omnium, inquit Autor, hæc sunt nomina: Jacobus Episcopus

M m m

CYRILLO
Patr. LXVII.
Querelæ ad-
versus fami-
liares Patriar-
chæ.

Convventus
Episcoporum.

Misra, seu Kahira : Gabriel Khandek : Hezekia Episcopus Wis-
sim, & Gizæ : Joannes Episcopus Saca : Marcus frater ejus
Episcopus Semnuda, Samuel Tancoos : Misaël Damiatæ, Theo-
dorus Balinæ, Joannes Demiræ : Chail Busridos : Justus Sa-
harget : Chail Menuf, Joannes Tendta : Chail Nyssæ : Chail
Barales, seu Paraloou : Gabriel Nesterowæ : Macarius Sa : alter
Macarius Bana sive Panopoleos : Theodorus Khartabæ : Gabriel
Demnhuræ : Mercurius Messilæ : Raphael Serfiæ : Justus Re-
chidæ : Theodorus Athribæ : Mennas Banwaniin. Advenerant,
sed ob invaletudinem venire in confessum non potuerunt ; ex ea-
dem Provincia maritima : Chail Episcopus Katuræ : Theodorus
Sinjaræ : Petrus Deckmiræ : Besam & Cosmas Episcopi Elowa-
xhat. Episcopi Sahid vicinarumque regionum, Jacobus Episcopus
Athfiæ : Daniel Tmucos : Samuel Ahnasæ : Mathæus Fiumæ :
Macarius Kifæ : Petrus Behnseïæ : Senudas Taxhæ : Chail Aschmo-
nin : Isaac Ansnæ : Mercurius Episcopus Kusæ : Antonius Osiu-
tæ : Ephraim Chetabæ : Mathæus Kawouæ : Claudius Episcopus
Echmimæ : Marcus Belinæ : Kalta Houæ : Mercurius Arksarinæ :
Pammon Armentæ : Theodorus Afniæ : Besam Afowana : Jo-
annes Denderæ : Theodorus Koufæ alterius. Omnes numero quin-
quaginta duo numeratis quinque illis, quorum nomina scosim
recitata sunt. Quæ verò ad illorum Episcopatum pleniorẽ no-
tionem spectant, cum paucis verbis explicari non possent, alio
loco referentur. Hos omnes Episcopos cum convenisse Misram
didicisset Bederelgemalus, advocavit eos ad se, in hortum majorem
suum, qui erat in suburbio. Annus erat Martyrum 802^m, respon-
dens 475^o Kharegio.

Causa Pa-
triarchæ co-
ram Viziro
agitata,

Cum convenissent coram eo, gravissimis verbis illos increpa-
vit, quod debitum Patriarchæ suo honorem non deferrent, eaque
de causa afferri sibi voluit Collectionem Canonum, de quibus re-
latione facta judicaret Patriarcham, eumque dimisit. Ipse interea
cum suis compendium breve Canonum, & regularum ex Scriptu-
ra sancta utriusque Testamenti, præparavit : alii qui adversus eum
libellos porrexerant, similem quoque collectionem paraverunt.
Hortorum Præfectus paulò post ab irato Domino capite trunca-
tus est, eo ipso in loco, ubi Cyrillum ejus inimicis faverat,
convitiis incesserat, eumque pro uno ex discipulis, cum quo jura-
tus eam ob causam fuerat, deprecantem, & ad pedes ejus ab-
jectum, contemserat. Transactis Kahiræ uno & viginti diebus,

omnes Vizirus accersivit, prudenterque & quasi Deo per os ejus loquente, illos ad concordiam hortatus est, qualis debebat esse inter homines qui eandem religionem profiterentur : & ad obedientiam superiori suo præstandam ; monuit ne pecuniis coercendis intenti essent, sed ut eleemosinas ex redditibus suis amplissimas facerent, sicut Christus ipsis præceperat : Canonum quorum synopsis ei dederant, nullum se opus habere dixit : verum illam se ab ipsis postulasse, ut apud illos renovaretur eorum memoria, atque eos non solum legerent, quod ab ipsis dudum negligi audiverat, sed etiam ut ad eam formam mores componerent. Tandem præcepit Abulfedaïlo filio Obeidi Divani præfecto, ut singulis prout eorum negotia exigerent, diplomata scriberet, quibus ab omni injuria tuti esse possent. Ita omnes gaudio inexpectato perfusi quod ejusmodi judiciorum apud principes, non incertus modus, sed sæpe tristis exitus foret, ad Ecclesiam S. Mercurii ad gratias Deo agendas convenerunt ; & in ea, Sabbato Dominicaque sequenti Liturgiam celebraverunt. Quod autem Bederelgemalus tam benignus erga Patriarcham & Episcopos fuit, non tam ejus moribus, nam crudelis erat & ferrox, tribuendum videtur, quam quod ex Christianis parentibus ortus, religionis quodam amore tangeretur. Docet enim Abuselâh, cum origine Armenum fuisse : unde magna tunc fuit in Ægypto Armenorum autoritas, qui etiam illius favore Ecclesiam S. Georgii prope Doram ad mare obtinuerunt, quam diruta veteri ex integro ædificaverunt, adjunctis hortis, palmetis, puteis & piscinis. Eam verò Copticæ restitui sibi velut antiquis possessoribus obtinuerunt, post annos multos sub Marco filio Zaræ Patriarcha LXXIII.

Verum alius omnino fuit erga Christianos Bederelgemali animus in altero negotio, quod ad fisci rationes spectabat. Accusati sunt enim Episcopi plures, præcipue Episcopus Khandek, quod eorum qui in bello civili partes Nassiredoulæ Hamadanidæ, aliorumque Viziri hostium secuti fuerant, pecunias depositas habuissent ; is verò Episcopus Abulserouri, filius Labek, opes sibi commendatas apud se retinuisse : quod alii ferme omnes Episcopi fecerant. Accepta igitur autoritate ut illam de pecuniis repetundis quæstionem institueret, rem ita composuit, ut cum singulis de certa pecuniæ restituendæ fisco summa pepigerit, quo nomine ab illis collegit quatuor aureorum millia. Mercedis etiam titulo quinque aureos annuatim Monacho Fergio denunciatori persolvendos Vizirus per diploma concessit.

Accusatio
adversus Epi-
scopos.

M m m ij

Patr. LXVII.
Alexandria
obsidē.

Circa eadem tempora Bederelgemalus Alexandriam obsedit men-
sibus duobus, eo quod filius ejus qui urbis Præfectus erat rebel-
lasset, ex consilio aliquot militiæ ducum, quorum patres, aut con-
sanguinei, ob Nassiredoulæ causam occisi fuerant. Urbs ab eo
tamen pactis conditionibus recepta est : & ejus cives paulò post
quod novis rebus studuissent, quod adversus Calisam Mustansu-
rum defectionem nudassent, ejusque milites qui in officio intra
urbem permanserant occidissent, grandi pecunia mulctati fuere. His
titulis, nulla pactarum conditionum ratione habita, Bederelge-
malus centum viginti aureorum millia ab illis exegit : sed eum
filius nihilominus consilia adversus eum agitare non desineret,
& ad patrem occidendum cum aliquot aliis conjurasset, illum in
vinctula conjecit : cumque per annum & menses sex in conclavi
domestico captivum tenuisset, tandem occidit : alii laqueo post
quinque dierum in ediam sublatum tradunt : alii submersum, alii
tandem vivum sepultum fuisse scribunt : ut Autor Historiæ Ægy-
ptiacæ ad annos Hegiræ 477^{um} & 478^{um}, cum annus ab Histo-
rico nostro assignatus anno Hegiræ 479^o respondeat : mortem ve-
rò juvenis referat ad annum Martyrum 803^{um}, J. C. 1087^{um}, qui
fuit Hegiræ 480^{um}.

Cyrilli con-
stitutiones.

Ut ad res Ecclesiasticas revertamur, scripsit Cyrillus Canones,
sive novas Constitutiones Synodicas, easque in superiorem Ægy-
ptum misit, cum in Ecclesiis Misræ aliisque lectæ fuissent. Verum
in Sahida receptæ non fuerunt, negantibus omnibus, mutatiros
se pristina statuta sua : neque amplius quidquam à Cyrillo factum
est, cum illi quos in contubernio habebat suassent, sufficere sibi
quod illos monuisset, atque ita illum omni culpa vacare.

Edictum ad-
versus Chri-
stianos.

Eodem anno Martyrum 802^o, J. C. 1086^o, Hegiræ 479^o,
publicatum fuit Edictum, quo Christiani zonam nigram ferre ju-
bebantur : Judæis quoque idem imperatum, eo tamen discrimi-
ne, ut oras flavas zonis attexerent, atque ita à Christianis distin-
guerentur. Tributum quoque unius aurei, tertiæque & quartæ
partis aurei ab illis exactum, nempe ut haberet Bederelgemalus
unde ingentes belli sumtus toleraret. Magnum autem in exercitu
suo Armenorum numerum habebat, eorumque operâ, utpote
gentilium suorum, maximè utebatur.

Armenorum
Patriarcha.

Occasione autem autoritatis quam ejus tempore Armeni in Ægy-
pto habebant, venit ex Oriente Gregorius quidam, qui se Ar-
menorum Patriarcham dicebat. Constantinopoli navem conscen-

dens, inde Alexandriam venerat cum numeroſo famulitio, aiebatque ſe Patriarchæ Senioris ex ſore nepotem eſſe. Nobilitatem quoque generis præ ſe ferebat, tanquam oriundus à Sennacheribo vetere illo Aſſyriorum rege: patrum dicebat dignitatem Patriarchalem ſibi reſignaviſſe; miſiſſeque illum in Ægyptum cum inſignibus ſanctorum reliquiis, crucibusque aureis, aliisque muneribus: Meminit iſtius Patriarchæ Abufelah Armenus initio operis ſui, additque poſtea Hieroſolyma profeſtum, ubi Codices Evangeliorum pretioſos auro minioque diſtinctos muneris loco reliquit. Erat ille admodum juvenis, ſed formâ, modeſtiâ, & præclaris moribus commendabatur. Suſceptus eſt ſtatim à Monacho quodam Armeno, nomine Menachis, à quo in deſertum S. Macarii ad viſitanda monaſteria deductus eſt. Alexandriam cum rediiſſet, habita cum eo diſputatione de fide, Jacobiticam proſiteri reſertus eſt, cujus etiam publicam confeſſionem fecit coram Cyrillo Patriarcha, præſentibus Coptitarum plurimis, qui idcirco in Patriarchium convocati fuerant. *Eo die*, inquit Autor noſter, *fama apud omnes percrebuit de conſenſu Coptitarum, Armenorum, Syriarum, Ethiopum & Nubarum, circa fidem Orthodoxam, quam communi ſententia tenuerant veteres ſancti Patres, quamque Neſtorius, Leo, Conciliumque Calchedonenſe perverſerant.* Eo loco obſervandum eſt, quòd ante hæc tempora nulla ferme Armenorum Chriſtianorum mentio occurrit in Jacobitarum Ægyptiorum libris, neque fortaiſſis antiquior ulla illorum obſervari poteſt memoria, tantum abeſt ut illa de qua deinde tantopere gloriati ſunt, & etiamnum gloriantur, conſenſio fidei cum Syrianis & Armenis admodum antiqua ſit, aut ad prima ſchiſmata initia debeat revocari. Neque enim ante illa tempora, hoc eſt ante 11^o ſæculi finem, communio Armenorum & Coptitarum ſtabilita deprehenditur: atque ut Græci, etiam in illis ex illa gente Chriſtianis, qui leviùs errabant, nec hæreſibus Dioſcorianorum Severianorumque tenebantur, multa damnabant, ut ex Nicone, Euthymio, aliisque manifeſtum eſt: ita quoque Jacobitæ in iis qui ſuæ communionis eſſe dicebantur, non pauca reprehendebant. Ea autem emendata non fuiſſe ab Armenis poſterioribus certiffimè demonſtratur ex variis erroribus, quos in illorum ſecta notat Abulbircat duobus locis; præſertim referens verba Petri Melichæ Epifcopi, qui ſeptemdecim capita diſciplinæ in illis condemnat. Ita quoque Tractatus anonymus Syriacus adverſus eos multis diſ-

Errores Armenorum.

putat, tum quòd pane fermentato utantur ad sacrificium, tum quòd vino aquam non admisceant. Fuerunt tamen antiquitus Armeni multi, qui Jacobitarum hæresin secuti sunt; nam ut Liberatus notat, jam ipsius tempore multos hæc pestis infecerat; sed illi sub Antiocheno Jacobitarum Patriarcha erant, neque proprium habebant Patriarcham; qui verò progressu temporis ita sunt appellati, originem habuerunt à Catholicis Persidis, & Armeniæ, de quibus dictum est alibi. Eà verò maximè causâ novus hic Patriarchatus, etsi non propriè dictus institutus est, quia Armeni propriam linguam habebant, ritusque singulares, quæ occasio ipsis fuit subtrahendi se à Patriarchæ Antiocheni jurisdictione, cui per omnes Canones antiquos & recentiores subiciebantur, quod ipsis faciliùs licuit quando Antiochia fuit in Christianorum potestate; similiter qui in ea gente fidem Orthodoxam retinuerunt, suum quoque habuerunt Patriarcham. Quàm verò recens sit illius dignitatis institutio, ostenditur præterea ex silentio Canonum Arabicorum, qui cùm Metropolitæ Æthiopæ, & Catholici Seluciæ meminerint, locumque illis assignent post Hierosolymitanum Patriarcham, Armenorum Patriarchæ memoriâ nullam faciunt; sed hæc aliàs, quando quidem maiorem operam desiderant.

Anno Martyrum 804^o obiit Jacobus Episcopus Misræ, cùm sedisset annos 24: & ante Episcopatum fuisset Archidiaconus Monasterii S. Joannis in Valle Habib: sepultusque est in Monasterio seu Cæmeterio Abyssinorum dicto, prope eam urbem. Congregati sunt primores Christianorum, statueruntque ut Episcopum eligerent Sanutium Diaconum Ecclesiæ S. Bischoi: aut Yeminum Archidiaconum Ecclesiæ S. Joannis. At cùm Sanutius fugisset, atque in eo Monasterio latitaret, repertus, Misramque abductus est, ordinatusque in Ecclesia S. Sergii.

Res Æthio-
picæ.

Anno sequenti 805^o venit in Ægyptum frater Severi Metropolitæ Æthiopæ cum muneribus, quæ Emiro non placuerunt. Advocavit is deinde Patriarcham, qui cum decem Episcopis aulam ingressus, statim interrogatus est de illo Metropolita, cur illum ordinasset, non solutâ, quæ idcirco debebatur, fisco pecuniâ. Questus est etiam Emir, quòd promississet se Mescitas ædificaturum in Æthiopia, missurumque munera: tandem alia multa quæ non præstisset. Erat inter Episcopos qui Cyrillum comitabantur, Ephræm Episcopus Denkou, causa malorum omnium, adversus quem reliqui querelas detulerant, ut cùm amoveret, sed

frustra. Flagrabat autem is majori apud omnes odio, quod ordinatione suscepta, nunquam ad sedem suam profectus fuisset, aut in ea proclamatus fuisset, aut in ullo altari Dioeceseos suæ sacra fecisset; sed perseverabat in officio scribæ Patriarchalis. Ille igitur Emiro respondit: Metropolitam Æthiopiæ ordinatum non fuisse nisi ex ejus mandato. Emir usque eum & ipsum Patriarcham mentiri dixit: moxque significavit oportere ut duo Episcopi in Æthiopiam mitterentur, qui Meschitas ædificandas curarent, orationemque in illis Muhamedanorum more fieri: deferri quoque debere tributum annorum quinquaginta; quod si ipsis minus placeret ea conditio, liberum ipsis esset eligere quid mallerent. Questus quoque est quod mercatoribus Muslemanis negotiationem prohiberent, iter agentibus vias in Æthiopiam præcluderent: quæ si vera essent, scire se quid facto opus esset. Postea omnes dimissi, sed additis unicuique Episcopo satellitibus duobus, quibus quotidie aureos duos solvere cogerentur, quos Patriarcha de facultatibus suis suppeditavit. Significatum est etiam omnibus, eam multam ed usque exigendam donec in Æthiopiam literæ missæ fuissent per duos Episcopos, Marcum Wissim & Gizet, & Theodorum Sinjaræ. Maximo in metu Christiani erant, cum Emir usque illis ed usque iniquus non fuerat, tam durus erga eos videretur, neque ulla ratione mitesceret. Interea advenit Legatio à Basilio Rege Nubiæ, cum muneribus Emiro destinatis: in qua erat filius Regis defuncti, quem petebat ordinari Episcopum. Nam qui regno successerat, erat prædecessoris sui ex sorore nepos, cui ex Nubarum lege hæreditas debebatur, ut superius ex autoritate Abuselâh Armeni observatum fuit. Emir accersivit statim Patriarcham, decemque ex ejus comitatu Episcopos, quibus ex satellitio suo custodes dederat, simulque fratrem Metropolitanæ Æthiopiæ. Accidit autem eo ipso tempore, ut libellus à Mercatore Muhamedano oblatu fuisset, qui Metropolitanam accusaret quod sibi viam intercluserat, opesque ipsius per vim abstulerat: sed convictus est quod Severus à Rege Æthiopiæ captus fuisset & in custodiam datus eo tempore, quo injuriam sibi factam mercator ille querebatur. Illius igitur nulla ratione habita, dixit Emir Metropolitanam promississe, quatuor se in Æthiopia Meschitas ædificaturum, neque tamen id præstitisse. Tum ejus frater respondit eum in iis quibus potuerat locis septem ædificasse Meschitas, rem verò notissimam apud omnes fuisse quid

his ædificiis acciderit : nempe Æthiopes ea solo æquasse, eumque ad necem quæsisse : Regem, cum id accepisset, eum in vincula coniecisse. Ita placatus Emir us quæsit quid facere designarent. Scribemus, inquiunt, literas Copticè & Arabicè, legenturque coram te, ut earum interpretatio apud te constet : scribemus autem quod tibi visum fuerit : designaverunt etiam Episcopos duos qui eas deferrent. In hunc modum hoc periculo defuncti cum honore remissi sunt, Episcopique viatico necessario instructi. Addit Autor se à viris fide dignis accepisse, quòd Emir us Bederelgemalus, qui literas quoque misit per Legatum qui in comitatu Episcoporum profectus est, scripisset ad Regem Æthiopie, se nisi Rex hæc atque illa quæ imperabat faceret, omnes Ægypti Ecclesias eversum : Regem verò respondisse, quòd si ex Ecclesiis vel lapidem unicum dejeceris, ego lateres & lapides omnes Meccæ ad te mittendos curabo ; & si vel unus later deficeretur, cum auri pondere pari compensabo. Huc usque narratio de rebus Æthiopicis, mira sanè & pene incredibilis : & de qua ne verbum quidem habemus in singularibus de Æthiopia virorum doctissimorum Tractatibus. Inde porro constat tumultuatos esse adversus Metropolitam suam Æthiopas, quod Meschitas Muhamedanis ædificasset, de qua novitate & impietate altum est apud Autores omnes silentium : nam autoritate Geographorum Arabum constat, in Æthiopia nullam præter Christianam Religionem publicè exercitam fuisse. Ædificationem autem Meschitarum criminis idololatriæ quodammodo æqualis loco habent Orientales ; & quamvis nulla certa poenitentia eidem præscripta reperiatur, neque enim passi fuissent Muhamedani suis in regionibus, ut tali operi Christianus manum admoveret, erat tamen scelus longè gravissimum, præsertim in Episcopo ; neque mirum esse debet quòd Æthiopes sub talibus pastoribus Christianam religionem obliti quodam modo fuisset, in multis videantur. Literæ verò minaces illæ quas Æthiopie Regi attribuunt, suspensissimæ videri debent : cum eo tempore regnum illud non tanti foret, ut exercitum trans mare ducere ille posset, Meccamque ubi ingens erat Muhamedanorum concursus, præsidariiique Arabes sub Emiro Meccano aggredi auderet, aut saltem simulare tale quidquam posset : imo apud illos Æthiopes imbelles, & qui nullas vires haberent, animo designare.

De Syriacis. Erat tunc Kahiræ non mediocris Syriacorum multitudo, quorum

rum primarius Ebn-Tawil appellabatur, & in suburbio Hucceniet dicto habitabat, ubi olim Armenorum militia stativa erant. Nempe jam ab Ahmedis filii Toloni, & Hamarowia ejus filii principatu, inter diversas cohortes prætorianas, quæ ex multarum gentium mancipiis exercitatis conscribebantur, erant Armenicæ. Emirus autem qui, ut diximus, Armenus erat, ut suæ gentis hominibus commodum locum assignaret, Syrianos inde ejecerat. Ebn-El-Tawil ut hanc suorum calamitatem aliqua ratione soleretur, petiit ab Emiro concedi sibi Ecclesiam vacuum in Monasterio Elkhandek, & obtinuit: jussusque est Gabriel Episcopus Khandedek, eam Syrianis concedere. Erat autem illa sub titulo Pauli filii Justi Martyris, & in ea corpus ejus servabatur. Eodem in loco servavit Episcopus locum ubi pabulum ad jumentorum suorum pastum reponeretur: eratque olim Ecclesia S. Macario dicata. Indignati idcirco Armeni, questi sunt non habere se Ecclesias ubi orare possent, cum Jacobitæ unam eadem in urbecula haberent clausam & inutilem, in qua nullas preces facerent, cum Episcopus horreum ex ea fecisset. Cum vera dicere illos comperisset Emir, Ecclesiam pleno jure illis attribuit, qui eam à fundamentis restituerunt, & in ea officia divina celebrare cœperunt. Ipsa verò postmodum Armenis attributa est, à quibus retinebatur, dum Autor noster suam historiam scriberet. Ibi, inquit, multa miracula facta sunt, sicut in aliis Ecclesiis; quæ fusiùs prosequitur, nos silentio commendanda duximus. Erit tamen locus, cum aliqua illarum reliquiarum memoria facienda erit, nempe ubi agemus de Ecclesiis & Monasteriis, de quibus præter ea quæ à Christianis scripta sunt, commentarium justum edidit Chanefchi quidam, laudatus ab Abuselah, Makrizio & plerisque aliis rerum Ægyptiacarum autoribus. Noster autem eas solum reliquias commemorat, quas ipse in variis Ecclesiis religionis causâ visitaverit: neque inutilis omnino censenda hæc disquisitio est, ea præsertim ratione quod vix aliter intelligi possunt nomina sanctorum plurimorum, qui coluntur apud Coptitas, & quæ apud Græcos, Latinos, ipsosque Syros scriptores frustra quæsieris. Pleni sunt peregrinationum libri nominibus sanctorum talium, quos sæpè locorum Christiani, etiam posteaquam ad Christianæ fidei unitatem Catholicam redierunt, venerari non desinunt, & incauti Missiarii tales honores patiuntur, quia qui fuerint sancti illi, nesciunt. At quantum licebit, dabimus operam ut sancti legitimi, à falsis

Res Antio-
chenæ.

distinguantur : nam plerique illorum, quia in hæresi vixerunt, tales existimandi sunt.

Postea Auctor non assignato tempore, nisi per notam insignis calamitatis, quæ Antiochenam & multas alias Syriæ urbes vastavit, per ingentem terræ motum, ait Hierosolyma tunc in Azorum potestatem venisse, quamvis jam antea occupata ab Ortokidis fuisset, quos illo nomine designavit : nempe quia Turcicæ erant originis, & inter gentes varias quæ Turcarum nomine comprehenduntur, Az, qui & Azaz, à Geographis recensentur. Terræ motus contigit anno Hegiræ 484°, qui erat Mostansiri 57°, J. C. 1091° : urbs ferè tota subversa est, & Oronis exundatione magna ædificiorum multitudo concidit. At in Ægypto, Nili inundatio maxima, etiam remotiores ab eo terras ita fecundavit, ut ubertas quanta vix unquam, major consecuta fuerit. Hierosolymitana urbs in Turcarum potestatem venit, eorum scilicet qui Melikschahi auspiciis, aut licentiâ potius, bella assidua cum ducibus aliis gerebant, quique omnes tributarii Seljukidarum erant. Ita enim fiebat ut mutuis præliis attriti ad obsequium paratiores forent, neque rebellare facile possent. Inter eos autem erat Ortox filius Aksak Turcomanus, Maredinæ princeps, cui Halepum, sive Berrhæam, dedit Melikschah, & Ortox anno eodem 484° ex vita migravit. Filii ejus Sacman & Ilgazi Hierosolymam & multas alias Syriæ & Palestinæ urbes occupaverunt. In urbe sancta de miraculo luminis cœliûs apparentis in Ecclesia Resurrectionis certiores facti, quod prius præstigiarii loco habebant, in administrandis publicis negotiis usi sunt ministerio Jacobitæ cujusdam qui Mansur appellabatur. Uxorem habebat caritate & hospitalitate erga peregrinos qui ex Ægypto aliisque provinciis concurrebant, celeberrimam. Ea occasione Mansurus Jacobitis suis Ecclesiam Hierosolymis ædificare aggressus est, atque consilium illud suum per literas significavit Cyrillo Patriarchæ. Nam ex antiqua, quæ etiamnum superest in Jacobitarum Codicibus consignata Patriarchatum divisione, Hierosolymitana Diœcesis, & Palestina tota ad sedis Alexandinæ jurisdictionem pertinebant, ut etiam observatur ex Noticiis quibusdam Græcis, & Nilo Doxapatrio. Rogavit itaque Mansurus Patriarcham, ut Episcopum mitteret, à quo Ecclesia nova consecraretur. Anno Martyrum 808°, J. C. 1088°, Episcopum misit qui hoc officio functus est. Hæc observatu dignissima sunt, quippe cum ex eo loco intelligatur, Jacobitas etiam per totum ferme Orientem dispersi

Miraculum
luminis Hie-
rosolymis.
Futcher. Cor-
vol. p. 407.

omnibus in provinciis Ecclesias haberent, Hierosolymis ante ista tempora non habuisse. Qui autem eorum Antistes ea in urbe erat, non ut apud Orthodoxos Patriarchæ titulo honestabatur, sed Episcopi, aut Metropolitæ, ut apud Nestorianos qui serius adhuc, quantum conjicere possumus, ibi Episcopum proprium habuerunt. Paulò post cum Franci ea in urbe regnarent, habuerunt Metropolitam suam Jacobitæ, quod huc usque servatum fuit. Rationem investiganti, cur in locis humana Jeshu Christi conversatione dum in terra esset consecratis, hæretici illi Ecclesias & Clerum non haberent, cum omnes sectas Muhamedani tolerarent, imò deterior esset Orthodoxorum conditio, quia ob conformitatem fidei cum Græcis Imperatoribus, sæpè in novarum rerum suspicionem adducebantur, non alia potior videtur, quàm quòd Hierosolymis pauci admodum erant Hæretici: atque ita Orthodoxis ex communi Muhamedanorum lege mansit integra autoritas sua, neque alii qui Ecclesias illic non haberent, faciliè admissi sunt.

Eodem circiter anno obiit Marcus Episcopus Belinæ, *primus*, inquit Autor noster, *Episcoporum omnium*, scilicet antiquitate ordinationis: nam ex illa, non ex sedium dignitate primus dabatur Episcopis locus, ut ex controversia Episcopi Arment cum altero superiùs observatum est.

Mansit Cyrillus eodem anno ultra præscriptum tempus in Cella prope Ecclesiam S. Michaelis, antequam ad desertum S. Macarii proficisceretur, intentus lectioni sacræ, præsertim quatuor Evangeliorum quæ Copticè legebat cum sua interpretatione, tum ut literam intelligeret; jam enim rarior erat apud plerosque populares linguæ Copticæ facultas, adeo ut pauci absque Arabica versione sacros libros legere possent: tum ut sensum perciperet, nam ejusmodi Interpretationes, quas *Tafsîr* vocant, Commentarii cujusdam locum obtinebant. Omnes pecunias quas ex reservatis fructibus Episcopatum recipiebat, impendebat in pauperum sustentationem, & Ecclesiarum restitutionem: afflictorum aut multorum inopiam sublevabat, tamque continua caritas facultates illius patrimoniumque exhaustit, ita ut moriens ne aureum aut drachmam quidem reliquerit. Jejunabat ferè semper, uno eoque simplicissimo ex leguminibus ferculo contentus, ad vesperam: cum alia discipulis pararentur. Orationi intentus erat, sæpè cum discipulis de rebus divinis sermones habebat, quibus & se interfuisse dicit Joannes filius Sahed, filii Jahiæ filii Minæ, cognomine Ebn-

Cyrilli studia, & mores.

Elkolzumi, Autor vel Interpres historiæ hujus : & ex ejus manu communionem multoties percepisse, quam cum distribueret, solebat benedictionem apprecari linguâ Copticâ. Testatur autem in familiaribus illis colloquiis observasse, illum non modò sacras literas, sed omnia quæ ad earum interpretationem pertinent probe tenuisse, & de illis præclaros sermones habuisse. Ex quibus affectatis non uno loco laudibus intelligi potest, non magnam fuisse olim de ejus doctrina famam, de qua historicus tam anxie laboraverit.

Obitus Cyrilli.

Obiit die Dominica 12^a mensis Baîni, post susceptam Eucharistiam, anno Martyrum 808°, J. C. 1092°, qui est Hegiræ 485^m : & quem annum 481^m Helalæum Autor numerat. Sedit annos 14, menses 3, dies 15 ; sepultusque est in Ecclesia S. Michaelis *Muclara* in Insula Misræ, unde postea translatus est ad S. Macarium Vallis Habib. De anno mortis & tempore Patriarchatus consentiunt Elmacinus & Makrizius, quorum hic annum Hegiræ 485^m assignat, qui ex vero calculo responderet anno Martyrum 808°. Abulbircat sedisse ait annis 13, mensibus 10 : obiisse anno 806°. Multò minor ratio habenda est Indicis Kircheriani, ubi initia Cyrilli assignantur anno J. C. 1098°, nempe sexennio post ejus mortem ; non quòd apud illum scriptorem tales notæ temporum reperiantur, quæ falsissimæ sunt, sed quia Autor Catalogi, dum illas ex ingenio, aut quibusdam locis Historiæ Saracenicæ malè intellectis disponere voluit, in infinitos errores lapsus est.

Vivebat adhuc Mustansirus Ægypti Califa Fatimida, qui anno 487° sexagesimum regni & ultimum vitæ annum inplevit : res omnes administrante Emiro, seu copiarum supremo duce, Viziroque simul Bederehgemalo Armeno.

Obitus Sultani Melikschahi. Status Orientis.

Eo ipso anno Hegiræ 485°, quo Cyrillus decessit, diem quoque suum obiit Melikschahi Albarlsani filius, Seljukidarum 3^m. Illius nomen integrum, Gelaeddin Abulfetah Melikschah. Imperium ejus vastissimum fuit ; nam ut Autores omnes consentiunt, completebatur Mawarinnaharam, seu Transoxianam : Turcicas provincias superiores Hiathelitarum, Portas Caspias, Anatoliam, Mesopotamiam, Syriam : adeo ut longitudo sumeretur ab urbe Katschgara quæ est in Sinarum finibus, usque ad Hierosolymam : latitudo à Constantinopoli, ad Russorum seu Cozarorum regiones & Mare Indicum. Ea autem imperii illius ratio fuit, ut in singulis Provinciis essent

Præfecti, seu potius Principes, qui eas beneficiario jure possiderent, inter quos plures è Regia familia numerabantur, qui sæpè rebellaverunt. Erant autem in clientela summi illius Imperatoris, cujus nomine Oratio publica in Mescitis fiebat; præmissio tamen Calife nomine, honoris gratiâ, quia Seljukidæ cùm religionem Sunnitaram sequerentur, Ægyptios Fatimidas hæreticorum loco habebant: Calisamque Bagdadensem, tanquam ex legitima linea Muhamedis successorem, venerabantur. Confirmabat antiquam illam & familiæ Seljukidarum innatam opinionem, summa Viziri supremi Nezamelmolc autoritas, qui in Traditionum studio secundùm Chaschiticæ scholæ placita eruditus, doctisque mirum in modum favens, vastum illud Imperium, per annos ferme quadraginta administravit. Principes illi honorem supremi Domini Sultano deferrebant, tributum quoque pendebant, opes, vestigalia, urbes, exercitus, judicia in eorum potestate erant. Neque ulla unquam in Oriente familia extitit, cujus majora erga subditos beneficia fuerint, nec enim urbes, sed provincias & regna assignabant mercedis loco. Cùm verò post istius Sultani mortem divisio in quatuor filios Imperio, illi bellis civilibus se invicem concidissent, plerique Præfecti, aut qui in clientela erant Principes, sicut olim post Alexandri mortem, excusso jugo, nulli subiecti esse voluerunt; sed ut populos in religione continerent à Califa investituras obtinuerunt, quas facile concedebat, cùm jam libertatem quam antea nullam habebat, quodammodo recuperasset. Nam Mostadi Abbassidarum 27^m, qui anno 467^o Kayemo avo successerat, mandatum acceperat à Sultano Melikschah, ut intra horas viginti-quatuor Bagdado excederet: obtinuitque ægrè decem dierum inducias; quo intervallo Sultanus obiit. Ex illis præfectis orti Principes Perfidis, quos *Atabrkos* vocant, quia Regionum liberorum juventuti præfuerant, & Mosulenses ex Zenghi familia, qui totam ferè Syriam occupaverunt, tum multi alii: quorum aliqui in Palestina & Syria sublati sunt per Francos Cruce signatos: alii tandem post annos ducentos à Tartaris deleti sunt: alii dignitatem & imperium servaverunt, auxeruntque ex aliorum potestate inferiorum spoliis, ut Noraddinus à quo Christiani magnas clades acceperunt. Ex illorum satellitio nati sunt novi homines Curdi, quorum præcipuus Salaheddinus Joseph, qui Syriæ & Ægypti regnum obtinuit; tanta in Orientali illo Imperio vicissitudo rerum fuit. Ut ad Melikschah revertamur, fuit in illo principe sum-

ma dignitas, æquitas, religio, quanta in Muhamedano esse potest : publicorum commodorum cura non vulgaris ; doctorum & literarum amor : benignitas in subditos maxima : nam tributa per totum ferme Imperium levavit, atque etiam multa planè sustulit ; pontes, ædificia ad Caravanarum stationes, balnea, scholas, Mefchitas passim ædificari iussit, assignatis redditibus amplissimis. Vias sterni fecit : aquæductus, & diversoria locis desertis in itinere Meccano magno sumtu construxit. Avaritiæ & rapacitatis, communi inter illos principes vitio caruit, neque de libidine infamatus est. Avunculi & aliorum cognatorum principum in bello captorum cædes, excusavit necessitas : nam aliis pepercit. Nihil verò magis famam illius læsit, quàm Viziri sui Nezamelmolkæ cædes per sicarium commissa, paucis diebus antequam ipse è vivis excederet. Cùm enim paulò antea asperius eum objurgasset, Vizirusque liberius respondisset, exacerbatiq; animi indicia non obscura Sultanus dedisset, suspicio fuit illum Viziro percussorem immisisse, quodd austeritatem ejus & arrogantiam amplius ferre non posset. Neque id tamen ullis indiciis compertum : nam sicarius statim occisus est ; eratque ex scelerata illa Bateniorum secta, qui postea *Hassissin* ab Arabibus, à nostris *Assassini* appellati sunt. Nam regnante Melikschah cœpit illa pestis sub Ismaelitis, ut quidem se appellabant, principibus, qui in loco quodam inaccessu ultra Ispahanam, Castrum *Elmout* ædificaverant, unde eorum Princeps, seu Cheikus, quem Autores nostri *Vetulum de Montanis* appellant, sedem fixit. Canis aberrans inter venandum ibi à Christiano quodam repertus, viam præmonstraverat : hinc malum omen captum à vicinis, ut scribit Abulfeda. Princeps ille venationi nimium indulgit, eamque sibi, tanquam Regiæ majestatis partem reservavit : aureum pauperibus dabat pro singulis feris quas venatu capiebat : decem mille uno die cepit : nempe eo modo quo etiamnum venari Orientales principes solent, & nostro sæculo Muhamed IV^{us} Turcarum Imperator, saltus indagine cingendo. Obiit Melikschah anno ætatis 38^o, regni 20^o, triginta quinque post Vizirum diebus. Is erat Nezamelmolkus, quo nullus celebrior inter illius dignitatis viros in tota Orientali historia reperitur. Hujus vitam scripserunt multi, atque inter alios Ebn-Chalican.

MICHAEL PATRIARCHA LXVIII. MICHAEL
PAL. LXVIII.

MORTUO Cyrillo cùm electio ad Alexandrinos pertineret, Quæ ele-
ctionem ejus
preceſſerunt. convenerunt primores illius Ecclesiæ, & per multos dies frustra agitatæ consiliis, in nullius electionem communibus suffragiis consentire potuerunt. Unde communicatâ cum illis qui in El-Rif reperiebantur Episcopis, sententiâ, iustisq; Monasteriis, adhibuerunt quoque ad consilium Episcopos qui ex Thebaide advenierant, sed inutiliter. Tandem ad Monasterium S. Macarii profecti sunt, ubi nominatis diversis Monachis, qui non placuerunt, demum propositus fuit ab aliquibus Episcopis Samuel Anachoreta reclusus, Syrus origine, qui cùm multis laudibus commendatus fuisset, missi sunt Episcopi, atque inter eos Sanutius Episcopus Misræ, qui eum deducerent : sed priusquam ad cellam ejus pervenirent, relatum est illum absurdis & perversis quibusdam circa fidem opinionibus imbutum esse. Accusabatur præsertim, quod corpus Domini nostri Jesu Christi sumtum ex Virgine Mariâ, in quo passionem mortemque sustinuit, & miracula fecit, ex intima unionem cum Verbo increatum esse, & consubstantialia Verbo secundum divinitatem, affirmaret : tum quod negaret Christum Dominum Feriâ 5^a Paschalem agnum cum discipulis comedisſe : tum alias quasdam opiniones minus Orthodoxas habere dictus est. Hæc cùm audivissent Episcopi, ultrâ non progressi sunt : querentibusque Alexandrinis quod electione diutius protracta, ipsi magno suo incommodo, instante hyeme, domo abessent ; volentibusque ut ea in aliud tempus differretur, Episcopi obstiterunt : verbaque ad eos fecit Sanutius Episcopus Misræ, probans non potuisse Patriarcham eligi, eum, quem constaret ex pravis quas tuebatur opinionibus, nusquam legisse sacras literas, quæ talem impietatem aperte refellerent. Ea occasione Autor prolixam adversus Phantasiastas orationem refert, tanquam ad Alexandrinos habitam ab eodem Episcopo, in quâ è sacræ Scripturæ Patrumque testimoniis ostendit doctrinam Ecclesiæ semper fuisse, quod *Deus Verbum humanam naturam assumpsit ex B. Virgine, similem nobis in omnibus, excepto peccato : eamque sibi conjunxerit per intimam unionem, conservatis utriusque naturæ proprietatibus : futurum alioquin ut omnia quæ facta erant dum in terris Jesus Christus conversaretur, operareturque mysterium redemptionis nostræ, imaginaria tantum &*

Expositio
fidei.

phantastica fuissent. Laudat autem sanctos Patres, Gregorium Thaumaturgum, Nazianzenum, Joannem Chrysostomum, Epiphanium Cypri, Hippolytum & Paulum Romanos Pontifices; Cyrillum Alexandrinum: tum ex Jacobitis Severum Antiochenum, Jacobum Serugensem, & quosdam alios. Ex illorum sententiiis concludebat Episcopus eum qui contrà sentiret, indoctum esse, & sacrarum literarum expertem: sibi autem Episcopis non licere, ut consensu suo electionem confirmarent Canonibus contrariam, quibus prohibetur, ne indocti ad ullum Sacerdotii gradum promoveantur. Transactis adhuc diebus aliquot, mentio facta est Sacerdotis cujusdam Reclusi in Monasterio prope Sinjaram, nomine Michaelis; qui cùm omnium testimoniis laudatus fuisset à doctrina morumque sanctitate, primò miserunt ad eam urbem, ut secundùm publicam famam de eo inquireretur. Cùmque civium commendatione fama ejus confirmata fuisset, eum adiverunt; & cùm circa fidei præcipua capita idem Episcopus illum interrogasset, neque solùm rectam illam comperisset, sed etiam doctrinam ejus intellexisset, reliquis significaverunt Episcopi quòd ipsum adivissent ad deferendam illi Patriarchalem dignitatem; prius tamen quàm eo nomine ipsum salutarent, opus esse ut capita quædam scripto comprehenderentur, ipseque perscriptas condiciones observaturum se polliceretur, & subscriptione firmaret.

Constitutiones
futuro Patriarchæ
ad subscribendum
propositæ.

Prima fuit ut exhiberet Confessionem fidei, secundùm doctrinam quam ex habitis cum eo sermonibus intellexerant. Id promissit. Tum ut annuam pensionem quam ejus decessores Ecclesiæ Alexandriæ solverant, ad Ecclesiarum ædificia reparanda, tum ad sumtus ad Officia sacra necessarios, pauperumque sustentationem, soluturum se polliceretur. Respondit se non modò quæ præcedentes Patriarchæ contulerant, sed plura adhuc si posset daturum. Post hæc petierunt ut scripto quoque se obligaret ad abolendam simoniam, adeo ut neque pro Episcoporum ordinatione, neque ullo quocumque prætextu pecunias contra Canonum statuta exigeret aut reciperet: imò dantes & accipientes anathemati subjicerentur. Petierunt pariter ut quandoquidem Patriarcha esset, non omnium Ecclesiarum, sed solius Alexandrinæ Episcopus, cui non magis liceret aliorum Ecclesias invadere, quàm ei qui uxorem haberet, cum alienis uxoribus commisceri, restitueret Episcopis multas Ecclesias, quas decessores ejus sibi contra jus attribuerant, ut aliquot etiam Monasteria. In Episcopatu

Miltæ

Misræ sive Cahiræ, Ecclesiam B. Mariæ Muhallaca dictam in Castro *Elchemah* S. Mercurii ad litus Elfahir; & B. Mariæ in Vico Græcorum: quas duas posteriores Christodulus occupaverat post obitum Episcopi Philothei: & Gabrieli ejus successori fructus aliquos ex utraque percipiendos assignaverat: tum etiam dies quosdam constituerat, quibus Liturgiam celebrare in illis Ecclesiis posset, ut in archivio Ecclesiæ ejusdem legebatur. In Episcopatu Wissim & Gizæ Ecclesiam S. Michaelis, in Insula Misræ, eam quæ Muftara. In Episcopatu Tmüeos Monasterium *Elchemah* & aliud sub nomine S. Mercurii *Elfakar* vulgò dictum: cum aliis ad ea pertinentibus quæ continebantur instrumento asservato in Cella Patriarchali: tum ut annuas pensiones remitteret, quas ex Episcopatum proventus ejus decessores exigebant. Hæc omnia facturum se pollicitus est, anathemati se subiciens, si secus ageret; omnibusque capitulis subscripsit, justa esse omnia quæ proponerentur ultro agnoscens.

His peractis, è Cella egredi noluit, priusquam ornamenta Patriarchalia acciperet, simulque Episcopi orationes consuetas ad Ordinationem super eum pronuntiarent, quod fecerunt, eumque ordinauerunt. Neque antea, ullum exemplum occurrit ordinationis alibi factæ quàm in Ecclesia Alexandrina præsentibus Episcopis. Ea tamen rata fuit, ipseque Alexandriam deductus, ibique proclamatus est 12^a Paophi anno Martyrum 809^o, qui erat J. C. 1093^{us}, Hegiræ 486^{us}: atque ita vacavit sedes menses quatuor, ordinatioque ad sequentem annum pertinuit, cujus 2^{us} mensis erat Paophi: atque ita convenit Autori nostro cum Makrizio, qui centum viginti quatuor dies vacasse sedem asserit; quod ita intelligendum, ut ex Epagomenis, qui supersunt dies quinque assumantur. Abulbircat anno 806^o mense Epiphri ordinationem assignat. Dein profectus est ad Monasterium S. Macarii in Valle Habib, ubi sicut in Ecclesia Muhallaca Misræ, proclamatus est.

His cæremoniis perfundam rogavit Sanutius Misræ Episcopus, ut secundum pacta quæ ipse subscriptione firmaverat, Ecclesiæ suæ restitueret eas quas Christodulus Patriarcha usurpaverat. Michael non modò negavit se facturum, sed etiam impudenter mentitus asseruit subscriptionem falsam esse: testes, qui cum instrumentum percriberetur adfuerant, excommunicavit, si contra se testimonium perhiberent, neque Episcopis Ecclesias aut Monasteria restituit. Facta fuerant exempla aliquot pacis ab eo confirmatæ:

Michael electus & statim ordinatus.

Subscriptis conditionibus stare negat.

unum ipse servaverat : aliud Alexandrini Sacerdotes habebant ; aliud Joannes Episcopus Saca , quia erat Episcoporum senior : aliud Episcopus Misraë. Alexandrinos Sacerdotes minis , pollicitisque adeo commovit , ut illud quod habebant ipsi restituerint : cessitque similiter Episcopus Saca ; ex quo enim Patriarchalem dignitatem sibi confirmatam vidit , tam impudenter & tyrannico more Episcopos , & reliquos omnes Christianos vexavit , ut obistere nemo auderet. Attamen Misraë Episcopus minas ejus , blanditiasque insuper habens exemplum pactorum , quod penes se habebat , reddere noluit. Eum Michael ab Ecclesiarum suarum Diocesibus administratione , Liturgiæque celebratione suspendit : nec contentus , vetuit ne in Ecclesiis Diocesibus ad publicas preces nominis ejus commemoratio fieret. Cumque Sanutius audisset yelle discipulos ex suis aliquot ad se mittere , ut quasi judicio condemnatum deponeret , Misraë exivit , & ad Monasterium Philomonis prope Fiumam se recepit , ubi aliquamdiu latuit , sede vacua relicta , adeo ut judicia Ecclesiastica nulla jam inter Christianos essent propter ejus absentiam : sed graviter expostulantibus Misraë primarius , iniquam sententiam rescidit , Episcopumque ad sedem suam redire permisit.

Mors Bederelgemali Vizii.

Anno Hegiræ 487°, qui Mostanfir 60^{us} Imperii , postremusque vitæ fuit , paucis ante illum mensibus obiit Bederelgemalus , supremus copiarum Ægypti Dux , Vizirusque simul , in quo totum rerum omnium autoritas erat , adeo ut Califæ , præter titulum , nihil superesset. Paulò antequam abiret è vita , obtinuerat ab eo Diploma amplissimum , quo filius ejus Abulkacim Chamschah , qui honoris gratiâ Afdal cognominatus est , successor ejus institueretur. Illum laudat magnopere Autor istius historiæ , quòd Ægyptum summâ prudentiâ , æquitate & temperantiâ gubernaverit , adeo ut felicitas publica ei deberetur : potestatem verò non modò paternæ æqualem obtinuit , sed majorem quodammodo.

Mors Mostanfiri Califæ Ægyptii.

Mostanfirus qui non diu supervixit , obiit eodem anno , ætatis 67°, regni 60° ; princeps nulla alia re , quàm longitudine regni , laudatus. Designaverat olim Nezarum filium suum natu majorem , ut sibi succederet : sed secundum Autorem nostrum mutato in fine vitæ consilio , juniorem natum annos viginti successorem appellavit. At Muhamedani Autores contraria scribunt ; factumque Afdali Viziri industriâ , ut Mostali (nam ita vocatus est Mostanfir successor) Califæ salutaretur , Emirique , Judices , virique

in Republica primarii fidem ei tanquam Domino jurarent. Erant quippe secretae inter Nezarum & Afdalum inimicitiae, ex quo hic Palatio egrediens, Afdalum venientem, quod statim equo non desiliret, contumeliâ affecerat, clamans ad eum, *Descende Armene*: tum quod Viziri dignitatem cuidam ex purpuratis promiserat. Itaque Afdalus, cum Mostansirus vellet, ut se vivo sacramentum Nezarô præstaretur, moram traxit: eo mortuo convocatis præcipuis Ducibus, & literatis, ultimam Califæ defuncti voluntatem fuisse dixit, ut filius ejus minimus regno succederet: quam productis testibus confirmavit. Nezarus & alii ejus fratres jurare in ejus verba coacti sunt: postea Alexandriam fugit, ubi obfessus est ab Afdalo, & captus: vitæque concessâ, cum res novas moliri non desineret, in vincula conjectus est, & fame necatus: vel, ut alii scribunt, inter parietes duos ad mensuram corporis ejus ædificatos constrictus, miserè periit.

Jam verò ad res Ecclesiasticas revertendum, de quibus nihil ferè memoriæ proditum est ab Autore hujus vitæ usque ad annum 10^{um} Patriarchatus Michaelis, quo ait obiisse Mostalin Califam Ægypti; postquam annos septem sub Afdali Viziri potestate regnasset, relicto impubere sex annorum filio Almanfore Abuhali, qui ad solium evectus, novo cognomine appellatus est Amerbeahacamilla, 7^{us} Fatimidarum qui in Ægypto regnaverunt. Fuit is annus Hegiræ 495^{us}, quem assignat quoque noster Autor sub Helalæi nomine: Kharagium verò numerat 491^{um}, Martyrumque anno 818 comparat. Is est J. C. 1102^{us}, qui respondet partim anno Hegiræ 499^{us}, partim sequenti 496^o, qui incipit à 15^a Octobris. Eo ipso anno Legatus ad Afdalum ex Æthiopia advenit, rogans ut Metropolita ad Æthiopes mitteretur. Accersitus ab Emiro statim fuit Michael Patriarcha, jussusque petitioni eorum satisfacere, quàm citissimè posset, ut novus Metropolita cum Legato proficisceretur. Cumque non facilè reperiretur aliquis huic ministerio idoneus, ex Vallis Habib Monasterio S. Marci quæsitum Monachum nomine Georgium, quem Metropolitam ordinavit & in Æthiopiam misit. Ibi post breve temporis spatium cum moribus incompertis omnium adversus se odia concitasset, à Rege captus, omnibusque pecuniis, quas nefariis artibus collegerat, spoliatus, & in Ægyptum remissus est. Scripsit etiam Rex Afdalo adversus eum, unde statim in vincula conjectus, diu mansit in carcere cum Fergio Monacho, quem ob vexatos Episcopos, alio-

Res Æthio-
picæ.

que Bederelgemalus pari poena affecerat. Quomodo hæc missio cum altera, de qua in præcedenti vita diximus, cohæreat, dicere non possumus.

Accusatio-
nes adversus
Episcopum
Misræ.

De Episcopo Misræ Sanhuto, cum autoritate Principis iussus fuisset Michael ne quid adversus illum moliretur, tamen mortuo Bederelgemalo, iterum vexare illum Episcopum aggressus est, adeo ut ex urbe sua fugere coegerit. Et illo 10^o Patriarchatus anno, congregatis Episcopis accusavit eum, quod tempore Cyrilli bis eodem die Liturgiam celebrasset, semel in Muhallaca, semel in Ecclesia S. Sergii, eaque de causa excommunicatus ab eo fuisset, nec absolutus: quam ob causam Episcopatu & Sacerdotio excidisset. Ita composita ad arbitrium sententiâ, Episcopos ad eam subscriptione firmandam metu coegit: omnes enim ferociam ejus & impotentiam timebant. Illam sententiam quasi ab Episcoporum concilio confirmatam misit per unum ex syncellis suis ad Sanutium, ut eum citaret, & deponeret; sed ille postquam diversa in loca fugisset, tandem Misræ apud amicum latuit. Erat in eadem urbe Michael habitans in domo quam ædificandam curaverat prope Ecclesiam B. Mariæ Muhallacam. Duobus verò ante festum Pentecostes diebus, Ecclesiæ S. Sergii, quæ erat in Castro *Elthemah*, Oeconomo dari iussit ador, quantum opus erat ad parandas oblatas pro solennitate proxima: *Doron* hoc loco vocantur, sicut in diversis hujus Historiæ locis. Significare etiam jussit Sacerdotibus & omni Clero, se in eadem Ecclesia festo Pentecostes sacra facturum: se enim cogitare de illa constituenda in Ecclesiam Patriarchalem: dicebatque primariis Laicorum & plebi: Ego sum Episcopus vester, nec à vobis fugiam. Die Sabbati profectus est cum multis aliis Demnhuram versùs, obviam Af-dalo, qui ex Tani redibat. Cum salutationis officio functus fuisset, jumentoque suo impositus, statim quasi ictu, peste percussus est, unoque aut altero verbo pronuntiato obmutuit, domumque reportatus, obiit Dominicâ Pentecostes, quæ incidebat in 30^{am} mensis Pachonis, anno 818^o Martyrum, J. C. 1102^o, Heg. 496^o, anno Patriarchatûs 10^o nondum completo: sedit enim annos novem & menses octo. Sanutius Episcopus Misræ ad Ecclesiam suam, magnâ civium lætitiâ reversus est.

Mors Cy-
rilli.

Tumultus
ob Ecclesiam
à Christianis
ædificatam.

Circa ea tempora tumultus adversus Christianos exitit, eo quod nobilis quidam Christianus Abulie-min, qui in Divano Provinciæ Inferioris sub Abdel-Messia ejusdem Divani Præposito of-

ficiū exercebat, novam Ecclesiam ædificavit in loco vicino *Piscina Abyssinorum*, prope aliam dictam *Abi kadamet*. Erat ibi antiqua Ecclesia eodem nomine appellata, ubi tria altaria in totidem facellis erant; primum S. Pachomii, secundum S^æ Maharielis virginis & martyris, tertium S. Severi Patriarchæ Antiocheni. Cū ædificiū vetustate labasceret, illud restaurare cepit Abulicemin absque diplomate aut licentia Emiri: qua ratione delatus est ad ejus tribunal, non modò quòd Ecclesiam absque illius venia ædificavisset; sed etiam quòd Mescitam vicinam vetustate collapsam solo æquasset, materiam omnem ædificandæ Ecclesiæ impendisset, locum ipsum occupasset, hortumque ibi fecisset. Res testibus adductis comprobata, eum exitum habuit, ut Ecclesia à Muhamedanis occupata atque in Mescitam conversa fuerit.

Patriarchatus Michaelis insignis fuit expeditione prima Francorum in Palestinam, de qua cū longè plura apud Autores nostros, quorum historias continet famosa illa Collectio sub titulo *Gesta Dei per Francos*, reperiuntur quàm apud Muhamedanos, pauca & necessaria dicemus. Quidquid enim dicere sæpè soliti fuerint viri aliquot in literis Orientalibus doctissimi, quasi Arabes historici nostros longè superent, neque absque illorum subsidio quidquam in sacri Belli rebus intelligi queat, verum id ex aliqua parte est, nam ab aliis quàm à Muhamedanis, nomina hominum & locorum, Dynastiæ distinctiones, statum denique Orientis qui tunc erat turbatissimus, agnoscere difficile est, nisi hæc ab Orientalibus ipsis petantur. At quantum ad rerum gestarum seriem, cū in pari, imò & majori ignorantia Europæ illi fuerint, ac nec Orientis, qui eos solos consulere vellet, non meliora reperiret passim, quàm quæ apud Elmacinum & Abulfaragium extant; in aliis plus verborum erit, rerum non magis. Utrumque igitur studium conjungat necesse est, qui hanc historiam diligenter explicare velit; sed ita tamen ut Autores Belli sacri Latinos, longè præferat; neque enim vel unum Orientales habent, qui non cum Willelmo Tyrio, scriptore accurato, & docto: cujusque virtutes omnes agnoscere non cujuscumque lectoris est; sed cum illis qui fordidi maximè judicantur, possit comparari. Cū porro historiæ illius pertractatio singularem operam desideret, in ea non aliter immorabimur, quàm ut præcipuas res suis temporibus assignemus; simulque moneamus quinam illi principes Muhamedani aut cujus-

Expedicio
Francorum
Hierosolymitana.

tes erant, cum quibus Cruce signati prosperis initiis pugnauerunt: summa enim apud Historicos nostros obscuritas nascitur ex confusis Soldanorum, Miramolinorum, Califarum, Emirorumque appellationibus: neque enim hæc ab advenis sciri facile poterant, quamvis ut verum fateamur, plerumque castigatè de illis loquatur Willelmus Tyrius, neque illius culpâ sed lectorum imperitiâ factum sit, ut quæ rectè in literas miserat, perversè intelligerentur. Ut igitur paucis dicamus de sacra Francorum in Orientem expeditione; hæc sunt quæ in Musulmanorum annalibus annuatim de illis referuntur.

Res illius
expeditionis
principum.

Anno Hegiræ 490°, J. C. 1096°, ab illis Nicæa capta est.

Anno 491°, J. C. 1097°, capta Antiochia, Mearra, & aliæ minores urbes, cum ingenti Muhamedanorum cæde.

Anno 492°, J. C. 1098°, die Veneris 13^a mensis Chaaban, capta sunt Hierosolyma. Erat urbs sub potestate Mostali Califæ Ægyptii: eam enim expugnauerat ante triennium, anno scilicet 489°, Afdalus Emir, atque inde pepulerat filios Ortok, Sakanum & Ilgazium, qui eam sub Seljukidarum clientela tenebant. Cum Bederelgemalus ejus pater supremam in Ægyptiaco Fatimidarum regno autoritatem sibi confirmasset, statim amissam Syriæ partem recuperare aggressus, Tyrum aliasque multas urbes ceperat: nam Fatimidæ olim totam Syriam, Palestinamque obtinuerant. Afdalus patris vestigia secutus, alias oppugnavit faciliore successu, quod mortuo Melikschah, filii ejus civilibus bellis vires amplissimas attriverunt: beneficiarii principes, in vicinos debiliores vi & fraude grassabantur: atque ita in multos exiguosque principatus divisa erat Syria. Sackmanidæ potentiores facti Hierosolyma obtinuerant: eaque urbe capta, Afdalus Præfectum urbi constituerat Afschkharedoulam, qui infelicitè eam adversus Francorum exercitum defendit. Atque Ægyptii Califæ nomine Legatio cum literis missa, cujus meminerunt Albertus Aquisanis, Willelmus Tyrius, & alii, eo spectabat, ut se hostem Turcarum ostenderet, & Christianos spe alicujus fœderis incautos opprimeret. Turcarum autem nomine, quod apud rigidiores Muhamedanos opprobrii vim habebat, non modò designabantur Seljukidæ qui rerum potiebantur jam à Tozrulbeghi tempore, quique revera Turcicæ erant originis; sed etiam per contemptum ita vocabant Fatimidæ, Abbassidas qui ex Chorasana, Turkestaniaque prodierant, quosque ut invasores Pontificatus atque Imperii detestabantur, diuisque devovebant. Nam simul atque urbs aliqua in Ægy-

priorum potestatem venerat, publica pro Califis Fatimidis tanquam legitimis Pontificatus & Imperii successoribus fiebat oratio. Atamen cum tot Francorum victoriæ, Muhamedanorumque ad centena multa millia cædes, magnum toto Oriente terrorem iniecissent, coeperunt illi compositis, quantum fieri poterat, privatis simularibus, de communi periculo cogitare. Itaque copias ex omnibus ferme provinciis eduxerunt præterquam ex Ægypto: unde nisi post cladem urbis sanctæ, pedem Afdalus non extulit.

Mirum nemini esse debet, ea clade tantopere perculosos Muhamedanos fuisse, qui urbem celebrem sanctitate, & ad quam Christiani ex toto orbe confluerent, ereptam sibi deplorabant. Sed non minor fuit Jacobitarum Ægyptiorum dolor, tantum erat illo tempore hæresis illius adversus Ecclesiam Orthodoxam odium. Nec illum dolorem suorum Autor noster dissimulat, dum ita scribit. *Inde factum est ut nos Christiani Jacobitæ Coptitæ non amplius peregrinationis religiose ad eam urbem instituende facultatem habeamus, sed neque ad eam accedendi. Notum est enim odium eorum adversus nos, quasi in fide erremus, adeo ut palam nos impietatis condemnent.* Hæc propria ipsius verba referri, visum est operæ pretium, ut ex eo loco & multis aliis quæ alibi relata sunt intelligatur, quàm absint longè, non modò à vero, sed etiam à verisimili, quibus visum est doctrinas quæ consensum perpetuum Ecclesiarum Orientalium & Occidentalium certissimè demonstrant, præsertim de veritate corporis & sanguinis Christi in Eucharistia, in Orientem illatas & propagatas fuisse, ab eo tempore quo Franci in Palestina regnaverunt. Videmus enim statim ademtam ab illis fuisse Jacobitis Ægyptiis sacræ peregrinationis libertatem, quasi hæreticis. Paulò post, coepere Orientales Christiani Latinorum fidem moresque perspicere; statimque illos errorum, tam in fide quàm in disciplina, multorum damnaverunt; adeo ut ne minimis quidem in rebus illis parcerent, quæ salva fide possunt tolerari. Quos verò adversus Latinos edidere Tractatus; illi circa regni Hierosolymitani tempora proculdubio facti sunt, cum multa accusationis capita contineant, quæ disciplinam spectant, corruptam, ut omnes sciunt, & prope everfam in illius Belli licentia. Talis est Tractatus Petri Melichæ Episcopi, qui à multis aliis descriptus est: tum Expositio Liturgiæ facta per Dionysium, Barsalibi, & eo consilio, quod ipse testatur, ut haberet Metropolitæ Hierosolymitanus Jacobitarum, unde suæ Ecclesiæ

Christianis
Ægyptiis pro-
hibita à Lati-
nis Peregrina-
tio Hiero-
solymitana.

De Nili ob-
structione.

P. 289.

fidem & instituta adversus Francos qui urbem obtinebant, defenderet. Sed plura de illis odiis dicentur, & alibi dicta sunt.

Aliam, cujus nulla apud Historicum nostrum memoria est, ex Elmacino narrationem referemus, quæ cum hujusmodi sit ut eruditorum ingenia exercere non mediocriter debeat, ipsius verbis illam referemus. *Tempore illius, nempe Michaelis Patriarchæ, Nilus quamplurimum decrevit: ita ut Mustansirus illum in Æthiopiam mitteret cum muneribus & ornamentis multis: ei-que obviam venit Rex ejus: & cum illum prostratus salutasset, quaesivit, quæ de causa eò venisset, & exposuit illi quoddam Nilus Ægypti diminutus esset, unde magnum regioni & populis damnum consequeretur. Itaque diverticulum seu septum recludi jussit, ut aqua inde in Ægyptiacas regiones deflueret, idque propter adventum Patriarchæ: crivitque Nilus una nocte ad tres cubitos & ad plenam mensuram exundavit, irrigataque terra & consita est: magnoque cum honore rediit Patriarcha in Ægyptum, illumque Mustansirus Princeps beneficiis & veste ornavit. Eandem historiam, ut multa alia, ipsis verbis ex Elmacino refert Makrizius, & ex eo, ut videtur, non tamen nominato, Autor non valde antiquus Descriptionis Raudæ, cui titulus *Kawkab el Rawdet*, cujus maxima pars occupatur in Collectaneis de Nilo per ordinem distribuendis; & non deerunt fortassis alii qui eandem exscripserint. Ipsam quoque, sed ex Elmacini quem solum viderat testimonio, retulit, & attento examini subjecit vir clarissimus Jobus Ludolfus, deque ea multum dubitat, nec immerito. Absurdum quippe illi prorsus videtur, ut diverticulo tanta vis aquarum in aliam partem, Orientem versus emitti posset; neque tamen Æthiops ille suus Gregorius id impossibile judicabat. Dicebat autem se à fide dignis hominibus accepisse, haud procul ab eo loco ubi cataraëtæ Nili sunt, terram omnem, Orientem versus, declivem esse, & nisi mons unicus obstaret, Nilum potius illuc quam in Ægyptum aut in Mare Septentrionale fluxurum. Igitur monte illo, labore non adeo difficili perfollo, flumen omne averti & in Mare Orientale, id est Rubrum, derivari posse. Gnarum id Turcis, multisque Lusitanorum; & Imperatorem Æthiopiarum hanc ob causam sæpe olim præclaras condiciones à Saracenis obtinuisse: imo id illum semel effectui dare voluisse, acque laborem suis immoderate: sed à Christianis Ægypti exoratum fuisse, quos simul omnes peripuros consulerit. Hæc ex Gregorii Æthiops*

Hist. Æthiop.
L. 1. c. 8. &
Commentar.
ad cum locum
p. 131. § 46.
Warßb. Rel.
II. p. 47. Gall.
61.

pis relatione Ludolfus. Id etiam, siue verum siue falsum fuerit, credidit sanè fieri posse maximus ille Alfonso Albuquerque, ut ex Commentariis ejus patet. Quòd si mouere autoritas Elmacini Ludolfum potuit, multò magis Makrizii, qui, si quis umquam inter Orientales, magno judicio scripsit: ut Autoris etiam alterius quem nominauimus. Kircherum nihil moramur, qui omnia quæ Indici Patriarcharum suo addidit, non ex Autore ullo idoneo, sed ex Elmacino descripsit. Verum aliam quoque habemus autoritatem, in Epistola Magistri Hospitalarii Hierosolymorum, ad Carolum VII^m Francorum Regem scripta anno 1448^o, in qua loquens de Presbytero Joanne Indorum Imperatore, hæc habet. *Destinavit præterea Oratorem hic Indorum Rex Soldano Babylonia cum muneribus, sicut mos Orientalium est: ei denuntiatis, nisi ab affligendo Christianos desisteret, se bellum pestiferum civitati Mecha, ubi sepulcrum Machometi esse dicitur, Ægypto, Arabia, & Syria quæ diuioni ipsius Soldani subiectæ sunt, illaturum, flumenque Niloticum qui Ægyptum irrigat, & sine quo nullus ibi vivere posset, surrepturum, & iter aliud illi daturum simili pacto minitans.* Habetur hæc Epistola Spicilegii Tom. 7^o: neque defutura videntur aliquot ejusmodi testimonia Autorum recentioris ævi, qui eam sententiam confirmant. Attamen magis accedendum videtur ad eorum opinionem, qui huic Elmacini narrationi fidem non faciliè adhibendam existimant. Nota sunt eruditis, quæ de Nili fontibus nostro aut superiori sæculo detectis, Autores multi scripserunt, præsertim Hieronymus Lupus, qui in Æthiopia per annos aliquot vixerat: & Baltazar Tellezius, uterque è Societate Jesu; quorum hic in historia Æthiopiæ quam Lusitanicâ linguâ edidit, veram fontium descriptionem dedit, nec fabulosas, ut alii, sed certas causas exundationis Nili, quæ antiquos tantopere exercuit, dum remotissimas & abditas investigando, eas negligebant quæ verisimillimæ videri debebant; & quas Autores antiquissimi tanquam notissimas tradiderant, antequam experientiâ oculatorum testium confirmatæ fuissent. Jam enim certum est imbres qui in Æthiopia continui & largissimi decidunt mense Maio, immensam illam vim aquarum producere, quæ Nilum augent tantopere, ut totam Ægyptum inundet: & id multi scripserant conjectando tamen: quorum collecta testimonia edita reperiuntur ab Henrico Stephano ad calcem Herodoti. Sed ut rem certam tradiderat Athanasius, aut quicumque tandem sit scriptor vitæ

P. 4. 6. 7.

Hist. de Æ-
thiop. L. 1. 6. 5.

Itin. Benjam.
p. 118.

Hist. Egypti
t. 2. a. 1 hos an.
nos H storia
Nilotica.
G.ogr. Nub.
Clim. 3. p. 3.
p. 58.

Antonii. Strabo l. 4^o & 17^o, Heliodorus in *Æthiopicis*, & alii. Parem causam assignavit quasi ab *Æthiopibus* acceptam Benjamin Tudelensis in Itinerario suo : & alii fortassis ; ut ex recentioribus Leo Africanus libro 9^o, & multi alii. Hanc quoque rationem cum aliis retulerunt Arabes Geographi aut Historici ferme omnes, sed simplicior erat quàm ut recipi posset. Cùm igitur ex imbrium copia, Nilotica incrementa producantur, fieri nequit, aut impossibile saltem videtur, maximi fluvii cursum averti in alterum Mare posse : atque ita totam Elmacini narrationem contemnendam arbitramur. Neque est cur historici autoritate moveamur ; quæ ut ex tota hujus Epitomes serie satis apparet, mediocris, si non planè nulla esse debet, præsertim cùm Autor vitæ Michaelis, ætate suppar, qui Legationis Regis *Æthiopiæ* meminit, & missi ad eum Metropolitæ quem Michael ordinavit, nec professionis Patriarchæ, nec clausi apud *Æthiopas* fluminis, meminerit. Adde quòd cùm Michael nonnisi annis duobus Mostansirum viderit, nempe anno 486 & 487^o, quo obiit, illis ut etiam 485^o præcedente, aqua ultra sexdecim cubitos creverit. At id fieri non poterat, si clausa fuissent ostia quibus ab *Æthiopia* in *Ægyptum* flucret, neque annonæ raritas metuebatur, cùm ad duodecim cubitos incrementum pervenerat. Nam ut Edrisius vel quicumque sit Autor Geographiæ Nubienfis vulgò dictæ, omnesque Arabes & Persici Geographi docent, cùm incrementum Niloticum est cubitorum sexdecim, terræ magna pars alluitur ; cùm decem & octo, tota regio ; estque tunc summa ubertas : cùm viginti, damnum infert : & modò duodecim excederet, nihil erat periculi. Testis de suo tempore Julianus Augustus Ep. 50^a ad Ecdicium *Ægypti* Præfectum, quæ non sine lætitia, ut videtur, nuntiat fluvialis exundationis mensuram ad cubitos quindecim ascendisse. Anno Mostalis 1^o, qui erat 488^{us}, cubitorum 17½ fuit : 489^o, 13. cub. digitorum 17. 490^o, cub. 17. dig. 1. 491^o, cub. 18. dig. 16. 492^o, cub. 18. dig. 14. 493^o, cub. 18. dig. 15. 494^o, cub. 18. dig. 7. 495^o, quo obiit Mostali, cubit. 17. digit. 13. Itaque tam extremis Mostansiri annis, quàm toto Mostalis vitæ decursu, ex quo Patris loco regnavit, semper Nilus exundavit ; cùm tamen, si Elmacino credendum est, eo anno quo in *Æthiopiam* Michaellem missum ait, non modò non creverit, sed etiam diminutus sit. Imò omni illo temporis spatio, si an. 489^{um} excipimus, ad eam mensuram crevit, quæ ubertatem efficeret, quamvis tredecim cubitorum incrementum

publicæ inediæ causa non esset, sed minoris fertilitatis. Cùm igitur ex certis annalium Nili monumentis, quæ extant in Libro qui Tarich Nil appellatur, & qui singulis annis incrementa notat, & Ebn-Werdi in Historia sua Ægyptiaca, probaverimus fluvii solitam exundationem toto decursu Patriarchatus Michaelis non defecisse, imò si unicum annum excipias, fuisse ad justam mensuram, non est cur Elmacini testimonio quidquam tribuatur. Hæc fusius & minutius fortassis quàm par erat, persequi visum est operæ pretium, tum quia non obvia sunt, tum quòd ex neglecta una fabella, magna Geographiæ & historiæ conturbatio oritur: tum quòd virum doctissimum Ludolfum in ea difficultate solvenda plurimum laborasse agnoscamus: tandem quia nuper alius magni sanè inter literatos nominis nobisque dum viveret conjunctissimus Bartholomæus Herbelotius, illam retulit ex Elmacino in Bibliothecam Orientalem suam, absque ulla censura. Quamvis autem neminem fortasse in his peregrinis literis doctorem nostra aut superior ætas viderit, tamen quia Collectanea illa quæ in Alphabetum digesta sunt, caruerunt postrema Autoris emendatione: non majorem habent auctoritatem, quàm à scriptoribus ex quibus illa desumpsit: hic autem non alium quàm Elmacinum nominat.

Quæ diligentissimi Continuatores Bollandiani laboris, de hoc Patriarcha scripserunt, omnia ex Elmacino, & observationibus Ludolfi translata sunt: quid de illis sentiendum sit, ex illis quæ huc usque diximus, satis intelligitur. Rectè porro Michaelen non in carcere detentum, ut habet Elmacini versio, sed Eremitam, viri doctissimi fuisse intellexerunt: rectius etiam si intelligatur cum ex illo Ascetarum genere fuisse, qui *Habis*, hoc est *Ἐσθλαῖστοι*, seu Reclusi dicuntur. Nesteruha pagus Ægypti, unde ortus erat Michael, non Nesterudu, quæ est vox nihili.

f. 512. &
 seq.

MACARIUS PATRIARCHA LXIX.

MACARIUS
 PATR. LXIX.

VACANTE per Michaelis obitum Alexandrina Jacobitarum Sede, ad Misræ Clerum & cives, Monachosque S. Macarii pertinebat ea vice successoris ejus electio. Dubitari posset an Monachis, tanquam potiori Laicorum parti, jus esset ferendi suffragia: forè quia in Diocesi Misræ Monasterium erat, nisi jam ab aliquot sæculis jam tunc in usu receptum esset, ut inter eos multi

Monachorum S. Macarii jura ad eligendum Patriarcham.

ad sacerdotium aut diaconatum promoverentur. Præterea Monasterii hujus summa erat apud Coptitas, præsertim à Benjamini tempore, qui per annos aliquot ibi latuerat, antequam capta à Muhamedanis Ægypto prodiret, dignitas & existimatio, tum quòd esset privilegiis multis ornatum, tum etiam quòd Patriarchæ ibi Quadragesimam & Festa Paschalia ut plurimum celebrabant. Malim igitur convocationem illam Monachorum ad comitia Patriarchalia, referre ad communem disciplinam, cujus originem Autores non assignant. Quantum ad alternationem illam, cujus exempla jam aliquot occurrerunt, pertinet, illius quoque origo nobis obscura est; nec alia videtur fuisse, quàm quòd præcipui inter Christianos, cum essent in Aulicis Ministeriis, præsertimque Divanorum sive Curiarum Scribæ plerumque forent, obtinuerunt autoritate sua, tam apud Christianos quàm apud Principes, ut in urbe, quæ jam caput regni erat, & unde peti debebat electionis confirmatio, comitia aliquando fierent; ut ipsi, qui ob negotia sua Alexandriam proficisci non poterant, liberè illis intervenirent; tum etiam ut Alexandrini, qui tanquam Clerus & Cives urbis primariæ, & in qua Patriarchalis Cathedra antiquitus fuisset, omnem illorum cõmittorum potestatem ad se non traherent, quod sæpius conati sunt. Quidquid sit, ea tandem fuit per aliquot sæcula consuetudo, ex qua satis intelligitur, quodnam esset in eligendo Patriarcha jus Cleri & Plebis. Nempe in ea urbe, cujus vices erant, conveniebant Episcopi, Monachi, & etiam Laicorum præcipui, etiam ex aliis urbibus, ut ex sequenti narratione fiet manifestum. At electionem, quæ à solis Laicis facta fuerit, aut etiam à solis Sacerdotibus, nullam huc usque observavimus; neque talem contigisse, aut secundum illarum Ecclesiarum disciplinam fieri potuisse, accuratè demonstrant ea quæ de electione Patriarchæ scribunt Ebnassalus in 2^a Operis sui Theologici parte, & Abulbircat.

Literæ
ad vocandos
Episcopos ad
electionem.

Mortuo igitur Michæle, Clerus & Cives Misræ, ubi conventus indicij debebat ad eligendum ejus successorem, literas miserunt ad omnes Episcopos, tam in provinciâ inferiori, quàm in superiori, seu Sahide, quibus significabant de obitu Patriarchæ, eosque hortabantur ut in urbem, quàm citissimè fieri posset, convenirent, ad eligendum ex communi omnium consensu, qui ad eam dignitatem sustinendam magis idoneus videretur. Pars literæ ad Alexandrinos misræ sunt; tam Kahiranorum, quàm Monachorum S. Macarii nomine. Cum autem ipsò Pentecostes die, atque adeo

PATRIARCHARUM ALEXANDRINORUM. 48

MACARIOS
Patr. LXIX.

in media ætate, Michael obiisset, omnesque occupati essent in colligendis terræ fructibus, Episcopos quoque ea cura tangeret, ob primitias, decimas, & alia Ecclesiarum suarum jura, pauci admodum Misram venerunt ante festum sanctæ Crucis. Dies hujus solennitatis in Calendario Coptitarum est 17^{us} mensis Toth, qui cùm non exactè respondeat Septembri Juliano, (nam incipit à 29^a Augusti) eodem die tamen apud nos & apud illos festum celebratur: nam 17^{us} Thoth est 14^{us} Septembris, quo Exaltatio sanctæ Crucis apud nos agitur.

Qui primi venerant, Misram profecti sunt ad Monasterium S. Macarii, ut cum Episcopis, quorum aliqui jam eò se contulerant, & Monachis communes ad Deum preces facerent pro felici boni Pastoris electione. Erat jam inchoatus mensis Paophi, diesque aliquot partim orando, partim consultando transacti sunt, dum inquireretur de Monachis qui doctrinâ & morum probitate præ cæteris commendarentur. Inter omnes duo præcipuè publicâ famâ, omniumque testimoniis laudati, digni visi sunt qui cæteris præferrentur, Macarius Sacerdos ad sancti Macarii, & Ju-
nes, sive Joannes Diaconus; constitueruntque inter se Episcopi, & cæteri qui ipsis in consilio adfuerant, ut alteruter eligeretur in Patriarcham. Scripserunt igitur ad eos qui Kahiræ adhuc aut Misræ hærebant Ecclesiasticos & sæculares, de utriusque laudibus, & per easdem literas polliciti sunt se alterutrum, qui dignior illis videretur, inaugurationi assensuros. Illi verò congregati sunt in urbe veteri, seu Misra, ad Ecclesiam S. Sergii Martyris in Castro *El-Chemah*; lectisque literis, & earum relatione facta, tum auditis qui Monachos illos duos noverant, Macarium prætulerunt. Erat enim senex, eloquens, Canonum, qui ad Regularem vitam spectant, peritus, rerumque experientiâ subactus. Joannes à doctrina, & dicendi facultate commendabatur; sed erat juvenis: Canones autem qui conditiones necessarias continent in eo qui Patriarcha eligendus est, juxta Abulbircat & Ebnassalum, præcipiunt, ne quis ad eam dignitatem assumatur, minor annis quinquaginta. Omnes igitur una voce Macarium proclamaverunt, scripseruntque ad congregatos Episcopos quòd in eum vota omnium consensissent: illi electionem ratam habuerunt.

Mox missi qui Macarium adducerent: at ille invitus & relictus, dixit se neque doctrinam habere talem, neque in rebus

Macarii
electio.

Ppp iij

Ecclesiasticis satis esse versatum, ut tanto muneri par sibi videretur: præterea natum se ex secundo conjugio, atque ita non posse legitimè ordinari. Excluduntur quidem per mox laudatos à nobis Canones, qui ex matre secundis nuptiis implicata nati fuissent; sed istius irregularitatis, quam in se accusabat Macarius, non meminerunt. Verùm nulla ad illius reluctationem ratione habitata, statim ornatu Patriarchali vestitus est in ipso loco, ordinatusque Dominicà 13^a Athyr, anno Martyrum 819^o, J. C. 1103^o, Hegiræ 497^o, juxta vulgarem supputationem 492^o, secundum Kharageos. Postea Misram ductus est, divertitque ad Ecclesiam S. Cosmæ prope pontem vicinum horto Zaherio. Abulfadel cognomine Ebn-Elescof, seu Episcopi filius, qui magna apud Emirum supremum gratia & auctoritate valebat, (erat enim ipsi ab actis & epistolis, Divanorumque aliquot præfecturam administrabat,) obtinuit ab eo ut novum Patriarcham benignè susceperet; & quandoquidem Monachus erat, atque adeo pauper, ut ne drachmam quidem possideret, rogavit Emirum, ut remitteretur ei pecunia quam donarii titulo Præfecti Alexandriæ à novis Antistitibus exigebant. Id ultrò concessit Afdalus, Macariumque cum maxima pompa ad se venientem benignè suscepit, eique literas sigillo regio munitas scribi jussit ad omnes Præfectos, Duces & Ministeriales Divanorum, quibus ei auxilium, si opus foret, favoremque præstare jubebantur; tum prohibebantur ab eo quidquam exigere sub quocumque titulo. Cùm verò Macarius ad salutandum Emirum processit, exivit ex Ecclesia S. Cosmæ, præcuntibus Sacerdotibus qui psalmos & hymnos ex libro caneant: Evangeliaque, thuribula & cereos accensos præferebant. Episcopi Patriarcham cingebant: Laicorum primarii sequebantur: cohortes aliquot præsidiariorum militum latera claudebant. Pari honore Alexandriæ à Præfecto urbis susceptus est: factaque est ejus inauguratio in Ecclesia S. Marci eodem anno, 12^a mensis Cohiac, Ea ratione vacavit sedes, mensibus quinque, diebus tredecim. Erravit, ut sæpè, Abulbircat, dum assignavit ordinationi mensem Bayni, & annum Martyrum 817^{um}: & cùm Michaëlem anno superiori obiisse scribat, ex ejus calculis vacavisset sedes anno integro. Elmacinus annum Martyrum 819^{um}, eundem cum Autore nostro, 1^{um} Michaelis numerat: sed cùm anno 496^o Hegiræ comparat, neque errare, neque accuratiori supputationi contradicere censendus est. Nam quando electus est Michael, annus Hegiræ

decurrens numerabatur 496^{us}; qui inceperat à 15^a Octobris: defuit verò 3^a ejusdem mensis, qui secundus erat in anno Ægyptiaco. Quòd autem Alexandria confirmatum eum asserit, nihil aliud his verbis significatum voluit, nisi proclamationem, *Εὐδαιμονία* Græci vocant, in ea Ecclesia factam, quæ adeundæ, ut vulgò loquimur, possessionis forma erat. Eadem habet Makrizius, qui ubique Elmacinum exscribit. Hæc autem annotamus, quia versio ab Erpenio facta, tot erratis præsertim circa res Ecclesiasticas obsita est, ut à nemine sæpè possit intelligi. Quis enim per *præfecturam Ecclesiæ* ordinationem sacramentalem significari suspicetur? aut *rem sacram administrare*, idem credat ac Liturgiam celebrare, & multa similia?

Cùm tandem novus Patriarcha in Alexandria D. Marci Ecclesia proclamatus & salutus fuisset, magna ipsi cum Alexandrinis contentio fuit, ob annuam aureorum quingentorum pensionem, qui in sumtus Ecclesiarum deputabantur. Cùm enim syngrapham, quâ decessoris sui exemplo quingentos aureos quotannis persolvere polliceretur, ab eo exigerent; ille subscripturum se negavit, testatus se daturum quæ posset, plura etiam, si facultas supereretur; verùm suæ sibi paupertatis conscium nunquam obligatum se ad præstandum quod fortasse solvere nequiret. Si hæc ad eum excusandum non sufficerent, rogabat se ut sinerent ad Monasterium reverti; quod sibi optabilius foret, quàm dignitas ad quam illum nihil tale cogitantem vocavissent. Tandem multis alio citroque sermonibus habitis, persuaderi sibi passus est, ut aureorum ducentorum quotannis solvendorum syngraphæ subscriberet, quâ contenti Alexandrini conqueverunt.

Contentio
cum Alexan-
drinis,

Venit deinde Misram, seu Kahi à n veterem, ut primam illic Liturgiam solennem celebraret, atque proclamaretur. Advenerat Sabbato, 24^a Cohiac; Dominicaque sequens huic officio destinata fuerat: sed intervenientes Monachi S. Macarii, dixerunt primam Liturgiam solennem, post eam quæ Alexandria à novis Patriarchis celebrabatur, ex antiqua consuetudine alibi quàm in Ecclesia S. Macarii celebrari non debere: eam legem à decessoribus ejus observatam, quam si immutare conaretur, aut Misræ in Ecclesia Muhallaca sacra faceret, antequam fecisset in altari S. Macarii, pro certo sciret nullum ipsi cum Monachis illius Monasterii fore commercium, neque commemoraturos nomen ejus ad altaria sua in Liturgiis aliisque precibus publicis, neque permissuros

Alia cum
Monachis S.
Macarii.

ut eorum Ecclesiam ingrederetur, aut in ea sacra faceret; sequere vitam prius, quam loci prærogativam amissuros. Ne igitur animos eorum majorem in modum exacerbarer, eâ Dominicâ Liturgiam non celebravit, neque diebus sequentibus, donec ad S. Macarium profectus, Monachis satisfecisset, celebratâ Liturgiâ in eorum Ecclesia, Dominicâ 23^a Tybi. Ultima die ejusdem mensis Misram rediens post solennem Synaxin, in Ecclesia S. Mariæ Muhallaca proclamatus est.

Instrumentum electionis Patriarchæ publicè lectum.

Pontif. Seguer. Ms.

Observat Autor noster in ea cæremonia inter Missarum solennia lectam esse formulam quam *Taklid* vocant, Græcè, Copticè & Arabicè. Literæ illæ erant communi Episcoporum, & præcipuorum Ordinis Ecclesiastici & Monastici nomine scriptæ ad omnes Episcopos, Sacerdotes, Diaconos, omnemque plebem Christi amantem, Alexandriæ & in tota Ægypto, quibus postquam significaverant obitum Patriarchæ, cujus memoriam laudibus proficui solebant, testabantur se in ejus locum elegisse, alterum nomine talem, cujus simul doctrina, virtutes & antè acta vita commendabantur. Huic instrumento subscribebant Episcopi, postea tres Sacerdotes Alexandrini, tresque Diaconi: tum Komos seu Archimandrita S. Macarii, tandemque primi dignitate inter cives Alexandrinos & Cahiranos. Tale erat exemplum quod suo tempore observatum inferuit Abulbircat operi suo, etiam propriè non *Taklid*, seu *Tazkjet* vocari videatur. Alterum, quod eo nomine designat instrumentum, & cujus formam exhibet Copticè & Arabicè, simile est quodam modo, & vocatur Græca voce *Συναπτή*, quasi commendatorias tantum literas contineret: cum tamen prioris exemplo, electionem novi Patriarchæ factam doceat, eo tantum discrimine quod prolixius est & ornatus. Tertium tandem utraque lingua exhibet, quo propriè & paucis verbis significatur, talem electum & ordinatum fuisse Patriarcham Alexandin. Utriusque hujus instrumenti formulas reperimus in Pontificali Segueriano, Coptico - Arabico. Prima quæ ea est quam *Taklid* & *Tazkjet* vocat historicus, extat in eo Codice Græcè, Copticè & Arabicè, & ea vocatur voce Græca *Ἐνθισμα*, hoc est Decretum de Electione. Altera *Συναπτή* vocatur: Tertia, cujus historicus noster meminit, in eodem Pontificali non extat.

Quamvis porro non dubitemus prolatam ab illo Autore actorum formam esse legitimam, quia tamen scripsit longè post illa
in

in quibus versamur tempora, mutationem aliquam intervenisse facile fuit. Nam Autor noster unius Instrumenti meminit, quod quidem legi debebat in illis Ecclesiis ubi novus Patriarcha proclamabatur: & ex quo constabat electionem factam esse secundum Canones, electum esse Monachum, ejusque electionem factam fuisse, communique consensu approbatam ab Episcopis, à Clero, à Monachis præsertim S. Macarii, & à Laicorum Alexandria Misræque primoribus. Prima quam Abulbircat exhibet forma, antiquior omnino censenda est, & statim literis consignata antequam ordinatio celebraretur; electo stante adhuc coram Episcopis, qui in Throno sive superiori loco erant: & inter duos Sacerdotes medio. Eam verò formulam instrumenti, scriptam in charta, antiquior Episcoporum dabat Diacono, qui ex Ambone, ut notant Abulbircat & Ebnassalus, eam legebat: antequam novus Patriarcha ordinaretur, & in ipsa ordinatione. Secundæ formulæ literarum locus fuit post celebratam ordinationem ubi *ἐὺς ἡμεῖς* fiebat; & ea est de qua Autor noster loquitur, ex cujus verbis docemur adhuc incunte 12^o sæculo servatum fuisse Alexandriae morem, ut illæ literæ quas *Συνεσις* vocant, Græcè ad antiquitatis honorem legerentur: quod sequentibus quoque sæculis observatum fuisse Pontificalis liber testatur.

Jam verò ut ad Patriarcham revertamur, facta illius proclamatione Misræ in Ecclesia Muhallaca, more consueto Liturgiam celebravit; & omnibus qui in Ecclesiam convenerant Christianis, communionem distribuit: id enim observabatur ubicumque primam solennem Liturgiam novus Antistes celebraret, ut Ebnassalus & Abulbircat notaverunt, & Autores istius historiæ multis in locis.

Anno 5^o Macarii, qui erat Hegiræ 501^a, juxta Autoris supputationem, annorum scilicet Helalæorum sive Lunarum, lectum est Diploma Emiri in aula majori Palatii, quo edicebatur, ut eo anno deincepsque supprimeretur computandi ratio secundum annos Kharagios dictos, qui erant solares. Fusè hæc explicat Makrizius in Descriptione Ægypti: sed cum hæc ad Chronologiam & Kalendariorum rationem spectent, non ad institutum nostrum, nec paucis verbis explicari queant, scire sufficit ad hæc usque tempora Coptitas, etsi in suis negotiis contractibusque inter Christianos semper æram Martyrum quæ ducit initium ab anno J. C. 284^o, usurpaverint præsertim in rebus Ecclesiasticis, tamen secutos fuisse

Mutatio for-
mæ anni Ægy-
ptiaci.

se aliam annos computandi methodum, de qua nihil quod sciam huc usque ab Chronologis proditum est. Supputabant siquidem annos ab Hegiræ capite: verum cum Muhamedani annis lunaribus utantur, qui dies 354 efficiunt, Coptiæ eundem annum constituerant mensibus propriis suis, qui 30 dierum sunt, quique adjunctis Epagomenis ad verum annum solarem reducuntur. Hos igitur menses cum adhibuissent ad supputandos Hegiræ annos, triginta tribus annis elapsis, annus currens Hegiræ uno anno Copticum antevertebat; atque ea est discriminis ratio quam aliquando notavimus: igitur anni *Kharagii* solares sunt: ita dicti quod secundum eos menses, qui Ægyptiacum annum componebant, atque adeo solares, Tributum quod *Kharage* appellant, exigeretur. Hanc igitur supputandi rationem Edicto sustulit Afdalus anno 501*; adeo ut anni solaris mentio nulla in tabulis publicis, aut tribunaliis fieret. Tentatum id antea fuerat à Mostangido Califa, sed nullo successu. Hujus Edicti qui præter Makrizium meminit, vidimus neminem: neque de ea mutatione quidquam habent Annales Ægypti. Ea verò occasione monitos lectores velim Josephum Scaligerum virum sanè doctissimum, quique magnos in Orientalibus literis progressus fecerat, de iis tamen quæ ad Orientalium Cyclos, Periodosque pertinent, quamvis ubique testimoniis ex quacumque lingua quæsitis libros suos de Emendatione temporum insererit, in hoc tamen genere nihil omnino vidisse. Unde non modò multis locis ubi aquam hære sibi faretur, sed ubique fermè errat; tantùm abest ut ex ejus dictatis emendari Chronologiæ, quam in hoc opere sequimur, ratio debeat.

Tempestas.

Anno 504*, ingens turbo ventorum, pulverisque exortus est, sequentibusque diebus aer fervidus, rubensque tanquam flammæ discurreret, quæ tantum omnibus terrorem incusserunt, secutis tenebris densissimis, ut plerique domos suas reliquerint, existimantes instare judicii diem.

Terræ motus.

Anno Martyrum 818^o, quem comparat Autor cum anno 501^o Kharagio, horâ 3^a, feriâ 6^a, 3^a Toth, ingens terræ motus Misræ fuit: sed erratum à librario est; legendumque 828^o, ut habet Elmacinus: & annus ille est Hegiræ 506^{us}. Ea ipsa nocte Ecclesia S. Michaelis, *Muētara* dicta, in Insula Misræ diruta est, jussu, ut creditum, Afdali Emiri; quæ tamen ruina terræ motui adscripta fuit, quo Makrizius concussam magna ex parte fuisse scribit, jubenteque Emiro quod superfuerat dejectum, ob

hortorum suorum viciniam. Verisimilior tamen Autoris nostri narratio est, qui scribit Josephum quemdam fidei desertorem, Præfectum Fabrûm Emiri, dum Raudæ quæ est insula prope Misram ædificium amplissimum construeretur, petiisse à Christianis pecuniam, ne illud ad Ecclesiam usque vicinam produceret: promississe quidem illos, sed non præstitisse, imò cum contumelia comminatos fuisse, se ejus crimina ad Sultanum delaturos. Unde ille vindictæ occasionem quærens, ea nocte quæ terræ motum secuta est, operas immisit, à quibus Ecclesia everfa est; fama quoque sparsa, quòd muris vetustate collabentibus, ob Christianorum in illis reparandis negligentiam, conciderit.

Anno Martyrum 833^o obiit Sanhutus Episcopus Misræ, de quo dictum est superius non uno loco, & quem impensè laudat Joannes filius Sahedi, Autor hujus historiæ. Corpus ejus delatum est in Ecclesiam S. Sergii, comitantibus Episcopis, Sacerdotibus, & Laicorum primariis; & post solennes exequias illatum sepulcro, quod sibi & fratri suo Severo Hieromonacho, prope Ecclesiam vicinam loco *El-Habesch* dicto paraverat. Exequiis & orationibus Christianorum more celebratis interfuit cum aliis Gregorius Patriarcha Armenorum. Aberat Macarius, scripsitque ad eum Joannes filius Sahedi, tam privatas quàm publicas, nomine Cleri & Civium Misræ literas, quibus petebant ut vacanti sedi dignum Episcopum constitueret. Respondit ille neminem se ordinaturum, nisi quem ipsi elegissent, neque in se moram ullam futuram. Suspicati sunt Patriarcham ita respondisse, ut sedem vacantem relinqueret, ipseque, ut Michael conatus fuerat, Episcopatum per Vicarios administraret. Sed cum negarent licere Episcopo duas Ecclesias tenere simul, congregati in Ecclesia S. Sergii, duodecim ex diversis Monasteriis viros religiosos nominaverunt; ex illis quatuor suffragiis electi, quorum nomina schedis inscripta, & in altari collocata sunt. Post preces, celebratamque triduo Liturgiam, datamque omnibus Eucharistiam, adductus est junior Diaconorum, qui schedam eduxit, in qua scriptum erat nomen Joannis filii Sanhuti. Electio ejus communi consensu approbata est, per scriptumque ejus instrumentum quod omnium Sacerdotum, primorumque inter Laicos subscriptionibus firmatum est. Testatur Autor se illud scripsisse, cum verò rogaretur ut subscriberet recusasse, facturum se id quod petebant pollicitus, cum Joannes advenisset, & præsens ab eo didicisset an esset orthodoxus. Postea

Electio Epi-
scopi Misræ.

missum est electionis instrumentum cum literis, quas ut præcedentes, Autor narrationi suæ inseruit. Respondit Patriarcha, cujus etiam literas subjicit : & illarum ea sententia fuit, ut Gregorius Armenorum Patriarcha, Joannem quem Kahirani elegerant, adduci juberet ; & si constaret de ejus fide præclarisque moribus, posse eum ordinari. Misit quoque ex discipulis suis seu syncellis duos qui eum deducerent. Obtenta à Præfecto Kahiræ licentiâ, & præsidio, processit novus Episcopus ex Abulfadli Sahydi. viri primarii domo ad Ecclesiam S. Sergii, cum Evangelis, thuribulis, & cereis ; & post Liturgiam lectis literis confirmatoriis seu *Taklid* Patriarchæ, quibus electionem à Kahiranis factam confirmabat, ordinatus est à tribus Episcopis, Menna Episcopo Melichæ, Michæle Atsijæ, & Joanne Khandekæ. Dominicâ sequenti proclamatus est in Ecclesia B. Mariz in Vico *Zowaila* dicto. Narrat Autor se ab illius amico quodam accepisse scribam, & syncellos Patriarchæ metu virorum primariorum Misræ, non aulos quidquam ab eo exigere, quod argumento est non planè sublatas exactiones fuisse sub illo Patriarcha, frustra que factas tot constitutiones synodales, quæ simoniam prohibebant. Ait etiam Macarium postquam Joannes Hegumenus ordinatus est, noluisse consentire ut ordinaretur Episcopus, quin subscriberet syngraphæ quâ pollicebatur mediam reddituum Episcopatum partem se ad Patriarchium quotannis missurum. Syncelli quoque aureos duos exigebant quoties Paschales Epistolas deferebant.

Plura de Macario & rebus Ecclesiasticis Autor non recitat, ea opinor ratione, quod hanc vitam non perfecit, live morte præventus fuerit, antequam Patriarcha abiret è vita, seu aliam ob causam quæ nobis ignota est. Eam certè historiam imperfectam esse constat, cum obitus illius non meminerit, sed statim ad res politicas convertatur ejus oratio, quas ab anno 496°, quo obiit Michael, paucis persequemur.

Res Muham-
medanæ.

Eo anno, qui fuit J. C. 1102^m, obiit Mustali, Califa Ægypti, anno Hegiræ 495^m : cui successus est Amer-beahacam-illah, ejus filius, 7^m Obeidiorum seu Fatimidarum, ex quo regnare in Ægypto coeperunt ; 10^m verò ex quo in Africa Califas se appellaverunt. Natus erat annos quinque ; atque adeo negotia omnia administravit Afdalus, summus exercituum Præfectus, filius Bederegelgemali, qui in eadem dignitate & autoritate sub Mostansiro fuerat. Vixit Amer annis 35 ; regnavit 29. Carpitur ab Histo-

ricis omnibus, non modò quòd Sectæ Rafidæorum, seu Haliadarum, patris & avorum exemplo, esset addictissimus; sed quòd crudelis, durus, ingratus erga Afdalum, vaser, mendax, superbus, & ludo delitiisque diffunderet. Alioqui valebat ingenio, doctus erat, scribebat eleganter, & fraudum artifex eximius erat. Hæc autem quæ sub ejus principatu contigerunt, paucis secundum annorum seriem subjicimus.

Anno 496', post multa bella Barkiaruk, Melikschahi filius natus maximus, & qui Sultani dignitatem acceperat testamento patris, cum fratre Muhamede concordiam iniit, vastato interea Oriente per excursions unius in alterum, Emirisque, aut etiam Mamalucis sive mancipiis ad amplissimas præfecturas evectis, novos quotidie principatus fundantibus. Magna interim Bagdadi fama fuit sub Califa Mustadiro Ardechiri filii Mansour, qui ex urbe Merou in Corasana oriundus, & concionibus faciendis in Meschita Nezamia, quam Nezamel-Molk Vizirus ædificaverat, intentus, sæpè auditorum triginta millia congregabat. Inter eos conveniebant mulieres quoque magno numero: & quasi rem prodigiosam narrant, quòd juvenes multi formâ præstantes, capillati, in quos Muhamedani, tot mulierum mariti, insaniant, ejus hortationibus comas toronderint; vinumque passim effusum fuerit. Obiit autem impostor ille eo ipso anno, sicut alius dictus Cheik Abulmuhali, qui asperam vitæ formam sibi præscripserat, nunquam in strato dormiens, sed sedens; una veste contentus. Tales quippe nebulones parabat mendaciorum pater, dum Christiani in Oriente essent, ne misera illa gens veritatem fidei agnosceret.

Anno 497°, J. C. 1103°, facta est provinciarum partitio inter Seljukidas Melikschahi filios, ita ut Barkiaruk Sultani nomen & honores haberet, & ad quinque orationis tempora tympanum ad fores palatii ejus pulsaretur; atque præter Bagdadum possideret Montanam regionem, Hamadanam, Hispahanam, Rayam, & omnes earum provinciarum ditiones; Bagdadique fieret oratio ejus nomine: Muhamedi cederet Armeniam, Aderbijanam, Diarbekeram, Geziram & Mauslam; Sinjaro, quem pater ab ea urbe in qua natus erat ita vocaverat, Corasanam: utrique suis in provinciis præcum suo nomine, tanquam Imperatori honor deferretur. Eodem anno Boamundum & Tancredum acie victos à Muhamedanis scribunt, amissis suorum decem millibus. Acca à

Balduino capta, defendente urbem Zahreddoula Gioufchi, Emiri Bedergemali liberto : Ægyptiis auxilium ferre negligentibus. Obiit Dekak filius Tetesch, princeps Damasci ex Seljukidarum stirpe : relicto filio impubere sub tutela Togtekini. Is est quem ex prava punctatione Nisum ubique vocavit Erpenius Elnacini interpretes.

Anno 498°, J. C. 1104°, obiit Barkiaruk, annos natus 24, cum duodecim regnasset : relicto filiolo Melikschah avi nomine, quadrienni : qui Bagdadi proclamatus, sed paulò post à patruo Muhamede spoliatus est.

Anno 499°, J. C. 1105°, Ismaelitæ arcem Apamææ occupaverunt, occiso Ahlaf filio Mulaheb, jussu Abutaheri, qui, inquitunt, primus Sectam Batinæorum seu Assassinatorum propagavit. De iis multa dicenda occurrunt, quæ alio loco opportuniùs referentur. Inter Francos & Ismaelitas hoc anno sæpiùs certatum est.

Anno 500°, J. C. 1106°, occisus est ab iisdem Batinæis Singiar-Chah Sultanus, filius Melikschahi.

Anno 501°, J. C. 1107°, Balduinus Hierosolymorum Rex Saidam seu Sidonem obsedit.

Anno 503°, J. C. 1109°, Muhamed-Chah Sultanus Seljukida, collectis auxiliis Sakman filii Ortok, Chelati & Armeniæ principis, Cherefeddin Maudoud, Mosulæ & Negemeddin Ilgazi, Maredinæ principum, adversus Francos Tankredum, & Balduinum prosperè pugnavit.

Anno 507°, J. C. 1115°, obiit Emir Rodowan, Halepi seu Berrhœæ princeps, ex Seljukidarum familia : erat enim filius Tageddoula Tetesch, filii Albarflan, atque adeo frater Melikschahi, sub quo non modò fratres, sed agnati omnes, imò duces, & purpurati amplissimas ditiones possidebant, sed ut beneficiarii qui supremum Sultanum agnoscerent. Cum verò Franci continuas usque ad Halepi mœnia excursiones facerent, prædæque de Musulmanis agerent, multos in captivitatem abducerent, Rodowanus nunquam adversus eos progressus est. Filius ejus Albarflan annorum sexdecim juvenis sub tutela Lului principatum obtinuit. Eodem occisus est ab ignoto sicario Maudoud Mosulæ princeps, qui in Syriam venerat ad auxilium Tahireddini Togtekini & adversus Francos sæpiùs fœliciter pugnaverant. Muhamedschah Sultanus, ad quem utpote supremum princi-

pem dominium illud recidebat, Mosulæ, & Geziræ principatum concessit Axlenkaro, dato simul consiliario & præcipuo administro Zenghio, quem *Sanguinum* & *Sanguineum* Autores nostri vocant, patrem Mahmoud Noraddini, avum Noraddini illius celeberrimi à quo primùm concussæ sunt res Christianorum Hierosolymitanæ, & per quem magnas illi clades acceperunt.

Anno 509^o, J. C. 1115^o, Afdalus Emir usque Egypti inducias cum Balduino Rege Hierosolymorum fecit, postquam is ingentem caravanam Muselmanorum cepisset, desperaretque Emir, posse eum armis opprimi. Contigit hoc eo in loco qui retinuit nomen *Sebkbat-Bardiil*, Salinæ-Balduini.

Anno 511^o, J. C. 1117^o, obiit Muhamedschah Seljukida relictis quinque filiis, Mashudo, Mahmudo, Togriolo, Solimane, & Seljuko, quorum secundus Bagdadi anno sequente proclamatus est.

Anno 512^o, J. C. 1118^o, obiit Califa Abbassida Mostdaher-Billa Muçtadis filius, cum dignitatem titulo tenuis tenuisset ab anno 489^o: successit ipsi filius ejus Mostarsched, qui ex ea familia 29^{us} fuit.

Anno 515^o, J. C. 1121^o, occisus est à sicariis Emir Afdal, immisiss à Califa Amero, quem sæpè veneno appetierat, cum jam animadverteret gravem se & odiosum esse principi.

Anno 516^o, J. C. 1122^o, obiit Ilgazi filius Ortok. Princeps Maredinæ & Miafarekinæ, multis adversus Francos præliis famosus.

Huc usque præcipua capita retulimus rerum his annis gestarum, ex quibus Autor admodum pauca delibat; nisi tamen quod accuratius loquitur de Balduini in Ægyptum expeditione: ait autem eum Farma, quam nostri Pharamiam vocant, cum cepisse anno Patriarchatus Macarii 15^o, Martyrum 834^o, qui est J. C. 1118^{us}, assignatus huic expeditioni à Willelmo Tyrio. Is est Hegiræ 512^{us}: & paulò post morbo correptum in itinere obiisse, cum Arischam pervenisset. Corpus ejus sale & aromaribus conditum, Hierosolyma, sicut jusserat, deportatum est, ubi in Ecclesia Calvariæ sepultum est; ibique adhuc sepulchrum ejus cum Epitaphio visitur. Assignant anno 511^o Ebn-Chalican, Ebn-Chuena & alii; levi temporis differentia.

Plura Autor non scribit, tantum fusè narrat Afdali cædem, sed ita ut facile intelligatur scripsisse illum vivo adhuc Amero Califa, qui ab omnibus historicis accusatur, quasi jussu ejus cæ-

Emiri Af-
dali cædes.

des perpetrata fuerit, cum nimiam Emiri potentiam ferre non posset. Commissa est autem à sicariis duobus ex Batinaeorum seu Assassinatorum numero ad pontem ipsum, cum stipatores corporis, & servi armati ob angustiam loci præcessissent, vel ponè sequerentur. Sicarii statim confossi sunt: ipse lectica delatus in Palatium, exanimis repertus est. Funus ei amplissimum decretum à Sultano, cui etiam ipse operam dedit, & solennem super eum orationem fecit. Sed antea, omnem ejus pecuniam quæ quater millies, mille nummorum aureorum fuit: vestes, peristromata, tapetes, vasa, gemmas, equos, arma, omnia tandem bona ejus fisco addixit. Ipse anno Hegiræ 524^o, regni 29^o, eodem modo occisus est ab iisdem Batinais, conductis, ut quidam existimaverunt, ab aliquot purpuratis, qui clientes aut amici fuerant Emiri Bedelelgemali, & Afdali ejus filii: quamvis decem sicarii rem absque aliorum ullorum auxilio, confecerint. Quippe is erat nefariorum illorum hominum furor, ut modò eadem ad quam missi erant perpetrassent, de salute sua ne cogitarent quidem, sed lati perirent.

Califæ cædes à sicariis.

Narrat hoc loco Historia Ægyptiaca quam sæpè laudavimus, rem pene incredibilem. Erant, ut diximus, decem furiosi illi, qui cum aliquamdiu occasionem cædis pattandæ non reperissent, existimaverunt Califam de paratis sibi insidiis monitum fuisse: quod si foret, melius esse ut rem in aliud tempus rejicerent. Unus tale ipsius consilium dedit, quo certiores forent, an indicia de ipsis ad Sultatum pervenissent: nempe ut alicujus ex eorum numero caput amputatum prope Palatium projicerent: si agnosceretur, signum esse detectæ conjurationis, secus si nemo illud agnosceret. Illis non assentientibus, quod ita numerus eorum minueretur, sicarius ille statim ferro se transverberavit. Caput igitur illius amputatum projecerunt, eo in loco quem designaverat: cumque circumlatum à nemine agnitum fuisset, intellexerunt nullam suspicionem conjurationis esse. Ita refutatis animis Amerum dum fatellitio omni stipatus per pontem transiret, loco angusto adorti sunt: dumque primi percussores à servis armatis conciderentur, omnesque adversus eos concurrissent, alii eum aggressi multis plagis confoderunt: ipsi ab armatis qui sequebantur cæsi sunt. Atque hic fuit Ameri finis.

De ritibus immutatis.

Ut ad Macarium revertamur, manca est illius vita; neque de eo quidquam occurrit præterea apud historicum quem sequimur: pauca

paucæ etiam scribit Autor Chronici Orientalis ab Abrahamo Echellensi editi, & eadem prope quæ Elmacinus. Is cum Patriarcham refert quosdam ritus immutasse: *Nam antea, inquit, si in Coptitarum prius baptisabantur, tum circumcidebantur; ipse verò constituit ut prius circumciderentur, tum baptisarentur. Item sponsalia cum orationibus & thure in domibus contrahebantur; ille verò decrevit id fieri in Ecclesia tempore coronationis sponсорum.* Plura non habet Chronicon; neque in illis verbis quidquam difficultatis est. Cum enim, ut nihil de ipso ritu Circumcisionis apud Coptitas usurpatæ dicamus, id quippe singularem Dissertationem desiderat, certum sit à multis sæculis eam post Baptismum fuisse prohibitam, facile omnino fuit, ut, qui per summam ignorantiam & superstitionem eam conservandam arbitrabantur, etiam baptisatos filios circumciderent. Canones de ea disciplina anonymi aliquot extant, Macario, ut videtur, antiquiores: atque adeo hac in parte non tam condidisse novas regulas, quàm veteres revocasse censendus est, ut etiam in altera circa matrimonii celebrationem: sunt enim Canones antiqui & recentiores permulti, quibus constituitur ut Coronatio sive Benedictio nuptialis, non fiat nisi juxta ritum in Ecclesia Coptica receptos, quorum præcipuus erat ut Liturgia celebraretur; tum ut multæ preces super sponfos inter Missarum solennia recitarentur. Hæc autem omnia legitimè extra Ecclesiam fieri non poterant; & omnem illam disciplinam antiquiores habere origines, Macarii temporibus, omnino certum est. Nullas sanè de duobus istis capitibus Constitutiones edidisse Macarium prope indubitatum est, cum illarum memoria nulla occurrat in amplissimis Collectionibus; neque ullas illius nomine recenseant Abulbircat, Autores celeberrimi diversorum Juris Canonici syntagmatum, Ebnassâlus, & Echvimenus, qui aliarum diversarum meminere, de illis Macarii verbum nullum faciunt.

Elmacinus plura adhuc habet in eandem sententiam: quem primò interpretis sui verbis loquentem inducimus, quia liber est inter omnium manus, etsi sensum plane nullum efficiant. *Hic verò Patriarcha multos abrogavit in Ecclesia ritus, quemadmodum sufficit & positam in Ecclesia horam Alleluia, quæ dicebatur in rei sacræ administratione, post lectionem Actorum: ita ut cum Minister sacrificio adesset, ante intermitteret sacra, quæ sacrificus absolvebat. Ordinavit itaque Alleluiam ante lectionem librorum, & Minister rem divinam exorsus eidem ad finem us-*

Elmacini
de ea re testi-
monium ex-
penditur.
Eim. p. 298.

*que insistebat : at qui oblatione fungebantur , non inclinabant se se , ille verò ut fieret præcipiebat . Gryphos sanè & ænigmata scribebat Erpenius dum hæc exararet : neque enim ullus omnino sensus ex verbis illis exsculpi vel conjectando potest : maximè ob ridiculam illam & putidam affectationem , quæ certo consilio , non erroris tribuenda est , ut omnia nomina & verba permutet , ne dicat *Liturgiam , Sacerdotem , Diaconum* ; nam qui ita loquitur , dat operam ne intelligatur , dum pro istis vocibus quas omnes intelligunt , *rem divinam , sacrificum , Ministrumque* substituit . Quali si quis Lutheranus vertendo Eusebium aut alios Autores Ecclesiasticos , scriberet Athanasium fuisse *superintendentem* Alexandriæ , cùm priùs *senior* illius *Consistorii* fuisset : quod in templo assiduus esset , *cænamque* frequenter celebraret . Non sanum esse qui ita scriberet , vel insani ipsi sentirent : non alia tamen est Erpenii interpretatio . Quamvis autem in Arabicis errata quædam librariorum subesse existimemus , ita tamen totus locus verti potest . Hic verò Patriarcha abrogavit consuetudines multas ; atque inter alias *thuris suffitum* , eumque constituit in Ecclesia fieri , *hæc hymni : qui quidem dici solebat in Liturgia post lectionem Actuum Apostolorum* . Cùmque adveniret Diaconus qui Liturgiæ ex officio suo ministrare debebat , ante horam illam , Diaconus qui tunc sacro ministrabat , locum ipsi relinquebat , alter Liturgiæ perficiebat , seu ad finem usque illius , ministerio suo fungebatur . Constituit igitur ut hymnus diceretur ante lectionem scripturarum , neque Diaconus qui Liturgia incipiente ministrare cœperat , eidem ad finem usque insisteret . Hunc esse verborum Elmacini sensum eò confidentiùs existimamus , quod extant constitutiones diversæ ; de eadem disciplina , ne Diaconus qui ministrare altari debet , seu dignitate , seu ordine vicis suæ , si non statim ab initio Liturgiæ præsens sit , locum non resumat ; sed qui incepit ministerium , illud perficiat . Hæc itaque planissima sunt . In ultimis vocibus aliqua est difficultas ex voce rara & abstrusa , quæ fortassis sensum aliquem singularem in Liturgiarum stylo habet , quæ inter alia involucria significat . Eo sensu ita locus vertendus est . *Prophora autem seu oblatio non involvebatur , jussitque Macarius ut hoc deinceps fieret* . Nam vox est è Græcis desumpta & corrupta , ut pleræque aliæ : at eam pro Oblata seu Pane Eucharistico apud Autores Christianos usurpari multis exemplis probari potest . De quo ritu Elmacinus loquatur conjecit .*

non omnino facile est : nam multi sunt & varii passim in tota Liturgiæ parte, quæ Anaphoram propriè dictam, seu, ut nos loquimur, Canonem antecedit. At magis verisimile est id Macarium voluisse, ut quoniam antequam inferretur Oblata ad altare, repositi solebat in Protheli, seu, ut Rituales nostri loquuntur, in Credentia; deinde ad altare ferebatur à Diacono cum calice, eodem prope ritu qui à Græcis vocatur *Μεζαλη εισόδος*; tuncque ut Græci, ita reliqui Orientales honorem aliquem deferre solent elementis mox in corpus & sanguinem Christi consecrandis, majorem aliquantò quàm sacris Imaginibus, ut à nobis in Commentario Liturgiæ explicatum est; præscribantque Rituales libri, ut Oblatio simul cum calice velo tegatur, fieri potuit, ut sive rituum ignorantia, sive ex præpostera pietate, quidam ea palam gestarent : hoc prohibuisse videtur Macarius.

Ex hac nostra interpretatione intelligi potest qualiter Protestantes versari soleant in explicandis illis, quæ ad Religionem pertinent : bellè quippe secum agi putant, si persuaserint lectoribus suis, fuisse aliquando cum Patriarcha quidam Alexandrinus ritus Ecclesiasticos immutaret, atque ita scilicet, ignari facillè sibi insinuari paterentur, sacros Ritus quos Majorum nobis religio commendavit, esse ex illarum rerum genere, quæ institui, antiquari aut immutari à quolibet Antistite possint : atque ita pro voce quæ *Consuetudinem* significat, *Ritus Ecclesiasticos* substituit Calvinista interpres, quasi inter consuetudines, quarum aliæ bonæ, malæ aliæ, & perversæ esse possunt, & Ritus sacros discrimen nulum intercederet. At multis hujus historiæ locis agnoscì potest, quàm difficilis mutatio fuerit earum cæremoniarum, quas traditio commendaret : neque tantam fuisse manifestum est Patriarcharum autoritatem, ut de illis pro arbitrio suo statuerint. Verùm nihil magis risu dignum quàm ad istius commutationis probationem adducere, vanam futilemque orationis ambagem, ex qua sensus exculpi nullus queat. Ea tamen Athanasio Kircherò sufficere visa est, ut ex ea non intellecta, hanc Canoni Chronologico Patriarcharum suo notam adjiceret : *Macarius ritus Ecclesiasticos mutavit* : ut ex ipsius testimonio, Protestantes, qui eruditionem ejus laudare non desinunt, pugnent contra Catholicos. At nihil tale unquam apud idoneum ullum scriptorem legitur, nisi apud Elmacinum, vel potius Erpemium, quem Kircherus excerptis ita, ut in marginali synopsi hæserit, ubi hæc leguntur

Quid de
ista mutatio-
ne judican-
dum.

tur, *Macarius ritus Ecclesiasticos mutat* : nam si textum legis-
set, statim vidisset in Arabica quidem oratione difficultatis esse
plurimum : sed in Latina sensum esse nullum, atque adeo dubi-
tasset.

Obitum Macarii assignat Elmacinus anno 845° Martyrum : is
est J. C. 1129^m, atque adeo Hegiræ 524^{us} & 525^{us} : nam 524^{us}
incepit à 14^a Decembris anno 1129° : obiit autem 23^a mensis
Cohiac, qui Decembri ex parte respondet : atque ita eodem
anno quo Amerus Ægypti Califa occisus est. Sedit Macarius
annos 26. dies 41. ut etiam scribit Makrizius. Sepultus est
Misræ in Ecclesia Muhallaca, ut habet Autor Chronici Orien-
talis. Canon apud Abulbircat propius quàm solet ad historiæ
veritatem, anno 844° Martyrum obiisse scribit : postquam se-
disset annos 26. menses 7. 25^a Kohiac. Kîrcherus ex falsis
calculis qui toto suo Canone decurrunt, Chronologiam perva-
rens, initium ejus regiminis figit, anno J. C. 1020°, vel po-
tius 1120° : nam apparet errorem esse typographicum. Si
igitur anno 1120° Macarius sedere cœpit, sedit usque ad
1146^{um}, ut ipse annotat, cùm eo anno assignet initia successo-
ris : in quo calculo errat annis 35 : cùm obiisset Macarius an-
nis 9, antequam eum ordinatum fuisse credat. Sed majus ad-
huc peccatum, cùm annum Christi 1120^{um} comparat anno Mar-
tyrum 819°, cùm is sit annus Christi 1103^{us}, & Hegiræ non
496^{us}, sed sequens : multò minus respondet anno J. C. 1120°,
qui fuit Hegiræ 514^{us}.

GABRIEL FILIUS TARIK
PATRIARCHA LXX.

Vacatio se-
dis Alexan-
drinæ.

CUM omnes, quos sequi possumus, Autores testentur vacasse
Caliquandiu Sedem post obitum Macarii, & inter se dissentiant ;
nam Elmacinus & Chronicon, quibus accedit Makrizius, vacas-
se aiunt annos duos mensesque circiter totidem ; Marcus, filius
Zaraa, Autor hujus vitæ, annos plures ; hæc omnia ad certam
temporum rationem possunt revocari ex istius ultimi testimonio :
nam Gabrielis ordinationem in Ecclesia Muhallaca factam asserit 9^a
mensis Mechir, anno 847° SS. Martyrum : atque ita, si mortuus
est Macarius anno ejusdem Æræ 845°, rectè dictum est ab aliis

vacationem fuisse annorum duorum & mensium totidem. Electio tunc ad Alexandrinos spectabat, verèque id ab Historico dictum, quando Michael, qui Macarium præcesserat, ab illis quoque electus est, & Macarius à Kahiranis. Sive igitur statim ab illius morte comitia Patriarchalia haberi non potuerint, aut per discòrdiam soluta fuerint, seu aliud quidpiam impeditum natum fuerit, quod scire non possumus, (nam de eo silet Historia) tandem eo quem diximus anno Martyrum 847°, convenientibus Misram sive Kahiram viris Christianorum Jacobitarum primariis, & Alexandrinis aliquot qui in urbe erant, deliberari cœptum est de novo Patriarcha deligendo. Nulli adfuerunt Episcopi, nulli ex ordine Monastico ob longam Ecclesiæ vacationem; sed communicatis inter se consiliis venerunt ad Monasterium S. Macarii, adieruntque senem Monachum, Aba Josephum Syrum, qui erat in Syrorum Monasterio, ut ejus sententiam sciscitarentur. Ille divinitus, ut volunt, monitus, Gabrielem designavit, sicut antea Macarium eligendum prædixerat.

Fuit Gabriel, cognomine filius Tarik, ex nobilioribus Kahiræ familiis, vocatusque fuit nomine sæculari Abulola; non Taril, quod in Chronico Orientali legitur, ex prava lectione, quam refellunt Codices manuscripti. Erat Diaconus in Ecclesia S. Sergii ejusdem urbis, prudens, pius, vitæ exemplaris, largus in faciendis elemosynis, hospitibus recipiendis, viduis orphanisque sustentandis intentus, assiduus ad preces & ad Liturgias, doctus, & sacrarum literarum peritus, quique eleganter scribebat tam Copticè quàm Arabicè, librorum curiosus, unde multos utriusque Testamenti codices ad Ecclesiæ suæ usum comparaverat. Fuerat aliquando inter Scribas Divanorum Ærarii & aliorum: cùmque omnes Misræ, seu Kahiræ, congregati in ejus electionem consenserunt, natus erat annos quadraginta septem. Deductus est in Ecclesiam Muhallacam, 9^a Mechir, anno, ut diximus, 847° Martyrum, J. C. 1131°. Mox Alexandriam cum magno comitatu profectus, ibi ordinatus est, Præfecto summo exercituum tunc existente Ahmede, filio Afdali, nepote Bederelgemali, qui post patris eadem loco ejus constitutus, cognominatus est Chahinchah.

Alexandriâ Misram reversus, ad Monasterium D. Macarii profectus est, ut ibi ex more proclamatio ejus fieret, juxta observatam more majorum consuetudinem. Ibi non levem cum Monachis controversiam habuit, quam propriis Autoris verbis, quia ma-

Gabrielis
vita & mores.

De Confessione fidei ante communionem.

ximi momenti est, referendam existimavimus. *Ea fuit*, inquit, *circa sensum Confessionis, quæ dicitur super Eucharistia ante ejus perceptionem, quæ talis est: Credo & confiteor hoc esse corpus Domini & Salvatoris nostri Jesu Christi, quod accepit ex Dei genitrice sancta Maria Virgine, fecitque illud unum cum divinitate sua. Recusaverunt quidam ex illius Monasterii Monachis hæc ultima verba dicere: Fecit unum cum divinitate sua: ed quodd adjecta essent: & quod affirmarent consuetudinem apud se non esse, ut ea dicerent. Ipse verò excusabat se his rationibus: quodd ea dixisset die ordinationis suæ, sicut suggesserant ipsi, qui illum ordinaverant, Episcopi: neque licere ea supponi, cum sententiam veram continerent. Itaque de ea re multis sermonibus habitis, tandem ed deventum est, ut illis verbis alia adjici placeret ab omnibus comprobata in hunc modum: Fecit illud unum cum divinitate sua, absque divisione, commisione & confusione. Huic additioni cum consensissent, simul cum ea orationem pronuntiavit; usurpaturque ita ad hanc usque diem. Hæc Marcus Historicus, qui mox ita prosequitur. Attamen cum plerique eam additionem comprobaissent ejusque usum recepissent, quidam ex Sabud, seu Egypto superiori, permanserunt in pristina sua consuetudine, quibus idcirco nullam molestiam dedit, neque cogere voluit ut aliorum exemplo se conformarent.*

De ipsa Oratione quæ Ομολογία adhuc Græco nomine in Coptica lingua conservato appellatur, diximus ad Liturgiam, ubi ex Rituali Gabrielis Patriarchæ, ex Abulbircat & aliis certissimæ autoritatis scriptoribus, attulimus ea quæ ad ritus quos in ea pronuntianda Copticæ præscribant explicandos, aliquid conferre videbantur. In Dissertatione verò de Eucharistia exposuimus, quanta ejus vis censenda sit, ad agnoscendam eorum fidem circa Eucharistiæ Sacramentum. Ex hac autem historia quædam ad ejus origines cognoscendas observanda sunt. 1^{um}, quodd jam ante sæculi duodecimi initia tam vetus esset usus illius Orationis, ut qui additionem, quæ illo tempore facta est, acceptare renuebant, ne id facerent vetustare consuetudinis in Ecclesiâ receptæ se excusarent. 2^{um}, quodd in ordinatione novi Patriarchæ, illa Confessio ab Episcopis consecrationem celebrantibus ab eo exigebatur; imò quodd verbatim suggereretur, sicut Canones ejusdem Ecclesiæ fieri præcipiunt. 3^{um}, quodd eo solo argumento satis apparet fidem de Eucharistia, circa quam, si Protestantes audiamus, tam ignari sunt

PATRIARCHARUM ALEXANDRINORUM. 503

GABRIEL
Part. LXX.

Orientales ut quid credant, vix ipsi sciant, perspectissimam illis fuisse, quando addita pauca verba, quæ sententiam non mutarent, haud leves apud eos turbas excitaverint.

Paulo post ordinationem Gabrielis obiit Junes, sive Joannes, Episcopus Misræ, qui sepultus est in Monasterio prope locum Habessinorum dictum, ubi erat cœmeterium. Neminem autem Patriarcha, quandiu vixit, ejus loco Episcopum ordinavit: nempe, ut suspicari possumus, simili ac decessores sui ambitione ductus, ut urbs regia non alium haberet Episcopum, quàm ipsum Patriarcham.

Vetuit ne mortui in Ecclesiis sepelirentur: cùmque contra hoc ejus mandatum sepultus fuisset Justus, sive Isus, Archimandrita in Ecclesia Vici Græcorum, eam claudi jussit, atque ita mansit clausa per multos dies, donec eam aperiri permisit, rogatus à primariis Kahiræ civibus.

Ne in Ecclesiis mortui sepelirentur.

Anno 2^o Patriarchatus, transtulit corpus Macarii decessoris sui ex Ecclesia Muhallaca Misræ, ad S. Macarii Monasterium: postquam preces, quales in Exequiis peraguntur, pro eo celebratæ fuissent: corpus panno sericeo involutum; additumque tegmen quod impositum erat super sepulturam S. Macarii magni, quæ postea consuetudo in aliorum Patriarcharum exequiis usurpata est. De exequiarum illarum solennitate scribit Ebnassâlus, Abulbircat quoque & alii, præter ea quæ in libro Rituali continentur, speciatim verò in eo qui scriptus est autoritate Gabrielis Patriarchæ. Vel illi soli exequiarum Rituales, adjunctæque preces sufficient ad confirmandam fidei disciplinæque similitudinem inter Ecclesiam Romanam Copticamque, & alias omnes Orientales, circa orationes & sacrificia Eucharistica pro defunctis.

Postea Autor conversus ad res sui temporis, eas ita narrat, ut neque ordinem temporum, neque aliorum historicorum narrationem sequatur: cùmque nonnisi longo sermone possit cum illis conciliari, consultius visum est paucis exponere quæ Ameri mortem consecuta sunt, ut ita ad res Ecclesiasticas revertamur.

Res Muhamedanæ.

Afdali, ut creditum est, necessariorum conjuratione occiso Califa Amero, magna ut in ejusmodi mutationibus, turbatio fuit: Vizirus, simulque supremus copiarum dux, qui patris & avi exemplo, utramque dignitatem retinuerat, Abuhali Ahmed, Afdali filius, de regno occupando cogitavit. Verùm frustra: cùm ingens inter purpuratos discordia esset; nec minor ex superstitiosa

plebis contentione. Erat enim pervulgatum, neminem ex illa Fatimidarum stirpe absque mascula prole mortuum, atque ita expectari voluerunt, partum uxoris Ameri, quæ tunc uterum gerebat: utque interea salutaretur Hafeth frater patruelis ejus, sed ita ut regni administrationem haberet, non titulum, Califfæque dignitatem. Cum illa foeminam peperisset, Hafethus Califa renuntiatus est. Amerus post cædem Afdali, filium ejus de quo loquimur, in carcere tenuerat: eo occiso eductus, & dignitati patriæ avitæque restitutus, statim cogitavit quomodo Califam in potestate haberet, omniaque negotia ad se traheret: unde principis jussa non toto vertente anno occisus est. Novæ deinde turbæ tum inter milites, tum in ipsa Hafethi familia exortæ sunt: rixantibus inter se filiis, Abuhali El-Hacen, qui successor jam designatus erat, post Sulimanum natu majorem, & fratrem ejus Abuterab Haidara. Obierat Suliman, instabatque Hacen ut successor designaretur: quod cum obtinere non posset, ad rebellionem Emiros incitabat, quorum plerique literas ejus & consilia patri patefecerunt. Cumque ejus causa multi tumultuarentur, adeo ut milites in duas factiones divisi Sunitarum, & Rafidarum seu Haliadarum, inter se pugnantem magna utrimque cæde commissæ, Hafethus per triduum in Palatio obsessus est, Emiribus postulantis, ut Hacen occideretur. Cum jam ligna congererent, incendiumque minarentur, accersitis Judæis duobus medicis suis, Califa parare potionem mortiferam eos jussit: primus negavit: alter nomine filius Karaka eam paravit, atque illam Hacenus bibere jussus, confestim expiravit. Apertis ostiis corpus jacens tumultuantibus ostensum est, atque ita conquieverunt. Hafethus Judæum veneni artificem omnibus bonis spoliavit: alterum nomine Abu-Mansour, qui per caput Principis & Legem juraverat, se veneni parandi modum ignorare, honoribus cumulavit, constituitque Judæorum Principem, seu *Reschhagalout*, id est Æchmalotarcham. Hæc Auctor Historiæ Ægypti, & alii præcipui Muhammedani, Ebn-Kalican, Speculum temporum, & diversi alii. Neque tamen verisimilitudine carent ea quæ Marcus filius Zaræ, præter illos refert Solimanum veneno sublatum: Hacenum verò non modò apud patrem egisse ut regni successor, sed etiam consors designaretur, tam apertè rebellasse: armasseque promiscuum hominum multitudinem ex diversis legionibus; quibus pecunias, possessiones, imò & præfecturas distribuerat: & eorum præsidio ferociorem

ferociorem factum magnū suspectorum sibi numerum occidisse, quorum cadavera, truncatis capitibus ne agnoscerentur, præcipitabantur quotidie ex muris palatii.

Eo tempore Gabriel ejus jussu in carcerem missus est, evasitque datis aureis mille, qui ipsi à mercatoribus subministrati sunt.

Cūm Hæcenus omnium animos adversus se concitasset, milites plurimi ab eo deficientes, ad Præfectum regionis Occidentalis se receperunt. Is erat Beheram cognomine Tageddoula, Armenus, inter belli duces celeberrimus, qui cum Bederelgemalo ex Syria in Ægyptum venerat, sub Califa Mostansiro. Dein per omnes militiæ gradus ad præfecturam pervenerat, conservata semper profusione Religionis Christianæ. Gratus erat militibus, & prudentiâ non minus quam benignitate, & rerum bellicarum peritiâ commendabatur. Ita factum, ut omnes concursu ad eum facto postulaverint ut Kahiram veniret, Vizirusque esset, atque regni turbati gubernaculis manum admoveret. Ille licet invitus morem ipsis gerere coactus est: statimque ut ejus adventum Hæcenus sensit, fugam arripiens se occuluit. Pater ejus Califa in Palatium rediit: & Beheramum Vizirum suum designavit, eo ipso die, quo dignitatem ejus beneficio recuperaverat, anno scilicet Helalæo sive Lunari 529°. Is autem, ut aliàs observatum est, annus est Hegiræ vulgatus.

Erat Beheramo frater, qui ob virtutes & nobilitatem (nam propinquitate Reges Armeniæ attingere dicebantur) ordinatus erat Patriarcha Armenorum. Vocabatur Gregorius; cūmque in Ægyptum salutandi fratris sui causâ venisset, ibi vitâ functus est: in ejus locum substitutus est alter, Ananias nomine; qui in Ægypto ordinatus est. Qua ratione factum id fuerit dicere non possumus, cūm rerum Ecclesiæ Armenicæ nulla ferme apud Arabes memoria sit: sed quidquid sit, contra disciplinam ordinatio ista facta est, cūm Armeni Jacobitæ, non ad Alexandrini Patriarchæ, sed Antiocheni jurisdictionem spectarent. Hæc absque interruptione à nobis describuntur, ut omnia quæ ad Beheramum pertinent uno contextu prosequamur. Cūm verò ille rem publicam sapienter administraret, incitati sunt adversus eum Muhamedani, quia, ut etiam notat Abulfeda, Armenis Christianisque aliis muncia publica, Divanorumque officia præcipua committebat; ita enim fore dicebant, ut multi, quæstus gratiâ, Reli-

Armenorum
Patriarcha.

450 43

•Eo igitur ipso anno quo Rodowan filius Vahaxchi, aut ut habet historicus, noster, Valahaxchi, Viziri locum obtinuit, Misram cum copiis ingressus, maximam urbis partem populatus est, præcipuè verò Christianorum bona diripiendi suis concessit: Ecclesie Misræ, et suburbiorum spoliavit. Monasterium Armenorum

Zaheri appellatum incensum est; & in odium gentis, Patriarcha ipsorum nuper ordinatus, occisus est, cum omnibus qui illic comprehendi poterunt Monachis.

Rodowan statim atque imperium stabilivit, vetuit ne Christiani ad ulla Divanorum officia admitterentur: jussit ut secundum vetera edicta zonis præcingerentur; equorum ipsis usum prohibuit, duplicavitque tributum, sicut & Judæis: eos autem in quatuor classes divisit, divitum qui quatuor aureos; aliorumque, quorum tenuiores unum pendere cogerentur. Paucis tamen annis dignitatem servavit, nempe quatuor aut quinque: & eo intervallo Ecclesia *Moniat Rfsis* quam Michael Episcopus Sahariet magnâ curâ, nec minoribus impensis restituerat, à Muhamedanis everfa est, frustra implorato Viziri auxilio, qui paulò post excitatâ adversus eum seditione pulsus, fugit in Syriam. Ibi collectâ fugitivorum & Arabum manu, in Ægyptum reversus, hostes primo prælio fudit: secundo victus est. Cùmque sub spe securitatis à Califa revocatus esset, apud eum, sed sine autoritate, liberè vixit.

Autor noster de Beheramo, præter illa quæ superius relata sunt, scribit Califam postquam Rodowanus depositus est, ad eum misisse, hortatumque ut ad se rediret, Viziriue dignitatem reciperet: illum se excusasse, tum quòd rerum mundanarum curam omnem abjecisset, tum quòd vitam Monasticam cujus professionem fecerat, colere instituisset: seque jam Monachum esse, non militem. Translatum tamen in arcem regiam ubi reliquum vitæ tranquillè egerit, ibique mortuum: funus ejus cum pompa deductum ad Ecclesiam *Zaheriat*, quæ erat Armenorum, ubi corpus ejus sepulchrum fuit. Habebant tunc Armeni Episcopum in urbe Atsja, qui tantùm apud suos autoritate valuit, ut eum elegerint Patriarcham. Rogaverat Gabrielem Patriarcham, ut Ordinationi suæ interesset: qui veritus ne manus ipsi imponere cogeretur, non prius venit quàm in Ecclesia propria Liturgiam celebravisset, jejuniumque solvisset. Nempe pia hæc consuetudo apud Orientales Christianos hucusque observatur in omnium Sacramentorum celebratione, ut non modò ad Liturgiam celebrandam Ministri aut adstantes Sacerdotes non accedant nisi jejuni: sed in aliis omnibus, ita ut nisi metus mortis urgeat, Sacerdotem jejunum esse oporteat, ut baptiset, ut sponsus sacramentalem benedictionem tribuat, ut Episcopi qui omnes cum Ordinatore manus imponunt, jejuni sint. Displacbat igitur Armenorum istius

Armenorum
Patriarcha
post alios ele-
ctus.

Patriarchæ electio, Gabrieli, tanquam contra Canones facta : neque enim legitime electus censeretur poterat, qui à paucis Armenis Ægyptum incolentibus, absque Episcoporum patriæ suæ, amplissimamque provinciarum consensu ; in aliena Diocesi, absque venia & autoritate Antiocheni Patriarchæ ad quem spectabat Catholicum Armeniis ordinare electus erat. Causam autem novæ illius disciplinæ, nullam aliam cogitare possumus, quam quod sub Viziris aut Emiris qui Armenicæ erant originis, Bederelgemalo Afdaloque ejus filio, licet Muhamedanis, nam Christianis favebant, tum sub Beheramo Christiano privilegium aliquod obtinuerint, ordinandi sibi Metropolitam, qui honoris gratiâ appellaretur Patriarcha. Nullus enim propriè loquendo Armenorum Patriarcha fuit, sed tantum Catholicus ; quæ dignitas ex Græcis Notitiis satis intelligi potest : nam Catholici Persidis & Armeniæ, non ante Justiniani tempora instituti fuerunt. In Ægypto ubi Armeni omnes advenæ erant, multò minus habere potuerunt suum Patriarcham. Quod igitur ad historię verisimilitudinem nobis maximè videtur accedere, paucis explicabimus.

De com-
munione Ale-
xandrinorum
& Armeno-
rum.

Armenorum cum Ægyptiis commercium ante illa de quibus scribimus tempora, exiguum aut nullum fuisse certum est. Cum verò sub Viziris illis qui genti suæ maximè favebant, multi in Ægyptum venissent, horum maxima pars Christiani erant, quibus ut de Beheramo vidimus, antequam Viziri dignitatem obtineret, licebat religionem suam profiteri. Quàm verò ignoti essent Christiani illi Armeni Jacobitis, argumento est, id quod superius retulimus de Gregorio illorum Patriarcha, qui Kahiram venit sub Cyrillo Patriarcha LXXVII°. Nesciebant enim quam fidem teneret ; utque edidit Confessionem suam, Jacobitam cum fuisse intellexerunt, non sine admiratione, quæ nonnisi ex novis rebus oriri solet. Venit autem Gregorius sub Bederelgemalo ; atque ut docet Abuselah Armenus, eo protegente obtinuit Ecclesiam S. Gregorii prope Doram ad mare suæ gentis Christianis attribui, quam sub Marco filio Zaræ, Jacobitæ restitui sibi obtinuerunt. Cur Ecclesias proprias peterent, duplex ratio fuit. Prima, quòd linguâ patriâ Liturgiam, omniaque sacra officia celebrarent, ut qui erant in Ægypto Syriani, hoc est Syri Jacobitæ, quorum Ecclesias & Monasteria non pauca commemorantur, & in hujus historię serie & apud Makriziam ; tum cum quæm maximè secutus est Chanekhium, qui singularem de Ægypti Monasteriis tra-

statum scripserat : & Abuselah Armenum , qui multa quoque ex eo in opus suum transtulit. Altera ratio erat , quòd ritus Armenorum diversi admodum à Coptiticis forent , non modò secundùm cæremonias , & quam Græci vocant *ἑκολυθίας* , quæ per se indifferens est ; verùm in duobus capitibus quæ Coptitæ inter gravissimos errores numerabant , Azymorum usu , & vini meri nullâ aquâ commisti consecratione. Hæc in Armenis etiam Jacobitis Coptitas probavisse , ne levi quidem indicio existimari potest : damnasse probant testimonia Petri Melichæ Episcopi , Ebnaßali , Abulbircat , & aliorum qui illa inter Armenorum errores numerant : dissimulasse Emirorum reverentiâ , verisimile omnino est. Nam præterquam quòd videmus Gregorium illum Patriarcham eorum , qui sub Cyrillo venit , ad communionem admissum , ex eo in quo sumus historiæ loco , apertè hæc communio utriusque Ecclesiæ demonstratur , cùm Gabriel Liturgiæ in qua novus ille Patriarcha consecratus est , licet non integræ , adfuerit ; reliqui verò Episcopi qui manus ipsi imposuerant , quod Gabriel refugiebat , cùm toto officio cooperati sint , proculdubio cum eo communicaverant. Ex illis igitur causis duabus factum videtur , ut non admodum refragantibus Alexandrinis Jacobitarum Patriarchis , Armeni majorem in modum aucti , Emirorumque patrocinio potentes , non modò Ecclesias , sed etiam Episcopos sui ritus habere cœperint ex eorum privilegio. Deinde cùm aliquid adhuc ad illorum Ecclesiæ in Ægypto stabilitatem deesse judicarent , eâdem autoritate quæ canonica non erat , post mortem alterius Gregorii , qui in Ægypto obiit , cùm ad Beheramum fratrem venisset , Hananiam elegerunt , qui cum multis Monachis Armenis occisus est , tunc cum Rodowan Viziratum occupavit : quo exemplo excitatus Episcopus , quem habebant in urbe Atfige , ad eam dignitatem adjecit animum. Eam electionem cùm Gabriel Patriarcha improbaret , quippe contra Canones de non eligendis ad Patriarchalem dignitatem Episcopis factam , tum ob eas causas quas tetigimus , nec tamen ei se opponere vel posset , vel auderet , saltem noluit manus ipsi cum aliis Episcopis imponere ; quod si fecisset , ratam sanè illam habuisset. Hæc sunt quæ de isto Armenorum Patriarcha observare potuimus.

Gabriel cùm intelligeret quantopere decessores sui circa simoniam peccassent , & juxta Evangelii doctrinam , gratis dandum quòd gratis acceptum erat , cùm Episcopos quinquaginta tres or-

Gabriel pa-
rus à simo-
nia.

dinasset, non pecuniam, non munus exegit, sed ne quidem oblatum recepit: verum vetuit ne quid simile fieret pro quacunque ordinatione, excommunicationi subjiciens tam dantes quam accipientes. Sacerdos quidam Bechira Episcopatum Echminæ ambiens magnam ipsi pecuniam obtulit; sed repulsam passus, ad Calisæ filiam, regni successorem jam designatum, venit; datisque muneribus, postulavit commendari se apud Patriarcham, quò Episcopus ordinaretur. Excusavit se Patriarcha, datoque ad Calisam libello, ostendit esse contra Christianæ disciplinæ regulas, id quod Bechira petebat. Calisa vetuit ne ea occasione quidquam incommodi ipsi faceretur. Postea tamen, Gabriel ne indignatione & ambitione ad ultimam desperationem traheretur, fidemque ejuraret; cum alterius Sedis Episcopum ordinavit: oblatam verò pecuniam aspernatus, Oeconomo Ecclesiarum dari jussit ad cellæ ædificationem in Kasser-el chemah.

Res Æthio-
picæ.

Eo tempore insignis in rebus Ecclesiæ Æthiopice novitas tentata est. Rex Metropolitam Michaelem, qui ante ordinationem suam Habib vocabatur, cogere conatus est ad ordinandum ea in regione majorem Episcoporum numerum, quam consuetudo longo temporis usu confirmata permetteret. Numerus autem præscriptus, ut ex Canonum Arabicorum Pseudo-Nicænorum variis Collectionibus aliisque monumentis, tum ex adjuncta ad marginem Codicis Regii annotatione intelligimus, septem Episcoporum erat. Nam si vel decem habuissent, sufficiebant ad ordinandum Metropolitam, aut etiã si liberet, Patriarcham: atque ita ab Alexandrinæ Sedis subjectione recedere potuissent, nec ad ejus auctoritatem recurrere opus habuissent, quoties Metropolitæ Sedem vacare contingeret. Negavit Michael posse id fieri, absque arbitrio Patriarchæ. Ad eum igitur Rex Æthiopie literas misit, quibus hoc suo regno beneficium dari postularet; alias quoque per Legatum ad Calisam Ægypti in eandem sententiam: qui Patriarchæ mandavit, ut Regi Æthiopie satisfaceret. Verum ille excusavit se, ostenditque petere Æthiopes, ut plures septenis Episcopi ordinarentur, non alio consilio, quam ut consuetam Sedi Alexandrinæ obedientiam subtraherent; quando, ubi possent sibi, eo inconsulto Metropolitam ordinare, illius adeundi necessitatem habituri nullam essent: inde audaciores futuros ad inferendum finitimis Muhamedanis bellum. Cum hæc excusatio Calisæ placuisset, scripsit ad Regem Æthiopie Patriarcha, cumque per literas

PATRIARCHARUM ALEXANDRINORUM. SII GABRIEL Patr. LXX.

hortatus est, ut à proposito desisteret. Relatum verò est ab illis qui eas degulerunt, ignem è coelo Regis palatium tetigisse, magnamque ejus partem absumsisse; famem, pestem, siccitatem omnes illius regionis provincias afflixisse: cùmque poenitentia ductus benedictionem & veniam à Patriarcha per literas postulasset, statim atque pervenit ad Regem illius responsio, finem accepit publica calamitas.

Anno antequam è vita excederet, vidisse eum aiunt in somnis, sacerdotes & monachos cum Evangeliiis; crucibus & thuribulis, (gravissimè tunc ægrotabat) qui dicerent venire se ad eum visitandum, sed anno elapso reversuros, & eum secum abducturos. Cùmque ex illo morbo convalesceret, obiit anno sequenti; &, ut Auctor Historiæ suæ initio notavit, fuit is Martyrum 862^{us}: qui convenit ex ejus calculo cum anno Lunari Arabum 539^o, sed contra vulgarem ejus supputandi rationem. Annus ille Æræ Martyrum respondet anno J. C. 1146^o: is verò Hegiræ 541^o, qui fuit Hæfethi 17^{us}. Sedit autem Gabriel annos 14, & menses 6: unde, etiam rectè colligitur ejus inaugurationem factam fuisse anno Martyrum 847^o. Obitus dies, fuit 10^a mensis Farmuthi. Abuk-bircar annum 861^{um} supremum ei fuisse scribit, Pontificatus annos 14, menses duos.

Præter ea quæ à nobis relata sunt de multa quam Hæmus ab eo extorsit aureorum mille, nullam à principibus extra tumultus occasione Beherami excitatos, calamitatem Christiani experti sunt; præterquam semel. Accusati sunt enim à nefario quodam Monacho Monasterii Abukema, qui erat balsamo ad *Myron* sive *Chrisma* conficiendum præpositus, quod apud eos exercerentur auguria, & divinationes, quibus inquirebant in salutem principis; artem quoque auri & argenti conficiendi exercerent. Unde missus satelles cum militibus ad Vallem Habib, ubi altare S. Macarii & ejus Ecclesiam spoliaverunt: sed rei veritate patefacta, Monachi seniores qui abducti Misram fuerant, liberi remissi sunt: delator ulcere insanabili percussus miserè periit.

Extant in amplissima Collectione Canonum Copticarum Synodales Constitutiones hujus Patriarchæ; quas, quoniam multa notatu dignissima complectuntur, Canonumque Collectoribus sæpè memorantur, in epitomen redactas referemus: I. Ne ullus pro ordinatione quidquam acciperet, atque ut datus munera quàm accipiens excommunicarentur. II. Ut ad preces matutinas & vesperinas Christiani in Ecclesiam convenirent. III. Ut Episcopi

Gabrielis
Constitutiones.

Symbolum fidei Orationemque dominicam plebi explicarent linguâ vulgari. IV. Episcopi, Sacerdotes, Clerici, vel Monachi ad choreas ludosve spectatum non irent. V. Ut nemo eorum, oblationes fidelium aliosque fructus Ecclesiasticos ad peculium augendum aut bona acquirenda impenderet. VI. Ut neminem excommunicare liceret, pecuniarum, aut alterius causæ ad forum sæculare spectantis prætextu. VII. Ut Laici Ecclesiasticis necessaria subministrarent. VIII. Ut ad communionem Eucharistiæ omnes jejunio & oratione se præpararent. IX. Ut pueri, qui ad vitam Ecclesiasticam à parentibus destinabantur, à teneris annis sacras scripturas & disciplinam Ecclesiæ docerentur. X. Ut matrimonia Quadragesimali tempore, aut etiam Paschali, non celebrarentur. XI. Ut ludiones, vel mimi, in Ecclesiis non inducerentur, sub prætextu lætitiæ in solemnioribus festis. XII. Cùm in Thebaidæ nonnulli maximam diem partem, quando nuptias celebrabant, tripudiis, ludisque confunderent, ita ut Dominicis Liturgia aliquando ad noctem usque differretur, fieri id prohibuit. XIII. Ut etiam ne diebus Dominicis solennes preces pro mortuis fierent. XIV. Ne Ecclesiastici cum familiis suis in Ecclesia habitarent. XV. Ut nemo oblationes, primitias, & decimas offerre negligeret. XVI. Ut Baptismus tempore Liturgiæ, aut Orationis publicæ, non administraretur. XVII. Ut Monachi absque causa ex Monasterio suo non exirent. XVIII. Ut mortuorum corpora in Ecclesiis non sepelirentur. XIX. Ut nullus post Baptismum circumcideretur. XX. Ut nullus pellicem uxori legitimæ superinduceret. XXI. Ut Sponsalia & Coronatio, id est officium benedictionis nuptiarum, non celebrarentur nisi præsentem Episcopo, aut qui ab eo delegatus foret. XXII. Ut Sacerdotes ex oblationibus, quæ ad altare offeruntur, nihil seponerent, quo veluti cibo communi uterentur. XXIII. Ut omnes Sacerdotes, & reliqui Ecclesiastici ad altare non accederent, nisi cum vestibus ordini suo congruentibus. XXIV. Ut nemo mulierem domi suæ haberet, præter uxorem, matrem, sororem, amitam, materteram, aut aviam. XXV. Ut Liturgia aliter quàm secundum receptum ordinem non celebraretur. XXVI. Ut Episcopi bis quotannis ad Cellam Patriarchalem convenirent. XXVII. Ut Episcopus neminem ad Monasticam Professionem admitteret, nisi qui esset ex sua Diocesi, & post triennii probationem. XXVIII. Ut Monacho non liceret, absque summa necessitate, pernoctare ex-

tra Monasterium, aut alibi communionem accipere. XXIX. Ut Episcopi, Sacerdotes, & Monachi de die balnea non ingrederentur, aut coram aliis nudarentur. XXX. Ut Episcopis & Monachis non liceret puellas venum expositas emere: si quæ, inter alia mancipia ad eos hereditate pervenissent, eas venumdare, aut, quod magis optandum, manumittere festinarent: atque interea eas ad domesticum ministerium non admitterent. Hæc sunt disciplinæ capita quæ Constitutionibus illis continentur, quarum plurima aut Canonibus totæ Ecclesiæ communibus, aut præcedentium Patriarcharum statutis præscripta cum essent, ob effractionem licentiam renovare coactus est. Pauca admodum sunt, quæ non intelligere facile sit, ex iis quæ toto hujus operis decursu diximus: reliqua locis aliis explicabuntur.

Memoria Gabrielis filii Tarik apud Æthiopes conservatur in Synaxariis quorum Ludolfus meminit in Commentario ad Historiam suam. *Laudatur*, inquit, *ab Encomiaste, quod precibus & adhortationibus suis Æthiopia motus sedaverit. Literatus fuit: Canones & alios nonnullos Rituales libros composuit.* Quæ verò de eo retulimus, quod hæc laus pertineat, satis explicant. Verùm quod Ludolfo ea occasione visum est Gabrielis nomen inter sanctorum memorias Calendario inferere ad 10^m mensis Farmuthi, absque ulla auctoritate fecit: neque enim occurrit nomen ejus in Calendario Ægyptiaco.

Ludolf. Com.
p. 434.

Porro quod Wanslebius, & ex ejus testimonio Autores Historiæ Chronologicæ Patriarcharum Alexandrinorum eidem Gabrieli præter Canones attribuunt Officium Hebdomadæ sanctæ, videtur dubium, cum illius mentio in ejus historia non occurrat: neque illius officii, cujus plura in Bibliothecis exemplaria reperiuntur, Autor dicatur fuisse Gabriel. Sed, opinor, Wanslebius fefellit nominis homonymia: nam inter istius Patriarchæ successores, Gabriel 88^{us} anno Martyrum 1127°, J. C. 1411°, Rituale Sacramentorum edidit, cujus testimoniis usi sæpè sumus, alia quoque Ecclesiastica Officia reformavit: inter quæ fieri potuit, ut etiam Hebdomadæ sanctæ Officium recenseret. Nam antiquius illud cum sit utroque Gabriele, à neutro componi potuit, sed facile ab 88° recenseri simul cum aliis.

Hist. Patr.
Alex. p. 523.

MICHAEL
Patr. LXXI.

MICHAEL PATRIARCHA LXXI.

POST Gabrielis obitum quatuor & amplius menses elapsi erant, antequam congregati Misræ Episcopi, Christianorumque primarii, circa novi Patriarchæ electionem consensissent. Prenabat Joanes quidam filius Kidarani Monachus ex S. Macarii cœnobio, suffultus auxilio Episcoporum aliquot, inter quos præcipui erant Jacob Episcopus Lekana ex Regione Behira : Christodulus Fuæ, Michael Tendatæ, quibus accedebant Nobiliorum Laicorum suffragia. Neque si ambitionem excipiamus, videbatur indignus supremo apud Jacobitas sacerdotio Joanes, sive Joannes : nam peritissimus erat linguæ Copticæ, & in scripturarum utriusque Testamenti lectione versatus, facundus, facilis ; eratque in eo oris dignitas præcipua. Abu-Yuceph quidam cognomento Philosophus, cum mores hominis & superbiam nosset, scripsit Misram ad congregatos pro electione, monens ne eum ad gubernandam Ecclesiam incauti eligerent, qui se ipsum regere non posset. Itaque post aliquam contentionem, repulsam tulit, statutumque ut ex communi consuetudine, sicut in dubiis, longisque de eligendo Patriarcha deliberationibus factum fuerat, Dei voluntas per schedulas sorte educendas exquireretur. Ita volentibus omnibus, hæc sententia in acta relata fuit, subscripseruntque omnes excepto Michaele, qui idcirco à plerisque existimatus est Joanni fuisse, cum re vera subscribere non posset ; neque enim literas noverat, aut Copticas aut Arabicas. Marcus filius Zaræ qui hanc & præcedentem historiam scripsit, (sed quæ ab aliquo interpolata est, sive ille Copticè eam scripserit, sive, quod sæpè videmus, in libris Orientalibus, continuator vel descriptor aliquid de suo addiderit, eo jam mortuo) Marcus, inquam, ille aderat inter alios ; & cum viris primariis, Episcopisque significasset, quis & qualis esset Michael, placuit nomen ejus inscribi inter candidatos, qui tres fuerunt : Joannes filius Abulsetah Monachus ex Cœnobio S. Joannis : Salomon filius Dehiari ex Cœnobio Primi ; & Michael Monachus S. Macarii, in Cella dicta *Deschuri*. Is pietate quidem & laudabili vita commendabatur ; sed cum à prima juventute parentes ejus institutionem neglexissent, nec Copticè nec Arabicè legere poterat : unde ob scientiæ defectum, contentus accuratâ disciplinæ monasticæ observantiâ,

Electio per
sortem.

Sacerdotium, aut alium Ordinem Ecclesiasticum non acceperat. Tribus schedulis, quarta de more adjuncta est inscripta nomine Jesu Christi Pastoris boni, quæ cum educeretur, ut alibi dictum est, significatum sibi credebant, neminem ex tribus propositis dignum esse Patriarchatu, & tres alios inscribebant.

Politis super altari schedulis, Liturgiæque per triduum celebratâ, adductus infans, eam eduxit quæ Michaelis nomine inscripta erat. Publicata electione, & ejus proclamatione facta, omniumque acclamationibus comprobata, eo ipso die ordinatus est Diaconus, secundo Presbyter, tertio *Komos*, seu Hegumenus, in Ecclesia Muhallaca Misræ, impetrata prius autoritate Calisæ, qui electionem diplomate confirmavit. Ita Alexandriam magno & splendido comitatu deductus, ibique ordinatus est, Dominicâ 5^a Mesori, anno Martyrum 876^o: sed errat Autor perspicuè: nam mortem ejus assignat anno ejusdem æræ 863^o, cum non integrum annum superstes fuerit. Anno igitur 862^o ejus ordinatio facta est, aut 861^o secundum Chronicon Orientale, quia mense Mesori ordinatus est, ultimo anni Ægyptiaci: atque adeo statim initium habuit annus 862^o Martyrum: is est J. C. 1146^{us}, Hegiræ 541^{us}, quo ejus mortem Makrizius assignat. Abulbircat, quod rarum est, consensit huic supputationi, ut anno 861^o ordinatus sit, sequenti mortuus, postquam sedisset menses octo, dies 4: & obierit 3^a Farmuthi, Feriâ 6^a post Pascha.

Notat Autor non mediocrem laborem fuisse ut doceretur Liturgiam D. Basilii, eamque memoriter teneret: neque Misram rediisse donec eam didicisset, sacrumque secundum eam celebrasset. Ea quippe disciplina est Jacobitarum Ægyptiorum multis locis perscripta, ut Sacerdos nullus ordinetur qui Liturgiam memoriâ non teneat, quod multò magis in Patriarcha necessarium erat.

[Liturgia memoriter tenenda Patriarchis.

Cum Misram rediisset, tantâ pompâ exceptus est, ut similis nunquam visâ fuerit: prodierunt enim obviam non Christiani solum, sed Muhamedani tantâ frequentiâ, ut plures Christianis essent.

Statim quinque Episcopos ordinavit, atque inter eos Ebn-Nefra filium Nobilis ex Misra Christiani, Monachum & Diaconum S. Macarii, in Cella Denschiri, quamvis triginta tantum annos ætatis haberet; sed moribus erat omnique virtute conspicuus. Eum Misræ ordinavit Feriâ 5^a contra consuetudinem Ec-

clesiasticam, quæ ordinationes fieri præscribit Dominicâ.

Ordinavit quoque Abulmukarenum filium Abu-Juceph Episcopum, qui erat ex primaria inter Christianos dignitate. Diacorum etiam Ebn-Jaroud ordinavit Episcopum Chebarelkhimar; & Marci nomen dedit: frequens quippe non in Patriarchatu modò, sed etiam in promotione ad Episcopatus, mutatio nominum. Notat hoc loco sedem Chebra Demnehour toto Gabrielis tempore Episcopum non habuisse, quia consuetudo erat ea in Dicecesi, ut nullus nisi virgo eum Episcopatum obtineret: qui autem ordinatus fuerat, uxorem habuerat, quæ tamen erat mortua. Monachum Sahiditam Simonem ordinavit Episcopum Moniat Ebn-Hassid: alium Theonam ex eadem regione, qui prius mercaturam exercuerat, Episcopum Echmimæ: Abulbedrum Balinæ: atque ita per paucos menses, multos in variis sedibus constituit.

Monachorum scelus.

Causam mortis ejus fuisse memoriæ proditum est, datum à Monachis ex Cella filii Haidaræ venenum, quo tabescens, postquam sex fere mensibus decubisset, diem suum obiit. Erant autem illi amici & contubernales illius qui tantopere laboraverat, ut Patriarchatum obtineret: neque bene affecti erga eum erant Monachi, quòd ipsos sub arctissima disciplina contineret, adeo ut non modò verbis, sed etiam verberibus delinquentes castigaret.

Sub illo brevissimo Pontificatu Ecclesia Jacobitica summam tranquillitatem obtinuit: quia Hafethus satis benignus erga Christianos fuit, nec Viziri quidquam adversùs eos illo intervallo moliti sunt.

Michael iste in Chronico Orientali appellatur Ebn-Dakalti, & ita quoque in Canone apud Abulbircat. Quod verò Poeta Æthiops cum admiratione eum laudat, quòd schedula ejus nomine inscripta, ex urna prima prodierit, stuporem ipse suum prodit, cum laudis argumentum quærit in disciplinæ apud Copritas & Nestorianos receptæ eventu, in quo non miraculi plus, quàm in tot aliis electionibus per sortem Ecclesiasticam factis intervenit.

JOANNES PATRIARCHA LXXII.

JOANNES
Patr. LXXII.

MORTUO post brevem vix novem mensium Pontificatum Michaelē, statim de sufficiendo in ejus locum Patriarcha inter Coptitas deliberari coeptum est. Cū autem in præcedenti electione multa in laudem Joannis filii Kidarani Monachi ex Cœnobio D. Joannis dicta fuissent, ejusque nomen inter tres candidatos inscriptum esset, plerique Episcopi & Laicorum primores, qui ad eum inclinaverant antequam electio sorti permetteretur, eum communibus votis expetiverunt. Ita absque longa dilatione missi sunt qui eum ex Cella sua extraherent, & Misram adducerent, ubi ordinatus est in Ecclesia Muhallaca, primo die Sacerdos, nam erat jam in Diaconorum ordine: postero Hegumenus seu Komos. Pergere etiam ad ejus consecrationem inter se stauerant, nisi obtitisset Joannes ambitiosus ille Monachus, qui per amicos & patronos quos in aula Califæ muneribus sibi conciliaverat, obtinuit, ut omnes Episcopi, & primores Christianorum, coram Principe, Judicibusque Divani præcipuis, rationem electionis à se factæ reddere cogerentur. Cū in confessum venissent, unus Episcoporum libera oratione testatus est, non posse Christianos, nisi profligatis majorum suorum institutis, eum eligere Patriarcham, qui eam dignitatem, ambitu, malisque artibus quævisset, præsertim interpositâ Principum autoritate. Itaque electum fuisse communi consensu virum, qui totam in desertis vitam transegisset, nihil tale cogitans, adeo ut catenis ferreis constringendus fuisset, ne fugam arripens in interiorē solitudinem se reciperet: doctum, pium, talem denique qualis inter mille unus vix reperiretur: factum id non novo, sed omnium sæculorum exemplo, cū semper Christianis licuerit eligere in supremum Ecclesiæ suæ pastorem, quem ipsi vellent. In frequenti igitur illo Judicio, Jurisque Muhamedani Consultorum Senatu statutum est, ut delegati Alexandriam proficiscerentur, convocatisque Christianis intelligerent, utrum ex duobus mallet. Cū in urbem venissent, ab omnibus Christianis una voce acclamatum est: *Joannes filius Abulfetah Patriarcha noster, atque ipse hoc honore dignus est.* Ejus autem modestiam ipsi Muhamedani admirati sunt, in eo confesso: nam cū ab uno eorum interrogatus esset, quam haberet opinionem de Joanne filio Kidarani com-

Joannis electio.

petitore suo, numque eum existimaret digniorem se, & magis idoneum ad Patriarchæ munus sustinendum; respondit: *Ita sanè, quandoquidem præstantior est & legum Ecclesiasticarum peritior.* Eum in modum electione ejus, Califæ nomine confirmatâ, ordinatus est Kahiræ, seu Misræ, ut videtur, nempe quia ex more non prius ordinari poterat, quàm Califam salutasset; etsi id sileat historicus. Verùm id satis intelligitur, quia postea completam fuisse Alexandriæ ceremoniam asserit.

Facta est ordinatio Dominicâ, quæ erat 2^a dies τῶν ἑπταμήνων, quas Nisi vocant Ægyptii, dies quinque scilicet quibus augebatur annus, anno Æræ Martyrum 863°. Cùm autem obierit Michael 3^o Farmuthi anni superioris 862ⁱ, vacavit sedes reliquis anni mensibus quatuor, uno die minus; & rectè ordinatus dicitur eo ipso anno, quia ἑπταμήναι ad exeuntem annum pertinent non ad ineuntem: falliturque Chronici Autor cùm vacationi tribuit annum unum, dies 70; quem calculum secutus est Makrizius: Abulbirca 862°. Sequens qui verus est, ut diximus, inaugurationis annus, respondet anno Æræ Christianæ 1147°, quem sequitur Bissextilis, in quem incidebant ἑπταμήναι: atque ita ex earum nota certus est character anni, qui 862° Æræ Martyrum non convenit.

Post ordinationem Alexandriam profectus est, ubi per solennem proclamationem consummata est ejus inauguratio: deinde Misram rediit; & magnâ pompâ exceptus, ad Ecclesiam S. Mercurii deductus est, ubi habitabant Patriarchæ. Joannem filium Kidarani, ne ex repulsæ dolore aliquid adversus se Ecclesiamque moliretur, consolari volens, obtulit ei Episcopatum Semnudæ: sed ille accipere noluit; & quod reliquum vitæ fuit, in Monasterio suo quod erat in regione El-Rif, transegit.

Res Muham-
medanæ.

Eo tempore Rodowan ex arce Imperiali in qua tenebatur, quasi in libera custodia, perussio pariete Misram venit; & in ea urbe Kahiræque per veteres clientes suos, Nigritasque & alios milites tumultum excitavit, & urbem obtinuit: verùm etsi Hafethus Califa domi se continens, nihil adversus eum moliretur, tamen seditione orta, à Nigritis quibusdam occisus est Rodowan; neque Hafethus dum superstit, alium Vizirum constituit. Christianos qui erant in Divanorum ministerio, quos Rodowan pepulerat, præcipuè Ebn-Yunes restituit, qui alios quoque in eodem officio collocavit. Verùm calumniis appetitus paulò post cum fratre, jussu Hafethi est occisus, Samaritani qui calumniati eos fuerant,

non toto vertente anno, in ipso loco supplicio affecti sunt.

Mortuus est Hafethus, anno 544° Helaleo, qui convenit cum numero annorum Hegiræ, qui à Muhamedanis historicis usurpatur: regnaverat autem annos circiter viginti. Ejus loco salutus est filius ejus Abu-Manfur filius Ismaelis, vel potius Ismael, ut habent accuratiores historici, qui novam dignitatem accipiens, novo quoque nomine appellatus est *Dafer-ledin-Illa*: annorum septemdecim juvenis. Is statim Vizirum assumpsit Negemeddinum filium Mesal, patri suo familiarissimum: sed unus ex purpuratis Hali filius Selar, qui tractui Alexandrino præfectus erat, collectis militibus ex Occidentali Regione vicinisque prædiis, constaturo valido exercitu, Kahiram ingressus, eodem anno illum expulit, & Viziratum occupavit.

Negemeddin dum exercitum comparat, & Nigris armat, occisus est in prælio; caputque ejus conto præfixum, Kahiram circumlatum est. Eo tempore Christiani zonas abjiciendi, & notas quas deferre cogebantur in vestimentis omittendi consilium ceperunt: sed triduo tantum hæc novitas duravit. Quidam Muhamedanorum Doctores, novo Viziro persuaserant, ut eam ipsis libertatem concederet: spemque fecerant Christianos hujus beneficii gratiâ pecunias subministraturos. Sed cum elapso triduo nemo illorum nomine eas præstaret, aut promitteret, vetera edicta renovavit. Idem Vizirus insurgente adversus eum Nasserò Abbassi filio occisus est. Pater Nasserì Abbas, præfectus erat urbi Balbais, & vicinæ regioni: inde movens ut filio suppetias ferret, Kahiram cum magnis copiis ingressus est: & satagente filio eodem Nasserò, Vizirus exercituumque Princeps declaratus à Califa fuit. Hæc ita narrat historicus noster, atque etiam Vizirum Adelum (nam ita honoris causâ appellatus est Hali filius El-selar) manu Nasserì occisum per insidias, etsi mater Abbassi uxor ejus esset. Verum tam confusa est, & tot contrariis autorum inter se testimoniis perturbata illorum temporum historia, ut faciliè explicari non possit. Eò tandem res cecidere, ut Abbassus Viziri dignitate & vita prædecessores suos Halim spoliaverit. Erat secundum Autorem nostrum Abbassus, ex regia familia Moltemidarum, filiorum Temim, qui in Africa interiori regnum occupaverant; quod ab aliis non scribitur. Daferus Califa juvenis, & deliciis disfluens, Nasserum ejus filium ob ætatis florentiæ eximiamque pulcritudinem, tam perditè amare cœpit, ut non

modò dies, & noctes cum eo comotationibus & lusu consumeret, sed etiam sæpè noctu egrediebatur ex arce paucis conficiis, & absque custodia ad Nasserum comestatum ibat. Cùm inde maximâ apud omnes infamiâ Nasserus flagraret, à patre ad occidendum Calisam impulsus est, eo magis quòd, ut plerique Autores tradunt, filius ei significaverat, parari sibi ab illo insidias, excitari- que se ad patris necem, promissa Viziri dignitate. Ita cùm Califa noctu, duobus tantùm comitibus, ad Abbassi domum venisset, oppressus subito occisusque cum illis est, cadavera in puteum coniecta. Postero die Abbas ad Aulam profectus est, & ad Principem ut admitteretur, instabat. Cùmque cubiculariis & alii causas diversas prætulerent, tandem jam à nocte præterita cum non comparuisse, fateri coacti sunt. Abbas fratres ejus duos, Josephum & Gabrielem, tum Salehum fratrem eorum patruelem, Haceni à patre veneno necati filium, immixtis militibus statim occidi jussit, tanquam cædis in Califa perpetratæ reos: multi præterea quos suspectos habebat, occisi sunt. Mox in Gynæceum Abbas ingrediens, Favezum puerum quadriennem eductum, Calisam proclamari fecit, omnesque sacramentum ei dicere coegit: atque in hunc modum rerum potitus est. Puer spectaculo tot cadaverum adeo territus fuit, ut toto vitæ tempore, hebes & emotæ mentis fuerit. Verùm non diu impunè tulit Abbas: nam cùm rumor cædis ab eo perpetratæ emanasset, Duces præcipui advocaverunt Talahia filium Rezik, Præfectum *Moniat Bani Khacib*, qui Kahirâ potitus, Abassum & ejus filium fugâ salutem quærere coegit. Illi in Syriam pecuniam, gemmas, & quidquid convasare poterunt, secum tollentes, fugerunt. Soror Daferi, ad Francorum duces qui nuper Ascalonem ceperant scripsit, ut fugientes, si fieri posset, comprehenderent, magnam si id facerent mercedem pollicita. Egressi igitur ex urbe manipuli aliquot militum eos interceperunt; commissaque pugna Abbas occisus est, Nasserus captus & Cahiram missus: omnis eorum præda in Francorum potestatem venit. Nasserus mulieribus Gynæcei quæ Daferi uxores aut concubinae fuerant, traditus, crudeliter excarnificatus est: nam dexteram quâ dominum occiderat, soror principis tamdiu verberavit, ut eam prorsus contriverit. Carnes ex toto corpore forficibus concisas, coram eo comederant, focisque muliebribus eum contuderunt: postea vivus in crucem sublatus est: & cadaver igne consumtum.

consumtum. Cædes Daseri incidit ex omnium Autorum consensu in annum Hegiræ 549^{um}, J. C. 1154^{um} : in aliis circumstantiis tanta est eorum diversitas, ut major esse non possit. Autor noster Talahiam fuisse scribit Præfectum Behnele & Aschemonin in Thebaide : evocatumque non modò à Ducibus qui Abassum ferre non poterant, & qui Califæ fratrumque ejus cædem molestè ferebant, sed ab ipsis etiam Gynæcei mulieribus, quæ in doloris signum, comas præcisas ad eum miserunt : ipse verò quasi Califæ occisi vindex, capillos ex hastis appendit, nigraque vexilla præferri jussit : eoque ipso anno Kahirâ potitus, Abassum fugere in Syriam coegit. Cùm verò Viziri dignitatem novi Califæ nomine accepisset, vestem, torquem, reliquaque insignia, statim ad ædes Abassi cum indice uno ex cubiculariis, qui cædem commissam aliis ignorantibus viderat, venit, designatumque locum fodi jussit : ubi tria cadavera reperta sunt, Daseri, & duorum comitum : postea funus magnâ pompâ deductum est.

Ita confirmata ipsi suprema autoritas fuit, quâ statim intemperanter abusus est : erat enim avarus, multosque pecuniarum quocumque modo comparandarum studio perdidit. Erat præterea Christianis infensus : unde vetuit ne cidares pendulas deferrent, sed aliquâ notâ in capitis tegmine, tam ipsi quàm Judæi, à Muhamedanis distinguerentur. Calumniatorum adversùs eos delationes facillè recepit. Eo tempore contigisse videtur, quod paulò superiùs refertur, sed absque annorum nota : quod scilicet Ecclesia quæ à Jacobitis Matareæ ædificata fuerat, prope locum ubi balsamum nascitur, unde Chrisma parari huc usque solet, à Muhamedanis spoliata, & in Meschitam conversâ sit, cùm antequam perfectum fuisset ædificium, in ea sacra fecissent, ipsamque sub nomine S. Georgii dedicassent. Notum est porro ex omnibus tum Christianorum, tum Muhamedanorum libris, quanta sit illius loci etiam apud Infideles veneratio, ex antiqua traditione quæ apud omnes pariter recepta est, quòd Beata Virgo cum infante Jesu in Ægyptum fugiens, eodem in loco conledit : panosque in vicino fonte laverit, qui inde virtutem quamdam conceperit, adeo ut non alibi in toto orbe balsamum illud exquisitum, quàm Matareæ nascatur. Plena sunt hujus traditionis etiam Itineraria, tam antiqua quàm recentiora : imò & Muhamedani Geographi, scriptoresque rerum naturalium.

Novi Viziri in Christianos crudelitatis.

Traditio de origine Balsami.

Kewini. Matre.

Res Muht-
medanz. A-
ded ultimus
Fatimida-
rum.

Circa eadem tempora, magna in Ægypto raritas annonæ fuit : quam secuta est tanta lues in bobus & armentis, ut aratores, camelis, equis, mulis & asinis uti coacti fuerint.

Mortuus est Fayez Califa anno Hegiræ 555° : cuius loco Califa renuntiatus est Aded, seu Adad, Hafethi filius, 11^{us} & ultimus Fatimidarum. Eo ipso anno obiit Moctafi, 32^{us} Califa Abbassidarum, cum 25 annis sedisset : cui successit Mostangid, Moctafis filius. Erat autem eo tempore exigua aut nulla Califarum Bagdadensium autoritas : neque in ipsa urbe Bagdado quidquam poterant, Seljukidis rerum potentibus : Mesopotamia, Syria & Palestina, erant in Atabekiorum, aut Christianorum, vel minorum aliquot principum potestate. Ipsi etiam Seljukidæ post continua bella quæ à morte Gelaeddini Melikschahi vix interrupta sunt, uno ex filiis Sinjaro, qui usque ad annum 551^{um} superstes fuit, principatum inter cæteros amplissimum obtinente, donec temerè adversus Cachanum Turcarum regem movens, bis victus est, primoque prælio amisso omni exercitu : tum secundo captus, & per quadriennium in cavea ferrea conclusus, tandemque elapsus : illi, inquam, Seljukidæ vastissimi illius imperii lacias aliquot, in multas familias divisi ægrè retinebant. In hoc rerum statu Ægyptus sub principibus pueris in omnium qui viribus prævalebant, ducum prædani cedebat. Talahia Vizirus, confirmatâ, ut videbatur, dignitate, anno 556° à tribus sicariis occisus est. Rezik ejus filius, eadem à Califa ornatus est, appellatusque Ajal Maged Elselam : sed eam non diu tenuit, rebellante Chawero, qui ex paternis necessariis ad Præfecturam Kusæ in Thebaide proventus ab eo fuerat. Erant Chawero inimicitie cum Hassamo Talahie ex sorore nepote, qui Præfectus erat Moniet-beni Chafis, & per insolentiam ex avunculi dignitate conceptam, omni qua poterat ratione, Chawerum offendeat : servos ejus, si qui per ejus Præfecturæ loca transirent, spoliabat, aut capiebat : cumque alter sæpè de injuriis apud Vizirum questus esset, nihil profecerat. Verùm Hassamus majoris contumeliæ causâ arculam operis elegantis ad eum muneris loco misit, in qua lora bubula quibus cadere servos solebant, continebantur. Itaque Chawerus desperatus, nihilque non metuens, in aviam solitudinem Lowaxat fugit, ut missis adversus se copias paulatim siti, aeris fervore, fabulique & comæatus inopiâ conficeret. Cumque per menses tres frustra infecuti cum fuissent quos Vizirus miserat, tandem

per desertum Elwak ad Piscinam prope Alexandriam venit, sub-
stititque ad *Mehalles Abdelrahman* : unde in vicum vicinum
Belkina dictum transiit anno 558^o Hegiræ ineunte. Vix triduo
illic fuerat cùm ad eum convenerunt ex Garbia sive Occidentali
regione Ægypti, & ex aliis locis, præcipue ex deserto, milites,
Arabesque magno numero, adeo ut intra paucos dies equitum
decem millium exercitum conflaverit. Tum Arabes latrocinii
assuetos prædatum dimisit terras filiorum Rezik, quibus agri ho-
stium divisi fuerant : omnemque illis prædam concessit : primoque
successu elatus movit ulteriùs, & prope Misram Kahiramque ca-
stra posuit. Vizirus & sui, adeo territi subito Chaweri adventu
fuerunt, ut omisâ pugnâ omnes fugerint. Ipse in sacculum con-
gestis unionibus & gemmis infiniti pretii, quod annum Ægypti re-
ditum exæquaret, solus equo conscenso fugit : mille aureos in alio
posuit, & super sellam equi collocavit. Incidit in Arabum turmam,
à quibus spoliatus, nudusque in deserto relictus est, ubi paulum
absuit quin frigore & fame periret. A Jacobo illorum Arabum
duce agnitus, & in tentorium deductus est : cùmque de eo fama ad
Chawerum pervenisset, eum ad se adduci iussit : eumque non
ut hostem, sed ut amicum in Vizirorum Palatio collocavit, red-
ditâ concubinâ, filiis & quibusdam domesticis : sæpè ad eum ve-
niebat, & ad mensam eum adhibebat. Cùmque accusatus fuisset
quasi fugam moliretur, & Emiros ad defectionem sollicitaret, ca-
tenis constrictus est : quas cùm limare illum renuntiatum foret
Chaweri filio, is ad eum cum gladio ingressus eum obtruncavit,
patre nescio, & factum graviter dolente.

Eodem ipso anno Dargam Ducem præcipuus Viziratum oc-
cupavit ; excitatâque adversus Chawerum militiâ, illum Kahirâ
fugere coegit : Tai qui Rezikum occiderat, in concursu primo ca-
ptus & cæsus est. Dargamus dignitatem tenuit mensibus novem,
nempe à mense Chewal anni 558ⁱ, usque ad Jomadam 2^{um}
anni sequenti. Vocatus est novo titulo *Melic Asfal*, frater ejus
Molhem, Adeli nomine, Nasser alter ejus frater, *Nasser el Mus-
limin* appellatus est. Chawerus Damascum fugit ad Noraddinum
ex Arabekiorum stirpe famosum principem, juratum Christiano-
rum hostem ; à quo benignè susceptus, auxilium petiit & obtinuit.
Missus idcirco cum magno exercitu Chiracoua, quem nostri Au-
tores *Siracorum* vocant, ex Curdis oriundus, Jobi, qui Saladini
pater fuit, frater. Is cum Chawero in Ægyptum veniens ad

Chiracoïa
Vizirus Æ-
gypti.

Balbaïs castra posuit : ubi cum adversus eum processisset Nasser el Muslemine, cum exercitu longè superiori, victus tamen est. Chawerus ad Kahiræ suburbia venit, mox in urbem receptus est ; cum Dargamus fugiens & ignotus occisus esset ; caputque ejus postea suis ostensum fuisset.

Cum interea Chawerus monitus fuisset parari sibi insidias à Chiracoïa, & ipsum Kahiræ mœnibus exclusisset, ingens tumultus tota Ægypto fuit ex diversarum partium studiis : omnes milites ad prædam versi, multas in urbe cædes perpetraverunt, domos diripuerunt, raptasque è conjugum sinu mulieres, aut alios homines liberos vendiderunt, Christianos, Armenos, Turcas, Ægyptios. Eo in tumultu Chenusa Monachus S. Macarii ab illis captus, cum ad Muhamedanam religionem profitendam compelli non potuisset, occisus est anno Martyrum 808° : sepultusque cum honore in Ecclesia S. Sergii Miskæ. Tunc diruta ab infidelibus plures Ecclesiæ, atque inter alias prope Kahiram *Hamara* & *Zahara* : omnes vastata & spoliata.

Chiracoïa prope urbem cum infesto exercitu obsidionem & prædas non intermittebat, donec accepit per Arabes, advenire cum Francorum exercitu Regem eorum Almericum, quem Arabes *Meri* vocant, eos quippe magnis muneribus ad suppetias sibi ferendas Chawerus excitaverat. Eorum adventu territus Chiracoïa, obsidione Kahiræ omisâ, in Sahidem fugit. Franci ad Balbaïs castrametari per mensem subliterunt ; & postea hostem persecuti sunt. Commissum est inter eos prælium prope locum dictum *Elbanin*, in Sahidis finibus, ancipiti fortuna : nam ex Chiracoïæ exercitu multi ceciderunt, multi capti sunt : ex Francorum & Ægyptiorum parte, amissi etiam non pauci. Inde elapsus & ad Inferiorem Ægyptum festinans, Alexandriam occupavit, ubi à Francis & Ægyptiis diu obsessus, secretò effugiens Kahiram venit. Tandem de concordia actum Almerico satagente, cum jam satis intelligeret quanto suo periculo cum Christianorum robore inter duos Infidelium exercitus conclusus versaretur : Chawerus quæ ipsi pollicitus fuerat fideliter præstitit, Chiracoïæ data pecunia, ut in Syriam reverteretur. Ita Chawerus in Viziri dignitate confirmatus, eam usque ad annum Hegiræ 564^{um} retinuit. Tanta porro in illo Califatu imaginario Adedi vicissitudo rerum fuit, ut eam accuratè persequi nonnisi longo sermone possemus. Hæc verò fuscè tractata sunt ab Abulfeda, Ebn-

Chucnah, autoribus rerum Ægyptiacarum omnibus : neque plura quàm retulimus necessaria sunt ad cognoscendum quantopere afflictus esset rerum status in continuis pro suprema dignitate præcipuorum ducum præliis, licentiaque militari, cùm Muhamedanis omnia tunc adversus Christianos licerent. In illis etiam tumultibus describendis occupatur Autor hujus vitæ, ita ut de rebus Ecclesiasticis aut Christianis pauca admodum referat.

Inter alia memoratu digna quæ sub Patriarcha Joanne contigerunt, fuit conversio ad fidem Christianam, celebris inter Judæos Magistri, Abulfekhar filii Azhar. Hic cùm libros qui de ea haberi poterant legisset accuratè, adeo ut cum Judæis Hebraicè, cum Christianis Copticè loqueretur facillimè, disputationesque cum utraque sectæ hominibus habitas eà linguâ Christianis communicasset, tandem fidem in Christum magnâ constantiâ professus est, eoque nomine multa tam à Judæis quàm à Muhamedanis sustinuit. Judæi pecuniam sæpè polliciti sunt infidelibus, ut eum è medio tollerent : verùm Deo protegente liberatus est, & quadraginta annis in Ægypto inter ipsos Judæos professionem quam fecerat, constantissimè tenuit.

Judæi celebris ad fidem conversio.

Cùm adhuc Vizirus esset Hali filius Selar, pervenerunt ad eum literæ Regis Æthiopæ, quibus rogabat ut juberet ordinari Metropolitam regni illius. Erat tunc apud Æthiopes in ea dignitate Michael antea *Habib* seu Agapius dictus, Atsijâ oriundus, qui à Macario Patriarcha ordinatus, jam senuerat. Eo prætextu petebat Æthiopæ Rex alium ordinari; causa verò præcipua fuit, quòd cùm is regnum absque ullo jure occupasset, Metropoli non modò injustam usurpationem non probaverat, sed eam illi vehementer objiciebat. Patriarcha ad quem pariter scripserat Rex, negavit secundùm Christianam disciplinam licere ut vivo Metropolita, alius in ejus locum ordinaretur; & quamvis instaret Vizirus, mandatis ejus acquiescere noluit. Ille furore percitus Patriarcham in carcerem Palatii sui conjici jussit, ubi magnas calamitates perpessus est; neque libertati restitutus, nisi post Viziri illius mortem. Frustrà ex recentiori Historia Æthiopæ, quam magno labore collegit Jobus Ludolfus, quidquam ad hujus historię illustrationem quisquam expectet : nihil enim reperitur certum, ante Lalibela Regem, de quo postea dicitur. Omnino igitur oportet ea quæ de Michael Patriarcha retulimus, contigisse eo intervallo temporis quo familia quam *Zagiam* appellant, regnum occupavit,

Res Æthiopæ.

Vuu iij

quod juxta Ludolfum contigit circa annum J. C. 960^{um}, aut paulò post quando interrupta est successio Delnoodi familiae. Sanè Baltasar Tellezius qui ex sodalium suorum commentariis longè certiora quàm omnes reliqui de rebus Æthiopicis prodidit; reges ex Zagæ illa stirpe oriundos accusat tanquam injustos & memoriâ indignos, invidiosè nimium, si Ludolfo credendum est, cum, inquit, *illa multos insignes Reges Æthiopiæ dederit, quorum etiam in Liturgia Æthiopica p. 163. col. 3. & apud Poetam meum felix est memoria, ut Degna Michael & Newaia Christos*. Nec tamen aliud de illis Tellezius scribit, quàm quòd eos in Catalogo suo numerandos non est arbitratus, quia regnum exclusâ Salomonæ familiâ injustè occupaverant. In tales igitur omnino quadrat, quod Autor noster scribit, quamvis incredibile videatur, ut de jure regni Michael Patriarcha litem Regi, qui tunc erat, moverit, ob antiquam & quæ jam annorum fermè ducentorum possessione firmata fuisset, familiæ Zagæ usurpationem. Verùm, ut credibile est, erat aliud quiddam negotii, quo exclusis legitimis dominis ille regnum sibi vindicaverat, quod ob summam historiæ Æthiopice obscuritatem divinando tantùm assequi possumus.

De sensu
Confessionis
fidei circa
Eucharistiam
controversia.

Nova sub eo Patriarcha contentio fuit circa Orationem seu Confessionem quæ ante perceptionem Eucharistiæ dicitur. Macarius Episcopus Semnudæ ejus ex fratre nepos, fraterque spiritalis in vita Monastica multos offenderat, quasi nimium mundanis rebus addictus, gloriæque cupidus. Ipse invicem offensus quibusdam Monachis, & Salmoni Abbati ad S. Bichoim, eos accusavit per literas apud Patriarcham, quòd Confessioni quæ in fine Liturgiæ dicitur, vocem novam à se ipsis institutam adjungerent, quæ antiquitùs usurpata non fuerat. Ea erat vox Coptica quæ *vivificum* significat; quæ tamen in multis aliis Liturgiæ locis usurpata reperiebatur, atque ita expositio fidei quæ in fine Liturgiæ fiebat, convenienter eam recipiebat in hanc sententiam. *Credo & confiteor usque ad ultimum vitæ spiritum, hoc esse corpus vivificum quod assumpsit filius unigenitus, Dominus & Salvator noster Jesus Christus, ex Maria Virgine, & fecit unum cum divinitate sua; absque confusione, aut commixtione, aut divisione.* Cùm literas Macarii Episcopi Semnudæ legisset Patriarcha, displicuit ipsi quod factum fuerat à Salmone & fratribus ejus Monachis; & post multos utrimque sermones, convocatis Epi-

scopis, res in eorum confesso maturè perpenſa eſt. Tandem judicaverunt vocem de qua ambigebatur, orthodoxam ſententiam efficere, neque cauſam eſſe cur ea rejiceretur; quandoquidem corpus Chriſti eſt verè vivificum, & qui in illud credit, ei prodeſt ad vitam æternam. Scripſit igitur Patriarcha ſecundùm illam definitionem ad omnes provincias; eamque ſuſceperunt paſſim, in regione maritima, Miſræ & Alexandriæ, omneſque Monachi, exceptis Sacerdotibus Eccleſiæ S. Macarii, qui eam vocem adicere renuerunt, excuſaveruntque ſe, eò quòd additio illa nova eſſet, & apud majores ſuos in uſu non fuiſſet: tum quòd adjungeretur ipſorum cauſa, & novum quemdam ſenſum inſinuare videretur. Hæc Autor noſter, qui de controverſia circa celebrem hanc Confeſſionem fidei, plura non habet: ſed ex Liturgicis codicibus quorum aliqui eam vetuſtatem habent, ut ab Joannis Patriarchæ ætate non longè abſint, intelligitur receptam tandem ubique eam particulam, quæ otioſa aut indifferens omnino cenſenda non erat. Nam, ut ex Cyrilli Anathematismiſ & Neſtorii Quaternionum excerptis manifeſtum eſt, carnem Chriſti vivificam dici, hæreticus ille non patiebatur. Itaque apta omnino vox illa eſt ad explicandam Eucharistiæ fidem, ſimulque ad jugulandam Hæreſin, quam Jacobitæ tantopere averſabantur, neque aliena à ſenſu Orthodoxo ſententia videri poterat, quæ Cyrillum, Ephesineſque Concilium Autores haberet. Non ergo culpabatur à Salmone ſeu Salomone Abbate & ejus Monachis Confeſſio de Eucharistiâ, quando quidem eam adhuc expreſſiorem eſſe volebant: neque quidquam aliis in ea additione diſplicebat, præter novitatem, quæ ſere ſemper etiam in melioribus iſtitutis ſuſpecta fuit. At fortaiſſis Monachos S. Macarii moleſtè habere potuit tum ſuſpicionibus Liturgicas orationes augere neceſſe foret: tum fortaiſſis ambitio quædam præpoſtera, quaſi ob Monasterii ſui prærogativam inſignem, ab inferioribus dignitate doceri nihil deberent. Sane contra illius Confeſſionis ſententiam nihil quidquam excuſpi poſſe, res ipſa clamat; & quæcumque ad eam illuſtrandam adducere hoc loco poſſemus, alibi fuſè expoſita ſunt.

Sub Viziro Saleho quaſi non ſatis turbatum in re publica foret, niſi novas in Eccleſia Jacobitæ agitarènt, multæ ad eum Episcoporum & aliorum contra Patriarcham querelæ delatæ ſunt, quaſi autoritate ſua impotentius abuteretur. Ea occaſione confeſſus habi-

Turbæ ad.
verſus Pa-
triarcham.

tus est, ubi Viziro præsente, de Religione Christiana disputatum est, cujus veritatem Patriarcha multis rationibus confirmavit: atque inter alias eam adhibuit; quòd *Iesus Christus in Alcorano, Spiritus, & Verbum Dei sit appellatus*; atque ita ipso Muhamede non diffidente, dignitas ejus superaret omnium Prophetarum dignitatem. Hæc disputatio literis consignata paulò post fuit, & extat in aliquibus codicibus. Cùm deinde quæstio de injuriis habitâ fuisset, jussus est exire Patriarcha, ut liberius qui de eo querebantur loqui possent: nec tamen continere se potuit, quin Monachum audacem præ cæteris, verberari coram se juberet. Hinc Vizirus eum in carcerem conjici jussit, Christianosque ejus causâ vehementer affixit: & tamen, si superis placet, Episcopus ille percussor & turpis lucri cupidus, in carcere prophetabat, & miracula faciebat: prædixisse quippe dicunt proximam victoriam omnium liberationem, quæ eadem Viziri secuta est.

Obiit autem Joannes cùm illam dignitatem Chawerus obtineret 4^o mensis Pachonis, anno Martyrum 883^o, qui respondet anno J. C. 1167^o, Hegiræ 563^o, à 16 Octobris ducto initio: sepultus est post celebratas solennes exequias in Ecclesia S. Mercurii Misræ, in cujus ædibus mortuus est; prope corpus Gabrielis Patriarchæ decessoris sui. Utriusque corpus inde post annos tres, anno nempe Martyrum 886^o, translatus est ad Monasterium S. Macarii satagente Marco filio Zaraa Patriarcha.

Cùm verò ordinatus fuerit anno 863^o Martyrum, obieritque anno 883^o, sedit annis 20 circiter. Makrizius 19. Abulbircat addit menses 8, & annum eundem 883^{um}, sed malè Makrizius mortem ejus assignat anno Hegiræ 551^o, qui respondet anno Martyrum 872^o: neque tunc Vizirus erat Chawerus: movit enim ex Thebaide anno 558^o: occisus est anno 564^o Hegiræ, ut ex Abulfeda, aliisque Historicis manifestum est.

Res Muhamedanæ. Noraddinus.

Nihil præterea quod ad res Ecclesiasticas spectet, de hoc Patriarcha occurrit apud Autores. Quantum ad res politicas mutata profus erat rerum Orientalium facies, cùm, Sultanis reliquis aut spoliatis, aut nihil ferme ex avita dignitate retinentibus, summam potestatem obtineret Noraddinus, Damasci, totiusque ferme Syriæ & Mesopotamiæ dominus, Hamadeddini Zenghi filius. Is est unus ferme ex tot principum millibus qui laudari jure queat, cùm non modò bellicarum rerum gloriâ, maximè inclaruerit, summâque prudentiâ, verùm etiam virtutibus quæ in hominem Muhamedanum

Muhamedanum cadere queunt. Nam fuit iustus, temperans, modestus, & religionis suæ observantissimus. Is porro primus fuit à quo Franci in Oriente atteri cœperunt: multas enim urbes ab illis recepit: sæpè eos acie vicit, tandemque maximum eorum hostem Salaheddinum ex aula sua produxit, à quo Hierosolyma capta, Christianique in tales angustias redacti, ut clades ab eo acceptas reparare nunquam poterint. Quæ verò hoc vicennio inter Muhamedanos gesta sunt, hæc præcipua fuere.

Anno Hegiræ 545°, qui fuit Daferi 1^{us}, J. C. 1150^{us}, Noraddinus Damascum cepit, sed ita ut eam Megireddino relinqueret, in clientelam recepto. Occiditur Emir Ebn-Mezal: & eodem anno Hali filius Selar, qui Viziratum occupaverat. Franci post longam obsidionem Afcalonem ceperunt.

Anno 546°, Noraddinus rediit Damascum, Megireddino infensus: is Francorum auxilium imploravit, atque ita Noraddinum exclusit.

Anno 547° obiit Hemdanæ Sultan Mashud filius Muhamed, nepos Melikschahi; qui hujus nominis nepotem successorem habuit in illo principatu, sed paulò post depositum, fatiscente jam Seljukidarum familia.

Anno 548° sequenti, majorem ea cladem accepit, capto à Turcis Sinjaro, ultimo filiorum Melikschahi, qui Sultanus inter eos erat, hoc est juxta patris sui dispositionem qui inter quatuor filios Imperium diviserat, supremam inter alios dignitatem tenebat. Is ante paucos annos, temerè suscepto adversus Cachanum Turcarum Regem & Chowarezmiurum Regem bello, tanta cum cæde profligatus fuerat, ut cum quinque aut sex superstilibus fugerit, perierint duodecim millia virorum conspicuorum, inter quos Literatores, Poetæ, Fakii seu Doctores multi, quos in castris habebat. Ipse per annos quatuor, cavæ ferreæ inclusus, calamitates infinitas sustinuit postquam bellum redintegrasset, secundòque victus fuisset, hoc ipso anno.

Anno 549°, Noraddinus proditione civium Damasco potitus est. Obiit Dafer Egypti Califa eo quo dictum est modo.

Anno 551°, Califa Moctafi, Sultani dignitatem contulit in Soliman Chah filium Muhamedis Seljukidam, ita ut Yracâ excederet, sed ea remaneret in Califæ potestate. Eo anno Sinjar ex carcere evasit.

Anno 552°, Muhamedschah filius Mahmoudi Bagdadum ob-

fedit, Sultani dignitatem ambiens. Ingens terræ motus in Syria : Halepum, Chizara, Apamea, Laodicæa, Sidon, Berythus, Tripolis, Acca, Tyrus penè eversæ. Obiit Sinjarschah ; successitque Mahmoud filius Muhamedschah, Seljukida : cui honor primarum in Meschitis precum in plerisque provinciis supererat : autoritas planè mediocris.

Anno 555°, mortuus est Fayez in Ægypto, Moctafi Bagdadi.

Anno 556°, occisus est Vizirus Talahia filius Rezik, cognomine Melik Saleh, cùm annis septem negotia publica administrasset.

Anno 558°, prodit Clawer novus Vizirus ex Thebaide : occisusque est Rezik Vizirus, qui patri Talahie successerat.

Anno 560°, Noraddinus Paneadem cepit.

Atque hæc est series præcipuarum rerum gestarum sub hujus Patriarchæ vita. De Confessionis abrogatione, quam ei attribuit Chronicon Orientale, ejusque adversus Marcum filium Elkonbari gestis, dicetur in vita Marci filii Zaraa, sub quo magnæ de ea disciplina turbæ fuerunt.

MARCUS FILIUS ZARAA
PATRIARCHA LXXIII.

AUTOR hujus vitæ alius est ab illis qui præcedentes scripserunt : & cùm alii præsertim antiquiores parcè admodum de politicis rebus egerint, hic eas fusiùs omnino pertractat. In illis tamen recensendis modum quem toto opere huc usque nobis præscripsimus, excedere non visum est operæ pretium, tum quia id longioris laboris foret, tum quòd multa, quamvis à cœteraneo Autore profecta, plenius tamen apud Muhamedanos Autores scribuntur & accuratius. Illorum si quis Commentarios adhibeat, præsertim in historia horum de quibus scribimus temporum, eam nonnisi multis voluminibus explicare poterit, quod ab Ecclesiastico opere foret alienissimum. Ut igitur huc usque præstare conati sumus, res politicas quàm brevissimè licebit ita attingemus, ut satis explicatæ lectorem non morentur, sciatque sub quibus principibus quæ ad Ecclesiam spectant gesta fuerint, reliqua prætermittimus, nisi quando singulari aliqua illustratione indigere videbuntur,

PATRIARCHARUM ALEXANDRINORUM. 531

MARCUS
PAT. LXXIII.
Electio ad
Monachos
spectabat.

Mortuo Joanne cū ad Monachos electio pertineret, nempe ut alio loco diximus, apud ipsos comitia ad electionem Patriarchæ habenda essent, reliqui ad suffragia ferenda admitterentur, proposuerunt Misræ cives & Ecclesiastici Marcum filium Zaraa, virum nobilem, qui antea vocabatur Abulfergius filius Abusahad, Syrum origine. Ita enim accepisse se Autor testatur ab illius fratre patrueli; notatque eodem familiæ cognomine fuisse jam alium Patriarcham Alexandrinum, cujus vitam Severus Aschmonin Episcopus scripsit, Ephrem scilicet 62^{um}. Fuit quoque famosus inter Jacobitas Theologus Isā filius Zaraa, qui in Syria ante annos plus minus ducentos floruerat: cujus operā habemus non pauca pro defensione Religionis Christianæ adversus Infideles, & Jacobiticæ sectæ adversus Orthodoxos & Nestorianos: unde facile creditur Marcum Syriacæ originis fuisse. Erat autem ab ineunte ætate præclaris moribus, perpetuæque castimoniæ commendatus, tum etiam doctrinā rerum Ecclesiasticarum. Itaque communibus omnium votis electus est anno 880° SS. Martyrum, J. C. 1174°, anno Hegiræ, ut ait Autor, 566°; sed parū accuratè: nam is annus 566° Christianæ respondet anno Hegiræ 560°. Verū hoc loco ut in aliis multis perturbatissima est Coptitarum Chronologia. Autor vitæ præcedentis, mortem Joannis refert ad annum Martyrum 883^{um}: idemque asserit anno 886°, triennio post ejus mortem, translatus fuisse corpus ejus ex Ecclesia S. Mercurii Misræ, ad sancti Macarii, sub Marco isto: itaque si hæc vera sunt, præcessit ejus electio mortem Joannis. Verū annum Hegiræ 560^{um} habuit Codicis Regii quem sequimur prima scriptura, quam temerè aliquis emendavit, sex additis intra lineas. Annus Hegiræ 560^{us} est J. C. 1164^{us}; ex quo numero si detrahantur juxta certam regulam anni 284, supersunt anni 880 Martyrum, quibus notis videtur certum, Joannem maturiùs obiisse, aut minus vixisse quàm referat præcedens historia. Errorem hunc in alios libros irrepsisse ostendit Chronicon Abulbircat, in quo ejus ordinatio assignatur quoque anno Martyrum 883°: eo ipso quo mortuus dicitur Joannes ejus decessor. Postea uno eodemque contextu scribit sedisse illum annos 25, obiisse 6^a Tybi, anno Martyrum 905°, qui responder anno Arabico 585°: qui calculus ostendit initia Patriarchatus incidisse in annum Martyrum 880^{um}, ut mox diximus.

Cū igitur, ut dictum est superiùs, rebus Ecclesiasticis omis-

Res Muhamedanæ.

Xxx ij

sis totus sit Autor hujus historiæ in narranda mutatione Imperii, quæ tunc in Ægypto fuit, eam paucis prosequemur. Cum Chawerus soluta ingenti pecunia Chiracoïam dimisisset, & in Syriam redire compulisset, Franci qui ex prima in Ægyptum expeditione intellexerant quàm facile foret Regnum continuis Ducum de principatu dimicantium bellis & rapinis exhaustum armis occupare, collecto numerofo exercitu redierunt. Causa fuit non omnino iusta, si autoribus nostris credimus, neque enim pactis conditionibus Chawerus deorat: sed prædæ cupido. Non defunt tamen inter Muhamedanos qui cum perfidiæ erga Francos accusent, sed ut videatur immerito; satis enim intelligebat majus omnino sibi à Chiracoïa, si in Provinciam veniret armatus, periculum, quàm à Francis imminere. Verùm ubi illi in Ægyptum emenso deserto ingressi sunt, statim Chawerus legatione ad Noraddinum missa, auxilium ejus adversus communis religionis hostes imploravit. Missus cum valido exercitu primariisque Regni Damasceni Emiris Chiracoïa, magnis itineribus in Ægyptum contendit. Almericus Rex Hierosolymitanus interea Balbais, seu Pelusium vi ceperat, omnesque cives aut milites, nullo discrimine occisi, aut in duram servitutem abducti fuerant, neque Christianis paritum magis quàm Muhamedanis: urbs militi in prædam concessa. Affirmant Autores eum, si statim Kahiram propius copias admovisset, urbem imparatam seditionibusque turbatam primo impetu capturum fuisse: sed consumtis in unius diei itinere diebus decem, Chawerus animo suorum confirmato obsidionem fortiter sustinuit, donec Chiracoïam advenire nuntiatum est. Rex dubius animi omiſsa obsidione, ei occurrere consultius existimavit, gnarus quòd si prosperè cum eo pugnasset, Ægyptus futura mox esset in Francorum potestate. Chiracoïa magis sollicitus de occupanda Ægypto, quàm de ea defendenda, desertum emensus, pugnam declinavit, & se exercitui Ægyptiaco conjunxit: quod ubi Almerico relatum est, spe omni amissa, in Palestinam rediit. Ita Willelmus Tyrius, cui consentiunt Orientales historici.

Salaheddini iusticia.

Chiracoïa Kahiram veniens magnificèque receptus, statim de Chawero tollendo cogitavit, quem, cum ad tentorium suum veniret, nec satis sibi caveret, Salaheddinus Chiracoïæ ex fratre nepos, cum alio Syriaci exercitus duce, quasi honoris gratiâ in medio collocatum, equo deturbavit, & vinciri jussit: mox ubi

fama Kahirām pervenit, Adedo Califa, & aliis purpuratis postulantibus, caput ipsi abscissum & conto præfixum, per urbem circumlatum est. Tumultuantibus verò adversus Chiracoiām, qui mox cum pompa eam ingressus est, tum plebe tum militibus, ipse subito consilio inclamavit, Califæ jussu omnem Chawerī gazam illis in prædā dari, unde omnes ad domum ejus diripiendam conversi sunt. Chiracoiā Viziri insignibus à Califa acceptis, summam auctoritatem obtinuit, & post sexagesimum diem subita morte oppressus est ex crapula anno Hegiræ 564°, J.C. 1168°.

Erat ille Curdus, ex aspera illa & latrocinii assueta gente, Gordyæorum veterum progenie, quæ vix unquam dominationis alienæ patiens, ob inaccessam regionem suis ferme legibus, per tribus divisa sub propriis principibus vixit, ex qua emi solebant mancipia, quæ ad militiam, cui à natura idonei præ cæteris esse videbantur, in satellitio Sultanorum multorum solebant institui, quibus plerumque exitio fuerunt. Nam per omnes militiæ gradus ad dignitates evecti, in continuis illis turbis quibus Imperium Muhamedanum à trecentis annis agitabatur, ad altiorē gradum contendebant. Chadi Chiracoiæ & Youbi pater, erat ex illorum Curdorum tribu Rowadia: natus in urbecula Dowin, in finibus Aderbijanæ: nulla alia eorum nobilitas fuit, licet postquam Salaheddinus regnum occupavit, non defuerint, qui ex Omniadis Califis, aliisque principibus stemma illorum deducerent, sed ipso Salaheddino, palpones illos, Muazzumque fratris Togtekini filium Yemenæ seu foelicis Arabiæ principem deridente. Chadi servum fuisse Bihrouzi Rumæi, qui Seljukidarum nomine Yracæ Bagdadique præfectus fuerat, testatur Ebn-el-Farfi, antiquus eorum temporum scriptor, quem temerè fortassis alii refellunt, & ab eo Chiracoiā & Youbus evecti ad bellicas dignitates: primus arcis Takrit in Mesopotamia præfectus fuit: sed cum homicidium perpetrasset, à Bihrouzo viro æquissimo pulsus est, eā nocte qua Salaheddinus lucem aspexit anno Hegiræ 532°. Recepit se Chiracoiā cum fratre ad Hamadeddinum Zenghi Mausilæ Principem, quem Takrit à fuga transeuntem, juverat. Is eos non modò fovit, sed præfecturis ornavit. Mortuo Hamadeddino Zenghiō manserunt in aula Noraddini ejus filii, qui Chiracoiæ Rahabam, Emesam & alias urbes clientelari jure possidendas dedit, & inter præcipuos Duces habuit. Cùmque Noraddinus ipse de invadenda Ægypto cogitaret, neminem illi præferendum arbi-

Hamad Hist.
pahanensis vit.
Salahed. Ebn-
Chalican Hist.
Ægypt.

tratus est, ad ducendum exercitum : ter autem in Ægyptum venit, tandemque Viziratum obtinuit.

Salaheddinum qui primario nomine Yuceph, seu Joseph, appellabatur, habebat Chiracoiā filii loco, eumque licet invitum in tribus illis expeditionibus secum duxerat, ubi Alexandriæ à Francis obsessus fortiter se gesserat : atque ea occasio fuit audacissimo juveni, ut non modò Viziratum, sed imperium Ægypti occuparet.

Erant in Syriaco Chiracoiæ exercitu, Emiri insignes multi Salaheddino & ætate & dignitate superiores, qui cùm inter se certarent, quis Vizirus constituendus foret, locum ei fecerunt ut hanc dignitatem capesseret, Adedo statim diploma & insignia concedente. Existimabat quippe illum ut juniorem, & quem alii sibi præferri non paterentur, facilius destruendum : unde etiam animum ei addidere, cùm propriis viribus diffideret. Emiros, uno excepto, qui in Syriam reversus est per Phaxium seu Doctorem quemdam Isām sibi conciliavit. Noraddino gratum id fuit, qui ita Ægyptum in potestate se habiturum existimabat, ignarus se familiæ suæ cladem parare : nam illa per Salaheddinum fortune omnibus eversa est. At majestatem ambitiosius retinebat, mandata mittens per patentes literas, quibus Emirur Salaheddinus, & alii hæc atque hæc facere jubebantur. Gesta hæc anno Hegiræ 564°, J. C. 1168° : atque adeo triennio fere ante Adedi Califæ mortem : unde refelluntur Autores nostri, qui eum à Salaheddino statim occisum memorant.

Ita summum in Ægypto imperium, sed Viziri titulo adeptus Salaheddinus, pecunias Chiracoiæ & multas quas à Califæ extorsit, Emiris atque militibus distribuens, largitione eos sibi conciliavit. Mores satis incompósitos, nam vino & ludo nimium indulgebat, emendavit : tum quasi in peccatorum expiationem, bellum adversus Christianos vovit : gemmas, equos, vestes, & pretiosa quæcumque donavit. *Mutmen-el-Kelaset* Nigrita spado, sed vir magni animi, nam solus imperium ejus detestabatur, arcemque Kahiræ cum Nigrorum præsidio tenebat, fraude circumventum occidit : inde gravis inter Salaheddini milites, & Nigros præsidarios pugna, quorum plerique cæsi sunt.

Anno Hegiræ 565°, J. C. 1169°, Franci Damietam obsederunt, & post dies quinquaginta recesserunt, cùm accepissent Noraddinum Arcem Karac obsedisse, quam statim omisit. Adedus

PATRIARCHARUM ALEXANDRINORUM. 535

MARCUS
PAT. LXXXIII.

decies centena aureorum millia ex privato ærario dedit, ut obsequiis & exercitui necessaria subministrarentur. Ingens terræ motus in Syria, bello hujus anni finem imposuit. Salaheddinus fratres suos remitti ad se à Noraddino postulavit, & ægrè obtinuit.

Anno 566°, J. C. 1170°, obiit Mustangid billa Califa Abbassidarum 32^{us}, cui successus filius Mostadi. Salaheddinus adversus Francos movens Ascalonem & Remlam circumfedit, sed mox recessit: Ailam ad mare cepit.

Anno 567°, J. C. 1171°, cum Noraddinus vehementer instaret, nec ullam Salaheddini excusationem admitteret, coactus est tandem abolere publicam in Meschitis Fatimidarum nomine orationem, oratumque pro Mostadi Abbassida, nullo tumultu. Orationem ex Ambone fecit Persa quidam Sufius sive Religiosus, cum Khatib seu Præses Meschitæ ordinarius id facere præ metu seditionis detrectasset. Nam Noraddinus erat Sunnita, Abbassidis addictus, atque adeo Fatimidas habebat pro hæreticis. Aded tunc periculosissimè ægrotabat, & decimo postquam id factum fuerat die, obiit. Variant Arabes, nam antiquiores dicunt vocatum ab eo Salaheddinum morienti officia omnia præstitisse: filiosque ei commendasse Califam, quod ab uno ex illis qui post annos fermè sexaginta in carcere adhuc vivebat anno Hegiræ 628°, didicisse testatur Cheabeddin Abu-Achama. Willelmus Tyrius ait Califam à Salaheddino occisum. Autor noster cum quoque ejusdem cædis accusat; ita ut cum comperisset parari sibi ab Adedo insidias, illum in quadam turri inclusum occiderit. Refert idem ex aliorum testimonio, Adedum compotantem cum Salaheddino, statim ut vidit Touranschah fratrem ejus natu majorem, qui inopinatò intervenit, venenum quod in annuli pala gestabat fuisse, & paulò post mortuum. Hanc enim veneni ad subitos casus parati consuetudinem diversis locis Autores nostri Jacobitæ commemorant. Addit eos qui vim veneni statim fenserunt, conatos fuisse ab eo extorquere ubi thesauros deposuisset, cum recusaret, fascia sua capitali strangulatum.

Will. Tyr.
l. 20. c. 12.

Hic finis Fatimidarum regie in Ægypto familiæ fuit, cujus initia ab Obeidalla Imperatore primo, qui Califæ titulum assumpsit Segelmessæ in Africa, referuntur ad annum Hegiræ 299^{um}: duravitque annis 266, in Ægypto 208. Erant omnes *Rasides* seu sectæ Persicæ, quæ Halin & Haliadas pro legitimis Pontificibus, & Principibus agnoscebat: à quibus per Fatimam uxorem,

Finis imperii Fatimidarum in Ægypto.

Muhamedis filiam, suas deducebant origines. Hinc Fatimidarum dicti: & *Imamii*, quasi Pontificii, quia inter majores suos numerabant eos Halis posteros, qui *Imami* seu Pontifices appellabantur, & quos Ommiadarum utraque dignitate, temporali & spirituali, spoliaverant. Ipsi quoque Imamos se appellabant: Abbassidas detestabantur, tanquam invasores supremæ illius dignitatis, qui ad familiam Muhamedis nullatenus pertinebant, tum ut Auctores falsarum multarum traditionum. Ita per annos ferme trecentos divisi erant in duas illas sectas Muhamedani, quæ adhuc supersunt. Tertius item erat Califa ex Ommiadarum stirpe in Africa & in Andalusia seu Hispania. Vocabantur etiam *Halawin*, hoc est *Haliada*, seu Halis posterii.

Accusabantur Manichæismi, seu *Zindiket*, quod idem est, Magiæ, & multorum criminum, quæ quidem eodem loco habenda sunt, ac pares illorum & qui eandem sectam profitebantur, adversus Abbassidas injuriæ, qui armis non jure Califatum obtinuerunt.

Gaza Fari-
midarum in-
gess.

Gazâ regiâ potitus Salaheddinus, eam, ut erat liberalissimus, omnem distribuit, aut ad Noraddinum misit. Erat autem ingens rerum omnium copia, aulæorum, peristromatum, vestium generis omnis, vasa ex auro argentoque innumera, chrysellina item & murrhina seu porcellanæ non minoris pretii: gemmæ, uniones: smaragdus palmi & dimidii longitudine: rubinorum majorum qui drachmarum Ægyptiacarum septemdecim pondus æquabant, lineæ: unio insignis ovi columbini magnitudine. Tandem, quod non minoris æstimabatur, Bibliotheca voluminum centum mille, elegantissimè scriptorum & compactorum, quæ Doctoribus literatissimè distribuenda curavit. Non mirabitur tantam librorum multitudinem, qui sciet extare apud Muhamedanos infinitam eorum copiam. Primum locum obtinent Theologi qui Alcoranum interpretati sunt, magno numero: tum qui traditiones explicaverunt, plures adhuc: Juris & Legum interpretes, Philologi, Grammatici, Critici, Poetæ, præter Philosophos, Medicos, Historicos, aliosque qui sub certis classibus comprehendi non possunt. Sola Hadgi Calfe qui ante paucos annos Constantinopoli vivebat Bibliotheca, quadraginta & amplius millia titulorum complectitur, quorum librorum plerique non uno volumine comprehenduntur. Tamen antiquos multos non habet, quorum in aliis libris memoria est: de Africanis scriptoribus quorum ingenia feracissima

racissima fuerunt, nihil ferme scribit : de Christianis planè silet : Philosophorum, Mathematicorum, & Astronomorum paucos omnino recenfer. Ita non difficile fuit colligi à Fatimidis Principibus, tot voluminum Bibliothecam : cùm ante annos circiter ducentos, ut legimus, apud Ebn-Calican, Ismael quidam Abulcacein invitatus à Noah filio Almanforis Samanide, ut ad se veniret, excusaverit se quòd libros suos transferre vix posset, quibus deferendis quadringenti cameli vix sufficerent.

Eo ipso anno venerat ex Syria in Ægyptum Youb, sive Jobus, Chadi filius, Chiraxotix frater, Salaheddini pater, qui illum tanto honore prosecutus est ut etiam imperium ei deferret. Mansit verò apud illum in summa dignitate, ærario præfectus. Jamque verspectrum habere Salaheddinum Noraddinus cœperat, præsertim cùm ille Francorum fines ingressus, arcemque Chaubek obsidens, statim atque Noraddinum appropinquare audivit, in Ægyptum reversus est. Timebat quippe ne si in conspectum ejus veniret, omnes exercitus Syriaci duces, & milites ad veterem communemque dominum deficerent. Noraddino indignationem animi non obscurè præ se ferente, rumoremque dissipante, quasi statim cum omnibus copiis in Ægyptum profecturus esset, cùm trepidaret Salaheddinus, fratresque ejus & amici vim vi repellendam conclamassent in consilio habito cum Emiris præcipuis, Jobus callidus & recoctus senex, illud abruptit dicens, omnes se servos esse Noraddini, seque ipsum, si ita juberet, caput filio præcisurum : non opus esse exercitu ut filius in obedientia erga principem, & patronum suum contineretur, sufficere ut ex servis aliquem cum mandatis mitteret, qui mantile sive fasciam collo filii circumligaret, eum in Syriam usque secuturum. Tum secretò increpans filium quòd suam dubitationem coram tot ducibus fortunæ suæ invidentibus patefecisset, jussit bono animo esse ; nam ne sacchari quidem arundinem Noraddino, si peteret, daturum : at non exacerbandum fuisse novis suspicionibus illius animum, ne omisiss negotiis omnibus ipsoque adversus Francos bello, imperium nondum satis confirmatum aggrediretur, & ad se transferret. Paulò post 568 anno mortuus est Jobus, cùm equo lapsus fuisset. Reliquit filios sex, quorum secundus erat Salaheddinus.

Eo anno 568°, J. C. 1172°, Tripolis Barbariæ à Salaheddini fratre capta. Eo quoque Karacum, seu, ut nostri homines scri-

Yyy

bunt, *Krac*, obsedit Salaheddinus, statimque in Ægyptum rediit, accitus ut videri volebat à patre morituro; sed re vera ne ea arce capta, & Franci depulsis, liber Noraddino aditus pateret.

Anno 569°, J. C. 1173°, Chemseddoula Touranscha frater Salaheddini natus major, Nubiam ingressus & populatus est. Postea cum Nubia ob paupertatem & sterilitatem displiceret, in Arabiam felicem seu Yemenam duxit adversus Abdelnebi quemdam ex Arabum veterum stirpe, quem cepit & occidit. Octoginta urbes aut arces, Zebidam & Adenam inter alias expugnavit. Fratrem virum turbulentum & superbum, ducesque & milites ad seditionem paratos, occupabat his bellis Salaheddinus, ne res novas molirentur: nec illa fuscipiebat absque Noraddini licentia. Cumque illi occasio vel prætextus ad Salaheddinum spoliandum deesset, misit eo anno quemdam Ebn-Elkeïçar cum mandatis, quibus Fatimidarum thesauri, pecuniarumque tam publicarum, quam privatarum gazæ regiæ, rationes dare jubebatur. Obtemperavit ille, magnamque pecuniæ vim auferri passus est. Eo enim ipso tempore conjuravere adversus eum multi ex viris principibus, ut Fatimidas restituerent. Plurimi supplicio affecti: major etiam tunc à Noraddino metus, nam copias colligere cœperat ut in Ægyptum veniret, Salaheddinumque in ordinem redigeret, cum morte præventus est. Miserat ad eum Salaheddinus munera summi pretii quæ enumerat Makrizius; tentoria quinque ex sericeis plagulis auro intextis cum aureis annulis, fibulis & commissuris: gemmas ponderis inusitati, balsami exquisiti ampullas quinquaginta: rariora autem præ omnibus existimata sunt, abacus quadraginta vasa porcellana continens Sinenfis opificii: frustum ingens Agallochi seu ligni Aloes odoriferi, quo ad suffitum utuntur Orientales: Anbari fragmenta magna duo: alterum triginta, alterum viginti librarum pondere. Hæc autem potissimum observamus, quia multa quæ ad navigationis & commercii historiam spectant, deduci inde possunt. Nam quantum ad Sineses res spectat, certissimum est non ex eo solùm indicio, sed ex integro libello Muhamedis Sirasitæ, Indicam, Sinicamque navigationem jam ante trecentos plus minus annos Muhamedanis apertam fuisse, & frequentissimum Indicarum Sinicarumque mercium emporium fuisse in urbe Siraf, quæ erat in ora sinus Persici. Anbarum quoque de quo tantâ curâ disputatur à rerum naturalium historicis, Autores multi constantur reperi in ora Africæ Orien-

tali, ejicique ad litus pretiosi illius aromatis fragmina molis inusitata. Aloes illud genus non alibi potissimum nascitur quàm in peninsula *Comar*, à qua nomen habuit Promontorium quod Caput Comorinum nautis nostris appellatur : de quo Avicenna, Ebn-Beitar & multi alii. Nempe hæc in Ægyptum veniebant ex Oceano Indico delata vel per Mare Rubrum, vel à sinu Persico in portum *Elkafir*, quæ urbs tridui itinere per desertum distabat à Cus, Thebaidis urbe celebri, unde secundo Nilo in Ægyptum merces vehébantur, sed hæc alibi tractabimus. Dona autem illa quæ ducentis mille aureis æstimabantur, cùm de morte Norad-dini allatum fuisset, in Ægyptum relata sunt. Erat sanè Norad-dinus omnium qui inter Muhamedanos floruerunt, principum integerrimus : religionis suæ observantissimus, nullo vitio : multis imò virtutibus insignis. Nam præter summam rerum bellicarum peritiam, & fortitudinem, quam magno suo malo Christiani sæpius experti sunt, erat continens, modestus, parcus, justitiæ tenax, à rapinis & exactionibus alienissimus. Doctores Muhamedanos, aliosque scientiâ juris insignes maximi faciebat, & magis quàm inani literatura commendatos, impensè colebat. Unde multa quæ adhuc supersunt Collegia, Damasci, Mosulæ, Hemefæ, Halepi, atque in aliis urbibus ditionis suæ ædificavit, amplissimisque redditibus fundavit. Meschitas etiam celebres multas : Xenodochia, Prokotrophia, tam pauperum quàm infirmorum, non pauca erexit, & ditavit. Unde nihil illi ad solidam laudem videtur defuisse, quàm veræ religionis cognitio. Salaheddinus ingenti metu liberatus, postea Ægyptum cum summa autoritate obtinuit.

Hæc quæ ad illius principatus initia spectant, prolixius prosequi necesse fuit, quia res illius-cum Christianorum rebus magnam habent connexionem, tum quia illas à viris etiam doctissimis parum accuratè explicatas fuisse dolendum est. Unde monitos lectores velim, ne si quæ illis occurrent aliter tradita quàm à nobis factum est, de fide & diligentia nostra dubitent, præsertim si quæ in nupera Bibliotheca Orientali Viri clarissimi amici nostri Bartholomæi Herbelotii de istis rebus leguntur, cum nostra narratione comparent. Absit sanè ut viro doctissimo, quem ut Magistrum semper suspeximus, laudis aliquid detractum velimus. Plura sanè & meliora longè præstare in hoc literarum genere potuisset, quàm in opere illo posthumo, in quo licet multa recon-

Tit. Saladin.

Leges ad-
versus Chri-
stianos reno-
vatae.

ditissimæ eruditionis reperiantur, tamen non pauca sunt quæ emen-
daturus erat si supervixisset; aut ad Historiæ Orientalis cognitio-
nem penitiorum, adjecisset animum, ut ejus autoritas fraudi nobis
esse non debeat, præsertim in rebus, quales mox à nobis exposi-
tæ sunt, quas ex ipsis quos laudat autoribus & multis aliis con-
quisivimus. Nam, exempli gratiâ, Chiracoïam, aut sicut scribit
Schirgoïé, in diversis locis fratrem Salaheddini fuisse scribit
quamvis alio loco ejus, ut verè fuit, patrum fuisse dicat. Ita-
que conciliari inter se non possunt, quæ de historia illius mutatio-
nis leguntur in Bibliotheca sub his diversis titulis *Adhedî*, *Aiubi*,
Salaheddini, *Schirgoïé*: in quibus multa contra veritatem pec-
cata sunt, nempe quia schedas informes, qui editioni præfuerunt,
non satis accuratè expendebant, antequam ederent.

Sed quia huc usque non tam de Marco filio Zaræ Patriarcha,
& rebus Ecclesiasticis, quàm de Salaheddino dictum est, ad illas
jam revertendum foret, si quid hæc vita contineret quod ad illas
referretur. Verùm nihil omnino refert Autor, nisi quod primis
ejus annis inter bellorum tumultus renovatæ fuerint adversus Chri-
stianos leges veteres, de zona & habitu diverso ferendis: ne equis
aut mulis veherentur: ne ad Divanorum publica ministeria ad-
mitterentur: ne in Ecclesia preces elatiori voce facerent: ne cam-
panas haberent: ne processiones solennes celebrarent in festo Pal-
marum. Ecclesiæ quoque luto oblità: cruces quæ in earum su-
perliminibus erant, everstæ; multæ denique calamitates illis su-
pervenerunt: unde multi & quidem nobiles, officiis utilibus ad-
opes parandas destituti fidem abnegaverunt. Sed quando Sala-
heddinus rerum potitus est, summa tranquillitas in Ægypto fuit,
magna omnium rerum ubertas; tributa levata, multaque penitus
sublata: tandemque Christiani iterum ad Officia publica admissi,
ita ut vix ullus esset in aula, etiam ex Salaheddini filiis, fratribus
aut affinibus, qui non aliquem Christianum haberet ab actis, ra-
tionibus vel epistolis. Quod reliquum est, Autor consumit in
hujus Sultani historia contexenda, quam cum non satis accuratè
exposuerit, eam nos ex diversis melioris notæ autoribus compen-
dio trademus.

Anno eodem 569° refert Makrizius Guillelmum Rogerii filium
cum ingenti classe Alexandriam appulisse, eamque obsedisse: sed
aliquot eruptionibus fatigatos Christianos, amissis incendio, aut
depressis aliquot navibus, anno sequenti recessisse: alii ad annum

PATRIARCHARUM ALEXANDRINORUM. 541

MARCUS
PAT. LXXIII.

571^{um} referunt. Willelmus Tyrius ad annum 1173^{um}, qui refpondet Hegiræ 569^o, sexque circiter tantum diebus, expeditionem hanc infelicem ducum negligentia, durasse scribit. Erat is Guillelmus secundus Siciliae Rex.

Anno 570^o, rebellavit Kenaz seu Kenazeddoula Asowanæ præfectus, debellatus ab Adelo Sultani fratre. Is Kenaz ad rebellionem Ægyptios, Nigritasque in Thebaide concitaverat, eo nomine quod Fatimidas avito regno restitutos vellet. Item à Makrizio memoratur defectio Habassi filii Chadi, qui urbem Kous cepit, sed in prælio occisus est. Alia etiam, sed quæ à Makrizio refertur ad annum 572^{um}, fuit circa Kest, sive Coptum, antiquam urbem in Thebaide, duce Abdelkouiæ filio, Davidem Adedi ultimæ Calisæ filium se esse simulante : sed is ab Adelo oppressus : urbs penè diruta, tria rebellium in illa suspensio necata. Salaheddinus Damascum prodicione Emirorum occupavit, quæ erat caput regni Salehi Sultani, qui filius erat Noraddini, cui honorem publicarum precum, nominis in pecunia impressionem & alias prærogativas abstulit : multas alias urbes pulsus dominis cepit.

Anno 571^o exercitum principum Mosulensium Hamadeddini Zenghi & Seifeddini Gazi, qui cum Saleho affine conjunxerant se adversus Salaheddinum, ipse fudit : Halepi obsidione omiffa quam anno superiori aggressus fuerat, *Menbigiam* seu Hierapolim cepit. Ab Ismaelita ficio appetitus accepto vulnere, eum retinuit dum à custodibus corporis occideretur : duo alii in eum similiter irruerunt, & occisi sunt. Missi erant à Senano eorum principe. Halepum secundo obsedit. Chemeddoula Touranscha frater ejus, cum Arabiæ pertæsum esset, rediit, Damascique præfecturam obtinuit.

Anno 572^o, Salaheddinus ut designatam sui cædem ab Ismaelitis vindicaret, Castrum Mosiab, ubi Senan eorum dux residebat, obsedit : eam tenebant ab anno 535^o, distabatque secundum Abulfedam ab Hama unius diei itinere : vastatis agris, pacem furiosis illis, hortante Cheabeddino avunculo concessit. Novo muro Misram & Kahiram cinxit, arcemque in monte vicino Moktam ædificavit : 29300 cubicorum circuitus murorum fuit. Collegium etiam in Kahira veteri prope sepulcrum Chaf hii, famosi illius doctoris, & sectæ Theologicæ principis crexit. Eodem anno Autores multi magnam rebellionem in Thebaide, Nigrorum præsertim, cædem

licitam fuisse memorant, adeo ut ex centum millibus octoginta mille perierint. Tributum quod Emitus Meccæ, Gioddæ & Aidab à peregrinis Meccam petentibus exigebat, sustulit, assignatis duobus millibus aureis Emito, magnâque tritici copiâ ex Ægypto.

Anno 573°, J. C. 1177°, cùm Remlam usque cum exercitu venisset, partemque copiarum ad vastandos agros misisset, subitò Franci cum adorti in fugam verterunt : adeo ut magna exercitus parte amissâ, per desertum fugerit. Qui dispersi remanserant, concurrentibus undique Christianis, cæli aut capti sunt, inter quos famosus Doctor Isâ El-Arati, quem post annos duos aureis sexaginta millibus redemit. Gesta hæc sub Balduino 3°. Franci Hamam obsederunt, sed sine successu : mox Harem, cujus obsidionem omiserunt acceptâ pecuniâ à Saleho Noraddini filio, qui eam obsedit & cepit, occiso prius per tormenta Kemschetkino Viziro suo, qui eam clientelari jure tenebat.

Anno 574°, fames & pestilentia, tum anni superioris clades impedimento fuerunt, ne ulla expeditio susciperetur, nondum reparato exercitu. Prælium tamen Francis infaustum fuit prope Beit Yacoub, ubi arcem extruxerant, una statione à Damasco distantem.

Anno 575°, J. C. 1179°, Salaheddinus arcem Francorum prope Pancadem cepit.

Anno 576°, J. C. 1180°, obiit Califa Mostadi Abbassida, cui successit filius Nacer. Hic eodem anno Diploma investituræ, vestem, & reliqua principatus insignia Salaheddino misit. Is copias duxit adversus Livonem seu Leonem Armeniæ Regem, auxilium laturus Kelige Arslano, Romanæ principi : pacisq; condiciones utrique præscripsit. Obiit Chemseddoula Turanicha frater ejus major, Alexandriæ præfectus, bello strenuus, sed insolens, vinosus, libidinosus, rapax, crudelis, liberalitatis profusissimæ.

Anno 577°, J. C. 1181°, obiit Saleh Noraddini filius, Halepi & Syriæ Sultanus absque liberis : Califa Halepi præfecturam petiit, nec obtinuit. Legatus Imperatoris Constantinopoli Kahiram venit : paxque inter eum & Salaheddinum sancita. Quatuor filios cum quatuor filiabus Adeli fratris matrimonio conjunxit. Inducias cum Tripolitano Comite fecit.

Anno 578°, J. C. 1182°, multas urbes in Mesopotamia cepit, quæ ad Mosulensem Sultani Atabekidam pertinebant.

PATRIARCHARUM ALEXANDRINORUM. 543 MARCUS
Pac. LXXIII.

Arnaldus Castillionæus Karaki Dominus classe instructa, Ailâ solvens, Aidab in Arabia obsedit, & Meccam tendens cum inde abesset, unius diei itinere redire aquæ penuriâ coactus: Muhamedanos multos peregrinos occidit; adversus Muhamedem & Meccam, multas contumelias & minas jactavit, quæ ipsi necis causa fuerunt. Variant tamen Autores, sunt enim qui dicant illum à classe Ægyptiaca interceptum, magnam cladem accepisse.

Anno 579°, J. C. 1183°, Halepum Salaheddinus frustra obsessam recepit ab Hamadeddino Zenghi, cui Sinjaram, Cabour, Nisibin, & Seruge concessit. Karak obsedit; sed coactus obsidionem solvit.

Anno 580°, J. C. 1184°, iterum eandem urbem obsedit, & repulsus est. Neapolim, Sebasten aliasque urbes & agros vastavit: Adedi filios sub arctiori custodia ob metum seditionis, haberi jussit.

Anno 581° Mosulam obsedit, cumque Azeddinus filiam Noraddini matremque suam aliasque, quod summæ demissionis erat indicium, foeminas, ad eum deprecatum misisset, ut ab obsidione recederet, negavit: unde tanta fuit civium indignatio, ob contentam Noraddini filiam, ut resumptis animis eum fortiter repulsum abscedere coegerint: tandem pax inter eos sancita. Salaheddinus hoc anno periculosissimè ægrotavit Harranæ: regnumque jam filiis diviserat: sed convaluit. Nacereddinum Muhamedem Chiracoïæ filium, patruelem suum, quod rumore de morte ejus divulgato Damascus occupare designaverat, veneno sustulit, etsi præter consanguinitatem, sororem suam haberet uxorem. Nec hoc ejus scelus dissimulant magni ejus laudatores Ebn-Chalican, Abulfeda, Makrizius. Hemefam quæ ditionis Nacereddini erat, pecuniis, armis, equis spoliata pupillo tradidit, qui Chiracoïa dictus, avi nomine diutissimè hunc principatum tenuit. Narrat Ebn-Chalican puerum illum, cum ad Salaheddinum adductus ab eo interrogatus esset, an aliquem in lectione Alcorani progressum fecisset, respondisse: *Eò loci perveni, Domine, ubi scriptum est eos qui orphanorum opes injustè comedunt, ignem perniciosum comedere, quo consumendi erunt, donec in infernum detrudantur.*

Anno 582°, J. C. 1186°, domesticis dissensionibus agitatus Salaheddinus, Adelum fratrem Halepo revocatum, Præfectum

Ægypti constituit : mutationes varias præfecturarum & principatum fecit. Ad eum annum referunt Autores præcipui expeditionem Arnaldi Castillionæi Principis Karac in Arabiam, prope Meccam ubi agmen ingens seu Caravanam Peregrinorum incepit, multos occidit, plures in captivitatem abduxit : & dimittere rogatus ex induciarum pacto, negavit. Hinc triste illud Salaheddini votum de eo, si in manus ejus incideret, occidendo.

Annus 583^{us}, J. C. 1187^{us}, luctuosus admodum Christianis fuit. Comes Tripolitanus, cum Salaheddino foedus habebat, ob inimicitias cum Guidone novo Rege, Sibyllæ marito : tandem cum aliis adversus Salaheddinum, qui prope Tiberiadem castra posuerat, in aciem prodire coactus est. Interclusâ Christianis aquâ, igneque in scena injecto, cum calore, fumo & siti vexarentur, cum eis conflixit prope Tiberiadem, eosque magna strage devicit. Captus Rex Guido cum Arnaldo & multis aliis. Templarii & Hospitalarii equites plusquam ducenti, ante tentorium ejus occisi ; neque enim quoscumque bello ceperat, dimittebat, Assassinos eos vacans : & quinquaginta aureos pro cujuscumque capite, militibus donare solitus. Inducti in tentorium ejus Guido Rex & Arnaldus : cum sit penè enecti essent, jussit afferri potum quem *Sorba* vocant, nos vulgò *Sorbetum*, nive refrigeratum ; & Regi porrexit : Arnaldoque ex Regis manu poculum accipienti, negavit illum se permittente aut conscio bibere : erat enim vetus hæc hospitalitatis Arabum lex, ut quicumque apud hostem ederat aut biberat, occidi non posset. Arnaldum statim postquam multis verbis increpasset, ut perfidum foederumque violatorem accusavit vehementius quòd Meccam adoriri ausus, quòd Muhamedem convitiis violasset ; quòd tantum Muhamedanorum sanguinem fudisset : significavit igitur moriendum esse, nisi Christum abnegare vellet. Id cum Arnaldus constantissimè rejecisset, inermem acinace educto Salaheddinus obtruncavit : Regem humanissimè convivio excepit. Tiberias mox capta, ut etiam Jafa, Nazareth, Cæsarea, Neapolis & plures aliæ partim vi expugnatae, partim deditæ. Infelicem hanc ad Tiberiadem, ut vocamus, pugnam, Muhamedani *prelium Hettum* appellant, ab eo loco ubi Christiani aciem disposuerant. Acca etiam, Berythus, Ascalon tandem receptæ ; sed ea conditione, ut Rex Guido liber dimitteretur. Castellanus Beth Gabriel cum quingentis, liber dimissus in Europam rediit, & Venetorum, Genuensium & Pisatorum auxiliis adjutus, post

post sex menses cum centum navium classe Tyrum reversus est. Eo etiam anno *Marchisus*, ita vocant Marchionem Montisferati, classe Acconem advectus, cum eam ab Infidelibus teneri didicisset, deluso Adelo, Tyrum contendit, & urbis defensionem suscepit. Mox Salaheddinus Hierosolyma obsedit; nec cepisset absque civium discordia, & Christianorum Melchitarum proditione. Nam per quendam Josephum Elbarith ex eadem secta, qui negotiorum causa multoties in urbem receptus erat, eos ad excutiendum Francorum jugum, quos numero superabant, incitavit. Tandem his conditionibus urbs deditionem fecit, ut Franci liberè exirent; ita ut vir decem aureos, mulier quinque, infantes unum penderent. Patriarcha laminas aureas & argenteas, sacramque Ecclesiæ sancti Sepulcri suppellectilem abstulit; ea cum Muhamedani negarent ex pietatis auferri debere, Sultanus dimitti iussit. Quatuordecim capivorum millia in urbe remanserunt. Crux insignis aurata super Hospitalariorum Ecclesiam, magno infidelium plausu dejecta est. Victoria hæc toto illorum imperio festis, triumphisque celebrata. Mox Tyrus obsessa: adductæque decem majores ex Ægypto naves, ad eam mari claudendam: quarum quinque à Tyriorum classe captæ, reliquæ depressæ sunt: omnes Muhamedani gladio aut naufragio periire, paucis qui enataverant servatis. Hinc coactus Salaheddinus obsidionem solvere, exercitum in hyberna dimisit, & Acconem venit. Hoc primum anno ex quo Franci in Syriam venerant, Caravanæ Meccanæ liberum per oram Syriæ iter habuerunt: verum cum occurrissent prope Arafat, ea quæ ex Ægypto, & altera quæ ex Yraca veniebat, atque Emir us illius honoris prærogativam peteret ob Califæ insignia, Ægyptiacæque Emitus, Salaheddini nomine tympanum pulsari vexillumque attolli iussisset, cruentum fuit inter eas prælium, in quo Emir us Ægyptius occisus est: neque Salaheddinus excusationes Califæ admisit.

Anno 584°, J. C. 1188°, Antarsum, Laodicæam, Sionem, & alias urbes aut castra cepit. Induciæ octo mensium cum Boemundo Principe Antiocheno factæ: Karac sub finem anni dedita. Præsidia Francorum ex captis urbibus Tyrum migravere, quæ salus urbis fuit. Eo anno noctu quidam ignoti, Kahiræ populum ad arma vocaverunt ad restituendos Fatimidas, sed nemo se commovit.

Anno 585°, J. C. 1189°, Salaheddinus obsedit rupem Ar-

Zzz

non, cujus Dominus Arnaldus nomine, post longam defensionem, de deditone cum eo egit: sed cum moras necteret, ab eo in vincula coniectus est. Franci acceptis ex Europa auxiliis Acconem obsederunt terra marique, cum triginta peditum, equitum duobus millibus, quamvis præsidium decem millium armatorum foret. Salaheddinus castris in conspectu eorum positus, magno prælio victus est, amissis plusquam decem suorum millibus; exercitus omnino dissipatus fuit. Classis Ægyptia in ipso portu cum Christiana pugnavit, & obsessis subvenit. Turres à Francis erectæ ad summam altitudinem, naphthâ paratâ à quodam Bagdadensi nomine Ebn-Nejas, consumptæ sunt, cum multis milibus, idque semel & iterum.

Anno 586°, J. C. 1190°, Salaheddinus convocatis ex toto Imperio copiis, auxilium Acconis tentare cœpit: sæpè levibus præliis victi Muhamedani, obsidio continuata, aucto exercitu milienis aliquot viris residuis ex Germanico, quem Fridericus Imperator eo anno merfus in Cydno ducebat.

Anno 587°, J. C. 1191°, Rex *Fransis*, ita vocant Regem nostrum Philippum Augustum, cum centum navibus advenit: renovataque acrius obsidio: quotidie cum Muhamedanis feliciter pugnatum: urbs dedita iis conditionibus, ut arma, machinæ, naves Christianis relinquerentur: solverent Muhamedani ducenta aureorum millia: sacre Crucis lignum restitueretur: ut etiam captivi quingenti, inter quos centum nobiles. Hæc pacta non observata scribunt Abulfeda, & alii, multosque captivos occisos, præter eos qui in castra deducti in conspectu hostilis exercitus cæsi sunt. Eodem anno prope Arsouf, Muhamedani magna clade victi sunt. Jafa ab illis deserta, à Christianis occupata est. Ascalon jussu Salaheddini everfa, cum de ea servanda desperaret. Colloquium de pace inter Adelum Sultani fratrem, & Francos habitum, proposito ejus matrimonio cum sorore Richardi Regis Angliæ, cui Hierosolyma in dotem daretur: sed abrupta à Sacerdotibus negotiatio, negantibus id licere, nisi Adel Christianus fieret.

Anno 588°, J. C. 1192°, Marchio Tyri ab Assassinis occisus. Iterum de pace actum; quæ tandem conclusa, secundum quam Jafa, Cæsarea, Arsouf, Hifa, Acco & aliæ urbes cum suis ditionibus Christianis restitutæ sunt; ea conditione, ut Ascalon à nullo ædificaretur: liberè Christiani ad loca sancta peregrinarentur, absque vectigali, modò sine armis. Obiit Senan Imaelitarum seu

Hassassinorum princeps cùm triginta annos multas in Syria arces obtinisset. Salaheddinus Damascum rediit, ubi post aliquot menses obiit, relictis tantùm, ut refert Ebn-Chedad testis oculatus, drachmis quadraginta septem & aureo uno. Natus erat anno 532^o, ut suprâ dictum est; atque ita 56^{um} agebat annum, non septuagesimum, ut Autor historiæ Patriarchalis scribit. Fuit sanè Salaheddinus vir magnus; nec modò bello, sed pace etiam: nemo enim inter tot suæ religionis principes, tam alienus fuit à rapacitate illa & avaritia quæ Arabibus insita à natura videtur. Nullus minora tributa exegit, nam ea multis in locis planè sustulit, ubique levavit: nullus eo regnante ob divitias periculum adiit: urbes magno labore subactas, imò & provincias suis in beneficium dabat, solo directi, ut loquimur, dominii jure servato. Pecuniarum contemtor, quidquid habebat, donabat. Dum Acco obsideretur à Francis, equorum Arabicorum duodecim millia militibus aut ducibus suis distribuit. Nemo magis ad opera publica liberalis; nam in præcipuis urbibus Collegia, Xenodochia, aut Ptochotrophia, & Meschitas ædificavit: urbium muros multis in locis suâ pecuniâ restituit, præsertim earum quæ vel bello, vel terræ motibus deformatæ fuerant. Ad privatas voluptates nunquam adjecit animum, ita ut viginti duobus annis integris, quibus regnum obtinuit, non villam, non domum, non hortum sibi fecerit. In cultu simplicissimus, serica veste vix unquam, laneâ semper utebatur; in victu sobrius & parcus. Religionis suæ ad superstitionem usque observantissimus; preces quotidianas aut in Meschita si occurreret, aut in castris persolvebat. In ea magis supersticiosus quàm doctus: nam Doctoribus Chafehitis præsertim, quorum tota scientia est traditiones & fabulas memoriter recitare, plurimùm tribuebat. Qui de religione liberiùs disputabant, eos odio habebat; atque unum inter alios de hæresi suspectum, capitali supplicio affecit. Philosophos, præsertim Dialecticos, magnopere averfabatur, neque literatis, Poetis, aut aliis ejusmodi qui vulgò reliquis Principibus erant in deliciis, multùm favebat. Verùm fuit ambitiosus supra modum, ingratus in Noraddinum Dominum suum, Chiracouæque patrui, cui omnia debebat, filium: nimium erga fratres faciliis: nam majori Chemseddoulæ, viro improbo, omnia sub ipso licuerunt; Adelo quoque & aliis. Hæc sunt quæ de Salaheddino præcipua leguntur apud Autores æquales Ebn-Chedad, & Hamad secretarium ejus, qui historiam illius florido & luxurianti

L. B. Terick.

Stylo descripsit: Abulfedam in Annalibus: Ebn-Chalican, Ebn-El-Atir: Tagri Berdi Historiæ Ægyptiacæ Autorem, Ebn-Chucnah, Muhabeddinum, Historiam Hierosolymitanam, & multos alios, quibus adjungi potest Abulfaragius: & Bibliotheca Orientalis, ubi multa de eo accuratè dicuntur, si quædam excipias, quæ nostræ narrationi contraria sunt, ut quod Chiracoiam inter ejus fratres numerat. Partum verò tanto sanguine Imperium in filios natu majores divisum, intra paucos annos translatus est ad Adelum ejus fratrem, qui nepotes spoliavit, iusto, ut Ebn-El-Atir & post eum Makrizius observant, Dei judicio adversus heroes illos, qui ut Imperium stabiliant, omnia cædibus foedaverant; & quorum vix ullus inter Muhamedanos principes, hæreditatem filiis suis transmississe observatur.

De statu re-
rum Christiano-
rum sub
Francorum
regno Hiero-
solymitano.

Longa igitur & quæ tamen necessaria erat digressionem perfundi, quòd Salaheddini res cum Christianorum rebus tantam affinitatem habeant, ad Ecclesiasticas revertemur. Et primum de Hierosolymorum urbe sancta monendum illud est, per annos circiter nonaginta qui intercurrent ab ea per Francos capta, ad ejusdem expugnationem per Salaheddinum, cum summa tunc esset ignorantia, maximè verò circa veterem disciplinam, adeo ut quæ laudanda in Orientalibus Christianis essent, quæ toleranda, quæ emendanda vix ullus intelligeret, nihil omnino perfectum quantum ad unionem Ecclesiarum promovendam spectabat; sed exacerbata potius fuisse mutua inter partes odia, ex variis criminationibus, quæ ut plurimum, non alio fundamento, quam accusatorum ignorantia, nitebantur. Sola Maronitarum societas Ecclesiæ Catholicæ reconciliata est abjectis Monothelitarum erroribus; malum enim omnibus Autoribus Orientalibus, Eutychio, Elmacino, Ebnassalo, Abulbircat, & reliquis aliis, tum Christianis cujuscumque sectæ, tum Muhamedanis, quàm ignotis quibusdam credere, quos, præter Abrahamum Echellensem ejusque successorem & propinquum Faustum Naironum, nemo vidit. Nempe vel unico Tyrensis Archiepiscopi testimonio satis refelluntur, qui rem sub oculis quodammodo suis gestam ita narrat, ut de ejus certitudine dubitare non liceat, præterea accedente Ebnassali testimonio, qui Maronitas ait *nuper ad Francorum Religionem transivisse*. Ea autem unio quàm prudenter facta sit, (et si præcipuas tantum circumstantias scimus, nempe quòd Monothelitarum hæresin abjurantes recepti sint,) vel illud satis ostendit

Unio Maro-
nitarum.

quod ritus Ecclesiasticos suos immutabiliter retinuerint : neque Latinos ullos acceperint , nisi fortè Azymorum usum , de quo tamen nihil omnino certi constituere possumus. Verùm quod reliquas societates Christianas attinet , nemo , ut videtur , ad earum concordiam procurandam adjecit animum : imò quod ex autoribus illorum temporum satis agnoscitur , qui multos in Melchitis , Jacobitis , & Nestorianis errores carpunt , sæpè contra veritatem , manserunt toto Francorum Imperii Hierosolymitani tempore absque ulla cum Latinis sacrorum communione. Neque hæreses quibus Jacobitæ & Nestoriani laborabant , hujus odii sola causa erant : sed quod mirum erat , displicebant non minus ritus secundum veterem disciplinam proprii , sed à nostris diversi , quique nullam unquam separandæ communionis occasionem dederant ; atque magis omnino exardescibat circa illos ritus innoxios zelus Occidentalium , quàm adversus alia peccata , quæ salva fide tolerari non possunt. Inde Dionysius Barsabibi , qui ante captam urbem sanctam Amidensi Jacobitarum præerat Ecclesiæ , Commentarium in Liturgiam Syriacam Jacobi suum scripsit , ut Episcopo scilicet suæ Hierosolymitano , defensiones adversus eorum argumenta subministraret. Nempe non potuissent doctis Theologis displicere orationes & cærimonie , quas à multis sæculis usurpatas fuisse in Ecclesia Græca certum erat , quasque in Catechesibus suis Cyrillus Hierosolymitanus exposuerat. At qui nullam aliam disciplinam , præter communem suam Latnam noverant , in suspicionem adversus Orientales ritus adducebantur , eò facilius quò major illorum erat ignorantia. Ita factum ut Christiani Orientales , etiam ipsi qui ut Melchitæ , communem cum Latinis fidem habebant , in ritibus tantùm innoxii differebant , nunquam odiunt adversus Francos deposuerint , imò quòd ex historia Patriarchali observavimus , de urbe prodenda cum Salaheddino convenerint. Hæc si scivissent aut animo perpendifsent Calvinistæ illi nostrates , qui cum infinitis argumentis pressi agnoscere coacti fuerint Orientales Christianos eam habere de Eucharistia fidem & disciplinam , quæ veræ realisque transmutationis doctrinam supponunt necessariò , ad illud diverticulum non confugissent , ut si quid tale reperitur , non nativis Orientalibus tribuendum sit , sed corruptis per unius ferme sæculi cum Latinis hominibus societatem. At quàm inanis hæc cavillatio sit , ostendit tota historiæ istius series , ex qua constat certissimè nullam præterquam cum Maronitis , eo temporis

spatio fuisse nostris cum Orientalibus concordiam. Probant id etiam accusationes Latinis impactæ, sed siivolæ : quos de Eucharistia religiosè sentire satis sciebant, neque tamen unquam inter eorum hæreses numerant, quod Eucharistiam crederent verum esse corpus & sanguinem Jesu Christi. Qua enim ratione eam in ipsis fidem damnaissent, quam quotidie celebri illa inter Liturgiarum solennia Confessione de qua superius diximus, testatam faciebant ; sed hæc alibi tractata sunt accuratiùs.

De Marco
filio Elkonba-
ri.

Aliud magnique momenti, disquisitionis argumentum suppetat historia de Marco filio Elkonbari, cujus meminit Chronicon Orientale : Makrizius etiam, & qui fusè illam descripsit Abuse-
lah Armenus, utpote quæ magnam partem transacta fuerit sub Marco filio Zaræ Patriarcha, etsi jam sub Joanne decessore ejus inceperit. Locum integrum referemus in Dissertatione de Pœnitentia, atque adeo sensum ejus in pauca verba contrahemus. Marcus ille erat ex Australi Ægypto oriundus, vocabaturque filius Elkonbari ; Monachus erat, & quamvis famâ dubiâ, tamen ab Episcopo Damiatensi, Monastico habitu indutus, posteaque Sacerdos ordinatus fuerat. Eum verò Joannes Patriarcha 72^m excommunicavit, quia, ut aiunt, cum uxorem haberet, eam ignoto cuidam viro, quasi liberam collocaverat, posteaque ab Episcopo, tanquam cælebs, habitum Monasticum & Sacerdotium per fraudem obtinuerat. Ita narrant Coptitæ Marco infensi, adduntque illum excommunicatione contenta, cœpisse sacras literas ex Libris Copticis publicè interpretari, magnamque hominum multitudinem eloquentiæ & doctrinæ famâ, ad se trahere. Inter alia verò doctrinæ capita, magnam curam adhibuit, ut auditoribus suis suaderet, non posse haberi alicujus peccati remissionem, nisi facta apud Sacerdotem ejus confessione, & completo Canone Pœnitentiali. Unde dubitare non possumus quin circa hæc tempora ortum habuerit corruptio illa disciplinæ, cujus Autor non sine fundamento dicitur fuisse Joannes ille Patriarcha 72^m in Chronico Orientali, ubi scribitur illum Confessionem abrogasse. Testes quoque accedunt, etsi eum nominatim non designent Echmimensis, & Ebnassalus in Canonum Collectionibus, & Michael Antiochenus Jacobitarum Patriarcha, in Tractatu de præparatione ad Eucharistiam, qui dicunt quosdam Coptitarum Patriarchas Confessionem abrogasse. De Joanne, Marco filio Zaræ, & Joanne altero ejus successore, loquuntur haud dubiè : nam

ante illorum tempora, ne leve quidem occurrit, tam absurdæ novitatis vestigium. Tunc verò Confessionis loco institutum fuerat, ut super fumante thuribulo dum incensum Sacerdos aut Diaconus adolerent, quisque peccata sua secretò confiteretur; eorum enim veniam obtinere se isto modo stultissimè existimabant. De hoc ritu qui manavit quoque apud Æthiopes, ut testatur Abuselah, procul dubio sub iisdem Patriarchis, dicitur in Dissertatione eadem de Pœnitentia. Igitur filius-Elkonbari acerrimè adversus hanc superstitionem invehens, contra Joannis Patriarchæ Constitutionem de omittenda Confessione, tantùm effecit, ut ingens hominum multitudo apud ipsum peccata confiteretur. Disputavit etiam acriter adversus Circumcisionem, quam idem Patriarcha tolerabat, modò fieret ante baptismum: atque hæc causa præcipua excommunicationis illius fuit. Sub Marco filio Zaræ Episcopi Australis regionis, cùm receptam, & impœnitentibus gratissimam superstitionem tam vehementer impugnari viderent, scripserunt ad eum de filio Elkonbari: quem Patriarcha ad se Kahiram venire jussit. Factum id anno Martyrum 890°, qui est J. C. 1174^m, Hegiræ 570^{us}, anno circiter 10° Patriarchatûs Marci. Aiunt venisse statim filium Elkonbari, prostratumque ad ejus pedes veniam præteritorum postulasse, & obtinuisse, ea conditione, ut nihil contra Canones Ecclesiæ, hoc est receptam tunc disciplinam, doceret; atque in officio debitaque superioribus obedientia se contineret. Jussit etiam ut ad Monasterium S. Antonii prope Atfige profectus, ibi super sancti corpus juraret, se omnia quæ pollicitus fuerat præstiturum.

Attamen statim cùm ad regionem El-Rif pervenisset, iterum verba ad populum facere pro Confessione cœpit: concursusque ad eum major quàm antea factus est, singulique pecunias & munera ad eum deferrebant, quæ pauperibus erogabat; imò decimas, & primitias colligebat. Marcus inde magis perculsus literas adversus eum circulares misit ad omnes Episcopos, qui resciperunt Marcum contumacia & perjurio suo meruisse; ut deponeretur sacerdotio, & excommunicaretur. Ipse ex altera parte libellum supplicem Judici Fadeto porrexit, causam suam canonicè, & secundum leges Christianorum judicari postulans, paratum se esse dicens ostendere Patriarcham falsò illum accusasse de novitate doctrinæ, cùm nihil nisi apud Christianos receptum, eorumque disciplina confirmatum prædicasset. Judex edicto ad Pa-

triarcham misso, jussit ut habito confesso Episcoporum se purgaret, neque Christianis impotentiùs insultaret: alioqui si eorum leges insuper haberet, oportere Muhamedanum fieri. Quid verò post Edictum illud factum fuerit, Abuselah reticet: quia ut verisimile est, coram eo disputare non ausus est Patriarcha, & judicium effagit. Postea idem, & alii Autores asserunt filium Elkonbari ad Melchitas transivisse, duasque naturas, & voluntates duas confessum; magnamque sectatorum ejus multitudinem ejus exemplo à Jacobitica fide descivisse. Ea occasione illum calumniis lacebant: aiuntque venisse postea ad Patriarcham veniam petitem, sed rejectam ab eo fuisse. Idem Abuselah alio loco loquens de Ecclesiis S. Gregorii & S. Sabæ, quæ erant prope Montem Elmoretam, qui Kahiræ contiguus est, in latere Orientali; ait Marcum filium Elkonbari cœpisse illic colligere magnam hominum multitudinem, fuisseque in Monasterio quod habitabat, aut in vicinis, sex circiter Monachorum millia, qui ejus doctrinam sequerentur; & licet ad pauciores numerum redacti, eam tamen suo tempore adhuc tuebantur. Ibi illum obiisse anno Martyrum 924º; qua ratione annis decem & novem Marco filio Zaræ supervixit. In excerptis autem suis Abuselah refert fragmenta quædam ex Michaelè Damiatensi Metropolitâ, qui præ cæteris, adversus Confessionem disputavit. Habemus brevem illius Tractatum de hoc argumento in Codicibus Canonum Collectionis amplissimæ: quem etiam refert Abulbircat, & quidam alii: atque & ea disputatione vix quidquam insulsius potest excogitari. Eam autem tacito ejus nomine refellit Ebnassalus, parte ultima Collectionis principiorum fidei: & frater ejus in Canonum Epitome, imò & ipse Michael Patriarcha Antiochenus, à quo Damiatensis asserit excommunicatum quoque fuisse filium Elkonbari. Quod si verum est, sanè ob desertam Jacobiticæ Ecclesiæ doctrinam, non quodd necessitatem Confessionis sacramentalis propugnaret, quam toto opere suo Michael ita confirmat, ridiculasque Damiatensis rationes ita evertit, ut plura dicere filius Elkonbari non potuisset. De Synodo sexaginta Episcoporum adversus eum habita, in qua pariter damnatus est, testem habemus eundem Damiatensem, cujus verba refert Abuselah: nihil verò simile legitur in Historia Patriarchali. Quod verò Michael ille, qui novo dignitatis titulo, nunquam antea apud Scriptores Alexandrinos usurpato, Metropolitâ appellatur, sub Marco filio Zaræ vixerit, testis est Codex insignis Evangeliorum

Evangeliorum quatuor, ab eodem Michaelē in charta vitulina scriptus linguā Copticā literis uncialibus, cum picturis quales eo sæculo manus Ægyptiaca delineare poterat. Initio voluminis duæ majores occurrunt imagines, una D. Marci Evangelistæ, altera Marci filii Zaræ habitu Patriarchali. Quidquid igitur Marco filio Elkonbari factum fuerit, dubitari non potest, quin veram doctrinam & disciplinam circa Confessionem peccatorum sustinuerit, & multos discipulos habuerit; nam præter eos quorum testimonia retulimus in Dissertatione de Pœnitentia, occurrunt alii, quorum sententiæ eodem loco recitantur, Ægyptii & quidem genuini, qui paria cum filio Elkonbari de Confessione ad hanc usque diem docuerint. Makrizius brevissimè ait magna negotia Patriarchæ fuisse cum filio Elkonbari, qui ad Melchitas transierit, mox redierit: cùmque iterum ad Melchitas transivisset, postea receptus non fuit.

Docet etiam nos Abuselah Armenus sub eodem Patriarcha Monasterium quoddam Kahiræ vicinum, Nestorianorum, quod unicum erat in Ægypto, cùm pauci illic ex ea secta essent unusque Sacerdos Joseph nomine ibi commoraretur, Patriarchale factum esse; Ecclesiamque consecratam à Petro Episcopo Fiumensi: Marcum ibi Liturgiam & ordinationem celebravisse anno Martyrum 899°, J. C. 1183°. Hegiræ is fuit 579°, non 576°, ut Autor existimavit. Dedicata Ecclesia est sub nomine Philothei Antiocheni: cùm antea Georgio Martyri dicata fuisset, ab Abulfedaïl Medico Nestoriano, qui illud Monasterium ædificaverat. Archiatr hic fuit Principis aut Viziri alicujus, à quo obtinuit suæ sectæ hominibus qui nulli ferè in Ægypto unquam fuerunt, Monasterium & Ecclesiam suæ sectæ habere; nam ne titulares quidem Episcopos in ea provincia unquam habuit hæc hæresis.

Monasterium
Nestorianorum.

Anno Martyrum 903°, J. C. 1187°, advenit in Ægyptum Episcopus Armenus cum Salaheddini & Seifeddini Gazi Mosulæ principis Diplomatis. Ex Sultani autem illo præcepto restitutæ sunt Armenis Ecclesiæ duæ, *Zahara* & *Bostan*, quas Coptitæ antea occupaverant, & quas nonnisi coacti, Armenis restituerunt. Ita Abuselah, qui alio loco docet Ecclesiam S. Georgii nomine, prope Doram ad mare, Armenis attributam sub Viziro Bederegel-malo qui Armenus erat, & suæ genti favebat, ædificiis auctam adjunctis hortis, & Jacobitis restitutam sub Marco filio Zaræ. Ea igitur fortassis ratio fuit, ut cùm occupata à Marco fuisset, ejus

Res Armenorum.

Aaaa

restitutionem Armeni impetraverint, nam eadem videtur esse.

Hæc sunt quæ de Marco filio Zaræ, apud Autores nostros occurrunt, quibus nihil addendum nobis superest, quàm quod accusatur ab Autore Orientalis Chronici, quasi parum religiosè vixerit, frequentiaque apud eum convivia fuerint, non modò luxu nimio: sed etiam in quibus contra communem disciplinam, carnes apponebantur. Erat enim ea lex apud Coptitas, & apud alios ferme Orientales omnes Christianos perpetua, ut Episcopi & Patriarchæ, quamvis ex Clero sæculari eligerentur, tamen vitam secundùm Monasticam regulam componerent, præsertim quia antequam Episcopalem ordinationem susciperent, Archimandritæ ordinabantur, ut ex multis hujus historiæ locis observari potest. An verò Marcus, quia Monasticam vitam à juventute professus non esset, ea se abstinentiæ à carnibus lege non teneri existimaverit, affirmare non possumus. Sanè in Patriarchio ea observari solebat, quod idcirco Cella appellabatur, quia ut in Cellis & Monasteriis abstinentia observabatur.

Præter ea quæ superiùs dicta sunt de Michaele Metropoli-
tamiensi, docet nos Abulbircar ab eo compositum fuisse opus
Theologicum in multa capita divisum, in quo potissimum expli-
cabat Incarnationis mysterium secundùm doctrinam Jacobita-
rum: probabatque Verbum verè incarnatum; & post incarnatio-
nem esse in Christo, naturam unam, voluntatemque unam. At
qui ejus testimonio uteretur, aut ejus cum laude meminisset, huc
usque vidimus neminem: & si omnia ejusmodi sunt ac Tracta-
tus ejus de omittenda Confessione, sanè mediocris omnino erat
Theologus. Dicitur quoque Canonum Collectionem scripsisse per
locos communes dispositam, & synaxarium, quæ ad manus no-
stras non pervenerunt.

CUM Marcus filius Zaræ diem suum obiisset anno Martyrum
905°, qui responderet anno Hegiræ 585, J. C. 1189°, 6^a
mensis Tybi, eodem anno, statimque postquam sedes vacavit,
convenientes Misram ejus urbis Christiani præcipui, cum Episco-
pis & reliquis qui aderant, unanimi consensu elegerunt hunc

Joannem, qui ante ordinationem suam vocabatur Abulmeged, filius Abugaleb, quem est renitentem, compulerunt ut dignitatem capesseret, 11^a Mechiri ejusdem anni: atque adeo vacavit sedes uno tantum mense & diebus quinque, ut Autor noster observat: rectius quam Makrizius, qui 27 dies tantum numerat, ejusque ordinationem refert ad annum 584^{um}. Abulbircat eam assignat eidem anno Martyrum 905°, sed 4^a Mechiri. Ordinationis officio Misræ peracto, Alexandriam ductus, ibi proclamatus est. Erat ille sæcularis, sacerdos ut videtur; sed cui Ecclesiæ addictus fuerit, non legimus; tantam verò asserunt famam ejus apud omnes fuisse, ut statim atque de Patriarchia eligendo consilium haberi cœpit, omnia Monachorum ex quorum numero plerumque candidati quæri solebant mentione, statim omnes eum expetiverint. Commendabant eum mores integerrimi, & castimonia virginalis observata à prima pueritia, neque enim uxortum sacerdotem aut viduum eligere fas fuisset, atque ea potissimum causa erat, estque etiamnum, ut præ cæteris Monachii ad Patriarchatum promoveantur. Scripturas callebat, doctrinæque, facundiæ, & oris dignitate, tum etiam morum suavitate inter alios eminebat. Amplissimas facultates ex paterna avitæque hæreditate possidebat; pater enim & avus mercaturam fecerant: ipse quoque eam exercebat, Misræque amplam domum habebat mercimonii sui causâ: tum sacchari torcularia, molendina, multaque possessiones, unde magnas divitias collegerat, quas liberalissimè in pauperes effundebat. Ordinatus est quatuor ante Salaheddini mortem annis, adjutus favore Kadiorum seu Judicum, Murtadi & Redi fratrum, quorum apud principem præcipua erat autoritas. Cum autem Autor testetur se omnem Principis istius historiam sub Marci filii Zaræ vita comprehendisse, nec eam repetere necesse judicaverit, quantum ad quatuor postremos annos spectabat, statim de successoribus ejus ea scribere aggreditur, quæ non modò ex ejus historia, quæ non multum accurata est, sed ex aliis compendio trademus; non tamen tam accuratè, quàm res Salaheddini, quia ad institutum opus minus pertinent; illudque augere majorem in modum.

Salaheddinus quindecim ex diversis uxoribus filios reliquerat, aut juxta alios, septemdecim; quorum maximus natus Melik Af-
 dal. Secundum atque ex alia uxore, Melik Azizum; & ex eadem matre Dahetum. Azizum Ægypti Hierosolymorum, & Sy-

Res Muham-
 medanæ.

riæ literalis à se expugnata, Sultanum constituit : Afdalo Damascusum, magnamque Syriæ partem : Dahero Halepum : reliquis urbes aliquas, minoresque principatus. Cùm verò Ægypti regnum & aliæ ditiones Azizo concessæ, sortem Afdali superarent, statim inter fratres dissidia nata sunt, & ad arma brevi tempore ventum est. Nam Damascus Azizus, & Halebum ambiebat : Afdalus Ægyptum : ambo ignavi erant & vecordes, libidinique, ludo, & comestationibus vacabant : exigua tandem erat utriusque apud Emiros autoritas, imò & apud milites. Veterani enim qui *Acedii* appellabantur, eò quòd sub Agededdino Chiracoia olim militaverant, Salaheddini familiæ non multùm favabant, utpote hominis novi, qui principatum fraude occupaverat. *Salehii* dicebantur qui sub Salaheddino prima stipendia fecerant, sed pauci inter servos emittios, ex quibus cohortes prætorianæ constabant ut plurimùm, dominis præsertim mortuis gratum animum fidelemque servabant. Omnibus contemptui erant principes, nulla propria virtute commendati : multos etiam beneficiis sibi devinxerat Adelus Salaheddini frater, vir astutus, & rebus suis attentus. Habuerat à fratre amplissimas ditiones beneficiario jure possidendas, urbesque & arces tam in Mesopotamia, quàm in Syria illis in locis sitas, unde arbiter quodammodo belli & pacis inter fratris filios erat. Hic dum modò ad pacem hortatur, modò imbecilliori auxilia subministrat, illos aliquot annis ita attrivit, ut in ejus potestate essent ; quamvis si multis Autoribus credendum est, faceret id concordie inter eos stabiliendæ studio, potius quàm ambitione, cui si libuisset, statim Ægyptum occupare licuisset. Verùm cùm in Ægyptum venisset invitatus ab Acediis & Salehiis, omnem autoritatem obtinuit, honorem qualis Sultanis tribui solebat Azizo deferens, ita ut umbellam equitanti præferret ; sed revera omnia ejus arbitrio negotia gerebantur. Azizus Damasco semel ejus favore occupata, fratreque Afdalo pulso, ita ut sola Serkod urbecula ei superesset, astuti senis consilio eam amisit, cùm uni ex propriis filiis Moadhamo Isæ jussisset, ut eam sibi dari in beneficium peteret, quod negare ausus non est. Ita in Ægyptum reversus est, ubi 6^o regni anno, Hegiræ 594^a, J. C. 1197^o, mortuus est, cùm in venatione lapsus equo, graviter vulneratus fuisset. Laudatur tamen is princeps ab aliquot historicis, ob justitiæ amorem, divitiarum & pecuniæ contentum ; adeo ut cùm in summa angustia esset, decem aureorum

millia quæ à Præfecto quodam sibi allata fuerant, restitui statim iusserit, simul atque intellexit collecta esse ex multa Arabibus indicta, cum ducem quemdam suum occidissent in tumultu. Laudatur quoque à continentia, quod mancipium Turcicum forma præcellenti domo expulerit, quamvis eunt aureis mille. Cum enim semel sibi adstaret in conclavi, & ejus pulchritudine captus, nudari illum iussisset, statim poenitentia ductus, à scelere abstinuit; sed ita tamen (nam mira sanè propudiosa illius sceleris continentia est) ut statim in gynæceum currens, cum una quæ occurrit concubina libidinem expleret.

Anno ejus 1^o, Hegiræ 589^o, Califa Abbassida Nasser Scholam Nezamiam dictam ædificavit, simul adjuncta bibliotheca decem millium voluminum, quorum multa originalia, ut vulgò dicitur, fuerunt. Obiit Sultanus Mashoud filius Maudoud, Noradini magni ex fratre nepos, Mosulæ princeps, qui ter obsidionem à Salaheddino sustinuerat, & cum Adelo bellum habuerat. Boctomar Kelati Dominus ex mancipio Ortokidarum, ab Ismaelitis Assassinis occisus, quorum princeps Senan eodem anno obiit.

Anno 590^o obiit Togrilshah filius Arslanschah, filii Togrilshah, filii Muhamedis, filii Melikschah; in quo desuit Seljukidarum potentissima illa familia, cum centum sexaginta annos regnasset; neque superfuit ex ea nisi ramus Sultanorum Iconiensium, qui non à Sultanis sed eorum agnatis ducebant originem. Occisus est autem in prælio à Rege Cowarezmiæ Tekescho.

Anno 591^o, qui fuit J. C. 1194^o, sed cum Muharram sive initium anni Arabici inciderit in 15^{am} Decembris, respondet majori ex parte anno 1195^o, referunt Arabes insigne de Christianis Hispanis victoriam, sub Aba Yacoub filio Juceph, filii Abdelmoumen, Mogrebitarum seu Africanorum Muhamedanorum Rege. Christianorum dux erat Alfonsus, 1^{us}. scilicet Castellæ Rex, cujus exercitum tanta internecione cæsum aiunt, ut in acie ceciderint centum quadraginta sex millia, capti fuerint triginta mille: qui captivi unâ drachmâ venterint. Rex cum paucis comitibus Toletum fugisse dicitur, & ex dolore nimio vovisse quod neque in lecto dormiret, nec equum conscenderet, nec ad mulierem accederet, donec ultionem de hostibus cepisset. Ea fuit pugna ad Alarcos, de qua Hispanici scriptores; infelicitissima quidem sed non ejusmodi, ut solus Castellæ Rex, qui aliorum auxilia non expectavit, posset tunc in aciem educere centum octoginta millia & amplius

armatorum. Verum ex illo voto quod Alfonso tribuitur, quem etiam caesariem, barbamque rasisse, & crucem invertisse in luctus indicium scribunt, satis intelligitur, nenas liberas vulgares illas, quæ à vernaculo quo extant sermone *Romances* appellantur, & quarum multæ ex Maurorum ingenio prodierunt, fundamentum fuisse tam absurdæ narrationis. Apud Arabes pugna hæc Zulacæ nomen habet.

Anno 592°, J. C. 1195°, memorant quoque alteram adversus Alfonso Castellæ regem pugnam, Toleticæ obsidionem, Alfonso *Fonsch* vocatur ab Arabibus, qui articulum latere existimaverunt in prima syllaba. Damascus ab Azizo & Adelo patruo per prodicionem capta: principatus insignia, oratio, pecunia signata Azizi nomine, omnis in Adelo autoritas. Afdal fugit, & in arce Serkod se inclusit, unde frustra per literas de patruo apud Calisam questus est.

Anno 593° obiit Zebidæ in Arabia Scifel-Islam Togtekin Jobi filius, Salaheddini frater, amplissimas divitias oppressione subditorum partes relinquens filio suo Chemfelmelouc Ismael, qui in Arabia felici regnavit, & Calise titulum usurpavit; & paulò post interemtus est à conjuratis, qui injuriam religioni suæ factam vindicaverunt: hujus minor frater ab Emiris salutatus est: Nacerque appellatus; fuitque aliquamdiu sub tutela matris. Illa Solimano filio Chahinschah, filii Takieddin, filii Chahinschah filii Yub, qui à prima ætate inter Fakiros seu religiosos mendicos vixerat, Meccæque talem vivebat vitam, nupsit; & paulò post cum pessimè provinciam administraret, uxorem repudiavit: tandemque sublata est Yubidarum in Arabia dominatio.

Anno 594° obiit Azizus Ægypti Sultanus: relicto filio Almanfore, sub cujus nomine per duos annos Adelus regnum administravit. Ante verò quàm Kahiram occupasset, nam erat in Syria cùm Azizus obiit, Emiri Acedii & Salehii cùm Almanfori fidem præstiterunt, ob illius pueritiam, 9^m enim ætatis annum non excefferat, tutorem, seu ut nos diceremus Regentem, tam principis, quàm negotiorum, elegerunt Afdalum, ejus patrum, qui statim in Ægyptum occurrit. Ejus regni viribus auctus communicatis cum Dahero Halepi principe consiliis, Damascus obsederunt: eò festinavit Adelus qui: Maredinam obsidebat: diu obsessus acriter, vix effugisset, nisi ex insana libidine fratrum duorum, occasionem sumisset dissolvendæ illorum adversus se socie-

tatis. Habebat Daherus in deliciis servum Turcam, qui cum non compareret, illeque omiſſis negotiis illum conquereret, miſit Adelus ad eum, qui ſuo nomine nuntiarent fratrem ejus Aſdalum, eum raviſſe; locumque indicavit ubi mancipium lateret. Ea occasione conjeſto in vincula Emiro, qui puerum receperat, poſt magna cum fratre jurgia, copias deduxit, cum Adeli res eo in ſtatu eſſent, ut deditionem facere jam cogeretur. Ita metu & obſidione liber in Ægyptum venit: regnumque primò ſub Almanforis nomine, mox eo depoſito ſolus obtinuit, filiisſque tranſmiſit. Nec deſuit, homini qui æquitatem ut nomine, ita moribus præferebat, veteratoria ars ſua, ne hujus uſurpationis cauſa, tumultus fieret, exacerbatis aliquorum animis ob inſignem erga fratris poſteros ingratitudinem. Itaque cum jura, quæ ſolâ regnandi cauſa violaverat, pietatis quam in cæteris rebus colebat ſpecie, obſervare videri vellet, convocatis doctõribus Muhamedanis, hanc primùm ipsis quæſtionem propoſuit, num majori minor imparere deberet: negaverunt perſiti nebulones, id licere. Tum ſecundò quæſivit, an major minoris nomine imperium adminiſtrare poſſet: negaverunt pariter, quòd non poſſet in alium tranſferri plus juris à minore, quàm ipſe haberet. Ita Imperium à Salaheddino, tot fraudibus, dominique proditione, & ut vulgò exiſtimatum eſt, cæde partum, poſt annos ſex aut ſeptem everſum eſt. Regnavit autem Adelus uſque ad annum Hegiræ 615^{um}, J. C. 1218^{um}. Quo verò anno Salaheddini filii Ægypti regnum amiſerunt, everſa quoque funditus eſt inſignis illa, & tam latè imperans olim Seljukidarum in Oriente Dynaſtia. Cowarzemſchah, ſeu quod idem eſt, Cowarezmiorum rege Tckekſch, omnia in poteſtatem ſuam redigente, quæ olim ultrà Tigrin & Euſphraten in Oriente alteri poſſederant. Cowarezmiorum verò imperium, quod poſtea everſum eſt à Tartaris, tunc à Sinarum finibus in India, Tranſoxiana, Choraſana, tandemque ad Bagdadum ferme pertingebat. Atque hæc ſunt quæ ad hiftoriam illorum temporum ſpectant præcipua. Anni quoque primi Adeli nota apud hiftoricos eſt, quòd eo tempore tanta famēs in Ægypto fuit, ut homines cadavera comederent: paſſimque pueros qui ad Meſchitarum oſtia exponebantur raperent maſtandos & comedendos: ingens quoque peſtis infinitam hominum multitudinem abſuſit.

Regnante jam Adelo venerunt legati ex Æthiopia ad Patriar-

*Emir, Cond.
Cond-Emir, Lib
Tcharkib.*

JOANNES
Pat. LXXIV.
Rex Æthio-
picæ. Legatos
muticæ ad pe-
tendam Or-
dinationem
Metropolitæ.

560

HISTORIA

cham, rogantes regis nomine, ut novum Metropolitam in defuncti locum ordinaret. Tribus mensibus integris Joannes eos apud se detinuit, quia cum ad Monasteria misisset, ut quæreretur idoneum ad hanc dignitatem virum, neminem reperit. Cum Legati moram illam impatienter ferrent, literas ad Sultatum scriptas, cum muneribus à Rege Æthiopie missis obtulerunt, petentes simul ut auctoritatem suam interponeret, quo Patriarcha citius Metropolitam ipsis ordinaret. Igitur nemine inter Monachos reposito, qui idoneus judicaretur, elegit Kilum Episcopum Fua, quem Metropolitam Æthiopie ordinavit. Quamvis autem hæc proprie dicendo ordinatio non esset, verum translatio ad sedem majorem, & novæ auctoritatis collatio, tamen quia orationes varias habent Orientales, præsertim Syri ad constituendum Metropolitam eum qui jam Episcopus erat, idcirco utitur Autor eadem voce quæ ad significandam ordinationem proprie dictam usurpari solet. Illa verò cæremonia, & quæ eam comitantur orationes, occurrunt in Pontificalibus Syris, tam Jacobitarum quam Nestorianorum, atque etiam Melchitarum seu Orthodoxorum. Frequentissimæ enim fuerunt apud eos translationes Episcopales, maxime apud Nestorianos; atque adeo facile fuit, ut qui contra Canones tam facile peccabant, contra Ritualement disciplinam, peccarent pariter, dum preces ferme similes, & impositionem manuum adhiberent ad consecrationem Sacerdotis in Episcopum, & Episcopi ad Metropolim translationem. At saltem in ea parte observatio disciplinæ veteris, major apud Coptitas quam apud reliquos Orientales Christianos fuit; nam rarissimæ, aut prope nullæ in eorum historia occurrunt Episcoporum translationes. Ex tot Patriarchis nullus alterius antea loci Episcopus fuerat. Potuit igitur Joannes ex disciplinæ ignorantia, ut in rebus inusitatis fieri proclive est, existimare novam consecrationem Æthiopie Metropolitanæ esse necessariam.

Kilus Me-
tropolita in
Æthiopiam
profectus.

Profectus in Æthiopiam Kilus, ut Autor ait se accepisse ab illis qui in ejus comitatu fuerant, à Rege qui obviam prodiit, dierum trium itinere cum Episcopis, Sacerdotibus, & exercitu magnâ pompâ susceptus est; atque ita in urbem deductus, prælatâ umbellâ ex panno aureo super caput ejus. Cum primò Liturgiam celebravit, Rex, Magnatesque aurum obtulerunt, agallochumque & anbarum in thuribulis ad suffitum incenderunt. Cum eum in domum Metropolitanorum deduxissent, decem Sacerdotes qui ipsi

ipsi ministrarent, designaverunt; alios qui rerum ejus domesticarum curam gererent, tum qui libros, & suppellectilem Ecclesiae sub ejus nutu custodirent: praeterea dederunt ipsi Rex & viri principes, camelos, multosque quibus veheretur: servos, ancillas, omniaque adusum domesticum necessaria. Rex ipse frequenter domum ejus ventitabat, eoque magis ab omnibus honor novo illi Metropolitae deferrebatur, quod cum Aethiopia magnam siccitatem diu experta fuisset, statim atque Liturgia ab eo celebrata est, imber copiosus decedit, quod Dei beneficium precibus illius attribuerunt. Ita foeliciter, cum maxima Aethiopum approbatione apud eos vixit annis quatuor. Quinto demum anno, Joannes magno suo dolore accepit cum ex urbe regia Aethiopiae exivisset, & in Aegyptum venire. Paulo post pervenit Kahiram & illic cum esset, interrogavit eum Patriarcha, cur commissam sibi Ecclesiam deseruisset. Respondit se Reginae importunis sollicitationibus fatigatum, consensisse ad ejus preces ordinationi fratris ejus nomine *Hetren* vel *Gedron*, quem Episcopum urbis primariae consecravisset: hunc statim atque ordinatus fuit, umbellam, quae soli Metropolitae praeferebatur, sibi attribuisse: Sacerdotes ab eo alienasse, omnia negotia ad se traxisse, adeo ut nemini Metropolitam adire liceret: se in contemptum omnium venisse, cum supremam auctoritatem omnem Episcopus ille usurpasset.

Adjiciebat Kilus Episcopum illum, tandem eò furoris processisse, ut servos immitteret, qui noctu in domum ejus irrumperent, eumque occiderent. Itaque coactum se salutem fugam quaerere, utroque excessisse, comitantibus circiter hominibus quingentis, qui erant in ejus domestico ministerio, aut servis quos pecuniâ suâ emerat; seque recepit eum in locum ubi erat Cella Metropolitanorum, seu eorum habitatio, ad quam pertinebant pagi quadraginta. Inde quoque profectum, dimisisse maximam partem illorum qui secuti cum fuerant, secumque centum circiter remansisse, cum quibus se in viam dedit in Aegyptum tendens; omnesque in itinere fame & siti periisse. Postquam enim ex provinciis Aethiopiae Regi subiectis egressi fuerunt, transeundum fuisse per regiones Infidelium, qui transitum negaverunt, nisi exactâ pecuniâ. In illis locis magnas se calamitates cum suis perpeßum, vixque omnibus spoliatum in Aegyptum pervenisse, cum servis duobus & ancilla; Patriarcha jussit cum Misrae subistere, donec in Aethiopiam literas mitteret, per Sacerdotem quem-

Bbb

dam Moysen qui annum cundo redeundoque consumsit, retulitque Regis literas. Earum autem sententia hæc erat, quòd Kilus, Sacerdotem qui Thesauri Ecclesiæ Metropolitice curam habebat, occidisset, jubens eum tamdiu à servis suis coram se verberari donec efflaret animam, ex suspitione quòd virgam auream quæ erat inter vasa Ecclesiæ, surripuisset. Eos qui domum Metropolitice invaserant, fuisse populares Sacerdotis istius, qui erat dignitate conspicuus, decemque alios Sacerdotes infra se habebat. Negabat etiam Rex, quòd ab Episcopo quem ordinaverat in urbe regia, comparatæ adversus illum insidiæ fuissent, quibus fugere coactus esset: eumque duobus postquam profectus erat mensibus obijisse: præterea imbrem nullum cecidisse; quæ ratio Æthiopes compulsi, ut statim legatos ad Patriarcham mitterent, qui cum Moysæ Sacerdote venerunt. Attulerunt simul pretiosa munera Patriarchæ destinata, inter quæ erat corona aurea magni pretii. Erant etiam sua Sultani dona, & rara aliquot animalia, elephas, leo, camelopardalis, seu *Girafa*, & asinus sylvestris. Currebat tunc annus Martyrum 926^{us}, quem Autor comparat anno Arabum 606°. Est autem ex vero calculo annus J. C. 1210^{us}, quo 24^a Junii incepit annus Hegiræ 607^{us}: atque adeo superior annus mediam anni 606ⁱ partem complectebatur: majorem adhuc, annus Ægyptiorum incipiens à Septembri. Aberat Adelus Sultanus, Sinjaram obsidens; Kamelus ejus successor tunc Ægyptum administrabat, ad quem Legatus cum muneribus introductus est. Cum coronæ non minus pretium quàm elegantiam Sultanus miraretur, Legatus dixit notam fuisse Regi suo Patriarchæ modestiam, atque adeo judicasse eum nunquam coronam hanc capiti impositorium suo: si id facturum scivisset, tot eam gemmis ornatum fuisse, ut pretium, totius Ægypti annum redditum exæquaret. Tum de Regni Æthiopie statu, de bellis exercitiisque interrogatus, retulit qua ratione Rex cum finitimis multa, arduaque bella gessisset: quæ si Autor noster in literas misisset, fructuosior oratione fuisset ejus diligentia, cùm summa sit rerum Æthiopicarum illius temporis obcuritas, Ægyptiacæ verò, in quibus tantopere laboravit, à tam multis accuratè descriptæ sint, ut ejus curis non indigeremus. Nihil porro de Regis illius rebus singulare designavit, nisi quòd eo die quo profectus est cum ejus literis, eum in castris reliquerat; cùm lustraret exercitum, qui sub unius ex belli ducibus imperio erat, atque in eo fuisse equitum

millia sexaginta præter calones & lixas, minorisque ordinis milites. Hæc Kamelus cùm audiisset, risit, non dubitans Æthiopem de rebus patriis mentiri splendide. Postea munera Patriarcham accipere iussit; quando à Rege Æthiopiæ ad ipsum missa fuerant; sed adjuratus per vitam Adeli patris, ea tandem accepit. Mox iussit ut omisâ dilatione alium Metropolitam Æthiopiæ ordinaret, quando id præcipuè Legatus in mandatis habebat, ne Kilus remitteretur. Ea occasione tantus non Christianorum modò, sed Muhamedanorum, ad Ecclesiam Muhallacam Misræ concursus factus est ad hoc spectaculum, ut asinus eo die tribus drachmis locaretur.

Adductus in Ecclesiam Kilus filius Molebasi, Metropolitanica dignitate spoliatus est: ordinatusque ejus loco Isaac Monachus ex Laura S. Antonii, qui cum fratre suo majori Josepho inter Monachos magna cum laude vixerat; hunc verò Sacerdotem ordinavit eodem die 11^a Phamenoth, anno Martyrum 926^o; quique erat 9^{us} Ramadan anni 606ⁱ, J. C. 1209^m. Kilus dignitate Episcopali pariter privatus est. Isaac cum Legatis profectus est in Æthiopiam, ubi à Rege, magno cum honore susceptus est, foeliciterque pervenit ad urbem Regiam quæ, inquit Autor, *Adasa vocabatur*. Nomen regis qui tunc regnabat, fuit *Lalibela*; nam ita legendum est, ex Alvarezio, & aliis autoribus, qui ejus regis meminerunt. Erat autem filius Chenudæ, seu Sanutii, quam vocem cùm Coptitæ per Æ sæpè efferunt, ut *Enidos* scribant; inde Æthiopes fecerunt *Susneos*, quod nomen in eorum historia vulgatum est, & quo appellatus fuit Rex qui hoc nostro sæculo floruit. Significatio hujus nominis *Lalibela* secundum Auctorem nostrum est *Leo*. Uxorem habuit nomine *Maskal-Kebri*: sed secundum analogiam Æthiopicam pronuntiandum *Maskal-Gabrit*, id est *Crucis ancilla*; non, ut Ægyptius noster ex Arabismo interpretatus est, *Crux magna*. Nam *Gabra* Æthiopicè servus, & *Gabrit* in foeminino ancilla. Rex originem ducebat ex familia cujus nomen variis modis legi potest: duosque filios habebat, quorum nomina in scriptura Arabica punctis diacriticis destitutâ legi non possunt, vixque divinari; sedem regni habebat urbem Adasa. Hæc Historicus noster Ægyptius, quæ si explicasset uberius, multa nos de Æthiopia docuisset, quæ omnino obscura sunt. Quæ sit urbs illa *Adasa*, dicere non possumus; neque enim ejus meminerunt Arabes Geographi, apud quos vulgò

Metropolitana
Æthiopiæ de-
positus.

Hist. Æth.
l. 3. c. 11.
Teil. l. 1.

Alvarez c. 49.
De Telus. l. 1.
c. 27.

Monachi
apollata,

Regia urbs Æthiopiæ *Jermi* vel *Jerma* appellatur, de qua Goli in notis ad Alfraganum : alii *Axoum* vocant, quæ est procul dubio, *Axuma* veterum, de qua videri potest Ludolfus. Neque certum id quod plerique tam confidenter asserunt, nullas in Æthiopia fuisse urbes ; id enim constans Arabum traditio refellit, verum raræ fuerunt apud gentem, quæ aut in tentoriis, aut viciatim habitare semper consuevit. Rex de quo Autor noster scribit, Æthiopibus celebris est, & de eo fabulam carminibus expositam circumferunt, quodd nascenti examen apum circumfusum sit, ad futuræ magnitudinis indicium. Fuit autem ex familia illa Zagæa, quæ pulsâ Salomonæâ, per annos multos principatum obtinuit : atque ea ratio facit ut vocem Arabicam quæ nomen illius familiar signifiçat legendam existimemus *Yaniet* : nam litera Z ab Amharæis pronuntiatur ut J. Gallicum. Cum autem illum dicunt Sanutii fuisse filium, fortasse ille Rex fuit, quem catalogi ignorant ; neque Ludolfus nomen patris ejus prodidit, filiorum aut successorum multò minùs. Is porro est Lalibela qui ut ex Carmine Æthiopico docuit nos Ludolfus, *adificator fuit templorum artificum ex rupibus siccis sine luto humido*. Nempe excisis excavatisque rupibus ingentibus in Ecclesiarum formam, quas adhuc extantes suo tempore vidit, earumque ichnographiam dedit Franciscus Alvarezius, quem exscripserunt Autores alii. Regnasse dicitur Lalibela annis quadraginta. Reliqua ad hanc historiam spectantia magis opportuno loco referentur ; ubi agemus de Ecclesia Æthiopica.

Anno Hegiræ 606*, qui erat J. C. 1209^{us}, Franci Damiatam cum magno exercitu appulerunt, totamque regionem usque ad Gizam, in conspectu Kahiræ populi sunt ; ignem domibus subijçientes, omnesque quos repperunt, occidentes aut in captivitatem abducentes. Cum Adelus bello in Mesopotamia occupatus esset, Kamelusque exiguas in Ægypto copias haberet, contentus Kahiram munire, Damiatâ verò obsidionem sustinente, Franci prædâ in naves suas congestâ, in Palestinam reversi sunt. Inter alia damna à Francis illata, referunt direptionem Monasterii Melchitarum non longè ab urbe. Ejus expeditionis Autores nostri non meminerunt.

Narratur deinde fuisse in Ægypto Monachum ex S. Macarii Monasterio, qui Muhamedanus factus, officium scripturæ quoddam obtinuerat : mox poenitentia ductus, Kamelo Sultani filise

obtulit, petens ut liceret sibi ad religionem pristinam suam reverteri, aut ut cum supplicio addiceret. Princeps Christianis non incommodus, permisit, deditque literas, quibus à Muhamedanorum inquisitione liber esset: ita Monachus ad Lauram suam reversus poenitentiae incubuit, & per annos aliquot in ea se exercuit. Accidit ut quidam ex Sahiditis Christianis qui pariter fidem negaverat, poenitens, & hujus benignitatis exemplo fretus, ad Adelum Sultanium accesserit, paremque licentiam petierit, abnegandi Muhamedismi, quam Monacho filius concesserat. Iratus Adelus, misit ad S. Macarium, militem cum mandatis, ut si Monachus in Christiana fide peristeret, occideretur; concessa vita, modò iterum Muslemanus fieret. Ille fidem abnegavit, & ex Apostata factus fratrum calumniator eos accusavit, quòd magnam auri & argenti vim defossam haberent, in quodam puteo quem designabat. Eo in loco Coenobiarcha deposuerat vasa sacra: atque hic erat calumniae color, quæ tamen apud principem ita valuit, ut missis cum Joanne illo detestando Apostata satellitibus, jusserit rei veritatem perquiri. Cùm advenissent, simulque magistratus illi quos *Chahoud* appellant, Archimandrita dixit nihil illos argenti aut auri repositi habere, præter vasa & suppellectilem quibus ad Liturgiam uti solerent: calicem & discum ex argento, velumque sericeum, quo sanctuarium tegetetur. Omnia esse oblata à Christianis, quorum etiam nominibus inscripta erant. Ubi ea coram Musulmanis producta fuere, ad Sultanium delata sunt: & tribus aureorum millibus æstimata. Kamelus jussit adduci Christianum nomine Petrum qui olim Diaconus fuerat, in Ecclesia S. Mariæ, Misræ, qui coram eo legit Copticam scripturam in singulis donariis, quæ quid à quibuscumque oblatum esset significabat. Post hæc exegit à tribus antiquioribus Monachis juramentum, quo affirmarent nihil pecuniarum in puteo esse depositum: adductus etiam cæmentarius Muhamedanus, qui illum fecerat: cùmque Abuchaker Sultano dixisset, eadem vasa post similem calumniam ad Salaheddinum quondam allata fuisse, ipsumque illa reddi jussisse, ejus exemplo ea restitui Christianis præcepit. Patriarcha illa cùm recepisset, in arcis composita, camelis Misram revexit accensis circum cereis, comitantibus magna cum reverentia & latitia Christianorum præcipuis. Nempe honor quem Eucharistiæ Orientales deferunt, non modò in factorum mysteriorum adoratione consistit, quàm eos observare certis argumentis, & ad Liturgiam,

& in Dissertatione singulari probavimus; verum etiam talis est, ut etiam vasa ipsa, quæ, ut ipsorum verbis loquamur, destinata sunt ad continenda membra & sanguinem corporis Christi cereorum lumine & processionibus honorare soleant.

Monachum alium calumniatorem, qui de collectis pecuniis Patriarcham accusabat, proponebatque ut aliquot naves suæ pecuniæ instruere cogeretur, sicut olim decessores ejus fecerant, Kamelus non auditum remitti ad Monasterium suum jussit, tanta erat in isto Principe æquitas & benignitas.

Obit Joannes anno Martyrum 932°, qui erat J. C. 1216^{us}; atque adeo Hegiræ 613^{us}, incipiente 19^a Aprilis; atque adeo 16^a Ramadan, quam morti ejus assignat, quamque cum 12^a Tybi componit Autor noster. Annus Hegiræ 612^{us}, ut numerat, pertinebat ad annum sequentem. Annus 613^{us} fuit 17^{us} regni Adeli, ex quo post fratris filium Almanforem puerum exautoratum Sultanus salutatus est; obiitque anno 615°, atque ita totum Patriarchatus Joannis spatium sub quatuor regnis fuit, Salaheddini annis postremis, Azizi & Almanforis; reliquum sub Adelo. Corpus Joannis, sicut præceperat, sepultum est Misræ in Cœmeterio dicto Habessinorum prope Zachariam Patriarcham. Ibi olim fuisse Monasterium Nestorianorum cum adjuncta Ecclesia, docet nos Abuselâh; eaque à Jacobitis occupata fuisse. Ibi sepulera Episcoporum Misræ, & commune Jacobitarum Kahirensium cœmeterium; ejusque familiæ privatum, ut habet Autor qui sequitur.

Ab anno Martyrum 905°, quo ordinatus est Joannes ad 932^{um} quo mortuus est, sunt anni 27; atque tot illi attribuit Abulbircat, quem sequuntur Auctores alii, ipse quoque anno 905° ordinationem factam scribit; obitum refert ad 932^{um}, Makrizius ad annum Hegiræ 612^{um}.

Is Autor compendio tradit ea quæ pluribus noster historicus; illudque adjicit quòd mercaturam faciens cum semel in Mari salso seu Oceano, naufragium fecisset, magnamque bonorum partem amisset, filii Eljebab, judicibus illis duobus de quo initio dictum est, qui pecuniam ei crediderant, amissamque credebant, eam restituerit, dicens, se eam in quadam parte navis, quæ salva fuerat reposuisse. Ea ratione illi memores beneficii eum excitaverunt ad Patriarchatum obtinendum, cum operam pollicitus fuisset sacerdoti cuidam Abumaseero, qui gravissimè id tulit. Habuit, cum

ad hanc dignitatem evectus est, in numerato aureorum, decem & septem millia quæ in pauperes impendit : tributum Dinariale seu aurei capitati ab Ecclesiasticis exigendi sustulit : simoniam prohibuit, nec exercuit : adeo continens à muneribus, ut nunquam alicujus suorum Jacobitarum panem comederit.

De eo legitur in Chronico Orientali quod *Confessionem abrogaverit, & circumcisionem commendaverit* : sed cum de ea re nihil apud alios Autores occurrat, existimamus, aut ipsum aut ejus Interpretem qui liberè omnino in vertendo se habuit, quæ alteri Joanni, Marci prædecessori conveniebant, ad hunc transulisse ; & ea conjectura certissima videtur.

VACATIO PATRIARCHATUS PER ANNOS VIGINTI.

CUM Joannes Patriarcha diem suum obiisset eo quem superius diximus anno Martyrum 932°, sepultus est, sicut ipse jussit, in Ecclesia Habessinorum dicta, prope sepulcrum Zachariæ Patriarchæ, in gentilitio familiæ suæ sepulcro, cum vetuisset ne corpus suum inde transferretur ad S. Macarii Monasterium. Factæ sunt ea nocte quæ officium exequiarum antecessit, Vigiliæ in Ecclesia S. Mariæ Muhallacæ in Kahira veteri : neque ullus Episcoporum adfuit, præter Episcopum Melchitarum, quod facio mirum est : neque enim inter homines sectæ diversæ, qui se invicem ut hæreticos averfabantur, solita erant ejusmodi officia, cum tota precibus ritibusque Ecclesiasticis constarent, ad quas nemo ab Ecclesia alienus, secundum Canones recipi debebat.

Joannis exequiæ & sepultura.

Cum verò convenissent Jacobitarum primarii cum Episcopis ad eligendum ejus successorem, nihil per multos dies actum fuit, ob diversa partium studia. Multis placebat eligi Paulum cognomine El-Bouchi, Sacerdotem : alii Davidem Joannis filium, Fiumensem : alii denique Archidiaconum Ecclesiæ Muhallacæ nomine Abulkerimum, proponebant. Favebant multi qui apud principes autoritate valebant, Davidi ; jamque ipso exequiarum Joannis die, consilia inter se agitarant, ut à multis subscriptiones de ejus electione erigerent, totamque noctem huic negotiationi impenderant : atque ita constituerant ut in domum ministerialis cujusdam nomine *Chemsetriasset* eo fine convenirent. Verum ille adquies-

Electio per
sortem.

cere noluit, negavitque se electioni Davidis consensurum, quamdiu in vivis essent Abuchaker Medicus Sultanorum, & Abulfetwahi : ita re infectâ discesserunt : Vizirus alterum eligi volebat nomine Senieddoulet, qui erat ipsi ab actis & epistolis. Aberat interea Sultanus Adel, qui erat Hierosolymis : Kamelus quoque ejus filius absens, ut audivit vacare sedem, quæsitivit à Medico suo Abdelkrimo, qua ratione eligi apud eos soleret Patriarcha. Respondit tria virorum de quorum dignitate apud omnes constaret nomina, totidem schedulis inscribi solere : quartam item inscriptam nomine Jesu Christi, cum aliis super altare collocari, celebratisque per dies tres precibus, adduci infantulum impuberem, & ejus nomen educeretur, cum designari Patriarcham : quod si electa fuisset ea in qua scriptum esset nomen Christi Domini, argumentum esse quod nullus trium illi acceptus sit; atque adeo, tres alios eodem modo schedulis inscribi, donec alicujus nomen prodierit. Cum igitur contentio inter Jacobitas majorem in modum exardesceret, à multis consulebatur ut electio per sortem illam, majorum exemplis confirmata fieret; sed qui Davidi favebant, obstitērunt, sperantes, per vim & auctoritatem id quod optabant se consecuturos. Verum cum multi strenuè se illi opponerent, venerunt etiam adversus eum literæ, accusatusque est quod temerè supremam dignitatem ambiret, ad quam eligi non poterat, quia abstentus fuerat à Petro Episcopo Fiumensi, qui cum Sacerdotem ordinaverat, ob Confessionem, & alias controverfias quæ Ecclesiam Fiumensem turbaverant, quarum etiam occasione schisma in plebe fecerat : neque illum à propria Ecclesia egressum esse, ob aliam causam, quam quod ejectus ab Episcopo fuisset. Ea propter ipsum Patriarcham, cum pravitatem fidei ejus, morumque perpexisset, eum quoque communione privasse. Hæc de eo testati sunt subscriptionibus suis Sacerdotes Misræ & Kahiræ viginti-duo; quæ in acta retulerunt Misræ Cives habita congregatione. Adjiciebant alii quod cum esset Fiumensis, ea regio ad Sahid pertinebat, ex qua non posset eligi Patriarcha; quasi inde constet neminem ad Patriarchalem sedem assumi debere, qui non oriundus esset ex Inferiori Ægypto; quam regulam annotare visum est, quia in tota hac historia nihil de ea huc usque nobis occurrit. Objectum etiam ipsi est, quod, dum Patriarcha Joannes decumberet, nunquam de ejus salute sciscitatus foret, quod exequiis ejus non interfuisset: quod Metropoli-
tæ

pia fieri ambiens ab eodem cum indignatione repulsus fuisset ; multa tandem alia ipsi objecta fuerunt. Ita mensis elapsus, nihilque perfectum & cum quinque Episcopi convenissent ut tricenarium exequiarum officium ad sepulcrum Joannis celebrarent Liturgiâ & precibus ad Ecclesiam SS. Sergii & Bacchi, ubi hospitium habebant, reversi, mandatum acceperunt ab Eminateddino urbis præfecto ut posttridie eâ excederent & ad sedes suas reverterentur. Erant illi Mohna Episcopus Busridos, Senior Episcoporum sui temporis : frater ejus Episcopus Lekanæ, Michael Talhæ, Gabriel Atsiæ, & Marcus Melichæ. Factum id suspicati sunt operâ scribæ, qui Davidi favebat, veriti ne opposerent, se ut fecerant eò usque ejus electioni. Verùm antequam proficiscerentur, congregati coram altari in Ecclesia S. Sergii, excepto uno Episcopo Atsiæ, sententiam excommunicationis adversus eundem Sacerdotem protulerunt, seque jurejurando obstrinxerunt, ne unquam ipsi manus imponerent, utpote tantarum turbarum architecto. Inde postquam orassent ad Joannem tumulum, in viam se dederunt.

Non desit tamen Neschelkhelafet scriba cum amicis, apud plerisque agere, ut quoniam in confesso Jacobitarum publico res non successerat, per subscriptiones transigeretur. Itaque Psephisma præparaverunt, ejus generis quod suprà explicavimus, quod *Taklid* sive *Takket* vocant, quo scilicet testarentur se Davidem elegisse ad Patriarchalem dignitatem. Ipse Autor historiæ Ma-houb filius Mansour, fatetur se ejusmodi literarum paria quatuor exarasse, quia erat secretarius ; exemplum unum erat pro Episcopis ; secundum pro Sacerdotibus : tertium pro Laicorum primariis : quartum pro Monachis : quibus quintum accessit ad Alexandrinos : excusat autem se quòd ita fecerit, quod in mente habuerit, nihil hoc sua interesse : & si quidem alii consensum sua subscriptione testarentur, accessurum se ad eorum sententiam, sin minus, se nihil agere, atque ita culpâ vacare. Tanto autem studio subscriptiones exegit Neschelkhelafet, ut tredecim Episcopi subscripserint, etiam duo ex eorum numero qui anathema in eum protulerant, monachi quadraginta, Sacerdotes multi, tam ex Misra quàm ex tractu maritimo, exceptis illis qui sententiam adversus eum tulerant in concilio eadem in urbe habito. Nutabant Laicorum primarii, resque eò devenerat, ut nulla oppositionis aliorum habita ratione, electio jam jam perficienda videretur. Verùm cum apud Sultanum Adelum questus fuisset Medicus Abchaker,

Subscriptio-
nes secretò
petitæ.

contemni Christianorum leges, & eum quem designabant aliqui, cœteris acceptum non esse, uno indignum existimari, præsertim quòd pravas de religione opiniones haberet; iussit Princeps convenire coram se Jacobitas, qui illum se nolle Patriarcham habere testati sunt, multa ipsi crimina impingentes. Interrogati quem vellent, multos nominaverunt, præsertim ex Monachorum ordine. Cùmque inclinaret Adelus, ut electio forti permitteretur, opposuit se Neschelkelafet, dicens hanc quidem esse Francorum consuetudinem, sed quæ institutis eorum non conveniret, duplici mendacio: illam enim sortem quam explicavimus locis aliquot, usurpatam fuisse in dubiis nonnullorum Patriarcharum electionibus certissimum erat, ut multa hujus historiæ exempla demonstrant, & ea erat Latinis prorsus ignota. Interea adductus est Monachus quidam, quem multi postulabant, Camelo permittente; sed cùm advenisset, Adelus vetuit, ne ad ejus ordinationem procederent, & ita in cellam suam reversus est, omissumque electionis negotium.

Anno sequenti qui fuit æræ Martyrum 932^{us}, J. C. 1216^{us}, mortuo Abuchaker Medico, qui præcipuum Davidis electioni impedimentum afferebat, egit iterum apud Sultanum Neschelkelafet, ut negotium finem acciperet. Mandavit is Kahiræ præfecto, ut Christianos convenire juberet ad deliberandum 21^a mensis Tybi; ipsi verò noctem antecedentem, & duas alias in vigiliis & orationibus transegerunt; monitque sunt omnium Ecclesiarum Presbyteri, ut id parochianis suis significarent. Ea ipsa die quæ designata fuerat, ex Misra & Kahira ad aulam exteriorem Sultani convenerunt, plusquàm centum, ex utriusque urbis veteris & novæ primoribus Christianis, qui coram Præfectis in strato confidentibus interrogati, quem Patriarcham habere vellent, Davidem nominaverunt, cujus electionis instrumento subscripserant. In ea quippe sententia perstabant Kahirani plerique: verùm surgens Diaconus quidam ex Ecclesia Muhallaca Abu-Aziz, cum alio Abulkeza, obstitit, negantes consentire se: alterum Neschelkelafet in conclave seducens, sententiam mutare persuasit. Cùm alter in oppositione sua persisteret, magno tumultu multis ad eum se conjungentibus, facta est relatio à Præfectis ad principem, qui selectos ex utraque parte ad se vocari præcepit: accersiti quoque sunt Archipapæ, seu Archipresbyteri duo, Misræ Bircat: Kahiræ Joseph: qui cùm venissent, utraque pars suum Archi-

presbyterum eligi postulavit, neque ipsis Sultani adhortationibus reduci ad concordiam potuerunt. Iterum proposita est fors : sed à plerisque rejecta. Totoque illo anno altercationibus consumpto, nihil actum est, etsi semel atque iterum parata omnia fuissent ad Davidis ordinationem, jamque Diploma Sultani signatum esset : at ille cum intellexisset eos qui ex illa factione non erant illum averfari, diploma revocavit. Dum perpetuò ad aulae atrium tempus tererent, omisâ etiam divinarum officiorum curâ, factum est ut eo anno Dominicâ Palmarum, Liturgia multis in Ecclesiis celebrata non fuerit. Omnia verò quæ ad has contentiones spectant, Autor noster qui interfuit, cum accuratè describeret, tæderet ea prosequi, cum nihil omnino nos doceant. Observabimus tamen horum tumultuum occasione vexatos à Principe, cetero-que Christianis non incommodo, Jacobitas : nam ex ipsorum mutuis delationibus cum accepisset satis amplam hæreditatem à defuncto Patriarcha forori relictam, quod secundum leges Christianas licebat, cum hæredem alium non haberet, ex Jure Muhamedano secundum quod mulieres mediam tantum partem bonorum capere solebant, reliquam veluti sisco debitam, vindicavit : ut etiam collectitiam pecuniam quæ ab Episcopis, Monachis, & Sacerdotibus exigi ad Patriarchæ usus solebat. Eâ occasione Archipresbyteri illi duo, cum Adelus ab ipsis quæreretur, quis annuus esset Patriarchæ redditus, eum quadringentos circiter aureos percipere retulerunt. Sultanus pecuniam illam quæ *Dinariet* vulgò vocabatur, ab aureo capitatim pendendo, exigi præcepit.

Anno sequenti vir quidam accusatus quòd verba quædam ad Muhamedismi professionem spectare judicata protulisset, mori maluit quàm fidem abnegare : corpus ejus ab igne in quem coniectum fuerat, illæsum, in Melchitarum Ecclesia sepultum est. An ipse ex ea Orthodoxa communione foret non prodit historicus.

Martyrium
cujusdam
Christiani.

David Sacerdos interea amicorum numero magno stipatus, in Ecclesia SS. Sergii & Bacchi sacra faciebat : cumque semel ad altare esset, jamque lectio Epistolæ Pauli facta fuisset, Sacerdos factionis alterius cum multis aliis in Ecclesiam irrupit, magnumque tumultum excitavit dum conaretur eum impedire ne officium prosequeretur, quamvis jam facta esset oblatio. Ille tamen Liturgiam SS. Cyrilli quæ eo die usurpabatur, & omne ministerium absolvit, magno Christianorum omnium scandalo, cum Præfectus

Tumultus
adversus Da-
videm.

Damiatæ
obsidio.

Misræ ejus causâ in Ecclesiam venisset; sellâque posita, usque ad finem Liturgiæ ibi permansisset. Eum in modum turbatis Christianorum Jacobitarum consiliis, nemo eorum qui ab una vel altera parte expetebatur, eligi potuit. Eodem tempore Franci magnis copiis Damiatam oppugnaverunt, tantusque omnes Ægyptios terror invalit, præsertim Misræ & Kahiræ cives, ut plerique de urbe reliquenda cogitarent, postquam ab hostili exercitu, maritima loca omnia vastata sunt. Coepit urbs obsideri mense Rabie primo anno Hegiræ 615°, qui respondet anno J. C. 1218°: quod tantum dolorem Adelo, qui toto ferme vitæ decursu prosperè adversus Christianos pugnaverat, attulit, ut tertio post mense, morbo quem ex tædio conceperat, succubuerit. Suscepit Ægypti regnum & præcipuam inter fratres plures Sultani dignitatem, Kamelus ejus filius qui dudum provinciam tanquam gubernator administrabat. Dum subsidia undique parantur, tam ad Damiatam liberandam, quàm ad Kahiræ defensionem, vexati multis modis Christiani, tum operas subministrare jussi ad urbem novis mænibus cingendam; quod tamen opus tumultuariè susceptum, interruptum est: tum omnes qui arma ferre possent, ad bellum prodire coacti: plerique datâ pecuniâ se redemerunt. Præfectus Kahiræ veteris, Sacerdotes Ecclesiarum convocavit, tam Melchitas quàm Jacobitas, & eos ad castra proficisci imperavit; utque eos magis terreret, dixit eos non perventuros ad portam urbis, cùm statim Muhamedani eos trucidaturi essent, neque id prohiberi ulla ratione posse. Hæc autem ejus verba Melchitas propriè spectabant, quos Muhamedani magis oderant, ob suspicionem amoris eorum erga Francos, ob rituum morumque similitudinem, circumcisionisque neglectum, & alia similia. Melchitæ terribili denarios aureos mille polliciti sunt, quos ut conficerent, vas argenteum ex Ecclesiæ ministerio pignori dederunt Muslemanno cuidam doctori, pro ducentis aureis. A Jacobitis, qui hoc loco ut alibi semper Coptitæ ad Melchitarum differentiam appellantur, imperata decem millia aureorum: tandem ad tria millia summa redacta est. Ea ut representaretur, cùm exhausti essent plerique, nec haberent, unde constitutam unicuique à Sacerdotibus pecuniam invenirent, omnibus Ecclesiis pro facultatum suarum modo, imò & monasteriis remotioribus, quid solverent constitutum.

Calamitas
Ægypti.

Magna inde per totam regionem calamitas, quæ Judæi quo-

PATRIARCHARUM ALEXANDRINORUM. 573

que communis fuit : major adhuc cum collectiſſima hominum circiter decem millium turba potius quàm exercitus, proficiſci cœpit. Nam odio adverſus Chriſtianos qui Damiatam premebant, omnes Eccleſias quæ in via occurrebant ſpoliaverunt, & multas diruerunt ; quod ſacrilegium citò vindicatum eſt, nam plerique dum Francorum caſtra oppugnabant, occiſi ſunt.

Paulò poſt everſa eſt Eccleſia S. Marci *Kamſcha* ; Sultani juſſu, qui verebatur ne cum eſſet in Alexandriæ ſuburbio, ædificiumque ſublime, eam Franci occuparent, eaque ad urbem oppugnandam, tanquam turre uterentur. Magnus ex ea deſtructione Chriſtianis dolor, qui major adhuc fuit, cum Muhamedani feriâ 6^a ſequentē poſt publicas preces ſuas, eo loci congregati, quidquid ſupererat ſolo æquarunt.

Eccleſia D.
Marci everſa.

Anno ſequenti qui erat Martyrum 936^o, Præſecti Kahiræ novæ & veteris, quantam potuerit à Chriſtianis pecuniam extorſerunt, coactique ſunt eadem & plura etiam in ærarium inferre, quæ Patriarchis pro ſua ſuorumque ſuſtentatione conferre ſolebant, etiam Miſræ & Alexandriæ, ubi ea jura locum antiquitùs non habuerant. Auſta quoque majorem in modum tributa ob neceſſarias ad bellum expenſas ; tantaque fuit publica calamitas etiam per annonæ caritatem, ut multi ſolum verterint, non pauci præ deſperatione mortem ſibi conſciverint, multi quoque fidem abnegaverint. Omnes enim mercatorum domus expolitæ erant licentiæ militari, qui omnia cibaria, & annonam prædabantur. Neque finis tot malorum fuit ante decennales inducias, quæ inter Francos Muhamedanoſque factæ ſunt, poſt captam Damiatam : quæ urbs ipsis ex pactorum conditione reſtituta eſt, cum ex diſſenſionibus inter Duces præcipuos, fractum inſignis illius victoriæ amiſerint, quam totius Ægypti acquiſitio conſecuta fuiſſet, ſicæ occasione Chriſtiani uſi fuiſſent.

Eo tempore injecta eſt mentio electionis Patriarchæ, multis Anachoretam illum ex Monafterio *Abiar*, qui inter candidatos nominatus fuerat, poſtulantibus : ſed cum Præſectus Kahiræ quingentos aureos præſcripſiſſet, ut ejus ordinandi facultatem obtinerent : nec ſolvendo eſſent, nihil effectum eſt.

Anno 942^o Martyrum, J. C. 1126^a, habitum eſt coram Sultano conſilium, præſentibus Judicibus : advocato etiam Melchitarum Patriarchâ : aliis verò Davidem filium Laklaci Sacerdotem, aliis Paulum Elbouchi petentibus, re adhuc infecta diſceſſum eſt. Eodem anno Emir ſiquidam Ebn-Siroûin miſſus eſt ad Monaste-

Conſilium coram Sultano de electione Patriarchæ.

ria Vallis Habib, inquisiturus de accusatione adversus Monachos instituta per nebulonem, qui ex eorum numero à fide defecerat. Præcipua capita erant, quòd multos nomine tenus Monachos haberent, qui eo pretextu immunes à tributis erant, quodque multis aliis in rebus fiscum fraudarent. Emir usque ulla iudicii forma Monachos verberari & torqueri tamdiu iussit, donec ab illis sexcentos aureos exigeret, quorum quadringentos repræsentaverunt, pro reliquis fidejusserunt. At cum Emir rediisset, pecuniamque Sultano obtulisset, Monachique de injuria apud eum questi fuissent, eam restitui illis imperavit, rarissimo justitiæ exemplo: Monachi ut gratum animum testarentur, pecuniam discolo impostam per totam urbem cum cereis circumtulerunt.

Sultani summa æquitas.

Nec minor Principis æquitas fuit, cum aureorum duo millia accipere recusavit quæ offerebantur ab amicis Davidis illius Sacerdotis, ut eum, Patriarcham ordinari juberet: vetuit enim ne id fieret, cum accepisset, alios qui ejus electioni se opponebant, in sententia sua persistere: parem verò summam pecuniæ ab illis oblatam reject, hortatus eos ad concordiam, quæ tamen iniri tunc nulla ratione potuit. Quamvis enim isti consentirent ut nomen Davidis inscriberetur schedulæ, & inter candidatos referretur, electioque secundum sortem Ecclesiasticam, de qua sæpè diximus, fieret; altera pars neque alterius electionem approbare, neque sorti candidatum suum exponere voluit. Interea qui Davidi adhærebant, tum alii quotidie Patriarchatum licitabantur, offerebantque ad minimum tria aureorum millia, quinque atque etiam decem millia; quæ tamen Sultanus acceptare recusavit.

Liberalitas Sultani erga Monachos.

Anno Martyrum 944^o Sultanus cum Alexandriam rediret, transivit per Vallem Habib, & à Monachis hospitio exceptus est, cum omni satellitio. Ipse ne liberalitate ab illis superaretur, dedit eis artabas tritici quingentas, farinæ trecentas, aut hordei: fabarum centum, pisorum totidem. Removit etiam ministerialem fiscalem qui ex consuetudine in Monasterio erat: tum diploma ipsis concessit, quo omnes qui Monasticam vitam proficiebantur à tributo immunes essent; cum eo etiam privilegio, ut Monachorum bona, si quæ relinquerent, ad Monasteria pertinerent, nullaque illorum hæreditatis pretextu quasi ad Sultanium pertineret, adversus Monachos actio à Divani fiscalibus posset intentari. Ea occasione questi apud eum sunt, quòd Patriarcham non haberent, & quòd octoginta & amplius Sacerdotum loco, qui in Monasterio

PATRIARCHARUM ALEXANDRINORUM. 575

S. Macarii esse solebant, quatuor tantum superessent : quia ordinare nemo poterat alios, qui defunctorum vice succederent. Respondit Sultanus benignè, ut quem vellent eligerent, daturumque se operam, ut is constitueretur Patriarcha. Excusaverunt Monachi se ratione paupertatis suæ, quia pecuniæ præscriptæ erant prius solvendæ, quam licentia Patriarchæ ordinandi concederetur. Ille præcepit ut ipsi communi consensu aliquem designarent, reliqua sibi curæ fore pollicitus, nec quidquam ab ipsis exactum iri : verum illa gratia frustra fuit, divisit ut antea per factiones sententiis.

Anno sequenti, qui fuit Martyrum 945^m, cum Sultanus abesset Ægypto, nihil perfectum est : tunc enim in Syria occupatus fuit recipiendis Legatis Imperatoris Frederici II, qui tunc in Syriam transfretaverat, tum in suis ad eum mittendis, quorum interventu pax inter Christianos Muhamedanosque sancita est, reditus Hierosolymis, sed præter templum, & pauca quædam ædificia dirutis : nam eam urbem ante annos aliquot, nempe Hegiræ 616^o, J. C. 1219^o, dirui jusserat Sultanus Damasci & Syriæ Moadham Isa Kameli frater, quem Sanutus & alii ex aliquo cognomine male *Corradinum* vocant. Reddita quoque est Christianis omnis Hierosolymitana ditio, Bethlehem, Lydda, Remla, usque ad Ptolemaidem & Jaffam.

Pax inter
Christianos
& Muhamedanos.

Anno Martyrum 449^o, plurimi Jacobitæ consenserunt cum Monachis sancti Macarii circa electionem Joannis filii Mutmen, Diaconi in Ecclesia Muhallacæ : cumque subscriptione voluntatem de eo suam confirmassent, annuit Sultanus, modò omnium consensus accederet : sed eadem discordiâ eos dividente nihil egerunt. Mirum sanè quod sub principe admodum facili, qui Christianos religionis causâ vexari non permittebat, tanta fuerit illorum obstinatio. Nam etsi Patriarcha nullus esset, liberam habebant officia quotidiana & solennia celebrandi facultatem : Ecclesias instaurabant, novasque ædificabant, prohibente nemine : Monachis concessa privilegia servabantur, neque ob hæreditates fiatarum apud se defunctorum, turbabantur. Christiani equis & mulis uti poterant : eadem quoque erat Judæis libertas ; omnes à suæ religionis magistratibus jus accipiebant.

Electio alterius irrita.

Anno tamen 451^o graviter vexati sunt Monachi à vestigalium exactoribus, nec immerito : multi enim juvenes habitum Monasticum induiti in urbibus aut pagis extra Monasteria versabantur,

nihil aliud quærentes, quàm ut à tributo immunes essent. Cumque eorum numerus magnopere crevisset, querelæque ad fiscales, deinde ad Sultanum delatæ fuissent, iussit illos omnes tributo subijci. Verùm ministeriales, atque inter alios quidam Ebn-Farmesini, qui Alexandriæ officium aliquod gerebat, omnesetiam veros Monachos, vehementer affixit, & ab illis plusquam mille aureos exegit. Statutum est ut nemo Monachorum privilegio gauderet, qui non verè habitum accepisset in Monasterio, aut qui in illo non commoraretur, tum ut priùs eorum nomina in album Divani referrentur.

Cyrillus
ordinationis
sue præcep-
tum obti-
net.

Tandem eo ipso anno satagentibus amicis, obtinuit David Sacerdos filius Laklaci præceptum pro ordinatione sua; Kahiramque veniens, inde Alexandriam profectus est, ubi Sultanus commorabatur ob aëris salubritatem; datæque aureorum mille syngrophâ, fœnori accepit illam pecuniam, tum duo quoque alia milia pollicitus est, præstanda intra menses duos. Itaque 22^a mensis Bayni ordinatus *Komos* seu Archipresbyter, sicut qui è Monachis assumebantur, ordinabantur Hegumeni. Dominica sequente in Ecclesia Salvatoris ordinatus est. Tum Sultano obsequium præstitit, à quo veste, torque & aliis insignibus ornatus, benignèque exceptus est. Maluit, ut videtur, princeps quacumque ratione imponi finem huic negotio quod à tantis annis Christianos exercebat, quam continuari inter ipsos discordiam: multi enim adhuc se istius hominis electioni opponebant, quæ ut oculatus testis narrat Autor noster; sed ea sunt ejusmodi, ut recitari prolixius necesse non sit, cum nihil nos doceant.

CYRILLUS
Patr. LXXV.

CYRILLUS FILIUS LAKLAKI, PATRIARCHA LXXV.

Cyrillus or-
dinatur.

IS est David Sacerdos ambitiosus ille, qui tantas per vicennium in Jacobitica Ecclesia turbas excitavit, ut Patriarchatum adipisceretur, quem demum, factionibus illicitis, pecuniâ, ambitu, malisque artibus consecutus est. Ut autem à plerisque in Monastice vitæ professione fieri solebat, ab aliquibus etiam in ordinatione observabatur, ut nova nomina assumerent, ita ille Cyrilli nomen accepit. Ordinatus est, ut diximus, anno Martyrum 951^a, J. C. 1235^o, qui respondet anno Hegiræ 633^a, qui 18^{us} Sultani

Sultani Kameli in Ægypto regnantis fuit : die Dominica 23^a, 22^{am} designat Abulbircat, quod fieri non potuit, quandoquidem Sabbatum erat, quo die ordinationes Episcopales, multo minùs Patriarchales, celebrari non solebant. Cùm ad Sultanium salutandum admissus fuisset, vesteque & muneribus ornatus, postero die processit ad domum filiorum Sokari, in qua caput D. Marci ante complures annos repertum fuisse ferebatur, ut superiùs dictum est. Sed ipse Autor noster testis est dubitatum jam fuisse de ista traditione, inter suos. *Dicitur enim*, inquit, *fuisse caput Petri Hieromartyris, quia caput Marci Evangelistæ erat cum ejus corpore, quando Rumei sive Græci illud Venetias asportaverunt.* Insigne sane est Autoris non suspecti testimonium, quo Venetorum communis opinio, à majoribus accepta confirmatur; cùm hujus translationis historia obscurissima sit. Eandem traditionem reperimus apud Abulbircat, qui de D. Marco loquens ait *corpus ejus sepultum in Ecclesia Orientali ad maris latus, ibidem per annos multos quievisse, donec Franci quidam Veneti per fraudem illud abstulerunt Venetias, ubi huc usque servatur. Caput ab illis relictum, depositumque fuisse in domo filiorum Sokari, ubi adhuc erat.*

Traditio de
S. Marci reli-
quiis.

Delatum est in publica supplicatione caput, & arca juxta consuetudinem novo operimento tecta. Novus Patriarcha statim profectus est ad Monasterium S. Macarii ibi proclamandus : atque multos Sacerdotes & Diaconos ordinavit : alia Monasteria visitavit : & multas Ecclesias in regione maritima : tum Misram reversus est, substititque in Ecclesia S. Michaelis, quæ erat ad caput Incilis, seu Aquæductus, quo aquæ Nili effunduntur in Nilometrium. Inde stipatus infinita hominum multitudine, qui ad spectaculum undique convenerant, Judæorum etiam & Muhamedanorum, urbem ingressus est, & ad Ecclesiam Muhallacam processit. Præferebantur cruces, & Evangelia : Sacerdotes & Diaconi procedebant juxta ordinem suum : optimates Jacobitarum equis vecti, tympana, buccinæ, tibix, centumque funales cerei. Postea cùm in Ecclesiam advenisset, in throno collocatus est ; celebrataque Liturgia, in qua lectum est Evangelium Pastoris boni, in Patriarcharum inauguratione legi solitum : quod se explicasse, hoc est concionem de eo habuisse, Autor hujus historiæ scribit. Offensi hac ambitiosâ pompâ Muslemanorum doctores, querelas ad principem detulerunt, quòd cruces publicè coram Mescitis prælatæ essent : sed hæc eum non commoverunt ; ve-

Dddd

rùm excitatis ad tumultum, injuriamque Christianis inferendam pueris, & turbâ promiscuâ, abstinuit à publico Cyrillus; neque ad festum S. Mercurii, quod in ejus Ecclesia celebrabatur, venit; quamvis præfectus urbis, stipatores misisset: solennitatem secundo die celebravit.

Simoniam
exerceat.

Cùm multos Sacerdotes & Diaconos ordinasset, expectareturque ut Simoniam exerceret occasione pecuniæ quam fisco debebat, nihil tamen exegit: imò in capitalis illius pensionis, quæ Patriarchis debebatur, distributione neminem gravavit, sed singulis imposuit, quod secundùm facultates suas solvere poterant. At cùm omnes fermè sedes Episcopales vacarent, ubi novos Episcopos ordinare cœpit, nullum nisi pactâ pecuniâ ordinavit, præter Damiatæ Metropolitam, qui olim ex Syria venerat, ejusque contubernalis fuerat in Monasterio S. Philothei; tuncque Monasticam vitam professus erat. A reliquis ducentos aut centenos aureos exegit: à pauperioribus quinquagenos, atque ita Sacerdotes & Diaconos pretio pacto instituit: imò & quosdam natos ex secundis & tertiis nuptiis, quod apud Orientales nefas habetur. Hæc impudenter & absque ulla hominum reverentia, cùm perpetrasset, piorum omnium à se animos alienavit, adeo ut Petrus Monachus & Neschelkelafet Senior aliique ab ejus consortio se subtraxerint.

Ordinatio-
num multitu-
do.

Ordinavit in hunc modum Episcopos ante Quadragesimam, plusquam quadraginta; Sacerdotes & Diaconos innumeros: atque ita tria aureorum quæ fisco debebat millia brevi tempore collegit: paulò post tamen moderatior fuit, vota tantum, oblationes, fructusque suscipiens. In Ecclesiam S. Sergii Misræ non ingrediebatur, propter Seniore Neschelkelafet, qui cum eo nullum commercium habebat: & cum auctoritatem in ea Ecclesia haberet, patiebatur quidem nomen Patriarchæ commemorari in Liturgia & precibus, verùm dicebat facere se id Sultani reverentiâ; neque enim habere se pro Patriarcha cum qui Patriarchalem dignitatem emisset.

Cyrillus in-
creparur, à
suis Jacobi-
tis.

Anno Martyrum 953°, J. C. 1237°, congregati primores Jacobitarum Cyrillum adierunt in Ecclesia Muhallaca, gravissimèque illi exprobraverunt quòd Ecclesiam everteret, canique omnium ludibrio exponeret, per flagitiosam pecuniarum pro ordinationibus exactionem. Excusavit ille se quòd aliunde sibi non suppeteret quidquam, unde pecuniam Sultano promissam præ-

stare posset. Illi verò acrius in eum inveci, rogaverunt quo titulo eam pactus fuisset : se nullam in ejus electione partem habuisse : illum verò ambitione & malis artibus eam dignitatem quælivisse, & post annos viginti emisse. Post multa, jurjurandum ab eo exegerunt, quo se obligaret, ut statim atque Sultano reliquam pecuniam debitam persolvisset (erant autem residui auri trecenti), simoniam tolleretur : scriberet ad Episcopos, ne ipsi pro ordinationibus quidquam acciperent : utque ordinationes eorum qui ex secundis & tertiis matrimoniis nati erant, prohiberet. Hæc omnia factorum se interposito juramento pollicitus est, sed nihil præstitit.

Eo circiter tempore ruptis aggeribus, Nilus magnam partem hortorum Ecclesiæ quæ erat in Insula Misræ, inter urbem novam & veterem, inundaverat ; atque ut damnum majus præverteretur, jussit Sultanus, ut iis in locis aggeres repararentur : qua occasione Cyrillus Ecclesiam quæ collapsa erat, ex integro ædificavit. Deinde solenniter in ea Liturgiam celebravit ; atque in Throno constitutus, *Prologum* seu Orationem Procemii, quæ prima est, pronuntiavit : sed simul, ut expensas aurorum amplius mille in ædificando factas compensaret, Episcopo Gizet hanc Ecclesiam, quæ in ejus Dicecesi sita erat, eripuit ; eamque Patriarchalem, hoc est à jurisdictione Episcopali immunem, constituit. Ita quoque jurisdictionem super omnia Ægypti Monasteria ad se transtulit, eaque Patriarchalia fecit, Episcopis tantummodo relinquens auctoritatem in Ecclesiis urbanas, aut quæ Monachos non haberent.

Ecclesias &
Monasteria
Cyrillus sibi
reservat.

Deinde Metropolitam Hierosolymorum ordinavit, multis reclamantibus ; neque enim licere dicebant, ut in territorio alieno, quod ad sedem Antiochenam spectabat, Alexandrinæ conjunctissimam, Episcopum ordinaret : esseque id non minùs contra veterem consuetudinem, quàm contra Canones, qui Dioceseon limites definiverant. Verùm ille rationes illas insuper habens, novum illum Metropolitam misit Hierosolymam, attributâ illi in omnem provinciam auctoritate. Cùmque instaret Paschalis solennitas, advenierunt in eam urbem Ignatius Patriarcha Syriarum, hoc est Jacobitarum, Antiochenus, & Patriarcha Armenorum. Ut adventum Syriarum Patriarchæ Cyrillus audiit, munera ex Ægypto ad eum misit per Episcopum Khandekæ, & unum ex Misræ Sacerdotibus. Illi ad Metropolitam à Cyrillo ordinatum dixerunt.

Ordinat Me-
ropolitam
Hierosoly-
mis.

D d d d ij

terunt : & postea Patriarcham Syriarum salutatum iverunt ; muneraque obtulerunt , quæ latus accepit , monens , tamen Alexandrino Patriarchæ nihil juris esse suis in Diocæsisibus : tum illos ut apud se hospitarentur invitavit . Cùm tenueretur Episcopus negaretque posse se id facere absque Metropolitæ licentia , Syriarum Patriarcha , munera Cyrilli ad illum remisit : Metropolitamque excommunicavit , nec Episcopum postea in conspectum suum admisit . Metropolita auxilium à Francis petiit , quorum autoritate confirmatus dignitatem retinuit , & in Coptis eorumque Ecclesias plenam jurisdictionem obtinuit . Vulgò ferebatur eum subscriptione sua testatum ipsis fuisse , quòd eandem fidem , eandemque doctrinam quam illi , profiteretur . *Ea enim* , inquit Autor , *ipsorum consuetudo est , ut neminem prorsus sibi adjungant , nisi postquam id fecerit* . De hoc novo Metropolita superius dictum est : videturque quantum colligere ex variis Itinerariis antiquis & recentioribus possumus , hinc originem habuisse nova illa & olim inaudita apud Jacobitas Ægyptios Hierosolymorum Metropolis . Nam ab illius institutione quæ tentata olim , tunc verò consummata existimanda est , originem habuere Antistites , qui Coptis ad hanc usque diem in urbe sancta præfuerunt .

Cyrillus in
carcerem
conjectus.

Anno Martyrum 954^o , accusatus apud Divani Judices Cyrillus , quòd fisco satisfaciendi prætextu , usque ad novem aureorum millia ab Episcopis , Sacerdotibus & aliis quos ordinaverat , aut à Monasteriis & Ecclesiis corrasisset ; mille aureos pendere coactus est , tum alios quingentos , accusante primùm Monacho familiari quondam suo , qui ad eum Patriarcham constituendum plurimùm contulerat . Mortuo Sultano Kamelo anno Hegiræ 635^o , J. C. 1237^o , successit filius Adel ejusdem cum avo nominis , apud quem iterum accusatus est Patriarcha , agente præ cæteris Monacho Hamado Echmimensi , qui de pecunia pro Patriarchatu cum Kamelo pactus fuerat ; tandem literæ ad Præfectum Alexandriæ missæ sunt cum mandato principis , ut Cyrillum Hamado traderet : adducti sunt quoque Episcopi Demnhuræ , & Fuzæ , & alii quorum testimoniis ita pressum iri illum adversarii ejus judicabant , ut sententia depositionis pronuntiari adversus eum posset . Ita Cyrillus dum Ecclesiâ exiret post nocturnas preces , comprehensus & cum sociis in carcerem conjectus est : & quia Alexandrini in eum propensiores erant , patique noluerunt ut in ea urbe conventus Jacobia-

rum ageretur, Kahiram cum discipulis duobus & Secretario ductus est, & in arcis carcerem missus: unde tamen eductus est amicorum intercessione, & in Ecclesia *Haret Züilet* habitare permixsus. Ibi accusatores ejus pacem ipsi obtulerunt, pollicentes nihil se facturos amplius ad eum deiciendum, modò pactis subscriberet, quæ ipsi proposuerunt.

Præcipuæ conditiones fuerunt, ut nullam quocumque prætextu ordinationem faceret pro pecunia: ut nihil innovaret adversus jura Antiocheni Patriarchæ; sed Metropolita nuper Hierosolymis institutus, ultra Gazam quæ erat limes domini Ægyptiaci, nullam auctoritatem usurparet: ut ordinatos qui nati essent ex secundis vel tertiis nuptiis, deponeret, non minus quàm eos qui servilis conditionis erant: ut communem Coptitarum habitum usurparet, neque Melchitarum imitaretur: ut redditus Ecclesiarum juxta destinationem suam impenderet in earum ædificationem, instauracionem & ornatum; reliqua in pauperum curam: sicque de pecuniis quæ quocumque titulo, nomine Patriarchæ colligebantur, reservatis tantummodò quæ ipsi ad vitam erant necessariæ, nempe quindenis per mensem aureis: ut quando ad opera publica, ut eo tempore sæpius factum est, Christiani cogerentur, pauperiores quantum fieri, poterat sublevaret: Sacerdotes eximeret ab eo labore, qui servis proprius erat: (nempe quia paulò antè, cùm ad Nili aggeres reficiendos, omnes cujuscumque religionis operas dare cogerentur, coacti erant Ecclesiarum Sacerdotes, magno suo incommodo, in hoc opere servili laborare;) ut quotannis ex pecunia Ecclesiæ centum artabas farinæ emeret ad sustentationem Monialium, quarum Monasterium erat prope Ecclesiam Muhallacam Misræ: denique ut ab actis haberet Episcopum aliquem seniore, probatum. Hæ conditiones perscriptæ ad eum missæ sunt, cùmque ei prælectæ fuissent, nihil respondit. Unde Hamad Monachus vehementius instare apud principem cœpit, ut permetteret haberi Synodum, in qua Patriarchæ causa judicaretur: sed nihil effecit. Imò amicorum Cyrilli opera in carcerem ductus, & verberatus, fuit aliquamdiu in magna calamitate, & prope periit. Tandemque die festo S. Mercurii, libertati restitutus Patriarcha, festum in ejus Ecclesia cum magna pompa celebravit. Inde ad Sultani conspectum admixsus, cum muneribus quæ benignè accepta sunt; in auctoritate magis quàm antea confirmatus, plenam securitatem nactus est. Hamad Monachus ejus accusator, cùm syngropham aureo-

Conditiones
illi propositæ.

Synodus à
Jacobitis pos-
tulatur ad ju-
dicandum Pa-
triarcham.

rum quatuor millium & octingentorum à se subscriptam dedisset; tanti enim reperundas à Patriarchæ ministris pecunias æstimaverat, amicorum ope præsertim Cheic-el-Seni Monachi ad S. Sergium, liberatus est, & nexu solutus.

Episcoporum conventus.

Anno Martyrum 955°, J. C. 1239°, cum querelæ adversus Patriarcham non conquiescerent, conveniunt ex regione maritima Episcopi quatuordecim, qui congregati Misræ in Ecclesia *Haret Zuilet*, multis cum eo sermonibus habitis, tandem testati sunt, se cum eo ad concordiam redituros, modò certis capitulis subscriberet, quibus reformationis capita necessaria continebantur. Consensit tandem Cyrillus; postquam illa ex communi consensu descripta fuerunt, appolito in summa exemplaris margine signo suo, tum subscriptione eorum facta, hæc verba adjecit: *Subscribant fratres Episcopi, quibus Deus benedicat ut & sedibus & populis eorum, ad testandum consensum suum super hoc scripto, omnibusque in eo confirmatis, circa fidem, bonos mores, & consuetudines Ecclesiasticas: qui ea prætergressus fuerit, sit anathematisatus & rejectus sententiâ Trinitatis sanctæ, Patris, Filii & Spiritus sancti, & cccxviii. Patrum Nicænorum, sive sit Patriarcha, sive Episcopus, sive ego, sive Episcopi mei, non sit ei pars cum fidelibus: quod Deus avertat.*

Capitula constituta ad reformationem Ecclesiæ Alexandriæ.

Quia porro hoc instrumentum alicujus in Historia Ecclesiastica momenti est, idcirco illud paulò fusiùs à nobis referetur. In his igitur Capitulis, quæ deinde relata sunt in Codicem Juris Canonici Coptitarum Collectionis, quæ extat in Bibliotheca Segueriana, & aliis exemplaribus, præmissa fuit fidei Confessio, nempe ea quam stabilitam habemus in Concilio Nicæno, tum in Constantinopolitano & Ephesino; nam alia Jacobitæ non recipiunt: tum etiam quæ tanquam fidei fundamenta tenentur in Ecclesia Jacobitica, tanquam per traditionem accepta à S. Cyrillo, tum à Severo & Dioscoro, quorum doctrinam ut fidei Orthodoxæ regulam sequi se profitentur. Eam sic paucis exprimunt: *Quod Christus Deus homo factus, sit una natura, una persona, una voluntas: quoddam sit Deus Verbum: simulque homo natus ex Maria Virgine, atque ita verè ipsi conveniant attributa omnia & proprietates, tam divinæ quàm humanæ nature.*

Sequebatur alia professio de observatione eorum, quæ tam sacris literis quàm Canonibus Apostolorum continentur, & Conciliorum receptorum in Ecclesia Jacobitica, ut etiam earum con-

ſuetudinum quæ uſu apud Coptitas confirmatæ forent. Quæ verò ſingularibus ſtatutis noviter editis, comprehenſa fuerunt, hæc ſequuntur.

Ut nemo deinceps ordinaretur Epifcopus, niſi doctus, ut nec abſque plebis conſenſu, de quo conſciſci deberet Pſcphiſma, ſive Inſtrumentum publicum, quo conſtaret electionem ejus factam & probatam Epifcoporum, Cleri, Monachorum, & primariorum Laicorum ſuffragiis. Ut nihil acciperetur pro ordinatione, non modò Epifcopi, ſed neque Preſbyteri, aut alterius cujuſcumque Eccleſiaſtici. Ne qui judiciis Eccleſiaſticiſ præſidebant, munera quocumque prætextu acciperent; qui contra feciſſet, excommunicaretur.

Ut Patriarcha ex doctiorum aliquot Epifcoporum conſilio, fieri curaret compendium Canonum de rebus licitis & illicitis: præſertim circa cauſas matrimoniales, & hæreditates: tum ad Sacramentorum rectè adminiſtrandorum ordinem: exemplar verò primarium Patriarcha ſubſcriptione ſua confirmaret, ſimul cum Epifcopis; diverſaque exemplaria in Eccleſiis ad futuram memoriam conſervarentur: ſi quæ judicata fuiſſent contra præſcriptas in illo compendio regulas, ſententia irrita foret.

Ut Epifcopi quotannis ſemel convenirent apud Patriarcham hebdomadâ 3^a poſt Pentecoſten. Ne mutarentur conſuetudines receptæ in Eccleſia Coptica: ut circumciſio ante baptiſmum fieret, niſi cùm neceſſarium impedimentum occurreret. Ne ordinarentur nati extra legitimum matrimonium, aut ſervilis conditionis homines, exceptis tamen captivis ex Æthiopia & Nubia, ſi præclaris moribus commendarentur, Sacerdotioque digni judicaretur: qui verò præterquam in captivitatem abductus, ſervitutum ſerviſſet, aut natus ex meretrice, tandemque muliere *non coronata*, hoc eſt quæ benedictionem conjugalem non ſuſcepſiſſet, ab omni Eccleſiaſtico gradu in poſterum excluſeretur, non minus quàm natus ex muliere multinuba, & quæ virgo ducta non fuiſſet. Prohibitum etiam fuit ne Coronatio, ſive nuptialis benedictio, extra Eccleſiam ſecretò, atque in privatis domibus celebraretur, abſque Euchariſtia, hoc eſt Liturgiæ celebratione. Nemulieres menſtuatæ in Eccleſiam introirent. Ut Secretarius Patriarchæ aſſumeretur aliquis Epifcopus, aut quiſpiam alius rerum peritiâ & experientiâ commendatus. Statutum pariter, ut peteretur ſubſcriptio Meuopolitæ Gaze de ejus conſenſu circa fidem Eccleſiæ

Jacobiticæ, tum circa susceptionem Conciliorum quæ in illa suscipiuntur, aliorumque rejectionem: quod si recusaret, deponeretur. Ut Metropolita Damiatensis eum quem tunc habebat dignitatis gradum retineret, juxta consuetudinem decessorum suorum. Ne Patriarcha, vel Episcopi quemquam ordinarent extra Dioceses suas: neque ullus ordinaretur Episcopus nisi ex consensu populi suæ Diocesis, aut saltem majoris partis, & Episcopi qui eum ordinasset: neque Episcopus Sacerdotem aut alium Ecclesiasticum reciperet, nisi consentiente proprio ejus Episcopo, etiam si apud alterum maneret. Qui verò à propria Ecclesia, aut urbe in aliam absque necessaria causa transfiret, ab utraque excluderetur.

Ut Patriarcha neminem ex Diocesi alicujus Episcopi excommunicaret, nisi ex causa legitima & canonica, postquam apud eum constitisset, officio suo Episcopum defuisse: tuncque Patriarcha eum moneret, ut talem excommunicaret; ipse verò id faceret, si absque causa eum excommunicare Episcopus renueret.

Ne liceret etiam Patriarchæ absolvere eum qui à proprio Episcopo excommunicatus foret, nisi postquam constitisset illum injustè excommunicatum. Tunc scriberet Episcopo semel atque iterum: non obedientem accerseret, & inter utrumque ex legum Ecclesiasticarum præscripto, jus diceret.

Ut qui in aliqua sede constitutus fuisset Episcopus, autoritate in integram Diocesin suam gauderet, neque aliqua urbs auxiliorum ipsi subtraheretur, & illis etiam limitibus se contineret, quos habebat Diocesis, quo die ipse ordinatus fuisset.

Ut pensio annua quam ex Monasteriis ad Patriarchæ jus pertinentibus Episcopi exigebant, non per vim & ultra facultates exigeretur, sed tanquam benedictio seu elemosyna acciperetur.

Ne Patriarcha cogeret Episcopum ad illius ordinationem qui populo aut majori ejus parti indignus judicaretur, aut quem ipse Episcopus nollet, Daret etiam operam ut ipse cum Episcopis consentiret, circa res permittendas aut prohibendas.

Ne Patriarcha sibi vindicaret ea quæ in Ecclesiis offeruntur diebus festis, & certis temporibus pro locorum consuetudine; verum ea forent sub dispositione Episcopi, nisi consensisset ante ordinationem suam, ut ejusmodi fructus cederent Patriarchæ loco

loco pensionis ordinariæ, à sua sede, vel à Monasteriis ei subjectis perfolvendæ.

Ne monachorum accusationes adversus alios monachos temerè recipiantur, antequam causa testimonio plurium fide dignorum accuratè discussa fuerit. In ejusmodi autem causis dijudicandis, non adhibeantur Laici, sed præcipui præpositi Monasteriorum; adjunctis, si necesse est, Laicis, scientiâ & peritiâ commendatis. Ne Monachi absque necessitate Monasteriis suis egrediantur.

Ne Episcopus pro causis levibus excommunicetur, sententiâ emissâ ex Patriarchio: quòd si quidquam atciderit, unde eam poenam mereatur, Patriarcha unas & alteras ad eum literas scribat, quibus eum de officio suo commonefaciat: postea ad se venire jubeat, & defensionem ejus audiat, antequam illum, si ita fieri oportet, excommunicationi subiciat.

Hegumenus ejusdem ordinis est, atque Archipapas Sacerdotum, seu Archipresbyter; atque adeò jus habet pronuntiandi Orationem absolutionis, super Sacerdotem celebrantem, ut etiam adolendi incensum post eum, & communionem accipiendi post eum, ante omnes alios. Quando simul adest Episcopus, accipit ab eo thuribulum. Hæc omnia pertinent ad ritus Liturgiæ, ubi pleraque explicata reperiuntur.

Vetitum tandem, ne quis fidelium excommunicaretur, ea ratione quod ad aliam Ecclesiam alicujus festi causâ extra Diocesin proficisceretur. Hæc inquit Autor pauca ex multis se collegisse, cum ipsum instrumentum prolixissimum foret; signatum autem fuit 6^æ mensis Toth, anno Martyrum 955°, qui respondet anno J. C. 1239°. Extat integrum in multis codicibus. Facta etiam est compendiaria Canonum Collectio de rebus spectantibus ad causas matrimoniales, contractus, hæreditates, cujus varia exempla facta sunt, manu Patriarchæ & Episcoporum subscripta. Extat quoque illa in Codice Seguieriano & aliis, ejusque titulos refert Abulbircat, à quo etiam docemur in ea Collectione componenda præcipuam navasse operam Sasi-el-Fedail Ebnaßalum dictum, alterius Theologi fratrem quorum testimonio sæpius in hoc opere nostro usi fuimus. Cum vero hujus loci non sit pluribus has Constitutiones explicare, id enim majoris operæ foret, observabimus tantum modo nihil in illis, aut earum Epitomis contineri adversus Confessionis sacramentalis usum & necessitatem quam tantopere

Joannes Patriarcha 72^m & Marcus filius Zaráæ 73^m labefactaverant. Imo cum duo fratres Ebnassali, primus in Opere Theologico *Collectionis fundamentorum fidei*, alter in Canonum Epitome per locos communes, eam validissime stabiliant, inde sequi videtur id quod alibi probatum est, antiquam disciplinam, omiffa nugaci illa super thuribulum confessione, vires resumiffisse, cum deinde tam multa occurrant luculentissima pro Confessionis necessitate testimonia, quæ Michaelis Damiatensis & aliorum qui eam impugnabant argumenta prorsus evertunt.

Ebnassali
duo.

Hoc etiam ex loco discimus vixiffe illa ætate duos illos insignes Theologos, quorum præter nomina & opera, dignitatem aut historiam planè ignoramus. Primus autem, Autor est docti sanè voluminis sub titulo *Collectionis fundamentorum, sive Principiorum fidei*: in quo non modo veritatem religionis Christianæ propugnat, adversus Ethnicos & Judæos, sed etiam ex Philosophicis rationibus everrit præcipua Ethnicæ superstitionis capita: tum probat Trinitatis Myfterium, veritatem Incarnationis Dominicæ, & omnia fidei Myfteria de quibus inter omnes Christianas societates consensus est. Ubi vero ad unionis duarum in Christo naturarum explicationem devenit, Jacobiticam unius naturæ opinionem confirmare conatur, rationibus & autoritatibus. Nestorianorum & Melchitarum sententias propriis Autorum utriusque communionis verbis refert, quas deinde refellere aggreditur. Hac in Theologiæ parte tractanda magnam operis sui partem impendit. Deinde de aliis fidei aut disciplinæ capitibus fuse disserit: atque id habet commodi, quod autorum qui vel interciderunt, vel quorum libri ad manus nostras non pervenerunt, testimonia referat, ex quibus perspicuè eorum sententiam intelligere licet.

Alter edidit Canonum Collectionem, in qua sub diversis titulis refert, non modo Canones Conciliorum veterum, sed eos qui vel Apostolis, vel Nicænis Patribus attribuuntur: tum etiam responsa SS. Patrum, quo titulo multa extant apud Orientales, nec contemnenda canonice disciplinæ syntagmata, quæ æqualem auctoritatem habent: tandemque Constitutiones diversorum Patriarcharum Alexandrinorum. Extat id opus in variis Bibliothecis.

Res Muham-
medanz.

Ut tandem ad res Christianorum revertamur, turbato regno tum per bella civilia inter principes, tum etiam ex aliquot Emirorum Arabumque rebellione, magna in Christianos plebis info-

lencia fuit. Nam diu in Ecclesia Muhallaca celebrari officia divina non potuerunt, eo quod vicinam Meschitam Musulmani tanquam arcem adversus Ecclesiam habentes, inde supra tectum ascendebant, eorumque præcones, clamores edebant quibus plebem ad tumultum concitarent: tandemque adductis mensoribus judicatum est muri partem quam Meschitæ vindicare conabantur, ad Ecclesiam pertinere.

Successerunt Zelotæ quidam duce viro ignobili, qui absque ullo principis mandato quoscumque Christianos absque zona inveniebat contumeliosè tractabat eos verberans, aut capitis fascia eos cingens, jumentis quibus veliebantur dejiciebat. Cumque plebs eum imitaretur, tanta fuit adversus Christianos insolentia ut quidam eam impatienter ferentes fidem abnegaverint. Ea autem causa fuit præcipiendi Christianis, ut sæpe antea factum fuerat, ne in publicum absque zona prodirent, neque haberent dedecori Christianæ professionis notam, quam idcirco complures Theologi multis ex scriptura locis magnopere commendant.

Tumulus
adversus
Christianos.

Severus de
exercit. Christi.
lib. 4.

Nec multum temporis elapsum est quando novus adversus Cyril- lum tumultus excitatus est per Hamadam cognomine El-Murschar Diaconum, qui in illo ad Patriarchalem dignitatem promovendo, calcarâ Ecclesiasticâ disciplinâ, præcipuas partes habuerat. Is enim à Sultano continuis precibus postulavit, ut causam apud congregatos Christianos & qui reperiri possent Episcopos dicere cogeretur, adstantibus selectis Muhamedanorum magistratibus. Magna simul invidia laboravit apud suos Patriarcha, occasione quadam ridicula, quæ tamen seria in mala desuit. Cum in Ecclesiam Muhallacam Misræ venisset, ad quam diu non venerat ob illas cum vicinæ Meschitæ ædituis contentiones, & illic Monialem benedictione & precibus Deo consecraturus esset, jamque intra Ecclesiam procederet, prælatis cereis, & Sacerdotibus laudes ejus, ut per summam vanitatem pariebatur celebrantibus, vir quidam emotæ mentis qui latebat in tabulato superiori, vocibus multitudinis excitatus, è fenestra prospiciens inclamavit, ut illum ejicerent, multaque adversus eum contumeliosa verba protulit. Ille vero hominem arripi & tam crudeliter verberari jussit, ut miser ille sanguine respersus, magnis clamoribus ad Præfectum de vi conquestum iverit: atque urgente Hamado Diacono statim in ipsa Ecclesia captus Cyrillus ad Emirum Saremm ductus fuerit, & in ipsius domo custodiæ traditus: moxque diebus aliquot exactis trans-

Accusatio-
nes adversus
Patriarcham.

laus in domum scribæ Christiani qui erat ex illius Emiri ministerio. Paulò post convenire iussi sunt primores Christianorum presentibus Kadiis sive iudicibus, apud Emirum Saremum adductusque Patriarcha & accusator ejus Hamad; aderantque cum Patriarcha Jusab sive Josephus Episcopus Fux, & Joannes Episcopus Fiumensis, qui cum eo capti fuerant. Interrogati sunt autem de simoniacis pecuniarum exactionibus pro ordinatione, negaveruntque se scire quidquam, quippe illos gratis ordinaverat. Ita res quamvis notissima, probatu impossibilis evasit, cum tamen ad ducentos aureos à plerisque exegisset, ad minimum quinquaginta à tenuioribus, præter munera quæ ejus ex fratre nepoti dare coacti fuerant. Post multa, cum alii ipsum testimonio suo absolverent, alii accusationem Hamadi confirmarent: quosdam testes quasi suspectos sibi rejiceret, & alios etiam, quia non ea erant dignitate ut contra Patriarcham suum audiri deberent, iudices interrogaverunt an si duo Episcopi testarentur eum pecunias pro ordinationibus exegisse, vellet jurejurando se purgare ab objecto sibi crimine. Respondit se depositioni subjacere, si hæc à duobus Episcopis accusatio adversus eum institueretur: verum quidquid tandem de se futurum esset, non commissurum, ut rem illicitam perpetraret jurando, quod Patriarchæ non licebat: tandemque post multas altercationes constitutum, ut si duo Episcopi testarentur, pro alicujus ordinatione exactam fuisse pecuniam, deponeretur. Quærentibus dein iudicibus, num aliqua adversus eum haberent accusationis capita, accusavit eum Hamad, quod Metropolitam Hierosolymis & in regione quam Franci obtinebant ordinasset, qui Coptitas à fide sua abduceret, qui prohiberet circumcisionem, & conjugia quædam inter propinquos licita ex eorum communi consuetudine. Adiciebant, fuisse inter illam & Francos literarum frequens commercium, imo & ad eos ivisse Ptolemaiden. Respondit se ordinasse Metropolitam Gazæ, quæ tunc erat in Egyptiaca ditione, nihil amplius ei præcepisse; more majorum eum ordinasse: si quid ultra fecisset, se alterius crimine nequaquam teneri; cumque instarent alii, præcedentes Patriarchas nihil tale fecisse: respondit eorum tempore fuisse Hierosolymis Sacerdotes Coptitas: at inquebant ejus adversarii tunc urbs erat in Muhamedanorum potestate: aliudque erat Sacerdotes, aliud Metropolitam ordinare. Tum questi sunt quod is quem Cyrillus constituerat, cum Francis frequens haberet commercium, quod-

que fidem eorum profiteretur. Objecta quoque sunt alia & testibus probata, nihil tamen actum est, cum magna in illo confesso foret sententiarum diversitas. Multi consultius existimabant ut congregarentur Episcopi cum Laicorum primoribus, atque inter eos disquireretur, quænam essent necessaria reformationis capita: postea moneretur Patriarcha, ut leges Ecclesiasticas non violaret: id si fecisset, consecuturos facilius id quod frustra huc usque interposita principis autoritate tentatum fuerat: si eorum monita contemneret, oportere ut nulla deinceps in Liturgiis fieret ejus nominis memoria. Ita dum quæ aliis placebant alteris displicerent, re infectâ discessum est, Patriarchaque libertati restitutus, ita tamen ut trecentis aureis multatus fuerit: aucta etiam est vehementer, inter illum Jacobitasque discordia.

Paulò post cum ad solennitatem Dominicæ Palmarum celebrandam venisset ad Ecclesiam S. Georgii, Sacerdos eidem præpositus Senihet frater Cheic-el-Seni, quique officium in Divani ad ærarium spectantis ministerio habebat, persuasit ut ad pacem conciliandam, quædam ipse per se non coactus præstaret, quæ piis viris satisfacerent, eosque sibi adjungeret. Scripsit igitur dispositionem fructuum Ecclesiarum de quorum mala administratione incusabatur, quæ statuebatur, ut ea Sacerdoti alicui probo, & perito quem publico consensu eligerent, committeretur, qui illos quatuor in partes distribueret: prima in ædificiorum reparationem impenderetur: secunda in sumtus necessarios quotidianos, pro luminaribus, oblationibusque: reliquæ duæ in pauperum sustentationem, Ecclesiæ vero præposito ne drachma quidem ad proprios usus concederetur. Pollicitus quoque est se ordinaturum Episcopos Misræ seu Kahiræ & Khandekæ, quas sedes proprii compendii causa vacuas relinquebat: aliis quoque vacantibus daturum eos Episcopos quos Dioecesani approbarent, & quorum fama publico testimonio confirmaretur: constituturum Magistros seu Doctores duos, unum Misræ, alterum Kahiræ, à quo Laici officia sua doceri possent: quique literas sacras interpretarentur. Consensit etiam ut quæ Monasteria sibi gubernanda reservaverat, ea manerent sub Episcoporum autoritate, modo præcipuis Monachis ita videretur: eâ tamen conditione ut annuam pensionem quæ Patriarchis præstabatur, Episcopi repræsentarent, tum ut duos Episcopos assumeret, ex quorum consilio judicia, omnesque alias res Ecclesiasticas administraret. His capitulis cum subscripsisset

Concordia
intra certis
conditionibus.

Eccc iij

Patriarcha, ea Senihet ad fratrem suum detulit, qui cum aliis quibus curæ erat reformatio Ecclesiarum, multa deesse judicavit. Itaque inimicitia sopita non fuerunt, & statim post solennitatem Paschalem magis exarserunt.

Nova ad-
versus Cyril-
lum accusa-
tio.

Et quippe ipso anno qui erat Martyrum 956^{us}, J. C. 1240^{us} Sacerdos Alexandrinus Elmakinus cognomine Ebn-Elbiha, quem Patriarcha collectorem suum in tractu maritimo instituerat, & quem inter familiarissimos habuerat, offensus illius avaritiâ & pertinaciâ, querelam ad Emirum primum detulit, tum quod Patriarcha diceret Emirum postquam magnam ab eo pecuniam extorsisset, cum tamen omni auxilio destitutum relinquere: quod adversarios suos non compesceret: tum quasi amice monuit, periculum esse ne si Sultanus resciret, solutum re infecta confessum quem haberi jussisset, ut causa Patriarchæ cognosceretur, displiceret ipsi quod mandata sua neglecta fuissent: adjunxit Patriarcham absque aliorum consilio statim atque primum illud iudicium illæsus evasis, missis literis Episcopos, qui jam Kolioubam advenerant, ad sedes suas reverti coegisse. Jussit igitur Emir Patriarcham dari in custodiam, convocarique Episcopos ad quos etiam literas misit: adfueruntque paulò post undecim: inter quos novem fuerunt qui electionem subscriptione sua comprobaverant, nempe Joannes Semnudæus, Marcus Talkhæ, Joannes alter Panopoleos; tertius Lekanæ: Michael Barmonæ, Gabriel Senhuræ: Michael alter Sinschahæ: Ephræm Nesterawæ, Marcus Sinjæ: duo qui non subscriperant, Episcopi Fuzæ, & Aschmoumæ. Omnes tandem subscriperunt, veram esse accusationem institutam contra Patriarcham, nempe quod pecuniam pro ordinationibus exegisset: quidam etiam adjecerunt videri sibi illum in excommunicationis poenam incidisse, quia contra suam subscriptionem hæc fecerat, nempe cum scripto dato nihil tale postea commissurum se pollicitus fuisset. Duo tamen ex superius nominatis, & aliis qui advenerant, subscribere renuerant, Metropolitam Damiatensis & Episcopus Aschmoumæ, de iis non liquere sibi significantes. Accusatus est iterum quod Episcopum Khandekæ excommunicasset, quia aureos sex exegerat pro sepulcro in Monasterio ejusdem loci, quam pecuniam ipse acceperat: quod mulierem quæ monasticam vitam relicto marito amplexa fuerat, ad restituendam dotem & duplum condemnasset: & in eodem genere contrariam sententiam pronunciasset: quod libertinos Sacer-

dotes ordinasset, multaue alia ipsi objecta sunt, & testimoniis probata, adeo ut scriba Patriarchalis indicem dederit pecuniarum simoniace extortarum, cum nominibus eorum qui eas solverant, ex quo constabat aureos septemdecim mille, vel ut alii dicebant quindecim mille, ipsum ita collegisse. Ut autem aliquo modo si fieri posset concordia & reformatio disciplinæ procurarentur, simulque de accusationibus circa fidem Patriarcha se purgaret, oblatum est ipsi exemplum instrumenti subscripti olim à Joanne filio Abugaleb ejus decessore: quo fidei professio continebatur, juxta Jacobitarum doctrinam, præsertim declaratio adversus Concilium Calchedonenſe, & illius condemnatio: tum constitutio ut quicumque pecunias aut munera pro ordinationibus accipiebant excommunicarentur, & deponerentur, non minus quam qui dedissent; tandem diversa alia Ecclesiasticæ disciplinæ capita, quibus adjecta nonnulla fuerunt; ne ordinarentur nati ex secundis nuptiis; & ne mulieres in Ecclesiam admitterentur, nisi quinque diebus postquam à mensuris purgatæ fuissent. His omnibus Cyrillus subscripsit, eaque se observaturum pollicitus est.

Eodem anno Ecclesia Mhallaca Mistræ à Muhamedanis spoliata est, hortante nebulone quodam illius præcone, cum per portam quam olim ex vicina Meschita aperuerant obrepſissent: sub uno ex altaribus repertum vas sacrum antiqui operis illic defossum, cuius notitiam nemo habebat.

Anno Martyrum 957^o cum nova inter Patriarcham, & ejus accusatores dissidia concordiam dissolvissent, iterum postulatus est quod aureos tres mille circiter qui ad Sultani jura spectabant intercepſisset: petieruntque ut convocatis Episcopis judicaretur, & deponeretur. Cum Emirus qui judicio præerat quæſivisset, an liceret secundum Christianorum disciplinam illum deponere, falsi sunt id non licere; nempe quia ex antiquæ disciplinæ regulis, nulla ferme supererat, cum certum sit, ut etiam ipsi in libris suis habent, non modo Episcopos, sed ipsos Patriarchas deponi posse, præsertim ob simoniam. Verum cum ex suis ipsorum Canonum Collectionibus, historiisque intelligerent, id non posse fieri nisi ex Concilii sententia; paucos autem Episcopos qui ex inferiori Ægypto convenerant Concilii legitimi rationem habere non posse, idcirco falsi sunt se ad Patriarcham dignitate privandum carere autoritate. Cum igitur Emirus eos increpasset, quod rem sua ipsorum confessione illicitam à se peterent, confessus solutus est, Patriarchæ, & ejus

Novæ ad-
verlus eum
turba.

Pax cum
Francis.

nepotibus, multa aureorum mille quingentorum significata est.

Eodem anno pax cum Francis sancita est, post leves aliquot excursions, ea conditione ut in eorum potestate essent Hierosolyma, Betlehem, Ascalon, & earum urbium territoria, Bet Gabriel, Gaza sed absque territorio, Tiberias, Megedeliaba, Hamla, Safad, Kaukab, Tyrus, Tabnin, omniaque alia castra aut urbes regionis maritimæ. Captivi utrimque liberati: Francis vero qui in arce Kahiræ erant, data in hospitium Ecclesia vicina S. Mercurii, magno Jacobitarum dolore, quia Muhallacam ingredi non poterant aut officia divina in ea celebrare, ob quotidianos Muhamedanorum insultus: aliæ urbanæ, aut dirutæ erant, aut in eas Patriarcha non eandem quam in reliquis jurisdictionem habebat.

Episcopi
apostasia.

Inter magnas etiam illius temporis calamitates numeratur apostasia à fide Episcopi Sendafæ: is cum in fornicationis crimen incidisset, excommunicatus fuerat à Patriarcha, satagente in primis Diacono quodam Ecclesiæ suæ quem ipse communionem, & administrationem bonorum Ecclesiasticorum privaverat. Urgebant ex altera parte viri quidam pii, ne ad extremam illam poenam deveniretur, timentes hominis desperationem. Diaconus quoque qui eum observabat, cum vidisset meretricem quæ Muhamedana erat domum ejus ingredi, statim eum denunciavit: unde cum poena mortis proposita Episcopo fuisset nisi fidem negaret, Muhamedanus factus est.

Anno 959^o magnas à Judice calamitates Jacobitæ sustinuerunt ob Ecclesiam SS. Sergii & Bacchi, quam Musulmani ædificatam esse dicebant in solo quod olim Meschitam habuisset, eaque ratione à Christianis occupari non debuisset. Longa & multis conductorum festium perjuriis implicata lis ista fuit, in qua Cheic-el-Seni Monachus, Sacerdosque, ad quem illius Ecclesiæ cura spectabat, multa perpeffi sunt, sæpeque post diuturnum carcerem in vitæ periculum adducti. Autor noster in ea historia exponenda ad fastidium usque diligens fuit, sed hæc minutiora sunt, neque ex illis suis excerptis quidquam utilitatis percipi potest.

Obitus Cy-
rilli.

Patriarcha quod supererat vitæ transegit in Monasterio *Elchemah* quod ipsi solum supererat, obscurus & in summo suorum contentu, cum nemo inter eos qui aliqua pietatis aut doctrinæ opinione commendabatur, ullum cum ipso haberet commercium, neque ex tot monitionibus, depositionisque periculo melior evassisset. Obiit tandem 14^a Famenoth eodem anno 959^o Martyrum, qui

PATRIARCHARUM ALEXANDRINORUM. 593

CYRILLOS
Patr. LXXV.

qui respondet anno J. C. 1243°. Hegiræ 640° secundum Autorem nostrum aur 541°, quia is Arabum annus incæpit à 20° Junii : atque mensis Ægyptiacus qui Martio ex parte respondet, pertinebat ad annum superiorem. Statim vero ac Cyrillus diem suum obiit qui viventem tam acriter infectati fuerant, mortuo non pepercerunt, significaveruntque Sultano magnam auri & argenti vim ab eo relictam : pretiosamque suppellectilem quæ omnia ad fiscum spectare videbantur. Statim missi qui domum obsignarent, neque solum supellex Patriarchæ, sed vasa, libri, altarium tegumenta, & alia multa ad Ecclesias spectantia fisco addicta sunt. Ne-
pos ejus ex fratre & alter ex sorore in carcerem conjecti, & torti ut defossas pecunias indicarent : inventa aureorum capsula, in qua mille circiter ; tum in drachmis, alia millena : vasa, stragula vestis multa, & lineæ, tapetes magni pretii publicè vendita, adeo ut vix superesset quantum funeri procurando erat necessarium. Atque hic finis Cyilli filii Laklaci fuit, qui postquam annis ferme viginti laborasset, nihilque corruptelæ omilisset ut Patriarchalem dignitatem adipisceretur, in illa per annos septem & menses aliquot, summo cum dedecore, ea à melioribus Jacobitis passus est, quæ nemo antea à perditis nebulonibus, aut ipsis Christiani nominis hostibus sustinuerat, cum sæpè simoniæ convictus, & sub anathematis poena pollicitus emendationem, semper in ejusdem avaritiæ sacrilegæ baratrum delapsus, nullam aliam quam corradendarum pecuniarum curam habuerit.

Quæ vero verbosissimè scripsit Autor quem sequimur, ea paucis Makrizius complexus est, exagitatque ejus avaritiam, & simoniam ; laudat tamen quod in rebus Theologicis peritus esset, fortasse quia ejus nomine inscripta Canonum syntagmata quæ extant, ut monuimus, in variis codicibus, sefellerunt hominem Muhamedanum, adeo ut Autor illorum creditus ipsi fuerit, atque inde opinionem doctrinæ conceperit, quæ in Cyrillo nulla erat.

Eodem ferme tempore obiit Episcopus seu Patriarcha Melchitarum, cujus nomen ignoratur, in tanta paupertate, ut funeri efferendo necessaria non suppeterent. Mortuus quoque est Judæorum Æchmalotarcha, cumque duo ex illa gente primarii de hac dignitate contenderent, unusque illorum Sabbato pulpitum confendisset mille aureis multatus est, quasi eam absque Sultani licentia occupasset.

Mors Patr.
Melchitarum
& Æchmalotarchæ
Judæorum.

De illis Judæorum Æchmalotarchis multa dici possent ex Ju-
Ffff

De Judæorum
Æchmalotarchia.

Pag. 193.
C seq.Seld. hist. of
the Tithes, l. 1.
c. 3.

dæorum libris, quæ cum non sint hujus loci prætermittimus, ad Judaicam enim potius, quam ad Ecclesiasticam, aut Ægyptiacam historiam pertinent. De eorum autoritate, de inaugurationis ritu, & deductione ad Aulam Principis stante Abbassidarum Califarum imperio, plura scribit R. Abraham Salmanticensis in libro Jucassin, ex quo desumpta sunt quæ notis in Benjaminî Itinerarium suis inseruit illius Interpres Constantinus l'Empereur. Vulgo princeps exilii sive *Rosch Galout*, vocatus est à Judæis suis ille Æchmalotarcha, ex quo nomine parum detorto fecerunt Arabes suum *Ras eljalout* quod idem significat: & ea vox non modo ab Ægyptiacis autoribus usurpatur, sed etiam à Nestorianis in Historia sua. *Daïen* sive Judæ aliquando appellatur, imaginarius iste princeps, de quo Judæus ille tamen tam putide gloriatur, quasi in magistratu illo precario, sceptrum Juda & dux de femore ejus subsisterent. An ex Davidis prosapia (quod videtur Bagdadi observatum, si Judæis credendum est) semper fuerit Æchmalotarcha, maxime dubium est: nam alius erat in Chorasana, alius in Perside. Itaque suum Judæi Ægyptii Æchmalotarcham habebant; qui eodem prope jure eos regebat, quo Patriarchæ Christianos: & ut isti à Clero & primoribus Laicorum, ita ille à Judæorum optimatibus & plebe eligebatur, confirmabaturque electio à Principe Muhamedano: ut olim ab Anglorum Regibus *Presbyter Judæorum totius Angliæ*. Is autem honor, & magistratus obtineri ubique prope solebat per electionem, quæ ut apud Christianos ab Episcopis, accedente Cleri & Laicorum consensu confirmabatur, ita apud Judæos à Synagogarum præsidibus & Synedriis. In ea principatus imagine, non tam sceptrum à Juda non auferendum intellexisse eos manifestum est, quam id quod in Jacobi Prophetia sequitur, *Et dux de femore ejus*, ubi vox Hebræa, *legum lato-rem aut interpretem* significat. Quamvis porro familiam Davidicam adhuc superesse Judæi pertendant, ex qua Abrabaneles & alii ortos se esse gloriantur, sceptrum tamen, hoc est verum principatum apud Israelitas perisse dudum agnoscunt. Verum postquam ex Æthiopia relatum est regnare illic hominem circumciscum, qui ad Salomonem Davidis filium stemma deduceret, & observari illic Judaicas multas leges: tum demum gloriari cœpere non mediocriter, tanquam rege illo reperto, qui sceptrum à familia Judæ nondum ablatum fuisse probaret. Unde Epistolas à Davide Rege ad Clementem VII. per Franciscum Alvarezium missas Judæi His-

panicè & Hebraicè ediderunt, sed valdè interpolatas. Tandem ante annos aliquot Montefinus quidam; tale regnum in America repertum publicata relatione futilissima, mentitus est. Nunquam porro ante proximè elapsa duo sæcula, simile quidquam Judæo ulli in mentem venerat, agnoscentibus Magistris celeberrimis David Kimhi & aliis qui Holcæ cap. 3. y. 4. exposuerunt, completam esse erga illos prophetiam illius, cum filii Israel dudum essent absque Rege principe & sacerdotio. Sane vix ulla regio Judæos non habuit. In Africa, in India, in Montana Regione, Chorasana & aliis, magnum fuisse illorum numerum testatur Abulfeda: Modainæ etiam ante Bagdadum conditam, tum in ea urbe potentissimos illos fuisse scribit Nucirius. In Perside maxime floruisse probat versio integra sacræ Scripturæ in linguam Persicam: tum aliæ in Græcam & Hispanicam recentiores ad eorum usum qui Constantinopoli & in alijs Imperii Turcici præcipuis urbibus sedes fixerunt, præsertim postquam ex Lusitania & Hispania pulsæ fuerunt. Etsi vero amplissimas plerumque opes haberent, neminem in historiis legimus de principatu cogitasse: sed illa jactatio nupera admodum, & aliquot impostorum propria fuit: non communis Judæorum opinio.

Abulfeda
n. 112. 454.
456.
Ant. Ten-
reiro fol. 4.
M. Vol. I. 3.
6. 21.
Tacutip. 65.
Centio Dec.
11. p. 134.

In hujus Patriarchæ vita desinit Collectio quam secuti sumus, neque ultra progreditur, adeo ut pauca admodum sparsimque reperi fragmenta habeamus ad hanc historiam proseguendam. Si quis Autor eam historiam ad nostra hæc aut vicina tempora perduxit, ejus opus ad manus nostras non pervenit, neque de eo quidquam nobis occurrit.

Quod superest, paucis explicare necesse est successionem principum sub quibus stetit Yubidarum in Ægypto imperium: nam qui eam provinciam obtinebat, inter alios ejusdem stirpis; præcipuus censebatur, & Sultani titulum honoresque eidem deferbantur.

Adelo qui obiit anno Hegiræ 615°, J. C. 1218° successit Kamelus ejus filius, qui anno regni 20° obiit Hegiræ 635° J. C. 1237°: multa illi cum fratribus & agnatis Yubidis bella: variâ etiam fortunâ adversus Christianos pugnavit, cum quibus pace initâ, Damiatam recepit. Sæpè etiam ab Emiris seditionis appetitus est: Damascum & pleraque Orientis dominia occupavit: princeps bonus, literarum amans, doctis favens, quorum gratia scholam Kameliam à se dictam ædificavit. Cum Damasci diem suum

Res Muham.
medanz,

obiisset, ab Emiris Ægypti Sultanus salutatatus est, omisso Negemeddino natu majore.

Adelus Abubexrus, avi nomine appellatus. Huic post bienium mortuo anno 637. Hegiræ successit frater Saleh Negemeddin Yub : cui post annos decem successit ejus filius Moadham Turanscha post annum Hegiræ 647^m, J. C. 1249^m. Is est sub quo Ludovicus IX. sanctissimus Francorum Rex in Ægyptum trajecto exercitu, victorque captâ Damiatâ, ante Negemeddini mortem, paulò post ad Mansuram debellatus & captus est. Obiit Negemeddinus Saleh anno Hegiræ 647^o, J. C. 1249^o, ex morbo : absente filio qui erat in Castro Kaifæ in Syria : dum accersitur, regnum administravit *Chajareldor* Turcica patris ejus concubina, prudenter & foeliciter : nam patris ejus mortem celavit, & duces in officio continuit, præsertim Emiros Turcas, quorum summa tunc erat autoritas. Multos ex ea gente servos emerat Saleh, quos militaribus laboribus exercitatos ad corporis custodiam adhibuerat, & ex illis cohortem prætoriam constituerat. *Mamluci* vocabantur, quasi emittii servi : sed nimia illorum hominum insolentia domum Yubidarum evertit. Moadham enim juvenis ferox, nulliusque judicii, statim atque in Ægyptum advenit, odium adversus illos suum dissimulare nesciens, eos ad necem ipsi inferendam excitavit. Occisus est paulò post S. Ludovici liberationem, ut narrant quoque nostri historici : & in illo Sultano defecit stemma Yubidarum Sultanorum Ægypti, Salaheddini successorum. Regnum aliquamdiu administravit *Chajareldor*, adeo ut ejus nomine oratio fieret, diplomataque signarentur. Sed cum muliebris dominationis illos puduisset, eam coegerunt Emiri, ut Azeddino Ibeg Mamlucorum Turcarum primario nuberet : mox Emiri cum Sultanum habere vellent ex Yubidarum familia statuerunt ut proclamaretur Melik Aschraf filius Nacer Yuceph, filius Mashud Akfis, filius Kamel : Ibeg tutor ejus esset, seu *Atabek*. Mulier audax & zelotypa cum omnia negocia ad se traheret, maritumque de novis nuptiis cogitantem, vitæ quoque suæ insidiari rescivisset, eum prævertit, & in balneo occidit fecit. Paulò post cum Almanfor Ibegi filius, Sultanus in Patris locum renunciatus fuisset, ipse & ejus mater, excitatis adversus illam Mamlucis, illam oppresserunt, cum illa preciosiores gemmas suas in mortario contundi jussisset, ne ad inimicos suos pervenirent. Almanfor Ibegi filius quindecim annorum juvenis, post

multi inter Mamlucos diffidia communi consilio, depositus est, eo ipso anno 655°, Hegiræ, quo proclamatus fuerat. In ejus locum factus est Kotuz 3^{us} Mamlucorum Turcarum, qui postea à Mamlucis Circassis sublatus fuit, & quorum regnum eversum est initio decimi sexti sæculi, à Selimo Turcarum Imperatore. Atque hunc in modum non toto vertente sæculo insignis ille Principatus Ægypti, Syriæ, Mesopotamiæ, Arabiæ aliarumque provinciarum, tot Salaheddini sceleribus fundatus, concidit, adeo ut præter Sultanos Damasci, reliqui omnes, tam ex ipsius quam ex fratris ejus Adeli à quo familia ejus spoliata est, aut aliorum qui plures erant proscapia reliqui, vix aliquam urbem, sub majoris alicujus domini clientela retinerent. Et eodem ipso tempore Tartari ex Oriente extremo profecti omnes spoliaverunt & plerosque occiderunt. Nam ante annos circiter quadraginta fera illa Tartarorum Orientalium gens, qui *Mogoles* appellantur, prodire cepit.

Caput & princeps Temugin Bisakowi Badur, ortus ex antiqua nobilitate quam à Buzangir-Chano apud Mogoles principe, repetebat. Fuit educatus in aulâ Ung-Chani qui omnibus illis Tartarorum, Kipjakorum, & Cataiorum Ordís sive tribubus imperabat, apud quem in honore & dignitate fuit. Ung-Chanum eum esse non dubitamus de quo scribunt Autores nostri, Joannes de Plano-Carpini, Willelmus de Rubruquis, Joannes de Mandevilla, Marcus Paulus, & alii, quem Christianum fuisse prope omnes consentiunt, alioque nomine Joannem appellatum. Hinc plerisque doctis judicatum est ab annis amplius centum, illum fuisse Presbyterum Joannem, frustra quæsitum à Lusitanis in Æthiopia: quæ conjectura licet transivisse quodammodo in rem judicatam videatur, tamen ut ostendatur à nobis in Dissertatione de Ecclesia Æthiopica, videri debet incertissima. Cum calumniis inimicorum appetitus Temugin, in vitæ periculum devenisset, adversus Ung-Chanum bellum movit, eumque vita & imperio spoliavit. Postea anno Hegiræ 599°, J. C. 1202° in generali conventu Tartarorum *Curiltai* dicto, Ginghiz-Chan appellatus est, & *Regem Regum* Turanicâ, sive Turcicâ veteri hoc nomen significare testantur, Persici historici. Kara-Cataiam postea biennio subegit, totamque quantumque erat Mogolum & aliorum Tartarorum & Cataiorum regionem: quo nomine non dubitamus, magnam Sinici Imperii saltem Borealis partem significari. Nam Autor Ægyptius Historiæ Patriarchalis, fidus magis quam

Initia Tar-
tarorum Mo-
golum.

Emir Cond.
Cond. Emir
Matachi.
Abulfeda Ebn
Chuens, &c.
Leb Toua-
rich.

cruditus scriptor eorum quæ se vivente gesta sunt, ubi primam ejus in Iran, sive Persidem & vicinas provincias expeditionem refert, vocat eum Sinarum Imperatorem. Et sane Tartarorum in Sinas irruptionis, circa illa tempora meminerunt, qui de illis rebus scripserunt.

Hujus expeditionis in Chorasānam, Chowarezmiam & Transoxianam annum primum refert Cond-Emirus ad Hegiræ 615^{um} J. C. 1218^{um}; alii Autores ad 613^{um}, alii ad 617^{um}. Subactis illis provinciis sublatoque Chowarezmiorum imperio potentissimo, obiit Ginghiz-Chanus anno 624^o, J. C. 1226^o, excisis, funditusque deletis urbibus maximis, quarum ne vestigia quidem supersunt, tanta strage edita, ut quæ narrantur ab Emir-Condo & aliis autoribus, credibilia non sint, nisi vastitas illarum provinciarum, quæ maxime populosa olim fuerunt, fidem narrationi faceret. Erat Ginghiz-Chanus religione Tartarus, hoc est nullam propriè habebat, nisi qualis legibus aliquot continebatur, quas *Taça* vocant. Christianis non modo inimicus non erat, sed illis favebat, & in numerosa sua familia multi Christianam fidem nullo vetante profitebantur, imo filii ejus & nepotes quidam. Sed Muhamedanis infestissimi erant Ginghizcani: Meschitas evertebant, neque ullis ferme ex illa secta parcebant. Ex quatuor filiis quos ex Bulgin-Beghi uxore nobilissima, Ung-Chani secundum aliquos filia, suscepit, Oðai quamvis 3^{um} ex patris testamento supremum Imperium obtinuit. Tres alii fuerunt Touchi-Chan, Yaçai-Chan: & Tuli-Chan: ex quibus omnium fere Tartarorum nobilitas habet originem. Tertius eorum Imperator Gayuk Chan, salutat^{us} est, quamvis minorennis, matre Turakina-Chatoun imperium administrante; ab anno 639^o, obiit ille 644^o. Quartus fuit Mangu-Chan, Tuli-Chani filius qui electus est à Mogolum generali concilio anno 648^o, J. C. 1250^o. Hic fratrem suum Cublaïum versus Orientales partes misit, ubi magnam Sinici imperii partem invasit: alter Hulacou, qui nostris notissimus, *Holaco*, *Holao* & aliter appellatur, Persidem, Mesopotamiam, Syriam, Anatoliamque vastavit: reliquias Seljukidarum qui Iconii regnabant, sustulit: Ismaelitas sive Assassinos, cum eorum principe Cond Rucneddin, artibus eorum expugnatis, ad dena millia interfecit: quod vero Muhamedanos vehementer, pertulit, Bagdadum cepit, Calisam Mustasimum & ejus filios occidi jussit, in culeum infusos & per urbem raptatos, vel ut alii scribunt exercitus infiniti

qualis erat Tartaricus, equitum peditumque conculcati sunt pedibus. Atque hæc sufficiunt de Tartaris quantum ad hanc nostram historiam attinet, de quorum rebus multa & plura quam Arabici scriptores ulli habet Abulfaragius, cujus historia cum Latine & Arabicè edita sit patet omnibus. Persici tamen Autores omnino luculentius de illis rebus scripserunt, Emir-Condus præcipuè, tum ejus Epitomator Cond-Emirus : antiquiores alii duo qui extant in Bibliotheca Regia : tum ex Arabibus Marachi, Abulfeda, Ebn-Chukna, Historiæ Ægypti & plures alii. Extant etiam multa & quidem reconditæ eruditionis in nupera Bibliotheca Orientali; etsi dolendum est, multa nomina ita à vulgari usu discrepare, ut non nisi à peritis illarum historiarum agnosci possint. Neque enim si Persæ hodierni Avenk-Chan-pronunciant, mutanda fuit ratio nominis apud historicos Latinos & vernaculos conservari; nam nemo nescit pleraque à Persis esse secundum idioma Turcicum, ita de multis aliis quæ in toto hoc opere occurrent diversa ab iis quæ in Bibliotheca leguntur circa successores Kameli, Mamlucorumque initia, in quibus certissimè Autor non tam falsi quam negligentiae accusandus est, quam si doctrinæ suæ parem adhibuisset, nihil haberemus hoc in genere perfectius. Sane quæcumque referimus ea excerpta sunt fide summâ, ex optimis autoribus.

In Cyrilli 75ⁱ Patriarchæ vita definit Historia Alexandrina quam huc usque secuti sumus; neque Chronicon Orientale ab Echellenfi interpretatum ultra illius vitam progreditur. An ut historicos veteres, alii qui proximis sæculis vixerunt continuavere, hunc postremum alii exceperint, scire non potuimus. Si qui in Ægypto extitissent, non effugissent fortasse Wanslebi diligentiam, aut eorum qui Bollandiani laboris successoribus, multa de Christianorum Coptitarum rebus, subministraverunt. Itaque catalogum eorum qui à Cyrillo 75^o huc usque sedem Alexandrinam apud Jacobitas tenuerunt, solummodò dare possumus, adjunctis paucis quibusdam quæ undecumque excerptimus. Indicem illorum Patriarcharum primus publicavit Wanslebius ex Abulbircat: eundem historiæ suæ inferuerunt viri doctissimi, auctum aliquibus quæ à Ludolfo habuerunt observationibus.

Ubi definit
historia Pa-
triarchalis.

LXXVI. igitur Patriarcha Alexandrinus recensetur in laterculo Abulbircati Athanasius filius Kalil, electus anno Martyrum 967^o, ut Wanslebius scripsit, hoc est anno J. C. 1251^o. Quo

Athanasius
76.

circa vacare debuit sedes, per annos octo circiter, de qua tamen vacatione nihil habemus. Sed verisimilis admodum ea est, cum tota Cyrilli filii Laklaxi in Pontificatu vita, perpetuis inter ipsum, Clerumque & plebem contentionibus agitata fuerit, neque ille ad supremam inter suos dignitatem pervenerit nisi post annos prope viginti, dissidiis mutuisque accusationibus transactis, facile fuit ut odia reviviscerent, novique Patriarchæ electionem protraherent. Sed de hac vacatione Abulbircat, & Autor Chronici verbum non fecere. Sedit Athanasius annos undecim & dies sex secundum Chronicon, viginti sex annos habet Abulbircat, in eo ipso codice quo est usus Wanslebius. Addunt Continuatores Bollandi; *Dicitur in historia Athanasius fuisse vir bonus, justus, & humilis, & ideo fortassis inscriptus est Coptico apud Seldenum Kalendario, sed nomine corrupto, Asafius quod Ludolfus correxit, qui etiam putat de eo intelligendum quod habet Hagiologus ad diem x xii. mensis Hathuri.* Diximus alibi Kalendarii istius Seldeniani, nullam esse autoritatem, tum quod receptis apud Coptitas dissimillimum sit; tum quod ex vitioso exemplari descriptum, satis mendosè, & pejus interpretatum. In eo, quod Alexandrina Ecclesia sequitur, non 22^a sed 20^a Athyr occurrit nomen Athanasii cum nota quæ Patriarcham fuisse designat; non eâ tamen, quâ designari solent Alexandrini: quamvis in aliquibus illa ipsa nota non observetur; alterius quoque Athanasii cum eadem designatione 3^a Toth; ubi in Kalendario Coptico legitur *Anafius*. In eodem, sed 9^a ejus mensis Athanasii nomen legitur, sed Patriarchæ Antiocheni, unius scilicet ex Severi sectatoribus. Unde manifestum est in exemplaria vitiosissima Seldenum incidisse. Quidquid tandem sit, Athanasium secundum, sive junio-rem Coptitæ annua commemoratione celebrant, eum scilicet qui tertius à Dioscoro Cathedram invasit: alterius recentioris non videntur meminisse, cum alios aut æquales aut superiores, quamvis laudabiliter vixerint, inter sanctos non retulerint. Vacasse sedem post obitum istius Athanasii annis prope septem, addit Abulbircat: obiit Athanasius, anno Martyrum 978^o cum sedisset annis undecim, mensem unum diebus 26: historici Bollandiani sex tantum dies numerant: hic annus respondet anno J. C. 1261^o & 1262^o.

Gabriel 77. LXXVII. Gabriel Episcopi Tamidi ex sorore nepos: de quo scribit Abulbircat hæc quæ à Wanslebio prætermittenda sunt, notatu

PATRIARCHARUM ALEXANDRINORUM. 601

notatu tamen dignissima, quod ejusmodi sint ut exemplum primum schismatis & contemptæ apud Jacobitas disciplinæ contineant. Cum inquit ille (Athanasius) obisset, nonnulli ex Laicorum primoribus designaverunt Misrae Joannem Abusahid Sokareum: alii verò Kahra congregati, Gabrielem filium sororis Petri Episcopi Tamidensis. Constituerunt tandem ut in ea contentione fors ad sanctuarium in simili occasione fieri solita, adhiberetur. Eâ factâ exiit nomen Gabrielis prædicti, qui statim Hegumenus ordinatus est, sed obstitit ipsi Joannes cum suis, irritamque electionem fecerunt, adeoque Joannes ordinatus est 6^a Tybi anni Martyrum 978ⁱ 7. C. 1262ⁱ quo obierat Athanasius: mense uno post ullius mortem. Itaque Patriarchalem sedem occupavit Joannes annis sex, mensibus novem, quibus elapsis, depositus est: & perfectâ Gabrielis Ordinatio. Is Patriarchatum tenuit a 24^a mensis Paophi anni 985ⁱ Martyrum, 7. C. 1269ⁱ usque ad 6^m Tybi anni 987ⁱ qua depositus est, Joannesque restitutus Sultanorum jussu, dignitatem ad obitum usque retinuit, quo temporis intervallo compertor illius Gabriel diem suum obiit. Cum verò is prius & legitimè electus fuisset, numeratur primo loco inter Patriarchas: alter, quamvis intrusus, locum tamen suum inter eos retinuit. Obiit Gabriel anno Martyrum 987^o. secundum laterculum Abulbircati: atque adeò si vera scripsit in verbis suprâ relatis, eo ipso anno quo depositus est.

Joannes qui LXXVIII. numeratur obiit anno Martyrum 1009ⁱ, J. C. 1293^o, & illum sedem tenuisse idem Autor scribit annis 29. diebus 7. Ita scripsit quoque Wanslebius Autorem suum secutus, qui Patriarchatus annos innumerat, omnes simul ante depositionem, & ex quo sedi restitutus est pulso Gabriele, atque adeo vapulat innocenter, quasi in numeris erraverit, dum 29 annos Joanni attribuit, cum 22 dicere debuisset. At illi simul cum annis sex, & mensibus novem summam annorum viginti novem conficiunt. An Hagiologus Æthiops Joannem istum laudaverit, virum sanè non laudabilem, qui per vim & contra Canones intrusus fuit, parum refert: cum Philotheus sceleratissimus & alii non meliores simoniaci laudentur in sordida illâ farragine: de cujus sensu hæriolantem seriò Ludolfum audire, operam luisse est. Sanè quidquid obscuritatis erat in conciliandis duorum istorum Patriarcharum annis, ex iis quæ diximus perspicuè discutitur.

LXXIX. Theodosius Filius Ziabel Franci, sive Francus,
Gggg

Joannes 78.

utroque enim modo interpretari possumus. Is ordinatus dicitur anno Martyrum 1010°, J. C. 1294. 10^a Epiphi sive Abib ut Arabes pronunciant : obiisse anno 1016°. 5^a Tybi : sedisse annos sex, menses totidem, ut refert ex Abulbircato Wanflebius : cujus ut Autoris quem sequitur hoc loco & alibi errata diligenter emendaverunt Bollandiani. De isto Patriarcha nihil quidquam aliud occurrit, neque qua ratione Francus aut Franci filius appellatus fuerit divinare possumus, nec facile est conjectando assequi. Nam *quod forte ex Syria oriundus esset*, etsi aliunde probaretur, nihil efficeret : cum etiamsi Franci adhuc aliquam provinciarum sacro bello subactarum partem retinerent, & illa erat admodum exigua, & propterea Syri, Franci facti non fuerant. Hominem porro Latinæ religionis ad sedem Alexandrinam evectum fuisse impossibile omnino fuit.

LXXX. Joannes ex *Moniet Koufis*, vel *Koukis* oriundus, nam alterutro modo legi debet apud Abulbircat, non ut habet Wanflebius & ex eo Bollandiani *Monied Busis* : ordinatus est anno Martyrum 1016°, J. C. 1300°. 14^a mensis Mechir : obiit anno eorundem 1036°, J. C. 1320°. An idem sit ad quem refert Ludolfus laudes Poetæ sui, de *largis elemosynis*, adeo ut *ne clicium quidem reliqueris*, parum interest. Annus quo sedere cœpit, est Hegiræ 700^{um} incipiens à 15^a Septembris. Extincta jam erat Yubidarum qui Salaheddino successerant Dynastia, paucis quibusdam ex eadem familia urbes aliquas beneficiario jure tenentibus. Ægypti & maximæ partis Syriæ regnum erat in Mamalukorum Turcarum potestate, qui occiso Moadhamo Turan-Schah, eo ipso tempore quo S. Ludovicus captus ab Infidelibus fuit, illud occupaverant : neque fideiiores erga conservos quondam suos, quam erga legitimos dominos, plures ex Sultanis Mamalukis occiderant. Lacin eorum undecimus à suis ipsius Mamalukis seu servis emptitiis occisus fuerat. Successerat 12^{us}. Nacer Kelaouni filius 7^{us} illorum Sultanorum qui mille aureis emtus fuerat, & regnabat cum Joannes Patriarchatum obtineret. Sub eo Patriarcha, & ad annum primum ejus Pontificatus referri oportet duram Christianorum vexationem, quam ut sæpe alias, ipsi sibi accersiverant. Ita rem narrat Makrizius in Historia sua & in Descriptione Ægypti ad annum Hegiræ 700^{um}, J. C. 1300^{um}. Erant ut multis hujus historiæ locis observari potuit, Christiani tam Orthodoxi quam Jacobitæ plures, in Divanorum Ministerio ; modo vestiga-

lium redemptores, sæpius scribæ, aut ab Actis eorum qui rationes publicas administrabant, quia res erat plena nummorum. Nec contenti collectâ sæpius per turpem quæstum pecuniâ, insolenti divitiarum ostentatione & luxu perditio Musulmanos offenderunt. Cum Ducum unus, qui ex Africa interiori Meccam religionis causâ proficiscebatur, Kahiram venisset, arque ad palatium Sultani, officii causa procederet, eo comitatu quo Emiri solebant, jamque ad plateam cui arx imminebat, pervenisset, vidit ignotum sibi hominem equo generoso vectum, fasciâ capitis candidâ, veste polymitâ indutum, stipatumque multo famulatio. Sequebantur ex Muhamedana plebe non pauci, negotia sua illi commendantes, clamantes ut eorum misereretur, beneficiaque postulantes, adeo demisse, ut quidam ejus pedes oscularentur. Ille eos superbe rejiciens, neque respondens, nutu servis imperabat, ut turbam à se depellerent. Quæsit Emir, quid tandem Musulmanis esset cum isto Christiano negotii. Causâ intellectâ ad Sultanium ingressus, in Emirorum consessu primarios illorum duos Bibaïsum Jäschengirum qui postea regnavit, & Sclarum, quorum erat summa autoritas, interrogavit, cur Christianis tantum liceret ut non modo Muhamedani illis supplicare, sed servire cogerentur: tum non sine lacrymis Musulmanorum conditionem deploravit; quæsitque num victoriâ de hostibus sperare possent (tunc enim à Tartaris multas clades acceperant Ægyptii) qui legum adversus Christianos antiquarum curam non haberent. Vocati sunt igitur ad consilium Judices & Doctores, statutumque ut Christiani constitutam erga eos, ut etiam erga Judæos legem observare tenerentur: quam Omar filius Elkittabi olim captâ Ægypto tulerat: ne cidas res candidas capiti imponerent, sed cæruleas, Judæi croceas, Samaritani rubras, ne equis aut mulis sed asinis tantum vererentur, poenâ capitis propositâ omnibus qui contra edictum facerent, adeo ut impune occidi possent, domus eorum spoliari: ipsi ex equis dejecti, & ad necem usque verberari. Statutum etiam ne quis Christianus in Divanis Sultani, aut apud Emiros officia ulla exercere posset, nisi Muhamedismum profiteretur, quod nimium multi fecerunt. Vocatus Patriarcha Coptitarum, simulque *Daien*, sive Æchmalotarcha Judæorum, quibus hæc præcepta significata sunt. Patriarcha dixit daturum se operam ut sui eadem accuratè exequerentur, excommunicaturumque se eos qui non obtemperarent: illud idem Judæorum princeps in se recepit. Publicatum igitur edictum

est Sultani nomine, Kahiræ & mox Alexandriæ, deinde per vedarios in provincias transmissum. Ea occasione tumultuari adversus Christianos Muhamedani cœperunt: aliquasque Ecclesias in utraque urbe diruere aggressi sunt, incentore & Autore quodam Juris perito Negemeddino Ebn-Elrefsiha. Tamen re ad Emiros delatâ, statutum est solas illas, quæ à subacta per Muhamedanos Ægypto ædificatæ fuerant, diruendas: reliquis conservari placuit. Verùm in eo tumultu clausæ sunt omnes reliquæ per annum integrum, donec advenit Legatus *Lascaris Regis Francorum*, qui petiit & obtinuit ut aperirentur Ecclesiæ Muhallacæ Jacobitarum & S. Michaelis Melchitarum. Venerunt deinde Legati aliorum Regum, apertæque sunt Ecclesiæ Vici *Zowilet*, & sancti Nicolai. Edicti exempla missa sunt in Syriam, universamque Sultancrum ditionem à finibus Nubiæ usque ad Euphratem: & ubique ex ea lege, summo jure contra Christianos actum, præter quam in urbibus Carax & Schaubek, excusante se Emiro ob Christianorum multitudinem. Hæc Makrizius, cui adjungenda sunt ea quæ scripsit Abulbircat & ex eo Wansebius quem Bollandiani exscripserunt istis verbis. Sub eo Patriarcha, ut scribit Wansebius, Christiani Ægypti gravem persecutionem perpeSSI sunt à Sultano, qui jussit omnes pileo uti Saracenicò, (vulgo turban.) vilissimi pretii: non nisi asinis vehi permittens, inverso utroque crure ad unum latus pendente, ut ita despectui haberentur omnibus aliis nationibus in Ægypto degentibus. Clausit præterea illorum templa, ab iis incipiens quæ in nova veterique Cahirâ reperiiebantur, & reliqua deinde per Ægyptum omnia, exceptis solis illis quæ erant quatuor Monasteriorum deserti sancti Macarii, quæque erant Alexandria. Hoc modo sexcentis & tribus diebus oclusæ manserunt Ecclesiæ, donec intercedens apud Sultanum Legatus Lascaris Domini Constantinopolitani, obtinuit ut Jacobitis sua aperiretur, dicta S. Maria de Muallacæ, & quæ sancti Michaelis Archangeli vocatur alteri propinqua. Paulo post advenit Legatus alius, missus à Bersciennum, quo iidem pro Christianis deprecante, reſervatæ sunt aliæ duæ Ecclesiæ, ea videlicet quæ est in Haret Zovilet (vicus hic est ubi Patriarcha commoratur) & Melchitica una in Binducanum. Hæc illi fideliter ex Gallica Wansebii versione transfulerunt.

Observandum tamen est istum de suo, interpretatum esse autoris sui verba aliter quam Arabicè leguntur: neque enim Abul-

*Hist. de l'Egl.
d' Alex. p. 327.
Hist. Patr.
Alex. p. 547.*

PATRIARCHARUM ALEXANDRINORUM. 605

bircat exceptas dicit solas Ecclesias quatuor, quæ erant in deserto sancti Macarii, ubi tunc longè plures fuere, sed omnes Monasteriorum, & Alexandrinæ. Rectè porro Autores eruditi notant Constantinopoli tunc imperasse Andronicum Palæologum, nulum ex Lascarica familia : sed ab homine Ægyptio qui post sexaginta circiter annos scribebat, exigere accuratam rerum Occidentis notitiam non oportet. Imperaverant Principes ex stemmate Lascarico ante paucos annos, sufficiebat id peregrino in nostra historia ut Lascarin adhuc imperare crederet. De ea Constantinopolitana legatione nihil habet Makrizius : sed alterius meminit : scilicet *Bersciennuni*, de quo quis ille fuerit, *Æthiops an Nubiensis an nationis alterius*, nec conjectando, nec divinando assequi hætenus licuit, ait Autor Historiæ Chronologicæ. *Barchinoni* ut legi potest & debet, *Barcinonensem* significat : urbs enim Barcino quam Arabes *Barcinona* & *Barcelona* vocant, celebris apud eos fuit, ob res à Catalanis mari terraque in Oriente adversus Græcos & Infideles fortissimè gestas, de quibus fusè historici Hispanici & accuratè scripserunt. Postquam autem Catalanæ Comitatus per matrimonium Raimundi Berengarii cum Petronilla Raimiri Aragonum Regis filia, eidem Aragoniæ regno unitus est anno J. C. 1137°, major adhuc inter Muhamedanos fama Catalanorum fuit, qui *Barcinonenses* vulgo vocabantur, quòd Comites Barcinonis semper se appellarent, & quod ex eodem stemmate ad Aragoniæ regnum pervenissent. Itaque Makrizius qui istius de qua agimus Legationis meminit, missam eam dicit à *Rege Barcinonis* quem in Annalibus Regem Aragoniæ vocat anno Hegiræ 703° qui fuit J. C. 1303^m atque aded à Jacobo. 11° undecimo Aragoniæ Rege, qui à Justitia quam præcipue coluit nomen accepit, regnumque ab anno 1291° usque ad 1327^m tenuit. Addit Makrizius, Regem illum amplissima ultra consuetudinem munera misisse, non Saltano solum, sed Emiris præcipuis distribuenda, simulque scripsisse literas quibus rogabat ut Ecclesiæ aperirentur. Itaque ex communi sententia apertam esse eam quæ Jacobitarum erat, in Vico *Zowilet* dicto, & alteram in parte dictæ Bondocaniin : quamque in Annalibus ait Nicolai dictam fuisse. De reliquis Ecclesiis nihil habet. Quod si in nostris historiis de istis Legationibus nihil occurrit, mirum esse nemini debet.

Ex eodem quem citavimus Makrizio habemus narrationem quæ cum ab eo in historia Ægyptiaca referatur ad annum Hegiræ

Gggg iij

s. 148.

Garibay l. 32.

6. 11.

Id. l. 32.

6. 11. 6. 11.

703^{um}, qui fuit J. C. 1309^{um} ad ejusdem Patriarchæ tempora pertinere censenda est. Illius meminit quoque in descriptione Ægypti, atque rem contigisse statim post everfionem Ecclesiarum, de qua superius dictum est. Inter eas quæ dirutæ sunt, erat una in urbe *Chobra*, ubi repertam fuisse, dicit arcam, in qua repositus erat digitus cujusdam Martyris: eam autem in aquam demittere Christianos solitos fuisse, cum expectabatur exundatio Nili. In historia fufius rem exponit. Hoc enim ipso anno testatur Emirum Bibartum Jafchengirum, qui primam inter alios dignitatem & autoritatem obtinebat, aboluisse festum quod Martyris dicebatur, & ut Chobræ, ita Misræ solebat celebrari. Existimabant enim Christiani de arca in qua repositus erat digitus Martyris eorum, nisi ea in Nilum demitteretur, cum ad justam mensuram non exundare. Igitur ex variis Ægypti partibus conveniebant *Chobram*, & eò consuebant: Christiani equis vehi solebant, ripæ tentorii, fluvius naviculis tegebatur, promiscua virorum mulierumque multitudine concurrente, ibique vinum vendebatur, tanta quantitate, ut uno die centum millia drachmarum ex pretio conficerentur: & Christianum propolam memorant, ipso die duodecim mille drachmas ex illo mercimonio collegisse: tributi exactores duo mille. Inde tumultus, rixæ & cædes promiscuæ. Ea cum ad Bibartum Jafchengirum renunciata forent, edicto vetuit, ne ad tale festum concursus fieret: quod Christianis adeo molestum fuit, ut non ipsi modo, sed ex Coptitis multi qui ad Muhamedanam religionem defeceant, querelas ad eum detulerint, adjunctis publicanis, qui damnum proprium non minus dolebant. Sed Bibartus nihil motus, quasi puri Muhamedismi vindex, festum abolevit: & ut addit Makrizius, arcam ad se alatam & digitum coram se comburi, pulverem in ventum spargi jussit.

Joannes 81^{us}.

Hujus narrationis Autorem antiquiorem Makrizio alium non habemus, religionis suæ tenacissimum. Cùm vero de Nili exundatione multis hujus historię locis agatur, deque supplicationibus indictis, quando ad justam mensuram non excreverat: miracula etiam frequentissima occurrant, mentio sanctorum & reliquiarum crebra fiat; mirum Christianos Autores rei tam insignis non meminisse: quamquam temere vocaretur in debium Makrizii fides,

LXXXI. Joannes electus anno Martyrum 1037°, J. C. 1320° & 1321° ordinatus 12 Babæ seu Paophi: mortuus anno 1043° J. C. 1326° 2^a Farmuthi: de quo nihil præterea scribit Abulbirca

PATRIARCHARUM ALEXANDRINORUM. 607

ut neque de aliis aliquot. Primus respondet anno Hegiræ 720^o 1 secundus anno ejusdem æræ 727^o incipiente à 26^a die Novembris. Verùm Makrizius testatur anno Hegiræ 721^o qui fuit J. C. 1321^m atque adeo sub hoc Patriarcha, Feria 6^a nona mensis Rabieh posterioris, dirutas fuisse eadẽm horã omnes Ecclesias, in territorio Misræ seu Kahiræ: ita quippe videtur interpretandum, potius quam in tota Ægypto, ubi certum est antiquas multas superfuisse & etiamnum non paucas superesse.

LXXXII. Benjamin ex Democrad oriundus, ordinatus anno Martyrum 1043^o, J. C. 1327^o Hegiræ 728^o sedit annos undecim mortuusque est anno 1339^o de quo nihil aliud habetur. Benjamin.

LXXXIII. Petrus ordinatus anno Martyrum 1056^o, J. C. Petrus 83^m. 1340^o Hegiræ 741^o mortuus 1964^o, J. C. 1348^o Hegiræ 749^o.

LXXXIV. Marcus ex Kelioub, cujus initia non assignavit Marcus 84^m. Abulbircat, nec diem ordinationis sed mortem anno Martyrum 1079^o, J. C. 1363^o unde quamdiu fedit obscurum prorsus est. Makrizius gravissimæ persecutionis meminit anno 753^o Hegiræ, J. C. 1352^o. Scribit porro præcipuam illius causam ab ipsis Christianis profectam fuisse, qui absque pudore, post tot invidiæ Muhamedanorum experimenta, non modo libertate quam apud infideles dominos non nisi precariam retinebant, abutebantur, sed vana & intoleranda opum ostentatione eos irritabant. Quamvis enim renovatis ante annos quinquaginta & postmodum, legibus vetitum fuisset, poenâ capitis propositâ, ne ad Aulica officia admitterentur; ne equitarent; ne absque Christianismi nota prodirent in publicum, ad Divanorum ministeria rursus irrepere, cum sub ipsis Mamalukis Sultanis, major esset Emirorum, quam Principis autoritas. Itaque Christiani illi Coptiæ, cùm magnas ex publicæ pecuniæ tractatione, scripturaque Divanorum pecunias collegissent, iterum inolescere cœperunt, nec modo quasi legibus soluti essent, eas violare, sed Muhamedanis ipsis insultare, & malum ubi poterant dare non veriti sunt, cum ipsi interea luxu disfluere, moribusque flagitiosis infideles ipsos non offenderent modo, sed etiam corrumpere. Eos enim comotationibus deliniebant, & quod apud supersticiosam illam gentem piaculum existimatur, vinum illis præbebant: servas Muhamedanas cum quibus scortabantur, emebant, aliaque mancipia, quamvis illud mercimonium, non edictis modo Sultanorum, sed Canonibus Ec-

clesiasticis prohiberetur, constituta severissima poenitentiae lege adversus nefanda illa contubernia. Accessit ad hæc flagitia publicus edictorum circa cultum exteriorem contemptus, adeo ut non modo fascias capitum candidas contra interdictum gestarent, sed eas maximi pretii, quæ ipsis purpuratis convenissent. Quali vero tot crimina compensari piis largitionibus possent, Ecclesiarum bona auxerant, ita ut latifundia amplissima circa Misram possiderent. Ea occasio tumultuandi adversus Christianos Muhamedanis fuit; unde Judicum Emirorumque sententiâ, censerî illas possessiones placuit, erant autem illæ jugerum quinquaginta millium. Accidit quoque ut quodam die Christianus ex illis Divanorum ministerialibus, transiret prope Meschitæ *Elzahar* dictæ portam, equo vectus numeroque magno fervorum cinctus, qui magnifice vestiti & armati turbam depellerent. Itaque undique concursus ad Emiros factus est, instigantibus multitudinem Legisperitis, Judicibus, & quibuscumque aliis, qui zelum Muhamedanæ religionis præ se ferebant. Res in consilium missa, statutumque ut secundum mores antiquos edictis Sultanorum confirmatos, cogerentur Christiani, non minus quam Judæi constitutas sibi leges sub Omari filii Elkittabi Califatu, accurate observare. Patriarcha & Æchmalotarcha Judæorum citati, & illis lecta est communis Emirorum, Judicumque sententia, cujus hæc præcipua capita, Makrizius refert. Ut in Muhamedanorum ditione Christianis non liceret Monasterium, Ecclesiam, aut Cellam à fundamentis ædificare: sed neque illa ædificia reparare quæ vetustate collapsa forent: ut non prohiberent Muhamedano cuilibet, in Ecclesiis aut Monasteriis per tres noctes manere, atque interea cibos illis præberent, nec quidquam fraudis adversus eos molirentur. Ne filios suos Alcoranum docerent: aut si Muhamedani fieri vellent, eos non prohiberent. Ut vestitu dissimili, ab eo Muhamedanorum uterentur: fasciasque capitum cæruleas gestarent; Judæi croceas; pariterque mulieribus interdiceretur, cultus eo quo Muhamedanæ utebantur, similis. Ne nomina, cognomina, aut agnomina Muhamedanorum assumerent: ne ephippiis uterentur, aut equis veherentur, neque mulis, sed asinis, sedentes transversem. Ne in sigillis characteres Arabicos imprimerent. Ne quis illorum balnea ingrederetur absque signo collis appenso ex ære, ferro, vel plumbo, ut sic à Muhamedanis distinguerentur. Ne Muhamedanos servos, aut ancillas habere ipsis liceret. Ne publice

publice coram Muhamedanis mortuos ad sepulturam efferrent, aut sepulcra altiora extruerent: ne ædificia sua in sublime extollerent, unde prospectus esset in aliorum domos: ne campanas, vel potius crepitacula illa lignea, quæ illarum apud Orientales locum obtinent, cum majori strepitu pulsarent. Ne in Ecclesiis psallendo vocem altius efferrent. Ne servos & ancillas Muhamedanæ religionis emere possent, neque eorum quidquam in quibus Muhamedani partem haberent. Ut quotiescumque Christianus moreretur, hæreditatem adire nemini liceret, antequam causa apud Divani Ministros cognita fuisset: qui absque hæredibus morerentur, eorum bona fisco addicerentur. Ut Muhamedanis quotiescumque occurrerent, de via decederent. Ut qui cum Muhamedana rem habuisset, capitale ipsi foret. Hæc atque alia nonnulla capita legis, novo edicto comprehensa sunt, renovatâ eâ lege quæ anno Hegiræ 700^o sub Sultano Nasser Muhamed filio Kelaoun publicata fuerat, sed penitus neglectâ à Christianis, qui cum multis modis transgressi fuerant. Edictum publice in Divano Principis lectum & Christianis significatum, qui se illud observaturos professi sunt, non minus quam Judæi: cum istorum nomine Princeps seu *Daiem*: illorum, Patriarcha Jacobitarum præsentis sponsonem fecissent.

Adjecta est nova alia lex hominibus pecuniæ avidis, durissima, ne Christiani in Divanorum ministeria admitterentur, etiam si Muhamedismum professi fuissent, additâ poenâ adversus eosdem apostatas, si ad pristina domicilia familiarque suas reverterentur, nisi postquam omnes conjuncti & ejusdem familiæ Muhamedi nomen dedissent. Prohibiti sunt etiam Medicinam exercere; & exposti Muhamedanorum furori & petulantia, adeo ut statim atque edictum Kahiræ & Misræ publicatum fuit, impetu factò Muhamedani domos Christianorum diripuerint, vestes quibus tegebantur paulum elegantiores laceraverint, & Ecclesias spoliare & diruere cœperint. Unde tot malorum metu latere Christiani coacti sunt, ita ut ne aquam quidem ex Nilo ad eos deferri hostes eorum sinerent: qui mense prope integro in illos sævierunt, adeo ut à magistratibus compesci vix potuerint. Ea occasione multî fidem abnegaverunt, quod tamen non sincere sed per hypocrisin & timore majoris mali à plerisque factum Makrizius queritur, quasi ex matrimonii eorum cum Muhamedanis mulieribus, contagio morum sanctam illam gentem afflaverit.

Hhhh

Ad eundem quoque annum Makrizius in Annalibus suis refert narrationem de reperta arca, in qua digitus Martyris repositus erat, quam in Nilum demittere solebant Christiani urbis *Chobra*, cum Ecclesia destrueretur, ut pleræque tam in Australi, quam in Maritima regione destructæ sunt, aut in Meschitas conversæ. At idem ipse, quod etiam monet, eam igne ante plures annos consumtam, Sultani jussu testatus fuerat. An igitur alias reliquias priorum loco Coptiæ substituerint, aut Martyris festum tantummodo iterum celebrare coeperint, in obscuro est, nec magni refert. Tanta porro calamitas illius temporis fuit, tantumque potuere erga miseros illos Christianos publica quâ laborabant infamia, continuæ Muhamedanorum injuriæ, & sublata spes direscendi per Divani Ministeria, ut quamvis nemo ad abjurandam fidem cogere-
tur, plurimi tamen eam negaverint, adeo ut uno die in urbe Kelioub, quadringenti Muhamedi nomen dederint: infiniti alii in provinciis superioris Ægypti, non minus quam in Thebaidæ, passimque dirutæ Ecclesiæ aut in Meschitas conversæ fuerint.

Tandem cum si quid apud eundem Autorem de Christianorum rebus occurrat, ad edicta Sultanorum contra Christianos, everisiones Ecclesiarum & similia facinora spectet, quæ hinc inde colligi possent omittemus, indiculum sequentium Patriarcharum dedisse contenti.

Joannes 85.

L X X X V. Joannes, Damasco oriundus: ordinatus anno Martyrum 1079°, J. C. 1365°, & in eo definit Abulbircat nec mortem istius Patriarchæ, aut quam diu sedem tenuerit, notavit unde quod Wanslebius observavit, sub illo vixisse Abulbircatum verisimile est. Nomina sequentium Patriarcharum margini codicis quo usus est, quique extat in Bibliotheca Regia inscripta sunt, nec una manu.

Gabriel 86.

L X X X V I. Gabriel Archimandrita prius Monasterii Mohar-
rak.

Mathæus 87.

L X X X V I I. Mathæus.

Gabriel 88.

L X X X V I I I. Gabriel. Is est procul dubio qui Ritua-
lem librum Sacramentorum, secundum Ecclesiæ suæ disciplinam re-
censuit, emendavit, & Patriarchali auctoritate confirmavit. Con-
tinet autem Officiorum administrandorum regulas rituales: nam
Orationes primis tantum vocibus plerumque designantur. Sunt
autem, Ordo Baptismi: Absolutionis pœnitentium: Coronatio-
nis seu Matrimonii: Ordinationis, & Olei lampadis seu Unctio-

PATRIARCHARUM ALEXANDRINORUM. 611

nis infirmorum : præter ritus singulares ad celebrandam Liturgiam : præcis ad dandum Schema, seu Habitum Monasticum, &c. Esse præcipuam illorum Rituum autoritatem manifestum inde est, quod Codices recentiores accurate scripti qualis unus Bibliothecæ Regiæ, testantur rubricas defunctas fuisse ex Rituali Gabrielis. In eo notatur confirmatum esse Ritualement illum librum, anno Martyrum 1127^o qui fuit J. C. 1427^{um}.

LXXXIX. Joannes.

XC. Mathæus ex Sahid sive Thebaide oriundus : de quo Bollandi continuatores dicunt eum ultimum fuisse à qua Christma consecratum fuerit usque ad annum J. C. 1703^{um} ut ad eos scripsit Bernatus, de qua re nihil nobis occurrit.

XCI. Gabriel : antea Archimandrita Monasterii Occidentalis, an idem sit quod vocavit Wanslebius S. Antonii, nescimus.

XCII. Michael Semelouti.

XCIII. Joannes seu Yunes Nekaddi.

XCIV. Joannes Misrâ seu Kahirâ vetere oriundus.

XCV. Gabriel Minscianensis, ut edidit Wanslebius, errore opinor typographico : nam in codice Ms^o dicitur *Monschari*. De eo videnda sunt quæ addiderunt doctissimi Bollandiani : eum fuisse scilicet ad quem Pii IV. jussu legationem suscepit Christophorus Rodericus Societatis Jesu, ut refert Sacchinus. At ea successu caruit, acceptisque amplissimis muneribus, delusit Nuncios vasserrimus senex, & obedientiam quam literis geminis, & viva voce Roderico professus fuerat, insuper habuit.

XCVI. Joannes Monfalutenensis : ad quem scripsit Gregorius XIII. teste ejus successore.

XCVII. Gabriel. Is est cujus ad Clementem VIII. literæ quibus Romanæ sedis Primatum agnoscebat & fidem Orthodoxam profitebatur, editæ sunt à Baronio. De legatione illa aiunt Autores Historiæ Chronologicæ dubitari à nonnullis an acta vera sint, citantque Autorem Historiæ Criticæ, testem hoc in genere parum locupletem. Neque enim alio argumento utitur, quam eo quod primus produxerat Georgius Doufa in Itinere suo Constantinopolitano, ad quem cum de legatione illa Gabrielis Patriarchæ Alexandrini esset allatum, negavit superstite Meletio Piga, quo Alexandriæ familiariter usus fuerat, esse posse Gabrielem in eadem dignitate. At ignorabat quod omnes sciunt, à Dioscoro ad hæc usque tempora, præsertim à capta per Muhame-

Hhhh ij

Joannes 89.
Mathæus 90.

Hist. Patr.
S. 156.
Gabriel 91.

Michael 92.

Joannes 93.
Joannes 94.
Gabriel 95.

Hist. Societ.
P. 2. l. 1.

Joannes 96.

Gabriel 97.

S. 160.

Annal. 1. 6.

danos Ægypto, si primum sæculum excipimus, quo ferme toto Alexandrini Orthodoxi Antistite caruerunt, duos semper Alexandriæ fuisse Patriarchas, Græcum & Coptitam, & talis erat Gabriel. Ita de eo dubitari non potest: de literis ab eo scriptis non magis videtur dubitandum; nihil quippe frequentius à multis sæculis quam similes Orientalium Episcoporum ad Romanos Pontifices Epistolæ. An sincero animo Orthodoxam fidem Gabriel professus fuerit; Deus novit: sed quidquid habuerit in animo, decantata illa & nimium celebrata unio, fructum nullum tulit, non magis quam tot aliæ.

Marcus 98. XCVIII. Marcus ex Biad: ordinatus ut aiunt anno Martyrum 1319°, J. C. 1602° obiit anno 1610°.

Joannes 99. XCIX. Joannes Melawani.

Joannes 100. C. Joannes ex Touk: ita Wanslebius, secutus notam codici suo adjunctam: quod nomen mutari volunt recentiores historici ut Mathæi substituatur: quæ ratio mutationis sit, non satis apparet: dicunt eum scripsisse ad Urbanum VIII.

Marcus 101. CI. Marcus ex Mahjour, ordinatus anno Martyrum 1362. J. C. 1645.

Mathæus 102. CII. Mathæus ex Monasterio D. Mariæ in Eremito, nam id videtur significare vox Arabicè scripta, non *Baramus* ut Wanslebius transulit: ordinatus anno Martyrum 1377° mense Athyr anno J. C. 1660°, qui superstes erat cum is in Ægypto esset anno 1673°.

Joannes 103. CIII. tandem ultimus adjicitur Joannes Toukhi; ex literis à Bernato scriptis, qui eodem teste anno 1703° Chrisma, magnout aiunt apparatu, consecravit, quod ab annis ducentis factum non fuerat. De iis videnda quæ Bollandi Continuatores ad historiæ suæ finem addiderunt, ut postremorum illorum Patriarcharum annos ad veræ Chronologiæ rationes reducerent. Sed id præstare difficile propterea est, cum non aliud subsidium quam Indiculum habuerint ex Cyrilli ut aiunt Liturgia descriptum. Nempe repertum est in foliis aliquot vacuis alicujus Codicis quo illa continebatur: ita enim sæpe usus venit, ut in libris præsertim sacris ad calcem adscribant baptismata, Ordinationes, obitus & si quæ sunt ejusmodi, plane in locis non suis sed neque in Cyrilli nec in aliis Liturgiis omnium qui fuerunt Patriarcharum nomina solent recitari: illius tantum qui Cathedram tenet,



I N D E X

EORUM QUÆ IN HOC VOLUMINE continentur.

A.

- A** *Abaffda* Califæ. [317.](#) [225.](#) [108.](#) [119.](#)
[335.](#) [344.](#)
Abilius P. Alex. [13](#)
 Ordinatus Presbyter à D. Marco *ibid.*
Abrahani eujusdam hæresis Antiochiæ [149](#)
 Suppetella. [116](#)
Abfolutionis à Sanctio datæ formula inusi-
 tata. [117](#)
Abulfeda rerum Christianarum ignarissi-
 mus. [77](#)
Acrophili. [151.](#) [112](#)
 Episcopum sibi creant. [147](#)
Acth (las) P. A. [85](#)
Adesa urbs Æthiopiz ignota. [161](#)
Adel Sultanus Ægypti & Syriz Salahed-
 dini frazer. [356.](#) & *seq.*
Æchmalatarcha Judæorum. [521](#)
 Ægyptus à Muhamedanis subacta. [163](#)
 Æra Muhamedanorum. [173](#)
 Æra Martyrum [63](#)
Æthiopi quotannis scribere solebant
 Patr. Alexandrini. [414](#)
 Æthiopum de Concilio Calchedonensi
 traditio. [137.](#) [175](#)
 Æthiopum Rex Nejaſchi dictus. [337](#)
 Episcopos plures ordinari frustra petunt
 Reges Æthiopiz. [500](#)
 Æthiopiz Metropolis Cyrillus à Beu-
 jamino miſus. [179](#)
 Joannes à Jacobo. [271.](#) [281](#)
 Alius à Cosma. [336](#)
 Æthiopiz Regi ſcribit Iſaac P. A. [128](#)
 Res Æthiopiz [181](#) [336.](#) [381.](#) [443.](#) [413.](#)
 461. 475. 510. 525. 560.
 Impoſitor ſe Metropolitam ſimulat. [339.](#)
 185. 453.
 Æthiopum polygamia. [454](#)
Africa interioris Chriſtiani. [138](#)
Agnitho P. A. [165.](#) [173](#)
 Multa paſſus à Patre ſecto Ægypti.
 Moritur. [176](#)
Agrapp n. P. A. [71](#)
Admed ſ. Toloni Ægypti Vizirus, cum
 ampliſſima auctoritate. [310.](#) & *ſeq.* [467](#)
Alcoranus. [118](#)
 Citatur à Patriarcha Joanne. [72.](#) [118](#)
 An creatus. [276](#)
 Alexander P. A. XIX. [67](#)
 Ejus Epistolæ Paſchales. [83](#)
Alexander Conſtantinopolitanus Patriar-
 cha. [89](#)
 Alexander P. A. XLIII. [109](#)
Alexandria à Chriſtianiſ obſeſſa. [140](#)
 Alexandrini Patriarchæ auctoritas. [124](#)
 Accuſatus coram Synodo. [418](#)
 Alexandrinum templum vetus. [80](#)
 Alexandrinorum jus ad electionem Pa-
 triarchæ. [186.](#) [418](#)
Aſenſus IX. Caſtellæ Rex à Muhameda-
 nis victus. [117](#)
Alimaman Califa ſcientiis promovendis in-
 tentus. [175](#)
 Obſervationes Aſtronomiz ejus julii
 factæ. [375](#)
 Alcoranus creatum credi jubet. [376](#)
Altare portatile Regi Nubiz conceſſum [183](#)
 Turkeſtaniz Regi. [185](#)
Ambarum. [318](#)
Anianus ſucceſſor à Marco designatus. [11](#)
Anaſtaſius P. A. XXXV. [157](#)
 Scribit ad Antiochenos. [153](#)
Anaſtaſi Imperatoris memoria apud Cop-
 titas. [118.](#) [137](#)
Andaluſeni Ægyptum invadunt. [155](#)
 Andaluſeni Arabes quinam fuerint. [413.](#)
 368.
Andronicus P. A. XXXVII. [114](#)
Angelia. [142](#)
Angelum locus ubi Marcus Manſurium pal-
 ſus eſt. [5](#) [141.](#) [107.](#)
Anni Helalæ & Kharigæ. [439](#)
Antimenſa. [231](#)
Antioch ni Jacobitarum Patriarchæ
 Dionyſii Patr. Antiochenus. [457](#)
 Ignatus. [179](#)
 Episcopum vacanti ſedi præſentant.
 Athanaſius P. Antiochenus [198](#)
 Joannem Patriarcham agnoſcere noluit,
 H h h

quod jam esset Episcopus.	217	Scripta.	961
Isaac Episcopus Harran intrusus in sedem		Canones.	27
Antiochenam.	212	Athanasius Patr. Antiochenus Alexandriam	
Metropolitae occisi, & turbæ ea occa-		venit.	112
sione.	211	Athanasius alius Metropoli Montane	
Communio per literas cum Alexandrinis		regionis Antiochenam sedem inavit.	
interrupta.	214		
Res Antiochenæ.	216	Athanasius aliter scribit Philotheo P. A.	
Georgius Patr. Antiochenus.	217		
Dionysius Patr. Ant.	216	Athanasius P. A. XXVIII.	115
Dionysius in Ægyptum venit.	170. 267.	Axuma Æthiopiz urbs primaria.	164
	281.	Axumita veteres sunt Æthiopes.	117
Antiochenæ sedis post Dionysii mortem			
vacatio.	221		
Athanasius.	291		
Joannes.	291		
Ejus Epistolæ ad Mennam Alexandri-			
num	355. 161		
CP. ductus de fide cum Orthodoxis dil-			
purat.	116		
Joannes f. Abdoun Patriarcha Antio-			
chenus.	402		
Constantinopolim ductus.	404		
Fidem Jacobiticam tueretur coram Græ-			
corum Imperatore.	401		
Antiocheni Jacobitæ.	217		
Eorum multi ad fidem orthodoxam con-			
verti.	411. 439.		
Antonius magnus.	38. 66		
Vita ejus per Athanasium.	96		
Apollinaris.	142		
Apostasia à Monastica vita.	417		
Apostasia Episcopi.	122		
Apostata penitentia negata.	222. 240		
Erga illos disciplina.	117. 126. 416		
Apostata à fide multi.	603		
Arca ex cheno ad reponendos sacros li-			
bros.	203		
Arius à Petro excommunicatus.	18. 61. 67.		
	79. 87. 89.		
Armenorum Patriarcha Gregorius.	460. 423		
Hananias.	505. 107		
Ecclesæ.	465. 553. 179		
Armenorum errores.	461. 107		
Armenorum in Ægypto sub Viziris Ar-			
mevis potestas.	505		
Armenius Castillionæus. à Salaheddino oc-			
ciditur.	144		
Assassini seu Haffissini.	110. 470. 496. 141.		
	146.		
Athanasius magnus P. A.	81		
Pauci de illo habent Orientales.	84		
Historia puerorum ab eo baptizatorum.			
85.			
Mors.	95		
		B.	
		Bagdadum condita.	241
		Bagdadensis persecutio.	296
		Balduni Regis Hierosolymitani expeditio	
		in Ægyptum.	495
		Bal'amus Matarax de ejus origine tradi-	
		tio.	122
		Baptismi puerorum in mari per matrem.	16
		Baptismus non celebratur scilicet sexta	
		Crucifixionis.	432
		Non administratur absque communione.	
			431.
		Barcenenfis ad Ægyptios legatio.	605
		Baranusiæ.	123. 197. 247
		Behramus Armenus Viziris Ægypti.	106
		Fit Monachus.	ibid.
		Benjamin P. A. XXXVIII.	116
		Monasticam vitam professus.	162
		Alexandriam fugit.	160
		Latet in Monasterio Thebaidis.	162
		Muhamedanis se dedit.	163
		Alexandriam redit.	164
		Dedicat Ecclesiam S. Macarii in montis	
		radice.	161
		Ejus memoria.	170
		Metropolitam in Æthiopiam misit.	170.
			106.
		Beveregius refellitur.	77
		Bibliotheca Farimidarum.	136
		Bimaida apud Eurychiæ Interpretem qui	
		fini.	222
		Bethelchus Nestorianus Medicus.	227
		Bonadurum Dynastia.	416
		Bollandi continuatorum conjectura de con-	
		sensu Alexandrinorum Jacobitarum cum	
		Orthodoxis.	210
		Bucalia locus prope Alexandriam.	12
		Bisbamaria Ægypti rebelles.	116. 172

I N D E X

C.

Calendarii à Ludolfo editi nulla autoritas. 155
Calices vitrei pro aureis & argenteis. 193
Califarum auctoritas quando imminuta. 310. 311. 345. 448.
Califa Saracenorum post Muhamedem 167.
 198. 212.
 Abbaſſi &c. 257
 Abul Abbas Safah. 218
 Almanſor. 240. 250
 Almamou. 274
 Succellores. 291. 308. 319. 335. 350
Campanarum pulſario ad divina Officia. 182
 Vectita. 227
Canale ſubterranei ad aquas deducendas Alexandriæ à Sanuto reparati. 104
Canones Aſhanafit. 27
 Canones Imperatorum. 75
 Canonum interpretes Joſeph Ægyptius non fuit. 77
 Canonum Collectio juffu Viziri facta. 418
 Alia ab Episcopis poſtulata. 383
 Alia. 385
 Collectio Canonum Ebnaffali. 386
Catalogi Patriarcharum Kurchetiani nulla auctoritas. 16
Catholici Perſidis. 214
 Catholici Seleuciz. 71
 Neſtorianorum. 405
Caravana peregrinorum *Meccanz.* 417. 545
Caruim eſus Monachis interdictus. 101
Carmanior rebelles. 310
Celadim P. A. IX. 17
Cerdo P. A. IV. 14
Chail P. A. XLVI. 203
 Eius cum Melchitis contentio. 214
 Mulra paritur. 226
Chail P. A. LIII. 294
Chail P. A. LVI. 319
Chaneſch autor Muhamedanus ſcriptis de Monafteriis Ægypti. 465
Chiracena Salaheddini parguus. 324
Chriſtianorum elates in Hiſpania. 517
Chriſtidus P. A. LXVI. 418
 Eius Conſtitutiones. 420
Circumciſi apud Æthiopes. 183. 196
 Apud Copticas. 186. 497. 501. 588
Collectio Canonum Syriaca omnium Orientalium antiquiſſima. 73
Communio inter Jacobitas Alexandrinos & Autochenos. 182

Interrupta. 145
 Redintegrata. 152. 182
Conſensus Nicænum. 69. 71
 Eius Epocha. 70
 Canones. 71
 De illis qui dicuntur Arabici. 72
 De Conſilio Nicæno quid ſcribant Muhamedani. 76
 Concilium Conſtantinopolitanum I. 101
 Ephelinum. 111
 Calchedonenſe. 116. 123
 A Jacobitis anathematizatum. 131. 162. 146. 150.
 Fabulæ de eodem. 225
 Concilium V. Occumenicum. 146
Confefſio peccatorum. 219
 A quibuldam Patriarchis Alexandrinis ſuppreſſa: à Marco f. Elkonbat & aliis propugnata. 350. 359.
 Confeſſio ſuper thuribulum. 151
 Confeſſio de veritate Eucharitiæ, ante Communionem. 101
 Eius formula. 101
 De ea controverſiæ. 101. 126
Conſtitutiones Eccleſiaſticae Chriſtoduli. 420
 Gabrielis f. Tank. 311
 Aliz. 383
 Cyrilli. 420
 Factæ ſub Cyrillo LXXV. 323
Coptica lingua. 290
Coptiarum rebellio. 222
Cofmas P. A. XLIV. 201
 Cofmas alter Melchitarum Patriarcha. 203
 An Monothelita fuerit. 206. 213. 240
 Cofmas P. A. LIV. 225
 Cofmas P. A. LVIII. 316
 Metropolitam Æthiopiſibus mittit. *ibid.*
Cofmiz Perſis Perſarum Rex Ægyptum vaſtar. 154
Cruce inventio. 81
 Cruces contraſtæ. 297. 345
Cyriacus Rex Nubiz. 222
 An fuerit Rex Æthiopiæ. 222
Cyrius Hieroſolymitanus. 90
 Cyrillus P. A. XXIV. 106. 108
 Scripta ejus. 113
 Cyrillus P. A. LXVII. 422
 Querelæ adverſus eum. 417
 Eius Conſtitutiones. 460
 Obitus. 468
 Cyrillus P. A. LXXV. 176
 Accuſatus de Simonia. *ibid.* 177

H h h h ij

I N D E X.

D.

D <i>Amianus</i> P. A. XXXV.	145
<i>Damiata</i> Metropoli.	590
<i>Dazarinus</i> impostor & sceleris autor.	401
<i>Drufi</i> .	414.
<i>Demetrius</i> P. A. X X X V.	10
Laicus & uxoratus: caltimonia miraculo probata.	17
Ocultis peccata dogoscit.	21
Originem expellit.	23
An autor compui Paschalis.	25
<i>Depositis</i> Episcoporum.	181. 180. 114
Depositionis Patr. Alexandrinorum nulum exemplum.	181. 181
<i>Diemysus</i> P. A. Sapius prius fuerat scundum Ægyptios: ejus conversio.	25
Fabula illa refellitur.	26. 11
Ejus Epistolæ de persecutione.	14
De penitentibus.	15
Canones.	16
Epistola, exilium.	16
Scribit aduersus Paulum Samosatenum.	37
<i>Diemysus</i> Patr. Antiocheus.	451
<i>Dionysius</i> P. A. X X V.	114
<i>Dioscorus</i> junior P. A. XXXI.	119
<i>Diplomata</i> Almamonis in Patriarcharum favorem.	190
Alia Christianis concessa.	310
<i>Dopyreus</i> inferebantur nomina Patriarcharum, cum litreis scripissent.	446. 412
<i>Disputationes</i> celebres cum Muhamedanis de Religione.	377
<i>Dormientes</i> septem.	38. 107

E.

E <i>Enaffali</i> fratres duo;	386
<i>Ech-Lenfi</i> (Abraham) Seldenum confutavit	10
<i>Eclisia</i> à Beniamino consecrata ad S. Marcium.	166. 169
S. Marci Alexandriæ sub Agathone illustrata	176
Major D. Marci Kamficia dicta restituta sub Isaac.	168
In cenlio consumta:	331
Anastasis quoque dicta.	ibid.
Holusianæ.	178
Duorum Cubiculariorum Melchiris propria Ecclesia S. Joannis.	189. 176
S. Georgii & Abukit Kahiræ.	189
S. Menæ prope Misram, triplex Ægypti-	

torum, Syriacorum, Armenorum.	105
S. Samutii in qila miraculum.	103
S. Menæ in Marcotide.	113
Spoliata.	188
Saluatoris Alexandriæ.	110. 413
Incensæ.	335
Jacobitarum Hierosolymis 164. 169. 171.	
SS. Cosmæ & Cyriaci.	142
S. Ptolemæ Martyris.	199
Ecclesiæ Damasci spoliata.	143
Ecclesiæ S. Victoris Melchitarum.	ibid.
S. Victoris prope Misram	417
S. Sergii in Caltro Elchemah: Catholica dicta.	414
S. Mariz Muhallaca dicta.	414. 471
S. Michaelis Mochara.	417
Ecclesiæ in rupibus excavatæ in Æthiopia.	193
Ecclesiæ Ægypti Tamaouta.	10
S. Michaelis Alexandriæ.	81
SS. Cosmæ & Damiani.	141
D. Marci.	161
Ecclesiæ spoliata.	197. 110. 195
Everfæ.	191. 603
Instaurata.	124
<i>Electio</i> Patr. Alexandrini 483. 501. 517. 135	
Ejus instrumentum publice lectum.	418
<i>Electio</i> Patr. Alex per sortem.	409. 412
114. 168. 601.	
<i>Elas</i> Episcopus Antiochenam sedem administrat.	196
Ad Alexandrinos scribit.	ibid.
<i>Elmacinus</i> interpres Erpenius emendatur.	
177. 116. 171. 175. 176. 180. 117. 171.	
401. 482. 427.	
Elmacinus autor historiz Saracenicæ nullo auctoritatis Jacobita.	10
<i>Ephrem</i> P. A. LXVI.	166
<i>Episcopi</i> electio.	491
Episcopi depositio.	181
Isaac Taneos, Theoderus Misræ depositi	189
Episcopus Saca depositus ob conculatam oblatam.	114
Episcopi accusatio.	476
Episcopi erant in Ægypto ante Demetrium.	18
Episcopi secundum Canones non possunt fieri Patriarchæ.	113
Episcopatus duo uni commissi	181
Episcoporum avaritia	187
Episcopi Seniores ordinatione, reliquos precedebant.	410. 467
Eorum Inthronisatio.	417
<i>Epistola</i> Synodice de Fide inter Alexandri-	

I N D E X.

Isidori Rafaili dictum Alexandrie. 42

Isidori Quadragesimalis 431

Apostolorum, Nativitatis, &c. 431. 431

Imagines cultas. 319

Apud Jacobitas conservatus. 119. 190.

Miracula. 119. 198

Isaia seu Pontificatus Muhamedanorum. 351

Indi Episcopum ab Alexandrinis petunt. 184

Qui fuerint illi Indi. 188

Infantes cum baptizantur jejuni esse de- 431

bent. 431

Invocatio per Califas. 431

Joannes P. A. XXX. reclusus. 116

Machiot male appellatus. ibid.

Joannes Semudex P. A. XL. 171

Ab Agathone non ordinatur Episcopus ibid.

ut Patriarcha esse posset. 174

Fit Patriarcha. 174

Joannes P. A. XLVIII. 171

Joannes Grammaticus. 119. 169

Isaac Ep. Harran vi occupat sedem Antio- 111

chenam. 111

Rejctus quod Canones de non transie- 211

rendis Episcopis violasset. 114

Isaac Syrus. 114

Imaelis videm qui Asailai. 111

Judei celebris conversio. 111

Judeorum *Echmalotarchæ*: an princi- 124. 603

pes & quales. 101

Julianus qui & Phantasiastæ. 196

Julianus Patr. Antiochenus. 111

Julianus Halicarnassæus. 111

Julianus P. A. XI. 111

Urbe excedit. ibid.

Julianus Apostata. 90

Ejus mors. 91

K.

Kahira à Jshero edificata. 351

Diversa est à Menf, quæ est Mem- ibid.

phis veterum. 448

Kalendaris reformatio Gelalæ. 167. 424

Kasser-el-Chemah Castrum luminum: à ve- 515

teri Pyro dictum. 100

Kilus Metropolis Ethiopiz. 111. 111.

Kircheri catalogus emendatur. 111

Kyræna à Fatimidis occupata. 111

Kyrie eleison seu Tarchum orationes quan- 431

do dicendæ. 431

L.

Lalibela Ethiopiz Rex. 161

Lascaris Constantinopolitani legatio 604. 607

ad Sultanos. 611

Lazarus Gabrielis P. A. XCVII ad Cle- 611

mentem VIII. 611

De ea Judicium Critici rejicitur. 450. 140. 607

Leges adversas Christianos. 116. 110. 147. 154

Leontius Pape Tomus. 116. 110. 147. 154

Labrorum apud Arabes ingens multitudo. 117. 116. 155. 149. 174.

Liturgia Syrticæ Jacobitarum Alexandrino- 184.

rum ad Jacobitas fuerunt, non ad Or- 600.

thodoxos. 110

Liturgia Dioscori. 110

Liturgia celebrare prohibitum. 110

Liturgia celebrabat novus Patr. Alex. 110

ad S. Macarium. 110

Liturgia memoriter scire tenebatur 110

Patriarchæ Alexandrini. 110

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

Ludolfus refellitur. 117. 116. 155. 149. 174.

<i>Arium</i> eicie.	55	<i>Salaheddinus</i> , Sultanus <i>Aegypti</i> & <i>Syriae</i> .	
Ejus martyrium.	58	512. & seq.	
Epistola Canonica.	61	Ejus ad Noraddinum munera magnifica.	
<i>Petrus</i> P. A. III. nomine.	143	518.	
<i>Petrus</i> P. A. Athan. Successor.	99	Victoria de Christianis ad Tiberiadem.	
<i>Phanasi</i> sta sive Julianistae.	302	544.	
<i>Philippi Augusti</i> expeditio <i>Syriacae</i> .	546	Arnaldum Castillionem sua manu inter-	
Pax cum Muhamedanis.	ibid.	terfecit.	ibid.
<i>Philippus</i> Imperator Christianus fuit secun-		Hierosolyma capit.	545
dum Arabes.	33	Ejus mors, mores, &c.	545
<i>Phlopanus</i> nullus Patriarcha fuit.	373. 385	Posteri.	555
<i>Philathus</i> P. A. LXXIII.	373	<i>Saloon</i> Rex Nubiae sit Monachus.	451
Ejus scelera.	380	<i>Sanctius</i> P. A. LV.	301
<i>Panthenia</i> Apostatarum à fide. 219.	238.	<i>Sanctius</i> P. A. LXV.	408
396. 426.		Ejus electio.	410
Pœnitentiae exemplum.	408	Simoniacus.	411
<i>Presbyter</i> Joannes.	223. 338	<i>Scaligeri</i> error de origine nominis Presby-	
<i>Presbyter</i> duodecim à Marco instituti,		teri Joannis.	338
de iis Eutychiei narratio.	7	<i>Seldenus</i> de ordinato per Presbyteros Patr.	
Eligebant non ordinabant Patriarcham.	8	Alexandrino refellitur.	8. 11. 19. 54
<i>Primus</i> P. A. electus ex Laico.	95	Alia ejus peccata.	347
Nomen ejus non mutandum.	ibid.	<i>Seljukidarum</i> Sultanorum Dynastia.	439
<i>Processo</i> Dominum Palmatum.	412	Togrolbeg.	440
<i>Proterus</i> inter Patriarchas à Jacobitis non		Albaislan.	441
numeratur.	120	Melikschah.	447. 408
Ab illis occisus.	121	Ejus successores.	493. 529
<i>Protopresbyter</i> apud Alexandrinos.	8. 107	<i>Semidalita</i> .	425
		<i>Settelmeluca</i> Hakemi Soror <i>Aegyptum</i> re-	
		git.	408
		Ejus & aliquot aliarum mulierum opu-	
		lencia.	409
		<i>Severus</i> Aschmoninensis autor historiz Pa-	
		triarchalis refellitur.	16. 86
		Ubi desinit ejus historia.	312. 418
		Ejus opera.	367
		Ingenium.	368
		<i>Severus</i> Metropolitae <i>Aethiopiz</i> .	452
		<i>Severus</i> Antiochenus.	127. 129. 130. 151
		Venit in <i>Aegyptum</i> .	133
		De eo Nestorianorum Traditio.	135
		Ejus mors.	138
		<i>Simon</i> P. A. XLII.	179
		Scribit ad Antiochenos.	180
		Veneno petrus nihil mali sustinet.	ibid.
		Mortuum fuisse.	185
		<i>Simonis</i> .	324. 330. 373. 388. 414. 578
		Impugnata & prohibita.	101. 579. 581
		<i>Sinenis</i> porcellana.	131
		<i>Sophimus</i> Patr. Hierosolymitanus Ortho-	
		doxus.	289
		<i>Sors</i> Ecclesiastica ad eligendum Patriar-	
		cham.	409. 514. 568
		Quomodo fieret.	410
		<i>Spolia</i> Episcoporum à Sanctis occupata.	
		412.	

I N D E X.

<i>Symbolum Arshanagi.</i>	97	<i>Talensdarum Vizirorum Aegypti succello.</i>	
<i>Symon Stylites.</i>	116	332.	
<i>Synaxaris Aethiopie autoritas nulla.</i>	14.	<i>Triagium cum additione Petri Gnaphei.</i>	139
16-25.		V.	
<i>Synodus Episcoporum Aegyptiorum sex-</i>			
<i>ginta quatuor.</i>	183		
<i>Alia convocata à Chailé.</i>	321	V <i>Aze filius Reja : ejus opera & histo-</i>	
<i>Alia sub Cyrillo LXVII.</i>	417	EIA.	374
<i>Postulatæ ad judicandum Patriarcham.</i>		<i>Velutalis Aegypti.</i>	354
437.		<i>Venerorum traditio de reliquiis D. Marci</i>	
<i>Synodica litteræ de fide ad Antiochenos.</i>	110.	<i>se transdatis.</i>	393
180-183. 247. 265. 308. 423. 445.		<i>Waller Metropolis Aethiopiz.</i>	458
<i>Dionysii Antiocheni ad Alexandrinos.</i>		<i>Xenela infecta electis ad Patriarchatum.</i>	
497.		378.	
<i>Syrani Jacobitz.</i>	464-579	<i>Vinum factitium ad Lieurgiam.</i>	327

T.

T *Et'ahaimanes* Jacobita Pater Vitz
Monastice apud Aethiopes sub Ben-
iamino vixit. 171

<i>Terra motus ingens.</i>	420
<i>Terræ motus.</i>	413
<i>Theodorus P. A. XLV.</i>	101
<i>Theodorus Calchedonensis Agathonem ca-</i>	
<i>lumniarum.</i>	175
<i>Theodosius P. A. L.</i>	50
<i>Ecclesiam ædificat.</i>	ibid.
<i>Theophrastus P. A. LX.</i>	345
<i>Theophrastus P. A. XXXIII.</i>	102
<i>De illius initium fabulæ.</i>	104
<i>Tria 2.</i>	108
<i>De ejus iniciis cum Joanne Chryso-</i>	
<i>stomo silent Orientales.</i>	107
<i>Ut de Cyclo Paschali.</i>	ibid.
<i>Ecclesiæ edificat.</i>	344
<i>Theriodontis Christianorum clades.</i>	514
<i>Timotheus P. A. XXII.</i>	101
<i>Timotheus P. A. XXVI.</i>	102
<i>Timotheus P. A. XXXII.</i>	103
<i>Tymotheus.</i>	445

 γ

V	<i>Az</i> filius Reja : ejus opera & histo- ria.	374.
	<i>Velligalia</i> Ægypti.	384.
	<i>Veneranda</i> traditio de reliquiis D. Marci sc translati.	393.
	<i>Viter</i> Metropoliis Æthiopiæ.	438.
	<i>Vincula</i> injecta electis ad Patriarchatum.	
	172.	
	<i>Vinum</i> factitium ad Lieurgium.	1297.
	<i>Vivificum</i> vox addita in Confessione de Eu- charistia	514.
	<i>Uxorata</i> à Patriarchatu repulsa.	177. 178.

Y.

Youb, five Job pater Salabeddini. 116
 Callidum ejus confilium. 117
Tugabus P. A. LII 177
 Componit res Æthiopiz & Nubiz. 136
 Episcopos in Penrapolin, Cyrenem, &c. 137
 mittit.

Z.

Z *Zacharias* Rex Nubie altare portatile
petit à Parr. Alex. 281. 286
Zacharias P. A. LXIV. 316
Ejus in fide confiantia. 392
Obitus. 401
Zacharias Rex Nubie. 227. 287
Filius Georgium in Egyptum mittit. 287
Zagae familia Regum Aethiopie. 75 754
Zeno Imperator scribit Henoticon. 132. 137
Quod fuscipiet à Joanne. 128
Zena Christianorum nota. 293. 390. 426.
410. 540.

A P P R O B A T I O.

D^e mandato Illustriſſimi Galliarum Cancellarii perſcriptum cui titulus eſt, *Hiſtoriam Patriarchatus Alexan^{dr}inae ſacraſantam ad D. Marco ſolito ad hunc ſ. uſum* *X. l. c.* Quod opus ut pereculum, nec ad cognoscendum ſedem Eccleſie Alexan^{dr}inae hiſtoriam, verum etiam ad plures reconditionis doctrinae partes perutile, ita magno reipublice literariae bono, publica luce donandum cenſeo. Datum Lutetiae Paſiſſimo, die 6. *Q. Octobris* anno 1713. F R A G U I T.

P R I V I L E G E D U R O Y.

L O U I S par la grace de Dieu Roy de France & de Navarre : A tous ceux qui ces presentes Lettres verront, Salut. Le Sieur **EUSEBE RENAUDOT**, Prêtre de Froidlay & de Chalteauffort, l'un des Quarante de l'Académie Française, Nous a fait remontrier, qu'il a composé plusieurs Ouvrages tirez des Auteurs Orientaux, qui pourroient estre utiles au Public, pour esclaircir divers points de la Religion Catholique, & pour en faire voir la conformité avec l'Eglise d'Occident; Que la plupart de ces Ouvrages sont de présent en estat d'estre imprimez, & qu'il travaille actuellement à d'autres Ouvrages sur de semblables matieres, pour l'impression desquels il Nous a fait supplier de luy accorder nos Lettres de Privilege. A CES CAUSES, voulant favorablement traiter ledit sieur Renaudot, Nous luy avons permis & accordé, permettons & accordons par ces Presentes, de faire imprimer par tel Libraire ou Imprimeur qu'il voudra choisir, les Livres qu'il a composez, soit en Latin ou en François, avec des Notes ou Commentaires, & intitulez *Perpetuus de la Foy de l'Eglise Catholique touchant l'Enchiridion, le neuvième & cinquiesme; Dissertationes varia de Fide. Moribus & Institutis Ecclesiarum Orientalium; Synopsis Historie Patriarcharum Alexandrinorum à Divo Marco ad annum millesimum ducentiesimum quinquagesimum; Synopsis Historie Patriarcharum Ecclesie Nestoriana ad annum millesimum trecentiesimum; Liturgia Copistarum ex Copticis & Arabicis exemplaribus Latine versa cum Commentariis; Liturgia Syrorum Latine versa cum Commentariis; Tractatus de Ecclesia Ethiopica; Officia varia Sacramenta Copistarum; Syntagma de Latine conversa cum Notis; Dispositio Patriarche Hierosolymitani Enchiridion Græco-Latinum; Alia Græcorum Opuscula Latine versa; Histoire de Saladin Sultan d'Egypte & de Syrie, tirée d'Auteurs Orientaux; Voyage ancien fait à la Chine par deux Mahometans, traduits sur un Manuscrit Arabe avec des Notes; & tels autres Ouvrages qu'il a composez ou qu'il composera ou traduira dans la suite, avec des Notes & Commentaires, soit en Latin, en François, ou autre langue; & ce conjointement ou séparément en telle forme, marge, caractères, & autant de fois que bon luy semblera, & de les faire vendre & debiter par tout nostre Royaume pendant le temps de quinze années consécutives, à compter du jour & date de nos presentes Lettres Patentes seulement. Faisons défenses à toutes personnes de quelque qualité & condition qu'elles puissent estre, d'en introduire d'impression estrangere dans aucun lieu de nostre obéissance, & à tous Imprimeurs, d'imprimer, faire imprimer, mesme sur des copies imprimées ou manuscrites, vendre, faire vendre ou debiter, ny contrefaire en aucune maniere, en tout ny en partie, sans la permission expresse & par escript dudit Expsant, ou de ceux qui auront droit de luy, à peine de confiscation des Exemplaires contrefaits & de trois mille livres d'amende contre chacun des contrevenans, applicable un tiers à Nous, un tiers à l'Hôtel-Dieu de Paris, & l'autre tiers audit Expsant & de tous despens, dommages & interêts; à la charge que ces Presentes seront enregistrees tout au long dans trois mois de leur date sur le Registre de la Communauté des Imprimeurs & Libraires de Paris; que l'impression dudit Livre sera faite dans nostre Royaume, & non ailleurs, en bon papier & en beaux caractères, conformément aux Reglemens de la Librairie, & qu'il en sera mis deux exemplaires dans nostre Bibliothèque publique, un dans celle de nostre Chasteau du Louvre, & un dans celle de nostre amy & feal Chevalier Chancelier de France le Sieur **MELLYER** Comte de Pontchartrain, Commandeur de nos Ordres, le tout à peine de nullité des Presentes; du contenu desquelles vous mandons & enjoignons de faire joindre l'Exposant & ses ayans cause, pleinement & paisiblement, sans souffrir qu'il leur soit fait aucun trouble ny empeschement. Voulons que la copie des Presentes qui se-a imprimée au commencement ou à la fin desdits Ouvrages, soit tenue pour dûement signifiée, & qu'aux copies collationnées par l'un de nos amez & feaux Conseillers Secretaires, soy soit adjointe comme à l'Original. Commandons au premier nostre*

Huissier ou Sergent de faire pour l'exécution des Presentes tous Actes requis & necessaires, sans demander autre permission, & nonobstant clameur de Haro, Charte Normande, & Lettres à ce contraires: Car tel est nostre plaisir. DONNE' à Versailles le dernier jour de May l'an de grace mil sept cent onze, & de nostre Regne le soixante-neuvième. Par le Roy en son Conseil, CHAFFUZAU, avec paraphe, & scellé du grand Secau de cire jaune.

Registré sur le Registre N°. 3. de la Communauté des Libraires & Imprimeurs de Paris, page 171. N°. 187. conformément aux Reglements, & notamment à l'Arrest du 13. Aoust 1703. A Paris le 7. Juin 1711. Signé, P. DE LAUNAY Syndic.

Ledit Sieur Abbé Renaudet a cédé à François Fournier Libraire à Paris, le Privilege pour l'impression du Livre intitulé, *Historia Patriarcharum Alexandrinorum*, &c. suivant l'accord fait entre'eux,

